


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

**Tí Nuevo Testamento cuènte Inchéni Jesucristo C'óna
Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	47
SAN LUCAS	77
SAN JUAN	125
LOS HECHOS	161
ROMANOS	202
1 CORINTIOS	219
2 CORINTIOS	236
GALATAS	247
EFESIOS	253
FILIPENSES	259
COLOSENSES	263
1 TESALONICENSES	267
2 TESALONICENSES	271
1 TIMOTEO	273
2 TIMOTEO	278
TITO	282
FILEMÓN	284
HEBREOS	285
SANTIAGO	298
1 PEDRO	302
2 PEDRO	307
1 JUAN	310
2 JUAN	314
3 JUAN	315
SAN JUDAS	316
APOCALIPSIS	318

Tí tan jína chrónka ch'in Mateo

Tí sín k'uaxrjenixin ch'in Jesús

(Lc. 3.23-38)

¹ Tíhi mé chrónka nkexro kaín tí sín k'uaxrjenixin ch'in Jesucristo. Mé jehe ch'an k'uaxrjenixin ch'an tí ch'in David la ko tí ch'in Abraham. ² Ch'in Abraham mé it'é tí ch'in Isaac la ko ch'in Isaac mé it'é tí ch'in Jacob la jehe ch'an mé it'é tí ch'in Judá la ko kaín kichó ch'an. ³ Ch'in Judá mé it'é tí ch'in Fares la ko ch'in Zara la tí iné sín mé it'in Tamar. Ch'in Fares mé it'é tí ch'in Esrom la jehe ch'an mé it'é tí ch'in Aram. ⁴ Ch'in Aram mé it'é tí ch'in Aminadab la jehe mé it'é tí ch'in Naasón la jehe mé it'é tí ch'in Salmón. ⁵ Ch'in Salmón mé it'é tí ch'in Booz la iné mé tjan Rahab. Ch'in Booz mé it'é tí ch'in Obed la iné tí ch'in Obed mé tjan Rut. Tí ch'in Obed mé it'é tí ch'in Isaí. ⁶ Ch'in Isaí mé it'é tí rey David la jehe ch'an la ko tí tjan k'uéchjién ch'in Uriás mé táha it'é la ko iné tí ch'in Salomón.

⁷ Ch'in Salomón mé it'é tí ch'in Roboam la jehe mé it'é tí ch'in Abías la jehe ch'an mé it'é tí ch'in Asa. ⁸ Ch'in Asa mé it'é tí ch'in Josafat la ch'in Josafat mé it'é tí ch'in Joram la ch'in Joram mé it'é tí ch'in Uzías. ⁹ Ch'in Uzías mé it'é tí ch'in Jotam la ch'in Jotam mé it'é tí ch'in Acáz la ch'in Acáz mé it'é tí ch'in Ezequías. ¹⁰ Ezequías mé it'é tí ch'in Manasés la ch'in Manasés mé it'é tí ch'in Amón la ch'in Amón mé it'é tí ch'in Josías. ¹¹ Ch'in Josías mé it'é tí ch'in Jeconías la ko kichó ch'an. Tí sín a mé k'uéjó sín tí yaon a ntá xrínghya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixín sákjuí sín mé ch'in Jeconías mé it'é tí ch'in Salatiel la ch'in Salatiel mé it'é tí ch'in Zorobabel. ¹³ Ch'in Zorobabel mé it'é tí ch'in Abiud la ch'in Abiud mé it'é tí ch'in Eliaquim la ko ch'in Eliaquim mé it'é tí ch'in Azor. ¹⁴ Ch'in Azor mé it'é tí ch'in Sadoc la ko ch'in Sadoc mé it'é tí ch'in Aquim la ko ch'in Aquim mé it'é tí ch'in Eliud. ¹⁵ Ch'in Eliud mé it'é tí ch'in Eleazar la ch'in Eleazar mé it'é tí ch'in Matán la ch'in Matán mé it'é tí ch'in Jacob. ¹⁶ Ch'in Jacob mé it'é tí ch'in José la ch'in José mé k'óna xií tjan María la jehe tjan María mé iné tí ch'in Jesús. Tí ch'in Jesús la mé nchek'in sín Cristo.

¹⁷ Mé xikaha catorce t'áchrji k'uaxrjenixin tí ch'in Abraham ntá kjuák'e ch'in David la í jnko catorce t'áchrji k'uaxrjenixin tí ch'in David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjó la ntá kokjihi Cristo.

Kokjihi Jesucristo

(Lc. 2.1-7)

¹⁸ Tí kokjihi Jesucristo mé xikihí kónhen. Tí tjan María iné ch'an mé tsotéhe tjan ch'in José. A ntá naḡa kuákjahya kichó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. ¹⁹ Ch'in José mé tí nkexro ts'óna xií tjan María, mé ijnko chojni jína la tjinkakonhya ch'an noxín chrók'óxroan ch'an tjan ntá kjuenkayáxin ch'an imó chrókjuákehe ch'an tjan kixin tjinkaon ch'an kixin ninkexró tsonohya. ²⁰ Ntá tí naḡa tjenkayáxin ch'an kixin xikaha sich'e ch'an ntá kotáchrini ch'an chrónkaxín titàya k'uúkuén ch'an ikui ijnko ángel kuente Ìnchéni nixja, chrónka kixin:

—José jaha mé k'uaxrjenixian David. Tóxakuanhya la ko chrakonhya chrókjuákjá tjan María ts'óna ichjián kixin tí xjan tsochónta tjan la kjuachaxin kuente Nchakuen Dios ikui mé k'óna tí xjan a. ²¹ Sinchekokjihi tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjin ijé chojni —mé xikaha chrónka tí ch'in ángel.

²² Kaín tíha kónhen kixin tsoxiteyá tí nkehe chrónka Ìnchéni k'uéniixja tí sín k'uéchrónka itén ch'an ósé. Mé ntáchro xikihí:

²³ Ijnko tjan naḡa chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'an Emanuel,*

la tíha t'axrjexín kixin Dios tjejókoni. Mé xikaha chrónka itén Dios.

²⁴ Ntá k'uàya ch'in José ntá kjuínchexiteyá ch'an tí nkehe k'uetoan tí ángel kuente Ìnchéni la kuákja ch'an tjan María ts'óna ichjién ch'an. ²⁵ A ntá kjónté xikaha la naḡa kójnkojiéhya sín tí naḡa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuútsjehe sín xjan

¹ Tí kokjiexín ch'in Jesús tí chjasin Belén estado Judea la tí yaon a kjuák'e ijnko ch'in rey it'in Herodes mé k'uetoenhen ch'an tí nación a. A ntá xrínghya iso chojni ntoa kjuáxin ijnko

* 1:23 Isaías 7.14

chjasin nó tjtjoxin yaon mé kjuíji sín chjasin Jerusalén. Jehé sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjen tí xjan tsikokíhi ts'óna tí rey ts'etuenhen tí sín judío? K'uíkonxínni tí konotsé kuénte ch'án nó tjtjoxin yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetjoan kixin sírxakoa kaín tí sín nchat'á t'etjoan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. ⁵ Ntá jehé sín kjuátehe sín kixin:

—Tsokjéxín xjan chjasin Belén estado Judea mé xikaha tsikjin tí sín tsíchronka itén Dios. Ntáchro xikíhi:

⁶ Jaha chjasin Belén nonte Judá, jaha la jehya ijnko chjasin imá ntsí; kixin tí nonte ts'axrxjén tí nkexro antsí t'etjoan,

la jehé ch'án ts'ayakonhen tí chjasin kuéntana mé chjasin Israel.*

Mé xikaha nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhi ch'án sín nkesá kjuankíxín k'uíkon sín tí konotsé. ⁸ Ntá chrónka sín ntá tuénxín k'uetjoan ch'án kixin sátsji sín chjasin Belén la ntáchro ch'án kixin:

—Sátjirá ntíha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntíha tsotjahá xjan kjuasáya —mé xikaha k'uetjoan ch'ín Herodes.

⁹ Ntá kuínhin tí sín mago tí nkehe k'uetjoan tí ch'ín rey ntá sákjuí sín la xík'íkon sín tí konotsé inaá la kjuítaón va ntíja la ntá chréhe sín hasta kjuák'e va chritaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uixenhen sín tí nchia la k'uíkon sín tí xjan kjuák'eko tí tjan María iné xjan. Ntá k'uejóxín toch'in sín la chjéhe sín kjuasáya ntá kuakitjéhe sín tí nkehe kjuíkajo sín la kjuanjón sín chica oro la ko ihntí tsochéxín chjincjo la ko xrojan xraxé náxrxjón. ¹² Ntá chr'éxín kotáchríen sín chrónkaxín kixin chrókjanhya sín tí tjen ch'ín Herodes. Méxra kjanxín sín í jnko ntíja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixín sákjuí tí sín mago la ntá kotáchríen ch'ín José chrónkaxín titáya k'uíkon ch'án ijnko ángel kuénte Ìnchéni chrónka kixin:

—T'iyá sátsjikoa xjan la ko iné xjan la sátsjirá chjasin Egipto la ntahó ts'ejorá hasta tsoxrxjankajia, kixin tí ch'ín Herodes xritjeyá tí xjan chrók'óyan ch'án xjan —mé xikaha chrónka tí ángel.

¹⁴ Ntá ch'ín José k'uáya la ntá sákjuíko ch'án xjan la ko iné xjan la sákjuí sín chjasin Egipto tí tie a. ¹⁵ Ntahó k'uejó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchronka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyahá ch'án”.†

Ch'ín Herodes mé k'uetjoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetjoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan náxa chóntahya iyó nánó. Mé xikaha k'uetjoan ch'án kixin ó xraxínkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsikjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tiha mé tí tjan Raquel la tsjánkamá tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

¹⁹ Ntá tió kjuixín k'uén ch'ín Herodes ntá ijnko ángel kuénte Ìnchéni mé k'uíkonxín ch'ín José kotáchríen ch'án tí kjuák'e ch'án chjasin Egipto mé ntáchro kixin:

²⁰ —T'iyá sátsjikoa tí xjan la ko tí iné xjan la tsokjan chjasin Israel kixin ó kjuixín k'uén tí nkexro chrók'óyan tí xjan a —mé xikaha k'uetjoan tí ch'ín ángel.

²¹ Ntá ch'ín José mé k'uáya ch'án la sákjuíko ch'án tí xjan la ko tí iné xjan la sákjuí sín chjasin Israel. ²² A ntá kuínhin ch'ín José kixin ch'ín Arquelao xjeen ch'ín Herodes mé k'uetjoan ch'án tí estado Judea la ntá chrakon ch'án la sáchrókjuíhya ch'án ntíha. A ntá kotáchríen ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntíha ntá sákjuí sín ijnko chjasin it'ín Nazaret la ntaha k'uejó sín. Mé xikaha xiteyá tí nkehe tsíchronka tí sín k'uénixja itén Dios senó. K'uéntáchro sín kixin jehé ch'án mé tsíkítexín sín nazareno.

* 2:6 Miqueas 5.2 † 2:15 Oseas 11.1 ‡ 2:18 Jeremías 31.15

3

Juan el Bautista mé kjuák'e ch'án nteje

(Mr. 1.1-8; Lc. 3.1-9, 15-17; Jn. 1.19-28)

¹ A ntá tí yaon a kjuák'e ch'in Juan Bautista nteje Judea la kjuako ch'án. ² Ntáchro ch'án kixin:

—Títoghérá ijjará la tjínkírá tí nkehe tjenkayáxinrá kixin í séhya itsi kjuachaxién Dios.

³ Tí ch'in Isaías, mé ijnko ch'in tsíchronka itén Dios, mé tsíkjin ch'án kuente tí ch'in Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Inchéni.

Takitjehérá ijnko ntja ntoí.”*

⁴ Tí iké ch'in Juan mé tsik'óna kaxree kocamello la ko tí nkehe chr'ínkat'óxin ch'án mé tsik'óna tjoa. A ntá tí nkehe kjóna ch'án mé kochjoá la ko itsjen kotsjenta tónoxin nteje. ⁵ Itsjé chojni kuixin sín chjasin Jerusalén la ko í so chjasin siin estado Judea la ko chjinaxón tí ntario Jordán kixin tsinhin sín nkexrí tjechrónka ch'án. ⁶ Ntá chrónka sín ijje sín ntá ch'in Juan kjuikiteixin ch'án sín tí ntario Jordán.

⁷ Ntá xrinahya k'uikon ch'in Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsik'axrjenixínrá konche. Xhá nkexro kjuintanohará kixin chrókuinkéhérá tí kjuaninkaon kuente Dios ó tsi? ⁸ T'ichjánxin kixin chrók'uejorá jnkojina chrókuákoxinrá kixin chaxin kjuitoxinhinrá tí nkehe tjenkayáxinrá. ⁹ Jahará nchehnkerá ntáchrórá kixin k'uaxrjenixínrá ch'in Abraham. Janhan ntáxrjan kixin kjónté tí xro í la Dios tsjacha chrókjuich'éna ch'án chojni k'uaxrjenixin ch'in Abraham. ¹⁰ Tí chica hacha ó tjechónhen tsochrinjinxin tí nta. A ntá káin xín nta t'ónahya to jina mé tsochrinjin kixin tsoche. ¹¹ Janhan mé intá tükiteixin chojni kixin tsjakoxin sín kixin ó kjuitoxinhin sín ntjé sín. A ntá tí nkexro itsi chr'éxin mé tsíkitexinrá tí Nchakuen Dios la ko xrohi. Antsí tjetóxin t'etqan ch'án a ntá janhan la kánhyó. Méxra chrókósuána sáchrókjuikian tokaté ch'án. ¹² Jehé ch'án la ó tjexraá ch'án pala sinchetjuáxin ch'án noatrigó kixin tí ntáchijji trigo la ókjé ts'ejo ch'án a ntá tí noatrigó la tsjenájin ch'án la ts'enkachijina ch'án. A ntá tí ntáchijji trigo la tsjakaxin ch'án ijnko xrohi ts'ankahya jnkochrín —mé xikaha kjuako ch'in Juan.

Kuikite ch'in Jesús

(Mr. 1.9-11; Lc. 3.21-22)

¹³ Ntá ch'in Jesús kjuixin ch'án nó estado Galilea ikui ch'án tí ntario Jordán tí tjen ch'in Juan kixin ch'in Juan tsíkite tí jehé ch'án. ¹⁴ A ntá tí saoxin chrohya ch'in Juan chrókuikite tí ch'in Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'in Juan.

¹⁵ Ntá kjuátehe ch'in Jesús kixin:

—A ntá jie la títóhé tí xikaha tjenkayáxin kixin t'ichjánxin tsikiteni kixin sinchexiteyáni tí nkehe k'uetqan Dios.

Ntá ch'in Juan kuitekaon ch'án la xikaha kjuich'e ch'án. ¹⁶ Ntá tió kuikite tí ch'in Jesús la ntá xrinahya titàya xitjehe nkajní la k'uikon ch'án tí Nchakuen Dios, éxi kontóá tsjehe, k'uinkajinxin nkaya nkajní ntá kjuák'e chrítaón kja ch'in Jesús. ¹⁷ Ntá xrinahya kuínhin sín ijnko tan kuixin nkaya nkajní ntáchro kixin:

—Tíhi mé xjanna la imá tjuahá ch'án la imá chàna kixin nchexiteyàna ch'án.

4

Ch'in Tsochren chrókuachroe ch'in Jesús

(Mr. 1.12-13; Lc. 4.1-3)

¹ Ntá tí Nchakuen Dios mé sákjuiko ch'in Jesús tí nteje a ntá ch'in Tsochren tjinkaon chrókuachroe ch'in Jesús. ² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³ Ntá ch'in Tsochren mé kóchjinehe tí ch'in Jesús kixin tjinkaon chrókuachaxin ch'án. Ntáchro ch'án kixin:

—Tí chaxin jaha Xjeen Dios la ntáche tí xro í kixin chrók'óna niotja.

⁴ Ntá kjuátehe ch'in Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Káin tí tán nixja Dios tjejóchónxin chojni” —ichro ch'án.

⁵ Ntá ch'in Tsochren mé sákjuiko ch'in Jesús tí chjasin tjóá mé chjasin Jerusalén, la sákjuiko ch'án tí chrítaón tí kja njnko a ⁶ la ntáchro ch'án kixin:

* 3:3 Isaías 40.3

* 4:4 Deuteronomio 8.3

—Tí chaxín Xjeen Dios jaha la títqohé t'anótjenxian tí noi ntíhi kíxín ntáchro xroon itén Dios kíxín:

Dios mé ts'etuenhen tí sín ángel kuènte ch'án kíxín ts'ayakonhan sín.

Tsotsé sín itjá

kíxín tsotéhya totá ts'itja xroq tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kíxín:

—Náhi. Kjaxin ntáchro xroon itén Dios kíxín: “Chjinihya chrókjuásixián kjuaxroan kjuachaxin kuènte Ìnchéni Dios”‡ —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jnā imá noi ntá kjuako tí Jínahya kain xín tí nación siín chjasintajni la ko tí nkehe t'etqan kuènte. ⁹ La ntáchro ch'ín Tsochren kíxín:

—Kain tíha mé tsotjaha tí tsjak'éxian tóch'ian tsjikosáyana tí janhan —mé xíkaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kíxín:

—Sátjia Satanás kíxín xroon itén Dios ntáchro kíxín: “Chrókjuikosáyehé Ìnchéni Dios la jehó ch'án chrókjuich'ehé xra”§ —ichro ch'ín Jesús.

¹¹ A ntá ch'ín Tsochren mé kuitqhe tí ch'ín Jesús la iso tí sín ángel ikui tsjinkitsa tí jehé ch'án.

Ch'ín Jesús kjuankíxín ch'án tí xra kuènte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kíxín tí ch'ín Juan mé tjechjina ch'án ntqechiso a, a ntá jehé ch'án mé sákjuí ch'án estado Galilea. ¹³ Kuitqehya ch'án chjasin Nazaret ntíha. Náhi. Sákjuí ch'án chjasin Capernaum la kjuák'e ch'án ntíha. Tí chjasin a mé tjen chrínta ntayaon chjino estado Zabolón la ko estado Neftalí. ¹⁴ Mé xíkaha kjuich'e ch'án kíxín tsoxiteyá tí nkehe tsíkjin ch'ín Isaías, ijnko nkexro k'u'échrónka itén Dios. Ntáchro ch'án kíxín:

¹⁵ Tí estado Zabolón la ko Neftalí tí ntja

chrínta ntayaon la tí nó chók'á tjitoxin yaon tí ntario Jordán,

mé tí estado Galilea tí tjejó tí sín jehya judío.

¹⁶ Mé ntíha tjejó tí sín siín tí sitié mé ts'ikon sín ijnko xrohi jie,

la tí sín éxi tsík'en xritjejó sín

mé ts'inkaséyanxín ts'ejó sín.

¹⁷ Ntá kjuankixín kjuako ch'ín Jesús ntáchro ch'án kíxín:

—Tjitóxínhinrá ntjará. Tsákjára ijnko ntja nixín kíxín kjuachaxin kuènte Dios tjen nkaya nkajni la í séhya tsi.

Ch'ín Jesús k'uýehe noó chojni k'uétsé koche

(Mr. 1.16-20; Lc. 5.1-11)

¹⁸ Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí ntá. ¹⁹ Ntá ch'ín Jesús nixjehe sín ntáchro ch'án kíxín:

—Chrehérá tí janhan ntá tsotjहारá xra tsjéyará chojni.

²⁰ Ntá tuénxín kuitqhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcq la tjejótjenite sín tí nchísén tséya sín koche. Ntá kjaxin tí sín a k'uýehe ch'ín Jesús. ²² La ntá tuénxín kuitqhe sín tí ntabárcq la ko tí it'é sín ntá sákjuichréhe sín tí ch'ín Jesús.

Kjuakohe ch'ín Jesús nchónhya chojni

(Lc. 6.17-19)

²³ Ntá sákjuí ch'ín Jesús nkuixín tí estado Galilea la kjuakoqxín ch'án tí nñnko Israel siín jnkojnko chjasin mé kjuako ch'án tí tan jina chrónka nkexrí tí kjuachaxin kuènte Dios la ko kjuínchekitqhe ch'án jina kain chojni chónka kain xín chín la ko kain kjuatjoté. ²⁴ Ntá kain xín tí sín tjejó tí estado Siria mé kuínhin sín kuènte Jesús la kjuíkao sín kain xín tí sín níhi chónka kain chín la ko tí sín imá tjetéhe sín la ko tí sín chónka nchakuen tí jínahya la ko tí sín t'aniáte sín la ko tí sín sixénká toté sín, la ntá ch'ín Jesús mé kjuínchekitqhe ch'án sín jina. ²⁵ Ntá itsjé chojni kjuichréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntario Jordán.

† 4:6 Salmo 91.11-12

‡ 4:7 Deuteronomio 6.16

§ 4:10 Deuteronomio 6.13

5

Kjuakoxin ch'in Jesús ijnko jna

¹ K'uikon ch'in Jesús kixin k'uejó nchónhya chojni la ntá chrin ch'an ijnko jna la ntaha kjuák'etjaxin ch'an. Ntá tí sín k'uájiko ch'an a mé kóchjina sín chjinaxón tjejóntaxin sín tí tjen ch'an. ² Ntá ch'in Jesús kjuankixin kjuakqhe ch'an sín kixin:

Tí nkexro tjejó náxrjón

(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuente Dios kixin ntá jehe sín mé tsochóna sín tí kjuachaxin kuente Dios.

⁴ Náxrjón tjejó tí sín t'ává kixin Dios mé sinchechéhe asén sín.

⁵ Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

⁶ Náxrjón tjejó tí sín éxi yóhe chrók'uexin sín kjinta la chrók'uexin sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

⁷ Náxrjón tjejó tí sín tikonóhehe kichó sín kixin ntá Dios kjaxin tsjikonóhehe tí jehe sín.

⁸ Náxrjón tjejó tí sín kótjóá asén kixin ntá jehe sín sátsjik'ikon sín Dios.

⁹ Náxrjón tjejó tí sín tjinkaon kjuaxroxin kixin Dios sinchek'in ch'an xjeen ch'an tí jehe sín.

¹⁰ Náxrjón tjejó tí sín kjónté tjejótxasótexin sín kixin kjuinchexiteyéhe sín Dios kixin ntá jehe sín mé kuente sín nkaya nkajni.

¹¹ Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan. ¹² Chrókócháhará la ko kjuaxroxin chrók'uejorá kixin ntá chr'éxin jahará ts'ayéhérá ijnko nkehe antsí má jina nkaya nkajni. Mé xikaha kjuasóte tí sín k'uejó óse k'uechrónka sín tí itén Dios.

Jahará la éxi yóhe xjnta la ko éxi xrohi t'inkaséyanxin chjasintajni

(Mr. 9.50; Lc. 14.34-35)

¹³ Jahará mé yóhe éxi xjnta chjasintajni. A ntá tí chrók'uánkéhe tí jni tí xjnta la ntá xitjahya chrókójni inaá. Ninkehó chrókjuich'ehya xra la chrók'uikitíj ntója la ko chrókuinkátja chojni.

¹⁴ A ntá jahará la mé tí xrohi t'inkaséyanxin chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jina tsjak'e ch'an xrohi noi kixin ntá ts'inkaséyanxin kaín nkexro siín tí nchia ntíha. ¹⁶ Mé xikaha tí jahará chrókóyóhará éxi tí xrohi t'inkaséyanxin kixin ts'ikon kaín chojni tí xra jina tjejoch'erá la ntá chrókjuanchehe sín kjuasáyé It'eni tjen nkaya nkajni.

Kjuako ch'in Jesús kuente tí ley

¹⁷ Jahará chróntáchrohýará kixin k'uinka kixin tsjakjían tí ley tsík'etqan ch'in Moisés la ko tí nkehe kjuako tí sín k'uechrónka itén Dios. Náhi. Jehya xikaha k'uinka kixin tsjakjían tíha. Náhi. K'uinka janhan kixin tsjakoxian nkehe chaxin t'axrxéxin tíha. ¹⁸ Chaxin xrxanka kixin tí naxa tjen nkajni la ko chjasintajni la kohya ninkehó ley tsjínhya, mé tsjínhya níjnko punto la níjnko letra kuente tí ley tsjixinjian tsoxiteyá kaín tí nkehe t'ichjánxin tsoxiteyá. ¹⁹ Mé xikaha tí nkexro tsitekakonhya tí nkehe k'uetqan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsí tí kjuachaxin kuente Dios. A ntá tí nkexro tsitekaon la ko tsjakqhe ókjé nkexro tsitekaon sín, mé antsí imá ts'etqan sín tí tsi kjuachaxin kuente Dios. ²⁰ Méxra tjonkará kixin t'ichjánxin kixin antsí jina ts'ejorá la tsoyóahýará tí sín tjako ley la ko tí sín fariseo kixin tí tsoyóhará sín la ntá xitjahya tsákjára tí kjuachaxin kuente Dios tjen nkaya nkajni.

Kjuako ch'in Jesús kuente tí kjuanínkaon

(Lc. 12.57-59)

²¹ Jahará tsíkinhínra kixin tí sín óse tsík'ítuennen sín kixin: "T'oyánhýará kichuára* kixin tí nkexro t'oyán kichó mé t'ichjánxin tsjasóte sín." ²² A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etqan mé sinchekítqexin ijé ch'an. La ntá tí nkexro tsontáche kichó kixin tsixénká ch'an la tíha mé sátsji tsjasótéxin tí siín xrohi. ²³ A ntá tí tsjikuehérá Dios nkehe tsochjehérá ch'an ntá tsjasánra tí altar ntá tsoxráxinkáonra tí jnkojín kichuára kjuánjonkoará sín ²⁴ la ntá tí xikaha la tjtóhérá tí nkehe tí altar la sátsjirá tsonixjehérá ch'an jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjínkáonra tsjánjonrá.

²⁵ Tí siín jnkojín nkexro tjanchia jie tí jahará la tjinkaon chrókjuikoará ch'an juzgado, a ntá íchá jina jnkokóá chrókjuenkayáxinra, jehe ch'an la ko jahará, ntía ó, kixin ntá sáchrókjuihýará tí tjen ch'in juez. Kixin sáchrókjuirá tí tjen ch'an ntá jehe ch'an ts'etuenhen ch'an tí policia

* 5:21 Éxodo 20.13; Deuteronomio 5.17

kixin ts'ixenhenrá ntogechiso. ²⁶ A ntá chaxín tjonkará kixin tí ts'ikjahará sín ntogechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókuasinhya sín jie, chróchóntahya sín chojni chjin ókjé

²⁷ Jahará tsikinhínrá tí nkehe tsik'ítuenhen tí sín ósé ntáchro kixin: "Chrókuásinhyará jie, chróchóntahyará chojni chjin ókjé."[†] ²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

²⁹ A ntá tí ikuan chjina chrókuásixián jie la chrókuakitsjenkiá ikuan la chróchr'an ikjín kixin íchá jina ts'ítjáyán it'o cuerpo kuéntá kixin jehya kuénté cuerpo kuéntá sátsji tsjasotéxín tí síin xrohi. ³⁰ A ntá tí itja chjina chrókuásixián jie la chróchóchrínjian tí tjá a la chróchr'an ikjín kixin íchá jina ts'ítjáyán it'o cuerpo kuéntá kixin jehya kuénté cuerpo sáchrókjui tsjasóte tí síin xrohi.

Ch'in Jesús kjuako kixin chrók'uitjéhya kichó sín

(Mt. 19.9; Mr. 10.11-12; Lc. 16.18)

³¹ Kjaxin tsik'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'ítjéxin kichó sín.[‡] ³² A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuitohe ch'án tjan kixin tsjasin tjan jie. A ntá tí nkexro tsotehe ijnko tjan tsíkítsinke la kjaxin ó kjuasin ch'án jie.

Ch'in Jesús kjuako kixin chjiníhya chrók'uákjenxinni ihnié Dios

³³ Kjaxin tsikinhínrá tsik'ítuenhen tí sín ósé kixin: "T'ichjánxin sinchexiteyará tí nkehe tsintáchorá kixin chrók'uákjenxinhyará ihnié Inchéni chjini."[§] ³⁴ A ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajni kixin ntaha tjan Dios t'etóan. ³⁵ La ko chrók'uákjenxinhyará chjasintajni kixin ntaha tjejókjen toté ch'án la ko chrók'uákjenxinhyará chjasin Jerusalén kixin ntiha la itjen tí Rey t'etóan. ³⁶ La tjenkayáxixínhyará ikjárá ó kixin jahará xitjahya tsjakérá ijnko kaxihi tjóá ó nijnko kaxihi tié. ³⁷ Tí nkehe tsontáchorá chaxin la chaxin la tí nkehe náhi la náhi la koha nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

Ch'in Jesús tjako ch'án kuénte tí sín t'ítjáyenhya ichrén kjuanínkaon

(Lc. 6.29-30)

³⁸ Jahará mé ó tsikinhínrá tsik'ítuenhen tí sín ósé kixin tí takitsjenki sín ikonrá la kjaxinrá chrókuakitsjenkirá ikon sín. A ntá tí chrókuakitsjenki sín nënorá la kjaxinrá chrókuakitsjenkirá neno sín kjaxin.^{*} ³⁹ A ntá janhan mé tjonkará kixin tí jnkojin nkexro ichrén nkehe jínahya sit'ahará la jahará ch'ehyará xikaha. Náhi. Tí chjéhe ijnko nkexro ijnko tuagan la ntá tjóka tí í jnko nàno tuagan. ⁴⁰ La tí síin jnkojin nkexro tjanchia jie la tjinkaon sín chrókuakitsjaha sín camisá la tjtóhé sín sátsjiko sín tí ka t'ínkayate kjaxin. ⁴¹ La tí t'etuanhanrá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojin nkexro tsjanchia nkehe la tí tjinkaon ch'án nkehe la chróntáchrohyará kixin "náhi", chrókjuinchejjenrá ch'án.

Tjuèhérá tí sín nínkakonhanrá sín

(Lc. 6.27-28, 32-36)

⁴³ Kjaxin ó tsikinhínrá tsik'ítuenhen tí sín ósé kixin: "Tjuèhérá tí nkexro choxinrá la tsóninkákonhénrá tí sín jínahya kjuít'ahará."[†] ⁴⁴ A ntá janhan mé tjonkará kixin chrójtjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jina chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xikaha sích'erá la ntá jahará chaxin xjeen It'eni tjan nkaya nkajni kixin jehe ch'án mé t'etóan ch'án tsjitoñ yaon ts'inkaséyehenhen tí sín jínahya la ko tí sín jina la ko kjaxin t'etóan ch'án kixin ts'aniá ichrin tí síin tí sín jina la ko tí sín jínahya. ⁴⁶ Tí jehó tjuèhérá tí nkexro tjuèhará, ¿la ntá nkehe chrókjuachará? A ntá kjaxin tí sín nchekjénki la xikaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxin imá jina tíha ní? Kixin tí xikaha la kjaxin tí sín chónhya Dios la xikaha ich'e sín. ⁴⁸ Kjaxinrá jahará ntoá chrók'uejorá kixin It'eni tjan nkaya nkajni la antsí má ntoá tjan ch'án.

6

Kjuako ch'in Jesús kuénté tí xrajína

¹ Chrókuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xikaha chrókjuich'erá ntá It'eni tjan nkaya nkajni la ninkehó nkehe

† 5:27 Éxodo 20.14; Deuteronomio 23.21 ‡ 5:31 Deuteronomio 24.1-4 § 5:33 Números 30.2; Deuteronomio 23.21

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

tsotjáhyará ch'án. ² Tí tjínkĩtsará ijnko chojni nõa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan káxin mé xikaha ch'e sín t'óxroan sín nkaxenhen njnko la ko tí ntja káxin chrók'uikon chojni la chrókjuikosáyehe sín tí jehe sín káxin jına tjejóch'e sín. A ntá janhan ntáxrjan káxin ó kjuixin k'uáyéhe sín nkehe la í ts'áyéhya sín inaá. ³ A ntá tí jahará tió chrókjuínkĩtsará ijnko chojni chaxín nõa la íchá jına káxin chrókónoehya ninkexró kjónté ijnko nkexro tjuá jına. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'éní ts'íkon ch'án káxin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

*Tjako ch'ín Jesús nkexrí tsonixjeheni Dios
(Lc. 11.2-4)*

⁵ A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen njnko la ko ts'ejó sín esquina calle kuénte ntain káxin ts'íkon kaín chojni káxin tjejónixjehé sín Dios. Ntá janhan chaxín ntáxrjan káxin jehe sín la xikaha kjuich'e sín la ó kjuixin k'uáyéhe sín nkehe la í ts'áyéhya sín inaá. ⁶ A ntá tió nixjehérá Dios la t'ixenhénrá nchia ntógará la t'íkjhérá tí puerta la nixjehérá It'éní káxin ntaha tjeoárá ch'án. A ntá jehe ch'án ts'íkon káxin xikaha ninkexró ts'íkonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjateehya chrónixjará káxin chrókóyóahyará éxí tí sín chónhya Dios káxin jehe sín tjenkayáxin sín káxin nchónhya tsonixja sín, la mé xikaha mé chrókuihin Dios, ichro sín. ⁸ A ntá jahará chrókóyóahyará éxí tí jehe sín. It'éní ó nohe ch'án nkehe t'ichjánxinhanrá kjónté naxá tjanchéhyará ch'án. ⁹ Méxra xikíhi chróntáchrórá: It'éní tjen nkaya nkajní jaha imá tjóá.

¹⁰ Chrókui tí kjuachaxin kuénta.

Chrókjuich'e tí nkehe tóxrjínhan jaha ntíhi chjasintajni éxí tjech'e nkaya nkajní.

¹¹ Ijie la tsjánjuan tí ntójtja t'ichjánxinhinini.

¹² T'oxíka tí nkehe jínahya kjuich'eni káxin kjaxin jeheni ts'itjáyenhenni tí nkehe kjuich'eheni chojni.

¹³ Tjtoéhyani káxin xrahya chrókjuasinni jie. Nchekaáni kaín tí jínahya chrókónhenni, káxin jaha mé kuéntá tí kjuachaxin káxin ó noheni káxin jaha tjetétoan tí kjuachaxin jnkochríxin. Amén.

¹⁴ Tí jahará ts'itjáyanhanrá tí nkexro kjuasinhánrá ichrén jie la mé kjaxin It'éní tjen nkaya nkajní mé ts'íkon ch'án káxin xikaha kjuich'erá la ntá kjaxin jehe ch'án ts'óxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'éní tjen nkaya nkajní ts'íkon káxin xikaha kjuich'erá k'uitjáyanhyará la ntá kjaxin jehe ch'án la ts'óxíkahya ch'án tí jie chontará.

Ch'ín Jesús kjuako káxin chrók'óxroanhya sín káxin kjónehya sín

¹⁶ A ntá tí jahará tí naxá kjóntehyará káxin tjínkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxin sín. Mé xikaha ch'e sín káxin tjínkaon sín ts'íkon chojni káxin naxá kjónehya sín. Tí xikaha ch'e sín la janhan ntáxrjan káxin ó kjuixin k'uáyéhe sín nkehe la í ts'áyéhya sín inaá. ¹⁷ A ntá tí jahará kjónté naxá kjóntehyará káxin tjínkáonrá tsonixjehérá Dios la t'ontirá ikonrá la tjétoará kjará ¹⁸ káxin tsonoehya chojni káxin naxá kjóntehyará. Jehó It'éní tjeoará ntíhi mé jehe ch'án nohe ch'án xikaha ntá tsjanjon ch'án nkehe ts'ayéhérá.

*Tí nkehe chaxín tjeje siín nkaya nkajní
(Lc. 12.33-34)*

¹⁹ Jahará chrókjuásitonhyará nkehe tjeje ntíhi chjasintajni káxin ntíhi la ts'ín kué tí nkehe tjeje sinchek'itjáyanhanrá va la ko tsóchjisen tí chichaon la ko xíchee ts'ixenhen tsaáhará.

²⁰ Íchá jına tjásitonrá tí nkehe tjeje nkaya nkajní káxin ntaha kohya iko sinchek'itjáyan nkehe la tsóchjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsóchontará nkehe tjeje la ntá tí nkehe tjenkayáxinrá la kjaxin ntaha tjen.

*Tí xrohi t'inkaséyanxín cuerpo
(Lc. 11.34-36)*

²² Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jına ikonrá la ntá kjaxin kuénté tí cuerpo kuéntará mé chónxa xrohi. ²³ A ntá tí ikonrá la jínahya la ntá kuénté tí cuerpo kuéntará la sítíe tjen. A ntá tí chrókjuak'ehya tí xrohi la ntá antsí má chrókjuinchetié tí sítíe.

*Dios la ko tí chichaon
(Lc. 16.13)*

²⁴ 'Kohya ninkexró tsjacha sich'ehe xṛa yaá lamó. Tí xikaha chrókjuich'e ch'án la ntá ijnko tsonínkakohen ch'án la tí í jnko tsotjuèhe ch'án o ijnko la tsitekakohen ch'án la tí í jnko la tsitekakuenhya ch'án. Méxṛa xitjahya chrókjuich'ehe chojni xṛa Dios tí tjinkaon sín chróchónta sín itsjé chichaon.

*Dios mé t'áyakonhen tí xjeen ch'án
(Lc. 12.22-31)*

²⁵ 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya ántsi má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya ántsi má sínkí tí cuerpo kuéntará, a ntá kánhyó sínkí tí ka chrók'uítsará? ²⁶ Xráxinkáonrá nkexrí siín tí koxroxé xritjaka. Jehe va la t'enkahya va noa la ko tjáhya va la ko chóntahya va nketi ts'inkachjínayá va tí noa, la kjánchó It'éni tjen nkaya nkajní la tjanjon ch'án nkehe sine va. A ntá jahará mé ántsi tjeotan a ntá tí koxroxé la kénhyó. ²⁷ ¿Á tjejó jnkojínrá tjenkayáxinrá kixin tí chrókóxakonhanrá imá a ntá naṛa chrók'uankirá it'ó metro ntetoxinrá inaá?

²⁸ '¿Nkekuénté kixin imá tóxakonhanrá ikará ó? Tsjehérá nkexrí sit'ánkí tí catsjo siín nteje. Tí itsjo la ní ch'ehea xṛa la ko tjonhya. ²⁹ La tjonkará kixin kjónté ch'in rey Salomón k'uéchónta itsjé chichaon la naṛa kjuíncheyóehya ch'án nkexrí náxjrón tsjehe tí tsjo a. ³⁰ A ntá tí Dios la nchek'itsa tí ka yoa siín nteje kjónté ijie síchón ka la ntóye tsochexín tí nkaxenhen tja, a ntá jahará mé ántsi chrókjuintak'itsará ch'án. ¿A ntá nkekuénté titekákonhyará ch'án? ³¹ Méxṛa xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uítsará. ³² Kain tí nkehe la tí sín chónhya Dios mé tóxakonhen sín tíha. A ntá jahará chontará It'éni tjen nkaya nkajní la mé nohe ch'án kain nkehe t'ichjánxinhanrá. ³³ A ntá senó mé chrókjuéyará tí kjuachaxin kuénté Dios la chrókjuínchexiteyará tí nkehe jina tjinkaon ch'án, a ntá jehe ch'án mé tsjanjon ch'án kain nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjíakó kjuaxíkaon kuénte.

7

*Chrók'uantaxíenhyará kichuárá
(Lc. 6.37-38, 41-42)*

¹ 'Chrókuékahará ókjé chojni jje kixin ntá Dios kjaxin chrókjuanchahya jje tí jahará. ² A ntá Dios la tsjanchia ch'án jje tí jahará tí tsékará ókjé chojni jje. A ntá tí xikaha sich'erá la mé xikaha tsonhanrá kjaxin. ³ ¿A ntá nkekuénte tsjehé tí chjínínó ntsí tjenkánkí ikon tí kichuá tí naṛa ántosán tí inta jje tjenkánkí ikuan? ⁴ A ntá tí chonta jaha tí nta jje tjenkánkí ikuan, ¿a ntá nkexrí kixin chróntáche tí kichuá kixin: "Títóhé tsakitsjenkíni tí chjínínó ntsí tjenkánkí tí kuan?" ⁵ A ntá jaha la ntoáhya tjenkayáxian. Senó chrókuakitsjenkiá tí nta jje tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

⁶ 'Chróchjeéhyará tí nkehe tsikótjótá tí konja kixin jehe va tsokjan va tsonínkakohenhá va ntá sinchekuenrá va. La ko kjaxin chróchjeéhyará tí cochino tí xro perla tjeje kixin tsinkátja va la tsokuen.

*Tjanchia la tjéyá la t'inka puerta
(Lc. 11.9-13; 6.31)*

⁷ 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyéhe tí nkehe la tí nkexro tjeýá nkehe la ts'itja la tí nkexro t'inka puerta la tsoxitjehe.

⁹ '¿Á tjejó jnkojín nkexro ntíhi chrókjuanjon xro chrókjóné xjeen tí chrókjuanchia xjan niótja? Kja náhi. ¹⁰ O tí chrókjuanchia xjan ijnko koche la, ¿a chrókjéhe ch'án tí xjeen ch'án konche chrókjóné ní? Kja náhi. ¹¹ A ntá jahará kjónté jínahará la ó nohará nkehe jina chjehérá xjaanrá. A ntá It'éni tjen nkaya nkajní kjaxin ántsi tsochjéhe ch'án nkehe jina tí nkexro tsjanchia nkehe.

¹² 'Méxṛa xikaha chrókjuikosáyehérá kichuárá éxí yóhe nkexrí tjinkáonrá chrókjuikosáyahará sín mé xikaha k'uetóan ch'in Moisés la ko xikaha ntáchro tí xroon kuénte tí sín k'uéchrónka itén Dios ósé.

*Tí puerta tekahya
(Lc. 13.24)*

¹³ 'T'ixeenxínrá tí puerta tekahya. Kixin tí puerta la ko tí ntja ts'itjáyaxín chojni la imá iton la ko teka la nchónhya chojni sátsji tí ntja ntíha. ¹⁴ A ntá tí puerta la ko tí ntja sátsjixinni tí kjuachón la tekahya ntíha la ko tsjéhya chojni ts'itja tí ntja a.

Tí to mé tjátsəŋxínni tí nta
(Lc. 6.43-44)

¹⁵ Méxra tóxakonhanrá tí ts'ikonrá itsi tí sín ch'ia tsontácho sín kixin kjaxin sín nixja sín itén Dios. Jehé sín la chrítaón ó tjoé kolélo ó, a ntá nkaya la kolobo jjehe. ¹⁶ Jahará la chrókjuátsəŋxínní tí jehé sín kixin tí xra ch'e sín kixin tí ntach'i la xitjahya chrók'óna to uva la ko tí kach'i xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xíkaha chrókjuátsəŋxínní jahará tí sín jehya jína kixin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní
(Lc. 13.25-27)

²¹ Kénhya chojni tsontácho: “Ínchéni, Ínchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínhin T'aná t'etəŋ tjen nkaya nkajní. ²² Tsjixraká tí yaon a la ntá itsjé sín tsontácho sín kixin: “Ínchéni, Ínchéni, k'uénixjaxínni ihnjá la ko tí ihnjá mé kuakitsjexínni nchakuen tí jínahya la ko kjuachaxién ihnjá kjuasixínni nchónhya kjuaxroan.” ²³ A ntá janhan tsjatahə kixin: “Janhan la chonhya tí jahará. Tjəŋará sájtjirá kixin jahará imá jínahyará.”

Ch'ín Jesús kjuíncheyóexin ch'án kixin yaá nchia
(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehé ch'án mé éxi yóhe ijnko nkexro chóna kjuaxrexinkaon jína la kjuích'éna nchia chrítaón tjo. ²⁵ A ntá xrinahya xrakoa chrin, ikui yéé ntəninche la tjian chjéhe xrintə la kjónté xíkaha la xíkaha tí nchia kixin itjo tjekjen nchia. ²⁶ A ntá tí nkexro tinhin tí xrxanka la titekakonhya mé jehé la éxi yóhe ijnko nkexro lonji la kjuích'éna ch'án ijnko nchia tí siin nchesen. ²⁷ La ntá xrinahya xrakoa chrin ntá antsí kóyéé ntəninche tí tsaka la ko chjéhe xrintə la ntá xíka tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kixin nkexrí kjuako ch'án. ²⁹ Kixin kjuako ch'án éxi ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekitəhe jína ijnko chojni chóna chin lepra
(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jnə la chréhe nchónhya chojni. ² La ntá kóchjina ijnko ch'ín níhi chóna chin lepra la kjuák'exín toch'in ch'án nkayakon ch'ín Jesús la ntácho ch'án kixin:

—Ínchéni tí tjínkəvan la jína chrókjuínchekitəhéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntácho ch'án kixin:

—Méxra xíkaha tjínkəvan. Ntá jie sjntakitəha jína.

A ntá tuénxín kuitəhe ch'án jína la ó kjuíin tí chin k'uéchóna ch'án.

⁴ La ntá ntácho ch'ín Jesús kixin:

—Nínkexró chenkahya ntihi. Jehó sájtja tjákohe tí ch'ín nchat'á kixin kuitəha jína la ko sájtjioa tí nkehe tsík'etəŋ ch'ín Moisés* kixin ntá xíkaha tsoŋoxín kain xín chojni kixin ó kuitəha jína —mé xíkaha k'uəŋəŋ ch'ín Jesús.

Ch'ín Jesús kjuínchekitəhe jína ijnko nkexro ch'ehe xra ijnko capitán romano
(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xrinahya kóchjina ijnko capitán romano la chrónə ch'án ⁶ ntácho ch'án kixin:

—Ínchéni ntəŋeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjetéhe ch'án —ichro ch'án.

⁷ A ntá ch'ín Jesús kjuátəhe ch'án ntácho ch'án kixin:

—¿Á sátsjia sjntakitəha jína tí ch'ín a? —ichro ch'án.

⁸ Ntá tí ch'ín capitán kjuátəhe kixin:

—Náhi, Ínchéni, tósuəhəni kixin chrók'uixenhen ntəŋeni kixin jehya chojni jínani. Jehó chrókjuánjuan kjuachaxin kuəntá, ntá tí ch'ín ch'ehe ni xra chrókuitəhe ch'án jína. ⁹ Janhan na kjaxin chonta chojni t'etəŋna la ko kjaxin janhan tətəŋhan tí sín soldado. Tió tətəŋhan ijnko sín sátsji sín la ntá ó sátsji sín. La kjaxin tí tətəŋhan ijnko sín kixin xrakoa

* 8:4 Levítico 14.1-32

sín la mé tji sín. La ko tió tétuanhan ijnko nkexro ch'ena xra kixin sich'e xra la ich'e xra —ichro ch'an.

¹⁰ Ntá kuínhin ch'in Jesús ntá kóxakonhen ch'an kixin xikaha chro tí ch'in a, ntá nixjehe ch'an tí sín chréhe ch'an ntá chro ch'an kixin:

—Chaxín ntáxrxjan kixin kuénté tí nació Israel la k'uitjahya janhan ninkexró tinkáchónki xikaha éxi tinkáchónki tí ch'in i. ¹¹ Janhan xrxjanka kixin nchónhya chojni ókéjé tjiixin tí tjióxin yaon la ko tí tjiátóxin yaon la sineko sín tí ch'in Abraham la ko Isaac la ko Jacob tí tjen tí kjuachaxin kuénte Dios. ¹² A ntá itsjé tí sín chrók'uejéjé tí tjen tí kjuachaxin kuénte Dios la ts'axrxjén sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'in Jesús mé nixjehe ch'an tí ch'in capitán ntá chro ch'an kixin:

—Sátjia ntóq. Éxi kuítekávan jaha la tsoxiteyá tsonhen tíha —ichro ch'an.

La ntá tí ch'in ch'e xra la o tuénxín tí hora a tsíkitohe ch'an jina.

Ch'in Jesús kjuínchekitohe ich'ee ch'in Pedro jina

(Mr. 1.29-31; Lc. 4.38-39)

¹⁴ A ntá sákjuí ch'in Jesús tí ntóq ch'in Pedro la ntaha k'uúkon ch'an kixin tí ich'ee ch'in Pedro la níhi tjan tjetsínka tjan la chóna tjan sóa. ¹⁵ Ntá itsé ch'an itja tjan la ntá kjuínhin tjan tí sóa la ntá k'uúkatjen tjan la kjuankixin yaxínhin tjan kixin tsjanjon tjan nkehe sine sín.

Ch'in Jesús kjuínchekitohe nchónhya tí sín níhi jina

(Mr. 1.32-34; Lc. 4.40-41)

¹⁶ La ntá tí ó kóntanone ntá kjuikohe sín ch'in Jesús nchónhya chojni chóna nchakuen tí jínahya. La ntá jnkokoá nixja ch'an la k'uaxrxjén tí nchakuen tí jínahya tí jehe sín la kjaxin kjuínchekitohe ch'an jina káin tí sinníhi. ¹⁷ Mé xikaha kjuích'e ch'an kixin tsoxiteyá tí nkehe tsichrónka tí ch'in Isaias tí ch'in k'uéchrónka itén Dios. Mé ntá chro ch'an xikihi: "Jehe ch'an kuákja ch'an tí chin chónani la ko jehe ch'an kuámá ch'an tí kjuatjoté."[†] Mé xikaha ichro itén Dios.

Tí sín tjinkaon tsochréhe tí ch'in Jesús

(Lc. 9.57-62)

¹⁸ Tió k'uúkon ch'in Jesús kixin nchónhya chojni k'uántatjen sín ch'an la ntá k'uetóan ch'an kixin ts'átóye sín í jnko chrínta ntá. ¹⁹ La ntá ijnko tí sín maestro tjako tí ley mé kóchjinehe ch'an tí ch'in Jesús la ntá chro ch'an kixin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'in a.

²⁰ La ntá kjuátehe ch'in Jesús ntá chro ch'an kixin:

—Tí koxróntá chóna va itjuéjé va la ko tí koxroxé chóna va káké va. A ntá tí Xjeen Dios K'óna Chojni mé chónahya nketí ts'ok'éxin ch'an.

²¹ A ntá ijnko tí chojni k'uájiko ch'an, mé ntá chro ch'an kixin:

—Ínchéni, tjióhéni senó sátsjikjaváni it'éni —ichro ch'an.

²² La ntá kjuátehe ch'in Jesús ntá chro ch'an kixin:

—Náhi, chréhe tí janhan. Tjióhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'in Jesús.

Ch'in Jesús kjuínchek'ixrata tí xrinto la ko tí ntá

(Mr. 4.35-41; Lc. 8.22-25)

²³ Ntá ch'in Jesús k'uúxnenhen tí ntabárcó la k'uúxenko ch'an tí sín k'uájiko ch'an. ²⁴ La ntá xrinahya imá síchrica ntá la ó chjina sítika ntá tí ntabárcó. La kjánchó ch'in Jesús la tjejua ch'an. ²⁵ La ntá tí sín k'uájiko ch'an kjuínchek'áya sín ch'an la ntá chro sín kixin:

—Ínchéni nchekaáni kixin tí ntabárcó la ó meró ts'aniánkí ntá —ichro sín.

²⁶ Ntá kjuátehe ch'an ntá chro ch'an kixin:

—¿Nkeuénté kixin imá chrakonrá? Intsíkoá tinkachónkirá Dios —ichro ch'an.

Kjuixin ntá chro ch'an xikaha ntá k'uáya ch'an la k'uetuénhen ch'an tí xrinto la ko tí ntá yaon la ntá tuénxín k'uúxrata. ²⁷ La ntá imá chrakon sín la ntá chro sín kixin:

—¿Xá nkexro tíhi? Kjónté xrinto la ko ntá yaon la mé nchexiteyéhe ch'an —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátóye ch'in Jesús tí ntá yaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrxjén tóye chojni tsík'en la kóchjinehe sín ch'an. Jehe sín mé imá jjehe sín la kohya ninkexró tjacha ts'atsínka tí ntá ntiha. ²⁹ La ntá kjuankixin k'óyako sín ntá chro sín kixin:

—Tjiátéhya jaha tí jeheni jaha Jesús mé Xjeen Dios. ¿Á k'uúinka ntihi kixin sijnchekjasóteni kjónte naxá kjuixrakáhya tí yaon tsjasóteni? —ichro sín.

[†] 8:17 Isaias 53.4

³⁰ A ntá ntiha kánhyó kjin síin itsjé cochíno xrine va. ³¹ La ntá tí nchakuen tí jínahya mé chrónógehé tí ch'in Jesús kixin:

—Tí tsétoan kixin sátsjini la chrókuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'in Jesús kixin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá káin xín tí cochíno kuínká va, k'uínkajinxín va ntiha kjuítsínkayá va tsaka, ntá kjuítsínkankí va nta, kjuínhin va nta.

³³ La ntá tí chojni t'ayakonhen tí cochíno mé chrakon sín ntá kuínká sín sákjuí sín chjasin la kjuankixin chrónka sín káin tí nkehe kónhen la ko káin nkehe kónhen tí sín k'uéchénta tí nchakuen tí jínahya. ³⁴ A ntá káin tí sín chjasin ntiha sákjuítsjehe sín ntá kjují sín tí tjen ch'in Jesús ntá k'uikon sín kixin xikaha tsíkónhen la chrónógehé sín ch'án kixin sáchrókjui ch'án ókjé.

9

Ch'in Jesús kjuínchekitqhe jina ijnko chojni tsik'en tote

(Mr. 2.1-12; Lc. 5.17-26)

¹ La ntá kjuixin tíha ntá ch'in Jesús mé k'uixenhen ch'án ijnko ntabárcq la k'uátsínka ch'án í jnko lado chrínta nta la kjují ch'án chjasén ch'án. ² A ntá ntiha kuíkao sín ijnko ch'in tsík'en toté la tjetsínkaták'á ijnko kania. Ntá k'uikon ch'in Jesús kixin chaxín tínkáchónki sín ch'án la ntá nixjehé ch'án tí sijníhi ntáchro ch'án kixin:

—Xjeenni nechehéé asán. Tí jie chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'in í mé ncheyóhe ch'án asén ch'án Dios kixin xikaha nixja ch'án.

⁴ Ntá ch'in Jesús mé ó nohe ch'án kixin nkehe tí kjo sín asén sín ntá ntáchro ch'án kixin:

—¿Nkeuénté kixin xikaha jínahya tjenkayáxinrá? ⁵ ¿Nkehe antsí xrahya chróntátjan ch'án?

¿Á antsí xrahya chróntátjan ch'án kixin ó kjuixin kjuínhin ch'án tí jie yámá ch'án o á antsí xrahya chróntátjan ch'án kixin chrók'uínkatjen ch'án sáchrókjui ch'án? ⁶ Méxra tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjínhin ijje chojni.

Ntá ntáche ch'án tí sijníhi a kixin:

—Jie la t'ínkatjen tjatsíyan kaniáa na sátsjia ntqa —ichro ch'án.

⁷ Ntá tí ch'in tsík'en toté na tuénxín k'uínkatjen ch'án la sakjuí ch'án ntqo ch'án. ⁸ Ntá káin tí sín síin ntiha k'uikon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuákoqxín ch'án kjuachaxin kuénte Dios.

Ch'in Jesús k'uúygehé ch'án tí ch'in Mateo

(Mr. 2.13-17; Lc. 5.27-32)

⁹ A ntá ch'in Jesús sákjuíxín ch'án ntiha la k'uikon ch'án ijnko ch'in it'in Mateo tjetjaxín ch'án ntiha nchekjènkí ch'án. Ntá ntáchro ch'in Jesús kixin:

—Chréhé tí janhan —ichro ch'án.

Ntá ch'in Mateo tuénxín k'uínkatjen ch'án chréhé ch'án tí ch'in Jesús.

¹⁰ A ntá chr'éxín ch'in Jesús kjuák'e ch'án ntqo tí ch'in Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chóna jie mé kjují sín la kjaxín kjóneko sín tí ch'in Jesús la ko tí sín k'uúajiko ch'án. ¹¹ La ntá tí sín fariseo kjaxín k'uikon sín xikaha la kjuanchankíhi sín tí sín k'uúajiko ch'in Jesús, ntáchro sín kixin:

—¿Nkeuénté kixin tí ch'in maestro kuéntará mé neko ch'án tí sín nchekjènkí la ko tí í so sín chóna jie? —ichro sín.

¹² Ntá ch'in Jesús la kuínhin ch'án nkehe tí tjo sín la ntáchro ch'án kixin:

—Tí sín niehya la t'ichjánxíjenhya sín nkexro sich'e xroan. Náhí. Jehó tí chojni níhi mé t'ichjánxínhin sín nkexro sich'ehe sín xroan. ¹³ Sátjirá la ts'itjará nkexri t'axrjexín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókujikonógehérá chojni la tjínkakonhya kixin chrók'oyánrá iko chrókuánjonrá.”* Mé xikaha ichro itén Dios. Janhan na k'uínkahya ntihi kixin chrók'uúyahá chojni jina tjejó. Náhí. K'uínka kixin ts'iyahá tí chojni chóna jie kixin chrókuítqhe sín tí ijje sín ntá chrókjuínkí sín tí tjenkayáxin sín —ichro ch'án.

Kjuanchankí sín kuénte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'in Juan Bautista mé kóchjinehe sín ch'in Jesús la kjuanchankíhi sín ch'án, ntáchro sín kixin:

* 9:13 Oseas 6.6

—Jeheni la ko tí sín fariseo la jnkoyaxon nehyani, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsik'íyehé sín tsochjina tsoṭehe ijnko chojni kixin naṣa tjen tí ch'ín tsikótehe tjejóko sín ntiha? A ntá tsjixraká ijnko yaon tsotsé sín tí ch'ín tsikótehe sátsjiko sín ch'án ntá kaín tí sín tsikóchjina mé ts'ává sín la í sinehya sín.

¹⁶ Nijnko chojni chrókjuak'eniēhe tí ka ó ntaxin it'ò ka nixin kixin ntá chrókjuixéhe tí ka nixin chrók'uitjān tí ka ntaxin ntá antsí má chrók'uichje. ¹⁷ La ko kjaxin éxi yóhe chrókuiqiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje tí tjuaxran ntaxin. Ntá chrók'uitjāyan tí xran la ko chrok'uitjāyan tí tjuaxran. Ntá tí xranvino nixin chrókuiquia ijnko tjuaxran nixin la ntá xikaha la yóí nkehe chrók'uitjāyanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jina ijnko tjan kuákoxin iké ch'án

(Mr. 5.21-43; Lc. 8.40-56)

¹⁸ Ntá naṣa tjenixja ch'ín Jesús la ntá ikjui ijnko ch'ín t'etōan kuènte tí sín judío la kjuák'exin toh'ín ch'án nkayakon tí ch'ín Jesús la chrónoēhe ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuiko ch'án tí ch'ín a la ko sákjuikotoxin ch'án tí sín k'uájiko ch'án. ²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákoxin tjan tí iké ch'án ²¹ kixin tjenkayáxin tjan kixin kjónté chrínta iké ch'án ó chrókuákoxin tjan, la táhó chrókuitōexin tjan jina. ²² Ntá nkátjía ch'ín Jesús la k'uikon ch'án tí tjan a ntá ntáchro ch'án kixin:

—Xjeenni, nchechéhé aśán jaha. Jaha la ó kuítōha jina kixin kuítekávān tí janhan —ichro ch'án.

Na ntá tuénxín ó kuítōhe tjan jina.

²³ Ntá tió kjuíji ch'ín Jesús ntepe tí ch'ín judío t'etōan la k'uikon ch'án kixin ó yaxinhin tí sín músico kixin ó sátsjixravá xjan. La kaín tí chojni tsikójnkotsé la tsjánkamā sín xjan. ²⁴ La ntá ntáchro ch'ín Jesús kixin:

—Tí xjan méhe tjtōhéra, kixin tsik'enhya xjan, la tjejua xjan ó —ichro ch'án.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuénté chjasin ntiha la kuínhin sín kixin xikaha kónhen.

Ch'ín Jesús kjuínchekitohe jina yaá sín t'ikonhya

²⁷ Ntá sákjuixin ch'ín Jesús ntiha la ntá yaá chojni t'ikonhya kjuichréhe tí jehe ch'án la k'uíyehé sín ch'án ntáchro sín kixin:

—Tikonóhéni jaha tsik'axrjeníxian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekávān kixin tsjácha sjt'a xikaha? —mé xikaha kjuanchankí ch'án.

Ntá kjuátehe sín kixin:

—Jeén, Inchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekávān la tsoxitéyá —mé xikaha ichro ch'án.

³⁰ La ntá tuénxín ó jina t'ikon sín. Ntá ch'ín Jesús k'uetuenhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jina ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósin ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxín nixja ch'án. Ntá kaín chojni la k'uikon sín la ntáchro sín kixin:

—Nunca t'ikonhyéni ijnko kjuaxroan xikaha kuénté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuikonóēhe ch'án chojni

³⁵ Ntá k'uaúsínka ch'ín Jesús itsjé chjasin jié la ko chjasin ntsí la kjuakoxin ch'án jnkoinko njnko Israel. Chrónka ch'án tí tan jina nkexrí tjen tí kjuachaxin kuènte Dios. La ntá

kjuínchekitøhe ch'án jína chojni níhi chóntha kaín xín chin la ko chojni chóntha kjuatjøté.
³⁶ K'uikon ch'án kixin nchónhya chojni k'uéjío sín ntá kuikonøøhe ch'án sín kixin imá tóxakonhen sín la k'uéjío sín éxí kolélo chónthaha nkexro t'ayakonhen. ³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsik'óna, kjánchó chojni sich'e xra mé tsjéhya.

³⁸ Chrókuanchehérá tí Ínché tí nonte kixin chróchr'án ch'án itsjé chojni chrókuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitøhe sín jína kaín chojni chóntha kaín chin la ko kaín xín kjuatjøté.

² Na mé tí teyó sín k'uájiko ch'án mé it'ín sín xikihi: saoxín mé ch'ín Simón na mé kjaxin it'ín ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'ín ch'án Tadeo. ⁴ La ko kjaxin ch'ín Simón, mé kuente tí sín cananista, la ko kjaxin ch'ín Judas Iscariote, mé tí nkexro chr'èxin kjuínchejki tí ch'ín Jesús.

Ch'ín Jesús k'uetuenhen tí teyó sín kixin sátsjikako sín kjuachaxin kuente Dios

(Mr. 6.7-13; Lc. 9.1-6)

⁵ Ntá k'uetuenhen ch'ín Jesús tí teyó sín kixin sátsji sín la k'uetøan ch'án kixin:

—Tjihyará tí tjejó tí sín jehya judío la ko t'ixepnyará tí chjasin siín estado Samaria. ⁶ Náhi.

Íchá jína sátsjírá tí tjejó tí chojni éxí kolélo kjuichroe kuente nación Israel. ⁷ Sátsjírá tjákoherá sín kixin kjuachaxièn Dios tjen nkaya nkajni la í séhya tsá. ⁸ Sjnchekitøherá jína chojni níhi la ko snchekitøherá jína tí sín chóntha chin lepra la ko snchexechónrá chojni tsik'en la takítsjerá tí nchakuen tí jínahya. Jahará kjaxin kuítønhanrá tí kjuachaxièn Dios, méxra chrókuachahyará jahará kjaxin.

⁹ Chrókuikuahyará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sátsjírá ntja la chrókuikuahyará ka bolsa la chrókuikuahyará yaá ka chrók'uinkayaterá la ko chrókuankahyará tqkatará la ko chrókuikuahyará nta tjixinrá. Tí nkexro ch'e xra la jehí siín kjuachaxin ntiha chrókjone.

¹¹ A ntá tío tsjasánrá ijnko chjasin jié ø ijnko chjasin ntísi la tjéyará ijnko nkexro tsjanjon kjuachaxin la ntøe sín ntahó chrókuitøhará ntá tsjixin tí xra ntá sátsjírá. ¹² A ntá tío t'ixenhenrá ntøe sín la nixjehérá sín tjákoxinrá jnkójina. ¹³ A ntá tí chaxín jína asén sín la ts'áyéhe sín tí kjuaxróxin, a ntá tí náhi la sátsjikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitøhará la tjinkakonhya sín sinhin sín tí nkehe tsochronkará na mé t'axrxéxinrá tí ntøe sín ø tí chjasén sín la t'oxènjinnrá tí inche chóntha toqtará. ¹⁵ A ntá chaxín tjønkará kixin tío tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóntha sín jié la kánhyó tsjasóte sín, a ntá tí sín chjasin a la antísi tsjasóte sín kixin k'uéjío xróxinhya sín tí tan chrókuaáxin sín.

Ókjé sín tsonínkonhen tí sín kuente Cristo

¹⁶ Janhan tsochrohan tí jahará éxí yøhe chróchr'an kolélo ts'ejóyakan kolóbo. Listo chrók'uejorá éxí konche xikaha la chrók'uejorá éxí kontóá chrókójiahyará.

¹⁷ Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etøan la ko nkaxenhen tí nínkoé sín tsjatiaxinnrá sín. ¹⁸ La ntá tsjikaánrá sín tí tjejó tí sín t'etøan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. ¹⁹ A ntá tío sátsjikoará sín tí tjejó tí sín t'etøan la tóxakuanhyará nkehe tsontáchorá ø nkexri tsonixjará kixin tío tsjixraká tí hora la ntá Dios mé tsjinkítsará tsonixjará. ²⁰ Kixin jehya jahará tsonixjará. Náhi. Tí Nchakuen It'èni mé tsochronka nkehe tsonixjará.

²¹ Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkonhen tí it'é kixin its'en. ²² Kaínxin chojni chjasintajni tsonínkonhanrá sín kixin tinkachónkirá tí janhan. A ntá tí nkexro tsitøehya tsinkáchónki sín tí janhan hasta tsjéje chjasintajni mé tsaá. ²³ Tíó má chónkíhará sín ijnko chjasin la ntá sátsjírá í jnko chjasin. La ntá chaxín tsøxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

²⁴ Tí nkexro xrakøhe la kánhyó tjeotoan la tí maestro la antísi tjeotoan, la ko kjaxin tí nkexro ch'e xra la tjeotoanhya la antísi tjeotoan tí lamo. ²⁵ A ntá tí nkexro xrakøhe chrók'uaokøxin ch'án

éxí tí nkexro kjuakohé ch'án la ko tí nkexro ch'e xra chrókjuakoxin ch'án éxí tí lámóé ch'án ch'ehé ch'án xra. Tí ch'ín inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakonhénrá
(Lc. 12.2-9)*

²⁶ Méxra chróchrakuenhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. ²⁷ Tí nkehe tjonkará sitié la t'ichjánxin tsochronkará tíó itsi xrohi t'inkaséyanxin tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín. ²⁸ Chróchrakuenhyará tí sín t'óyan cuérpóé chojni kixin asén chojni xitjahya ts'óyan sín. Íchá jína chróchrakonhénrá tí nkexro tsjacha sinchek'itjáyánxin cuérpóé chojni la ko asén chojni tí xrohi ts'ankahya.

²⁹ ¿Á chrókóxi xinhya yaá koxroxé ntínsí ijno chicháon ntí? A ntá kjónté xikaha la chrók'uanótjenhya nijnko tí jehe va nonte tí chrókjuanjonhya It'eni kjuachaxin. ³⁰ A ntá kjónté tí kaxihí chóna ikjárá la ó nohe ch'án nkekjaín ka chontará. ³¹ A ntá jahará chróchrakonhyará kixin tóyóahyará tí koxroxé kixin antsí sínki tí jahará, a ntá tí koxroxé, kjónté nchónhya va, la kánhyó sínki tíha.

*Tí sín tósuéhya tsochronka sín kixin tinkáchónki sín Cristo nkayakon chojni
(Lc. 12.8-9)*

³² Kaín tí chojni tsochronka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajni. ³³ A ntá tí nkexro sinchemána tsontácho sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajni.

*Jnkokoáhya tsjenkayáxin chojni kixin ó kui Ínchéni Jesús
(Lc. 12.51-53; 14.26-27)*

³⁴ Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. ³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tikintá tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxa kjéhya sín.

³⁷ A ntá tí nkexro antsí tjuéhe it'é sín la ko iné sín la kánhyó tjuéhe tí janhan la mé xitjahya ts'óna sín kuéntana, la ko tí nkexro antsí tjuéhe xjeen sín la kánhyó tjuéha sín la mé xitjahya ts'óna sín kuéntana. ³⁸ La tí nkexro tamáhya ntacruz, chréhya sín tí janhan la mé xitjahya ts'óna sín kuéntana. ³⁹ Tí nkexro tjinkaon kixin kohya nkehe chrókónhen sín mé ts'itjáyán sín, a ntá tí nkexro chrókjuinchek'itjáyánxin asén kixin tinkáchónki sín tí janhan la mé tsáá sín.

*Tí nkexro ts'áyéhe nkehe
(Mr. 9.41)*

⁴⁰ Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nkexro jína. ⁴² A ntá tí nkexro sinchekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

11

*Ch'ín Juan Bautista k'uetjenhen iso sín
(Lc. 7.18-35)*

¹ Ntá ch'ín Jesús kjuixin kjuakohé ch'án tí teyó sín xriko ch'án la ntá sákjuixin ch'án ntiha la sákjuíjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntópechiso ntá xrinahya kuínhin ch'án nkerí xra tjech'e Cristo. La ntá k'uetjenhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús.

³ Ntá sákjuí sín kjuíji sín ntiha ntá kjuanchankíhi sín ch'án ntácho sín kixin:

—¿Á jaha tí nkexro itsi ní o á naxa tsochónhenni í jnko nkexro? —ícho sín.

⁴ A ntá kjuátehe ch'ín Jesús, ntácho ch'án kixin:

—Sátjirá tjechenkará tí ch'ín Juan tí nkehe k'uíkonrá la ko tí nkehe kuínhínrá. ⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóá sín kuitqhe sín jína la ko tí sín k'uékienhya la ó tinhin sín

jje. Kjaxin tí sín tsík'en na ó xechón sín inaá la ko kaín tí sín nòà mé síxraḳoḳe sín tí tan jína tsaáxin sín. ⁶ Méxra imá náxrjón tí nkexro kohya nkehe t'inkákonḡen tinkáchónki tí janhan.

⁷ Tió sákjuí sín ntá ch'in Jesús kjuankíxin nixjeḳe ch'an tí sín k'u'éjó la chrónka ch'an kuènte ch'in Juan ntáchro ch'an kíxin:

—Tí sákjuítsjeḳerá ch'in Juan nteje la, ¿nkexrí k'uikonrá tí jehe ch'an? ¿Á k'uikonrá ch'an éxi ijnko tji nchexrayehe xrxnto? ⁸ Tí náhi, la ¿nkehe k'uikonrá? ¿Á k'uikonrá ch'an éxi ijnko nkexro tsík'itsa jína? Jahará ó nohará kíxin chojni tsík'itsa jína la tjejó sín tí nchia kuènte tí sín rey. ⁹ ¿Á ntá nkehe k'uikonrá? ¿Á ijnko nkexro chrónka itén Dios? Jehe chaxín la antsí chónḡa ch'an kjuachaxin la tí sín k'u'échrónka itén Dios la kánhyó. ¹⁰ Ch'in Juan mé tí nkexro kui éxi xíkaha chrónka xroon itén Dios ósé. Mé ntáchro xíkahi:

Janhan mé tsochr'an ijnko nkexro tsochrónka itan kuèntana tsitónxin ntja, kíxin tsjasiyóxin ch'an ntja kuènta.*

Mé xíkaha chrónka itén Dios. ¹¹ Ntá ijnko nkehe chaxín tsoḡtjonḳará kíxin kaín tí nkexro k'u'éjó senó la kánhyó tjeḡtoan sín la antsí tjeḡtoan tí ch'in Juan Bautista. Kjánchó ijnko nkexro kjónté tjeḡuanhya la tí ts'áyéḳe sín tí kjuachaxién Dios tjen nkaya nkajni la antsí tjeḡtoan sín la ntá jehe ch'in Juan la kénhyó.

¹² Tí ikui ch'in Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajni. La jehó tí sín imá chónḡa kjuachaxin mé tsjacha sín. ¹³ Kaín tí sín profeta la ko tí ley kuènte ch'in Moisés mé chrónka nkexrí tí kjuachaxin kuènte Dios hasta ikui ch'in Juan. ¹⁴ A ntá tí jahará chrókuítekaonrá tíhi; kíxin ch'in Juan la mé ikui kíxin tí xra kuènte ch'in Elías tsjintaxín sich'e ch'an kíxin ch'in Elías la t'ichjánxin chrókui ch'an inaá. ¹⁵ Tí nkexro tjinkaon chrókuinḡin la chrókuinḡin.

¹⁶ ¿Nkexrí chrókuíntayóaxian tí chojni tjejó ijie? Tóyoḳe sín tí chánjan tjejójjaxin sín nḡasin tsítán sín la t'iyehé sín kíchó sín ¹⁷ ntáchro sín kíxin: “K'uánoani flauta kjánchó jahará la teḳyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kíxin tí ikui ch'in Juan la kjónehya ch'an la k'uíhya ch'an vino la jahará ntáchrorá kíxin ijnko nchakuen tí jínahya mé chónḡa ch'an. ¹⁹ A ntá tió kui tí Xjeen Dios K'óna Chojni ntá kjóne ch'an la ko ik'ui ch'an, ntá ntáchrorá kíxin imá itsje kjóne ch'an la imá ik'ui ch'an la ko imá t'ito ch'an tí chojni chónḡa jje la ko tí sín nchekjènki, ichrorá. A ntá tí kjuachaxin kuènte Dios mé tjakoxin tí xjeen ch'an.

Tí chjasin titekakonhya

(Lc. 10.13-15)

²⁰ Ntá ch'in Jesús mé kjuankíxin ch'an ntáche ch'an tí sín tjejó iso tí chjasin imá kjuasíxin ch'an kjuaxroan kíxin kjónté xíkaha la naḡa kuínkáchónkihya sín Dios. ²¹ Ntá ntáchro ch'an kíxin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará ntá tí chrókójehe sín la tjoka chrókuínkáchónki sín Dios la tjoka chrókjuakoxin sín chrók'uinkáya sín ka tié la ko nteso chrókjuinček'ia sín asén sín. ²² Ntá ntáxrjan kíxin tí yaon tsitoxin ijje chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kíxin imá nohará a ntá sátsjirá nkaya nkajni, ichrorá, kjánchó chaxinḡhya. Jahará la tsjasinkajjinxinrá ntíha sátsjirá tsjasótiará tí sín tí sín tsík'en. Tí chrókjuásian tí kjuaxroan tí chjasin Sodoma éxi kjuásian chjasánra la tí chjasin la kjá naḡa chrók'uixin sín naḡa chrók'uitjáyanyhya sín tí yaon ijie kíxin tjoka chrókuítekaon sín. ²⁴ A ntá tjonḳará kíxin tió sinčekitoxin Dios ijje chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjeen janhan la ts'ok'áhará

(Lc. 10.21-22)

²⁵ Ntá tí yaon a ch'in Jesús mé nixjeḳe ch'an It'é ch'an ntáchro ch'an kíxin:

—Tjáncháha kjuasáya It'éni mé Inché nkaya nkajni la ko chjasintajni kíxin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kíxin ts'itja tí sín noehya.

²⁶ Mé xíkaha It'éni jaha kóxrjínhan kíxin xíkaha tsónhen —ichro ch'in Jesús.

²⁷ Ntá ntáchro ch'in Jesús kíxin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'an. Jehó It'é ch'an mé chóxin ch'an la kohya ninkexró chóxin tí It'é ch'an. Jehó tí Xjeen ch'an mé chóxin ch'an la ko tí sín tsíkjejá ch'an tsochóxin sín ch'an. ²⁸ Xrákirá kaín rá tí tjeen janhan tí jahará imá tsíkóxrjérá kjuich'erá xra la yamárá nkehe iye la ntá janhan mé sintak'ok'áhará.

²⁹ Tákjára tí xra kuèntana la ts'itjará kuèntana kíxin janhan mé jina asenná la ntáḡnkehya.

* 11:10 Malaquías 3.1

Ntaha mé ts'itjará ts'ok'èxin asánrá. ³⁰ Tí xrá tsotjahará la xrahya la tí nkehe tsotjahará la yehya.

12

Tí sín k'uajiko ch'in Jesús mé ik'uín sín iso noatrigo ijnko yaon t'ok'éhe tí sín Israel (Mr. 2.23-28; Lc. 6.1-5)

¹ A ntá ijnko yaon la ch'in Jesús k'uaúsinka ch'an ijnko nonte síin noatrigo tí yaon t'ok'éhe tí sín Israel. Na ntá tí sín xriko ch'an mé tsik'en sín kjinta la ntá kjuankixin sín ik'uín sín iso noatrigo a kixin sine sín. ² A ntá iso tí sín fariseo k'uúkon sín kixin xikaha kjuich'e tí sín xriko ch'in Jesús la ntá ntáχρο sín kixin:

—Tsjehe tí sín xriko mé tjeoch'e sín xrá tí yaon t'ok'éheni na mé kohya kjuachaxin tsonhen xrá tí yaon i —ichro sín.

³ Ntá kjuátehe ch'in Jesús kixin:

—Jahará zá kjuínchekuáxinhyará tí xroon chrónka nkehe kjuich'e ch'in David la ko tí sín k'uájiko ch'an tió k'uén sín kjinta? ⁴ A ntá jehe sín mé k'uúxenhén sín tí nchia kuénte Dios la kain sín kjóne sín tí niotja tsikóyaon kuénte Dios kjónté kohya kjuachaxin sine ch'an ní tí sín k'uájiko ch'an. Jehó síin kjuachaxin sine tí sín nchát'á. ⁵ Jahará zá nchekuáxinhyará tí xroon tsikjin ch'in Moisés ntáχρο kixin tí sín nchát'á kuénte njnko mé t'ok'éhya sín tí yaon sábadó la kjónté xikaha la yehya jie tíha? ⁶ Ntáxrjan kixin itjen janhan la antsí má chonta kjuachaxin la ntá tí njnko la kénhyó. ⁷ Jahará la tiénxinhyará nkexrí t'axrxén tí nkehe ntáχρο xroon itén Dios. Mé ntáχρο kixin: “Janhan Dios tjínkavan kixin chrókujkonóehérá chojni la tjínkakhya kixin chrók'oyánrá iko chrókjuánjonrá.”* Tí chrókúéxinrá tíha la ntá chrókóninkákuénhyará tí janhan kixin ninkehó jie chontahya. ⁸ A ntá tí Xjeen Dios K'óna Chojni mé chóna kjuachaxin ts'etqan nkexrí tsonhen tí yaon t'ok'éheni —ichro ch'in Jesús.

Ch'in Jesús kjuínchekitohe jina ijnko chojni tsixámá tja (Mr. 3.1-6; Lc. 6.6-11)

⁹ Ntá ch'in Jesús mé sákjuúxin ch'an ntiha la k'uúxenhén ch'an ijnko njnko Israel. ¹⁰ Mé ntiha itjen ijnko ch'in tsixámá tja. Na ntá tjeóntaxin iso sín fariseo a tjínkaon sín tsjanchia sín jie. La ntá kjuanchankihi sín ch'an kixin:

—Zá síin kjuachaxin sinchekitoheni jina ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'in Jesús ntáχρο ch'an kixin:

—Jnkojín tí jahará chontará ijnko kolélo chrókjuútsínkáya ijnko tòye tí yaon t'ok'éheni zá chrókjuúhyará chrókúakitsjetaónrá va tòye ní? ¹² Kjánchó tí chojni antsí má tjeete síinki a ntá tí kolélo la kénhyó. Méxrá jina sich'eni tí xrá jina kjónté tí yaon t'ok'éheni.

¹³ Méxrá nixjehe ch'an tí ch'in níhi a, ntáχρο ch'an kixin:

—Tjéntoá tjá —ichro ch'an.

A ntá tí ch'in níhi tjá kjuentoá tjá ch'an la ó kjuúxin kuitóhe jina éxí tí í jnko tjá ch'an xikaha. ¹⁴ Ntá tí sín fariseo kónínkaon sín k'uaxrxén sín ntiha sákjuú sín la kjuenkayáxin sín nkexrí ts'óyán sín tí ch'in Jesús.

Itén Dios senó chrónka kuénte ch'in Jesús

¹⁵ A ntá ch'in Jesús mé kónohe ch'an kixin xikaha tjenkayáxin sín la ntá sákjuúxin ch'an ntiha la itsjé sín chréhe sín ch'an. Kjuínchekitohe ch'an jina kain tí sjnníhi ¹⁶ la k'uetqan ch'an kixin tsochrónkahya sín noxín kixin nkexro tí jehe ch'an. ¹⁷ Mé xikaha ó xiteyá tí nkehe chrónka ch'in Isaías, tí nkexro chrónka itén Dios ósé, mé tsintáχρο ch'an xikíhi:

¹⁸ Ntihi tjen tí nkexro ch'ena xrá la janhan mé kjuéyá ch'an, janhan tjuahá ch'an la chána kixin itjen ch'an.

Tsotjahá ch'an tí nchakuenná

la jehe ch'an mé tsochrónka ch'an nkexrí sjntakitoaxián ijje chojni chjasintajni.

¹⁹ Tsonínkakuénhya ch'an chojni la chjíníhya ts'óyako ch'an, la ko kohya nkexro tsinhin itén ch'an tí ntja.

²⁰ Ts'óchjenjinhya ch'an kjónté itji tsíxréya, la ts'ók'ankahya ch'an kjónté ijnko nkehe sínhchikoá.

Jehe ch'an náxa sich'e ch'an xrá tsjixrakájia tí yaon ts'etqan ch'an.

²¹ La kain xín chojni chjasintajni mé tsitekaon sín tí jehe ch'an.† Mé xikaha chrónka itén Dios ósé.

Tí sín fariseo mé ntáχρο sín kixin ch'in Tsochren t'etuenhen asén tí ch'in Jesús (Mr. 3.19-30; Lc. 11.14-23; 12.10)

* 12:7 Oseas 6.6 † 12:21 12.18-21 Isaías 42.1-4

²² Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kixin chóntha ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á Jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóntha ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko kjaxin tí sín jnkokoá chjasin ó tí sín jnkokoá nchia jnkokónhya tjenkayáxin sín la kjaxin xikaha ts'itjáyán sín. ²⁶ A ntá tí chaxín ch'ín Tsochren chrókuakitsjéxín asén ntíhi kjá í chróchóntahya kjuachaxin naxa chrók'ueŕtoan.

²⁷ Jahará ntáchorá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá ¿nkebro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehé sín mé tjákojín sín kixin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókoánoaxínrá kixin tí kjuachaxién Dios mé ó kui tí tjejórá.

²⁹ ¿Nkexrí chrók'uiexnhen ijnko nkexro ijnko ntqe ijnko ch'ín jjehe la chrókuakitsjehe ch'án tí nkehe chóntha ch'án? Senó la chrókónteto ch'án kixin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

³¹ Méxra xrxánka kixin Dios tsjakjlin jnkojnko jje tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjin ijje sín. ³² La ko xrxánka kixin kaín nkehe t'ántaxínhinrá tí Xjeen Dios K'óna Chojni la tsjakjlin Dios. A ntá tí ts'ántaxínhinrá Nchakuen Dios la ntá mé í tsjinhya tí ijará kjónté ntíhi chjasintajni la ko kjónté tí chr'éxin.

*Tí nta chrókjuatsqanxín sín tí to jína
(Lc. 6.43-45)*

³³ Tí nta tsik'ánki jína la t'óna to jína la tí nta tsik'ánkihya jína la t'ónahya to jína. Méxra tí nta mé chrókjuatsqanxíni tí to a. ³⁴ Jahará tsik'axrjeníxinrá konche. ¿Nkexrí jína chróntáchorá jahará tí jehya jinará? Tí nixja ir'vará la éxi ntáchro asánrá mé nixja ir'vará. ³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya. ³⁶ Ntá tjonkará kixin itsi tí yaon tsjixixín tió sinchekitqexín Dios ijje chojni ntá tsonohará kaín nkehe chjini tsinixjará. ³⁷ Kixin tí nkehe nixjará tsjakoxín á kjuásinrá jje ní ó náhi.

*Tí sín jehya jína tjanchehe sín ch'ín Jesús kixin tsjakoxín ch'án ijnko kjuaxroan jje
(Mr. 8.12; Lc. 11.29-32)*

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

—Maestro, tjinkaonni chrók'uiakonni chrókjuásian ijnko kjuaxroan náxrjón tsoexoéxíni kixin nkexro jaha —ichro sín.

³⁹ Ntá kjuátqhe ch'ín Jesús ntáchro ch'án kixin:

—Tí sín jínahya la ko tí sín kuitqhe Dios mé tjanchia sín chrókjuásian kjuaxroan náxrjón. Kjánchó tsjakoxínhya í jnko kjuaxroan la jehó tí kjuaxroan kónhen ch'ín Jonás, tí nkexro k'uechrónka itén Dios ós. ⁴⁰ Éxi yóhe kjuák'e ch'ín Jonás iní yaon la iní tie nkaxenhen tsee koche jje mé xikaha tí Xjeen Dios K'óna Chojni tsjak'e nkaxenhen tóye tsoxravá iní yaon la iní tie. ⁴¹ A ntá tí yaon tsitqexín ijje chojni la ntá tí sín chjasin Nínive mé tsjanchia sín jje kixin tí sín tjejó jie, kixin tí sín chjasin Nínive mé kuitqhe sín ijje sín tió kuínhin sín itén Dios chrónka ch'ín Jonás. A ntá ijje itjén janhan la antsí má chonta kjuachaxin. A ntá tí ch'ín Jonás la kénhyó k'uechóntha ch'án kjuachaxin, kjánchó jahará kuitekákonyará tí janhan. ⁴² Kjaxin tí yaon tsitqexín ijje chojni la tí tjan reina k'ueŕtoan kjuixín nó Sur mé tsjanchia tjan jje kixin tí sín tjejó ijje kixin jehé tjan kjuixín imá ikjín kixin chrókuinhin tjan tí kjuaxrexinkaon jína k'uekjako ch'ín Salomón. A ntá ijje itjén janhan la janhan antsí má nóna a ntá ch'ín Salomón la kénhyó k'ueñohe ch'án.

*Tió tsokjan tí nchakuen tí jínahya
(Lc. 11.24-26)*

⁴³ A ntá ijnko nchakuen tí jínahya tsik'axrjéxín ijnko chojni la mé ixri tí nonte xámá xrit-jeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntóna k'uaxrjéxian”, ichro. A ntá tió ikjan tí nchakuen la t'ikon éxi

ijnko nchia kohya ninkexró la éxi ijnko chojni tsík'ánjón ntqe la náxrjón tsjehe tí nkaxenhen nchia. ⁴⁵ A ntá k'uikon tí jínahya xikaha tjen nchia la ntá sákjuikakjín í jnko yato nchákuen tí jínahya antsí má jínahya. A ntá kaín k'uúxenhen tí ntíha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín siín ijie titekakonhya.

Tí iné la ko kichó ch'ín Jesús

(Mr. 3.31-35; Lc. 8.19-21)

⁴⁶ Ntá ch'ín Jesús naxá tjenixjehe ch'án chojni la ntá xringhya kjuíji iné ch'án la ko kichó ch'án. Ntá kuitqhe sín ntója ó la tjinkaon sín chrónixjehe sín ch'ín Jesús. ⁴⁷ Ntá ijnko nkexro ntíha sákjuichénka tí ch'ín Jesús, ntáχρο ch'án kixin:

—Íná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehe ch'án tí nkexro chrónka a, ntáχρο ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáχρο ch'án kixin:

—Tí sín í la mé naná la ko kichiná. ⁵⁰ Tí jnkojin sín í nchexiteyá nkehe tjinkaon T'aná tjen nkaya nkajni na mé táha mé naná la ko kichiná mé xikaha t'ikuán tí jehe sín —ichro ch'án.

13

Ch'ín Jesús mé kjuíncheyóexin ch'án éxi ijnko chojni t'enka nontqe

(Mr. 4.1-9; Lc. 8.4-8)

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon. ² Ntá k'uúixikóchjina nchónhya chojni tí tjen ch'án la ntá jehe ch'án mé k'ujit'ótjen ch'án ijnko ntabárcq kjuák'etjaxin ch'án la kaín sín na tí chrínta ntá ó kuitqhe sín.

³ A ntá nchónhya nkehe kjuako ch'án kjuíncheyóexin ch'án, ntáχρο ch'án kixin:

—Éxi ijnko ch'ín sákjuík'enka nontqe ⁴ mé xikaha sákjuík'enka ch'án iso tí noatrigó a. Ntá iso noa la tsík'ánótjen ntíja ntá ikuí koxroxé k'uunká va noa. ⁵ A ntá iso noa na mé k'uúitji chrík'á xró tí kohya itsjé nche ntá tjoka k'uayan kixin ntaha tjínhya chóna nche. ⁶ Ntá tí kjuítjen yaon la ntá tí ka la xámá kixin nínkahya chóna nué. ⁷ A ntá í so noa kjuítsínkak'á tí siín kach'lj na k'uánkí tí kach'lj a na ntá í xitjahya k'uánkí tí noatrigó a kixin tsík'jate tí kach'lj.

⁸ A ntá tí noa tsík'itji nche jína na ntá tíó k'uánkí la mé k'óna jína. Iso tí no na jnkokóá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uúájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xikaha nixjehe sín ncheyóexián? —ichro sín.

¹¹ A ntá ch'ín Jesús kjuátehe ch'án ntáχρο ch'án kixin:

—Jahará la Dios me tsjinkítsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi. ¹² Tí nkexro ó chóna nkehe la antsí ts'áyéhe sín kixin antsí má tsochóna sín. A ntá tí nkexro chónahya la kjónté tí ntsí chóna sín la ts'axrjehe sín. ¹³ Mé xikaha kjuíntayóaxuán kjuákuaxián sín kixin jehe sín t'ikon sín la ntá kjónté tjátsqanhya sín la tjejótinhin sín a ntá kjónté kienxínhya sín. ¹⁴ Mé xikaha ó xiteyá tí nkehe k'uéchronka ch'ín Isaías tí nkexro k'uéchronka itén Dios, mé ntáχρο ch'án xikihi:

Jehe sín tsinhin sín a ntá tsienxínhya sín

la ts'ikon sín la tsjatsqanhya sín tí nkehe ts'ikon sín.

¹⁵ Imá icha asén tí sín chjasin í.

Chóna sín ntatsjon kjánchó ts'ík'jehe

la chóna sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kienxín sín,

kixin í tjinkakonhya sín chrókjan sín kixin janhan mé chrókjuíntakitohá sín jína.*

Mé xikaha tsíkjin ch'ín Isaías.

¹⁶ Ntá ntáχρο ch'ín Jesús inaá kixin:

—A ntá jahará la imá náxrjón tjejará kixin t'ikonrá la ko tinhínrá. ¹⁷ Chaxín xrxanka kixin itsjé tí sín k'uéchronka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuinhin sín tí nkehe tjejotinhínrá la ntá kuienhya sín.

* 13:15 13.14-15 Isaías 6.9-10

Ch'in Jesús chrónkaxín nkexrí t'axrjexín tí nkexro sákjuik'enka
(Mr. 4.13-20; Lc. 8.11-15)

¹⁸ "Tinhínrá nkexrí t'axrjexín tí ch'in sákjuik'enka nontee. ¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kíenxínhya sín la yóhe tí noa xénjintja ntja. Ó kui ch'in Tsochren ntá kjuinchekitjáyan ch'án tí itan jína kuínhin sín. ²⁰ A ntá tí tje kjuítsínkak'á xro la mé t'axrjexín kixin tí chojni kuínhin itén Dios la tjoka kóxrjínhin sín la kuinkáchónki sín. ²¹ Kjánchó nínkahya chóna nuèe na ntá itsi tí kjuaxróxínhya o tsochónkíhi sín chojni chrók'oyán sín kixin tí itén Dios kuítekaon sín, a ntá tsitöhe sín tí tinkáchónki sín Dios. ²² A ntá tí tje kjuítsínkak'á kach'í na mé éxi yóhe ijnko chojni kuínhin itan jína kjánchó tjitoxienhya ntje sín kixin tóxakonhen sín tí xra chóna sín chjasintajni la ko tjínkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xíkaha xitjahya sich'ehe sín xra Dios. ²³ A ntá tí tje k'uúinka tí nonte chóna nche jína na mé yóhe tí chojni kuínhin tí itén Dios na ko kíenxín sín la ntá xíkaha jína ch'ehe sín Dios xra. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xíkaha chrónka ch'in Jesús.

Ch'in Jesús kjuíncheyóexin ch'án éxi tí kajnto k'uánkikué tí noatrigo

²⁴ Ntá ch'in Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'in k'u'enka noa jína nontee ch'án. ²⁵ A ntá tío k'u'éjójua kaín sín ntá ikui ijnko nkexro nínkakonhen sín la k'u'enka ch'án kajnto chrik'á tí noa a la ntá sákjuí ch'án. ²⁶ La ntá tí noatrigo k'uánkí la ntá ó sitintaa la ntá ntíha kjaxin kónoxíxin k'uánkí tí kajnto. ²⁷ Ntá tí sín ch'e xra mé sákjuínixjehé sín tí lámoe sín la ntáchro sín kixin: "Tí noa k'u'enká nontaa la noa jína tíha. A ntá ¿nketí kjuixín tí kajnto tsik'ayan?" ichro sín kjuanchankí sín. ²⁸ Ntá kjuátehe tí inché tí nonte ntáchro kixin: "Kjá ijnko nkexro nínkakonna mé kjuich'e xíkaha", ichro ch'án. Ntá tí sín ch'e xra mé kjuanchankí sín kixin: "¿Á tjínkáván kixin sátsjini tsakitsjenkíni tí kajnto?" ichro sín. ²⁹ A ntá kjuátehe ch'án kixin: "Náhi. Tí sátsjia tsakítsjenkiá tí kajnto la kjá chóna tí katrigo ts'axrjenkí. ³⁰ Íchá jína títóhé kixin ts'ánkikué tsjixin tsojtájiani. Ntá ts'etuñhenni tí sín tsojtá kixin senó ts'ejo sín tí kajnto la sinchenteto sín kixin tsoche la ntá chr'éxin tsojtá sín tí noatrigo ntá ts'inkachjina tí noa a" —mé xíkaha chrónka ch'in Jesús.

Ch'in Jesús kjuíncheyóexin ch'án éxi tí xroan ijnko ntayoa it'in mostaza
(Mr. 4.30-32; Lc. 13.18-19)

³¹ Ntá ch'in Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxi yóhe ijnko tje mostaza k'u'enka ijnko chojni nontee ch'án. ³² Tí tje a mé aúntí mé ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jíe la tí í so nta la kánhyó. Ntá koxroxé xritjaká mé itsi va sich'éna va kaké va tí chrik'á tí chaon nta.

Ch'in Jesús kjuíncheyóexin ch'án éxi tí xroan t'ánkixin niotja
(Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:

—Tí kjuachaxin kuènte Dios mé éxi yóhe tí xroan t'ánkixin niotja. Kjuinkíjjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'in Jesús tí nixja ch'án
(Mr. 4.33-34)

³⁴ Ch'in Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án. ³⁵ Mé xíkaha kjuako ch'án kixin tsoxiteyá tí nkehe tsíchrónka ijnko nkexro k'u'échrónka itén Dios ntáchro xíkíhi: Mé tsoníxjajian sñntayóaxión nkehe tsonáxrjan tí nkehe nínkexró noehya desde k'óna chjasintajni.†

Ch'in Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí noatrigo

³⁶ Ntá kjuixin nixjehé ch'in Jesús tí sín a ntá sákjuí sín kaín sín la jehe ch'án k'uíxénhen ch'án nchia. Ntá kóchjina tí sín k'uájiko ch'án la ntáchro sín kixin:

—Chrónkaxián nkexrí t'axrjexín tí kajnto k'uánkikué tí noa trigo tí nonte —ichro sín.

³⁷ Ntá ch'in Jesús kjuátehe ch'án ntáchro ch'án kixin:

—Tí nkexro k'u'enka tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxi yóhe tí chojni kuákja kjuachaxin kuènte Dios. La ntá tí kajnto mé éxi yóhe tí chojni t'etuñhenni Tsochren. ³⁹ Tí nkexro nínkakonhen mé k'u'enka tí kajnto mé Tsochren tíha. A ntá tí tsojtá sín la mé tsjeje chjasintajni. A ntá tí sín tsojtá la mé tí sín ángel. ⁴⁰ Éxi xrenájín tí kajnto la tsoche mé xíkaha tsonhen tíó tsjixíxin tsjeje

† 13:35 Salmo 78.2

chjasintajni. ⁴¹ Tí Xjeen Dios K'óna Chojni mé ts'etueñhen tí sín ángel kixin tsakitsjexín sín tí tjet'etóan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxi tí yaon xikaha tsotsjehe sín tí tjet'etóan It'éni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxi ijnko nkehe tjete tjemá

⁴⁴ Tí kjuachaxin kuènte Dios mé éxi yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emá ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxi ijnko xro perla tjete

⁴⁵ Ntá ntáchro ch'ín Jesús kixin:
—Kjaxin tí kjuachaxin kuènte Dios mé éxi yóhe ijnko nkexro tjeýá xro perla náxrijón. ⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxi ijnko nchísén tséya sín koche

⁴⁷ Ntáchro ch'ín Jesús kixin:
—Kjaxin tí kjuachaxin kuènte Dios mé éxi yóhe ijnko nchísén tséya chojni koche t'enkí sín tí ntayaon la ntá tsotse nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín. ⁴⁹ Mé xikaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsítóhe tí chojni jína. ⁵⁰ La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin:
—¿Á tiénxinrá jahará kaín tí nkehe ní? —ichro ch'án.
Ntá kjuátehe sín kixin:
—Jeén, Inchéni, ó kíenxínni —ichro sín.
⁵² Ntá ntáchro ch'ín Jesús kixin:
—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxi yóhe ijnko inché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xikaha ichro ch'ín Jesús.

*Ch'ín Jesús kjuák'e ch'án chjasin Nazaret
(Mr. 6.1-6; Lc. 4.16-30)*

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxín ch'án ntíha. ⁵⁴ La ntá sákjuí ch'án chjasén ch'án Nazaret. Ntaha kjuankixin kjuakoxín ch'án tí njnko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín í la, ¿nketí tsíxraköhe ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjaxin tí sín chjin kichó ch'án na ntíhi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:
—Nkuíxín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntqe ch'án mé tjikosáyeheya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntíha kixin kuítekakuenhya sín ch'án.

14

*Ik'uén ch'ín Juan Bautista
(Mr. 6.14-29; Lc. 9.7-9)*

¹ A ntá tí yaon a ntá tí ch'ín Herodes mé tí nkexro k'uetóan tí estado Galilea mé kuínhin ch'án nkexrí ichro ch'ín Jesús. ² Ntá nixjehé ch'án tí sín ch'ehe ch'án xra, ntáchro ch'án kixin:
—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etóan kixin ch'ín Juan tsonetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanhia tí tjan Herodias, tí tjan ichjién tí ch'ín Felipe, kichó ch'án. ⁴ Tí ch'ín Juan tsintáche ch'án tí ch'ín Herodes kixin:

—Jehya jína tsochonta tí ichjién tí kichuá —mé xikaha tsintáchro ch'án.

⁵ Ntá ch'ín Herodes tjinkaon ch'án chrók'óyan ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. ⁶ A

ntá tí yagon kia tsíkjitoxínhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjínhin ch'ín Herodes nkexrí ité tjan. ⁷La ntá nixjehé ch'án tjan k'uáqjexín ch'án ihnié Dios ntáchro ch'án kixin tsochjéhe ch'án tjan kjónté jnkojín nkehe tsjanchia tjan, ichro ch'án. ⁸Ntá jehe tjan la senó kjuíkjanckhíkhi tjan iné tjan ntá iné tjan tsíntachro kixin ikja ch'ín Juan mé tsjanchia tjan ntá jehe tjan mé nixjehé tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹Na ntá ch'ín Herodes la mé imá k'uává ch'án kixin xíkaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. ¹⁰Méxra k'uetqan ch'án kixin ts'óchrínjin sín ikja ch'ín Juan tí tjan ch'án ntqechiso. ¹¹Ntá kjuíkqo sín kjuíkoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan iné tjan.

¹²Ntá tí sín k'uék'ajiko ch'án a mé sákjuíkakitsje sín tí cuérpóé ch'án la sákjuíkjavá sín. La ntá chr'éxin la sákjuíkénhen sín tí ch'ín Jesús kixin xíkaha tsikónhen ntiha.

Ch'ín Jesús kjuínckjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³Ntá tí kuínhin ch'ín Jesús kixin xíkaha tsikónhen la ntá jehó ch'án sákjuí ch'án k'ujt'ótjen ch'án ijnko ntabárcq la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjan ch'án la ntá k'uaxrjexín sín chjasén la ntá totó sín sákjuíchréhe sín ch'án. ¹⁴A ntá k'uaxrjexín ch'ín Jesús tí ntabárcq a, a ntá k'uíkon ch'án kixin nchónhya chojni sín ntiha ntá kuíkonóhéhé ch'án tí jehe sín na ntá kjuínckitqhe ch'án jína tí sín níhi tsíkijqo sín. ¹⁵La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuénhen sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

¹⁶Ntá kjuátqhe ch'ín Jesús, ntáchro ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷Ntá kjuátqhe sín kixin:

—Chóntahyani itjsé nkehe. Jehó in'ó niqtja la ko yaá koche chóntani —ichro sín.

¹⁸Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹Ntá k'uetqan ch'án kixin kaín xín sín ts'ixitjxin sín tí chrítaón kaxi a. Ntá kuákja ch'án tí in'ó niqtja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'q ch'án tí niqtja chjéhe ch'án tí sín k'uájiko ch'án la jehe sín mé k'óixikayehe sín chjéhe sín tí chojni sín a. ²⁰Ntá kaín sín kjuixin kjóne sín kóqjehé sín. Ntá kjuixin sín tí sín k'uájiko ch'ín Jesús kjuenájín kaín tí nkehe sixèhe sín la mé teyó ntaxra kaón. ²¹Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án nta

(Mr. 6.45-52; Jn. 6.16-21)

²²Ntá kjuixin tíha ntá k'uetuénhen ch'ín Jesús tí sín k'uájiko ch'án kixin ts'it'ótjen sín tí ntabárcq ts'atòye sín í jnko nánko ntayaon. Ntá jehe ch'án naxá kuítqhe ch'án nixjehé ch'án tí sín siín ntiha. ²³Ntá kjuixin xíkayehé sín na ntá jehó ch'án chrín ch'án ijnko jna tsonixjehé ch'án It'é ch'án tjan nkaya nkajní. Na ntá ó k'uúxin tie la jehó ch'ín Jesús itjen ch'án ntiha. ²⁴La ntá tí ntabárcq na mé tjenkátáon ntá jnkósiné ntayaon. Ntá imá chjéhe ntá tí ntabárcq kixin tí xrínto la chjéhe la xitjahya sátsji ntabárcq. ²⁵Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. ²⁶Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷Na ntá nixjehé ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

²⁸Ntá ch'ín Pedro mé nixjehé ch'án Inchéni, ntáchro ch'án kixin:

—Inchéni tí chaxín jaha la ntá chrókuánjuan kjuachaxin chrókuítaónni tí ntá tsjjini tí tjan jaha —ichro ch'án.

²⁹Ntá ntáchro ch'ín Jesús kixin:

—Xrákiá.

Ntá k'uínkajínxin ch'ín Pedro tí ntabárcq la kjuankixin ch'án tjetjitaón ch'án ntá sákjuíchréhe ch'án tí tjan ch'ín Jesús. ³⁰A ntá xrínahya ntá kónohe ch'án kixin imá chjéhe xrínto chrítaón ntá, ntá chrakon ch'án la kjuankixin tinkák'aniánki ch'án ntá, ntá k'uèya ch'án ntáchro ch'án kixin:

—Inchéni, nchekaáni —ichro ch'án.

³¹A ntá tuénxin ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títékákonhya? —ichro ch'án.

³² Na ntá tió k'ujit'ótjen sín yóí sín tí ntabárcɔ la ntá tuénxín k'uixratá tí xrinto. ³³ Ntá kain sín tí sín tjejóxenhén tí ntabárcɔ mé k'uéjóxín tochr'in sín nkayakon ch'in Jesús la ntáchro sín kixin:

—Jaha mé chaxín Xjeen Dios —ichro sín.

Ch'in Jesús mé kjuínchekitqhe jina tí chojni níhi nonte Genesaret

(Mr. 6.53-56)

³⁴ Ntá tió k'uatòye sín tí ntayaon ntá kjuíji sín tí nonte Genesaret. ³⁵ Ntá tí sín siín ntiha tjoka kjuátsoan sín kixin jehe ch'in Jesús tíha, ntá kuínhin tí sín chjasin chjinaxón ntiha la ntá kuikao sín kain tí sín níhi tí tjen ch'án. ³⁶ Na ntá chrónòehé sín ch'án kixin chrókuitqhe ch'án kixin kjónté chrínta iké ch'án chrókuákóxin sín, la ntá kain tí sín kuákóxin iké ch'án mé kuítqhe sín jina.

15

Tí jie tjasin chojni

(Mr. 7.1-23)

¹ A ntá chjasin Jerusalén kjuíxin iso sín fariseo la ko iso tí sín maestro tjako tí ley la kjuíchréhe sín tí ch'in Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'in Jesús kixin:

—¿Nkekuènté jahará kjaxín títékákonhyará nkehe tsík'etqan Dios? A ntá jahará tjinkáonrá naxa chrókuinkáchónkirá tí nkehe kuinkáchónki tí sín tsík'axrjeníxinrá. ⁴ Ntáchro Dios kixin: “Tsochontehérá kjuasáya it'ará la ko inará”, la ko ntáchro ch'án kixin: “Tí nkexro t'ántaxínhin it'é la ko iné la chrók'uen.”* ⁵ A ntá jahará tsintáchrórá kixin ó nchoxon kixin ijnko nkexro tsochénta it'é la ko iné kixin: “It'éni, inéni, chrokjuaehya tsjinkitsani tí jaha kixin kain nkehe chóntani la ó chjéheni Dios.” ⁶ A ntá jnkojín nkexro tsontáchro ch'án tíhi ntá í t'ichjánxinhya tsjinkitsa tí it'é la ko tí iné, mé xikaha tsixrorá. Mé xikaha jahará kuítqhérá tí nkehe k'uetqan Dios kixin tjinkáonrá chrókjuich'erá éxí kjuíche tí sín tsík'axrjeníxinrá. ⁷ Jahará la jehya jnkojínxón tjenkayáxinrá. Ntoá tsintáchro tí ch'in Isaías, tí nkexro k'uéchrónka itén Dios ósé. Mé chrónka ch'án kixin nkexrí tjeorá la xikaha tsíkjin ch'án kixin:

⁸ Tí chojni tí chjasin í ir'va ó xraxinkakonxín sín tí janhan

a ntá tí asén sín la ikjín kuítqhe sín tí janhan.

⁹ Méxra ó chónko tóchjina sín xraxinkaon sín tí janhan

kixin tí nkehe tjako sín la tí nkehe tsík'etqan chojni ó.†

Mé xikaha ichro itén Dios.

¹⁰ Ntá k'uíyehé ch'in Jesús tí chojni inaá la ntáchro ch'án kixin:

—Chrókuinhínrá la ko chrókuiénxinrá. ¹¹ Kain nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xikaha ichro ch'in Jesús.

¹² A ntá tí sín k'uájiko ch'in Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátqhe ch'án ntáchro ch'án kixin:

—Kain tí ka jehya T'aná tjen nkaya nkajní k'uenkaxin la mé ts'axrjenkixin nuèe. ¹⁴ Nté tjtóhé sín. Tí jehe sín la ntakótán sín la t'etuehnen sín í so sín ntakótán. A ntá tió ijnko chojni ntakótán tjitaón ntia la ntá yóí sín ts'anótjenyá sín ichrén tòye —ichro ch'án.

¹⁵ Ntá ntáchro ch'in Pedro kixin:

—Chronka nkexrí t'axrjexín tíha —ichro ch'án.

¹⁶ Ntá kjuátqhe ch'in Jesús ntáchro ch'án kixin:

—¿Á kjaxínrá jahará tiénxinhyará? ¹⁷ ¿Á tiénxinhyará kixin kain tí nkehe ineni na sátji nkaya tséni na ko xik'axrjexín tí cuérpéni inaá? ¹⁸ A ntá tí nkehe t'axrjexín ir'va chojni la t'axrjeníxin asén chojni la tíha la mé tí jie tjasixín chojni. ¹⁹ Kain tíha mé t'axrjeníxin asén chojni, mé tí jínahya tjenkayáxin sín la ko tí t'óyán kichó sín la ko tí t'jachehe kichó sín la ko tí chónnta sín í jnko chojni chjín óké la ko teé sín la ko tí kjuach'ia la ko tí t'ántaxínhin kichó sín. ²⁰ Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xikaha ichro ch'in Jesús.

Ijnko tjan jehya sín israelita mé kuinkáchónki tí ch'in Jesús

(Mr. 7.24-30)

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²² Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Inchéni, Xjeen David, tikonóghéni kixin tí xjeenni chjin la mé níhi tjan chóna tjan ijnko nchakuen tí jínahya —ichro tí tjan a.

²³ A ntá ch'ín Jesús la ninkehó kjuátèheya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuènhén tjan sátsji tjan kixin tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroe kuènte nació Israel —ichro ch'án.

²⁵ A ntá tí tjan a kóchjina la kjuák'exín toch'ín tjan nkayakon tí ch'ín Jesús la ntáchro tjan kixin:

—Inchéni, tjínkítsani —ichro tjan.

²⁶ A ntá ch'ín Jesús kjuátèhe ch'án ntáchro ch'án kixin:

—Jehya tí jína chrókuakitsjahá niotja tí xjan ntá chrótjahá koniá chrókjóne va —ichro ch'án.

²⁷ A ntá jehe tjan la ntáchro tjan kixin:

—Chaxín xíkaha, inchéni. Kjánchó kjónté tí koniá na tí nkehe tsjixènjinnkí mesa kuènte inché la ine va —ichro tjan.

²⁸ Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítøhe jína.

Ch'ín Jesús mé kjuínchekitøhe jína nchónhya chojni níhi

²⁹ Ntá ch'ín Jesús mé sákjuíxín ch'án ntiha la kjuíji ch'án chrínta ntayaon Galilea. Ntá chrín ch'án ijnko jnā la ntiha kjuák'etjaxín ch'án. ³⁰ Ntá kójnkotsé tsjé chojni tí tjan ch'án la kjuíkāo sín tí sinníhi, mé tí sín xitjahya tji la ko tí sín t'ikónhya la ko tí sín nixjahya la ko tí sín tsixénká la kaín xín tí í so sinníhi. K'uejo sín tí sinníhi toté tí ch'ín Jesús kixin jehe ch'án mé sinchekitøhe ch'án sín jína. ³¹ Kaín chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'ikónhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

³² Ntá k'uíyøhe ch'ín Jesús tí sín k'uájiko ch'án la ntáchro ch'án kixin:

—Imá tikonógha kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuñhan sín sáchrókjui sín ntege sín kixin naxā nehya sín la ntā ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'án kixin:

—¿Nkekjaín niotja chontará? —ichro ch'án.

Ntá ntáchro sín kixin:

—Yato niotja chóntani la ko iso koche ntsínsí —ichro sín.

³⁵ Ntá ch'ín Jesús k'uetøan ch'án kixin kaín xín sín ts'ixitjaxín sín nonte, ichro ch'án. ³⁶ Ntá kuákja ch'án tí yato niotja la ko tí koche ntsínsí la kjuanchehe ch'án kjuasáyé Dios. Ntá kóchrít'ø ch'án tí niotja a la ntá k'uetuènhén ch'án tí sín k'uájiko ch'án kixin ts'óxíkayøhe sín tí niotja la ko tí koche kaín xín tí sín sín a, sine sín. ³⁷ Na mé kaín xín sín kjóne sín na kókjøhe sín ntá kjuenájín sín yato ntaxra tot'ø tí nkehe naxā tsixøhe. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjøhe ch'án sín sákjuí sín la ntá k'uit'ótjen ch'án ntabáro la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjan Dios. ² A ntá ch'ín Jesús na kjuátøhe ch'án, ntáchro ch'án kixin:

—Jahará ntáchrórá ḱixin ijie ntá kónjín ó tsi ijnko yaon jína ḱixin ḱjátse nkajní. ³ La ntá nchítjen ntáchrórá ḱixin ijie la náxrjónhya ḱixin ḱjátse nkajní la tjenkáya tjuj. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sitónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'íkonhyará í jnko kjuaxroan, jehó tí kjuaxroan kuénte ch'ín Jonás mé ts'íkonrá —mé xíkaha ichro ch'ín Jesús.

Ntá kuítøhe ch'án sín la sákjuí ch'án.

Ch'ín Jesús ntáchro ḱixin chrókuitekakonhya sín tí nkehe tjako tí sín fariseo
(Mr. 8.14-21)

⁵ Ntá tí sín k'uájiko ch'ín Jesús mé k'uátøye sín ntayaon la ntá k'uitjáyenhen sín tsíkjikohya sín niotja. ⁶ Ntá ntáchro ch'ín Jesús ḱixin:

—Chróóxakonhanrá ḱixin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín ḱixin:

—Mé xíkaha ichro ch'án ḱixin tsíkjikohyani niotja —ichro sín.

⁸ Ntá kónohe ch'ín Jesús ḱixin nkehe tí kjo sín kichó sín, ntá ntáchro ch'án ḱixin:

—¿Nkeuènté tjórá ḱixin chontahyará niotja? Jahará la intsíkoá tinkachónkirá tí janhan.

⁹ Jahará zá naxá tiénxinhyará la ko á xráxinkákonhyará tí in'ó niotja k'óxikayeheni ḱjone tí in'ó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe?

¹⁰ La ko zá xráxinkákonhyará jahará tí yato niotja xikayehe ḱjone tí noó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe? ¹¹ A ntá ¿nkeuènté ḱixin kuiénxinhyará ḱixin janhan la jehya kuénte niotja tjénixja tió ntáxrjan ḱixin chróóxakonhanrá ḱixin tí xroan ts'ánkíxin niotjé tí sín fariseo la ko tí sín saduceo? —mé xíkaha ichro ch'ín Jesús.

¹² Na ntá kuienxín sín ḱixin nixjahya ch'án kuénte tí xroan t'ánkíxin niotja. Náhi. Tjenixja ch'án ḱixin chróóxakonhen sín ḱixin tí nkehe tjako tí sín fariseo la ko tí sín saduceo.

Chrónka ch'ín Pedro ḱixin ch'ín Jesús mé tí nkexro Cristo
(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án ḱixin:

—¿Nkehe tjo sín ḱixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátøhe sín ntáchro sín ḱixin:

—Iso sín mé ntáchro sín ḱixin Juan Bautista, ichro sín. A ntá í so sín na mé ntáchro sín ḱixin Elías, ichro sín. A ntá í so sín mé ntáchro sín ḱixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús ḱixin:

—¿A ntá jahará nkechrórá ḱixin nkexro tí janhan? —ichro ch'án.

¹⁶ A ntá ch'ín Simón Pedro kjuátøhe ch'án ntáchro ch'án ḱixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátøhe ch'ín Jesús ntáchro ch'án ḱixin:

—Náxrjón tjen jaha Simón xjeen Jonás ḱixin kohya nijnko chojni kjuakøha tíha. Jehó T'aná tjen nkaya nkajní mé kjuakøha tíha. ¹⁸ Méxra ntáxrjan ḱixin jaha mé Pedro mé t'axrjéxín ḱixin ijnko xro la chrítaon tí xro mé sit'ána njnko la ḱjonté tí kjuachaxin kuénte kjuach'en la tsjachahya sinchek'itjáyan. ¹⁹ Méxra jaha mé tsotjaha tí llave kuénte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

²⁰ Ntá ch'ín Jesús mé k'uætøenhen ch'án tí sín k'uájiko ch'án ḱixin ninkexró tsochénkahya sín ḱixin jehe mé tí Cristo.

Ch'ín Jesús chrónka ch'án ḱixin its'en ch'án
(Mr. 8.31—9.1; Lc. 9.22-27)

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án ḱixin t'ichjánxin satsji ch'án chjasin Jerusalén la ntaha la tí sín t'etøan kuénte njnko la tí sín nchat'á tjeoan la ko tí sín maestro tjako ley mé imá sinchekjasóte sín ch'án. La chrónka ch'án ḱixin ts'óyan sín ch'án kjánchó tí níxin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án ḱixin:

—Kjá Dios tsjanjonhya kjuachaxin xíkaha tsonhan Ìnchéni ḱixin jaha la xitjahya tsjasóte xíkaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án ḱixin:

—Sátjia ntáha, Sátanas. Tjia'téhya tí jaha tí nkehe tsonna. Jaha chrók'uínkakahén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxin éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjínkaonrá tsochréhérá tí janhan la t'ichjánxin tsitohérá kaín tí nkehe tjaké asánrá, ntá tsámárá tí nta cruz kuéntará, a ntá tsochréhérá tí janhan. ²⁵ A ntá tí nkebro tjinkaon jehó sinchekaá asén la ts'itjáyan. A ntá tí nkebro chrókjuinçek'itjáyanxín asén kixin tinkáchónki sín tí janhan la tsaá. ²⁶ ¿A ntá nkehe tsonhen tí chrókjuacha ijnko chojni chróhónta kaín nkehe síin chjasintajni a ntá tí kjuachón chrókjuinçek'itjáyan? ¿Nkehe chrókjuenka chojni kixin chróhónta tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jíe kuènte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojnko chojni nke xri tí xra kjuich'e jnkojnko tí jehe sín. ²⁸ Chaxin xrxanka kixin isorá tjejorá ntihi la naxa ts'énhyará naxa ts'ikonjjará kixin nke xri tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jíe —ichro ch'ín Jesús.

17

Ch'ín Jesús mé k'uixitóxin nke xri tsjehe ch'án

(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'ujit'ótjen sín ijnko jna imá noi. ² Ntá ntiha tjejó sín ntá xrinahya k'uikon sín kixin ch'ín Jesús mé k'uixitóxin nke xri tsjehe ch'án. Tí nkayakon ch'án la imá tjájni tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. ³ Na ntá xrinahya k'uikon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Inchéni, jina kixin tjejóni ntihi. Tí tjínkávan la chrókjuich'éneni iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrinahya ikui ijnko tjuj imá t'inkaséyan kjuak'etja chritaón tí jna tjejó sín. Ntá xrinahya chrikjan tí tjuj kuínhin sín itén ijnko nkebro nixja na mé ntáchro kixin:

—Tíhi mé xjanna. Imá tjuahá ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín. ⁷ Na ntá ch'ín Jesús mé kóhchina tí tjejó sín la kuákóxin sín ch'án la ntáchro ch'án kixin:

—T'áya chrakonhyará —ichro ch'án.

⁸ Na ntá xrinahya k'uikon sín kixin kohya ninke xro. Jehó ch'ín Jesús mé tjen.

⁹ Na ntá tí k'uínkajinxin sín tí jna ntá k'uetóan ch'ín Jesús, ntáchro ch'án kixin:

—Ninke xro chenkahyará tí nkehe k'uikonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuénté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkebro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. ¹² Kjánchó ó xrxanka kixin chaxín ó kui ch'ín Elías la tí sín chjasintajni la mé kjuátsoanhyaha sín ch'án la kjuínčekjasóte sín ch'án éxi kóxrjinhin sín. Mé xikaha kjaxin tí Xjeen Dios K'óna Chojni la mé kjaxin sinčekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

Ch'ín Jesús mé kjuínčekitóhe jina ijnko xjan t'aniáte

(Mr. 9.14-29; Lc. 9.37-43)

¹⁴ Ntá tíó k'uíji sín tí síin nchónhya chojni la ntá kóhchina ijnko ch'ín tí tjen ch'ín Jesús la kjuak'exin toch'ín ch'án nkayakon ch'án. La ntáchro ch'án kixin:

¹⁵ —Inchéni, tikonoghéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án nta. ¹⁶ Ntá kjuíkajoni ch'án ntihi la tí sín xrikoá la kjuachahya sín kjuínčekitóhe ch'án jina.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjínkaonrá naxa ts'ejóni? ¿Hasta nkesá tsjácha tsjak'é tsjákoahará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuenghen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuítghe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkeuenté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakitsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kain asánrá kjónté intsíkoá éxi ijnko tje mostaza intsi la ntá chróntácherá tí jnã kixin: “Sátjixian ntíhi la sátsjia ókjé”, chróchrorá chróntácherá tí jnã la ntá tí jnã sáchrókjuixin ntíha. Mé xjkaaha kain nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakitsjerá ijnko nchakuen tí jínahya la t'ichjánxín tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxã k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí síin chojni t'etóan sínchekjasóte sín ch'án ²³ la ts'óyán sín ch'án. A ntá tí yaon nixin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkã ch'án tí nkehe kjuanchia tí sín kuente njnko

²⁴ Ntá tíó kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkj kuente njnko mé sákjuítsjehe sín tí ch'ín Pedro la kjuanchankí sín kixin:

—Tí maestro kuentá la, ¿a tjenkãhya ch'án tí nkehe tjanchia tí sín nchekjènkj kuente njnko? —ichro sín.

²⁵ Ntá kjuátghe ch'ín Pedro, ntáchro ch'án kixin:

—Kjá tjenkã ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenkã tí nkehe tjanchia tí sín t'etóan chjasintajni, á tí sín kuente ntíhó ó á tí sín tsíkjixín ókjé? —ichro ch'ín Jesús.

²⁶ Ntá kjuátghe ch'ín Pedro, ntáchro ch'án kixin:

—Tí sín tsíkjixín ókjé mé tjenkã sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxínhya chrókjuenkã sín. ²⁷ Kjánchó tjínkakonhya tsonínkaon ninkexró ntíhi. La ntá sátsjia tí ntayaon sátsjikoá tí ichjón chóna gancho tséxin sín koche la ntaha itsé tí chjón chrínkí ntayaon. Ntá tsákjá tí koche saoxón sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenkã kain tí tjásikáha sín la ko tí tjásikehé sín jaha. Táha mé sátsjikoá tjenka —ichro ch'ín Jesús.

18

¿Nkexro tí imá ts'etóan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etóan tí kjuachaxin kuente nkaya nkajní? —ichro sín.

² Ntá ch'ín Jesús mé k'uýyehé ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxi ijnko xjan ntsí ntá xitjahya tsákjárá tí kjuachaxin kuente Dios. ⁴ Tí jnkójín nkexro ts'óna éxi tí chánjan ihnkehya la mé antsí tjejoan ntíha.

⁵ A ntá tí nkexro ts'áyehé ijnko chánjan kixin tinkáchónkí sín tí janhan la mé xjkaaha éxi chrók'uáyehé sín tí janhan —mé xjkaaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónkí tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuíakánkí ch'án ntayaon njnka. ⁷ Imá náxrjónhya tjejó tí sín chjasintajni kixin síin nkehe tjasixín chojni jie. Xrácín la jehí síin, a ntá nóa tí nkexro tjasin tí nkehe tsjasixín chojni jie.

⁸ Tí itjá o totá tjásixián jie na chrókójína chrókochrínjan chróchr'an ikjín kixin íchá jína chróchonta kjuachón kjónté it'qó itjá o it'qó totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohí jnkochrín. ⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na

chróchonta kjuachón. A ntá tí yóí ikuan chróchonta tsjásixián jje la tíha mé sátsjixián tí síche xrohi jnkochrixín.

Kjuíncheyóexin ch'ín Jesús éxí ijnko kolélo tsík'itjáyán
(Lc. 15.3-7)

¹⁰ Chrókókjoniehýará nijnko tí chánjan ntsíntí. Tjonkará kixin nkaya nkajní la tí sín ángel kuénte tí xjanntsí la xráxin tjejó sín tí tjen T'aná nkaya nkajní. ¹¹ Tí Xjeen Dios K'óna Chojní la mé ikui kixin chrókjuincheakaá tí chojni xrichroe.

¹² ¿Jahará nkechrórá? Ijnko chojni chóna ijnko ciento kolélo ntá chrók'uitjáyán ijnko va na ¿á chrókuitóehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyán ní? ¹³ A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyánhya va. ¹⁴ Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyán ninkexró kjónté ijnko chojni kánhyó tjejoan.

Chrók'uitjáyánhanrá tí jje kjuasinhanrá kichuárá
(Lc. 17.3)

¹⁵ Tí kichuá tí chrókjuit'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jje kjuasin ch'án. A ntá tí kjuacha nixjehé tí kichuá la í kohya kjuánkaon. ¹⁶ A ntá tí tahya ch'án kuéntá nkechrua la ntá ntáche á jnko ó yaá chojni sátijsíka kixin tsinhín sín á chaxín titekakonhya ch'án. ¹⁷ A ntá tí kjónté xikaha náxa titekakuenhya ch'án sín la ntá chenka tí sín tsikójkotsé nkehe tí jje kjuasin ch'án la ntá tí náxa titekakuenhya ch'án tí sín tsikójkotsé la ntá ts'ikonrá ch'án éxí ijnko chojni tinkáchónkihya Dios ó éxí ijnko chojni nchekjènkí.

¹⁸ Chaxín ntáxrxjan kixin tí tsjánjonhyará kjuachaxin nkehe tsonhen ntíhi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntíhi chjasintajni la kjaxin ntaha nkaya nkajní tsjanjon Dios kjuachaxin.

¹⁹ Kjaxin ntáxrxjan kixin tí tjejó yaára ntíhi chjasintajni la tí jnkokoá tjejótkenayáxinrá chrókjuancheherá Dios ijnko nkehe tjinkáonrá la ntá jehé ch'án mé tsotjáhará ch'án. ²⁰ Kixin tí tjejó yaá ó iy'á chojni tjejó jnkokoá t'ákjenxin sín níná la janhan koína tjéntaxian tí tjejó sín ntíha.

²¹ Ntá kóchjina ch'ín Pedro mé kjuanchankí ch'án ntáchro ch'án kixin:

—Ínchéni, ¿nkekjaín veces chrók'uitjáyenhenni tí jje kjuasin kichó ní? ¿Á yato veces ó ní? —ichro ch'án.

²² Ntá kjuátéhe ch'ín Jesús, ntáchro ch'án kixin:

—Náhi, jehya yato veces ó. Náhi, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyénhya ch'án ijje kichó ch'án

²³ Tí kjuachaxin kuénte Dios la éxí yóhe ijnko rey tjinkaon ch'án tsjentoáko ch'án kuéntá tí sín ch'ehe ch'án xra. ²⁴ Ntá kjuankíxin ch'án tsísínkaxín cuenta la ntá xrináhya kóchjina ijnko ch'ín ch'e xra síká nchónhya millones chichaon. ²⁵ Tí ch'ín a mé chónthahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetóan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuénte ch'án kixin ntá xikaha mé tsoxenka kaín tí síká ch'án. ²⁶ A ntá tí nkexro ch'e xra mé kjuák'exín toch'in ch'án nkayakon tí rey la chrónóehé ch'án, ntáchro ch'án kixin: “Jaha Ínchéni tikonóehéni la kjónté kjaxón tsjenkahani kaín tí síkáhani”, ichro ch'án. ²⁷ A ntá tí ch'ín rey kuikonóehé ch'án tí ch'ín a kjónté itsjé síká ch'án, ntá kuitóhe ch'án sákjuí. ²⁸ A ntá tí sákjuí tí ch'ín a ntá xrináhya xéta ch'án ijnko nkexro ch'eko ch'án xra mé ijnko nkexro síkhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¡Tsjénkana tí nkehe tjasíkana ní ó náhi!” ichro ch'án. ²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehé ch'án ntáchro ch'án kixin: “Tikonóehéni ijje la kjónté kjaxón tsjenkahani kaín tí nkehe síkáhani”, ichro ch'án. ³⁰ A ntá jehé ch'án la kuikonóehya ch'án. K'uetóan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. ³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénsa sín tí lámoé sín nkexri kaá kónhen tí ch'ín síká. ³² A ntá tí lamo mé k'uetóan tsjik'iyéhe sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyánhan tí nkehe tjasíkana kixin jaha chrónóana. ³³ A ntá jaha mé kjaxin chrókjuikonóehé tí nkexro choxian éxí janhan kuikonóaha tí jaha”, ichro tí ch'ín lamo. ³⁴ A ntá imá kónínkaon tí lamo a la k'uetóan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjáyánhanrá tí jje chóna kichuárá —ichro ch'ín Jesús.

19

Tjako ch'in Jesús kuènte tí sín t'itjìhi kíchó
(Mr. 10.1-12; Lc. 16.18)

¹ A ntá kjuixín nixja ch'in Jesús kaín tíha, ntá sákjuixín ch'an estado Galilea la kjuíji ch'an estado Judea nó tóhe tí ntario Jordán. ² Ntá nchónhya chojni kjuíjichréhe sín ch'an ntá ntiha mé kjuínchekitöhe ch'an jina tí chojni níhi.

³ Ntá iso sín fariseo mé kóhjinhe sín tí ch'in Jesús kjuanchankíhi sín ch'an kíxin tsotsjehe sín nkexrí tsixro ch'an, ntáchro sín kíxin:

—¿Á siín kjuachaxin tsjákehe jnkojín chojni ichjién kjónté kohya jie jíé? —mé xíkaha kjuanchankí sín.

⁴ Ntá kjuátehe ch'in Jesús ntáchro ch'an kíxin:

—¿Á nunca kjuínchekuáxinhyará jahará kíxin ntáchro xroon itén Dios kíxin tí nkexro kjuích'éna kaín chojni siín chjasintajni tí xrankíxixín, la tí nkexro mé “kjuích'éna ch'an chojni ntoa ko chojni chjin?”* ⁵ La ko ntáchro kíxin: “Mé xíkaha tí chojni ntoa la tsítóhe sín it'é sín la ko iné sín la tsakja sín ichjién sín la yóí sín la éxí ó jnko chojni xíkaha ts'óna sín.”[†] ⁶ Mé xíkaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjon kjuachaxin kíxin kuákja kíchó sín, la í xitjahya ts'itjìhi kíchó sín.

⁷ Ntá tí sín fariseo mé kjuanchankíhi sín ch'an kíxin:

—¿Ntá nkexrí kíxin tí ch'in Moisés k'uetqan kíxin ts'óna ijnko xroon tsakja tí ichjién kíxin tsjákeexín kíchó sín?[‡] —ichro tí sín fariseo.

⁸ Ntá ntáchro ch'in Jesús kíxin:

—A ntá jahará titekákonhyará. Méxra ch'in Moisés kjuanjon ch'an kjuachaxin kíxin ts'óna tí xroon ts'itjìxín kichuárá. Kjánchó tí xrankíxixín la xíkaha kónhen. ⁹ Méxra ntáxrajan kíxin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'an tjan ntá tsakja ch'an í jnko chjin mé xíkaha la ó jie tíha. La ko kjaxin tí ijnko chojni chjin tsíkítsinkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'in Jesús ntáchro sín kíxin:

—Tí xíkaha tjanjonko kíchó sín chrók'uitjìhi kíchó sín la íchá jina chrókóteehya sín.

¹¹ Ntá ntáchro ch'in Jesús kíxin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. ¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kíchó sín kíxin ókjé chojni kjaxin kjuích'ehe sín xíkaha, la ko í so sín la takjahya kíchó sín kíxin tjinkaon Dios kíxin xíkaha sich'ehe sín ch'an xra. Tí sín tsjacha sich'e tíha la chrókjuich'e sín xíkaha.

Ch'in Jesús mé kjuíncheyaoon ch'an chánjan
(Mr. 10.13-16; Lc. 18.15-17)

¹³ Ntá ikjui chojni kjuíkao sín iso xjan kíxin tjinkaon sín tsjak'etja tja ch'in Jesús chrítaon tí chánjan la sincheyaoon ch'an sín. Ntá tí sín k'uájiko ch'an mé kónínkakonhen sín tí sín kjuíkao tí xjan. ¹⁴ A ntá ntáchro ch'in Jesús kíxin:

—Nté títqhéra tsoxrakoa xjan tí tjén janhan la t'ínkakuènhyará xjan kíxin tí sín kuènte kjuachaxin nkaya nkajni la mé tóyóhe éxí tí jehe xjan —ichro ch'an.

¹⁵ Ntá kjuak'etja tja ch'an chrítaon tí xjan la ntá kjuixín ntá sákjuí ch'an ókjé.

Ijnko ch'in ntasoá rico mé kjuínixjehé ch'an tí ch'in Jesús
(Mr. 10.17-31; Lc. 18.18-30)

¹⁶ A ntá ijnko ch'in ntasoá sákjuítsjehe ch'an tí ch'in Jesús la kjuanchankíhi ch'an kíxin: —Jaha la ijnko Maestro jina. La ntá ¿nkehe jina chrókjuich'eni kíxin chróchóntani kjuachón jnkochrín? —ichro ch'an.

¹⁷ Ntá ch'in Jesús kjuátehe ch'an, ntáchro ch'an kíxin:

—¿Nkeuènté ntáchrúa kíxin jina tí janhan? Jehó jnkokqá nkexro la mé jina la tíha mé Dios. A ntá tí tjinkávan tsochonta kjuachón jnkochrín la titekávan tí nkehe k'uetqan Dios —ichro ch'in Jesús.

¹⁸ Ntá ntáchro tí ch'in ntasoá kíxin:

—¿Nkehe tíha? —ichro ch'an.

Ntá ntáchro ch'in Jesús kíxin:

—Chrók'oyánhya chojni la ko chrókjuich'iyehya nijnko chojni chjin la ko chrókugehya la ko chrókjuich'énahya kjuach'ia kuènte ókjé chojni ¹⁹ la ko chrókjuikosáyehé it'á la ko iná la ko chrójtjuèhé kíchuá éxí tjuèxian asán.[§] —mé xíkaha ichro ch'in Jesús.

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4 § 19:19 Éxodo 20.12-16; Deuteronomio 16.20; Levítico 19.18

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naḡa t'itjayan? —ichro ch'án.

²¹ Ntá ntáchro ch'ín Jesús kixin:

—Tí tjínkavan antsi ntoá sínchexiteyá la sátjia sínchekjia kaín tí nkehe chonta la sínchekjtonhén tí sín nóa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhe tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'avá ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xḡa ts'áyéhe sín tí kjuachaxin kuénte nkaya nkajní. ²⁴ Kjaṡee xrjanka kixin antsi xḡahya chrók'uatsínka ijnko kocamello ijnko tjar'i ntachica tjexrja. A ntá antsi xḡa kixin tí sín chóna itsjé nkehe chrók'uáyéhe tí kjuachaxin kuénte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ḡáa nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojní chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

—Inchéni, jeheni kaín ni la kuítgheni kaín nkehe chónatani kixin tsochréheni tí jaha. A ntá ḡnkehe ts'áyéheni? —ichro ch'án.

²⁸ Ntá kjuátḡhe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jié la ntá kjaxinrá jahará chréhérá tí janhan la ts'ejorá teyó trono sínchekitexínrá ijé kaín tí sín ts'axrjenixin tí teyó xjeen ch'ín Israel. ²⁹ La ko kaín tí sín kuítḡhe sín ntḡe sín la ko kuítḡhe sín tí kichó sín la ko kuítḡhe sín it'é sín ḡ iné sín la ko kuítḡhe sín ichjién sín la ko xjeen sín la ko nontḡe sín kixin tinkáchónki sín tí janhan, na ntá antsi má tsochóna sín la ko kjaxin tsochóna sín kjuachón jnkochríxin. ³⁰ A ntá nchónhya tí sín t'etḡan ijje, mé tsjixixín tsochréhe sín. A ntá nchónhya tí sín t'ituenhen ijje la tí sín a mé ts'etḡan sín tí ntiha.

20

Ch'ín Jesús kjuíncheyóexin ch'án éxi tí sín ch'e xḡa

¹ Tí kjuachaxin kuénte Dios la éxi yóhe ijnko chojni chóna xḡa nontḡe ch'án la ntá ijnko yaon imá nchítjen sákjuikjeyá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xḡa ntá ikjo ch'án sín kixin ijnko denario tsjenkehe ch'án sín tí xḡa sich'e sín nontḡe ch'án tí yaon a. ³ Ntá chr'éxin como las nueve nchítjen ntá sákjuí ch'án ntasin la k'uikon ch'án í so sín tjejó ntasin chónataha sín xḡa. ⁴ Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuich'erá xḡa nontḡeni la jína chrókjuénkahará”, ichro ch'án. La ntá jehe sín sákjuí sín. ⁵ A ntá tí inché nonte la sákjuí ch'án inaá chonkixin naḡa xík'itja ch'án í so sín ch'ehe ch'án xḡa la nta tí las tres kónjin la xikaha naḡa xík'itja ch'án í so sín inaá. ⁶ A ntá las cinco kónjin sáxikji ch'án ntasin inaá la k'uitja ch'án í so chojni ntaha chónataha sín xḡa la ntá kjuanchankíhi ch'án sín kixin: “ḡNkekuènté tjejorá ntíhi ch'ehyará xḡa kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xḡa chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xḡa nontḡeni la jína chrókjuénkahará”, ichro ch'án. ⁸ A ntá ó kóntó ntá tí inché nonte mé nixjehe ch'án tí ch'ín t'etḡan sítónhen xḡa nontḡe ch'án la ntáchro ch'án kixin: “T'iyehé kaín tí sín kjuich'e xḡa tjénkehé sín. Tjankixian tjénkehé tí chojni kjuixixín k'uixenhen xḡa la chr'éxin tjénkehé tí sín saoxín k'uixenhen xḡa”, ichro ch'án. ⁹ A ntá kóchjina kaín tí sín k'uixenhen xḡa las cinco kónjin la jnkojnko sín k'uáyéhe sín jnkojnko denario. ¹⁰ Ntá chr'éxin, tió kóchjina tí sín k'uixenhen xḡa nchítjen la ntá kjuenkayáxin sín kixin antsi itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkojnko denario ó. ¹¹ A ntá tí kjuachahya sín tjete ntá kjuankixin sín kónínkakonhen sín tí inché nonte ¹² la ntáchro sín kixin: “Tí sín ikui kjuixixín la kjuich'e sín xḡa jnkoqá hora la ntá kjaxin kjuénkehé sín jnkokón éxi kjuacha tí jeheni. La ntá jeheni kjuich'eni xḡa kjónté sóa la kuenté yaon kjuich'eni xḡa”, ichro sín. ¹³ A ntá kjuátḡhe tí inché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítḡexínni kixin ijnko denario tsjénkahará tí yaon. ¹⁴ Ntá tsákjá ch'icháḡon la sátjia. Janhan tjínkavan tsjénkahá tí sín k'uixenhen kjuixixín éxi tí kjuénkahá jaha. ¹⁵ ¿A chónataha janhan kjuachaxin xikaha

chrókjuénkahá sín kixin tíha la ch'ichakonna? ¿Nkekuènté tóchjinoxínhan jaha kixin xikaha kjuénkahá sín?" ichro ch'án. ¹⁶ Mé xikaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyaha kjánchó tsjéhya sín k'uítja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí síin tí sín nchat'á t'etóan la ko tí sín maestro tí tjako ley. Ntá jehe sín ts'etóan sín kixin its'en ch'án. ¹⁹ Ntá tsjikaán sín ch'án tí síin chojni jehya judío la jehe sín mé tsjatoán sín ch'án la ko tsjate sín ch'án ntá tsjak'enkani sín ch'án ijnko ntacruz kjánchó yaon nixin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan

(Mr. 10.35-45)

²⁰ A ntá tí iné tí xjeen ch'ín Zebedeo mé kjuikajo tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exin toch'in tjan nkayakon tí ch'ín Jesús la chrónógehe tjan ch'án. ²¹ Ntá ch'ín Jesús kjuanchankihi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

Ntá kjuátehe sín, ntáchro sín kixin:

—Kjá tsjachani —ichro sín.

²³ Ntá ntáchro ch'ín Jesús kixin:

—Chaxin kjónté chrókjuachará chrók'uirá éxi tí nkehe itsjá its'ia la ko chrókuikiterá éxi tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjan nkaya nkajni mé nohe kixin nkexro tsikjeyá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xikaha tsikjanchia tí sín a ntá kónínkakohen sín tí yaá a. ²⁵ A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etóan chjasintajni la imá t'etunhen sín kain chojni la tí sín t'etóan imá nchehnkehe asén sín kixin ihyé sín t'etóan sín. ²⁶ Kjánchó jahará la xikahya chrókjuich'erá. Náhí. Tí jnkójnra tjinkáonrá chrókuétoanrá la chrókjuinkitsará tí í so sín. ²⁷ A ntá tí jnkójnra tjinkáonrá chrókuétoanrá mé t'ichjánxin senó chrókjuakóxinrá chrókjuich'eherá kichuárá xra. ²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikuí ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jina yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús. ³⁰ Ntá ntaha chrínta ntja tjejótxaxín yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'iyehé sín ch'án ntáchro sín kixin:

—Inchéni, jaha tsik'axrjeníxian David, tjikonóghéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánírá tí jahará —ichro sín.

Ntá tí jehe sín antsi itsén k'uèya sín, ntáchro sín kixin:

—Inchéni, jaha tsik'axrjeníxian David, tjikonóghéni —ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankihi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátehe sín ntáchro sín kixin:

—Jaha Inchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kuíkonógehe ch'án tí jehe sín la kjuínchekuaókóxin tja ch'án tí ikon tí sín t'ikonhya. Ntá tuénxín k'uikon sín la chréhe sín tí ch'ín Jesús.

21

K'uíxenhén ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jna Olivo. Ntá ch'ín Jesús k'uetuénhen ch'án iyó tí sín k'uájiko ch'án ² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjíkuanará va ntihi. ³ A ntá tí nknojín nkexro tsjanchankíhará nkekuénté tjasintankehéra va la ntá tsonáchrórá kixin “Inchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxitéyá tí nkehe chrónka ijnko ch'ín k'u'échrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjehéra ó kui tí ch'ín Rey kuéntará.

Ihnkehya ch'án la ijnko kolócho ó tjejkjen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexitéyá sín tí nkehe k'uetóan ch'ín Jesús. ⁷ Ntá kjuíkáo sín kolócho la ko xjeen va la kuakitsje sín ika títáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka títáte sín na kjuentoá sín ka tinkák'ikjínxín sín ka tí ntá ts'atsínkaxín ch'ín Jesús. La iso sín xraá kajni la ko chaon nta yoa tsikóchrínjin sín la tinkákjasin sín ntá a. ⁹ Ntá iso sín tsitaón ntá la ko í so sín chréhe iton ch'án mé kjuankixin sín itsje sín kixin:

—Tjancheheni kjuasáyé tí nkexro k'uaxrjenixin tí rey David. Jína tí nkexro kjuíxín kjuachaxién ihnié Inchéni. Tjancheheni kjuasáyé Dios —ichro sín itsje sín.

¹⁰ Ntá k'uíxenhén ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátéhe sín ntáchro sín kixin:

—Tíhi mé tí nkexro Jesús chrónka itén Dios kjuíxín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uíxenhén ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjínkitóxixín sín chichaon la ko tí silla tjejókjen tí sín nchekji kontóá. ¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntóna imé it'in nchia tsonixjanaxian sín.” A ntá jahará tí nchia í tsíkjih'énará itjueé xíchee[†] —mé xíkaha ichro ch'ín Jesús.

¹⁴ Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitóhe ch'án sín jina. ¹⁵ A ntá tí sín nchat'á tjetóan la ko tí sín maestro tjako tí ley mé k'uíkon sín kaín tí kjuaxroan kjuíche ch'án la ko kuínhin sín kixin iso chánjan mé itsje sín nkaxenhen nínko ntáchro sín kixin: “Chjéheni kjuasáyé tí nkexro k'uaxrjenixin rey David”, ichro sín. Ntá kuínhin tí sín a xíkaha ntá kónínkaon sín ¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkíhi chro: Jaha kjuánjuan kjuachaxín kixin tí sín chánjan hyé la ko chánjan naxá tjejótakí mé tsotsje sín[‡]

—mé xíkaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjenixin ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóyjan nchítjen ntá kjan sín chjasin Jerusalén inaá la ikuí sín ntá ntá ch'ín Jesús mé ik'uéen ch'án kjiná. ¹⁹ Ntá k'uíkon ch'án itjen ijnko nta t'óna to higo chjino ntá. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxá k'ónahya to. A ntá jehe ch'án mé nixjehe ch'án tí nta, ntáchro ch'án kixin:

* 21:5 Isaías 62.11; Zacarías 9.9 † 21:13 Isaías 56.7; Jeremías 7.11 ‡ 21:16 Salmo 8.2

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuénté kixin tí nta t'óna to higo tuénxín xámá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrxjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjeherá tí jnā i kixin: “Sátjixian ntihi sátjijkjánkiá ntayaon”, la mé xikaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéherá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxnen ch'án tí nínko ntiha. Ntá tió tjetjako ch'án ntá kóchjina iso tí sín nchát'a t'etqan la ko tí sín táda judío t'etqan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánchánkihará ijnko nkehe siná tsjateherá ntá janhan tsotjonkará nkehe tí kjuachaxin chonta jtét'a tí xra i. ²⁵ ¿A ntá nkexro k'uētuenhen ch'ín Juan kixin tsíkíte ch'án chojni? ¿A Dios ní o á chojni ó? —mé kjuanchankí ch'ín Jesús.

Ntá jehé sín itjo sín kíchó sín kixin:

—A ntá tí tsontáchroni kixin Dios tsik'etuenhen tí ch'ín Juan ntá tsjanchankí tí ch'ín a kixin nkekuénté kuitekakuenhyani ch'án. ²⁶ A ntá tí tsontáchroni kixin chojni ó tsik'etuenhen ch'án la ntá chrakonhenni tí chojni kixin kaín sín kuitekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsórxjánkahya nkexro kjuanjon kjuachaxin kixin jtét'a tí xra —ichro ch'án.

Ch'ín Jesús mé kjuíncheyóxin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjen ch'án la ijnko yaon nixjehé ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án. ²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uúixitoxin tí kjuenkayáxin ch'án la sákjuíkijich'e ch'án tí xra a. ³⁰ A ntá tí it'é xjan a mé kjuínixjehé ch'án tí i jnko xjan la jnkokón k'uētuenhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsikji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uētuenhen it'é? —ichro ch'án.

Ntá kjuátehe sín kixin:

—Tí xjan sao —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkj la ko tí chojni chjin ch'iyehé nchónhya chojni ntoa la saoxin ts'ixnenhén sín tí kjuachaxin t'etqan Dios la ntá jahará la náhi. ³² Kixin ch'ín Juan Bautista mé ikui ch'án kjuakohará ch'án nkexri chrók'uejorá la ntá jahará kuitekakuenhyará tí chrónka ch'án. A ntá tí sín nchekjènkj la ko tí chojni chjin ch'iyehé nchónhya chojni ntoa mé kuitekaon sín. A ntá jahará kjónté xikaha k'uíkonrá la kjuítokjénhyará tí tjenkayáxinrá la ko kuitekákonyará —ichro ch'ín Jesús.

Ch'ín Jesús kjuíncheyóxin ch'án kixin éxi chojni ch'e xra la jínahya qсэн sín

(Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxi ijnko ch'ín k'uēnkaxin ch'án itsjé ntanoa t'óna to uva nontee ch'án. Ntá kjuíchéna ch'án ijnko corral. La ko ijnko tjo kjuíchéna ch'án tóye kixin ts'énya sín inté to uva. La ko kjuíchéna ch'án ijnko tjat'q noi kixin ts'it'ótjen ch'án tsotsjehé ch'án nkuíxín. §

A nta kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín. ³⁴ A ntá tí kjuixraká tí yaon k'óna nkehe ntá jehé ch'án mé ichr'án ch'án iso tí chojni ch'ehe ch'án xra kixin tsjikjanchehe sín tí sín ch'e xra nontee ch'án kixin tsjanjon sín tí nkehe

tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A ntá tí inché nonte a xích'án ch'án iso chojni ch'ehe ch'án xra ínaá, a ntá tí sín ch'e xra la kjaxín xikahó kjuích'ehe sín tí sín kjuíji.

³⁷ A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchóntehe sín kjuasáyé tí xjeen ch'án, ichro ch'án. ³⁸ A ntá tí k'uíkón tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín í mé ts'áyéhe ch'án kaín nkehe. Ts'óyánni ch'án kixin ntá tsitqekoni kaín tí nkehe kuènte ch'án”, ichro sín. ³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátqhe sín kixin:

—Mé tsjiji ch'án la tsikonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xíkíhi:

Tí xro náxrxjónhya kuitqenta tí sín ch'éna tját'ó,

a ntá mé jie k'óna tí xro tjeotan.

Mé xikaha kjuích'e Inchéni Dios,

na ntá tíha mé ijnko nkehe kjuachrakon k'uíkonní.*

Mé xikaha ichro itén Dios.

⁴³ Ntá ntáchro ch'ín Jesús kixin:

—Tjonkará kixin Dios tsakitsjehará tí kjuachaxin kuènte ch'án la ntá sinchek'áyéhe ch'án tí sín ch'e xra jína. ⁴⁴ A ntá jnkójín nkexro tsjitsínka chrítaón tí xro í mé tsqkuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchát'á tjeotan la ko tí sín fariseo mé kuínhin xikaha kjuíncheyóexín ch'ín Jesús ntá kienxín sín kixin kaín tí ntáchro ch'án kjuíncheyóexín ch'án kixin tí jehe sín xikaha tsonhen sín. ⁴⁶ La ntá tjinkaon sín chrókjuínchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexín éxí ijnko kia kótehe sín

¹ Ntá ch'ín Jesús mé kjuankixin nixja ch'án ínaá la kjuíncheyóexín ch'án ntáchro ch'án kixin:

² —Tí kjuachaxin kuènte Dios mé éxí yóhé ijnko ch'ín rey kjuasin ch'án ijnko kia kixin tsqtehe xjeen ch'án. ³ K'uétuénhen ch'án tí sín ch'ehe ch'án xra kixin tsjik'íyehé sín tí sín kjueyá ch'án, kjánchó jehe sín mé tjinkakonhya sín tsqchjina sín. ⁴ A ntá k'uétuénhen ch'án ínaá í so tí sín ch'ehe ch'án xra ntáchro ch'án kixin: “Chenka tí sín ó k'uíyahá kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanka la kaín nkehe la ó síchónhen. A ntá chróxrakoa sín tí sín kia”, mé xikaha k'uétoan ch'án. ⁵ A ntá tí sín tsik'íyehé ch'án mé ántosén sín. Ijnko sín la sákjuí nqntee la í jnko la sákjuí ch'án í jnko xra chóna ch'án. ⁶ La í so tí sín a mé tsísé sín tí sín tsik'etúenhen tí ch'ín rey la k'óka tí sín a hasta ik'uén tí jehe sín. ⁷ Ntá tí ch'ín rey mé kónínkaon ch'án ntá k'uétuénhen ch'án tí sín soldado kixin its'en tí sín kjuaya la ko tsoche tí chjasén sín. ⁸ Ntá nixjehe ch'án tí sín ch'ehe ch'án xra ínaá ntáchro ch'án kixin: “Kaín nkehe la ó síchónhen kixin tí nkexro tsqtehe la ntá tí sín k'uíyahá kjuítakakonhya sín la kjuihya sín. ⁹ Méxra sátsjirá tí esquina tí ntja jie la t'iyehérá kaín tí sín tsqxetará kixin itsji sín tí kia”, ichro ch'án. ¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntja ntíha, mé chojni jína la ko chojni jínahya hasta k'uixíkaon chojni tí nchia ntíha.

¹¹ Ntá tí ch'ín rey mé kuítsjehe kaín tí sín tsik'íyehé ch'án la ntá k'uíkón ch'án ijnko ch'ín ntíha chónahya ka jína kuènte tí kia a. ¹² La ntá nixjehe ch'án, ntáchro ch'án kixin: “Amigo, ¿nkexrí k'uixénhén kixin tsik'ítsahya kuènte kié chojni tsqtehe?” ichro ch'án. Ntá tí ch'ín a kjuátqehya ch'án ninkehó. ¹³ A ntá tí ch'ín rey mé k'uíyehé ch'án tí sín ch'ehe ch'án xra la ntáchro ch'án kixin: “Sínchenteto toté la ko itja tí ch'ín a la ité ntója sítíe la nta ntíha a mé tsqtsjánka ch'án la sínetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahá la séhya sín k'uitja —mé xikaha kjuako ch'án Jesús.

Ch'ín Jesús ntáchro ch'án kixin ó nchoxon tsjenkehe sín gobierno

(Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxín sín tí ch'ín Jesús kixin ách'e ichrén jie tsjasin ch'án la ntá tsjanchia sín jie. ¹⁶ Ntá ichr'án sín iso tí

* 21:42 Salmo 118.22-23

sín ch'ehe sín xra la iso tí sín ch'ehe tí ch'ín Herodes xra kixin tsjachaxin sín tí ch'ín Jesús. Ntá tí sín a nixjehe sín ch'án ntáχρο sín kixin:

—Maestro, ó noheni kixin tí nkehe ntáχhua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jina sín. ¹⁷ A ntá jaha chronka nkehe tjenkayáxian. ¿Á jina chrókjuenkeheni tí gobierno romano o náhi? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáχρο ch'án kixin:

—Jahará ntoáhya tjenkayáxinrá. ¿Nkekuente chrókjuáchaxínráni? ¹⁹ Tjákonará tí chichaon tjenkehérá sín méhe —mé xikaha k'ueŋtoan ch'ín Jesús.

Ntá kjuikohe sín ch'án tí chichaon a. ²⁰ Ntá k'uikon ch'ín Jesús ntá kjuanchankí ch'án kixin: —¿Nkexro tí tsík'axrxjén tjenkáni tí chichaon méhe la ko nkexro ihnié chóna? —ichro ch'án.

²¹ Ntá kjuátehe sín kixin:

—Tí ch'ín t'etōan mé tjenkáni ch'án —ichro sín.

Ntá ntáχρο ch'ín Jesús kixin:

—Chróχjehérá tí ch'ín gobierno t'etōan tí nkehe kuente ch'án la kjaxin tí nkehe kuente Dios la chróχjehérá Dios —mé xikaha chro ch'ín Jesús.

²² Ntá tí kuínhin sín xikaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuachaxin sín ch'ín Jesús. Ntáχρο sín kixin:

²⁴ —Maestro, tsintáχρο ch'ín Moisés kixin tí its'en ijnko chojni la naŋa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín sao tsík'en. ²⁵ Ntá ntíhi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xikaha kónhen inaá. La kayatoé tí sín k'uéchóna sín tjan xikaha kónhen sín kaín sín ik'uén sín. ²⁷ A ntá kjuixixín ntá kjaxin tjan ik'uén tjan. ²⁸ Ntá tíó tsoxechón kaín xín chojni tsík'en, ¿ntá nkexro ts'óna xì tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáχρο ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuente Dios. ³⁰ A ntá tí chojni tsík'en tí tsoxechón la tsoteehya sín la ko tsoteehya tí xjeen sín kixin tí sín tsík'en la éxi tí sín ángel kuente Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáχρο Dios? Jehe ch'án xikíhi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóχón —mé xikaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjeoan

(Mr. 12.28-34)

³⁴ Ntá tí sín fariseo mé tsíkójnkotsé sín tíó kónohe sín kixin nkehe chro ch'ín Jesús la ninkehó kjuáteehya tí sín saduceo. ³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjeoan kuente tí ley? —ichro ch'án.

³⁷ Ntá ntáχρο ch'ín Jesús kixin:

—“Chrótjuèhérá Inchéni Dios kaín asánrá la ko kaín kjuaxrexinkaon kuéntará.”† ³⁸ Mé tíha mé tí ley imá tjeoan la ko saoxín k'ueŋtoan Dios tíha. ³⁹ A ntá tí nkehe yóxin la tóyóhe la mé ntáχρο xikíhi: “Chrótjuèhérá kichuárá éxi tjuèxinrá asánrá.”‡ ⁴⁰ Tí iyó nkehe i la mé antsí tjeoan kuente tí ley tsík'etōan Moisés la ko tí nkehe kjuako tí sín k'uéchónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naŋa jnkokoá tjejó sín ⁴² la ntá ch'ín Jesús mé kjuanchankí ch'án ntáχρο ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrxjén sín ch'án? —kjuanchankí ch'án.

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18

Ntá ntáchro sín kixin:

—Tí Cristo mé tsik'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Inché ch'án tí Cristo? Ntáchro ch'ín David xikihi:

⁴⁴ Inchéni Dios ntáche tí Inchéni kixin:

“Tjak'e tjaná chjina ntiho tsétəan,

tsjixinjian kaín xín tí sín nínkakonhan la tsjachahya sín ts'etəan sín kixin jahvá mé tsétəan.”⁵ Mé xikaha chro itén Dios. ⁴⁵ A ntá çá nkexrí kixin Cristo chrók'óna xjeen David a ntá jehe ch'ín David kuikítexín ch'án Inché ch'án tí Cristo? —ichro ch'ín Jesús.

⁴⁶ A ntá nínkexró xitjahya kjuátehe sín nínkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés. ³ Méxra chrókjuinchexiteyéherá kaín tí nkehe t'etəan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín. ⁴ T'etəuñhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dede tja sín chrókjuinkítsa sín tí nkehe imá ye yamá chojni. ⁵ Ich'e sín kaín nkehe kixin tsotsjehe chojni. Tóxrjínhin sín tsjak'enkáni totjen sín la ko itja sín ijnko xroon kjinjin iton ts'inixín itén Dios la tjinkaon sín iké sín sixinkáni nkehe tjákiní. ⁶ Tjinkaon sín tsochóna sín silla jina ts'ejókjen sín sine sín tió sátsji sín tí síin kia la ko xritjeýá sín tí silla antsí náxrjón chrók'uejóya sín nkaxenhen njnko. ⁷ La ko tjinkaon sín kixin chojni chrókjuikosáyehe sín tsoxeta sín tí ntá la ko tjinkaon sín kixin tsontáchro chojni kixin maestro tí jehe sín.

⁸ A ntá jahará la tjuéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohyará kixin nínkexró mé it'ará ntíhi chjasintajni kixin jahará la chontará jnkokoá It'ará mé itjen nkaya nkajni. ¹⁰ La ko jehe sín chróntáchrohya sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkítsa iso chojni la jehe ch'án mé antsí t'etəan ch'án. ¹² Kixin tí nkexro ntáchro kixin imá ijié la mé imá tsontsí. A ntá tí nkexro nchehnkehya la antsí tsojié.

¹³ Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxin chojni tí kjuachaxin kuente Dios kixin tjuéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjàkorá tí ley la ko chojni fariseo. Jnkójínxónhya tjenkayáxinrá. Jahará takitsjeherá ntəe tí chojni tsikók'án la ntá isé nixjehérá Dios kixin ch'iyexínrá chojni kixin jina tí jahará. A ntá xikaha kjuich'erá jahará la antsí tsjasótiará.

¹⁵ Nòará tí jahará kixin tétəanrá kjánchó ntakótánrá. Jahará la jnkójínxónhya tjenkayáxinrá. Jahará sátiá nonte la chrítaón ntəyaon kixin tsjákohérá ijnko chojni tsinkáchónki xikaha tí tinkáchónkirá la ntá tió kjuachará kjuachroerá sín la ntá jehe sín antsí má tsjasótəxín sín tí xrohi la kánhyó jahará.

¹⁶ Nòará tí jahará kixin tétəanrá kjánchó ntakótánrá. Ntáchorá kixin tí jnkójín chojni tsontáchro kixin sinchexiteýá sín nkehe la t'ákjenxin sín tí njnko la ntá t'ichjánxinhya sinchexiteýá sín. A ntá tí tsontáchro sín kixin sinchexiteýá sín nkehe la t'ákjenxin sín tí chica oro siin nkaxenhen njnko la ntá t'ichjánxin sinchexiteýá sín. ¹⁷ Imá lontírá la ko ntakótánrá. ¿Á imá tjetəan tí chica oro o á imá tjetəan tí njnko kixin tí njnko mé kótjuáxin tí chica oro? ¹⁸ Kjaxin ntáchorá kixin: “Tí jnkójín chojni tsontáchro sín kixin sinchexiteýá sín nkehe la t'ákjenxin sín tí altar la ntá t'ichjánxinhya sinchexiteýá sín. A ntá tí tsontáchro sín kixin sinchexiteýá sín nkehe la t'ákjenxin sín tí nkehe tjokehe sín Dios chrítaón tí altar la ntá t'ichjánxin sinchexiteýá sín tí nkehe tsintáchro sín.” ¹⁹ Imá lontírá la ko ntakótánrá. ¿Á imá tjetəan tí nkehe tsochjehérá Dios o á imá tjetəan tí altar kixin tí altar mé tótjuáxin tí nkehe tsjánjonrá? ²⁰ Kixin tí nkexro tsontáchro kixin sinchexiteýá nkehe la t'ákjenxin ch'án tí altar la jehya t'ákjenxin ch'án tí altar ó. Náhi. Kjaxin t'ákjenxin ch'án kaín tí nkehe siin

chrítaon ntiha. ²¹ A ntá tí nkexro tsontáchro kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhi. Kjaxin t'ákjenxin ch'án tí Dios itjen ntiha. ²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuente Dios la ko tí nkexro tjet'etqan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kain tí kaxroqan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetqan kuente tí ley. Mé ntoá chrókjuenkayáxinrá la ko chrókjuikonóehérá kichuárá la ko chrókjuinkachónkirá Dios. Tíhi la antsí tjetqan chrókjuinchexiteyará la kjaxin chrókjuitoéhyará chrokjuich'erá tí í so nkehe. ²⁴ Jahará la tétqanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijié va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkojínxónhya tjenkayáxinrá. Jahará la imá nchetjóará chrítaon tí vaso la ko tí plato, a ntá tí nkaxenhen tsikaón kjuachee la ko jahórá tjínkaónrá chróchontará itsjé nkehe. ²⁶ Jahará chojni fariseorá imá ntakótán jahará. Saqxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaon kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkojínxónhya tjenkayáxinrá. Jahará la éxi yóhe ijnko tseyáxinrá chojni, imá náxrjón tsjehe ntója, a ntá nkaxenhen mé tsikaón huéseó chojni tsik'en la ko kain nkehe tjuáhya. ²⁸ Mé xikaha tí jahará la tsjehe éxi chojni jina xikaha, a ntá jnkojínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkojínxónhya tjenkayáxinrá. Jahará la kjuich'énará tjet'ó náxrjón chrítaon tí tóye tsíxravá tí sín k'uékjako itén Dios osé la ko nchek'ítsará tjet'ó chrítaon tóye kuente tí sín jina asén. ³⁰ La ntá ntáchrorá kixin tí chrók'uejorá tí k'uéjé tí sín tsik'axrjeníxinrá la ntá chrókjuinkítsahyará chrók'uéen tí sín kjuako itén Dios. ³¹ Méxra xikaha jahórá ntáchrorá kixin chaxin tsik'axrjeníxinrá tí sín k'óyán tí sín k'uékjako itén Dios. ³² Méxra ijie la tjínkaónrá tsjixinhanrá tí xra kjuich'e tí sín tsik'axrjeníxinrá.

³³ 'Jahará la tsik'axrjeníxinrá konche. ¿Ntá nkexrí chrókuaará kixin itsi tí tsjasótíará? ³⁴ Méxra janhan mé tsétqanhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjalexínrá sín nkaxenhen nínko la ko tsochonkíhírá sín chjasin la chjasin. ³⁵ Méxra jahará la yamará tí jie kixin tí sín jina k'uítjixin íjnje senó. Méxra tsamará tí jie kixin ik'uén ch'in Abel, tí nkexro jina, la ko kain tí í so sín hasta ik'uén ch'in Zacarías, xjeen Berequías, tí nkexro k'oyánxinrá chjino tí altar. ³⁶ Chaxín tjonkará kixin kain tí jie a mé yamá tí chojni síin ijie.

*Tsjánka ch'in Jesús
(Lc. 13.34-35)*

³⁷ Ntá ntáchro ch'in Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkítsará. Nchónhya veces tjínkavan chrókójnksotésará la chrók'uáyakonhánrá éxi ijnko cochiká mé t'ayakonhen xjeen va chrínki kanenge va mé xikaha tjínkavan chrók'uáyakonhánrá tí jahará. Kjánchó jahará la tjínkákonhyará xikaha. ³⁸ Ntá jie la Dios la tsítqhe tí jahará. ³⁹ Ntáxrxjan kixin í ts'ikonhyará tí janhan inaá tsjixrakájia tí yaon tsontáchrorá kixin: “Imá jina tí nkexro kujxin kjuachaxién ihnjé Ìncheni” —mé xikaha ichro ch'in Jesús.

24

*Chrónka ch'in Jesús kixin ts'itjáyán tí nínko
(Mr. 13.1-2; Lc. 21.5-6)*

¹ Ntá ch'in Jesús k'uaxrxjén ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a. ² A ntá ch'in Jesús mé kjuátqhe ch'án kixin:

—Jahará ¿á tjejtsjehérá kain tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókenhya kichó kixin kain tíha la tsóxika —ichro ch'án.

*Tí nkehe tsonhen tió tsjixín
(Mr. 13.3-23; Lc. 21.7-24; 17.22-24)*

³ Ntá sákjuj sín chrítaon tí jna Olivo la ch'in Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjínkaonni tsochónka nkesá tsonhen tíha. ¿Nkexrí tsoñoexinni tió ts'inka tí jaha la ko nkexrí tsoñoexinni tí itsi tí tsjixín chjasintajni? —ichro sín.

⁴ Kjuátqhe ch'in Jesús kixin:

—Tóxakonhanrá títóéhyará kixin ninkexró chrókjuít'áyahará. ⁵ Nchónhya chojni itsi sich'i yaxín nina tsontáchro kixin: “Janhan mé tí Cristo” tsixro sín, la sich'i yehe sín nchónhya chojni. ⁶ A ntá tió tsinhínrá tsontáchro chojni kixin ó síin kjuanínkaon la ko ts'ixín kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxá ts'itjáyannya chjasintajni. ⁷ Ijnko nación tsjanjonko í jnko nación la tsjanjonxin sín tí xra ts'etóan sín. La ko itsjé chjasin na tsokjinta la ko tsoníhi chojni la ko ntíhi la ntaha tsínki nonte. ⁸ Kaín tíha la ntá tsoxrankixixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxreé kixin sinchekjasótíará sín la ntá ts'óyanrá sín. La ko kaín xín chojni síin chjasintajni tsóninkakonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsóninkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'i yehe sín nchónhya chojni. ¹² La ts'ixín nchónhya jie jínahya la ntá ts'ixín itsjé chojni tsotjuéhya sín kichó sín. ¹³ A ntá tí nkexro naxá tjejó tinkáchónki tí janhan hasta tí tsjixín la mé tsaá. ¹⁴ La ko tí itán jína chrónka nkexrí tjen tí kjuachaxin kuénte Dios la t'ichjánxin tsinhin sín kuénte chjasintajni, la tió tsjixin tsinhin sín kuénte chjasintajni la ntá ó ts'itjáyannya chjasintajni.

¹⁵ Ch'ín Daniel k'uéchrónka itén Dios mé tsikjin ch'án kixin tsjixraká ijnko yaon tsjak'e ijnko nkehe jínahya nkaxenhen njnko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. ¹⁶ Ntá kaín tí sín tjejó estado Judea tsochriin sín jna sátsji sín. ¹⁷ A ntá tí sín tjejó chrítaón nchia ntóé sín la í xitjahya tsakítsje sín ninkehó. ¹⁸ Ntá tí tjejóche sín xra nontee sín la kjá í tsokjanhya sín tsjikakja sín iké sín. ¹⁹ Ntá nóa tí chojni chjin tjejóyá sín la ko nóa tí sín nchekakí xjan tí yaon a. ²⁰ Chrókjuanchehérá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni. ²¹ Kixin tíha mé ijnko kjuachrakon imá ijié la desde tí xrankixixín chjasintajni la nunca xikahya kónhen. ²² Ntá tí chrók'uetóanyha Dios kixin tjoka ts'atsínka tíha ntá chrókuaáhya ninkexró. Ntá ts'etóan ch'án kixin tjoka ts'atsínka tí kjuachrakon jie kixin jehe ch'án mé imá tjeúhe ch'án tí sín tsíkjeýá ch'án.

²³ Ntá tí tsontáchro chojni kixin: “Tsjehé ntíhi itjen Cristo”, o “Tsjehé ntíha itjen ch'án”, la ntá chrókútefékáuénhyará sín. ²⁴ Kixin ntá itsi iso sín tsontáchro sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jie kixin tjnkaon sín chrókjuich'iyehé sín chojni kjónté tí sín tsíkjeýá Dios. ²⁵ Ó xrjanka senó nkehe tsonhen kixin tsjonhará. ²⁶ Méxra tí chróntáchro sín kixin: “Tsjehérá tí nteje ntíha tjen ch'án”, la ntá tsjihyará nó ntíha. O tí chróntáchro sín kixin: “Tsjehérá ntíhi tí cuarto mé tjen ch'án”, la chrókútefékákonyhará. ²⁷ Méxra éxi tsjonkixín la t'íkon chojni t'inkaséyanxín tí tjtóxin yaon hasta tsjiatóxin yaon mé xikaha ts'íkon chojni tió itsi tí Xjeen Dios K'óna Chojni. ²⁸ Mé éxi yóhe tí tjen ijnko cuerpo tsík'en la ntíha tsjokotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jie la ntá tí yaon la tsotie a ntá tí nitjó la í ts'inkaséyanxínnya. La ko tí konotsé la tsoxènjxin nkajni la kjaxin kaín nkehe síin nkaya nkajni la tsínki. ³⁰ La ntá ts'íkon chojni kixin nkajni tsjixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'íkon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkjo tí kjuachaxin jie. ³¹ Ntá tsóchr'án Dios tí sín ángel kixin ts'ánoa sín tí trompeta itsen kixin tsóchjina kaín tí nkexro kjuéyá Dios tsjixín kanqé lado chjasintajni.

³² Chrók'uitjará nkexrí sintayóaxian kuénte ijnko nta to higo. Éxi yóhe tió chóna ntahnte la ko ts'ixín kayoa la nta tsónoaxínrá kixin í séhya tsokjan ichrin. ³³ Mé xikaha tí ts'ikonrá ts'atsínka kaín tíha la ntá xikaha tsónoaxínrá kixin í séhya itsi Inchéni. ³⁴ Ntá tjonkará chaxín kixin kaín tíha senó tsonhen tí naxá ts'enhya tí chojni sín jie. ³⁵ A ntá tí nkajni la ko tí chjasintajni mé ts'itjáyannya. A ntá tí nkehe ntáxrjan la nunca ts'itjáyannya tsóxitéyá tíha.

³⁶ A ntá tí yaon la ko tí hora tsóxitéyá tíha la kohya ninkexró nohe. Ni tí sín ángel tjejó nkaya nkajni noehya sín la ko ni tí Xjeen Dios noehya. Ó jehó tí It'é mé nohe.

³⁷ Éxi yóhe tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni. ³⁸ Tí naxá títiéhya sín ntá la kaín chojni la jína k'uéjó sín la kjóne sín la ko ik'uí sín la ko sitótehe sín kjuixrakájia tí yaon k'uixenhen ch'ín Noé ntabárcó.† ³⁹ A ntá jehe sín mé kienxínnya sín hasta kuijia tí k'uániá chrin ntá ikui ntá la k'uátjóá kaín sín. Mé xikaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóche sín xra nonte la ntá ijnko la sátsji la í jnko la tsítóhe. ⁴¹ La ko yaá chojni chjin mé tjejó'tó sín la ijnko la sátsji la í jnko la tsítóhe.

* 24:15 Daniel 9.27 † 24:38 Génesis 6.5-8

⁴² 'Chrók'uejotsjehérá kixin noahyará nkehora la ko nkesá ts'inka janhan. ⁴³ Chrókónohará tíhi: tí chrókónohe ijnko inché nchia nkehora tie chrókjui ijnko nkexro tseé la ntá chrókjuak'echónhen tí inché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jina chrók'uejorá kixin tí Xjeen Dios K'óna Chojni me titáya itsi.

Tí nkexro jina ch'e xra la tí nkexro ch'ehya xra jina
(Lc. 12.41-48)

⁴⁵ Tí nkexro chaxin ch'e xra jina la ko imá nohe la ntá tí lámoe ch'an ts'etuenhen kixin ts'ayakonhen ch'an tí sín siin ntqe ch'an la ko tsjanjon ch'an nkehe sine sín ch'nti tí hora a. ⁴⁶ Náxrxón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'an tí xra k'uituenhen ch'an. ⁴⁷ Chaxin tí lamo la tsjanjon ch'an kaín tí xra chóna ch'an ts'etqan tí ch'in a. ⁴⁸ A ntá ijnko chojni ch'ehya xra jina la ntá tsjenkayáxin ch'an kixin kjá tjokahya tsokjan tí lámoe ch'an ⁴⁹ la ntá tsjanxixin ch'an tsjanjonko ch'an tí í so sín ch'e xra la ko tsjanxixin sineko ch'an la ko its'ikao ch'an kaín tí sín sítokoan. ⁵⁰ Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'an la sinchekjasóte tí ch'in kuitohehe xra kjuinchehiteyáha la ts'etqan ch'an kixin tsjasóte tí ch'in a éxí tí sín jnkojinxónhya tjenkayáxin. Ntá ntiha la tsotsjanka ch'an la ko sinetáo neno ch'an.

25

Ch'in Jesús kjuincheyóexin ch'an kixin ite sín tjarisoá

¹ Ntáchro ch'in Jesús kixin:

—Tí kjuachaxin kuénte Dios mé éxí yóhe ite sín tjarisoá sátsji tí tsotehe chojni chuénko linterna tjá aceite la sákujuichónhen sín tí ch'in tsikótehe. ² In'ó sín la tsikóyaxienhya sín la in'ó sín ó tsikóyaxinhin sín. ³ Tí sín tsikóyaxienhya na kjaxin la tsikjijiko sín linterna kjánchó tsikjijikohya sín aceite tsikja inaá. ⁴ A ntá tí sín tsikóyaxinhin la sátsikjiko sín xro tjá aceite la ko tí linterna kuénte sín. ⁵ A ntá tí ch'in tsikótehe la tjokahya kui ch'an la ntá jehe sín mé tsikihi sín kotáchrín la tsik'ejóua sín kaín sín. ⁶ A ntá kuichjina k'áxrótjen la kuinhin sín t'èya ijnko chojni kixin: “Ó kui tí ch'in tsikótehe na t'axrjerá ntója tsoxetará ch'an”, ichro ch'an. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuénte sín. ⁸ A ntá tí in'ó sín tsikóyaxienhya la nixjehe sín tí sín in'ó tsikóyaxinhin ntáchro sín kixin: “Chjehéni intsi aceite kuéntará kixin ó k'uànká aceite tjá linternéni”, ichro sín. ⁹ A ntá tí sín tsikóyaxinhin mé ntáchro sín kixin: “Náhi, tí aceite tí xikaha tsjanjonni intsi jahará la antsí jeheni la tsjachahya. Íchá jina sátsjik'énará tí sítoxín ntiha”, ichro sín. ¹⁰ Ntá tí in'ó tí sín kóyaxienhya mé sákuju'èna sín aceite la ntá ó kui tí ch'in tsikótehe. Tí in'ó sín tjejóchónhen mé sákujuiko sín ch'an tí kia tsikótehe sín la ntá ó tuénxin k'uijkéhe tí puerta. ¹¹ Ntá chr'éxin ikui tí in'ó sín tjarisoá tsikóyaxienhya la t'ínka sín puerta ntáchro sín kixin: “Ó kuini takitjehé nchia.” ¹² A nta jehe ch'an kjuátehe ch'an ntáchro ch'an kixin: “Chaxin tí jahará la ní chonhyará”, ichro ch'an.

¹³ Ntá ntáchro ch'in Jesús inaá kixin:

—Méxra xikaha tí jahará chrók'uejotsjehérá kixin noahyará nkeyaon la nkehora itsi tí Xjeen Dios K'óna Chojni —ichro ch'an.

Ch'in Jesús kjuincheyóexin ch'an kuénte chichaon

¹⁴ Ntá ntáchro ch'in Jesús kixin:

—Tí kjuachaxin kuénte Dios la yóhe ijnko chojni tjinkaon sáchrókjui ch'an í jnko nación la ntá k'uáyéhe ch'an tí sín ch'ehe ch'an xra la ntá chjéhe ch'an sín tí chichaon a kixin ts'ayakonhen sín.

¹⁵ Ijnko ch'an la k'uáyéhe ch'an in'ó mil chichaon, la í jnko la k'uáyéhe ch'an iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'an nkexro tí tsjacha sich'e jnkojnko xra. Ntá jehe ch'an tió kjuixin kjuanjon ch'an la ntá sakjuí ch'an ikjín. ¹⁶ Ntá tí nkexro k'uáyéhe in'ó mil chichaon la kjuich'eko ch'an xra tí chichaon kuákja ch'an la kjuacha ch'an í jnko in'ó mil. ¹⁷ Kjaxin tí nkexro k'uáyéhe iyó mil chichaon mé xikjacha ch'an í jnko iyó mil. ¹⁸ A ntá tí nkexro k'uáyéhe ijnko mil chichaon mé sákuí ch'an la kjuich'èna ch'an ijnko tóye kjuavá ch'an tí chichaon kuénte lámoe ch'an.

¹⁹ A ntá nchónhya nánó k'uátsínka la ntá ikjan tí lámoe sín kixin ntá tsjentoáko sín ch'an cuenta. ²⁰ Saoxin kui tí nkexro k'uáyéhe tí in'ó mil la chjéhe ch'an tí lamo í jnko in'ó mil la ntáchro ch'an kixin: “Jaha mé chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'an. ²¹ Ntá tí lamo mé ntáchro kixin: “Nchoxon tí xikaha. Jaha la ijnko chojni jina ch'e xra. La ó kjuinchehiteyá jina. Kjónté jehya xra jíé la kjuinchehiteyá jina la ntá tsojtaha ijnko xra antsí jíé la tjak'e tsochéheni.” ²² Ntá chr'éxin ikui tí nkexro k'uáyéhe iyó mil la ntáchro ch'an kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'an. ²³ La ntá tí lamo ntáchro kixin: “Nchoxon jaha mé

ijnko nkexro jina ch'e xra la ó kjuinchexiteyá. Kjonté jehya xra jié la kjuinchexiteyá jina la ntá tsotjaha í jnko xra antsí jié. Tjak'e tsöchéheni", ichro ch'án. ²⁴ A ntá ikui tí ch'in k'uáyéhe ijnko mil la ntáchro ch'án kixin: "Ó nóna kixin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjonté k'uénkahya. ²⁵ Méxra chrakonni la sákjuikjak'emáni tí chichaon chrínki nche. Tákjá chíchakqan tjinhin", ichro ch'án. ²⁶ A ntá kjuátehe tí lamo kixin: "Jaha ijnko chojni jínahya la ko séhe. Jaha la ó noha kixin chrótjajá tí nonte k'uénkahya la chrókuákjáa tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó ch'áca", ichro tí lamo. ²⁸ A ntá nixjehe ch'án tí í so sín tjejó la ntáchro ch'án kixin: "Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjonté itsjé chóna la mé ts'áyéhe antsí la ntá tí nkexro chónahya la kjonté tí intsí chóna la ts'axrjehe. ³⁰ A ntá tí nkexro ch'ehya xra la tsétuénhén sátsji ch'án tí sítié ntója la ntá ntiha la tsotsjanka ch'án la ko sinetaón ch'án neno ch'án."

Tsitoxén ijíe chojni chjasintajni

³¹ A ntá tí tsi tí Xjeen Dios K'óna Chojni la tsjakqo ch'án kjuachaxién jié éxi ijnko Réy la ko tsjakqo ch'án kaín xín tí sín ángel ntá ntaha tsjak'etjajin ch'án tí trono ts'etqanxín tí kjuachaxién jié. ³² Ntiha kaín xín tí chojni tsíkjinín nkuixín nación tsöchjina tí tje ch'án la jehe ch'án tsakitsjekjan ch'án ijnko la í jnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtsó la ókjé ts'ixin. ³³ Méxra ts'etqan ch'án kixin tí kolélo la ts'ixin nó tja ch'án chjina, a ntá tí koténtsó la nó tí tja ch'án kjon. ³⁴ Ntá tí Rey tsonixjehe tí sín tjejó tja ch'án chjina tsontáchro kixin: "Xrákirá jahará tí tje kjuachaxin kuénte T'aná kixin T'aná ó kjuincheyaonrá ch'án. Tí naxá kjuich'énahya Dios chjasintajni la xráxin kjuenkayáxin ch'án xikaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uía, la k'uájia éxi ijnko chojni kjuixín ikjín la jahará kjuánjonrá nketi k'ók'ána. ³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan." ³⁷ A ntá tí sín jina la tsjanchanki sín kixin: "Ínchéni, ¿nkesá k'uíkoni kixin ik'uén kjinta ntá kjuanjoni nkehe kjonté? ¿La nkesá k'uíkoni kixin ik'uén ntá la kjuanjoni nkehe ik'uía? ³⁸ ¿La ko nkesá k'uíkoni kixin ikjín kjuixian ntá kjuanjoni nketi k'ók'áha? ¿La ko nkesá k'uíkoni kixin chontahya iká la kjuanjoni ika k'uítsa? ³⁹ ¿La nkesá k'uíkoni kixin kóniha o kjuak'échjina la ntá kjuíjtsjeheni tí jaha?" mé xikaha tsjanchankihi sín ch'án. ⁴⁰ A ntá tí Rey tsontáchro kixin: "Tió kjuinkitsará ijnko kichó ní kjonté ijnko chojni nóe la mé yóhe kixin tí janhan chrókjuinkitsará."

⁴¹ A ntá tí Rey t'etqan mé tsonixjehe tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tje ch'án xrohi ts'ankahya. Mé tí xrohi tjechónhen kixin tsoche tí ch'in Tsochren la ko kaín tí sín ángel kuénte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uía. ⁴³ K'uájia éxi ijnko nkexro kjuixín kjin la jahará kjuánjonhyará nketi k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan." ⁴⁴ Ntá tí jehe sín la tsjanchanki sín kixin: "Ínchéni, ¿nkesá k'uíkoni kixin ik'uén kjinta la ik'uén ntá la ko kjuixian kjin la ko chontahya iká la ko níha la ko kjuak'échjina? ¿Mé nkesá k'uíkoni xikaha la ntá kjuinkitsahyani tí jaha?" tsixro sín. ⁴⁵ La ntá tí Rey tsjatehe ch'án tsontáchro ch'án kixin: "Tí xikaha kaín tíha kjuinkitsahyará ijnko chojni imá nóe la éxi xikaha kjuinkitsahyará tí janhan." ⁴⁶ A ntá tí sín jínahya xikaha kjuich'e la mé sátsjixin sín ntihi tsjasóte sín jnkochríxin. A ntá tí sín jina la sátsji sín ts'áyéhe sín kjuachón jnkochríxin —mé xikaha chrónka ch'in Jesús.

26

Tí sín nínkakonhen ch'in Jesús tjenkayáxin sín kixin nkexrí ts'óyan sín ch'án
(Mr. 14.1-2; Lc. 22.1-2; Jn. 11.45-53)

¹ Ntá kjuixín chrónka ch'in Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjáyán iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etqan ntá tsjak'enkani sín ch'án ijnko ntacruz —ichro ch'in Jesús.

³ Ntá tí sín nchat'á t'etqan la ko tí sín maestro tjako tí ley la ko tí sín táda kuénte tí sín judío mé kójnkotsé sín tí ntasin kuénte tí nchia kjuak'e ch'in Caifás tí ch'in nchat'á t'etqan. ⁴ Ntaha tjenkayáxin sín kixin nkexrí tsotsé sín ch'in Jesús la ts'óyan sín ch'án. ⁵ A ntá ntáchro sín kixin: —Tí síin kia la chrótséhyani ch'án kixin imá tsoninkaon tí chojni —ichro sín.

Ijnko tjan kjuikqao aceite xraxé kuikqite tjan ikja ch'in Jesús

(Mr. 14.3-9; Jn. 12.1-8)

⁶ Ch'in Jesús tjen chjasin Betania ntqo ch'in Simón tí ch'in k'uéchénta chinlepra. ⁷ Ntá xringhaya kóchjina ijnko tjan kjuikqao tjan ijnko xro tsík'óna xro mármol mé kuikqao aceite xraxé náxrxjón la imá tjete k'uíte. A ntá tí tjene ch'in Jesús ntá tí tjan a mé kuikqite aceite ikja ch'án. ⁸ A ntá tí sín k'uájiko ch'in Jesús mé k'uíkon sín xikaha ntá kónínkaon sín la ntáchro sín kixin:

—¿Nkeuènté kóxénhen tí xroqan a? ⁹ Íchá jina chrókóxiqin itsjé chichaon tí xroqan ntá tí chichaon a chrókjuinkitsa tí sín nóè a —ichro sín.

¹⁰ Ntá kuínhin ch'in Jesús tí nkehe tjo sín, ntá ntáchro ch'án kixin:

—¿Nkeuènté t'antaxínhíná tí tjan í? Ó nchoxon ijnko nkehe jina kjuich'e tjan. ¹¹ Tí sín nóè la ó xráxin ts'ejókoar sín, a ntá janhan la jnkochrxínhaya ts'ejóni. ¹² Tí nkehe kjuich'e tjan mé kjuincheka tjan aceite xraxé tí cuerpo kuèntana la mé xikaha kjuakoxin tjan kixin xikaha tsoxravána. ¹³ Ntá chaxín tjonkará kixin kuènté chjasintajni tió tsjako sín tí tán jina tsaáxin sín ntá tsochrónka sín kixin xikaha kjuich'e tjan ntá tsoxraxinkakonxin sín kixin nkehe tí kjuich'e tjan —ichro ch'in Jesús.

Ch'in Judas kjuínchekji tí ch'in Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'in Jesús mé it'in Judas Iscariote sákuínixjéhe ch'án tí sín nchat'á t'etoan ¹⁵ la ntáchro ch'án kixin:

—¿Nkejaín tsochjinará tsoxrjanka nketí tjen tí ch'in Jesús? —mé xikaha chro tí ch'in Judas. Ntá tí sín nchat'á t'etoan kjuenkehe sín ch'án treinta chichaon plata. ¹⁶ Ntá tuénxin tí hora tí ch'in Judas mé xritjeyá ch'án nkexrí tsochénta ch'án sín nketí tjen tí ch'in Jesús.

Kjuixixín kjóneko sín tí ch'in Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankixixín kia sine sín niotja tsíkjkohya tí xroqan t'ánkixin niotja. Ntá tí sín k'uájiko ch'in Jesús mé kóchjina sín kjuanchankíhi sín ch'án kixin:

—¿Ínchéni, nketí tjinkávan sincheyaxixinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntqo ijnko ch'in la nixjehérá ch'án tsochtáchorá kixin: "Ntáchro Maestro kuènténi kixin í séhya naxá tsjak'e ch'án la ntá ijie ntqo ntihi tsoyaxixín kixin sineko ch'án tí sín xriko ch'án tí kia pascua", tsixrorá —mé xikaha ichro ch'in Jesús.

¹⁹ A ntá tí sín k'uájiko ch'in Jesús mé kjuínchexiteyá sín la kjuíncheyaxixín sín ntiha tí nkehe sine sín kia pascua.

²⁰ Tió ntá kóntó la ntá ch'in Jesús k'uéjoko tí teyó sín k'uájiko ch'án kjóne sín. ²¹ La ntá tió naxa tjejóne sín la ntáchro ch'in Jesús kixin:

—Chaxín tjonkará kixin jnkójnirá tjejorá ntihi mé sinchekjirána —ichro ch'án.

²² Ntá kaín sín la kjuankixin kóxakonhen sín k'uává sín la ntá kjuankixin sín jnkójnko sín kjuanchankíhi sín tí ch'in Jesús kixin:

—Ínchéni, ¿á jeheni ní? —ichro sín.

²³ Ntá kjuátqhe ch'in Jesús kixin:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xikaha tsjasóte ch'án éxi nixja xroon itén Dios, a ntá nóè tí ch'in sinchekji ch'án. Íchá jina chrókókjéheya ch'án —mé xikaha ichro ch'in Jesús.

²⁵ Na ntá tí ch'in Judas tí ch'in sinchekji ch'in Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'in Jesús kixin:

—Méxra xikaha tsíntáchrúa —ichro ch'án.

²⁶ Ntá tió tjejóne sín na ch'in Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'q ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuèntana —ichro ch'án.

²⁷ Na ntá kuákja ch'án ijnko vaso tjáá inté to uva na ntá kjuanchehe ch'án kjuasáya Dios ntá kjuixín ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxín ijnko nkehe níxin tsonhen. Mé tí jnina ts'ítji na mé tsjacha tsjinkitsa nchónhaya chojni kixin ts'íjmaxín ijíé sín. ²⁹ Tjonkará kixin ts'íhaya janhan tí inté to uva inaá tsjixrakája tí yaon ts'ayája kjuachaxín kuènte T'aná ntá xík'ini inté to uva inaá —mé xikaha ichro ch'in Jesús.

Ntá chrónka ch'in Jesús kixin ch'in Pedro sinchemá ch'án kixin chónhaya ch'án tí ch'in Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jnā Olivo. ³¹ Ntá ntáchro ch'ín Jesús kíxin:

—Jahará tsítōnaráni kaín rá ijie tie kíxin ntáchro tí xroon itén Dios kíxin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”* ³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátēhe ch'ín Pedro ntáchro ch'án kíxin:

—Kjónté kaín sín tsítōha sín ntá janhan la náhí —ichro ch'án.

³⁴ Ntá ntáchro ch'ín Jesús kíxin:

—Chaxín tsōxrjanka kíxin tí tie i naxā tsotsjehya kochíntōa la ó sínchemána níya —ichro ch'án.

³⁵ Ntá ntáchro ch'ín Pedro kíxin:

—Kjónté koína its'én la sīntamáhya tí jaha —ichro ch'án.

La ntá kaín tí sín k'uájiko ch'án na xīkaha ichro sín kaín sín.

Ch'ín Jesús chrónóhe ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kíxin:

—Tjejorá ntihó ntá janhan sátsjia tsonixjaha T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankíxin kóxakonhen ch'án la ko k'uává ch'án. ³⁸ Ntá ntáche ch'án tí iy'á sín kíxin:

—Imá t'áva asenná éxí its'én ntá ts'axrje asenná. Ntá jahará ntihó tsitōhará ts'ejotsjehekoarána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uúsén ch'án hasta caxín kja ch'án nonte ntá chrónóhe ch'án It'é ch'án tjen nkaya nkajíní, ntáchro ch'án kíxin:

—It'éni, tí tjínkávan chrókjuínchekaáni kíxin chrók'uíhyani tí nkehe tsjā tjāá tí copa i. Kjānchó jehya éxí tjínkaonni jeheni. Náhí. Éxí tjínkávan jaha —ichro ch'án.

⁴⁰ Ntá ikjan ch'án tí kuitōhe sín la ó k'uúikon ch'án kíxin tjejóua sín. Ntá nixjehē ch'án tí ch'ín Pedro ntáchro ch'án kíxin:

—Xá xitjahya chrók'uejótsehekoarána ijnko hora. ⁴¹ Titōhará tjejotsjehérá la nixjehérá Dios kíxin tsjínkītsará ch'án kíxin chrókjuachroehyará ch'ín Tsochren. Asánrá tōxrjínhin kjānchó tí cuerpo chontará la imá ntá —mé xīkaha ichro ch'ín Jesús.

⁴² Ntá sákjuí ch'án yóxin inaá chrónóhe ch'án It'é ch'án, ntáchro ch'án kíxin:

—Jaha It'éni tí xitjahya tsjakjīyan tí nkehe tsjasótexínni la ntá tjínkaonni éxí jaha tjínkávan —mé xīkaha ichro ch'án.

⁴³ Ntá ikjan ch'án la k'uúikon ch'án tjejóua tí sín k'uájiko ch'án inaá kíxin tjiehya sín kotáchrin. ⁴⁴ Ntá kuitōhe ch'án sín inaá la níxin sáxíkji ch'án ntá ó xīkahó xínixja ch'án inaá. ⁴⁵ Ntá kjan ch'án tí k'uéjō sín la ntáchro ch'án kíxin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjīkaán sín ch'án. ⁴⁶ Ntá ijie t'ínkatjenrá sátsjini kíxin ó kjui tí ch'ín sinchekjina —ichro ch'án.

Sákjuiko sín tí ch'ín Jesús tsjak'echjina ch'án ntōechiso

(Mr. 14.43-50; Lc. 22.47-53; Jn. 18.2-11)

⁴⁷ Ntá naxā tjenixja ch'ín Jesús ntá xrinahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kujkáo ch'án nchónhya chojni kjujiko sín chica espada la ko inta. Na mé kjuachaxién tí sín nchat'á t'etōan la ko tí sín táda kuente tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kíxin:

—Tí ch'ín tsakjīhā tuēen ch'án na mé tsgoanaxínrá kíxin jehe ch'án. Ntá itserá ch'án —mé xīkaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehē ch'án ntáchro ch'án kíxin:

—¿Á jína tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátēhe ch'ín Jesús, ntáchro ch'án kíxin:

—Amigo, á ó k'uinka tí xra tjínkávan sīch'e?

Ntá xīkaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tátsjon ijnko tí sín ch'ehe tí nchat'á t'etōan xra. ⁵² Ntá ntáchro ch'ín Jesús kíxin:

—Chr'axenhén tjeje chica espada méhe. Kaínxín tí sín tjāyaxín chica espada la xīkaha ts'enxín sín. ⁵³ ¿Á noahyará kíxin janhan jína chrókjuánchāhā T'aná la ntá tuénxín chróchr'án ch'án teyó ejército sin ángel? ⁵⁴ Kjānchó tí xīkaha chrókónhen la chróxitēyáhya éxí nixja xroon

* 26:31 Zacarías 13.7

itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxí chrótserá ijnko síche xikaha. A ntá kaín yaon kjuak'é nkaxenhen nínko kjuakua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios óse —ichro ch'án.

Mé xikaha ntá kaín tí sín k'uájiko ch'ín Jesús na mé kuitohe sín ch'án, ntá sákjuí sín.

Ch'ín Jesús kóchjina ch'án tí síxreé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuiko sín ch'án ntoge ch'ín Caifás, tí nchat'á t'etoan. Ntaha mé tsíkójnoksé kaín tí sín maestro tjako tí ley la ko tí sín t'etoan kuènte nínko. ⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntasin ntoge tí nchat'á t'etoan la kjaxin k'uixenhen ch'án tí ntasin la kjuak'eko ch'án tí sín policia kuènte nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesús kixin jina chrók'óyán sín ch'án. ⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjatéehya ninkehó? ¿Á chaxín xikaha tsíntáchrúa éxí xikaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxién ihnjé tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

—Éxí tí ntáchrúa jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chónka kaín xín kjuachaxin la ko ts'ikuan itjui mé tsjxin ch'án nkaya nkajní —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséche ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínrá kixin nkexrí nixja ch'án. ⁶⁶ ¿A ntá jahará la, ¿nkechrorá? —mé ichro tí nchat'á a.

Ntá kjuátehe sín ntáchro sín kixin:

—Chónka ch'án jie la chrók'uen ch'án —ichro sín.

⁶⁷ Ntá iso sín la kuíkíte sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrúa —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uikon tí jehe ch'án la nixjehe tjan kaín sín tjejóntaxín, la ntáchro tjan kixin:

—Tí ch'ín í la kjaxin k'uájiko ch'án tí ch'ín Jesús tsíkjin chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uájkjénxín ch'án ihnjé Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uejóntaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkojin tí sín a kixin tjátsoanxínni tí nixja jaha —ichro sín.

⁷⁴ Ntá k'uájkjénxín ch'án ihnjé Dios ntáchro ch'án kixin:

—Chonhya tí nkexro a —ichro ch'án.

Na ntá xrinahya itsje kóhíntoa. ⁷⁵ Ntá ch'ín Pedro mé xraxínkaon ch'án kixin nkexrí chrónka ch'ín Jesús senó kixin: “Naxa tsotsjehya kóhíntoa mé ó tsjixin sjnchemána níya kixin

chonhyana.”* Ntá xikaha xraxinkaon ch'in Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuanchenhi, la sákjuí ch'án.

27

Kjuikénhen sín ch'in Jesús tí ch'in Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uinkaséyan ntá kaín sín nchat'á t'etöan la ko tí sín t'etöan kuènte tí sín judío kjuenkayáxin sín nkexri ts'óyán sín tí ch'in Jesús. ² Ntá tjechroneteto ch'án sákjuiko sín ch'án tí tjen tí ch'in Poncio Pilato, tí ch'in gobernador romano.

Ik'uéen ch'in Judas

³ Ntá tí ch'in Judas, tsíkjinčekji ch'in Jesús, mé k'uikon ch'án kixin ts'óyán sín tí ch'in Jesús. La ntá xraxinkaon ch'án tí jié kjuasin ch'án la sákjuikénhen ch'án sín inaá tí treinta chichaon plata kuákja ch'án, mé ch'jéhe ch'án tí sín nchat'á t'etöan la ko tí sín táda. ⁴ La ntá ntáchro ch'án kixin:

—Ó kjuasinni jié kixin kjuínčekjini ijnko nkexro tjóá —ichro ch'án.

À ntá jehe sín kjuátéhe sín kixin:

—Ntá janhanna la nonahyana tíha. Tíha la ó jié kuènta —ichro sín.

⁵ Ntá ch'in Judas mé sákjuík'e tí chichaon nkaxenhen nínko ntá sákjuí ch'án kjuísik'á isin ch'án nta.

⁶ Ntá tí sín nchat'á t'etöan kjuenájin sín tí chichaon la ntáchro sín kixin:

—Tí chichaon la kóxiñin ijnié chojni la chrokjuaehya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontge Tí Ch'in Ch'éna Nchésen kixin tsochóna sín nketí tsoxravá tí chojni tsíkjiñin ikjín. ⁸ Mé xikaha kjuínček'in sín tí nonte mé Campo Kuènte Jni la hasta ijie la naxa xikaha nček'in sín. ⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'in a), ¹⁰ la k'uénaxin sín tí nonte kuènte tí ch'in ch'éna nchésen kixin xikaha kjuínchexiteyá sín tí nkehe k'uetuanna Inchéni.”*

Ch'in Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'in Jesús sákjuiko sín ch'án nkayakon tí ch'in gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátéhe ch'in Jesús, ntáchro ch'án kixin:

—Éxi ntáchrúa jaha —ichro ch'án.

¹² Na ntá tí sín nchat'á t'etöan la ko tí sín táda t'etöan t'eka sín jié tí ch'in Jesús kjánchó la ch'in Jesús la ninkehó kjuátéehya.

¹³ À ntá ch'in Pilato kjuanchankí ch'án kixin:

—¿Á kiénhya kaín tí jié t'eka sín tí jaha? —ichro ch'án.

¹⁴ Kjánchó ch'in Jesús la ninkehó kjuátéehya ch'án. Ntá tí ch'in gobernador la chraon ch'án.

K'uetöan sín kixin its'en ch'in Jesús

(Mr. 15.6-20; Lc. 23.13-25; Jn. 18.38—19.16)

¹⁵ À ntá tí kié pascua mé kuénhen tí ch'in gobernador kixin jnkojnko nánó takitsjéxin ch'án ntgechiso ijnko chojni tjechjina. Ntá tí chojni mé tsjanchia sín nkexro tí tsitöhe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnoktsé la ntá ch'in Pilato mé kjuanchankí ch'án kixin:

—¿Nkexro tjnkáonrá ts'atjánta, á tí ch'in Barrabás o á tí ch'in Jesús nček'in sín Cristo? —ichro ch'án.

¹⁸ Kixin tí ch'in Pilato la ó nohe ch'án kixin kjuachjinqxínhin chóna tí sín kjuíkaán tí ch'in Jesús.

¹⁹ Ntá jehe ch'án naxa tjetjaxin ch'án tí nčekitöexixin ch'án ijie chojni la ntá tí ichjién ch'án mé k'uetuennen tjan ijnko chojni tsjichénka ch'án kixin tsjiatéhya ch'án tí nkexro jína kixin kóntó náxrjónhya k'uikonxin tjan kotáchrén tjan kixin tí jehe ch'án.

²⁰ À ntá tí sín nchat'á t'etöan la ko tí sín táda t'etöan a mé nixjehe kaín tí chojni tsíkóchjina kixin chrókuanchia sín kixin chrókuitöge ch'án tí ch'in Barrabás sáchrókjui, à ntá ch'in Jesús

mé chrók'uen. ²¹ A ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

—¿A ntá nkehe sít'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuíche' e tí ch'ín i kixin? —ichro ch'án.

Ntá antsí má itsen k'uixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxinhin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xraško sín intá, la nkayakon kaín tí sín tsíkójkotsé ntaha k'ónti ch'án tja ch'án. La ntáchro ch'án kixin:

—Janhan tsámáhya jje tí its'en tí nkexro í ch'óntahya jje. Jahará xíkaha tjinkáonrá tsonhen —ichro ch'án.

²⁵ Ntá kaín sín kjuátehe sín kixin:

—Jeheni la ko xjeenni mé yámáni tí jje tí its'en tí nkexro í —ichro sín.

²⁶ Ntá ch'ín Pilato kuítóhe ch'án kixin sáchrókjuí tí ch'ín Barrabás. Ntá tuénxín k'uetqon ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuénte tí ch'ín gobernador. Ntaha kóinkotséxin kaín tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkáya sín kja ch'án ijnko corona tsíkijch'éna sín ntach'í la ko kjuanjon sín ijnko nta vara kixin tjenkáya tja ch'án chjina. La ntá k'uéjóxin toch'ín sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuénhen tí sín judío —ichro sín.

³⁰ La ko kjaxin ntaté sín kuíkite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuíko sín ch'án kixin tsjak'enkáni sín ch'án ntacruz.

Kjuak'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuíxin ch'án chjasin Cirene, mé it'in ch'án Simón. Ntá k'uetuénhen sín ch'án kixin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrxéxin Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroqan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuíche'exín sín suerte kixin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuíche'exín sín tí kaná.”[†] ³⁶ Ntá tí sín soldado ntaha k'uejónata sín t'ayakonhen sín ch'án. ³⁷ Ntá kjuak'enkáni sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuénhen tí sín judío.”

³⁸ Kjaxin yaá tí síchee k'uejóyáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kixin:

—Jaha ntáchrua kixin chrók'oxíka tí njnko a ntá iní koá yaon la ó chrókjuíxin chrókjuíche' éna inaá,[‡] ichrua. Méxra ijje jahvá nchekaá asán. Tí chaxín jaha Xjeen Dios la jahvá tjasinkajinxán tí ntacruz méhe —ichro sín.

⁴¹ La ntá kjaxin tí sín nch'at'á t'etqon la ko tí sín maestro tjako tí ley la ko tí sín fariseo la ko tí sín k'uetqon kuénte njnko kjuanoá sín ch'án, ikjo sín kichó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuénte Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kixin Dios tjinkítsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sinkáni ntacruz k'uántaxínhin sín ch'án.

*Ik'ueñ ch'in Jesús**(Mr. 15.33-41; Lc. 23.44-49; Jn. 19.28-30)*

⁴⁵ Ntá chonkíxin hasta las tres kónjín mé k'uúxin tie chjasintajni. ⁴⁶ Ntá tí hora a ch'in Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuènté kujtohéni?§ —mé xikaha ichro ch'án.

⁴⁷ Ntá iso sín tjejóntaxín kuínhin sín ntá ntáchro sín kixin:

—Tí ch'in a mé t'íyehé tí ch'in profeta Elías —ichro sín.

⁴⁸ Ntá ijnko ch'in kuínká ch'án sákjuikakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechriin ch'án kixin chrók'ui ch'in Jesús.

⁴⁹ Ntá í so sín ntáchro sín kixin:

—Nté tjtoghé ch'án. Tsotsjeheni á tsi ch'in Elías sinchekaá tí jehe ch'án —ichro sín.

⁵⁰ Ntá ch'in Jesús itsen k'uúyato ch'án inaá, ntá kjuixin ik'ueñ ch'án. ⁵¹ Mé ntá tuénxín k'uúchje tí ka tjenkáuénxín nkaxenhen nijnko. Mé k'uúchje tí ka k'óna yaá tí kjuankixixín noi hasta nonte. La ko kuínkí nonte la ko tí tjo la kjaxin xitjehe. ⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios. ⁵³ Kain tí sín a mé k'uaxrjexín sín tí tòye, la tió kjuixin xechón ch'in Jesús ntá k'uúxenhen sín tí chjasin tjóá mé chjasin Jerusalén la ntaha itsjé chojni k'uúikon kixin xixechón tí sín a.

⁵⁴ Ntá tí ch'in capitán la ko tí sín k'uéjoko ch'án, mé tí sín t'ayakonhen ch'in Jesús, na ntá k'uúikon sín kuínkí nonte la kain tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'in Jesús tí kjuixin ch'án estado Galilea kixin mé ntiha kjuankixixín sín k'uékinkixitsa sín ch'án. ⁵⁶ Ntaha kjaxin tjen tjan María Magdalena la ko tjan María, iné tí ch'in Jacobo, la ko ch'in José la ko tí iné tí xjeen tí ch'in Zebedeo.

*Ntá xravá ch'in Jesús**(Mr. 15.42-47; Lc. 23.50-56; Jn. 19.38-42)*

⁵⁷ Ntá tí ó ntá kóntó ikui ijnko ch'in it'in José, mé ijnko ch'in rico. Chjasén ch'án mé Arimatea la jehe ch'án kjaxin k'uéchréhe ch'án tí ch'in Jesús. ⁵⁸ Ntá tí ch'in José sákjuítsjehe ch'án ch'in Pilato kjuíkanchia ch'án tí cuérpóe tí nkexro Jesús. Ntá ch'in Pilato mé kjuanjon ch'án kjuachaxin. ⁵⁹ Ntá ch'in José mé kuákja ch'án tí cuerpo ntá kjuínchek'ísimá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjich'éna ch'án. Ntá ijnko xro jíe k'uúkjèxin ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuak'e tí tjan María Magdalena la ko ijnko tjan María tjejótxajin sín ntoí chok'èxin tjen tòye.

Tí sín soldado k'uúyakonhen tí tòye xravá ch'in Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchaj't'á t'etqan la ko tí sín fariseo sákjuítsjehe sín tí ch'in Pilato ⁶³ la ntá ntáchro sín kixin:

—Ó xraxinkaonni kixin tió naxa kjuak'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án. ⁶⁴ Méxra tsétuénhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uújiko ch'án la tseé sín tí cuerpo kuènte ch'án la ntá chr'èxin tsochéna sín chojni kixin ó xixechón tí nkexro a, mé xikaha sich'ia sín. La ntá tí xikaha sich'e sín qntsí má sich'ia sín que tí xrankixixín —mé xikaha ichro sín.

⁶⁵ Ntá ntáchro ch'in Pilato kixin:

—Ntihi tjejó soldado. Sátsjirá la ts'ayakonhenrá jina tí tòye éxi tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkjèxin tí tòye la kuitqhe sín tí sín soldado ntahó kixin ts'ayakonhen sín.

28*Ó xechón ch'in Jesús**(Mr. 16.1-8; Lc. 24.1-12; Jn. 20.1-10)*

¹ Ntá ó k'uútsínka tí yaon t'ok'éhe sín. Ntá chjino t'inkaséyan tí yaon xrankixixín semana, la ntá tjan María Magdalena la ko tí ijnko tjan María sákjuítsjehe sín tí tsíkjixravá Jesús. ² Ntá xringhya kuínkí nonte imá tjian kixin ijnko ángel kuènte Inchéni k'uúnkajinxin nkaya nkajni la kjuíji ch'án tí tsíxravá Jesús la kjuakjin ch'án tí xro a tjejkjèxin tòye la ntá chrítaón tí xro a kjuak'ekjen ch'án. ³ Tí ángel la imá tjákiní tsjehe éxi ijnko xrohi la tí iké ch'án la imá tjóá tsjehe éxi chrinta. ⁴ Tí sín soldado mé k'uúikon sín xikaha la ntá sixrànka sín chrakon sín la éxi tsík'en sín xikaha k'uéjó sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkáni ntacruz. ⁶ Kjánchó í kohya ch'án ntili ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sájtirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sátsji ch'án estado Galilea. Ntíha ts'ikonrá ch'án”, mé xíkaha tsochronkará. Kaín tíha mé tjonkará —mé xíkaha chrónka tí ch'ín ángel.

⁸ A ntá tí chojni chjin tjoka sákjuixin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. ⁹ Ntá xrinahya titáyá k'uúkuèn sín kixin itjen tí ch'ín Jesús la níxjehe sín ch'án. Ntá kóchjinehe sín ch'án la kjóa sín toté ch'án, kuítekaon sín ch'án. ¹⁰ La ntáchro ch'án kixin:

—Chrakonhyará sájtirá tjíchenkará tí sín kíchó ni kixin sáchrókjui sín estado Galilea la ntaha ts'ikon sín tí janhan —mé xíkaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'á t'etqan kaín tí nkehe tsíkónhen tí k'uéjé sín ntíha. ¹² Ntá tí sín nchat'a t'etqan kjuínixjehe sín tí sín táda la ntá jnkokqá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chronkará kixin tí tie naxá tjejochrinrá ikui tí sín k'uék'ajiko tí nkexro Jesús, mé kueé sín cuerpo kuénte ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsoninkakuanhyará ch'án —mé xíkaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákjuí sín la xíkaha kjuích'e sín éxí k'uítuénhen sín. La mé xíkaha chrónkaxín tí sín judío, la hasta tí yaon ijie la xíkahó ichro sín, chrónkaxín sín.

Ch'ín Jesús k'uetuénhen ch'án tí sín k'uék'ajiko ch'án tí xraq sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jnā estado Galilea kixin xíkaha tsík'etqan ch'ín Jesús. ¹⁷ Ntá k'uikon sín ch'ín Jesús la ntá kuinkáchónki sín ch'án kjónté iso sín naxá kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni. ¹⁹ Méxraq sájtirá kaín xín nación la tjácohérá chojni kixin tsitekaon sín tí janhan. Tikítexinrá sín kjuachaxién ihnjé It'éni la ko ihnjé tí Xjeen la ko Nchakuèn Dios. ²⁰ Tjácohérá sín kixin sinchexiteyá sín kaín xín nkehe kuétuanhanrá. Ijje la ó nohará kixin tsjak'é ts'ejokoará jnkochrín hasta tsjeje chjasintajni. Mé xíkaha tsonhen. Amén —ichro ch'ín Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista

(Mt. 3.1-12; Lc. 3.1-9, 15-17; Jn. 1.19-28)

¹ Xíkíhi mé xrankixixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsichr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin:

Janhan tsochr'an ijnko nkexro tsochrónka tan kuèntana tsitónxin ntja,

kixin tsjasiyóxin ch'án ntja kuénta.*

³ Ntá tsinhin sín itén ijnko nkexro tsjak'e nteje ts'èya tsontácho kixin:

“Tóxakonhanrá ncheyóxinrá ntja tsixín Inchéni, taktijehérá ijnko ntja ntoí.”†

⁴ Tíha mé xitéyá ikuí ch'ín Juan Bautista, mé xíkaha kjuák'e ch'án nteje kuíkite ch'án chojni. Kjuakohe ch'án chojni ntíha kixin chrókuiní sín tí nkehe tjenkayáxin sín chrókuítqhe sín tí ijíé sín ntá chrókuikite sín kixin xíkaha mé chrókuiní ijíé sín. ⁵ Itsjé chojni kuixín estado Judea la ko tí chjasin Jerusalén ikuí sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuíkítexín sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. ⁷ Mé kjuák'ekjakohe ch'án chojni ntáchro ch'án kixin:

—Itón tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókosuana chrókuasintanka tí correa tí tókate ch'án. ⁸ Janhan mé intá ó kuíkítexínrá. Ntá jehe ch'án mé tsjiktéxínrá ch'án tí Nchakuen Dios —ichro ch'ín Juan.

Ch'ín Juan kuíkite ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuíkítexín ch'án tí ntarío Jordán. ¹⁰ Tíó k'uaxrjenkixin ch'ín Jesús tí inta, ntá xrinahya titaya k'uúkuèn ch'án na ó xitjehe nkajní la ntá tí Nchakuen Dios éxi kontóá k'uínkajinxín ntíha ntá kjuák'e chrítaón kja ch'án. ¹¹ Ntá xrinahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chána kixin nchexiteyána tí jaha —mé xíkaha kuínhin sín.

Ch'ín Tsohren chrókuachroe tí ch'ín Jesús kixin chrókuasin ch'án jie

(Mt. 4.1-11; Lc. 4.1-13)

¹² Ntá tí Nchakuen Dios mé sákjuiko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntíha mé k'uúxin ko jiehe ntá ch'ín Tsohren a na mé tjinkaon chrókuachroe ch'án. La ntá tí sín ángel kui k'uáyakonhen tí jehe ch'án.

Ch'ín Jesús kjuankixixín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixín kjuák'echjina ch'ín Juan ntqechiso ntá ch'ín Jesús na mé sákjuí ch'án nó estado Galilea sákjuikjakohe ch'án tí sín ntíha tí tan jína kuènte Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etqan ch'án. Chrókuítqhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uúyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrinahya k'uúkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tunkák'e sín tí nchisén chrínki ntá. ¹⁷ Ntá ntáchro tí ch'ín Jesús kixin:

—Chréhérá tí janhan, ntá tsotjahárá xra tsjéyará chojni —ichro ch'án.

¹⁸ Ntá tuénxín kuitqhe sín tí nchisén k'uétséya sín koche ntá sákjuiko sín ch'án.

¹⁹ Ntá kjinhya kjuíji ch'ín Jesús ntá k'uúkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxhenhén sín tí ntabarco tjejótonité sín tí nchisén tséya sín tí koche. ²⁰ Na ntá ch'ín Jesús mé k'uúyehé tí jehe sín kixin kjaxin tsochréhe sín ch'án. A ntá tuénxín kuitqhe sín tí it'é sín ch'ín Zebedeo kuítqeko ch'án tí ntabarco la ko tí sín tjinkitsa ch'án ch'e xra. A ntá jehe sín sákjuiko sín ch'ín Jesús.

* 1:2 Malaquías 3.1 † 1:3 Isaías 40.3

Ijnko chojni chóna injno nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí njnko Israel. Na ntá ntaha mé kjuankíxin ch'án kjuako ch'án. ²² A ntá tí chojni siin ntiha mé chrakon sín kuínhin sín tí nkehe kjuako ch'án kíxin kjuakoxin ch'án kíxin chóna ch'án kjuachaxin, la jehya éxi tí sín maestro tjako tí ley, ichro sín. ²³ Ntá tí njnko Israel chjasin ntiha itjen injno chojni chóna injno nchakuen tí jínahya k'uúyato ntáχρο kíxin:

²⁴ —¿Nkekuènté tjiaté tí jeheni kaín ní? Jaha Jesús kjuíxian Nazaret. ¿Á k'uinka kíxin sínchek'itjáyanni? Janhan mé ó kjuátsoan tí jaha, la ko nóna kíxin jaha tí nkexro tjóá kuènte Dios —mé xikaha ichro tí nchakuen tí jínahya.

²⁵ Ntá ch'in Jesús mé k'uètuènhen tí nchakuen tí jínahya ntáχρο ch'án kíxin:

—Tániá, t'axrjéxian tí jehe ch'án —mé xikaha ichro ch'in Jesús.

²⁶ A ntá tí nchakuen tí jínahya mé kjuínchek'aniáte tí ch'in a la ko k'uúyatoxin tsen ntá k'uaxrjéxín tí ch'in a. ²⁷ A ntá kaín sín chrakon sín ntá kjuanchankíhi sín kíchó sín, ntáχρο sín kíxin:

—¿Xá nkexro tíha kíxin tjako ch'án nkehe njxin? Jehe ch'án chóna kjuachaxin kíxin t'ètuènhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uúikónohe kaín xín sín estado Galilea kíxin nkexrí tí kjuachaxin chóna tí ch'in Jesús a.

Ch'in Jesús kjuínchekitohe jína tí ich'ee tí ch'in Simón Pedro
(Mt. 8.14-15; Lc. 4.38-39)

²⁹ Ntá tí ch'in Jesús mé k'uaxrjéxín ch'án tí njnko, a ntá tuénxín sákjuiko ch'án ch'in Jacobo la ko ch'in Juan, sákjuí sin ntóe ch'in Simón la ko ch'in Andrés. ³⁰ Ntá tí ich'ee ch'in Simón na tjetsinka tjan, níhi tjan kíxin chóna tjan sóa. Ntá chénka sín tí ch'in Jesús. ³¹ Ntá kóchjina ch'án tí tjetsinka tjan ntá itsé ch'án tja tjan k'uúinkatjen tjan. Ntá tuénxín kjuúinhin tjan tí sóa chóna tjan. Ntá kjuanjjon tjan nkehe sine sín.

Ch'in Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)

³² A ntá tíó kjuíataón yaon tíó k'uúxin tie kuíkohe sín tí ch'in Jesús kaín tí sín níhi la ko tí sín chóna nchakuen jínahya; ³³ na ntá kuènté chjasin kójnkotsé sín k'uúixintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjjonhya ch'án kjuachaxin kíxin tsonixja tí nchakuen tí jínahya kíxin ó kjuátsoan tíha nkexro tí jehe ch'án.

Ch'in Jesús mé kjuako ch'án estado Galilea
(Lc. 4.42-44)

³⁵ Ntá naxá sítié k'uàya ch'in Jesús k'uaxrjéxín ch'án tí chjasin a sákjuí ch'án nteje kíxin ntiha níxjéxín ch'án It'é ch'án tjen nkaya nkajní. ³⁶ Ntá ch'in Simón la ko tí sín xriko ch'án mé sákjuíkjejá sín ch'án. ³⁷ Ntá k'uitja sín ch'án ntá chénka sín kíxin:

—Kaín sín xritjejá sín tí jaha —ichro sín.

³⁸ Ntá ntáχρο ch'in Jesús kíxin:

—Sátsjini ókjé chjasin chjinaxón kíxin ntaha kjaxin tsjákoḡá sín tí tan jína, kíxin xikaha mé tí k'uaxrjéxian chjasin ntiha.

³⁹ Ntá nkuúxin estado Galilea sákjuí ch'án kuinkákjako ch'án jnkojnko njnko la ko kuakitsje ch'án tí nchakuen tí jínahya chóna sín.

Ch'in Jesús kjuínchekitohe jína injno ch'in chóna chinlepra
(Mt. 8.1-4; Lc. 5.12-16)

⁴⁰ Ntá kui injno ch'in chóna chinlepra kjuák'exín toch'in ch'án nkayakon ch'in Jesús ntá chrónóeḡe ch'án ntáχρο ch'án kíxin:

—Tí tjínkavan jaha la jína chrókjuínchekitohéni jína —ichro ch'án.

⁴¹ Ntá ch'in Jesús na imá kuíkonóeḡe ch'án tí ch'in a na ntá kjuentoá tja ch'án kjuak'e tja ch'án chrítaón tí ch'in níhi a ntá ntáχρο ch'án kíxin:

—Méxra xikaha tjínkavan. Ntá jie sintakitoha jína —ichro ch'án.

⁴² A ntá xikaha ntáχρο ch'án ntá tuénxín kjuúin tí chinlepra ntá kuítḡe ch'án jína. ⁴³ Ntá k'uètuènhen ch'in Jesús tí ch'in a kíxin tjoka sátsji ch'án, ntáχρο ch'án kíxin:

⁴⁴ —Ninkexró chenkahya ntihi; jehó sátsjia tjákoḡé tí ch'in nchat'á kíxin ó kjuúinhan tí chinlepra la ko tjánjuan tí nkehe tsik'etḡan ch'in Moisés[‡] kíxin tsonoexín kaín xín chojni kíxin ó kuítḡa jína —ichro ch'án.

⁴⁵ A ntá tí ch'in tsíkitohe jína, a ntá sákjuí ch'án kjuankíxin ch'án chénka ch'án kaín xín chojni kíxin nkexrí kuítḡe ch'án jína. Méxra xitjahya ts'ixenhen ch'in Jesús noxín nijnko chjasin na

‡ 1:44 Levítico 14.1-32

ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuixín chjasin.

2

Ch'in Jesús mé kjuínchekitóhe jína ijnko chojni tsík'en toté
(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'in Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'in Jesús kjuako tí tan jína kuènte Dios. ³ Ntá kui noó sín tinkátsénkí sín ijnko ch'in tsík'en toté ch'án. ⁴ Kjánchó xitjahya kóchjina sín tí tjen ch'in Jesús kixin nchónhya chojni síin. La ntá k'uit'ótjen sín tí chrítaón nchia a ntá k'óxrat'ó sín. Na ntá ijnko hno kjuák'ete sín tí kania tjenkáyáa tí sínníhi a ntá kjuinkajin sín ntoí tí tjen ch'in Jesús a. ⁵ Tió k'uikón ch'in Jesús tí nkehe kjuích'e sín ntá ó nohe ch'án kixin chaxín imá tinkáchónkí sín tí jehe ch'án. Ntá nixjehe ch'án tí sínníhi ntáche ch'án kixin:

—Xjeenni, ó kjuixin kjuíinhan tí jie chonta —mé xíkaha ichro ch'án.

⁶ Na ntá iso tí sín maestro tjako tí ley tjejótxaxín sín ntiha na ntá jehó sín mé kjo sín asén sín kixin: ⁷ “¿Nkekuènté xíkaha nixja tí ch'in i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xíkaha ikjo sín asén sín. ⁸ Ntá ch'in Jesús la ó nohe ch'án nkehe tjenkáyáxin sín. Ntá ntáchro ch'án kixin:

—¿Nkekuènté kixin xíkaha tjenkáyáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuíinhan ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájin ch'án kanije ch'án ntá sáchrókjui ch'án? ¹⁰ Méxra jie tsjákoxjan kixin tí Xjeen Dios K'óna Chojni mé ntihi chjasintajni chóna kjuachaxin tsjakjiihin ijie chojni —ichro ch'án.

Ntá ntáche ch'án tí ch'in xitjahya tji kixin:

¹¹ —Jaha tétuanhan t'inkatjen, tjenájian kanija na sáttja ntóa —ichro ch'án.

¹² A ntá tí sínníhi na tuénxín k'uinkatjen ch'án kjuák'exín toté ch'án na kjuenájin ch'án kanije ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uikonhyéni tí nkehe i —ichro sín.

Ch'in Jesús k'uiyehé ch'in Leví
(Mt. 9.9-13; Lc. 5.27-32)

¹³ A ntá chr'éxin ch'in Jesús mé sáxikji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uikón ch'án tí ch'in Leví xjeen ch'in Alfeo tjetjaxín ch'án tjenchejkjenkí ch'án. Ntá ch'in Jesús mé k'uiyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'in Leví mé tuénxín k'uinkatjen ch'án chr'éhé ch'án tí ch'in Jesús.

¹⁵ A ntá ch'in Jesús kjuák'e ch'án ntóe tí ch'in Leví, la ntá kjuanjón sín nkehe sine ch'án la ko kjaxin k'uéjé nchónhya tí sín nchejkjenkí la ko kjaxin i so chojni chóna jie. Mé kaín tí sín a mé tjejótxaxín sín tjejóneko tí ch'in Jesús la ko tí sín k'uájiko ch'án, kixin nchónhya chojni chr'éhé sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uikón sín kixin ch'in Jesús tjejóneko kaín tí sín nchejkjenkí la ko tí i so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuéntará neko ch'án la ko t'ikájo ch'án tí sín nchejkjenkí la ko tí i so sín chóna jie? —ichro sín.

¹⁷ Na ntá ch'in Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxjenhya sín nkexro sich'e xroan. Náhi. Jehó tí sín níhi mé t'ichjánxjenhin sín nkexro sich'ehe sín xroan. Janhan na k'uinkahya ntihi kixin chrók'uíyaha chojni jína tjejó sín. Náhi. K'uinka kixin ts'iyaha chojni chóna jie —ichro ch'án.

Tjancharíhi sín tí ch'in Jesús kixin á chrókjónehya sín tió tsonixjehe sín Dios
(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'in Juan Bautista la ko tí sín fariseo a mé kjónehya sín kuénté yaon kixin mé xíkaha ts'áyehé sín kjuaxróxin, ichro sín. A ntá kui iso chojni nixjehe sín tí ch'in Jesús ntáchro sín kixin:

—¿Nkekuènté kixin tí sín k'uék'ajiko sín tí ch'in Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátêhe ch'in Jesús ntáχρο ch'án kixin:

—¿Xá chrókjónehya tí chojni tsík'íyehê sín kóhijina ijnko kia tsotêhe chojni tí naxá tjejóko sín tí nkexro tsotêhe? Tí naxá tjen tí nkexro tsotêhe la xitjahya káxin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'in tsikótêhe, ntá tí yaon la chaxín sinehya sín.

²¹ Ninkexró chrókjuak'eniêhe ijnko ka ó ntaxin it'ò ka nixin káxin ntá chrókjuixêhe tí ka nixin ntá antsí má chrók'uichje tí ka ntaxin a. ²² La ko kjaxin ninkexró chrókjuikjá xran vino nixin ijnko tjuaxran ó ntaxin; káxin tí xran vino nixin la chrókótsêchje tí tjuaxran ntaxin ntá chrók'uitjáyán tí xran la ko tí tjoa. Méxra tí xran vino nixin chrókuika ijnko tjuaxran nixin —mé xíkaha ichro ch'in Jesús.

Tí sín k'uájiko ch'in Jesús mé ik'uín sín iso neno noatrigó ijnko yaon t'òk'éhe sín (Mt. 12.1-8; Lc. 6.1-5)

²³ Ijnko yaon t'òk'éhe sín na ch'in Jesús la ko tí sín k'uájiko ch'án mé k'uátsínka sín ijnko nonte síin noatrigó. Na ntá tí sín k'uájiko ch'án kjuankáxin sín ik'uín sín iso noatrigó. ²⁴ Na ntá iso tí sín fariseo kjuanchankíhi sín tí ch'in Jesús a káxin:

—¿Nkeuênté káxin tí sín xrikoa tjejóch'e sín xra ijje? Na mé kohya kjuachaxin tsonhen xra tí yaon t'òk'éheni —ichro sín.

²⁵ Ntá kjuátêhe ch'án ntáχρο ch'án káxin:

—¿Á kjuínchekuáxinhyará jahará tí xroon chrónka nkehe kjuích'e ch'in David la ko tí sín k'uájiko ch'án tí k'uén sín kinta? ²⁶ A ntá jehe ch'án k'uixenhen ch'án ntòe Dios tíó kjuák'e nchat'á Abiatar k'uetóan, a ntá k'jone ch'án tí niotja tsíkóyaon kjónté jehó tí sín nchat'á mé k'uéchóna kjuachaxin sine sín la kjaxin chjêhe ch'án tí sín k'uájiko ch'án* —ichro ch'in Jesús.

²⁷ Kjaxin ntáχρο ch'in Jesús káxin:

—K'óna tí yaon ts'òk'éhe chojni káxin tí'ichjánxin sín, la jehya káxin chrókjuikosáyehe tí yaon a. ²⁸ A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'òk'éheni —ichro ch'án.

3

Ijnko chojni tsíxámá tja (Mt. 12.9-14; Lc. 6.6-11)

¹ Ntá ch'in Jesús k'uixenhen ch'án ijnko nínko Israel inaá. Na mé ntiha tjen ijnko ch'in tsíxámá ijnko tja ch'án. ² Na ntá kóhijina iso chojni tsáyehe sín ch'in Jesús ts'íkon sín káxin á sinchekitohe ch'án jína tí ch'in tsíxámá tja tí yaon t'òk'éhe sín káxin mé jína tsjanchia sín jje, ichro sín. ³ Ntá ch'in Jesús mé ntáche ch'án tí ch'in tsíxámá tja a káxin:

—T'íntakjen, tjak'e jnkosiné ntihi —ichro ch'án.

⁴ A ntá kjuanchankíhi ch'in Jesús tí sín síin ntiha káxin:

—¿Nkehe síin kjuachaxin tsonhen tí yaon t'òk'éheni? ¿Á chrókjuich'eni tí jína ní ò á chrókjuich'eni tí jínahya? ¿Á chrókjuínchekitòheni chojni jína ní ò á chrók'óyánni chojni? —ichro ch'án.

A ntá jehe sín la táníkoá sín. ⁵ Na ntá ch'in Jesús la nínkaon ch'án komá ch'án tí jehe sín la ko t'ává ch'án káxin tjinkakonhya sín tsíkonóehê sín chojni. Na ntá k'uetuénhen ch'án tí ch'in a káxin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuitòhe tja ch'án jína. ⁶ Na ntá tí sín fariseo a k'uaxrxjén sín nínko sákjuí sín k'uito sín tí sín kuénte ch'in Herodes ntá kjuenkayáxinko kíchó sín káxin nkexrí chrók'óyán sín tí ch'in Jesús.

Nchónhya chojni síin chrínta ntayaon

⁷ Ntá ch'in Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkíxin sín nó estado Galilea la ko kjaxin tsíkíxin sín nó estado Judea ⁸ la ko chjasin Jerusalén la ko estado Idumea la ko ikjé sín kuíxin sín nó tóhe ntario Jordán la ko iso sín tsíkíxin sín nó chjasin Tiro la ko nó chjasin Sidón. Na mé kaín sín tsíkinhin sín káxin nkexrí tí kjuaxroan jje kjuasin ch'in Jesús ntá kuíchréhe sín ch'án káxin chrók'uikon sín tíha kjaxin. ⁹ Ntá k'uetuénhen ch'án tí sín k'uájiko ch'án a káxin ntahó chrókjuak'echonhen sín ijnko ntabáro. A ntá tí imá chrók'uixítja sín ch'án ntá chrók'uixenhen ch'án tí ntabáro, a ntá ntiha chrókjuak'e ch'án tsochrónka ch'án. ¹⁰ Káxin itsjé chojni tsíkjinchekitohe ch'án jína, na ntá kaín xín tí sín níhi k'uixítja sín ch'án káxin tjínkaon sín chrókuáóxin sín ch'án. ¹¹ Kjaxin tí sín chóna nchaquen tí jínahya na mé tíó k'uikon sín tí ch'in Jesús ntá k'uejóxin sín toh'in sín nkayakon ch'án. Ntá k'óyako tí nchaquen tí jínahya a ntáχρο káxin:

—Jaha mé tí Xjeen Dios.

* 2:26 1 Samuel 21.1-6; Levítico 24.5-9

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)

¹³ A ntá chr'éxin chriin ch'ín Jesús ijnko jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín i mé tí teyó sín tsíkjeýá ch'án mé it'in sín xíkíhi: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko i jnko Simón tíhi mé kuènte tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuènte tí jínahya
(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uíxnenhén sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxá kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako tí ley kuixín sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuenhen káin tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehé ch'án tí sín ntá kjuíncheyóxin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etóan ijnko nación tjanjonko kichó la tsjachahya ts'etóan. ²⁵ La ko kjaxin tí sín jnkokóá ntóe jnkokóáhya tjenkayáxin sín ntá xitjahya ts'ejóko kichó sín. ²⁶ A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjáyán kjuachaxin kuènte.

²⁷ Ninkexró tsjacha ts'ixenhen ntóe ijnko chojni jíhe kixin ts'axrjehe tí nkehe chóna ch'án. Náhi. T'ichjánxin saoxín sinchenteto ch'án tí ch'ín jíhe kixin jína tseéhe ch'án nkehe chóna tí ch'ín a.

²⁸ Ijnko nkehe chaxín tsotjonkará kixin tió tsoxraxinkaon ijnko chojni tí jíe chóna la ko tsochronóhe Dios la ntá tsjakjiinhin ch'án káin tí jíe la ko káin tí nkehe jínahya tsintáchro sín. ²⁹ A ntá tí nkexro ts'ántaxínhin tí Nchakuen Dios na mé xitjahya tsjin tí jíe na mé jnkochrín tsóhóna sín tí jíe a —ichro ch'án.

³⁰ Mé xíkaha ichro ch'án kixin tí sín a tsintáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús
(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uétuenhen sín ijnko chojni tsjik'íyehé ch'án. ³² A ntá tí sín tjejótxáxin tí tjen ch'ín Jesús ntiha chénka sín ch'án kixin:

—Iná la ko kichúa tjejó sín ntója xritjeýá sín tí jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxáxin tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Káin tí sín nchexiteýá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóxin ch'án éxi ijnko chojni t'enka nontee
(Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxín ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabarók tjenkátaón ntá k'uit'ótjen ch'án, a ntá ntaha kjuák'e ch'án kjuakoxín ch'án. Ntá káin tí sín tsikójnkotsé mé kuitóhe sín chrínta ntayaon k'uéjokinín sín. ² Nchónhya nkehe kjuako ch'án kjuíncheyóxin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuik'enka nontee. ⁴ Mé xíkaha sákjuik'enka ch'án iso tí noatrigó a. Ntá iso noa la tsík'ánotjen ntja ntá kui koxroxé k'uínka va tí noa. ⁵ A ntá iso noa na mé k'uitji chrik'á xro tí kohya itsje nche ntá tjoka k'uayan kixin tjínhya chóna nche. ⁶ A ntá tió kjuítjon yaon la ntá tí ka la chján; la ko chónahya nuèe a ntá xamá. ⁷ A ntá í so noa kjuítsinkak'á tí síin kach'j la ntá tí kach'j k'uánkí la ntá tí noa í k'ónahya kixin sítja tí kach'j. ⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko

noa la mé k'óna treinta neno noa. **A** ntá í jnko la mé k'óna sesenta neno noa, **a** ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ **A** ntá chr'éxin, tió kuítóhe ch'ín Jesús jehó ch'án, **a** ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kixin:

—**A** ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, **a** ntá tí sín titekakhonya la ó kjuíntayóaxuán kaín nkehe kuínhin sín. ¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí ijíé sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—**¿**Á kiénxinyará jahará nkexrí t'axrjexín tí nkehe kjuíntayóaxian ní? **¿****A** ntá nkexrí chrókiénxínrá tí í so nkehe naxá sintayóaxian? ¹⁴ **A** ntá tí nkexro sákjuík'enka tí tje a mé yóhé ijnko nkexro sákjuík'ako itén Dios. ¹⁵ **A** ntá iso chojni la éxi tí tje kjuítsínka ntá; kixin kuínhin sín itén Dios, ntá chr'éxin ó kui ch'ín Tsochren kjuínchek'itjayan ch'án tí tan jina kuínhin sín. ¹⁶ **A** ntá í so chojni la éxi yóhé tí tje kjuítsínkak'á xro: mé kuínhin sín itén Dios ntá tjoka kóxrjínjin sín kuitekaon sín. ¹⁷ Kjánchó nínkahya chóna nuè, **a** ntá séhya kuítóhe; **a** ntá itsi tí kjuaxróxinhya tsonhen sín, **o** tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ **A** ntá í so chojni la éxi yóhé tí tje k'uínka chrík'á kach'í na mé kuínhin sín itén Dios ¹⁹ kjánchó tóxakonhen sín tí nkehe síin chjasintajni la ko tí nkehe tje té tóxrjínjin sín la ko tjinkaon sín tsochóna sín kaín xin nkehe. Kaín tíha mé t'ínkákonhen tí itén Dios kuínhin sín a, la tí chojni xíkaha la xitjahya sich'ehe sín xrá Dios. ²⁰ **A** ntá í so chojni kuínhin tí itén Dios na kuinkáchónki sín la ntá xíkaha jina ch'ehe sín Dios xrá. La iso sín la éxi yóhé tí tje k'uínka tí nonte jina k'óna treinta neno noa la ko iso sín la yóhé tí tje k'óna sesenta neno noa la ko iso sín la yóhé tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuíncheyóexin éxi ijnko xrohi tjeche

(Lc. 8.16-18)

²¹ Kjaxin ntáchro ch'ín Jesús kixin:

—**¿**Á chrókuijáonni xrohi tjeche chrókjuak'emá chrínki ntacajón **o** chrínki cama? Kjá náhi. Tí xrohi la noi chrókjuak'e ts'inkaséyanxín. ²² Mé xíkaha kaín tí nkehe tjejomá jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. ²³ **A** ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jina tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, **a** ntá antsí má ts'ayéhérá tí jahará tjejontinhinrá. ²⁵ **A** ntá tí nkexro chóna nkehe la antsí má ts'ayéhe sín. **A** ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijnko tje ts'ayan ts'ánkí

²⁶ Kjaxin ntáchro ch'ín Jesús kixin:

—Tí kjuachaxin t'etóan Dios tóyóhé ijnko chojni sátsjik'enka nonte. ²⁷ Ntá sákjuík'ajua ch'án tí tie la ko k'uáya ch'án tí nhítjen. **A** ntá xíkahó k'uátsínka iso yaon la ko iso tie, **a** ntá tí tje la k'uayan la k'uánkí. **A** ntá tí nkexro k'uęnká la noehya ch'án nkexrí kónhen tíha. ²⁸ **A** ntá tí nche mé kjuích'e xrá jehó. Senó k'uayan tí chaon tí ka, **a** ntá kjuíntaa, **a** ntá chr'éxin icha tí noa tsjinjin; ²⁹ **a** ntá tió tsícha tí noa, **a** ntá tsakjinjin sín tí noa kixin ó kjuixraká tí yaon tsotjá sín.

Ch'ín Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

³⁰ Kjaxin ntáchro ch'ín Jesús kixin:

—**¿**Nkehe chrókóyóhé tí kjuachaxin t'etóan Dios, nkehe chrókóyóexin tíha? ³¹ Mé éxi yóhé tí tje it'in mostaza tsík'ínka nonte. Tíha mé ijnko tje imá ntsí, **a** ntá tí í so tje síin chjasintajni la kénhyó. ³² **A** ntá jnkonaá tsík'ínka tí tje la tsík'ayan tsík'ánkí imá ihyé, **a** ntá tí í so nta la

* **4:12** Isaías 6.9-10

kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'okl'éhe va chrínkí tí ts'van chaon tí nta.

Nkehe tí xra kjuíche tí nkehe kjuíncheyóexin ch'ín Jesús
(Mt. 13.34-35)

³³ Mé xíkaha ch'ín Jesús kjuákohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókuacha chrókiexín sín tíha. ³⁴ Káinxín nkehe kjuákohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjéxín káin tí nkehe kjuíncheyóexin ch'án.

Ch'ín Jesús k'uetuénhen ch'án tí xrinto la ko tí ntá síchrica kixin ts'ixita
(Mt. 8.23-27; Lc. 8.22-25)

³⁵ A ntá tí yaon a la ntá ó kontó ntá ntáche ch'ín Jesús tí sín k'uájiko ch'án a kixin:
—Sátsjini tóhe tí ntayaon —ichro ch'án.

³⁶ Ntá kútohe sín káin tí chojni a ntá sákjuiko sín tí ch'ín Jesús naxa tjenkáya ch'án tí ntabárcó la ko kjaxin í so ntabárcó sákjuí kóí. ³⁷ Ntá xríngaha tjan chjéhe xrinto la ntá síchrica ntá t'ixenhen tí ntabárcó, ó mero tsókaón ntá tí ntabárcó. ³⁸ A ntá ch'ín Jesús na mé tjeua ch'án tí tjar'i nóton tí tjejó sín nkaxenhen tí ntabárcó a tjejkón ch'án ijnko ka. Na ntá kjuíncheyóexin sín ch'án ntáchro sín kixin:

—¡Maestro! ¿Á ntósán kixin ts'itjáyanni, ts'aniánkini ntá ní? —ichro sín.

³⁹ A ntá ch'ín Jesús k'uàya ch'án, k'uetuénhen ch'án tí xrinto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrinto la ko tí ntá k'uúxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuénté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xrinto la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara
(Mt. 8.28-34; Lc. 8.26-39)

¹ Ntá tíó k'uátóye sín tí ntayaon, a ntá kjuíji sín tí nonte Gadara. ² Ntá k'uínkajinxín ch'ín Jesús tí ntabárcó a. Ntá xríngaha xeta ch'án ijnko ch'ín kjuíxin nó tsíkijxravá chojni mé chóna ch'án ijnko nchakuen tí jínahya. ³ Tí ch'ín a mé kjuák'e ch'án tí tsíkijxravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchenetoxín sín ch'án cadena toté ch'án la ko itja ch'án, la kjónté kóchríton ch'án kjuínchekuen ch'án tí cadena. Kohya ninkexro tjecha ts'etuénhen tí jehe ch'án. ⁵ K'uék'aji ch'án nchakotjin la ko tie t'yato ch'án nó jna la ko tí tsíkijxravá chojni la ko chjéhe asén ch'án xro. ⁶ Na ntá k'uikon ch'án kixin kui ch'ín Jesús kjónté ikjin la kuínká ch'án kjuíji ch'án kjuák'exin toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuénté tjtáté jaha tí jeheni, jaha Jesús Xjeen Dios tjen nkaya nkajni? Dios nchenoheni kixin xrjanógha nchekjasótehyani —ichro ch'án.

⁸ Mé xíkaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tjtóhé tí ch'ín í —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátéhe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóehé ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá síin nchónhya cochíno xrine va chjinaxón tí jna ntíha. ¹² A ntá chrónógha tí nchakuen tí jínahya ntáchro kixin:

—Tétuénhenni sátsjini tí síin tí cochíno, tjtóhé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjón ch'án kjuachaxin. Ntá káin xín tí nchakuen tí jínahya a mé k'uaxrjéxín tí ch'ín a sákjuí kjuík'ixenhen tí cochíno a. Na ntá káin xín tí ko a mé chjina iyó míl va síin va xrine va. Na mé káin xín va k'uínkajinxín va ntíha kjuítsínkayá va tsáka ntá kjuítsínkankí va ntayaon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuínká sín kixin chrakon sín na ntá sákjuí chrónka sín chjasén sín la ko nqntee chojni. Na ntá itsjé chojni mé kuitsjehe sín nkehe tí tsíkónhen ntíha. ¹⁵ Ntá kjuíji sín tí tjen ch'ín Jesús a na k'uikon sín kixin itjen tí ch'ín k'uéchóna tí nchónhya nchakuen tí jínahya senó la ó jina tjen ch'án tjetjaxín ch'án tjenkáya ch'án iké

ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a. ¹⁷ Ntá kjuankíxin sín chrónóehé sín tí ch'ín Jesús a kíxin sáchrókjuixín ch'án ntiha.

¹⁸ A ntá ó ts'ít'ótjen ch'ín Jesús tí ntabárcó na ntá tí ch'ín k'uéchónta nchakuen tí jínahya na mé chrónóda ch'án kíxin kjaxín ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjónhya ch'án kjuachaxín sátsjiko sín ch'án. Náhi. K'uetóan ch'án kíxin:

—Sátjia ntóa tjíchenka tí sín naxá kjéhya tí jaha kíxin nkexrí kaín tí kjuaxroan jíé kjuasin Dios kjuínchekitóha jína kuíkonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuénte Decápolis kíxin nkexrí kaín tí nkehe kjuích'e ch'ín Jesús kjuínchekitóhe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Lc. 8.40-56)

²¹ Ntá tió xíkjanqao ch'ín Jesús tí ntabárcó tóhe tí ntayaon inaá ntá kóchjina nchónhya chojni ntá ntáhó chrinta ntá kuitóhe ch'án inaá. ²² Na ntá ikui ijnko ch'ín t'etóan kuénte njnko mé it'in ch'án Jairo. A ntá tió k'uíkon ch'án kíxin itjen ch'ín Jesús ntá kjuák'exín toch'in ch'án chrínki tóté ch'ín Jesús a ²³ imá chrónóehé ch'án kíxin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuitóhe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxín tjenkákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan kíxin nchónhya chojni kjuanjón xroan kónhen tjan na ó kjuixín kjuéhe tjan kaín xín nkehe k'uéchónta tjan. Ó jehí títóehya tjan jína la íchá ntsí tinkákótáo tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, ²⁸ ntáchro tjan kíxin kjónté iké ch'án ó chrókuakóxin tjan na ó tíhó mé chrókuitóhe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kíxin ó kjuixín kuitóhe tjan jína tí chin k'uéchónta tjan. ³⁰ Ntá ch'ín Jesús na ó kónohe ch'án kíxin kjuachaxién ch'án mé kuitóexín ijnko chojni jína ntá kuinkátjía ch'án kjuanchankíhi ch'án tí chojni síin a kíxin:

—¿Nkexro kuákóxin tí kaná? —ichro ch'án.

³¹ Ntá kjuátéhe tí sín k'uajiko ch'án a ntáchro sín kíxin:

—Ó noha kíxin nchónhya chojni sítja, ¿ntá nkekuénté kíxin naxá tjanchankiá kíxin nkexro tí kuákóxin? —ichro sín.

³² Ntá kuinkátjía ch'án tsjehe ch'án nkúixín kíxin tsonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxranká tjan ó nohe tjan kíxin ó kuitóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kíxin:

—Xjeenni, kaín asán kuinxachónkia tí janhan ntá kuitóha jína. Ijie la kjuaxróxin sátsjia ntóa la ó kuitóha jína a —ichro ch'án.

³⁵ Na ntá naxá tjenixja ch'án ntá ó kui chojni kujín sín ntóe tí ch'ín t'etóan tí njnko. Ntá chénka sín ch'án kíxin:

—Xjaan na ó kjuixín k'uén. ¿Nkekuénté naxá chjehé xrá tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etóan tí njnko ntáchro ch'án kíxin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjónhya ch'án kjuachaxín kíxin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. ³⁸ Na ntá tió kjuíji sín tí ntóe tí ch'ín t'etóan tí njnko na k'uíkon sín kíxin imá sítjité sín tsjánkamá sín tí xjan a. ³⁹ Ntá k'uixenhen ch'ín Jesús nchia kjuanchankí ch'án kíxin:

—¿Nkekuénté ánta tjasitérá tsjánkamará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetóan ch'án kíxin kaín sín sátsji sín ntója. Ntá kjuiko ch'án tí it'é la ko tí iné xjan la ko tí iy'á sín xríko ch'án ntá k'uixenko sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kíxin:

—Talita, cumi —mé t'axrxéxín kíxin: Lonchí, tétuñhan kíxin t'aya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xíkaha. ⁴³ Ntá fuerte k'uetóan ch'ín Jesús kíxin chróchenkahya sín nínkexró. La kjaxín k'uetóan ch'án kíxin tsjanjon sín nkehe sine tjan.

6

Ch'in Jesús kjuák'e ch'an chjasin Nazaret
(Mt. 13.53-58; Lc. 4.16-30)

¹ A ntá chr'éxin k'uaxrjéxin ch'an chjasin ntiha. Ntá jehe ch'an la ko tí sín k'uájiko ch'an na mé sákjuí sín Nazaret tí chjasin tsík'ánkíxin ch'an. ² Na ntá tió kui tí yaon t'ok'éhe sín ntá kjuankíxin ch'an kjuakoxín ch'an tí nínko ntiha. Na ntá nchónhya chojni kuínhin sín ntá chrakon sín ntáchro sín kíxin:

—¿Nketí tsíxrakohé tí ch'in i kaín tíhi? ¿Nketí kujíxin tí kjuaxrexinkaon chóntha ch'an la ko tí kjuaxroan tjasin ch'an? ³ ¿Á jehya ch'an tí ch'in ch'éna nta na mé xjeen tí tjan María, la tí kichó ch'an a na mé ch'in Jacobo, la ch'in José, la ch'in Judas, la ch'in Simón? ¿A kjaxinhya ntíhi tjejókoni tí kichó ch'an chjin? —ichro sín.

Méxra tahya sín kuénta nkerí ch'e ch'an. ⁴ Na ntá ntáchro ch'in Jesús kíxin:

—Kaín chojni tjikosáyehe sín ijnko nkexro chrónka iten Dios. Ntá tí chjasen ch'an la ko kaín tí sín kjéhya ch'an la ko tí sín ntqe ch'an na mé tjikosáyehya sín ch'an —ichro ch'an.

⁵ Méxra ninkehó kjuaxroan xitjahya kjuasin ch'an ntiha, la jehó kjuak'etja tja ch'an chrítaón ikja iso chojni nihi kjuinchekitohé ch'an sín jína. ⁶ Ntá chrakon ch'an kíxin xíkaha kuitekakuenhya sín ch'an. Na ntá k'uáji ch'an tí chjasin ntsíntsí chjinaxón ntiha kjuako ch'an.

Ch'in Jesús mé ichr'an tí teyó sín kíxin sátsji sín tsjikjako sín itén Dios
(Mt. 10.5-15; Lc. 9.1-6)

⁷ Na ntá k'uáiyehé ch'in Jesús tí teyó sín k'uajiko ch'an a. Ntá kjuankíxin k'uetuenhen ch'an kíxin yóyó yóyó sín sátsji sín la ko kjaxin kjuanjon ch'an kjuachaxin kíxin tsakitsje sín nchakuen tí jínahya chóntha chojni. ⁸ La ko k'uetqan ch'an kíxin ninkehó tsjikohya sín kuénte ntja. Jehó tí nta tjíxin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokaté ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'an kíxin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitohará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxénjinrá tí nche chóntha totárá kíxin xíkaha tsjakoáxinrá kíxin ntoáhya kjuíche'í tí jehe sín. A ntá chaxín ntáxrxjan kíxin tí yaon tsitoxénin ijje chojni ntá ántsi má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuínkákjakohe sín tí chojni a kíxin mé chrókjuítóxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóntha chojni. Na ko aceite mé kuíkite sín itsjé chojni níhi a la ntá kuítóhe sín jína.

Ik'uén ch'in Juan Bautista
(Mt. 14.1-12; Lc. 9.7-9)

¹⁴ Na ntá tí ch'in rey Herodes mé kuínhin ch'an nkehe tí kjuaxroan kjuasin ch'in Jesús. Na ntáchro ch'in Herodes kíxin:

—Kjá tí ch'in Juan Bautista mé ó tsíxechón ch'an inaá kíxin xíkaha tí kjuachaxin chóntha tí ch'in a —ichro ch'in Herodes a.

¹⁵ A ntá iso sín ntáchro sín kíxin:

—Kjá ch'in Elías k'uéchrónka itén Dios —ichro sín.

A ntá í so sín mé ntáchro sín kíxin:

—Kjá ijnko nkexro yóhé tí sín k'uékjako itén Dios ósé —ichro sín.

¹⁶ Ntá kuínhin ch'in Herodes tíha ntá ntáchro ch'an kíxin:

—Kjá ó jehe tí ch'in Juan tí kuétoan chrínjin kja ch'an, mé ó tsíxechón ch'an jie —ichro ch'an.

¹⁷ Méxra tí ch'in Herodes mé tsík'etqan ch'an kíxin tsontetoxín tí ch'in Juan cadena tsjak'echjina ch'an kíxin xíkaha tsíkjanhia tí tjan Herodías. A ntá tí tjan Herodías k'uéechjién tí ch'in Felipe. A ntá tí savé ch'an Herodes mé kuákja tí tjan a kíxin ts'óna ichjién ch'an. ¹⁸ A ntá tí ch'in Juan tsíntáche ch'an tí ch'in Herodes kíxin:

—Kohya kjuachaxin tsochonta tí ichjién tí kichúa —ichro ch'an.

¹⁹ Mé xíkaha tí tjan Herodías mé imá kóninkakonhen tjan tí ch'in Juan ntá chrók'óyán tjan ch'an, kjánchó xitjahya ²⁰ kíxin tí ch'in Herodes mé chrakonhen ch'an tí ch'in Juan kíxin ó nohe ch'an kíxin tí ch'in a mé ijnko nkexro jína la ko tjóá asén la méxra kuitqehya ch'an kíxin jehe tjan chrók'óyán tjan ch'an. A ntá kénhyó kienxín ch'an la kjónté kórxjínhin ch'an tí nkehe kuínhin ch'an kjuako ch'in Juan. ²¹ A ntá tí tjan Herodías mé kjuacha tjan tí yaon kia tsíkjitoxínhin nánó tí ch'in Herodes a kíxin tsík'íyehé ch'an tí síxreé la ko tí sín k'uetuenhen tí sín soldado la ko tí sín t'etqan estado Galilea kíxin itsi sín ntqe ch'an kíxin síin kia. ²² A ntá tí

xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'in Herodes la ko kaín tí sín tjejóneko ch'án ntiha. Na ntá tí ch'in rey ntáche ch'án tí tjan tjarisoá a kixin:

—Tjanchana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'etáon ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'in Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itja tjanchia tí kja tí ch'in Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjan tí ch'in rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'in Juan Bautista tsochjehéni —ichro tjan.

²⁶ Na ntá tí ch'in rey la mé imá k'uává ch'án kixin xikaha kjuanchia tjan kjánchó tsikjinchenohe ch'án Dios la ko tsikinhin kaín tí sín tsik'iyehé ch'án, la ntá xitjahya tsontáchro ch'án "Náhi" tí nkehe kjuanchia tjan. ²⁷ Na ntá tuénxín k'uetuenhen ch'án ijnko ch'in soldado kixin tsjikaó ch'án tí kja ch'in Juan a. ²⁸ Ntá tí ch'in soldado mé sákjuí ntøechiso, ntá kóchrínjin ch'án ikja tí ch'in Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan iné tjan.

²⁹ Na ntá kuínhin kaín tí sín k'uék'ajiko ch'in Juan kixin xikaha tsikónhen. Na ntá sákjuikáya sín tí cuérpøe ch'án ntá kjuikáyo sín ntá sákjuikjává sín.

Ch'in Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)

³⁰ A ntá chr'èxin tí sín k'uájiko ch'in Jesús a na mé ó kjan sín tí tjan ch'án inaá, chrónka sín nkexri tí xra kjuich'e sín na ko nkexri kjuako sín. ³¹ A ntá ntáchro ch'in Jesús kixin:

—Ts'axrjantani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'in Jesús la ko tí sín k'uájiko ch'án jehó sín k'ujit'ótjen sín ijnko ntabárco sákjuí sín ijnko nonte jehó tjan. ³³ Na ntá itsjé chojni k'uikón sín kixin sákjuí sín la ko kjuátsoan sín kixin ch'in Jesús. Ntá xrákuaxin sín chjasén sín kuinká sín na ntá senó kjuuji sín tí chrinta ntayaon tí tsjiji ch'in Jesús. ³⁴ Ntá k'uínkajinxin ch'án tí ntabárco, a ntá k'uikón ch'án kixin nchónhya chojni síin ntiha ntá kuikonøehé ch'án tí jehe sín na mé éxi yóhé kolélo tjejó sín chóntahya va nkexro ts'ayakonhen va. Ntá kjuankixin ch'án kjuakohe ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'in Jesús a mé kóchjina sín tí tjan ch'án ntáchro sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókjuitøhé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'in Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjeheni sín sine sín ní? —ichro sín.

³⁸ Ntá ch'in Jesús mé kjuanchankíhi ch'án sín kixin:

—¿Nkekjaín niotja chontará? Sátjitsjehérá —ichro ch'án.

Ntá sákjuitsjehe sín na ntá chrónka sín kixin:

—In'ó niotja la ko yaá koche mé síin —ichro sín.

³⁹ Na ntá k'uetøan ch'án kixin kaín xín sín chrók'uixitjaxin sín tí chrítaón tí ka yoa a. ⁴⁰ Na ntá xikaha kójnkojin sín ciento sín la ko cincuenta sín k'uixitjaxin sín. ⁴¹ Na ntá ch'in Jesús kuákja ch'án tí in'ó niotja na ko tí yaá koche ntá kónka ch'án nkajní ntá kjuanchia ch'án kjuasáyé Dios. Na ntá kóchrít'ø ch'án tot'ø tí niotja a ntá chjéhe ch'án tí sín k'uájiko ch'án kixin ts'ókikayehé sín sine tí sín síin a la ko kjaxin kóchrít'ø ch'án tí yaá koche ntá k'ókikayehé sín kixin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'in Jesús na mé kjuínchekaón sín teyo ntaxra tot'ø tí niotja la ko tí koche tsíxehé. ⁴⁴ A ntá tí sín kjóne na mé in'ó mil chojni ntoa.

Ch'in Jesús mé tjitaón ntayaon
(Mt. 14.22-27; Jn. 6.16-21)

⁴⁵ A ntá tuénxín k'uetuenhen ch'in Jesús tí sín k'uájiko ch'án kixin ts'it'ótjen sín tí ntabárco a ts'atøye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehé ch'án kaín tí sín síin a. ⁴⁶ Kjuixin nixjehé ch'án sín na ntá jehe ch'án chriin ch'án ijnko jna tsonixjeexin ch'án Dios. ⁴⁷ A ntá tió k'uixin tie ntá tí ntabárco na mé ó kjuuji jnkosiné ntayaon, a ntá jehe ch'án jehó ch'án kjuuji ch'án chrinta ntayaon. ⁴⁸ Ntá kotohe ch'án k'uikón ch'án kixin imá xra tjiko sín tí ntabárco a kixin tí xrintø imá

chjéhe. Nantóye a mé sákjuíchréhe ch'án sín. Tótó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án. ⁴⁹ A ntá tí k'uíkon sín kjuítaón ch'án ntá, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kain sín k'uíkon sín ch'án la chrakon sín. Na ntá jehe ch'án mé tuénxin nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'ujit'ótjen ch'án tí ntabárcō tí tjejó sín, a ntá tí xrjntō la ó k'uixratá. Ntá imá chrakon sín kixin xikaha kónhen ⁵² kixin kienxínhya sín tí kjuaxroan kjuich'e ch'án kuènte tí niotja kixin naxā kénhya asén sín kuinkáchónki sín ch'án.

Ch'in Jesús mé kjuínchekitōhe jina tí chojni nihi tí nonte Genesaret
(Mt. 14.34-36)

⁵³ Ntá tió k'uátōye sín tí ntayaon ntá kjuíji sín tí nonte Genesaret ntá kjuak'echroē sín tí ntabárcō a tí chrínta ntā. ⁵⁴ Na ntá tió k'uínkajinxín sín tí ntabárcō, a ntá tí sín sín ntiha tjoka kjuátsōan sín tí ch'in Jesús. ⁵⁵ Ntá sákjuí sín nkuixín chjinaxón ntiha kjuankixin sín kuikāo sín tí sjinníhi tinkátsénki sín kuikāo sín tí tjen ch'in Jesús. ⁵⁶ La ko kain nketi kjuíji ch'án, á chjasin ntsi, á chjasin hyé, á nontēe sín ó kjuíjiko sín tí sjinníhi a chrínta ntā. Na ntá chrónóhehé sín tí ch'in Jesús kixin kjónté chrínta iké ch'án ó chrókuákóxin sín, ichro sín. Na kain xín tí sín kuákóxin iké ch'án mé kuítóhe sín jina.

7

Tí nkehe nchekjita asén chojni
(Mt. 15.1-20)

¹ A ntá iso sín fariseo la ko iso tí sín tjako tí ley kuixín sín chjasin Jerusalén ntá kóchjinehe sín tí ch'in Jesús. ² Tí sín a, tió k'uíkon sín kixin iso tí sín k'uájiko ch'in Jesús mé k'óntihsya sín tja sín na kjónté ine sín mé t'axrjéxin kixin kjuínchexiteyáhsya sín tí ley, ntá kjonta tí sín a. ³ (Mé xikaha kjuich'e sín kixin tí sín fariseo la ko kain tí sín judío mé kuinkáchónki sín éxi k'uékjich'e tí sín táda ósé kixin ná t'óntó itja sín ntá sine sín. ⁴ Na ko tsokjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'in Jesús kixin:

—¿Nkekuènté kixin tí sín xrikoa la nchexiteyáhsya sín tí nkehe k'uékinkáchónki tí sín táda k'uéjío ósé? Na mé tí sín xrikoa t'óntihsya sín tja sín ntá kjónté ine sín —ichro sín.

⁶ Kjuátehe ch'in Jesús ntáchro ch'án kixin:

—Ntoá tsíchrónka ch'in Isaías ósé k'uéchrónka iten Dios tsíntáchro ch'án kixin ntoáhsya tsjenkayáxinrá tí jahará kixin xikíhi tsíkin ch'án ntáchro ch'án kixin:

Tí chojni tí chjasin í ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etōan chojni ó.*

Mé xikaha ichro itén Dios. ⁸ Ntá jahará kujtóhérá tí nkehe tsík'etōan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'iárá nkehe, la ko kjaxin í so nkehe yóhe tinkáchónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha tjtóhérá ntáha tí nkehe tsík'etōan Dios. ¹⁰ Tsíntáchro ch'in Moisés kixin: “Tsochonteherá kjuasáyé it'ará la ko inárá”, la ko “A ntá tí nkexro t'ántaxínñin it'é ó iné la chrók'óyán sín.” ¹¹ A ntá jahará ntáchrórá kixin ó nchōxon kixin ijnko nkexro tsochénta it'é la ko iné kixin: “It'eni, Ineni, chrokjuahsya tsjinkjitsani tí jaha kixin kain tí nkehe chóntani mé k'óna Corbán” (mé t'axrjéxin kixin kain tí chichaon k'uáyéhe Dios). ¹² A ntá xikaha jnkojín nkexro tsontáchro ch'án tíhi ntá jahará tsontáchrórá kixin í t'ichjánxínhya tsjinkjitsa ch'án tí it'é ch'án la ko tí iné ch'án. ¹³ A ntá tí xikaha la tjtóhérá tí nkehe tsík'etōan Dios éxi sínkíhsya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'in Jesús.

¹⁴ Na ntá k'uíyehé ch'in Jesús tí chojni inaá ntáchro ch'án kixin:

—Tínhínrá kain rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jje tíha. Tí nkehe t'axrjénxin asén chojni mé jje tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

* 7:7 Isaías 29.13 † 7:10 Éxodo 20.12; 21.17

¹⁷ A ntá tió kuitōhe ch'án kaín tí sín tsíkóhchina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíni sín ch'án kixin nkexrí t'axrjéxín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie ¹⁹ kixin jehya asénni sátsji? Tí nkehe ineni na sáti nkaya tseeni na ko xik'axrje inaá —ichro ch'án.

Mé t'axrjéxín kixin tí nkehe sineni la jehya jie.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jie táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá ²² la ko tí chrókuéerá, la ko tí tjaké asánrá tí nkehe chóna ókjé sín, la ko tí jínahya ch'ehérá kichuárá, la ko tí kjuach'ia xrikoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó tí chontahyará kjuaxrexinkaon jina. ²³ Kaín tí nkehe jínahya a mé t'axrjeníxin chojni, la mé tjasixín sín jie.

Jjko tjan tsíkijixin kjín mé kuítekaon tjan tí ch'ín Jesús

(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakonhya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko iné ijnko tjan tjarisoá chóna ijnko nchakuen tí jínahya mé kuínhin nkehe tí xra' ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toh'ín tjan chrínki toté ch'ín Jesús. ²⁶ Na mé jehe tjan tsíkijixin kjín, na mé tsíkijixin tjan nó nación Sirofenicia. Na ntá jehe tjan a mé kui tjan chrónóhe tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátehe ch'án kixin:

—Tjtohé senó chrókjóné tí xjan. Jehya tí jína chrókuakítsjaha xjan tí niotja ntá chrótjaha konja chrókjóné va —ichro ch'án.

²⁸ Ntá jehe tjan kjuátehe tjan ntáchro tjan kixin:

—Chaxín xikaha, Inchéni. Kjánchó kjónté tí konja tjejoyánki mesa ine tí tot'ó niotja tóxènjín tí chánjan —ichro tjan.

²⁹ Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kixin tí nchakuen tí jínahya ó k'uaxrjéxín tí xjaan —ichro ch'án.

³⁰ A ntá tió kjuíji tjan ntōe tjan, na ntá k'uíkon tjan kixin tí xjeen tjan na mé ó ntoá tjetsinkatá'á xjan tí cama kixin ó tsik'axrje tí nchakuen tí jínahya a.

Ch'ín Jesús mé kjuínchekitohe jina ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjéxín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kjuíkaon sín ijnko ch'ín tienhya na ko ntoáhya nixja ch'án. Ntá chrónóhe sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitohe ch'án jina. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhen ch'ín Jesús tatsjon tí ch'ín tienhya. La ko kjaxín tí dedo tja ch'án mé kjuíkite ch'án ntaté ch'án ntá kjuínchekákóxin ch'án nejen tí ch'ín nixjahya a. ³⁴ Ntá konta ch'án nkajni k'uáváxin ch'án na ntá nixjehe ch'án tí ch'ín tienhya a, ntáchro ch'án kixin:

—Efata —mé t'axrjéxín nkívee sín kixin: ¡Tsoxitjehe!

³⁵ Na ntá tuénxín xitjehe tatsjon tí ch'ín tienhya ntá kuínhin ch'án la ko kuitōhe jína tí nejen ch'án, ntá jína nixja ch'án. ³⁶ Ntá ch'ín Jesús k'uetōan ch'án kixin ninkexró tsochenkahya sín. Ntá kjónté imá k'uetōan ch'án ntá ántōsén sín kjónté ichá xrixronka sín. ³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jina. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjōn nkehe kjóné noó mil chojni

(Mt. 15.32-39)

¹ A ntá ijnko yaon nchónhya chojni k'uíxikóhchina inaá. A ntá chónahya sín nkehe sine sín. Na ntá ch'ín Jesús mé k'uíyehé ch'án tí sín k'uájiko ch'án, a ntá ntáchro ch'án kixin:

² —Imá tjikonóaha kaín tí sín i kixin ó ní yaon tjékjan sín ntihi ntá chónahya sín nkehe sine sín. ³ Ntá chrókuétuñhya sín sáchrókui sín ntōe sín tí naxa nehya sín kixin ntja ó chrókótiñxin sín kixin iso sín la imá kjín tsíkijixin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátēhe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjāxín sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ó ch'án tí niotja a. Ntá chjēhe ch'án tí sín k'uájiko ch'án kixin jehe sín ts'óxikayēhe sín tsakja kaín xín tí sín siín a. ⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxikayēhe sín kjaxín. ⁸ Na mé kaín xín sín kjóne sín na kókjehe sín. Ntá chr'éxín naxa kjuínchekaon sín yato ntaxra tí tot'ó tí nkehe tsíxehē. ⁹ Na mé chjina noó mil chojni kjóne sín. Ntá ch'ín Jesús mé niexjehē ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'ujit'ótjen sín tí ntabárcō a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié

(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakōxín ch'án ijnko kjuaxroan jié kuēntē nkaya nkajni kixin tjinkaon sín chrókjuachāxín sín ch'án. ¹² A ntá ch'ín Jesús na mé k'uávaxín ch'án ikjín kjanxín asén ch'án ntá ntáchro ch'án kixin:

—¿Nkekuēntē kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxínhya —ichro ch'án.

¹³ Na ntá kuítōhe ch'án tí sín a, ntá xik'it'ótjen ch'án tí ntabárcō ntá sákjuí ch'án í jnko tóhe ntayaon inaá.

Tí xroqan nchek'ánkí tí niotjé tí sín fariseo

(Mt. 16.5-12)

¹⁴ Ntá k'uitjāyēnhen sín tsíkjikohya sín nkehe sine sín. Jehó jnkokoá niotja chóna sín nkaxēnhen tí ntabárcō a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroqan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuēntē tjórá kixin chontahará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'vā tí n'ó niotja kjóne in'ó mil chojni na ¿nkekjaín ntaxra tí tot'ó niotja naxa kjuenájinná? —ichro ch'án.

Ntá jehe sín kjuátēhe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xintáchro ch'ín Jesús inaá kixin:

—Na ko tí kóchrít'vā tí yato niotja kjóne noó mil chojni na ¿nkekjaín ntaxra tí tot'ó niotja kjuenájinná? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xikaha la, ¿á naxa tiénxinhyará? —ichro ch'án.

Ch'ín Jesús mé kjuínchekitōhe jina ijnko ch'ín t'ikonhya tí chjasin Betsaida

²² A ntá chr'éxín kjuíji sín chjasin Betsaida, a ntá ikui iso sín kujukao ijnko ch'ín t'ikonhya. Ntá chrónōgēhe sín tí ch'ín Jesús kixin chrókjuínchekitōhe ch'án jina tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjēntako ch'án ikon tí chjasin a. Na ntá kujukitehe ch'án ntatē ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxi nta tsjehe itji —ichro ch'án.

²⁵ Ntá ch'ín Jesús mé xikjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuítōhe ch'án jina la jina t'ikon ch'án kaín nkehe. ²⁶ Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixēnhyā chjasin la ko ninkexró chróchenkahya ntíha —ichro ch'án.

Ch'in Pedro chrónka ch'an kixin ch'in Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'in Jesús la ko tí sín k'uájiko ch'an sákjuí sín tí chjasin ntsi chjino Cesarea de Filipino. A ntá tí ntja mé kjuanchankíhi ch'in Jesús tí sín k'uájiko ch'an kixin:

—¿Nkehe ntáchro chojni kixin nkexro tí janhan? —ichro ch'an.

²⁸ Ntá ntáchro sín kixin:

—Iso sín mé ntáchro sín kixin jaha mé ch'in Juan Bautista, ichro sín. A ntá í so sín na mé ntáchro sín kixin jaha mé ch'in Elías, ichro sín. A ntá í so sín mé ntáchro sín kixin jaha mé ijnko tí sín tsichrónka itén Dios ósé —ichro sín.

²⁹ Ntá kjuanchankíhi ch'an sín inaá kixin:

—¿A ntá jahará nkechorá kixin nkexro tí janhan? —ichro ch'an.

Ntá kjuátehe ch'in Pedro ntáchro ch'an kixin:

—Jaha mé tí Cristo, ichroni —mé chro ch'an.

³⁰ Ntá k'uetqan ch'in Jesús kixin tsochenkahya sín ninkexró.

Ch'in Jesús chrónka ch'an kixin ts'en ch'an

(Mt. 16.21-28; Lc. 9.22-27)

³¹ Na ntá kjuankixin kjuako ch'in Jesús kixin tí Xjeen Dios K'óna Chojni mé t'ichjánxin kixin imá tsjasóte ch'an la ko tsotjinkakonhya kaín tí sín táda kuénte nínko la ko tí sín t'etqan kuénte tí sín nch'á'á la ko tí sín maestro tjako tí ley. A ntá tí sín a mé ts'óyan sín ch'an. Kjánchó tí nixin yaon na ó tsoxechón ch'an inaá. ³² Kaín tíha mé ntoá chrónka ch'an. A ntá ch'in Pedro mé kuakitsjenta ch'an tí ch'in Jesús chrókjuentuéhe ch'an. ³³ Na ntá kuinkátjá ch'in Jesús komá ch'an kaín tí sín k'uájiko ch'an a. Ntá kjuentuéhe ch'an tí ch'in Pedro a ntáchro ch'an kixin:

—¡sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxin éxi tjenkayáxin chojni ó —ichro ch'an.

³⁴ Ntá ch'in Jesús mé k'uíyehé ch'an tí sín k'uájiko ch'an la ko tí sín tsikóchjina. Ntá ntáchro ch'an kixin:

—Tí jnkójnirá tjinkáonrá tsochréhérá tí janhan na t'ichjánxin tsitohérá kaín tí nkehe tjaké asanrá na ntá tsamára tí ntacruz kuéntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrójuacha ijnko chojni chróchónka kaín nkehe sín chjasintajni, a ntá kjuachón chrókjuechek'itjáyan? ³⁷ ¿Nkehe chrókjuek'itjáyan chojni kixin chróchónka tí kjuachón? ³⁸ A ntá jnkójn nkexro tsosuéhe kixin tinkáchónki tí janhan la ko tí tan kuéntana nkayakon tí chojni jínahya chónka jie la kjaxin tí Xjeen Dios K'óna Chojni tsosuéhe ch'an tsontáchro ch'an kixin chóxín ch'an tí jehé sín tió tsokjan ch'an tsikajo ch'an tí kjuachaxin jié kuénte It'é la ko tsikajo tí sín ángel.

9

¹ Na ko kjaxin chrónka ch'in Jesús kixin:

—Chaxín ntáxrjan kixin isorá tjejorá ntíhi la naxá ts'ényhará ts'ikonjjará itsi tí kjuachaxin ts'etqan Dios —ichro ch'an.

Ch'in Jesús mé k'uixitoxin nkexrí tsjehe ch'an

(Mt. 17.1-13; Lc. 9.28-36)

² Ntá k'uátsínka injon yaon ntá ch'in Jesús mé sákjuiko ch'an ch'in Pedro la ko ch'in Jacobo la ko ch'in Juan sákjuí sín jehó sín ijnko jnq noi. Ntá tíha mé xrinahya k'uixitoxin ókjé nkexrí tsjehe ch'an k'uíkon tí jehé sín. ³ A ntá iké ch'an tsík'óna imá tjákiní la ko imá tjóá éxi chrinta tsjehe, a ntá ntíhi chjasintajni kohya ninkexró chrókjuech'itjáyan la ko imá chrókuítóhe imá tjóá xikaha. ⁴ Na ntá titáya k'uíkuén sín ntíha itjen tí ch'in Elías la ko tí ch'in Moisés tjejótjo sín tí ch'in Jesús. ⁵ A ntá ch'in Pedro mé ntáche ch'an tí ch'in Jesús kixin:

—Maestro, jina kixin tjejóni ntíhi. Chrókjuech'énani iní nchia la mé ijnko kuéntá la ko ijnko kuénte ch'in Moisés la ko ijnko kuénte ch'in Elías.

⁶ Mé xikaha ichro ch'an kixin kaín sín la imá chrakon sín la tí ch'in Pedro la mé í noehya ch'an nkehe tsixro ch'an. ⁷ Na ntá xrinahya ikui ijnko tjuí kjuak'etja chrítaón kaín xín tí tjejó sín. Na ntá chríkan tí tjuí kuínhin sín itén ijnko nkexro nixja na mé ntáchro kixin:

—Tí nkexro í mé xjanna. Imá tjuaha ch'an. Chrókuinhírá tí nkehe tjako ch'an.

⁸ Na ntá tió tsjehe sín nkuixín tí tjejó sín la í kohya tí iyó sín a. Jehó tí ch'in Jesús tjejóko sín.

⁹ A ntá tí ó k'uínkajinxín sín tí jnq ntá k'uetqan ch'in Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejótjo sín kixin nkehe t'axrxjén tí

nkehe chrónka ch'án káxin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáχρο sín káxin:

—¿Nkeuènte káxin ntáχρο tí sín tjako tí ley káxin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáχρο ch'ín Jesús káxin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáχρο xroon itén Dios káxin nkehe tsonhen tí Xjeen Dios K'óna Chojni? Na mé ntáχρο káxin t'ichjánxin tsjasóte la ko tsotjinkakonhya sín. ¹³ Kjánchó ó xrjanka káxin chaxín ó tsíki ch'ín Elías, ntá kjuinçekjasóte sín ch'án éxi kóxrjínhin sín éxi nixja tí xroon itén Dios káxin xíkaha tsonhen —mé xíkaha chrónka ch'ín Jesús.

Ch'ín Jesús mé kjuínčekitohe jína ijnko xjan chóna ijnko nchaquen tí jínahya
(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uíkón sín káxin nchónhya chojni tsík'antatjen tí jehe sín. Kjaxín ntaha síin tí sín tjako tí ley ikjo tí jehe sín. ¹⁵ A ntá tuénxín tió k'uíkón sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáχρο ch'án káxin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án káxin:

—Maestro, ntihi kjuíkian ijnko xjanna chóna nchaquen tí jínahya na mé nchenixjahya xjan. ¹⁸ Kjóté nkeri tjen xjan la tí nchaquen tí jínahya mé tjáka xjan nonte, ntá ntalóxrjo sitíxin ir'va xjan na netaón xjan neno xjan na méxra tjeheya xjan. Ntá xrjanógha tí sín xrikoa káxin chrókuakitsje sín tí nchaquen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáχρο ch'án káxin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xráqoará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchaquen tí jínahya mé k'uíkón tí ch'ín Jesús ntá kjuínček'aniáte tí xjan a kjuítsínka xjan nonte la kjaminkítaón xjan nonte la sitji ntalóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáχρο ch'án káxin:

—¿Á ósé xíkaha tónhen xjan? —ichro ch'án.

Ntá ntáχρο tí it'é tí xjan káxin:

—Desde naxa xjanntsí xjan. ²² A ntá jnkoyaxón tí nchaquen tí jínahya a mé tjákáte xjan xrohi la ko tjákánki xjan intá káxin tjinkaon chrók'óyan tí xjan a. A ntá jaha zá tsjácha tsjinkítsani? La tikonóhéni tsjinkítsani —ichro ch'án.

²³ Ntá ntáχρο ch'ín Jesús káxin:

—¿Nkeuènté tjanchankina káxin á tsjácha? Tí sitekáván la kaín nkehe la jína tsonhen, káxin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáχρο ch'án káxin:

—Ó titekaonni. Tsjinkítsani káxin antsí má tsitekaonni tí jaha —ichro ch'án.

²⁵ Ntá k'uíkón ch'ín Jesús káxin itsje chojni kóchjina. Ntá nixjehe ch'án tí nchaquen tí jínahya chóna tí xjan a ntáχρο ch'án káxin:

—Jaha la ijnko nchaquen tí jínahya nchenixjahya chojni la ko nchekiénhya chojni. Ije la tétuanhan káxin t'axrjéxian tí xjan na ko tsitohé xjan la í tsokjanhya inaá —ichro ch'án.

²⁶ Ntá tí nchaquen tí jínahya a na mé k'óyato la ko kjuínček'aniáte tí xjan a inaá, ntá k'uaxrjéxín ntiha. Na éxi tsik'en xjan xíkaha tsjehe xjan. Ntá itsje sín ntáχρο sín káxin ó tsíkjin tsik'en xjan, ichro sín. ²⁷ Na ntá ch'ín Jesús mé tséhe tja tí xjan kjuínček'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxnenhen sín ijnko nchia. Ntá jehe sín kjuanchankíhi sín ch'án káxin:

—¿Nkeuènté káxin kjuachahyani kuakitsjeni tí nchaquen tí jínahya a? —ichro sín.

²⁹ Ntá ntáχρο ch'án káxin:

—Tíhi la t'ichjánxin káxin nchónhya tsochronóhéhé T'aná la ko sintehyará —ichro ch'án.

Yóxin chrónka ch'ín Jesús káxin its'en ch'án
(Mt. 17.22-23; Lc. 9.43-45)

³⁰ A ntá tió sákjuixin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án káxin ninkexró ntiha tsonhe sín ³¹ káxin tinkákjakohe ch'án tí sín k'uájiko ch'án a. Na mé chrónka ch'án ntáχρο ch'án káxin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyan sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kíenxínhya sín nkehe tí ntáχρο ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetaoñ?

(Mt. 18.1-5; Lc. 9.46-48)

³³ Ntá kjuuji sín chjasin Capernaum; a ntá tí tjejó sín tí nchia ntiha ntá ch'in Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

³⁴ Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'etqan. ³⁵ Ntá ch'in Jesús mé kjuak'etjaxin ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkojínrá tjinkáonrá chrókuétoanrá má ntá t'ichjánxin kixin tsjixixín tsochréhérá kain sín, ts'ítuanhanrá la ko tsjínktsará kain xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojín nkexro chrók'uáyehé ijnko chánjan kixin tinkáchónki sín tí janhan la mé xikaha chrók'uáyehé sín tí janhan la ko kjaxin éxi chrók'uáyehé sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjínktsa tí jeheni

(Lc. 9.49-50; Mt. 10.42)

³⁸ A ntá ch'in Juan mé ntáchro ch'án kixin:

—Maestro, k'uíkoni ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikoxyani ch'án —ichro ch'án.

³⁹ Ntá ntáchro ch'in Jesús kixin:

—Nté títóhé ch'án kixin ninkexró tjasixín kjuaxroan kjuachaxin njna la tuénxín chrókjuacha chrók'uántaxina sín. ⁴⁰ Tí nkexro nínkakuenhyani la mé tjínktsa tí jeheni. ⁴¹ A ntá jnkojín nkexro tsotjáhará kjónté ijnko vaso intá tsjanjonxín sín njna kixin jahará la tinkáchónkirá Cristo, ntáxrjan kixin chaxín ts'áyehé sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkojín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jina chrókjuincheteyá sín ch'án ijnko xro jie tsik'óna xrochre la chrókjuikákánki sín ch'án ntayaon. ⁴³ A ntá tí itjá tjásixián jie na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuixián tí siín xrohi xitjahya ts'anka, ⁴⁴ tí siín kosjntó t'enhya la ko síche xrohi ts'ankahya. ⁴⁵ A ntá kjaxin tí totá tjásixián jie na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuixián tí siín xrohi xitjahya ts'anka, ⁴⁶ tí siín kosjntó t'enhya la ko síche xrohi ts'ankahya. ⁴⁷ A ntá tí ikuan tjásixián jie na íchá jina chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etqan. A ntá tí yóí kuan la tíha mé sáchrókjuixián tí síche xrohi ⁴⁸ tí siín kosjntó t'enhya la ko siín xrohi ts'ankahya.

⁴⁹ A ntá kain nkexro t'ichjánxin tsjasóte. A ntá kain nkehe ts'áyehé Dios chóna xjnta. ⁵⁰ Tí xjnta la jina. A ntá tí chrók'uankehe tí jni la ntá xitjahya chrókójni inaá. Jahará mé chrókóyóhará éxi xjnta kixin kjuaxróxin chrók'uejokoará kichuárá —ichro ch'án.

10

Tjako ch'in Jesús kixin chrókjuakéhya kichó sín

(Mt. 19.1-12; Lc. 16.18)

¹ Na ntá ch'in Jesús mé k'uaxrxjén ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnkotsé sín tí tjen ch'án ntiha. Ntá kjuakóhe ch'án tí jehe sín kixin xikaha kuénhen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxín sín ch'án. Ntáchro sín kixin:

—¿Á siín kjuachaxin tsjákehé chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuñhanrá tí ch'in Moisés? —ichro ch'án.

⁴ Ntá ntáchro sín kixin:

—Ch'in Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjixén kichó sín —ichro sín.

⁵ Ntá ch'in Jesús ntáchro ch'án kixin:

—Ntá jahará icha asánrá titekáonhyará ntá k'uetqan ch'án ts'óna tí xroon a. ⁶ Kjánchó tí xrankixixín tió kjuich'éna Dios kain xín nkehe la kjuich'éna ch'án ijnko chojni ntoa la ko

ijnko chojni chjin.* ⁷ Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án ichjién ch'án ⁸ ntá yóí sín ts'óna sín éxi jnkokoá chojni. Méxra jehya yaá chojni. Náhi, jnkokoá.† ⁹ Na mé xikaha tí kjuachaxin kuènte Dios kójnkojiéxin sín ntá jehe sín chrók'uitjéhya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjaha ts'itjíhi kichó sín. ¹¹ Na ntá ntáchro ch'ín Jesús kixin:

—Tí jnkójin nkexro tsjákehe ichjién ntá tsakja ch'án í jnko chjin na mé xikaha tsjáchehe ch'án tí tjan tsikótehe ch'án saxín. ¹² La ko kjaxin tí chojni chjin tsikjákehe xii tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

Ch'in Jesús kjuíncheyaon ch'án xjan
(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sín kjuíkao xjan. ¹⁴ Ntá k'uikon ch'ín Jesús ntá kóninkaon ch'án ntáchro ch'án kixin:

—Nté títóhérá tí xjan tsoxrakoa tí tjeñ janhan la t'inkakuènyhará xjan kixin tí sín kuènte kjuachaxin kuènte Dios la mé tóyóhe éxi tí xjan a. ¹⁵ Ntá chaxin ntáxrxjan kixin tí nkexro ts'ónahya éxi ijnko chánjan xitjaha ts'ejó sín tí ts'etqan Dios tí kjuachaxin kuènte ch'án —ichro ch'án.

¹⁶ Ntá kjóá ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús
(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jina. ‡Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkeuènté ntáchrúa kixin jina tí janhan? Jehó jnkokoá nkexro mé jina la tíha mé Dios. ¹⁹ Ntá jaha ó noha kixin nkexrí k'uetqan Dios kixin: “Chrókjuacheéhya kichuá la chrók'oyánhya chojni la chrókueehya la chrókjótahya kichuá la chrókjuich'iahya la ko chróchontehé kjuasáya it'á la ko iná”‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuéhe ch'án tí ch'ín a. Ntá ntáchro ch'án kixin:

—Naxá t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sínchekjixián tí nkehe chonta la mé nchekjionhén tí chojni nóa, a ntá tí nkehe tje te tsochonta nkaya nkajni. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chónnta ch'án.

²³ Ntá ch'ín Jesús komá ch'án tí sín siín ntíha ntáche ch'án tí sín siín k'uájiko ch'án kixin:

—Imá xra ijnko chojni chónnta imá tsjé nkehe ts'ixenhen sín tí tjeñ Dios t'etqan —ichro ch'án.

²⁴ Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjejonhen tí nkehe chónnta sín na imá xra ts'ixenhen sín tí tjeñ Dios t'etqan. ²⁵ Antsí xrahya chrók'uátsínka ijnko kocamello ijnko tjar'in ntachica tjejrja. A ntá antsí má xra ijnko ch'ín chónnta itsjé nkehe chrók'uixenhen ch'án tí tjeñ Dios t'etqan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jina sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chónntani ntá chréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'ín kixin:

—Chaxin ntáxrxjan kixin jnkójin nkexro tsítóhe ntqé sín la o tí kichó ntoa o tí kichó chjin la o it'é o iné sín o ichjién sín o xjeen sín o nqtege kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón ³⁰ na mé ntíhi chjasintajni tsochónnta sín ciento veces nchónhya ntqé sín la ko éxi kichó sín la ko éxi iné sín la ko éxi xjeen sín ts'ikon sín itsjé chojni

* 10:6 Génesis 1.27; 5.2 † 10:8 Génesis 2.24 ‡ 10:19 Éxodo 20.12-16; Deuteronomio 5.16-20

kjé la ko éxi nontee sín xikaha ts'ikon sín itsjé nonte. Kjonté tsjasóte sín ntihi chjasintajni ntá chr'éxin tsochóna sín tí kjuachón jnkochrixín. ³¹ A ntá itsjé tí sín t'etqan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etqan sín tí ntiha.

Níxin chronka ch'in Jesús kixin its'en ch'án
(Mt. 20.17-19; Lc. 18.31-34)

³² Ntá tjejótti sín chrin sín tí ntja sátsji chjasin Jerusalén. Ntá ch'in Jesús mé tjetaón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankíxin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kixin:

—Ijje sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nch'á'á t'etqan la ko tí sín tjako tí ley. Ntá ts'etqan sín kixin its'en ch'án. Ntá sinchek'áyéhe sín ch'án tí sín jehya judío. ³⁴ Ntá jehé sín la tsjanoá sín tí jehé ch'án la ko ntáté sín tsíkíte sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoxechón ch'án inaá —mé xikaha ichro ch'in Jesús.

Ch'in Jacobo la ko ch'in Juan tjanchia sín nkehe
(Mt. 20.20-28)

³⁵ A ntá tí ch'in Jacobo la ko ch'in Juan mé xjeen ch'in Zebedeo mé kóhchinehe sín tí ch'in Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'in Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétqanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'in Jesús tí jehé sín kixin:

—Jahará la noahyará nkehe tí tjanchará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

³⁹ Ntá jehé sín kjuátéhe sín ntáchro sín kixin:

—Kja tsjachani —ichro sín.

Ntá ntáche ch'in Jesús tí jehé sín kixin:

—Chaxín its'irá éxi tí nkehe tsjá its'ia la ko tsikiterá éxi tsikite janhan. ⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxin ó tsikónoxin —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankíxin kónínkakonhen sín tí ch'in Jacobo la ko tí ch'in Juan. ⁴² Ntá k'uíyehé ch'in Jesús kaín tí jehé sín ntá ntáche ch'án sín kixin:

—Ó nohará kixin tí sín t'etqan chjasintajni la imá t'etuenhen sín kaín chojni la ko tí sín imá tjetqan mé imá nchehnkehe asén sín kixin ihyé sín ts'etqan sín. ⁴³ Kjánchó jahará la xikahya chrókjuich'erá. Náhí. Tí jnkójnirá tjinkáonrá chrókuétoanrá la chrókjuínktsará tí í so sín. ⁴⁴ A ntá tió jnkójnirá antsí chrókuétoanrá mé t'ichjánxin senó chrókjuákoxinrá chrókjuich'eherá kichuárá xra. ⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhí. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsáaxin sín ch'án —ichro ch'án.

Ch'in Bartimeo k'uék'ikonhya ch'án ntá ch'in Jesús kjuínchekitqhe ch'án jina
(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'in Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'in t'ikonhya mé it'in ch'án Bartimeo ntá it'é ch'án mé it'in Timeo. Tjetjaxin ch'án chrínta ntja tjanchak'á ch'án. ⁴⁷ Ntá kuínhin tí ch'in t'ikonhya kixin ó kuichjina ch'in Jesús, mé tí nkexro kjuixin chjasin Nazaret, ntá tí ch'in t'ikonhya kjuankíxin t'èya ch'án ntáchro ch'án kixin:

—Jaha Jesús, tsík'axrjenixian ch'in David tikonóghéni —ichro ch'án.

⁴⁸ Ntá nchónhya sín k'uétuenhen sín ch'án kixin tsqtání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjenixian ch'in David tikonóghéni —ichro ch'án.

⁴⁹ Ntá ntahó kjuák'e ch'in Jesús. Ntá k'uétqan ch'án kixin:

—T'jyehérá tí ch'in a —ichro ch'án.

Ntá k'uíyehé sín tí ch'in t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—ǂXá nkehe tjinkávan chrókjuít'ahá? —ichro ch'án.

Ntá kjuátēhe tí ch'ín t'íkonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsja. Ó kuítōha jína kixin kuítekávan tí janhan —ichro ch'án.

Ntá tuénxin tí ch'ín t'íkonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uíxnen ch'án chjasin Jerusalén

(Mt. 21.1-11; Lc. 19.28-40; Jn. 12.12-19)

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jnǂa Olivo ntá k'uetuēnhen ch'ín Jesús iyó tí sín k'uaájiko ch'án, ² ntáchro ch'án kixin:

—Sátjirǂa tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho nǂaxǂa ninkexró tjiták'áha va. Ntá tjasintankehéra va ntá tsjikoanarǂa va ntihi.

³ A ntá tí jnkójin chojni tsjanchankíharǂa sín kixin nkekuènté xíkaha ch'erǂa ntá tsontáchrórǂa kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorǂa —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—ǂNkekuènté xíkaha ch'erǂa tjasintankehéra tí kolócho a? —mé chro sín.

⁶ Ntá kjuátēxin sín éxi k'uetōan ch'ín Jesús. Ntá kjuanjōn sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntǂa ts'atsinkaxin ch'án. Ntá iso sín la mé tóchrínjin sín chaon nta itsǂa kayoa ntá xrǂakǂo sín tinkát'itjǂi sín ntǂa.

⁹ A ntá tí sín tsítaón ntǂa la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixin kjuachaxin ihnjé Inchéni. ¹⁰ Jína tí kjuachaxién Dios itsi mé ts'etuēnhen tí nkexro k'uaxrjenixin it'éni David. Ntá tsjancheheni kjuasáyé Dios tjen nkaya nkajni —ichro sín.

¹¹ Ntá k'uíxnen ch'ín Jesús chjasin Jerusalén la ko kjaxin k'uíxnen ch'án tí njnko jie tsjehe ch'án nkuiún tin nkaxenhen. Ntá ó kóntó ntá ch'ín Jesús sákjuiko ch'án tí teyó sín k'uaájiko ch'án sákjuí sín chjasin Betania.

Ch'ín Jesús kónínkakohen ch'án ijnko nta t'óna to higo tsík'ónahya to

(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjin kixin itjen ijnko nta t'óna to higo itsǂa kayoa. Ntá sákjuitsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjéhe ch'ín Jesús tí nta t'óna to higo k'uetuēnhen ch'án tí nta kixin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uaájiko ch'án mé kuínhin sín xíkaha.

Ch'ín Jesús kjuínchetjóǂa ch'án njnko

(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uíxnen ch'ín Jesús nkaxenhen njnko a. Ntá kjuankixin ch'án k'uínkité ch'án tí sín nchekjixin nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixin sín chichaon la ko tí silla tjejójen tí sín nchekji kontóá ¹⁶ la ko kjuanjōnhya ch'án kjuachaxin kixin tsamá sín nkehe ts'ajixenhen sín njnko. ¹⁷ Ntá kjuakōhe ch'án sín ntáchro ch'án kixin:

—Ntáchro xroon itén Dios kixin: “Tí ntōna i mé it'in nchia tsonixjanaxin chojni nkuiún nación”, a ntá jaharǂa tsíkjich'énarǂa itjueé xíchee* —ichro ch'án.

¹⁸ Ntá tí sín nchǂt'ǂa t'etoan la ko tí sín maestro tjako tí ley na mé kuínhin sín tǂha, ntá kjueyǂa sín nkexrí chrók'óyǂa sín ch'án, kjánchó chrakon sín kixin kóxrjínjin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexin ch'án tí chjasin a sákjuí ch'án.

Ó tsixámǂa tí nta t'óna to higo

(Mt. 21.20-22)

* 11:17 Isaías 56.7; Jeremías 7.11

²⁰ A ntá tí nchítjen k'uaúsínka sín tí tjen tí nta t'óna to higo ntá k'uúkon sín kixin ó tsíxámáxin nuèe tí nta. ²¹ A ntá ch'in Pedro xráinkakon ch'án ntáche ch'án tí ch'in Jesús kixin:

—Maestro, tsjehé tí nta t'óna to higo kónínkakohén jna na ó tsíxámá nta —ichro ch'án.

²² Ntá kjuátehe ch'in Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jná i kixin: “Sátjixián ntihi tjikjigankiá ntayaon”, a ntá tí kain asánrá chrókuinkachónkirá Dios kixin chróxiteyá tí nkehe tsontáchrórá, ntá xíkaha chaxín tsonhen. ²⁴ Mé xíkaha ntáxrjan kixin kain tí nkehe tsjancheherá Dios tí tsitékoonrá kixin chaxín ts'ayéherá ntá xíkaha tsonhen tsoxiteyá. ²⁵ A ntá tío tjejonixjehérá Dios ntá jnkojín nkexro naxá ninkákonhénrá, la chrók'uitjáyahanrá tíha kixin It'ará tjen nkaya nkajní kjaxín chrókjuinçek'itjáyán ch'án tí jje chontará. ²⁶ A ntá tí sinček'itjáyánhyará tí ijíe chojni ntá It'ará tjen nkaya nkajní la kjaxín sinček'itjáyánhya ch'án tí jje chontará.

Tjančankíhi sín tí ch'in Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nčaj'tá t'etqan la ko tí sín tjako tí ley la ko tí sín táda t'etqan njnko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

²⁹ Ntá kjuátehe ch'in Jesús ntáchro ch'án kixin:

—Ntá kjaxín janhan tsjánčankíhárá ijnko nkehe, síná á chrókjuáteherá, ntá tsojtjonkará nkehe tí kjuachaxin chonta janhan kixin xíkaha it'a. ³⁰ ¿A ntá nkexro k'uetuēnhen ch'in Juan kixin tsíkíte ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'in Juan ntá tsjančankí tí ch'in a kixin nkekuēnté kuítekakuenhyani ch'án. ³² ¿Á chróntáchroni kixin chojni ó tsík'etuēnhen ch'án? —ichro sín.

Kjánčhó chraķonhen sín tí chojni chjasin kixin kain sín kuítekaon sín kixin ch'in Juan mé k'uénixja ch'án itén Dios. ³³ Ntá ntáche sín tí ch'in Jesús kixin:

—Noehyani —ichro sín.

Ntá ntáchro ch'in Jesús kixin:

—La ko kjaxín janhan tsqxrjankahya nkexro kjuanjon kjuachaxin kixin xíkaha t'a —ichro ch'án.

12

Ch'in Jesús mé kjuíncheyóexin ch'án éxi chojni ch'ehya xra jina

(Mt. 21.33-46; Lc. 20.9-19)

¹ Ntá ch'in Jesús kjuíncheyóexin ch'án inaá ntáchro ch'án kixin:

—Itjen ijnko ch'in k'uēnkaxin ch'án itsjé ntanòda t'óna to uva nontee ch'án la ko kjuich'éna ch'án corral la ko kjuich'éna ch'án ijnko tòye ts'énya sín to uva. A ntá kjuich'éna ch'án ijnko tját'o noi kixin ts'it'ótjen ch'án tsokotohe ch'án.

A ntá kjuínčekjen ch'án tí nonte iso chojni ch'e xra. Ntá sákjuí ch'án kjín. ² Ntá tí kjuixraká tí yaon ts'óna to ntá k'uetuēnhen ch'án ijnko tí nkexro ch'ehe ch'án xra kixin tsésjijkjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'in a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí inché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí inché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí inché mé xíchr'án ch'án í so nkexro ch'ehe ch'án xra sákjuitsjehe sín, kjánčhó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkoķóaxón xjen ch'án na imá tjuēhe ch'án tí xjan a. Ntá kjuixixin chr'án ch'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kichó sín kixin: “Tí ch'in i mé ts'áyéhe kain nkehe síin ntihi. A ntá jie ts'óyánni ch'án, a ntá jeheni ts'áyéheñi kain tí nkehe a”, ichro sín. ⁸ Ntá xíkaha itsé sín ch'án k'óyán sín ch'án ntá kuakitsjexín sín ntqē ch'án tí nontee ch'án.

⁹ A ntá kjuanchankí ch'in Jesús ntáchro ch'án kixin:

—¿A ntá nkehe chrókjuich'e tí inché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

* 12:9 Isaías 5.1-7

10' ¿Á kjuinchekuáxinhyará jahará tí xroon itén Dios? Ntáchro xikihí:
Tí xro náxrjónhya kuitöenta tí sín ch'éna tjat'o,
mé jie k'óna tí xro tjetöan.

11 Mé xikaha kjuich'è Ìnchéni Dios,

na ntá tíha mé ijnko nkehe kjuachrakon k'uikonní† —ichro ch'ín Jesús.

12 Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxinhjín tí jehe sín. Kjánchó chrakon sín kixin nchónhya chojni kóchjina ntá kuitöe sín ch'án ntá sákjuí sín.

¿Á jína chrókjuenkehe sín gobierno?

(Mt. 22.15-22; Lc. 20.20-26)

13 A ntá ichr'án sín iso tí sín fariseo la ko iso tí sín kuente ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie. 14 Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjàkua ntje Dios. ¿Á jína chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

15 Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjácha_xinrání. Xrákoará ijnko tí chichaon tjanchia sín tsotsjáha —ichro ch'án.

16 Ntá xráko sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrxéjín tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátjehe sín kixin:

—Tí ch'ín t'etöan mé tjenkáni ch'án —ichro sín.

17 Ntá kjuátjehe ch'ín Jesús ntáchro ch'án kixin:

—Chróchjehérá tí ch'ín gobierno t'etöan tí nkehe kuente ch'án; a ntá tí nkehe kuente Dios la chróchjehérá Dios —ichro ch'án.

Ntá chrakon sín kixin xikaha kjuátjehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsik'en mé xikaha chrókjuachaxín sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsík'ich'énahya sín xjeen sín ntá tí kichó tí nkexro tsik'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsik'en. 20 Kjánchó k'uéjío yato sín jnkoqó kichó sín. Ntá tí ch'ín saó mé kuákja ch'án ichjién ch'án. Ntá ik'uén ch'án, kjánchó ninkehó xjan tsík'ich'énahya sín. 21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxín tsík'ich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen inaá. 22 Ntá kayatoé sín k'uéchénta sín tjan la ko kaín sín ik'uén sín la ko ninkehó xjan kjuich'énahya sín kaín sín. Ntá kjuixixín ntá k'uén tjan kjaxin tjan. 23 Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsikótehe tjan? —ichro sín.

24 Ntá kjuátjehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. 25 A ntá tió tsoxechón tí chojni tsik'en la tsotjeheya sín la ko tsjanjonhya sín xjeen sín kixin tsotjehe sín kixin tí sín tsik'en la éxi sín ángel ts'ejó sín nkaya nkajní. 26 A ntá tí tsoxechón tí sín tsik'en, ¿á kjuinchekuáxinhyará tí xroon tsíkjin ch'ín Moisés chronka nkexrí k'uénixjeexín Dios ijnko nta yoa tjeche ntáchro ch'án xikihí: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”? 27 Méxra tí Dios i la jehya tinkáchónki tí sín tsik'en. Náhi. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankirá —ichro ch'án.

Tí nkehe antsí imá tjetöan tsík'etöan Dios

(Mt. 22.34-40)

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kixin imá jína kjuátjehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetöan tsík'etöan Dios? —ichro ch'án.

29 Ntá kjuátjehe ch'ín Jesús ntáchro ch'án kixin:

—Tí nkehe antsí tjeotan tsík'etōan Dios mé tíhi: “Tinhínrǎ kaín rá chojni Israel kixin Ìnchéni Dios la mé jnkokǒa la kohya í jnko nkexro. ³⁰ Ntá kaín asánrǎ la ko kaín kjuaxrexinkaon kuéntárǎ la ko kaín fuerza kuéntárǎ chrótjuèxínrǎ.”* Mé xíkaha tí nkehe antsí tjeotan tsík'etōan Dios. ³¹ A ntá tí nkehe yóxin tsík'etōan Dios la mé tóyóhè na mé ntáchro xíkíhi: “Chrótjuèhérá kichuárǎ éxi tjuèxínrǎ asánrǎ,”† la kohya í jnko nkehe antsí má tjeotan tsík'etōan ch'án —ichro ch'ín Jesús.

³² A ntá kjuátehe tí ch'ín tjako n̄nko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokǒaxón Dios la ko kohya í jnko Dios.‡
³³ Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kichó ni éxi tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjonní chróchjǎnxin chrítaón altar la kánhyó tjeotan tíha —ichro ch'án.

³⁴ A ntá tió k'uikon ch'ín Jesús kixin jina kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

ǒXá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí n̄nko jíé. Ntá kjuanchankí ch'án ntáchro ch'án kixin: —ǒNkexrí kixin tí sín tjako tí ley mé ntáchro sín kixin tí Cristo mé ts'axrjenixin tí ch'ín David?

³⁶ A ntá tí Nchǎkuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntió tsétōan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétōan.”*

³⁷ ǒXá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókínhin sín kóxrjnh̄in sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyarǎ tí sín tjako tí ley. Jehe sín mé tóxrjnh̄in sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín. ³⁹ Jehe sín xritjeyǎ sín tí nta antsí náxrjón ts'ejóyǎ sín tí nkaxenhen n̄nko. La ko kjaxin tió sátsji sín tí sine sín xritjeyǎ sín tí nta antsí náxrjón ts'ejókjen sín sine sín. ⁴⁰ La ko takitsje sín ntōe chojni k'án. La ko ch'iyexín sín chojni kixin isé nixjehè sín Dios kixin chrókuinhin chojni chróntáchro sín kixin imá jina tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjǎxin ch'án nkaxenhen n̄nko chók'èxin tjen tí ntacajón tjetóxyeyǎ ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntiha mé kjui ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uúyehè ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan antsí tjete k'uikon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchónta tjan chrók'uíte nkehe chrókjónè tjan —ichro ch'án.

13

Ch'ín Jesús chrónka kixin tsóxika n̄nko

(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí n̄nko jíé ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas 6.6 * 12:36 Salmo 110.1

—¿Á tsjehé jaha tí nchia jíé tsík'óna ní? Tsjixraká tí yaon la í ninkehó xro ts'ejójkjenhya kíchó, la kaín tíha la tsqxika —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí nínko a. Ntiha kjuák'etjxin ch'in Jesús. Ntá ntiha ch'in Pedro, la ko ch'in Jacobo, la ko ch'in Juan, la ko ch'in Andrés chjanchankíhí sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexri tsonoxéinni nkesá tsoxiteyá kaín tíha —ichro sín.

⁵ Ntá ch'in Jesús kjuátehe ch'án ntáchro ch'án kixin:

—Tóxakonhanrá títoéhará kixin ninkexró chrókjuít'ayahyará. ⁶ Nchónhya chojni tsi tsontáchro sín kixin jehe sín mé Cristo. Ntá xikaha sich'iyehé sín nchónhya chojni.

⁷ A ntá tíó tsinhínrá kixin tjanjonko kíchó sín la t'óyán kíchó sín la chrakonhyará tóxakuanhyará ó jehí tsonhen tíha. Kjonté xikaha naxá tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsínki nonte la ko itsjé chjasin la tsókjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etjoan ntá tí nkaxenhen nínko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexri tinkachónkirá tí janhan nkayakon tí jehe sín. ¹⁰ Tí naxá ts'itjáyanyha chjasintajni la mé t'ichjánxin tsinhin chojni kaín xín nación tí tan jina tsaáxin sín. ¹¹ Tíó sátsjikoará sín tsjikaánrá sín tí tjejó tí sín t'etjoan, la tóxakuanhyará nkehe tsjateherá la ko nkehe tsjenkayáxinrá. Náhí. Chronkará tí nkehe kjuanjon Dios tsontáchrorá tí hora a, kixin jahyará tsonixjará. Náhí. Nchakuen Dios mé tsonixja. ¹² Iso chojni kjonté naxá kjéhya sín tsjikaán tí kíchó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko iné la tsjikaán sín kixin its'en. ¹³ Kaínxin chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

¹⁴ 'Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel* —ntá tí chojni sinchekuáxin tí xroon i mé chrókuienxin sín tíha—, a ntá tí chojni tjejó estado Judea ts'ikon la sátsji sín tsochriin sín jna tsjík'ejómá sín. ¹⁵ A ntá tí sín tjejó chrítaón nchia la í chrók'uinkajinnya sín, chrók'uixenxin sín nkaxenhen nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxá chrókjuikakja sín iké sín. ¹⁷ Ntá nóa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinnya ts'ejó chojni kixin ninkehó yaon kuénhya xikaha desde tí kjuankixixín Dios kjuich'éna ch'án chjasintajni la ko kjá xikahya tsonhen chr'éxin inaá. ²⁰ A ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehé ch'án tí sín tsíkjeýá ch'án ntá k'uetjoan ch'án kixin tjoka ts'atsínka tí kjuachrakon a.

²¹ A ntá jnkójín nkexo tsontáchro kixin: “Tsjehe, ntíhi itjen tí Cristo”, o tsontáchro sín kixin: “Tsjehe, ntiha tjen ch'án”, la títékákuénhyará sín. ²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíé tjínkaon sín chrókjuich'iyexin sín chojni, kjonté tí sín tsíkjeýá Dios. ²³ A ntá jahará chrókóxakonhanrá kaín tíha. Tjéjtjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjenxin nkajni la ko tí kjuachaxin siin nkaya nkajni la kjaxin tsínki. ²⁶ Ntá ts'ikon sín tí Xjeen Dios K'óna Chojni itsi chríkjan tjuí tsíkáo tí kjuachaxin jíé. ²⁷ Ntá tsochr'án ch'án tí sín ángel sátsji sín kuenté chjasintajni tsjíkjenájín sín kaín chojni tsíkjeýá ch'án.

²⁸ 'Chrókiénxinrá tí nkehe sjintayóaxian. Éxí yóhé tí nta t'óna to higo tíó sít'ayan kahnte ntá nohará kixin ts'ixenhen nchakuen sóa ²⁹ mé xikaha tíó ts'ikonrá xikaha tsonhen kaín tíha ntá tsonoxínrá kixin ó kuichjina tí tsjeje chjasintajni. ³⁰ Chaxin ntáxrxin kixin kaín tíha tsonhen tí naxá t'enhya tí chojni siin chjasintajni. ³¹ A ntá tí nkajni la ko tí chjasintajni mé ts'itjáyán. A ntá tí nkehe ntáxrxin la ts'itjáyanyha, tsoxiteyá tíha.

³² A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajni la ko kjaxin tí Xjeen Dios K'óna Chojni la noehya. Ó jehó It'éni mé nohe.

* 13:14 Daniel 9.27; 11.31; 12.11

³³ Méxra chrók'uejotsjehérá, chrók'uejochonhénrâ chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko chojni sátsji kjín, a ntá tí naxá sátxixínhya ch'án ntøe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntøe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetje tsje cochiká o á ijnko ts'inkaséyan. ³⁶ Ntá xrináhya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejótjsjehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús

(Mt. 26.1-5; Lc. 22.1-2; Jn. 11.45-53)

¹ Naxá t'itjáyan iyó yaon ntá tsjasin sín tí kia pascua, la ko sine sín tí niotja tsikjikhoya tí xroan nchek'ánkí niotja.

Ntá tí sín nchát'á t'etøan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án. ² Ntá ntáχρο sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókóninkaon sín —ichro sín.

Ijnko tjan kuikítexín aceite náxrjón xraxé ikja ch'ín Jesús

(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchénta chinlepra. A ntá tí tjene ch'ín Jesús ntá xrináhya ikui ijnko tjan kuikao tjan ijnko xro mé tjia tí aceite xraxé itsjo nardo, imá tjetje tsik'ite. Ntá tí tjan a mé kuakitjehé tjan tí xro a ntá kuikite tjan kja ch'ín Jesús tí aceite a. ⁴ A ntá iso tí sín tjejó ntiha kóninkakonhen sín tjan ntáχρο sín kixin:

—¿Nkekuènte kjuínchexénhen tjan tí aceite náxrjón xraxé? ⁵ Íchá jína chrókóxiçin iní ciento chichaoan denario tí aceite a ntá tí chichaoan a mé chrókujtønhen tí chojni nóa —mé xikaha ichro sín k'uántaxínjin sín tjan.

⁶ Ntá ntáχρο ch'ín Jesús kixin:

—Nté tjtøherá tjan; ¿nkekuènte t'antaxínhínrâ tjan? Ó nchoxon tí nkehe kjuích'ena tjan. ⁷ A ntá tí chojni nóa la ó xráçín ts'ejókoará sín la jína tsjnkítsará sín jnkojin yaon. Ntá janhan la jnkochríxínhya ts'ejóni. ⁸ Ntá jehe tjan kjuích'e tjan kaín nkehe tjínkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána. ⁹ Chaxín ntáxrjan kixin tí tsjako sín tí tan jína tsaáçin chojni nkuíçín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús

(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóçin sín k'uájiko ch'ín Jesús a mé sákjuítsjehe ch'án tí sín nchát'á t'etøan kixin tsochronka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáχρο sín kixin chaxín tsjanjon sín chichaoan ts'áyéhe tí ch'ín Judas. Ntá kjuankíçin ch'án kjueyá ch'án nkexrí tsochronka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíçin kia sine sín niotja tsikjikhoya tí xroan nchek'ánkí nio tíó ts'óyan sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjínkávan sátsjini sincheyaxíçini kixin sineni kuènte tí kia pascua? —ichro sín.

¹³ Ntá k'uetuenhen ch'án iyó tí sín k'uájiko ch'án ntáχρο ch'án kixin:

—Sátjirá chjasin Jerusalén ntá ntiha tsoxetarâ ijnko ch'ín yámâ tóa tjia ntá. Tí ch'ín a tsochréhérâ. ¹⁴ A ntá tí nchia ts'ixenhen ch'án la tsjanchankíhírâ tí inché nchia, tsontáçhorá kixin: “K'uetøan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakøhará ch'án ijnko cuarto jíe, yóçin piso mé chóna kaín nkehe t'ichjánçin. Mé ntaha mé sincheyaxíçinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíçin sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíçi ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uejó sín, a ntá tíó tjejóne sín ntá ntáχρο ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinčekjiráni —ichro ch'án.

¹⁹ Ntá jehe sín mé kjuankíxin k'uává sín. Ntá kjuankíxin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáχρο ch'án kixin:

—Jehe ch'án mé ijnko tí teyóxinrá, mé tí nkexro tjeñekian jnkokoá plato ntihi. ²¹ Chaxín tí Xjeen Dios K'óna Chojni mé tsonhen éxi níxja xroon itén Dios. Kjánchó nóa tí ch'ín sinčekji ch'án. Íchá jína tí ch'ín a la chrókókehya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ó ch'án tí niotja ntá kjuanjon ch'án k'uáyéhe sín. Ntá ntáχρο ch'án kixin:

—Interá, tíhi mé cuerpo kuèntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uú sín kaín sín tí nkehe tjiá. ²⁴ Ntá ntáχρο ch'án kixin:

—Tíhi mé njina mé chrónkaxín kixin chaxín tsoxiteyá tí nkehe níxin tsonhen na mé ts'itji kixin tsaáxin nchónhya chojni. ²⁵ Chaxín ntáxrjan kixin ts'íhya janhan tí inté to uva inaá tí naxá tsjixrakáhya tí yaon itsi kjuachaxin kuènte Dios, a ntá tí yaon a xik'ía inté to uva níxin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án
(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuí sín tí jnq Olivo. ²⁷ Ntá ch'ín Jesús ntáχρο ch'án kixin:

—Ijie tie kaín rá tsochrakonrá ntá tsjtonará. Ntá tsoxiteyá éxi ntáχρο xroon iten Dios kixin: "Ts'óyan sín tí nkexro t'ayakonhen tí kolélo ntá tsokehya nkexro ts'ayakonhen va, a ntá tsjichroe va."* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáχρο ch'ín Pedro kixin:

—Kjonté kaín sín tsítóha sín ntá janhan la náhi —ichro ch'án.

³⁰ Ntá ntáχρο ch'ín Jesús kixin:

—Chaxín ntáxrjan kixin ijie tie tí naxá tsjehya kochintóa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáχρο ch'án kixin:

—Kjonté koína its'én la sjntamáhya tí jaha —ichro ch'án.

La ko xíkaha ntáχρο sín kaín sín.

Ch'ín Jesús níxjeexín ch'án Dios tí Huerto Getsemaní
(Mt. 26.36-46; Lc. 22.39-46)

³² Ntá kjuíji sín ijnko nonte mé it'ín Getsemaní. Ntá k'ueñenhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankíxin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxi chrók'uén xíkaha. Ijie la ntihyó titóhará tjejtsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'ín ch'án. Ntá kjuankíxin chrónóhehe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáχρο ch'án kixin:

—It'eni jaha. Jaha mé chonta kaín xín kjuachaxin na ntá chrónóghani tsjakjínhinni kaín tí jínaha tsonhenni tsjasóteni jie. Jehya kixin chrókónhen éxi tjinkaonni jeheni. Náhi. Éxi tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuitóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejtsjehérá la ko chrónóhéhé Dios kixin títoehya ch'án tí jínaha chrókjuichroerá. Tí asánrá ntáχρο kixin chrókjuinchexiteyará tí jína kjánchó tí cuépporá la tsjachahya —ichro ch'án.

³⁹ Ntá sákjuí ch'án inaá chrónóhehe ch'án Dios. Ntá ó jehe xíkaho xínixja ch'án. ⁴⁰ Ntá ikjan ch'án la ó tjejójua sín inaá kixin kúihj sín kotáchrin. Ntá í noehya sín nkexrí chrókjuátehe sín.

⁴¹ Ntá níxin sáxíkji ch'án ntá kjan ch'án ntá ntáχρο ch'án kixin:

* 14:27 Zacarías 13.7

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjásote sín ch'án. ⁴²Ntá t'áyará sátsjini kixin ó kjuí tí nkexro sinchekjina.

Sákjuiko sín tí ch'in Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³Naxá tjenixja ch'in Jesús ntá xrinahya kjuíji ch'in Judas, mé ijnko tí teyóxin sín k'uájiko ch'in Jesús. Nchónhya chojni kjuikao ch'án kjuíjiko sín ch'ica espada la ko inta. Na mé kjuachaxién tí sín nchat'á t'etqan la ko tí sín maestro tjako tí ley la ko tí sín táda t'etqan njnko mé kjuixín sín.

⁴⁴A ntá tí ch'in Judas mé tí ch'in sinchejki tsintáchro ch'án kixin:

—Tí ch'in sinekian kochíto mé jehé tíha la itsérá ch'án sátsjikoará ch'án —ichro ch'án.

⁴⁵Ntá kjuí sín ntá tuénxin kóchjinehe ch'in Judas tí ch'in Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶A ntá tí sín kjuíji mé tsé sín tí ch'in Jesús, sákjuiko sín ch'án.

⁴⁷A ntá ijnko ch'in tjentaxín ntíha mé kuakitsje ch'án ch'ica espada kóchrínjin ch'án tatsjon tí ch'in ch'ehé tí nchat'á t'etqan xra. ⁴⁸Ntá ch'in Jesús mé ntáche ch'án tí sín a kixin:

—¿Nkeuènté kixin éxí chrótserá xícheé mé xíkaha k'uinkakoará ch'ica espada la ko inta kixin tsotseráni? ⁴⁹Kaín yaon kjuak'é nkaxenhen njnko kjuákohará, ¿ntá nkeuènté tsehyaráni? Kjánchó t'ichjánxin xíkaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰Ntá kaín tí sín k'uájiko ch'án na mé kuítqhe sín ch'án jehó ch'án ntá sákjuí sín.

Jnko ch'in ntasoá sákjuixín ch'án ntíha

⁵¹A ntá ijnko ch'in ntasoá mé kjaxín tinkáchréhe ch'án ntíha, a ntá jehó ijnko kamantá tjesáte ch'án, ntá kjaxín itsé sín ch'án. ⁵²Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'in Jesús kóchjina ch'án tí tjejó tí sín t'etqan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Ntá sákjuiko sín tí ch'in Jesús tí ntqé tí nchat'á imá t'etqan. Ntaha mé tsíkjínkotsé kaín tí sín nchat'á t'etqan la ko tí sín táda t'etqan njnko la ko tí sín maestro tjako tí ley. ⁵⁴Ntá ch'in Pedro la ikjín tjechréhe ch'án ntá kjuíji ch'án tí ntásin ntqé tí nchat'á imá t'etqan a. Ntaha síche xrohi. A ntá ntíha tjejótxaxín tí sín policia tjejóchjixrohe sín, ntá kjaxín ch'án ntahó kuítqhe ch'án tjechjixrohe ch'án.

⁵⁵Ntá tí sín t'etuñhen tí sín nchat'á la ko kaín tí sín t'etqan kjuéyá sín chojni kixin tsochrónka sín nkehe tí jie chóna ch'in Jesús kixin jína chrók'óyán sín ch'án. Kjánchó ninkexró k'uitjahya sín tsjinktsa tsochrónka. ⁵⁶Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸—Jeheni ó kuínhinni kixin ntáchro ch'án kixin ts'óxika ch'án tí njnko tsíkjich'énaxín chojni tja ntá iní yaon koá la ó tsjak'e ch'án í jnko njnko jehya chojni sich'éna[†] —ichro sín.

⁵⁹Kjónté xíkaha la jnkokónhya tí nkehe chrónka sín.

⁶⁰Ntá tí ch'in t'etuñhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'in Jesús kixin:

—¿Á ninkehó tjejeehya jaha? ¿Á chaxín tí jie t'eka sín tí jaha? —ichro ch'án.

⁶¹Ntá ch'in Jesús táni ch'án la ninkehó tjejeehya ch'án. Ntá xíkjanhankí tí nchat'á t'etqan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶²Ntá ntáchro ch'in Jesús kixin:

—Chaxín janhan tíha. Ntá chr'exín ts'ikonrá kixin tí Xjeen Dios K'óna Chojni mé tsjak'etjaxín ch'án tí tja chjina kjuachaxín kuènté Dios la ko itjuí mé ts'inkajinxín ch'án nkaya nkajní —ichro ch'án.

⁶³A ntá tí nchat'á t'etqan kótséchje ch'án tí iké ch'án kjuakoxín ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. ⁶⁴Jahará ó kuínhínra kixin k'uántaxínjin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵Ntá ikjé sín la kjuankixin sín kuíkíte sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuènté njnko chjéhe sín nkayakon ch'án.

[†] 14:58 Juan 2.19

Ch'in Pedro kjuínchemá ch'án kixin chónhya ch'án tí ch'in Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntásin nonte itjen ch'in Pedro. Ntá ikui ijnko tjan ch'ehe tjan xra tí ncha't'á t'etqan.

⁶⁷ Ntá k'uikon tjan kixin tjechjixrohe ch'in Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'in Jesús kjuixin chjasin Nazaret —ichro tjan.

⁶⁸ Ntá ch'in Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexin ch'án ntiha sákjui ch'án ntója. Ntá xrinahya itsje ijnko kochintqá. ⁶⁹ Ntá tí tjan a mé k'uikon tjan tí jehe ch'án ntá chénka tí sín sintaxin ntaha kixin:

—A ntá tí ch'in i mé jnkójin tí sín a —ichro tjan.

⁷⁰ Kjánchó kjuínchemá ch'án inaá. Ntá antsi chr'éxin tí sín k'uejontaxin ntáche sín tí ch'in Pedro kixin:

—Chaxin kjaxian jaha tsikjixian estado Galilea kixin tjatsqanxinni kixin nixja jaha éxi nixja tí jehe sín —ichro sín.

⁷¹ Ntá ch'in Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'in ntáchrórá jahará —ichro ch'án.

⁷² Ntá yóxin itsje kochintqá. Ntá ch'in Pedro mé xraxinkaon ch'án kixin nkexrí ó chrónka ch'in Jesús kixin: “Naxá tsotsjehya kochintqá yáya mé ó tsjixin sinchemána níya kixin chonhyana.”* Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuich'e ch'án kjuínchemá ch'án tí ch'in Jesús.

15

Ch'in Jesús nkayakon tí ch'in Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín ncha't'á t'etqan kójnkotséko sín tí sín táda la ko tí sín tjako tí ley la ko kaín tí sín t'etqan kuènte núnko mé kójnkotsé sín ikjo kíchó sín. Ntá kjuixin ntá kjuínchenteto sín tí ch'in Jesús ntá kjuikaán sín ch'án tí tjen tí ch'in Pilato. ² Ntá tí ch'in Pilato mé kjuanchankí ch'án ntáchro ch'án kixin:

—¿A jaha tí Rey kuènte tí sín judío? —ichro ch'án.

Ntá kjuátehe ch'in Jesús ntáchro ch'án kixin:

—Kjaxian jaha ntáchrúa —ichro ch'án.

³ A ntá tí sín ncha't'á t'etqan mé k'ueka sín ch'án nchónhya jie. ⁴ Ntá ch'in Pilato xíjanchankí ch'án inaá ntáchro ch'án kixin:

—¿Jaha, nkekuènté tjetehya ninkehó? Tsjehé kixin nchónhya jie t'eka sín tí jaha —ichro ch'án.

⁵ A ntá ch'in Jesús la ninkehó kjuáteehya ch'án. Ntá ch'in Pilato la í noehya ch'án nkehe tsjenkayáxin ch'án.

K'uáyéhe ch'in Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'in Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxi tjinkaon tsjanchia tí sín tsikójnkotsé tí kia a. ⁷ A ntá ntiha tjechjina ijnko ch'in mé it'in Barrabás, la ko í so sín kuítekakuenhya sín tí síxreé ntá k'oyán sín chojni.

⁸ Ntá kui nchónhya chojni kjuankixin sín kjuanchehe sín tí ch'in Pilato kixin chrókjuich'e ch'án éxi kaín nánó xíkaha. ⁹ Ntá kjuátehe ch'in Pilato kixin:

—¿A tjinkáonrá tsitqá sátsji tí ch'in Rey t'etuenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín ncha't'á t'etqan, a ntá tsé sín tí ch'in Jesús kjuikénhen sín ch'án. ¹¹ A ntá tí sín ncha't'á t'etqan a mé kjuínchekóninkaon sín kaín tí chojni sín, ntáche sín kixin íchá jina chrókjuanchia sín kixin chrók'uatjánta ch'án tí ch'in Barrabás. ¹² Ntá ch'in Pilato kjuanchankí ch'án ntáchro ch'án kixin:

—A ntá tí ch'in tikítexínrá kixin ch'in Rey t'etuenhen tí sín judío la ¿nkehe tjinkáonrá sit'aha ch'án? —ichro ch'án.

¹³ Ntá jehe sín kjuátehe sín k'oyako sín kjuanchia sín kixin:

—¡Tjakénkánia ch'án ntacruz!

¹⁴ Ntá ch'in Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuich'e ch'án? —ichro ch'án.

Kjánchó antsi má itsen k'oyako sín kjuanchia sín kixin:

—¡Tjakénkánia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uúixité ntá kuitohe ch'án k'ixin sátsji tí ch'ín Barrabás. Ntá k'uetōan ch'án k'ixin tsjate sín tí ch'ín Jesús. Ntá kjuixín ntá kjuanjon ch'án kjuachaxín k'ixin tí sín soldado sátsjiko sín ch'án tsjak'enkani sín ch'án ntacruz.

¹⁶ Ntá tí sín soldado a mé sákjuiko sín ch'án tí ntásin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'í. ¹⁸ Ntá kjuank'ixin k'uúixité sín ntáchro sín k'ixin:

—Jnkochr'ín tsjak'e tsétuēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuikite sín ch'án. K'uéjōxin toch'in sín nkayakon ch'án kjuich'eyáxín sín éxi imá chrókjuikosáyehe sín ch'án. ²⁰ Ntá tió kjuixín xikaha kjuich'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsikjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjéxin sín ch'án ntiha sákjuiko sín ch'án k'ixin ntá tsjak'enkani sín ch'án ntacruz.

Ntá kjuak'enkani sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'ín tsikjixín chjasín Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsikjixín ch'án nongtee ch'án, ntá k'uátsínka ch'án ntiha. Ntá tí sín soldado a mé k'uetuēnhén sín ch'án k'ixin tsochréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrjéxin k'ixin Tjo Calavera. ²³ Ntá ntiha chjéhe sín ch'án xranvino tsík'ixinkikjanxín xroan mirra chrók'ui ch'án, kjánchó k'uihya ch'án. ²⁴ Ntá tí sín soldado kjuak'enkáni sín ch'án tí ntacruz a. Kjuixín ntá kjuich'exín sín suerte tí ké ch'án k'ixin tsgnohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkáni sín ch'án tí ntacruz a. ²⁶ Ntá ikja tí ntacruz kjuak'enkáni sín ijnko ntachiso ntsí tsikjín sín nixja nkekuènte kjuínchekjasóte sín ch'án na mé ntáchro k'ixin: “Jehe ch'án mé Rey kuènte tí sín judío”. ²⁷ Na ko kjáxin k'uéjōyáni sín ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús. ²⁸ Na mé xikaha xiteyá éxi nixja xroon itén Dios ntáchro k'ixin: “Éxi yóhe ijnko chojni kjuasin jie mé k'uikon sín ch'án”*

²⁹ Ntá tí sín k'uatsínka ntiha mé kjuanoá sín ch'án la ko k'uántaxínhin sín ch'án tinkátjía jka sín ntáchro sín k'ixin:

—Kjá na ntáchrúa k'ixin chrók'oxika tí njnko, a ntá iní yāon koá la ó chrókjuixín chrókjuich'éna inaá,† ichrua. ³⁰ Nchekaá qásán jahvá tjasinkajinxíán tí ntacruz méhe —ichro sín.

³¹ Ntá tí sín nchaj'á t'etōan la ko tí sín tjako tí ley mé kjuanoá sín ch'án ikjo sín kichó sín k'ixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.

³² A ntá chaxín jehe ch'án tí Cristo tí Rey kuènte tí naciōn Israel ntá chrók'uiikonni k'ixin jehó ch'án chrókjuinkajinxín ch'án asén ch'án tí ntacruz ntá kjáxin chrókuitekaonni ch'án —ichro sín.

Kjonté tí yaá sín kjáxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonk'ixin mé k'uúixín tie kuènte chjasintajni, kóxrjehen tí sítie hasta las tres kónjin ³⁴ ntá tí hora a mé itsen k'uéya ch'ín Jesús ntáchro ch'án k'ixin:

—Eloi, Eloi, ¿lama sabactani? —tí nkívee sín mé t'axrjéxin k'ixin: It'eni, It'eni, ¿nkekuènte kuitōhéní?,‡ mé xikaha ichro ch'án.

³⁵ Ntá iso sín siín ntiha kuínhin sín, ntá ntáchro sín k'ixin:

—Tinhínrá k'ixin t'íyehé ch'án tí ch'ín Elías tí ch'ín k'uéchrónka itén Dios óse —ichro sín.

³⁶ Ntá ijnko tí jehe sín siín ntiha kuínká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjínjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a k'ixin:

—Tsítóhēni tsotsjehēni á chaxín tsi tí ch'ín Elías tsjinkajín tí jehe ch'án —ichro ch'án.

³⁷ Ntá ch'ín Jesús itsen k'uúyato ch'án ntá kjuixín k'uén ch'án. ³⁸ A ntá tí ka tjenkákueñxín nkaxenhen njnko mé yaá k'óna k'uichje kjuank'ixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uikon ch'án k'ixin xikaha ó kjuixín k'uén ch'án ntá ntáchro ch'án k'ixin:

—Chaxín tí nkexro i la Xjeen Dios —ichro ch'án.

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

⁴⁰ Kjaxin ntaha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'in tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin í mé kuinkáchréhe sín tí ch'in Jesús ntá kjuíkao sín ch'án kixin k'uejkinkitsa sín ch'án tí k'uekjak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'in Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankixixín tí yaon t'ok'éhe sín, ⁴³ mé kui ijnko ch'in it'in José chjasén ch'án mé Arimatea. Jehe ch'án mé koí ch'án t'etqan ch'án tí xra kuènté tí síxreé. Kjaxin jehe ch'án tjechónhen ch'án itsi tí kjuachaxin kuènté Dios. Chrakonhya ch'án sákjuí ch'án ntqé ch'in Pilato kjuíkanchia ch'án tí cuerpo kuènté ch'in Jesús. ⁴⁴ Ntá ch'in Pilato chrakon ch'án kixin ó tsikjixin tsik'en ch'in Jesús, ntá k'uíyehé ch'án tí ch'in capitán a kjuanchankíhi ch'án kixin á chaxín xikaha kónhen. ⁴⁵ Ntá chrónka tí ch'in capitán kixin chaxín ó kjuixin k'uén ch'án. Ntá kuínhin ch'in Pilato xikaha ntá kjuanjon ch'án kjuachaxin kixin tsjikakja ch'in José tí cuerpo kuènté ch'in Jesús. ⁴⁶ Ntá ch'in José mé k'uena ch'án ijnko ka sávana náxrxón. Ntá kjuinkajin ch'án tí cuerpo kuènté ch'in Jesús, a ntá jehe tí ka a mé kjuínchek'ísimá ch'án tí cuerpo kuènté ch'án. Ntá kjuák'enkaya ch'án ijnko tóye tsíxrayá itjo. Ntá ijnko xro jíé mé k'uíkjèxin ch'án tí ntója tí tóye. ⁴⁷ A ntá tí tjan María Magdalena la ko tí tjan María iné ch'in José mé k'uikon sín nketí xrává ch'án.

16

Ó xechón ch'in Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'in Jacobo la ko tí tjan Salomé mé k'uena sín xroqan xraxé sátsjiko sín sincheka sín tí cuerpo kuènté ch'in Jesús. ² Ntá imá nchítjen tí yaon xrankixixín tí semana mé kjuíji sín tí tóye tsíxrayá ch'án, na mé ó kjuítjon yaon. ³ A ntá jehe sín mé tinkákjo kichó sín kixin:

—Xá nkexro tí chrókuakjìinhinni tí xro tjejkèxin tí tóye? —ichro sín.

⁴ A ntá xrínahya k'uikon sín kixin ó tsikjixin tsikjìin tí xro jíé tjejkèxin tí tóye kixin í tjenhya éxi k'uekjak'e senó. ⁵ Ntá kjuíji sín ikon tí tóye ntá k'uikon sín kixin tjetjaxin ijnko ch'án ntasoá tí tja sín chjina tjenkaya ch'án ka kjinjin tjóá ntá imá chrakon sín k'uikon sín. ⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'in Jesús tsikjixin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntíhi. Tsehérá tí tsikjak'e sín ch'án. ⁷ Ntá sátxirá tjíchenkará tí sín k'uek'ajiko ch'án la ko tí ch'in Pedro kixin tí ch'in Jesús senó sátsji ch'án estado Galilea ntá ntaha tsoxetará ch'án éxi tsíchrónka ch'án —mé xikaha chrónka tí ntasoá a.

⁸ Ntá tí chojni chjin a mé sákjuixin sín tí tsíxrayá tí ch'in Jesús imá síxranka sín chrakon sín. Ntá naxa chenhahya sín ninkexró kixin chrakon sín.

Ch'in Jesús titàya xeta tí tjan María Magdalena

(Jn. 20.11-18)

⁹ Tió tsikjixin tsíxechón ch'in Jesús nchítjen tí yaon xrankixixín semana ntá titàya xeta ch'án saoxín tí tjan María Magdalena na mé jehe tjan tsikakitsjèxin ch'án yato nchakuen tí jínahya. ¹⁰ Ntá sákjuichenka tjan tí sín k'uek'ajiko tí jehe ch'án t'áva sín tsjánka sín. ¹¹ A ntá tió kuínhin sín kixin tjechón tí ch'in Jesús kixin xikaha tsík'ikon tjan la kjónté kuitekakonhya sín.

Iyo sín k'uek'ajiko ch'in Jesús titàya k'uikuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uikuèn sín tí ch'in Jesús, ókjé nkexrí tsjehe ch'án. Tí sín a mé tjejóti sín ntá sátsji sín ijnko nonte. ¹³ A ntá jehe sín sákjuichenka sín tí sín í so a; la kjónté xikaha la kuitekakonhya sín.*

Ch'in Jesús k'uetuenhen ch'án tí sín k'uek'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixín la titàya k'uikon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin:

—Sátxirá kuènté chjasintajni tjákoherá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín

* 16:13 Lucas 24.13-35

tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxín ts'ejotja tja sín chojni níhi la tsitqhe sín jína.

Ch'in Jesús ch'ín ch'án nkaya nkajní

(Lc. 24.50-53)

¹⁹ Ntá ó kjuixín nixjehe Inchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxín ch'án tí tja chjina Dios. ²⁰ A ntá jehe sín sákjuí sín nkuíxín sákjuíjako sín tí tan jína tsaáxin chojni. A ntá jehe Inchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoxín tí sín tjejótinhin kixin chaxín nkehe kuente Dios kjuako sín. Amén.

Tí tan jína chrónka ch'ín Lucas

Tíhi mé xránkixín tí xroon í

¹ Nchónhya chojni tjínkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uejóni. ² Éxi kjuáqoheni tí sín tsík'ikonxín kon sín tí xránkixín nkehe k'uátsínka ch'án la ntá k'uáyéhe sín tí xra sákjuichronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xránkixín. Ntá nóna jína ikjian kaín tíha éxi tsíkónhen ntá tsochr'anhan jaha Teófilo kixin imá tjuáha ⁴ kixin ntá jaha tsonoha jína tí nkehe chaxín tsíkjakoha sín.

Ijko ángel mé chrónka kixin tsokjìhi Juan Bautista

⁵ A ntá tí ch'ín rey Herodes k'uetóan ch'án tí estado Judea la ko ntiha kjuák'e ijnko nchát'á mé it'in Zacarías. Jehe ch'án mé kuènte tí sín tsík'axrjenixin tí ch'ín Abías. * A ntá ichjién ch'án mé it'in Elisabet. Jehe tjan mé tsík'axrjenixin tjan tí nchát'á Aarón. ⁶ Yói sín na mé jína sín kixin éxi tjínkaon Dios la mé kjuínchexiteyéhe sín kaín nkehe k'uetóan ch'án. Méxra ninkexró chrók'uekahya jé tí jehe sín. ⁷ A ntá jehe sín chónthya sín xjeen sín kixin ó jéhi tsík'ítoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchát'á kuènte Dios. ⁹ A ntá xikaha kuènenhén tí sín nchát'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte nínko tsjak'e ch'án chjincó chrítaón tí altar kuènte Dios. ¹⁰ Ntá kjuák'e ch'án ntiha kjuák'e ch'án tí chjincó la nachrohe kaín tí chojni k'uejó sín ntója nixjehe sín Dios. ¹¹ Ntá xringhya k'uikon ch'ín Zacarías ijnko ángel kuènte Dios tjexín toté ch'án nángo chjina tí altar tjak'exín sín chjincó. ¹² A ntá tió k'uikon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. ¹⁴ Jaha la tsocháhá má la ko itsjé chojni tsochéhe sín kixin tsokjìhi xjan ¹⁵ kixin imá tjetoan tsjak'e tí xjaan éxi tóxrjínhin Dios. Nínkehó xran vino la ko nínkehó í jnko xran ts'ihya ch'án. Tsochóntha ch'án kjuachaxin kuènte Nchakuen Dios kjónté naxá tokjéhya ch'án. ¹⁶ Jehe ch'án mé tsjakóhe ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntja tsixin Ìnchéni. Éxi k'uekjako ch'ín Elías ósé mé tsjako ch'án la ko tsochóntha ch'án kjuachaxin éxi k'uechóntha ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónona kixin chaxín chrókónhen tíhi? Janhan la ó tádana la ko tí chjín chonta la kjaxin ó nána tjan —ichro ch'án.

¹⁹ Ntá kjuátéhe tí ch'ín ángel ntáchro ch'án kixin:

—Janhan mé Gabriel la mé t'áha xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuitekákonhya tí nkehe xrxjanka a ntá tsonósian jaha xitjahya tsonixja jaha tsoxitjajia tí yaon tsokjìhi tí xjaan. Mé xikaha tsonixjéhe kaín tíha —ichro ch'án.

²¹ A ntá tí í so sín ntiha k'uejóchónhen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko. ²² Ntá tió k'uaxrjexín ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen nínko. Ntá itja ch'án ó tjakoxín ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xra nínko ntá sákjuí ch'án ntóe ch'án. ²⁴ A ntá chr'èxín ntá kjuák'eyá tí ichjién ch'án Elisabet. Ntá ntóe tjan ó kuítóhe tjan in'ó nitjó kjuenkayáxin tjan kixin: ²⁵ “Mé xikaha ijnko kjuaxroan kjuanjon Ìnchéni kixin chrók'uántaxiènhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijko ángel chrónka kixin tsokjìhi Jesús

²⁶ A ntá k'uátsínka injon nitjó ntá Dios k'uetuenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehe ch'án ijnko tjan tjarisoá naxá kuákjahya tjan chojni ntoa mé it'in tjan María. Jehe tjan mé tsíkjatéhe tjan kixin tsotéhe tjan

* 1:5 1 Crónicas 24.10

ijnko ch'ín mé it'ín José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uixenhen tí tjen tjan ntá ntáchro ch'án k'ixin:

—K'uinka nixjaha jaha k'ixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uikon tjan tí ch'ín ángel na mé kóxakonhen tjan kjuenkayáxin tjan k'ixin nkekuénte xíkaha nixjeheni ch'án, ichro tjan. ³⁰ A ntá ntáchro tí ch'ín ángel k'ixin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'èyá jaha, tsochonta ijnko xjan ntoa la ko sinchek'ian xjan Jesús. ³² Imá ts'etqan ch'án la ko its'in ch'án Xjeen Dios nkaya nkajni. Ìnchéni Dios mé tsjanjon ch'án kjuachaxin ts'etqan ch'án éxi ijnko rey éxi k'uetoan ch'ín David, tí nkexro ts'axrjeníxin ch'án. ³³ Jnkochr'ixin tsjak'e ch'án ts'etuenhen ch'án tí sín nació Israel, la mé tsjejehya tí kjuachaxin ts'etqan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel k'ixin:

—¿Nkekuénte k'ixin xíkaha chrókónhen k'ixin janhan la naxá chontahya chojni ntoa? —ichro tjan.

³⁵ Ntá kjuatèhe tí ch'ín ángel, ntáchro ch'án k'ixin:

—Tí Nchakuen Dios mé ts'inkajin éxi ijnko tjuj la ko tí kjuachaxin kuénte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchóntahya tjan xjan, a ntá jie la ó injon nitjó tjeýá tjan. ³⁷ K'ixin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María k'ixin:

—Janhan mé t'aha Ìnchéni Dios xra. Ó nchoxon tí nkehe k'uetoan ch'án sintaxiteyáha ch'án éxi chronka jaha —ichro tjan.

A ntá kjuixin ch'ónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jna estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntqe ch'ín Zacarías la ntá nixjehe tjan tí tjan Elisabet. ⁴¹ A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan k'ixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaan ch'án tí xjaan. ⁴³ ¿Xá nkexro tí janhan k'ixin kjuínixjana iné Ìnchéni? ⁴⁴ Tió kuínhan nixjana ntá tí xjan la chrika xjan nkaya tseña k'ixin chéhe xjan kjuíha. ⁴⁵ Ntá jaha la cháha k'ixin kuítekáván k'ixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María k'ixin:

Asenná imá tjikosáyehe Ìnchéni Dios

⁴⁷ la ko chéhe asenná k'ixin Dios sinchekaáni ch'án.

⁴⁸ K'ixin Dios ikuá kuentá ijnko tí chojni chjin nóe ch'exón xra kuénte ch'án.

A ntá ijie la ko jnkochr'ixin tsontáchro chojni k'ixin náxrjón tjèn janhan, tsixro sín.

⁴⁹ K'ixin Dios chónka kaín kjuachaxin ntá janhan mé kjuasixína ch'án ijnko kjuaxroan jie; imá tjóá tí ihnié ch'án.

⁵⁰ Jnkochr'ixin tsikonóhehe ch'án kaín tí sín tjikosáyehe sín ch'án.

⁵¹ Tsíkjasin ch'án itsje kjuaxroan jie;

kuakitsjehe ch'án tí kjuachaxin chónka tí sín nchehnke.

⁵² Kuakitsjehe ch'án tí kjuachaxin chónka tí sín t'etqan,

A ntá tí sín nóa k'uék'etuanhya senó la mé jie chjéhe ch'án kjuachaxin ts'etqan sín.

⁵³ A ntá tí sín t'enxin kjinta la kjuanjon ch'án kaín nkehe tsicháxinhin sín, a ntá tí sín rico xrxáin jehó tja sín sákjuí sín.

⁵⁴ Kjuínkítsa ch'án tí sín nació Israel k'ixin tjejóch'ehe sín ch'án xra;

k'uitjáyenyha ch'án tí jehe sín kuíkonóhehe ch'án sín,

⁵⁵ éxi k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naxá ts'axrjeníxin ch'án —mé xíkaha ichro tjan María.

⁵⁶ A ntá tjan María kuíteoko tjan tí tjan Elisabet iní nitjó la ntá chr'éxin xíkjan tjan ntqe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ A ntá tí sín chjinaxón ntqe la ko tí sín kjéhya tjan mé kjuíjitsjehe sín k'ixin tsóchéheko sín tjan k'ixin kuínhin sín k'ixin Dios imá tsíkikonóhehe tí jehe tjan. ⁵⁹ Ntá tí yaon

jnixin ikui sín sincheka sín xjan tí xroye kuènte tí sín judío. Ntá chrókjuinchek'in sín xjan Zacarías éxi it'in it'é. ⁶⁰ Kjánchó ntáchro iné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkeuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan. ⁶³ A ntá tí it'é xjan mé kjuanchia ch'án ijnko ntachiso ntsi tsokjin ch'án ntá kjin ch'án kixin: “Ihnjé xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ A ntá xrinahya ch'in Zacarías kjuankixin ch'án nixja ch'án inaá kjuanchehe ch'án Dios kjuasáya. ⁶⁵ A ntá kaín tí sín chjinxón ntøe sín mé chrakon sín. La ntá nkuixín tí jna kuènte estado Judea mé kjo sín kichó sín chrónka sín kixin xikaha tsikónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkijonhen tí xjan i? —ichro sín.

Kixin chaxín Ìnchéni Dios tsíkjincheyaoon ch'án tí xjan.

Tí ch'in Zacarías itsje ch'án

⁶⁷ A ntá it'é tí xjan mé ch'in Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jina Ìnchéni, na mé tí Dios kuènte tí nación Israel, kixin ikui ch'án tí tjejóni kjuinchekaá ch'án nación kuènténi.

⁶⁹ La ko kjuanjon ch'án ijnko nkexro t'etøan sinchekaáni ch'án na mé ijnko nkexro k'uaxrjenixin tí ch'in David, tí nkexro k'uékjich'ehe Dios xra.

⁷⁰ Éxi k'uéchronkaxín tí sín kjuéyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakohenni,

⁷² tsikónøehé ch'án tí sín k'uaxrjenixinni ósé, ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'in Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'ehe ni tí sín nínkakohenni kixin jina sich'ehe ni ch'án xra tsochrakonhyani,

⁷⁵ la ntá jina ts'ejóni sinchetjóáni ch'án kaín yaon tí naxa tjejóchónni.

⁷⁶ A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkajni.

Jaha tsítønxian ntja tsixin Ìnchéni la ko jaha tsjásiyóxian ntja tsixin ch'án.

⁷⁷ Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjehe ni ch'án la ko kuikonøeheni ch'án, kixin nkajni kuixin ijnko xrohi nixin ts'inkaséyanxín tí yaon nixin.

⁷⁹ Tíha mé tsíkao tí xrohi ts'inkaséyanxín tí sín tjejó sítie la ko tí sín chrók'uitjayan, la ko ts'ikonxinni tí ntja tsjanjon kjuaxróxin.

Na mé kaín tíhi chrónka tí ch'in Zacarías.

⁸⁰ A ntá tinkák'ánkí tí xjan a la ko Dios kjuinchek'ánkí tí kjuaxrexinkaon kuènte xjan kixin antsí tsonøe xjan nkexrí tjen Dios. A ntá kjuák'e xjan nteje k'uánkí xjan kjuixrakája tí yaon kjuankixin kjuakøhe ch'án tí chojni nación Israel.

2

*Kokjühi ch'in Jesús
(Mt.1.18-25)*

¹ A ntá tí yaon a na mé tí ch'in imá t'etøan mé it'in Augusto César na mé k'uetøan ch'án kixin ts'inixin ihnjé kaín xin chojni sín tí chjasin t'etøan ch'án kixin tsonøe ch'án nkekjaín chojni sín. ² Tí xrankixixín k'uínixín ihnjé sín tíó Cirenio mé k'uégovernador k'uetøan estado Siria. ³ Kaínxin chojni t'ichjánxin sátsji sín chjasén sín kixin ntaha ts'inixin ihnjé sín. ⁴ Mé xikaha ch'in José kjaxin k'uaxrxéxin ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsikokjéxin tí ch'in rey David kixin jehe ch'in José mé tsík'axrjenixin ch'án tí ch'in David. ⁵ Sákjuí ch'án chjasin Belén sákjuíko ch'án tí tjan María kixin ntiha ts'inixínko ihnjé ch'án tjan kixin jehe tjan tsíkatehe kixin tsotehe ch'án. A ntá jehe tjan na mé ó tjejá tjan. ⁶ A ntá xikaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. ⁷ A ntá ntiha kokjéxin tí xjeen tjan sao. Ntá kjuinchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'éxin sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titöhe sín tí tie a kixin t'ayakonhen sín kolélo. ⁹ A ntá titàya k'uikuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jíé kuènte Dios kuíkəo ch'án. Ntá jehe sín la imá chrakon sín. ¹⁰ A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsöchéhe kaín xín chojni ¹¹ kixin ijie tí chjasén ch'ín David kokjéxín tí nkexro tsaáxinrá jahará na mé Ìnchéni Cristo tíha. ¹² Ntá tsoñoaxínrá jahará kixin tí xjan a kixin ika tjechr'isímá xjan la ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uikuèn sín kixin nchónhya sín ángel kujxin nkaya nkajni tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajni kixin imá chónka

ch'án kjuachaxin. Ntá chjasintajni ts'ixin
kjuaxróxin tí tjejó tí sín sinchexiteyéhe ch'án.
Mé xíkaha ichro sín.

¹⁵ A ntá tí sín ángel xíkjan sín nkaya nkajni, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsikónhen kixin Ìnchéni k'uetqan kui tí nkexro kjuínchenoheni —ichro sín.

¹⁶ Ntá tjan sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uikon sín xíkaha ntá chrónka sín tí nkehe tsichrónka tí ángel kixin nkexrí tjen tí xjan a. ¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsikinhin sín la ko k'uikon sín kixin ó xiteyá kaín nkehe éxi tsichrónka tí ángel.

Sákjuíko sín tí xjan Jesús tí nínko Jerusalén

²¹ A ntá tió xéjta tí ijni yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxi tsintáchro tí ch'ín ángel chénka tí tjan María tí naxə kjuák'eyáhya tjan.

²² A ntá tió kuitöhe tjan María jína éxi chrónka ley kuènte Moisés* ntá sákjuíko sín tí xjan tí chjasin Jerusalén kixin tsochjéhe sín Dios kjuasáya. ²³ Éxi ntáchro tí xroon ley kuènté Ìnchéni Dios kixin: “A ntá kaín xjan ntoa tsokjilhi saoxín la mé tsochjéhe sín Dios tí xjan a sich'ehe xjan xra Dios.”† ²⁴ Ntá xíkaha sákjuí sín kixin ntaha tsjanjon sín iko ts'enxín ntaha tsochjéxín sín Dios kjuasáyé éxi t'etqan tí ley kuènte ch'án na mé yaá kontóá najni o yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkakon ch'án Dios la ko kjuák'echónhen ch'án kixin itsi tí nkexro tsaáxin tí naciön Israel. Tí Nchakuen Dios tjeko tí ch'ín Simeón ²⁶ tsíkjinchenohe ch'án kixin naxə ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. ²⁷ A ntá tí Nchakuen Dios kjuínchexraxinkakon tí ch'ín a kixin sátsji ch'án nínko. A ntá tió kui tí iné la ko it'é xjan Jesús k'uixenkon sín xjan nkaxenhen nínko kixin sinchexiteyéhe sín tí nkehe t'etqan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Ìnchéni Dios, tsánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsintáchrua

³⁰ kixin ó k'uikoxin kuan tí nkexro tsaáxinni,

³¹ mé xíkaha kjuich'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasín kuèntá Israel, mé ichro ch'ín Simeón.

³³ Ntá ch'ín José la ko tí iné ch'ín Jesús la chrakon sín kixin xíkaha kuínhin sín ntáchro ch'ín Simeón kixin nkexrí tjen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsíkikəo itsjé xra la itsjé tí sín Israel tsitekakuenhya sín xjan la tsítöhe sín la ko itsjé sín tsitekaon sín antsí tsoñohe sín la ko nchónhya chojni tsotjinkakonhya tsinhin sín tí nkehe tsjako ch'án. ³⁵ Mé xíkaha tsoñoaxín nkexrí tjenkayáxin jnkójnko asén chojni. Kjánchó kaín tíha tsoyóhe éxi ijnko chica espada chróchr'áte asán na mé tsoxakonhan la ko ts'avá má —ichro ch'án nixjéhe ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsik'axrjenixín ch'án tí ch'ín Aser. Jehe tjan la ó nána tjan. Tí naxə k'uétjarisoá tjan la

* 2:22 Levítico 12.1-8 † 2:23 Éxodo 13.2,12

kótehe tjan. Ntá yatokoá nánó kjuák'eko tí xii tjan ³⁷ ntá jie ochenta y cuatro nánó tsikók'án tjan. Kuítogehya tjan tí xra kuènte njnko la mé ntahó tjan tjan ch'ehe tjan Inchéni Dios xra nchakotjin la ko tie la jnkoyaxón nehya tjan kixin jina tsonixjehé tjan Dios. ³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjan tí xjan Jesús nixjehé tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etjoan tí ley kuènte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkítsa tjencheyaon xjan.

Tí xjan Jesús kjuák'e xjan tí njnko Jerusalén

⁴¹ Tí it'é la ko iné tí xjan Jesús xráxín k'uékjii sín kaín nánó tí chjasin Jerusalén kixin tí kia pasca. ⁴² A ntá tió xetjehé ch'in Jesús tí teyó nánó, ntá sákjui sín kaín sín tí chjasin Jerusalén kixin xikaha kuènnen sín kixin tí kia a. ⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsikotjehé xjan Jerusalén ntahó, kjánchó iné xjan la ko ch'in José xraxinkakonhya sín kixin kohya tí xjan. ⁴⁴ Jehé sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntja tsíkji sín. A ntá kjuéyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka ini yaon na ntá k'uitja sín xjan la mé nkaxenhen njnko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehé sín. ⁴⁷ Ntá kaín tí sín tjejótaxín tjejótinhin sín mé chrakon sín kixin xikaha imá nohe xjan la ko xikaha tjetjehé xjan kaín nkehe tjanchankíhi sín xjan. ⁴⁸ Ntá tió k'uíkon iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xikaha kjuích'e? It'á la ko janhan imá kóxakönhenni kjuéyáni tí jaha —ichro tjan.

⁴⁹ Ntá ntáchro ch'in Jesús kixin:

—¿Nkekuènte tjejá tí jeheni? ¿Á noahya jaha kixin tóxakönhenni kixin tí xra kuènte It'eni? —ichro ch'án.

⁵⁰ Kjánchó kíenxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakohen xjan tí jehé sín. A ntá tí iné la ntá asén tjan xráxín ó nohe kixin xikaha kónhen. ⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kixin jina tjan xjan.

3

Ch'in Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etjoan ch'in Tiberio tí xra gobierno, la ko tí ch'in Poncio Pilato k'uégovernador tí estado Judea, la ko tí ch'in Herodes k'uégovernador tí estado Galilea, la ko tí kichó ch'án Felipe mé k'uégovernador estado Iturea la ko estado Traconite, la ko ch'in Lisania k'uégovernador tí estado Abilinia. ² A ntá ch'in Anás la ko ch'in Caifás k'uéchóna sín xra nchat'á t'etjoan. A ntá Dios mé kjuanjon kjuachaxin k'uáyéhe ch'in Juan itjen ch'án nteje tsochrónka ch'án itén Dios. Ntá jehé ch'án it'é ch'án Zacarías. ³ Ch'in Juan k'uátsínka ch'án kaín tí chjasin chjino tí ntarío Jordán kjuakohé ch'án chojni ntiha kixin chrókjuinkí sín tí nkehe tjenkayáxin sín chrókuiteho sín tí ijje sín ntá chrókuiteho sín kixin xikaha mé chrókjuin ijje sín. ⁴ Mé xikaha kónhen éxi k'uéchronka la ko tsikjin ch'in Isaías, mé tí nkexro k'uéchronka itén Dios ósé kixin:

Tsinhin sín itén ijnko nkexro tsjak'e nteje ts'eya tsontáchro kixin:

“Tóxakonhanrá ncheyóxinrá ntja tsixin Inchéni Takítjehérá ijnko ntja ntoí.

⁵ Kaínxín tsaka mé tsoyóxin,
la ko kaín xín jnā la ko kaín xín itjo tsitoghe yóxin,
la ko tí ntja tsíxréya mé tsoxrentoá,
la ko kaín tí ntja yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

⁷ A ntá tió kjuíji chojni ntiha kixin ch'in Juan chrókuijite ch'án sín ntá ntáche ch'án tí jehé sín kixin:

* 3:6 3.4-6 Isaías 40.3-5

—Jahará tsík'axrjeníxinrá konche. ¿Xá nkexro kjuíntanohará kíxin chrókuinkeherá tí kjuanínkaon kuénte Dios ó tsí? ⁸ T'ichjánxin kíxin chrók'uejorá jnkojína chrókuákoxinrá kíxin chaxín kjuítoxinhínrá tí nkehe tjenkayáxinrá. Jahará nchehnkerá ntáchrórá kíxin k'uaxrjeníxinrá ch'ín Abraham. Janhan ntáxrjan kíxin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kíxin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kíxin tsoche —ichro ch'án.

¹⁰ A ntá tí chojni mé kjuanchankíhi sín ch'án kíxin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kíxin:

—Tí nkexro chóna yaá camisa la chrókjuinchekitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkí kíxin chrókuikite sín. Ntá kjuanchankíhi sín tí ch'ín Juan kíxin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kíxin:

—Jehó éxi tí tsík'ítuanhanrá chrókjuinchekjènkírá —ichro ch'án.

¹⁴ Kjaxin iso sín soldado kjuanchankíhi sín ch'án kíxin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kíxin:

—Teéhyará ninkexró tí chjéchaqoen sín la ko ninkexró sjch'énehýará kjuach'ia la ko kjónté tí chjchaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uejóchónhen sín tóxakonhen asén sín tjínkaon sín tsoñohe sín kíxin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kíxin:

—Janhan mé intá tikjéxián chojni. A ntá tí nkexro itsi chr'éxin mé tsík'itexínrá tí Nchajon Dios la ko xrohi. Antsí t'etoan ch'án a ntá janhan la kánhyó. Méxra chrókósuána chrókjuasintánkaha ch'án tí Correa tí tokaté ch'án. ¹⁷ Jehé ch'án la ó tjejraá ch'án pala sinchetjuáxin ch'án noatrigó kíxin tí ntáchjji trigo la ókjé tsjejo ch'án a ntá tí noatrigó la tsjenájín ch'án la ts'enkajjina ch'án. A ntá tí ntáchjji trigo la tsjakaxin ch'án ijnko xrohi ts'ankahya jnkochrín —mé xíkaha ichro ch'ín Juan.

¹⁸ Mé xíkaha chronkaxin ch'án la ko itsjé í so nkehe kjuínchexraxinkaon ch'án chojni mé xíkaha kjuákoexín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kíxin chóna ch'án tí tjan Herodias, mé tí ichjién kichó ch'án Felipe, la ko kjuentuéhe ch'án tí ch'ín Herodes kíxin tí í so nkehe jínahya tsík'ich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la kjuínche'ánkí ch'án tí ijé ch'án inaá kíxin kjuákechjina ch'án tí ch'ín Juan tí ntóechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxa kuénhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjéhe ch'án Dios ntá xitjéhe nkajní ²² ntá k'uínkajin Nchajon Dios éxi ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kíxin:

—Jaha mé xjanna la tjuaha tí jaha. Imá chàna kíxin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

²³ Ch'ín Jesús k'uechóna ch'án chjino treinta nánó tíó kjuankíxin kjuako ch'án. Ntá kjuenkayáxin sín kíxin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé

ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxiën Nchakuen Dios ntá kjanxin ch'án tí ntárió Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xringhya ik'uén ch'án kjinta. ³ Ntá ntáchro tí ch'ín Tsochren kixin: —Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí naciön sün chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí naciön a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuèntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja njnko, a ntá ntáchro ch'án kixin:

—Tí chaxín Xjeen Dios jaha la tjtóhé t'anótjenxian tí noi ntihi ¹⁰ kixin ntáchro xroon itén Dios kixin:

Dios mé ts'etuenhen tí sún ángel kuènte ch'án kixin ts'ayakonhan sún.[‡]

¹¹ Tsotsé sún itjá

kixin tsotéhya tótá ts'itja xro tí ts'anótjen§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uejtuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankxin ch'án tí xra kuènte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xikjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sún nkuíxin ntiha kixin nkexro tí jehe ch'án. ¹⁵ Kjuakoxin ch'án

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12 * 4:12

tí n̄nkoḗ sín kaín chjasin la ko kaín xín chojni kjuanchia sín kjuasáya ḱixin kóxrjín̄h̄n̄ sín tí kjuako ch'án.

*Ch'ín Jesús kjuák'e ch'án chjasin Nazaret
(Mt. 13.53-58; Mr. 6.1-6)*

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánk'ín ch'án. Ntá tí yaon t'ok'éhe sín mé k'uixenhen ch'án ijnko n̄nko Israel ḱixin xikaha kuènnen ch'án. Ntá kjuák'exín toté ch'án ḱixin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuènte tí profeta Isaías. Ntá kuakitjéhe ch'án tí xroon ntá k'uitja ch'án nketí nixja xikihí:

¹⁸ Tí Nchakuen It'eni Dios tjetjinkitsana má,

ḱixin kjuéyána ch'án ḱixin tsóxrjanka tí tan jína kuènte Dios tsjakohá tí sín nòa.

K'uetuanna ch'án ḱixin sintaktiḡhá jína tí sín t'ává asén ḱixin chóntahya sín nkerí tsaáxin sín, la ko tsjakohá tí sín tjejóchjina ḱixin nkexrí tsaá sín, la ko sintak'ikuan tí sín t'ikonhya,

la ko sintakaá kaín tí sín tjejótasóte kohya nkehe tsaáxin sín,

¹⁹ la ko tsóxrjanka ḱixin ó kjuixraká tí yaon ḱixin tí nkexro tsitekaon la tsaá sín.[†]

²⁰ A ntá ch'ín Jesús kjuixín kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xrá n̄nko ntá kjuák'etjaxín ch'án. Ntá kaín tí sín tsíkójkotsé ntíha n̄nko naḡá tjejókomá sín tí jehe ch'án. ²¹ Ntá kjuanḱixin chronkaxín ch'án ntáchro ch'án ḱixin:

—Ntá ijie la ó xiteyá tí nkehe kjuíntakuáxin tí xroon itén Dios kuínhínrá —ichro ch'án.

²² Ntá kaín sín kóxrjín̄h̄n̄ sín tí kjuako ch'ín Jesús la ko chrakon sín ḱixin náxrjón tí nkehe nixja ch'án. Ntá kjuanchankíhi sín kíchó sín ntáchro sín ḱixin:

—¿A jehya xjeen ch'ín José tíhi? —ichro sín.

²³ Ntá kjuátehe ch'ín Jesús ntáchro ch'án ḱixin:

—Kjá tsontáchorá ḱixin janhan ijnko chojni ch'e xroan chrókjuíntaktiḡhá jína asenná senó, la ko tsontáchorá ḱixin tí nkehe kuínhínrá kjuít'a tí chjasin Capernaum xikaha chrókjuít'a ntíhi chjasenná, tsixrorá —ichro ch'án.

²⁴ Naḡá tjenixja ch'án ntáchro ch'án ḱixin:

—Ijnko nkehe chaxín tsotjonkará ḱixin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a. ²⁵ Chaxín ntáxrjan ḱixin k'uéjó itsjé chojni chjin tsíkók'án tí nación Israel tíó kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'ḡ la ko imá kókjinta nkuixín chjasin ntíha. ²⁶ Kjánchó Dios la k'uetuenhya ch'ín Elías sáchrókjuitsjehe ch'án nijnko chojni chjin tsíkók'án tí nación Israel. Náhi. Dios k'uetuènnen ch'án ḱixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.[‡] ²⁷ Kjaxín nación Israel k'uéjó nchónhya chojni chóna chinlepra tíó kjuák'e ch'ín Eliseo chrónka ch'án itén Dios, kjánchó nijnko sín kuitḡehya sín jína la mé jehó ch'ín Naamán kjuixín ch'án nación Siria mé kuitḡe ch'án jína[§] —mé xikaha ichro ch'án.

²⁸ A ntá tíó kuínhin sín xikaha ntáchro ch'ín Jesús la ntá kaín tí chojni k'uéjóxenhen n̄nko la mé imá kónínkaon sín. ²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuínchek'anótjén̄xin sín ch'án tí tjo a.

³⁰ A ntá ch'ín Jesús k'uaátsínka jnkosiné tí síin tí jehe sín la sákjuí ch'án.

*Ijnko chojni chóna ijnko nchakuen tí jínahya
(Mr. 1.21-28)*

³¹ A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuanḱixin ch'án kjuakoḡe ch'án chojni tí yaon t'ok'éhe sín. ³² Chrakon sín ḱixin nkexrí kjuako ch'án ḱixin kjuakoxín ch'án ḱixin chóna ch'án kjuachaxín.

³³ A ntá nkaxenhen n̄nko kjuák'e ijnko ch'ín chóna ijnko nchakuen tí jínahya k'óyakoxín itén tí ch'ín a, ntáchro ḱixin:

³⁴ —Tjḡhéní; ¿nkekuènte tjatjé tí jeheni kaín ni, jaha Jesús kjuixían chjasin Nazaret? ¿Á k'uinka ḱixin sinchek'itjáyanni? Ó tjátsḡan tí jaha la ko nòna ḱixin jaha mé tí nkexro tjóá kuènte Dios —ichro tí nchakuen tí jínahya.

³⁵ Ntá ch'ín Jesús jjehe k'uetuènnen tí nchakuen tí jínahya ntáchro ch'án ḱixin:

—Táná. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí síin sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kíchó sín ḱixin:

—¿Xá nkexrí ḱixin xikaha nixja tí ch'ín i? Jehe ch'án chóna kjuachaxín ḱixin k'uetuènnen ch'án tí nchakuen tí jínahya k'uaxrjéxín tí nkexro i —ichro sín.

³⁷ A ntá nkuixín ntíha ikjo sín kíchó sín ḱixin nkerí kjuaxroan kjuích'e ch'ín Jesús.

[†] 4:19 4.18-19 Isaías 61.1-2 [‡] 4:26 4.25,26 1 Reyes 17.9;18.1 [§] 4:27 2 Reyes 5.1-14

Ch'in Jesús kjuínchekitohe jína tí tjan ich'ee ch'in Simón Pedro

(Mt. 8.14-15; Mr. 1.29-31)

³⁸ Ntá ch'in Jesús k'uaxrjexin ch'án tí njnko la ntá k'uixenhen ch'án ntöe ch'in Simón. A ntá tí tjan ich'ee ch'in Simón mé nihi tjan chóna tjan ijnko sóa jíé ntá chronóehe sín ch'án kixin chrókuinchekitöhe ch'án tjan jína. ³⁹ Ntá k'uísén ch'in Jesús tí tjan tjan ntá k'uetuēnhen ch'án tí sóa a ntá kjuin. Ntá tuénxín k'uàya tjan la ntá kjuanjon tjan nkehe sine sín.

Ch'in Jesús kjuínchekitohe ch'án jína itsjé chojni nihi

(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóna sín sinníhi chóna sín nchónhya clase chin mé kuikao sín tí tjan ch'in Jesús. Ntá kjuak'etja tja ch'án jnkojnko tí jehe sín a ntá xikaha kuitöhe sín jína. ⁴¹ La ko nchónhya chojni nihi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánhó ch'in Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'in Jesús kjuako ch'án tí estado Galilea

(Mr. 1.35-39)

⁴² A ntá tí kóyaon k'uínkaséyan ntá ch'in Jesús k'uaxrjenta ch'án chjasin sákjuj ch'án nteje. A ntá kaín tí chojni kjuikjeyá sín ch'án la k'uitja sín tí tjan ch'án. Tjinkaon sín chrókuinchehrjenhen sín ch'án kixin sáchrókjuihya ch'án ókjé. ⁴³ Kjánhó kjuátehe ch'in Jesús ntáchro ch'án kixin:

—T'ichjánxín kixin sátsjia kaín chjasin ókjé tsöxrjanka tí tan jína kuente Dios kixin nkexri tí kjuachaxin t'etöan Dios, kixin xrá ó mé k'uinka —ichro ch'án.

⁴⁴ A ntá xikaha k'uájkjako ch'in Jesús kaín tí njnko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

¹ Ntá ijnko yaon kjuák'e ch'in Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhen sín itén Dios. ² Ntá k'uíkon ch'in Jesús kixin tjejó iyó ntabárcö jehó chjino chrínta ntayaon. A ntá tí sín itsé koche mé tsik'axrjexin sín ntiha la k'uéjé sín tjentoá sín la ko tjejótjonehá sín tí nchísén tséya sín koche.

³ Ntá ch'in Jesús k'ujt'ötjen ch'án ijnko tí ntabárcö ntiha na mé ntabárcö kuente ch'in Simón na ntá chronóehe ch'án tí ch'in Simón kixin sátsjiko ch'án ntabárcö ijnko chrínta ntá kjínhya. Ntá ntahó kjuák'enkáya ch'in Jesús tí nta kjuák'etjaxin ch'án kjuaköhe ch'án nchónhya chojni síin chrínta ntá. ⁴ A ntá tíó kjuixin nixja ch'án ntá ntáche ch'án tí ch'in Simón kixin:

—Tjikoá ntabárcö tí tjiá ntá njnka ntá iterá tí nchísén tseyará koche —ichro ch'án.

⁵ Ntá kjuátehe ch'in Simón ntáchro ch'án kixin:

—Maestro, kjuich'eni xrá kuenté tie la tséhyani ninkehó koche. Kjánhó tí jaha xikaha kuétuēnhéni la mé tsochr'ánni tí nchísén inaá —ichro ch'án.

⁶ Na ntá xikaha kjuich'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje. ⁷ Ntá k'uéyaxín sín tja sín kixin chróxrakoa tí sín ch'eko sín xrá tjejóxenhen tí í jnko ntabárcö kixin tsjinkitsa sín. Ntá xráko sín ntabárcö kuente sín ntá kjuínchekaón sín yóí tí ntabárcö ntá chrókuachahya tí ntabárcö na tjinkaon chrók'uániánki ntá. ⁸ Ntá xikaha k'uíkon ch'in Simón Pedro ntá kjuák'exín toch'in ch'án nkayakon ch'in Jesús ntá ntáchro ch'án kixin:

—Tjöhéni Inchéni kixin jeheni ijnko chojni chóna jie —ichro ch'án.

⁹ Mé xikaha ichro ch'in Simón kixin chrakon ch'án la ko kjaxin chrakon tí í so sín tjejóko ch'án kixin xikaha kónhen xrenájin nchónhya koche. ¹⁰ La ko ch'in Jacobo la ko ch'in Juan, xjeen ch'in Zebedeo, na mé jnkokoá ch'eko sín xrá ch'in Simón, la kjaxin chrakon sín. Kjánhó ntáche ch'in Jesús tí ch'in Simón kixin:

—Chrakonhya. Senó la koche k'uétsje la nta jie la náhi la mé chojni tsjéyá —ichro ch'án.

¹¹ Ntá tíó kjujiko sín tí ntabárcö tí chrínta ntá la kuitöhe sín kaín nkehe kuente sín ntá chréhe sín sákjujko sín tí ch'in Jesús.

Ch'in Jesús kjuínchekitohe ch'án jína ijnko chojni chóna chinlepra

(Mt. 8.1-4; Mr. 1.40-45)

¹² Kjuák'e ch'in Jesús ijnko tí chjasin, ntá kui ijnko chojni nihi chóna chinlepra. A ntá tíó k'uíkon ch'án tí ch'in Jesús ntá kjuák'exín toch'in ch'án chronóehe ch'án jnkójina ntáchro ch'án kixin:

— Ìnchéni, tí tjínkáván jaha la jína chrókjuínchekitoḥéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chritaón tí sǐnníhi ntáchro ch'án kixin:

— Méxra xikaha tjínkáván. Ntá jie sintakitoḥa jína —ichro ch'án.

Ntá xikaha ichro ch'án ntá tí chinlepra tuénxín kjuíinhin tí sǐnníhi. ¹⁴ A ntá k'uetuenhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

— Sátjia tǐtsjehé tí nchá'tá la tsǎnjúan tí nkehe tsík'etḡan ch'ín Moisés ts'áyéḡe Dios* kixin ntá tsonoexín kaín xín chojni kixin ó kuítóḥa jína —ichro ch'án.

¹⁵ Kǐjánchó antsi k'uixikónohe sǐn nkexrí tí kjuaxroan kjuasin ch'ín Jesús, ntá nchónhya chojni k'uixikóchjinehe sǐn ch'án kixin tsinhin sǐn nkehe tsjako ch'án, la ko tsitoexín sǐn jína tí chin chónṭa sǐn. ¹⁶ Kǐjánchó ch'ín Jesús la k'uaxrjenta ch'án tí kohya chojni la ntaha nixjexín ch'án Dios.

Ch'ín Jesús kjuínchekitoḥe ch'án jína ijnko ch'ín tsík'en tote
(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxín iso sǐn fariseo la ko iso tí sǐn tjako tí ley, tsikjixín sǐn kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxín ch'án kixin sinchekitoḥe ch'án chojni jína. ¹⁸ Ntá kui iso chojni tinkátsénki sǐn ijnko ch'ín tsík'en tote tjenkáya ijnko kania. Ntá tǐnkaon sǐn chrók'uixenko sǐn ch'án tí nchia kixin chrókjuak'e ch'án tí tǐen ch'ín Jesús tjetjako ch'án. ¹⁹ Kǐjánchó xitjahya ts'ixenhen sǐn kixin nchónhya chojni sixenhen nchia. Ntá k'ujt'ótjen sǐn tí chritaón nchia, ntá kjuakjǐin sǐn iso teja la ko tí nta sít'ó ntá ntiha kjuinkajinxín sǐn tí ch'ín níhi tjenkáya kania ntoí tí tǐen ch'ín Jesús. ²⁰ Na ntá tió k'uikon ch'ín Jesús kixin imá tinkáchónki sǐn ch'án ntá nixjehé ch'án tí ch'ín níhi, ntáchro ch'án kixin:

— Jaha, ó kjuixin kjuíinhan tí jie chonta —ichro ch'án.

²¹ A ntá tí sǐn maestro tjako tí ley la ko tí sǐn fariseo kjuankixin sǐn kjo sǐn asén sǐn kixin: “¿xá nkexro tíhi ch'ia ch'án ncheyóḡe ch'án asén ch'án Dios? Ninkexró xitjahya tsjakjǐin ijie kixin jehó Dios mé chónṭa kjuachaxin tsjatsen ijie chojni”, mé xikaha kjuenkayáxin sǐn.

²² Ntá ch'ín Jesús la ó nohe ch'án tí nkehe tjenkayáxin sǐn ntá ntáchro ch'án kixin:

— ¿Nkeuènte kixin xikaha tjenkayáxinrá? ²³ ¿Nkehe antsi xrahya chróntátjan ch'án? ¿Á antsi xrahya chróntátjan ch'án kixin ó kjuixin kjuíinhin ch'án tí ijie yámá ch'án, ó á antsi xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjakoxian kixin tí Xjgen Dios K'óna Chojni mé chónṭa kjuachaxin ntihi chjasintajni tsjakjǐinhin ijie chojni —ichro ch'án.

Ntá k'uetuenhen ch'án tí ch'ín tsík'en tote ntáchro ch'án kixin:

— Jaha tétuñhan t'ínkatjen tjatsíyan kaniya la sájtia ntḡa —ichro ch'án.

²⁵ Ntá tuénxín k'uínkatjen tí ch'ín tsík'en tote nkayakon kaín tí sǐn siín a la kuákja ch'án kaníe ch'án k'uékjak'etak'á ch'án ntá sákjuí ch'án ntḡe ch'án la kjuanchehe ch'án Dios kjuasáya. ²⁶ Ntá kaín sǐn imá chrakon sǐn la kjuanchehe sǐn Dios kjuasáya kǐjonté chrakon sǐn la ntáchro sǐn kixin:

— Ijie mé k'uíkonni antsi má kjuaxroan jie —ichro sǐn.

Ch'ín Jesús k'uíyehé ch'án tí ch'ín Leví
(Mt. 9.9-13; Mr. 2.13-17)

²⁷ Ntá chr'éxin ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'ín ch'án Leví tjetjaxín ch'án tjech'e ch'án xrǎ nkaxenhen tí nchia ntsí tí xenkaxín chichaon a. Ntá ntáchro ch'án kixin:

— Chr'éhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuítóḥe ch'án kaín xín nkehe ntá chr'éḡe ch'án tí ch'ín Jesús.

²⁹ Ntá chr'éxin ch'ín Leví chónṭa ch'án ijnko kia jie ntḡe ch'án kjuikosáyehe ch'án tí ch'ín Jesús. Kǐjaxin k'uéjótjé tí sǐn nchekjènkí la ko itsjé í so chojni chónṭa jie k'uéjótjaxínko sǐn tí ch'ín Jesús chjino tí mesa a. ³⁰ A ntá tí sǐn fariseo la ko tí sǐn maestro tjako tí ley la mé kjuankixin sǐn tjonta sǐn tí sǐn k'uájiko ch'ín Jesús ntáchro sǐn kixin:

— ¿Nkeuènte ntekoará la ko t'ikoará tí sǐn nchekjènkí la ko tí sǐn chónṭa jie? —ichro sǐn.

³¹ A ntá kjuátḡe ch'ín Jesús ntáchro ch'án kixin:

— Tí chojni níehya t'ichjánxienhya sǐn nkexro sich'e xroan. Náhi. Jehó tí sǐn níhi mé t'ichjánxǐn sǐn nkexro sich'ehe sǐn xroan. ³² Janhan la k'uínkahya ntihi kixin chrók'uíyaha tí sǐn jína tjejó. Náhi. Janhan k'uinka kixin ts'iyaha tí sǐn chónṭa jie kixin chrókuítóḥe sǐn tí ijie sǐn ntá chrókjuínki sǐn tí tjenkayáxin sǐn —ichro ch'án.

* 5:14 Levítico 14.4-8

Tjančankíhi sín tí ch'ín Jesús ḱixin á chrókjóneha sín tió tsonixjehé sín Dios
(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús ḱixin:

—¿Nkeuènte ḱixin tí sín k'uék'ajiko ch'ín Juan jnkoyaxón nehya sín na nixjehé sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuáttehe ch'ín Jesús ḱixin:

—¿Xá chrókuachará chrókuétuenhenrá kaín tí sín tsík'íyehé sín tsíkóchjina tí tjejó tí sín tsíkótehe ḱixin chrókjóneha sín tí naḡa tjejóko sín tí ch'ín tsíkótehe? ³⁵ Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án ḱixin:

—Ninkexró chrókuaté ijnko camisa ńixin ntá chrókuak'eniehe ijnko camisa ntaxin ḱixin xikaha chrókuich'e sín ntá chrókuítjáyán tí camisa ńixin la ko kjaxin tí t'ò ka k'uaxrjéxín tí camisa ńixin tsyóéheya tí camisa ntaxin. ³⁷ Kjaxin chrókuikjahyará xranvino ńixin ijnko tjuaxran ntaxin ḱixin tí xikaha chrókuich'erá la chrókuichje tí tjuaxran ntaxin ntá chrókuítjáyán tí xran la ko chrókuítjáyán tí tjuaxran. ³⁸ A ntá tí xranvino ńixin chrókuikia ijnko tjuaxran ńixin ḱixin yóí la chrókuítjáyánhya. ³⁹ La ko kjaxin ninkexró tió tsík'i tí xran ntaxin naḡa chrókuóxrjinhín chrókuí xran ńixin. Náhí. Tsontáchro ch'án ḱixin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigó ijnko yaon t'ok'éhe tí sín israelita
(Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigó. Na ntá tí sín k'uájiko ch'án mé ik'uín sín iso noatrigó la kjuanḱixin sín nkaya tja sín ó k'ontajiná sín tí noa ntá ḱjone sín. ² Ntá iso tí sín fariseo kjuanchankí sín ḱixin:

—¿Nkeuènte ḱixin tjejoch'erá xḡa jie? La mé kohya kjuachaxin tsonhen xḡa tí yaon t'ok'éheni —ichro sín.

³ Ntá kjuátehe ch'ín Jesús ḱixin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uixenhen ch'án ntqé Dios la ḱjone ch'án tí niotja tsikóyaon, la ko kjaxin chjéhe ch'án tí niotja tí sín k'uájiko ch'án ḱjonté jehó siín kjuachaxin sine tí sín ncha't'á* —ichro ch'ín Jesús.

⁵ Kjaxin ntáchro ch'án ḱixin:

—A ntá tí Xjeen Dios K'óna Chojni mé chóna kjuachaxin ts'eḡan nkexrí tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsíxámá tja
(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'ín Jesús ijnko ńinko Israel la ntá kjuanḱixin kjuako ch'án. A ntá ntaha kjuák'e ijnko ch'ín tsíxámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrókuikon sín á sinchekitohe ch'án chojni jína tí yaon t'ok'éhe sín ḱixin ntá chrókuíueka sín ch'án jie. ⁸ Kjánchó jehe ch'án ó nohe ch'án nkehe tjenkaḡáxin asén sín ntá nixjehé ch'án tí ch'ín tsíxámá tja ntáchro ch'án ḱixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án. ⁹ Ntá nixjehé ch'ín Jesús tí í so sín ntáchro ch'án ḱixin:

—Tsjánchánkíhárá ijnko xḡa. Tí yaon t'ok'éheni la, ¿á jína chrókuich'eni ijnko nkehe jína ní ó á chrókuich'eni ijnko nkehe jínahya? ¿Á chrókuinchekitohe chojni jína ní ó á chróku'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehé ch'án tí ch'ín níhi ntáchro ch'án ḱixin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuitóhe tja ch'án jína. ¹¹ Kjánchó tí sín fariseo tjejó mé kóninkaon sín mé ntá kjo sín kichó sín ḱixin tjinkaon sín chróku'óyán sín tí ch'ín Jesús.

Ch'ín Jesús kjuéyá ch'án tí teyó sín ts'ajiko ch'án
(Mt. 10.1-4; Mr. 3.13-19)

* 6:4 6.3-4 1 Samuel 21.6; Levítico 24.5-9

¹² A ntá ijnko yaon ch'ín Jesús sákjui ch'án ijnko jnã kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. ¹⁴ A ntá tí sín í mé xíkhi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kíchó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kíchó ch'án mé it'in Jacobo; la ko ch'ín Judas Iscariote tí ch'ín kjuíncheki tí ch'ín Jesús.

Ch'ín Jesús kjuakohe ch'an nchónhya chojni
(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jnã ntá k'uéjé sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixín estado Judea la ko chjasin Jerusalén la ko tí chrínta ntayaon tí siín tí chjasin Tiro la ko tí chjasin Sidón. Ó kjuí sín kixin tsinhin sín tí nkehe tsjako ch'ín Jesús la ko tsitöhe sín jina. ¹⁸ A ntá tí sín kjuaxróxinhya k'uéjé k'uéchóna sín nchakuen jínahya na mé kúitöhe sín jina kjaxin. ¹⁹ Kaín chojni tjínkaon chrókuákóxin sín tí ch'ín Jesús kixin kjuínchekitöhe ch'án jina kaín xin chojni kixin jehe ch'án chóna ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:
—Náxrjón tjeorá jahará nõará kixin chontará kjuachaxiën Dios.
²¹ 'Náxrjón tjeorá jahará t'énxinrá kjinta ijie kixin chr'éxin sinterá jina.
'Náxrjón tjeorá jahará tsjankará ijie kixin chr'éxin tsjanorá.
²² 'Náxrjón tjeorá jahará nínkakhonhá chojni la ko ts'ínkítíará sín sátsjirá ókjé, la ko t'ántaxínhanrá sín la ko t'ákjenxin sín ihnjárá éxi ijnko nkehe jínahya kixin tñkachónkirá tí Xjeen Dios K'óna Chojni. ²³ Tsocháhará má la ko imá tsochontará kjuachéhe tí yaon a kixin ts'ayéhé nkehe kuente nkaya nkajni. A ntá xíkaha tí t'áchrjí tí sín jínahya ch'e la mé ósé kjuate sín tí sín k'uéchronka itén Dios.

²⁴ A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ A ntá jahará kjónterá jina, kjuaxróxinhya ts'ejorá chr'éxin kixin ts'énxinrá kjinta.
'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.
²⁶ 'Kjuaxróxinhya ts'ejorá tió kaín chojni tsjikosáyahará sín kixin xíkaha tí t'áchrjí sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakhonhemi
(Mt. 5.38-48; 7.12)

²⁷ A ntá jahará tjeotinhínrá mé tjéxrjanka kixin chrótjuéhérá tí sín nínkakhonhá la ko jina chrókuínkítisará tí sín tjínkakhonhá tí jahará. ²⁸ Jina nixjehérá tí sín t'ántaxínhanrá la ko tjanchehérá Dios kixin tsjínkítsa ch'án tí sín chónkíhará sín. ²⁹ Tí chjéhe ijnko nkexro ijnko tuáanrá chrókjóka tí í jnko nángo kixin chróchjéhe sín túha kjaxin. La ko tí siín ijnko nkexro tjínkaon sín tsakitsjaha sín tí chamara tjín t'ínkayate na mé tütöhe kixin kjaxin sátsjiko sín camisá kjaxin. ³⁰ Tí jnkojin nkexro tjanchaha nkehe chonta la chjehé sín. A ntá tí tsakja sín nkehe kuéntá la tjanchehya sín kixin naxá ts'ókjanhan sín. ³¹ Méxra chrókuikosáyehérá kichuárá éxi yóhe nkexrí tjínkaonrá chrókuikosáyahará tí jehe sín kjaxin.

³² Tí jehó tjuéhérá tí nkexro tjuahára la tí xíkaha la kohya ninkehó tsjachahyará. Kjónté tí sín jínahya tjasin jie la xíkaha ch'e sín. ³³ A ntá tí tjikosáyehérá jehó tí sín tjikosáyahará la kohya ninkehó tsjachahyará xíkaha. Kjónté tí sín jínahya tjasin jie mé kjaxin xíkaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xíkaha kohya ninkehó tsjachahyará. Kjónté tí sín jínahya tjasin jie xíkaha ch'e sín nchekjen kíchó sín chichaon la ko chónhen sín kixin tsokjan tí chjchaköen sín inaá. ³⁵ Kjánchó jahará chrótjuéhérá tí sín nínkakhonhá la ko jina chrókuíjch'eherá sín xra la ko chrókuíjchekjenrá sín chichaon la chróchoénhyará kixin chrókan tí chjchaköanrá inaá. Mé xíkaha chrókuíjch'erá la imá tsjachará la ko ts'ónará xjeen Dios nkaya nkajni kixin jehe ch'án ch'ehe ch'án jina tí sín chóntehya ch'án kjuasáya la ko tí sín jínahya. ³⁶ Chrókuíkonöghérá kichuárá éxi yóhe It'ará nkaya nkajni tikonóhe ch'án chojni.

Chrók'uántaxíenhyani kíchó ní
(Mt. 7.1-5)

³⁷ Chrókuékahyará jie ókjé chojni kixin ntá Dios chrókuanchahya ch'án jie tí jahará. Chrókuétuñhyará kixin chrókuasóte í jnko chojni kixin Dios kjaxin chrókuínchekjasótíahyará

ch'án tí jahará. Chrók'uitjáyanhanrá ichrén jie kjuasinhnanrá í jnko chojni kixin ntá Dios chrókjuinchek'itjáyanhanrá ch'án tí jie kjuásinrá. ³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhé éxi tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójina ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tóye. ⁴⁰ Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'án ntá tsoñohe ch'án éxi nohe tí nkexro kjuakohe ch'án.

⁴¹ ¿A ntá nkeuènté tsjehé tí chjíninó ntsí tjenkánki ikon tí kichuá, tí naxá ántosán tí nta jie tjenkánki ikuan? ⁴² Mé xikaha nkexri kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjíninó ntsí tjenkánki ikon ch'án tí naxá ántosán tí nta jie tjenkánki ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánki ikuan kixin ntá chrók'uikuan chrókuakitsjenkiá chjíninó ntsí tjenkánki ikon tí kichuá.

Tí nta mé tjatsoanxinni tí to tsík'óna

(Mt. 7.17-20; 12.34-35)

⁴³ Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxinni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxian asén mé xikaha nixja ir'va.

Ch'ín Jesús kjuíncheyóexin éxi yaá nkexro kjuích'éna nchia

(Mt. 7.24-27)

⁴⁶ ¿Nkeuènté ntáchrorá kixin janhan Inchará, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuíchea nchia la senó k'óxraya ch'án tóye ninka kixin ntá sich'éna ch'án nchia chrítaón tí tjo a. A ntá tió k'uánki tí ntario la ikui tí ntá k'uíntate tí nchia, kjónté xikaha la k'uátjoákoehya la ní kuínkíhya tí nchia a kixin jína tsík'óna chrítaón tjo tjekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínki. A ntá tió k'uánki tí ntario la ikui tí ntá k'uíntate tí nchia la ntá k'uátjoáko ntá tí nchia la ntá kuenté tí nchia la k'uítjáyan —mé ichro ch'ín Jesús.

7

Ch'ín Jesús kjuínchekitóhe jína ijnko ch'ín ch'ehe ijnko soldado romano xra

(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexri tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóhehe sín ch'án kixin chrókjuuji ch'án chrókjuinchekitóhe ch'án jína tí ch'ín ch'ehe ch'án xra. ⁴ Ntá kjuíji sín kóchjinehe sín tí ch'ín Jesús kjuankixin chrónóhehe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkitsa ch'án ⁵ kixin tjuèhe ch'án tí nación kuènteni la ko jehe ch'án kjuínkitsa ch'án la ko k'uétqan kixin ts'óna ijnko ninko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uétuènen ch'án iso chojni chónin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixénhén ntge ch'án. ⁷ Mé xikaha chrókósuèhe ch'án chrókjuuji ch'án chrókjuéyá ch'án tí jaha. Méxra tí kjuachaxin chrónixja ó chrókuitóexin jína tí ch'ín ch'ehe ch'án xra. ⁸ Kixin jehe ch'án kjaxin t'ítuènen ch'án la ko kjaxin chóna ch'án soldado t'etuènen ch'án inaá. Tió t'etuènen ch'án ijnko sín kixin sátsji la mé sátsji la ko tió t'etuènen ch'án í jnko sín kixin xrákoa la mé xrákoa la ko tió t'etuènen ch'án í jnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxian tí ch'ín a, a ntá nkátjá ch'án komá ch'án tí chojni chréhe ntáchro ch'án kixin:

—Ntáxrjan kixin naxá k'uítjahya nijnko nkexro israelita xikaha tinkáchónki éxi tí ch'ín í —ichro ch'án.

¹⁰ A ntá ó kjan nchia tí sín tsík'ítuhenen la ó k'uikon sín kixin ó tsíkitohe jina tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjui ch'ín Jesús ijnko chjasin it'ín Naín la ko sákjuiko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uikon sín nchónhya chojni sákjuikjiva sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuikotoxin sín tjan. ¹³ Ntá tió k'uikon Inchéni tí tjan a ntá kuíkonóhe ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuanhan t'aya —ichro ch'án.

¹⁵ Ntá tí ch'ín tsík'en tuéxin kjuák'etjixin ch'án la ko kjuankixin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuiko. ¹⁶ A ntá tió k'uikon sín xikaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etjan chrónka itén Dios ts'ejókoni —ichro sín.

Kjixin ntáchro sín kixin:

—Ó kui Dios tsjinkítsa ch'án chjasén ch'án —ichro sín.

¹⁷ A ntá nkuixin estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án ¹⁹ k'uetuhenen ch'án sín sátsjitsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ó á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjan ch'ín Jesús ntáchro sín kixin:

—Ch'ín Juan Bautista k'uetjan ch'án kuini tsikjanchankíhani kixin á jaha tí nkexro tsi ní ó á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jina la mé kjuatsen ch'án kaín tí chin chónka sín la ko kuakitsje ch'án tí nchakuen jínahya chónka sín la ko kjuínchek'íkon ch'án itsjé chojni t'íkonhya. ²² A ntá kjuátéhe ch'ín Jesús ntáchro ch'án kixin:

—Sátjírá tjíchenkará tí ch'ín Juan kaín nkehe k'uikonrá la ko kaín nkehe kuínhínra kixin tí sín k'uíkonhya la ó t'íkon sín jie, la ko tí sín k'uékijhya la ó tji sín jie, la ko tí sín k'uéchónka chinlepra la ó kuitohé sín jina, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxraohé sín tí tan jina tsaáxin sín. ²³ Ntá náxrjón tjan tí nkexro kohya nkehe t'ínkákónhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankixin nixjehe ch'ín Jesús tí sín k'uéjó ntiha kixin nkexrí tjan ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uikonrá tí jehe ch'án? ¿Á k'uikonrá ch'án éxi ijnko tji nchexrayehé xrínto? ²⁵ Tí náhi, ¿la ntá nkehe k'uikonrá? ¿Á k'uikonrá ch'án éxi ijnko nkexro tsík'ítsa jina? Jahará ó nohará kixin chojni tsík'ítsa jina la ko chónka kaín nkehe náxrjón la mé ntøe rey tjejó sín. ²⁶ ¿A ntá nkexrí k'uikonrá ch'án? ¿Á k'uikonrá ch'án éxi ijnko nkexro chrónka itén Dios? Na mé xrjanka kixin chaxín xikaha jehe ch'án na mé antsí t'etjan ch'án la ntá tí sín k'uéchrónka itén Dios ósé la kánhyó. ²⁷ Ch'ín Juan mé tí nkexro kui éxi chrónka tí xroon itén Dios ósé ntáchro kixin:

Janhan mé tsochr'an ijnko nkexro tsochrónka itan kuéntana tsítónxin ntja,

kixin tsjasíyóxin ch'án ntja kuénta.*

Mé xikaha chrónka tí xroon itén Dios. ²⁸ Ntá ijnko nkehe chaxín tsotjonkará kixin kaín tí nkexro k'uéjó senó k'uéchrónka itén Dios la kánhyó tjetooan sín la antsí tjetooan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajni la antsí tjetooan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjéni tsíkikite ch'ín Juan la ó kjuátsoan sín kixin Dios la jina ch'án. ³⁰ Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókjuinkítsa tí jehe sín. ³¹ Ntá ntáchro Inchéni kixin:

* 7:27 Malaquías 3.1

—¿Nkexrí chrókóyóhe sín tı chojni tjejó jie? ¿Nkehe chrókóyóhe sín? ³² Tóyóhe sín tı chánjan tjejótxın sín tı ntasin tsítan sín la t'ıyehe kichó sín ntáchro sín kixin: “Kjuínchentáchroni flauta la tehyará la ko tsjeni isón kuente chojni tsik'en la tsjankahyará.” ³³ Kixin ó kui ch'in Juan Bautista la kjónehya ch'an niotja la ko k'uıhya ch'an vino la ntá jahará ntáchrórá kixin ijnko nchakuen tı jınahya chóna ch'an. ³⁴ A ntá kjaxin ikui tı Xjeen Dios K'óna Chojni la kjóne ch'an la ko ik'ui ch'an la ntáchrórá kixin imá kjóne ch'an la ko imá ik'ui ch'an vino la ko t'ıto ch'an tı sín tjasin jie la ko tı sín nchekjênki. ³⁵ A ntá tı xjeen Dios mé tjakoxın sín káın tı nkehe tjınkaon Dios.

Ch'in Jesús mé kjuák'e ch'an ntøe ijnko ch'in fariseo it'in Simón

³⁶ Ijnko ch'in fariseo mé chronóhe ch'an tı ch'in Jesús kixin tsjiji ch'an ntøe ch'an sineko sín ch'an. Ntá sákjui ch'an ntøe tı ch'in a, a ntá ntiha kjuák'etjaxın ch'an tı tjen mesa. ³⁷ A ntá itjen ijnko tjan nchónhya jie chóna tjan. Itjen tjan tı chjasin ntiha la ntá kónohe tjan kixin tsikjiji ch'in Jesús ntøe tı ch'in fariseo la ko ntaha sineko sín ch'an. Ntá kui tjan ntiha kujkáo tjan ijnko xrø tjetet tsikaón aceite xraxé náxrjón. ³⁸ Ntá tsjánka tjan kóchjina tjan toté ch'in Jesús ntá ntakon tjan kjuátanxın toté ch'an la ko kaxıhi tjan kjuínchexámáxin tjan toté ch'an la ko kjóneko kochító toté ch'an la ko kjuíncheka tjan toté ch'an tı aceite xraxé náxrjón. ³⁹ A ntá tıó k'uıkon tı ch'in fariseo tsik'ıyehe tı ch'in Jesús ntá kjo ch'an asén ch'an kixin: “Tı chrókóchaxın tı nkexro i ijnko ch'in chrónka itén Dios ntá chrókónohe ch'an kixin nkexrí xéhe tı tjan tjetákoxın ch'an kixin ijnko tjan jınahya tıha”, ichro ch'an. ⁴⁰ Ntá ch'in Jesús ntáche ch'an tı ch'in fariseo kixin:

—Simón, janhan chonta ijnko nkehe tsonixjaha —ichro ch'an.

Ntá kjuátøhe tı ch'in fariseo ntáchro ch'an kixin:

—Chronka, Maestro —ichro ch'an.

⁴¹ Ntá ntáchro ch'in Jesús kixin:

—K'uéjó yaá chojni ntoa síkéhe sín chichaon ijnko ch'in nchekjen chojni chichaon. Ijnko la síká ch'an quinientos denario. A ntá tı íjnko a la síká ch'an cincuenta denario. ⁴² A ntá kjuachahya sín k'ókjenhen sín tı chichaon tı ch'in síkéhe sín ntá kujkonóhehe ch'an sín ntá k'ókıka ch'an tı cuenta síká yóı sín. A ntá jie chrónka jaha kixin nkexro tı yóı sín antsi chrótjuehe tı nkexro kujkonóhehe ch'an —ichro ch'in Jesús.

⁴³ Ntá kjuátøhe tı ch'in Simón ntáchro ch'an kixin:

—Janhan ntáxrjan tı nkexro kujkonóhehe má —ichro ch'an.

Ntá ntáchro ch'in Jesús kixin:

—Ntoá tjenkayáxian —ichro ch'an.

⁴⁴ Ntá ch'in Jesús komá ch'an tı tjan a ntá ntáche ch'an tı ch'in Simón kixin:

—¿Á t'ıkuan tı tjan a ní? Janhan na mé k'uıxanhan ntøa la ntá jaha la kjuánjonhya ntá chrók'ontia totená. Kjánchó jehe tjan tı ntakon tjan kjuínchek'ontıxın tjan totená la ko kaxıhi tjan kjuínchexámáxin tjan. ⁴⁵ A ntá jaha la kjóntekoahyana kochító. Kjánchó jehe tjan naxa kuitøehya tjan neko kochító totená. ⁴⁶ Jaha la kuikıtexınhya aceite kja. A ntá jehe tjan kujkíte tjan aceite xraxé náxrjón totená. ⁴⁷ Mé xıkaha ntáxrjan kixin imá tjuana tjan kixin káın tı nchónhya jie kjuasin tjan la mé kjuınhın tjan. A ntá ijnko nkexro kjuınhınıntısıkoá jie la mé xıkahaıntısıkoá tjakoxın kixin tjuana sín —ichro ch'an.

⁴⁸ Ntá nıxjehe ch'an tı tjan a ntáchro ch'an kixin:

—Ó kjuınhınhan tı jie chonta —ichro ch'an.

⁴⁹ A ntá káın tı sín tsıkóchjina sín k'uejótjaxın sín tı tjan ch'an mé kjuankixin kjo sín kichó sín ntáchro sín kixin:

—¿Xá nkexro tıhi kixin tjakjınhın ch'an ijje chojni?

⁵⁰ A ntá ch'in Jesús ntáche ch'an tı tjan a kixin:

—Ó kuaá jaha kixin kuıtekávan tı janhan. A ntá jie kjuaxróxin sátsjia ntøa —ichro ch'an.

8

Iso chojni chjin kjuınkıtsa tı xrø kjuıch'e ch'in Jesús

¹ A ntá chr'éxın ntá ch'in Jesús k'uájı ch'an itsje chjasin hyé la ko chjasin ntsıntsı kjuako ch'an la ko chrónka ch'an tı tan jına kixin nkexrí tı kjuachaxın t'etøan Dios. A ntá tı teyó sín mé k'uájıko ch'an. ² Kjaxın chréhe iso chojni chjin tsikjinchekıtøhe ch'an jına tsıkakıtsje ch'an tı nchakuen tı jınahya k'uechénta sín la ko tsıkjatsen ch'an tı chin k'uechénta sín. Ijnko tjan mé it'in Maria la ko kjaxın tikıtexın tjan Magdalena na mé tsik'axrje yato nchakuen tı jınahya k'uechénta tjan, ³ la ko íjnko tjan it'in tjan Juana ne mé xıı mé it'in ch'an Chuza. Jehe ch'an mé ch'ehe ch'an xrø tı ch'in Herodes t'etøan ch'an, la ko íjnko tjan mé it'in tjan Susana, la ko itsje í so sín k'uejó sín. A ntá káın sín kjuanjon sín tı nkehe k'uechénta sín kjuınkıtsa sín tı ch'in Jesús la ko tı sín k'uájıko ch'an.

Ch'in Jesús kjuíncheyóexin ch'an éxi ijnko ch'in k'uenka nonte
(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'in Jesús, k'uaxrjexín sín kaín tí chjasin ntiha. A ntá ch'in Jesús kjuíncheyóexin ch'an ntáchro ch'an kixin:

⁵ —Éxi ijnko ch'in sákjuik'enka noatrigo nontge ch'an. Mé xikaha sákjuí ch'an ik'ue ch'an tí noatrigo a. Ntá iso noa la k'uanótyen chrínta ntja ntá nkaxénjin chojni tí noa a la ko kjaxin tí koxroxé k'uínka va. ⁶ A ntá í so la k'uitji chrík'á xro ntá k'uayan la xámá kixin kánhyó siín tjo. ⁷ A ntá í so la kjuítsínkák'á kach'j ntá k'uánki kach'j la ntá í xitjahya k'uánki tí no a kixin tsíkjate tí kach'j. ⁸ A ntá í so la mé tsík'itji nche jina. A ntá tíó k'uánki la k'óna jina la mé jnkojnko noatje k'óna ciento neno noa —mé xikaha ichro ch'an.

Na ntá kjuixin kjuako ch'in Jesús kaín tíha ntá itsen ntáchro ch'an kixin:

—Tí tjinkáonrá chrókuinhínrá la tinhínrá —ichro ch'an.

Ch'in Jesús chronkaxín nkekuènte kjuíncheyóexin ch'an
(Mt. 13.10-17; Mr. 4.10-12)

⁹ Ntá tí sín k'uájiko ch'an kjuanchankíhi sín ch'an kixin nkexrí t'axrjexín tí nkehe kjuíncheyóexin ch'an. ¹⁰ Ntá ntáchro ch'an kixin:

—Dios mé tsjinkjtsa kixin tsonohará tí nkehe noehya í so chojni nkexrí t'etqan Dios. Kjánchó tí í so sín tjáqohá sín kjuíntayóaxoán kixin ntá k'uikon sín la kjónté tsjatsqanhya sín la ko kuínhin sín na kjónté naxá tienxínhya sín.

Ch'in Jesús chronkaxín nkexrí t'axrjexín tí ch'in k'uenka nonte
(Mt. 13.18-23; Mr. 4.13-20)

¹¹ Ntá tsoxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² A ntá tí noa k'uanótyen chrínta ntja la mé tóyóhe tí sín kuínhin tí tan a. A ntá ó kui ch'in Tsochren ntá kjuínchek'itjáyán ch'an kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. ¹³ A ntá tí noa kjuítsínkák'á xro la éxi yóhe tí chojni kuínhin itén Dios la tjoka kóxrjínjin sín kuínkáchónki sín. Na ntá itsi tí kjuaxróxinhya, a ntá tsítqhe sín tí itén Dios kuínhin sín kixin naxá nínkahya chóna nuè. ¹⁴ A ntá tí noa kjuítsínkák'á kach'j na mé éxi yóhe ijnko chojni kuínhin tí tan jina kjánchó tjtioxínhya ntje sín kixin tóxakonhen sín tí xra chóna sín la ko tjinkaon sín tsochóna sín itsjé nkehe la ko kaín tí nkehe tóxrjínjin sín mé t'inkákonhen kixin xikaha la xitjahya sich'ehe sín xra Dios. ¹⁵ A ntá tí noa k'uínka nonte jina na mé éxi yóhe tí chojni kuínhin tí itén Dios a ntá kaín asén sín kuítekaon sín la ntá kuítqehya sín tí tan, a ntá xikaha la jina ch'ehe sín Dios xra.

Ch'in Jesús mé kjuíncheyóexin éxi ijnko xrohi tjeche
(Mr. 4.21-25)

¹⁶ Njínko nkexro chrókjuínchek'ákjen xrohi chrókjuak'ema nkaxenhen chí o chrókjuak'ema chrínki cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxin sín tí t'inkaséyan. ¹⁷ Kohya nkehe chrók'uejóma a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxínxin tí xrohi a. ¹⁸ A ntá chrókuinhínrá jina kixin tí tjen ijnko nkexro chóna nkehe la mé ts'áyéhe ch'an má. A ntá tí nkexro chónahya nkehe la mé ts'axrjehe ch'an kjónté tí nkehe ntsí tónhen ch'an kixin chóna ch'an.

Tí iné la ko tí kichó ch'in Jesús
(Mt. 12.46-50; Mr. 3.31-35)

¹⁹ A ntá kjuíji iné la ko kichó ch'in Jesús tí tjen ch'an. Ntá xitjahya tsochjinehe sín ch'an kixin nchónhya chojni siín. ²⁰ A ntá ijnko sín ntiha tsíkjencha ch'in Jesús kixin:

—Iná la ko kichuá tjejó sín ntója la tjinkaon sín chrók'uiikon sín tí jaha —ichro sín.

²¹ Kjánchó kjuátqhe ch'an ntáchro ch'an kixin:

—Tí sín tinhín itén Dios la ko títekaon sín na mé t'íkuán tí jehe sín éxi nana la ko kichína —ichro ch'an.

Ch'in Jesús k'uetuenhen tí xrínto la ko tí ntq kixin ts'ixita
(Mt. 8.23-27; Mr. 4.35-41)

²² Ntá ijnko yaon k'uixenhen ch'in Jesús ijnko ntabárcq la koí tí sín k'uájiko ch'an. Ntá ntáchro ch'an kixin:

—Sátsjini tóhe ntayaon —ichro ch'an.

Ntá sákjuí sín. ²³ Ntá nachrohe tjejót'atóye sín a ntá ch'in Jesús mé kjuák'ejua ch'an. A ntá xrinahya tjan chjéhe xrínto chrítaón ntá ntá xrankixin sitíka ntá tí ntabárcq ntá chrakon sín kixin ts'anianki ntá tí ntabárcq. ²⁴ Ntá kjuínchekjayehe sín tí ch'in Jesús, ntáchro sín kixin:

—Maestro, Maestro. Tjejót'aniankíni ntá —ichro sín.

Ntá ch'ín Jesús k'uàya ch'án ntá k'uetuenhen ch'án tí xrjnto la ko tí ntá kixin ts'ixita, a ntá náxrjón k'uixita tí ntá la ko tí xrjnto. ²⁵ Ntá ntáche ch'án tí sín k'uájiko ch'án kixin:

—¿Á naxa tinkachónkihyará Dios? —ichro ch'án.

Kjánhó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuenhen ch'án xrjnto la ko tí ntá la titekakonhen ch'án?

Ijnko ch'ín nonte Gadara chóna nchakuen tí jínahya

(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóhe ntayaon ntoí chók'èxin estado Galilea. ²⁷ Ntá k'uínkajinxín ch'ín Jesús tí ntabárcó ntá kóchjina injko ch'ín chjasin ntiha. Ntá ó má sé chóna ch'án nchakuen tí jínahya. Na ntá ní ké ch'án t'inkáyahya ch'án, la ko jehya ntqe ch'án k'uékjak'e ch'án na mé tjen ch'án tí panteón. ²⁸ Tió k'uikon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'oyako ch'án ntáchro ch'án kixin:

—¿Nkekuènte tjtáté tí jeheni, jaha Jesús Xjjen Dios itjen nkaya nkajni? Chronóghani nchekjasótehyani —ichro ch'án.

²⁹ Xjkaaha ntáchro ch'án kixin ch'ín Jesús tsík'etuenhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'etuenhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon sín chrókjuak'e ch'án. Kjánhó k'uékóchrinjín ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuiko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátéhe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xjkaaha kixin nchónhya nchakuen tí jínahya chóna ch'án. ³¹ A ntá kaín tí nchakuen tí jínahya chronóghé tí ch'ín Jesús kixin chrók'uetqanhya ch'án kixin chrókjuitsínkayá tí tóye njnka. ³² A ntá ntiha tí jna siín nchónhya cochino xrine va. A ntá tí nchakuen tí jínahya chronóghé tí ch'ín Jesús kixin chrókjuanjón ch'án kjuachaxín chrók'uixenhen tí cochino a. A ntá kjuanjón ch'án kjuachaxín. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochino a. A ntá kaín tí cochino kuinká va sákjuí va nó nkaya tsáka k'uánótjenki va ntá kjuínhin va nta.

³⁴ A ntá tí sín sit'ayakonhen tí cochino k'uikon sín kixin xjkaaha kónhen ntá chrakon sín kuinká sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasín sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uikon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjxín ch'án chrínki toté tí ch'ín Jesús, ó tsík'ínkaya ch'án iké ch'án kixin ó jina tjen ch'án, a ntá chrakon sín tí k'uikon sín xjkaaha. ³⁶ A ntá tí jehe sín tsík'ikon sín kixin xjkaaha kónhen la chrónka sín kixin nkexrí kuítóhe jina tí ch'ín k'uéchóna tí nchakuen tí jínahya. ³⁷ A ntá kaín tí chojni chjasín Gadara kjuankixin chronóghé sín tí ch'ín Jesús kixin sáchrókjuixín ch'án ntiha kixin imá chrakon sín. A ntá tí ch'ín Jesús k'uit'ótjen ch'án tí ntabárcó sákjuixín ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóghé ch'án tí ch'ín Jesús kixin á chrókjuanjónhya ch'án kjuachaxín sáchrókjuí ch'án koí ch'án. Kjánhó ch'ín Jesús k'uetuenhen ch'án kixin tsitqhe ch'án ntáchro ch'án kixin:

³⁹ —Titqha satjia ntqá la ko chrónka nkexrí tí kjuachaxín jié kuènte Dios kuítóaxián jina jaha —ichro ch'án.

A ntá sákjuí tí ch'ín a chrónka ch'án nkuixín tí chjasén ch'án kixin injko kjuaxroan jié kjuích'e ch'ín Jesús kjuínchekitqhe ch'án jina.

Tí xjjen ch'ín Jairo la ko tí tjan kuákóxin iké ch'ín Jesús

(Mt. 9.18-26; Mr. 5.21-43)

⁴⁰ Tió ch'ín Jesús kjan ch'án tí íjnko chrínta ntá ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui injko ch'ín it'in Jairo na mé injko ch'ín t'etqan kuènte njnko. A ntá kjuák'exín toch'in ch'án tote tí ch'ín Jesús chronóghé ch'án kixin sáchrókjuí ch'ín Jesús ntqe ch'án ⁴² kixin chóna ch'án jnkokoáxon xjjen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uixitja kichó sín.

⁴³ Ntá siín sín ntiha. Na mé ntiha tjenákjan injko chojni chjin níhi tjan sitji tjan jni na mé chóna tjan teyó nánó titqehya tjan jina. A ntá kaín nkehe k'uéchóna tjan kjuenkehe tjan tí sín ch'e xroan la ko njjnko sín kjuachahya sín kjuínchekitqhe sín tjan jina. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

Ἀ ντά καίν σίν ντάχρο σίν κίξιν νινκεξρό, ιχρο σίν. Ἀ ντά χ'ίν Pedro la ko tí σίν k'uejoko ch'án ntáχρο σίν κίξιν:

—Maestro, nchónhya chojni siín la ko tótéka σίν la ntáhi ntáha, ζντά nkekuènte κίξιν naxa tjanchankiá κίξιν nkexro tí kuákoxian? —ichro σίν.

⁴⁶ Kjánchó ntáχρο ch'ín Jesús κίξιν:

—Jnkojín nkexro kuákoxinna κίξιν kónona κίξιν kjuachaxin kuèntaná kuitoxén ijnko chojni jína —ichro ch'án.

⁴⁷ Ἀ ντά tió k'uikon tjan κίξιν ó kónoxín ntá kóchjina tjan chrakon tjan kjuak'exín tjan toch'in tjan chrínki toté tí ch'ín Jesús. Ntá chrónka tjan nkayakon kaín xín chojni κίξιν nkekuènte kuákoxín tjan iké ch'án la ko nkexrí kuitoxén tjan jína xíkaha.

⁴⁸ Ntá ntáχρο ch'án κίξιν:

—Jaha, xjeenni, ó kuitoha jína κίξιν kuitékávan tí janhan. Kjuaxróxin sátjja —ichro ch'án.

⁴⁹ Naxa tjejótjo σίν ntiha ntá xrinahya ikui ijnko nkexro kjuixín ntøe tí ch'ín t'etøan kuènte njnko, a ntá chénka ch'án tí ch'ín t'etøan κίξιν:

—Xjaan na mé ó kjuixin k'uéen. Axri í chjeéhya xra tí maestro —ichro ch'án.

⁵⁰ Ἀ ντά tió kuínhin ch'ín Jesús la kjuátøhe ch'án ntáχρο ch'án κίξιν:

—Chrakonhya. Titékávan tí janhan la tsitøhe xjaan jína —ichro ch'án. Ἀ ντά sákjuí σίν.

⁵¹ Ἀ ντά tí kjujik'ixenhen σίν nchia ntá kuitøehya ch'ín Jesús κίξιν ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen σίν tí tjen tí xjan a. ⁵² Kaín tí σίν tjejó ntaha tsjánkamá σίν tí xjan a. Kjánchó jehe ch'án ntáχρο ch'án κίξιν:

—Tsjankahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá σίν ch'án κίξιν jehe σίν la ó nohe σίν κίξιν tsík'en xjan. ⁵⁴ Ἀ ντά jehe ch'án itsé ch'án tja xjan ntá itsen k'uiyøhe ch'án tí xjan ntáχρο ch'án κίξιν:

—Tjarisoá, t'áya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'ueøøan ch'ín Jesús κίξιν tsjanjon σίν nkehe sine tjan. ⁵⁶ Ntá it'é la ko iné xjan la chrakon σίν. Ἀ ντά ch'ín Jesús k'ueøøenhen ch'án σίν κίξιν νινκεξρό chróchenkahya σίν κίξιν xíkaha kónhen.

9

Ch'ín Jesús ichr'án ch'án tí teyó σίν

(Mt. 10.5-15; Mr. 6.7-13)

¹ Ntá ch'ín Jesús k'ueøøan κίξιν tsøchjina tí teyó σίν k'uajiko ch'án. Ntá chjéhe ch'án σίν kjuachaxin tsakitsje σίν kaín tí nchakuen tí jínahya chónta chojni la ko sinchekitøhe σίν chojni jína. ² Ntá k'ueøøan ch'án κίξιν sátsjikjako σίν nkexrí tí kjuachaxin t'etøan Dios la ko sinchekitøhe σίν chojni jína. ³ La ko k'ueøøan ch'án κίξιν:

—Ninkehó nkehe sátsjikohyará ntja sátsjirá, ni tí nta tjixinrá la náhi, ni bolsa la náhi, ni nioñja, ni chichaon, la ko tsjikoará jehó tí ka tjejóyará ó. ⁴ Ἀ ντά tí tsjasánrá ijnko nchia tsjanjon σίν kjuachaxin la ntahó tsitøhará la tsjixixín tí xra ntá sátsjixínrá ntíha. ⁵ Ἀ ντά tí tsjasánrá ijnko chjasin la ntá tsjanjonhya σίν kjuachaxin tsjákorá ntá t'axrxéxinrá tí chjasén σίν ntíha tsotsénkará tí nche chónta totárá tsjáoxínrá xíkaha κίξιν Dios sinchekjasóte tí jehe σίν —ichro ch'án.

⁶ Ntá sákjuí σίν kaín tí chjasin ntsínsí sákjuíchronka σίν tí tan jína tsaáxin chojni la ko kjuínchekitøhe σίν chojni jína kaín chjasin.

Ik'uéen ch'ín Juan Bautista

(Mt. 14.1-12; Mr. 6.14-29)

⁷ Ἀ ντά tí ch'ín Herodes t'etøan kuínhin ch'án kaín tí xra tjech'e ch'ín Jesús la tóxakonhen ch'án κίξιν iso σίν ntáχρο σίν κίξιν ch'ín Juan Bautista la ó tsixechón ch'án, ichro σίν. ⁸ Ἀ ντά iso σίν ntáχρο σίν κίξιν ch'ín Elías tsixechón ch'án mé tí nkexro k'ueéchronka itén Dios ósé. Ἀ ντά í so σίν la ntáχρο σίν κίξιν jnkojín tí σίν k'ueéchronka itén Dios ósé la mé ó tsixechón, ichro σίν. ⁹ Kjánchó ntáχρο ch'ín Herodes κίξιν:

—Janhan mé kuèøan kóchrínjin σίν kja ch'ín Juan. ¿Á chrókóchaxín jehe ch'án κίξιν nchónhya kjuaxroan kuínhan tí tjech'e ch'án? —ichro ch'án. Ἀ ντά kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ Ἀ ντά tió kjan tí σίν k'uajiko ch'ín Jesús ntá chénka σίν tí jehe ch'án kaín tí xra kjuích'e σίν. Ntá k'uaxrjentako σίν ch'án tí kohya νινκεξρό chjinaxón chjasin Betsaida. ¹¹ Ntá tió k'uixikónohe chojni κίξιν ntaha tjen ch'ín Jesús ntá sákjuíchréhe σίν ch'án. Ἀ ντά kjuanjon

ch'an kjuachaxin ts'ejó sín. Ntá kjuankíxin chrónka ch'an nkexrí tjen tí kjuachaxin t'etqan Dios la ko kjuínchekeitohe ch'an chojni jina.

¹² A ntá ó ntá kóntó ntá tí teyó sín k'uájiko ch'in Jesús kóchjinehe sín ch'an ntáchro sín kixin: —Nixjehé tí chojni kixin sátsji sín tí chjasin ntsi la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'in Jesús ntáche ch'an sín kixin: —Chjehérá sín nkehe sine sín —ichro ch'an.

Ntá kjuátehe sín ntáchro sín kixin:

—Chóntahyani itsje nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kain tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'in Jesús ntáche ch'an tí sín xriko ch'an kixin:

—Ntácherá sín tsojnkoié sín ts'ixitjaxin sín jnkoiñko cincuenta sín —ichro ch'an.

¹⁵ A ntá xikaha kjuich'e sín k'uetqan sín, a ntá k'uixitjaxin sín kain sín. ¹⁶ A ntá ch'in Jesús kuákja ch'an tí n'ó niotja la ko tí yaá koche. Ntá konta ch'an nkajni kjuanchehe ch'an kjuasáyé Dios kixin kjuanjon tí nkehe sine sín. Ntá kóchrít'o ch'an tí niotja la ko tí koche la chjéhe ch'an tí sín xriko ch'an. A ntá jehe sín k'óxikayéhe sín chjéhe sín kain tí chojni siín. ¹⁷ A ntá kain sín kjóne sín la kójehe sín. A ntá chr'éxin kjuenájín sín kain tí nkehe sixehé mé teyó ntaxra kjuínchekaón sín.

Ch'in Pedro mé chrónka kixin ch'in Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'in Jesús k'uaxrjenta ch'an tjenixjehé ch'an Dios. Ntá tjejóko ch'an tí sín xriko ch'an ntá kjuanchankíhi ch'an tí jehe sín kixin:

—¿Nkehe ichro tí chojni kixin nkexro tí janhan? —ichro ch'an.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'in Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'an.

Ntá ntáchro ch'in Pedro kixin:

—Jaha tí Cristo ichr'an Dios —ichro ch'an.

Ch'in Jesús chrónka kixin its'en ch'an
(Mt. 16.20-28; Mr. 8.30—9.1)

²¹ Ntá ch'in Jesús k'uetuenhen ch'an sín kixin ninkexró tsochenkahya sín kixin nkexro tí jehe ch'an. ²² Ntá chénka ch'an sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etqan kuente njnko la ko tí sín t'etqan kuente tí sín ncha'tá la ko tí sín maestro tjako tí ley. Ts'óyán sín tí jehe ch'an, kjánchó tí níxin yaon na ó tsoxechón ch'an inaá —ichro ch'an.

²³ Ntá chr'éxin chénka ch'an kain sín kixin:

—Tí chaxín tsochréhérá tí janhan na t'ichjánxin tsjtohérá kain tí nkehe tjaké asánrá, ntá tsamará tí ntacruz kuéntará jnkoiñko yaon, a ntá tsochréhérá tí janhan. ²⁴ Tí nkexro tjinkaon jehó sincheaka asén mé ts'itjayan. A ntá tí nkexro sincheke'itjayanxín asén kixin tinkáchónki tí janhan la tsaá. ²⁵ ¿A ntá nkehe tsonhen tí chrókjuacha ijnko chojni chróchónka kain nkehe siín chjasintajni a ntá kjuachón chrókjuincheke'itjayan ch'an? ²⁶ A ntá jnkoiñ chojni chrókósuèhe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsoquèhe chróntáchro ch'an kixin chóxin ch'an tí jehe sín tió tsi ch'an éxi ijnko rey tsikao ch'an tí kjuachaxin kuente It'é ch'an la ko tí sín ángel jina. ²⁷ Tíhi mé ntoá xrjanika kixin iso chojni tjejó nihi tjejótinhin sín naxá ts'enhya sín ts'enhya sín kixin Dios ts'etqan tí kjuachaxin kuente ch'an.

K'uixitóxin nkexrí tsjehe ch'in Jesús
(Mt. 17.1-8; Mr. 9.2-8)

²⁸ A ntá k'uátsínka ijni yaon tí tsichronka ch'an tíhi ntá sákjuiko ch'an ch'in Pedro la ko ch'in Juan la ko ch'in Jacobo la chr'in sín ijnko jna kixin tsonixjehé ch'an Dios. ²⁹ Ntá ch'in Jesús tjenixjehé ch'an Dios ntá k'uixitóxin nkexrí tsjehe ch'an la ko tí iké ch'an la tjóá la ko tjákiní tsjehe. ³⁰ Ntá xríngaha k'uikon sín yaá chojni tjejóto sín tí jehe ch'an na mé jehe sín la tí ch'in Moisés la ko tí ch'in Elías. ³¹ Imá t'inkáséyan jnkontatjen tí tjejó sín tjejóto sín tí ch'in Jesús kixin nkexrí its'en ch'an la ko nkexrí tsjasótexin ch'an tí chjasin Jerusalén. ³² A ntá ch'in

Pedro la ko tí sín tjejóko ch'án la imá kuihi sín kotáchrin; kjónté la k'u'éjótseje sín k'uikon sín tí kjuachaxin kuénte ch'in Jesús la ko k'uikon sín tí yóí chojni ntoá tjejóko sín ch'án. ³³ A ntá tió sátsji tí yóí sín tjejóko ch'in Jesús ntá ch'in Pedro ntáche ch'án tí ch'in Jesús kixin:

—Maestro, jína kixin tjejóni ntihi. Chrókuich'énani iní nchia la mé ijnko kuéntá la ijnko kuénte ch'in Moisés la ko ijnko kuénte ch'in Elías —ichro ch'án.

Kjánchó ch'in Pedro í noehya ch'án nkehe chróntáchro ch'án kixin chrakon ch'án. ³⁴ A ntá naxá tjenixja ch'án ikui ijnko tjuí kjuák'etja tí jná tjejó sín. Ntá chrakon sín tjejó sín chrínki tí tjuí. ³⁵ Ntá xrínahya kuínhin sín chríkjan tí tjuí itén nkexro ntáchro kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín kixin jehó ch'in Jesús tjen. A ntá tí jehé sín la táni sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'in Jesús kjuínchekitohe jína ijnko chánjan chóna nchakuen tí jínahya
(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jná la ntá nchónhya chojni sákuixin sín ntá ch'in Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóghani kixin chrótsjehé tí xjeenni kixin jnkokoxón ó chóntani a ntá níhi xjan. ³⁹ Chóna xjan nchakuen tí jínahya la ntá nchek'íyato xjan la ko nchek'aniáte xjan nchexránka xjan kixin tjetéhe xjan la ko ntáloxrjo sítjixin ir'va xjan la ko ncheníhi xjan, na mé chrohya tsjinhin xjan. ⁴⁰ A ntá chronógheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátéhe ch'in Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjáohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'in Jesús jiehe k'u'etuenhen tí nchakuen tí jínahya kixin ts'axrxjén xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'in Jesús kjuínchek'áyéhe tí it'é xjan. ⁴³ A ntá kaín sín chrakon sín kixin k'uikon sín tí kjuachaxin jié kuénte Dios.

Ch'in Jesús chrónka ch'án inaá kixin its'en ch'án
(Mt. 17.22-23; Mr. 9.30-32)

Naxá chrakon sín kaín sín kixin tí kjuaxroan kjuíche ch'in Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etóan —ichro ch'án.

⁴⁵ Kjánchó jehé sín kienxínhya sín tí nkehe ntáchro ch'án kixin naxá kjuanjónhya Dios kjuachaxin kixin chrókuiénxín sín, ntá chrakon sín na kjuanchankíehya sín ch'án kixin nkexrí t'axrxjén tí nkehe ntáchro ch'án.

Nkexro tí imá tjetóan ts'etóan
(Mt. 18.1-5; Mr. 9.33-37)

⁴⁶ A ntá tí sín k'uájiko ch'in Jesús kjuankixin sín itjo sín kichó sín kixin nkexro tí jehé sín antsí má tjetóan ts'etóan. ⁴⁷ Kjánchó ch'in Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojin nkexro chrók'uáyéhe tí xjan í kixin tinkáchónki sín tí janhan mé xikaha chrók'uáyéhe sín tí janhan. A ntá jnkojin nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojin nkexro antsí chrókjuinchehnkehya la mé antsí chrók'uáyéhe kjuachaxin chrók'u'etóan.

Tí nkexro nínkakuenhya tí jeheni la mé tóxrjínhin ch'án tí xra ch'eni
(Mr. 9.38-40)

⁴⁹ Ntá ntáchro ch'in Juan kixin:

—Maestro, k'uíkonni ijnko nkexro kjuachaxin ihnjá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuíche ch'án kixin xrikohyani ch'án.

⁵⁰ Kjánchó ch'in Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'in Jesús kjuentuéhe ch'án tí ch'in Jacobo la ko tí ch'in Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'r'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'u'ikon sín kixin ó xra ó sátsji ch'án chjasin Jerusalén. ⁵⁴ A ntá tió k'u'ikon tí sín k'u'ájiko ch'án la mé ch'ín Jacobo la ko ch'ín Juan la ntáchro sín kixin:

— Ìnchéni, zá tjínkáván kixin chrókjuanchiani xrohi chrók'uinkajjinxin nkaya nkajní chrókjuinçek'itjáyán tí jehe sín éxi kjuanchia tí ch'ín Elías?* —ichro sín.

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

— Jahará la kjá noahyará nkexro nchakuen chontará. ⁵⁶ Kixin tí Xjeen Dios K'óna Chojni kuihya ch'án kixin chrókjuinçek'itjáyán ch'án chojni. Náhí. Xra ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

— Ìnchéni, tjinkaonni chróchréheni tí jaha nketí tjínkáván sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

— Tí koxróntá chóna va itjué va la ko tí koxroxé chóna va kaké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

— Chréhé tí janhan —ichro ch'án.

Kjánchó kjuátehe ch'án kixin:

— Ìnchéni, tjtóhéni senó sátsjikjaváni it'éni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

— Tjtóhé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjaku nkexrí tjen tí kjuachaxin t'etqan Dios —ichro ch'án.

⁶¹ Ntá ntáchro í jnko nkexro kixin:

— Ìnchéni, tjinkaonni tsochréheni tí jaha. Jehí tjtóhé tsjinixjeheni tí sín siín ntqeni —ichro ch'án.

⁶² Kjánchó ntáchro ch'ín Jesús kixin:

— Tí nkexro kjuankixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

10

Ch'ín Jesús k'uetuenhen setenta chojni sátsjikjako sín

¹ Ntá chr'èxin Ìnchéni kjueyá ch'án í jnko setenta chojni ntá k'uetuenhen ch'án sín sátsji sín yóyó sín sátsji sín tsitónxin sín ntja tí kain chjasin na ko nkúixín tjinkaon ch'án sáchrókjuí ch'án. ² Ntá ntáchro ch'án kixin:

— Chaxín ntáxrjan kixin imá tsík'óna, a ntá tí chojni ch'e xra mé tsjehya. Chrókjuancheherá tí Ìnché nonte kixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá kixin tétuanhanrá sátsjirá éxi kolélo ts'ejóyakanrá chríkjan tí kolobo. ⁴ Tsjikoahyará kabólsa la ko tjoa t'ínka chichaon la ko tokate tjikoahyará la ko tí nixjehérá chojni tí ntja tjtóéhyará kixin chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrór kixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntíha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntíha chrókjuanjon sín kjuachaxin chrókuithará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la siín kjuachaxin tsoxenkehe. Tsjijhyá í jnko nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntíha ntá interá tí nkehe tsjanjon sín. ⁹ Nchekitohérá chojni níhi jína. Ntá chenkará sín kixin tí kjuachaxin t'etqan Dios la kjínhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntqé sín sátjirá tí ntja chjasin ntíha ntá ntáchrór kixin ¹¹ kjónté tí nche tsík'ixitja totará tsotsénkará kixin tsjakoxinrá kixin tí kjuaxróxinhya ts'áyéhe sín chr'èxin. Kjánchó chrókónohe sín kixin tí kjuachaxin t'etqan Dios la kjínhya tjen tí tjejó sín, ichrorá. ¹² Ntáxrjan

* 9:54 1 Reyes 18.30-40

kixin tí yaon tsjejechin chjasintajni la kjuaxróxinhya ts'atsínka tí chjasin a. Antsí náxrxónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya
(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará, ntá chrókójehe sín la tjoka chrókjuítóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuakoxín sín kixin t'ává sín. ¹⁴ A ntá tí yaon tsitoexin ijje chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótexín tí sín tsík'en.

¹⁶ Tí nkexo tinhin tí nkehe ntáchrórá la mé xíkaha tinhin tí nkehe ntáxrjan la ko tí sín titekakonhya sín tí jahará na mé xíkaha titekakonnhya sín tí janhan. A ntá tí nkexo titekakonnhya sín tí janhan xíkaha titekakonhya sín tí nkexo chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

— Ìnchéni, kjónté tí nchakuen tí jínahya titekakhenni tió t'ájkexinni ihnjá —ichro sín.

¹⁸ Ntá ntáchró ch'in Jesús kixin:

— Kja chaxín k'uikuán kixin ch'in Tsochren k'uánótjenxin nkajní éxi ijnko kjónkixin xíkaha kónhen.† ¹⁹ Ó tjàhárá kjuachaxin kixin kjónté konche la ko konchjã tsinkátjará la ko tsjachahya ninkehó tí kjuachaxin kuènte tí ch'in Tsochren kixin ninkehó tsoanhyará. ²⁰ Kjánchó jehya tíha chrókóchàxinrá kixin tí nchakuen tí jínahya kuitekakhannrá. Náhí. Chrókóchàxinrá kixin ihnjárá ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án
(Mt. 11.25-27; 13.16-17)

²¹ A ntá tuénxin tí Nchakuen Dios kjuínchechéhe tí ch'in Jesús ntá ntáchró ch'án kixin:

— Tjáncháha kjuasáya It'éni Ìnché nkaya nkajní la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'titja tí sín noehya. Mé xíkaha It'éni, jaha kóxrjnhan kixin xíkaha tsoñhen.

²² T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjeýá ch'án kixin tjinkaon ch'án tsoñohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

— Chéhe tí sín k'uikonxin kon sín éxi k'uikonrá. ²⁴ Ntáxrjan kixin nchónhya tí sín k'uéchronka itén Dios óse la ko nchonhya tí sín rey k'uétjinkaon sín chrók'uikon sín éxi t'ikonrá, kjánchó k'uikonhya sín, la ko k'uétjinkaon sín chrókuinhin sín tí nkehe tjejetotinhnra jie, kjánchó í kíenhya sín —ichro ch'án.

Ch'in Jesús kjuíncheyóexin éxi ijnko samaritano jina

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'in Jesús tjinkaon ch'án tsoñoexin ch'án á chaxín nohe ch'án tsjatjehe ch'án ntá kjuanchankí ch'án kixin:

— Maestro, ¿nkexrí chrókjuich'eni chrók'uitjani tí kjuachón jnkochrxín? —ichro ch'án.

²⁶ Ntá kjuátjehe ch'in Jesús ntáchró ch'án kixin:

— ¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátjehe ch'án ntáchró ch'án kixin:

— Chrótjuèhni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénteni la ko chrótjuèhni kichó ni éxi tjuéxini asénni‡ —ichro ch'án.

²⁸ Ntá ntáchró ch'in Jesús kixin:

— Jina kjuátjehe. A ntá tí jaha xíkaha s'ich'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxin ch'án tí ch'in Jesús ntá kjuanchankí ch'án inaá kixin:

— ¿Xá nkexro tí kichó ni chrótjuèhni, ichrua? —ichro ch'án.

³⁰ Ntá ch'in Jesús kjuátjehe ch'án ntáchró ch'án kixin:

— Ijnko chojni k'uínkajinxin nó ntja kjuixin chjasin Jerusalén sátsji ch'án chjasin Jericó, ntá kuátóhe ntja iso síchee kueehe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrinahya k'uátsínka ijnko nchat'á tí ntja tíha ntá k'uikon ch'án xíkaha

* 10:12 Génesis 19.24-28 † 10:18 Isaías 14.12 ‡ 10:27 Deuteronomio 6.5; Levítico 19.18

ntá ántosén ch'án k'uátsínké ch'án. ³² A ntá kjaxin ijnko ch'in levita k'uátsínka chjinaxon ntiha. Ntá k'uikon ch'án xikaha ntá ántosén ch'án k'uátsínké ch'án kjaxin. ³³ A ntá ijnko ch'in kjuixin estado Samaria k'uátsínka tí ntja ntiha ntá k'uikon ch'án xikaha tjetsínka tí nkexro ntá kuikonóhe ch'án. ³⁴ Ntá kóchjinehe ch'án tí nkexro tsikónihi ntá kjuich'ehe ch'án xroqan tí síchrit'og chjéhe ch'án aceite la ko vino la ko kjuinchentetoxín ch'án ka. Ntá kjuixin ntá kjuínchekíták'a ch'án tí kolóchoe ch'án. Ntá sákjuiko ch'án ijnko nchia t'ok'exín chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'in samaritano kuakitsje ch'án iyó tí chichaon la chjéhe ch'án tí inché tí nchia ntáchro ch'án kixin: "T'ayakonhén tí nkexro i, a ntá ántsi má ts'ichjánxinhin ch'án la tió tsokjan ntá tsjénkaha ts'ókjanhan kaín tíha," ichro ch'án. ³⁶ A ntá tí ini nkexro k'uátsínka ntja la, ¿nkexro tjuéhe tí nkexro kjuínchenihi tí síche? —mé kjuanchankí ch'in Jesús.

³⁷ A ntá kjuátehe tí maestro tjako tí ley kixin:

—Tí nkexro kuikonóhe tí jehe ch'án —ichro ch'án.

Ntá ntáchro ch'in Jesús kixin:

—Sátjia jaha la xikaha chrókuich'e —ichro ch'án.

Ch'in Jesús sákjuí ch'án ntqe tjan Marta la ko tjan María

³⁸ Naxá tjetji ch'in Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntqe tjan ntiha. ³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínkí toté tí ch'in Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'in Jesús ntáchro tjan kixin:

—Inchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'in Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjuéyá tjan tí nkehe ántsi jina la ko ninkexró tsakitsjehya tjan tíha —ichro ch'án.

11

Ch'in Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'in Jesús tjenixjehé ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjákohe ni nkexrí tsonixjeheni Dios kixin xikaha ch'in Juan kjuakóhe ch'án tí sín k'uájiko ch'án.

² Ntá ch'in Jesús ntáchro ch'án kixin:

—Tió nixjehérá Dios ntáchorá kixin:

It'éni tjen nkaya nkajni, jaha imá tjóá.

Chrókui tí kjuachaxin kuéntá.

Chrókuich'e tí nkehe tóxrjínhan jaha ntihi chjasintajni éxi tjech'e nkaya nkajni.

³ Jjie tsjánjuan tí niotja t'ichjánxinhinini jnkojnko yaon.

⁴ T'óxika tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'ehe ni chojni.

Tjitoéhyani jeheni xrahya chrókuasinni jje. Nchekaáni kaín tí nkehe jínahya chrókhonhenni

—mé xikaha ichro ch'in Jesús.

⁵ Kjaxin ntáchro ch'án kixin:

—A ntá jnkójnra chróchontará ijnko chojni choxian, a ntá sáchrókjuia ntqe ch'án k'áxrórtjen chróntáche ch'án kixin: "Amigo, nchekjenni iy'á niotja ⁶ kixin nantá ó kui ijnko chojni chóxinni kuixin ch'án kjin kjuíji ch'án ntqeni ntá chóntahyani ninkehó tsochjéhe ni ch'án."

⁷ A ntá tí chrókuátehe tí nkexro choxian tjen nkaxenhen chróntáchro kixin: "Chjééhyani xra. Tí ntója ntqeni méhe t'ikjéhe. A ntá xjeenni tjejót'ok'ékoni xjan. Ntá xitjahya ts'ayani tsótjáhani nkehe", ichro ch'án. ⁸ Ntáxrjan kixin kjónté chrók'uáyahya ch'án chrótjáhya ch'án nkehe kjónté chóxian ch'án, kjá ts'áya ch'án tsótjáha ch'án kaín nkehe t'ichjánxinhan kixin tjinkakonhya ch'án kixin naxá chrókjuak'é chrók'uéya jaha. ⁹ Mé xikaha ntáxrjan kixin: Tjanchará nkehe la Dios tsótjáhará; tjéyará nkehe la ts'itjará; t'inkará puerta la tsóxitjehe. ¹⁰ A ntá tí nkexro tjanhia nkehe la ts'áyéhe tí nkehe; la ko tí nkexro tjeýá nkehe la ts'itja; la ko tí nkexro t'inka puerta la tsóxitjehe.

¹¹ ¿Xá jnkójnra chontará xjaanrá chrókuanchahará xjan niotja la ¿á chrókuánjonrá ijnko xro? O chrókuanchahará xjan koche la ¿á chróchjehérá ijnko konche? ¹² O chrókuanchahará xjan koja la ¿á chrókuánjonrá ijnko konchija? ¹³ A ntá jahará kjónté jínahyará la ó nohará

nkehe jina tsochjehérá xjaanrá, la mé antsí chrókónohará kixin It'eni tjen nkaya nkajní tsojtáhará Nchakuen ch'án tí jnkójínrá chrókjuanchehérá ch'án —ichro ch'in Jesús.

Tjanchia sín jie kixin ch'in Jesús ch'óna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'in Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsik'axrje tí nchakuen tí jínahya a ntá tí ch'in xitjahya nixja la jina nixja ch'án. Ntá kaín chojni chrakon sín kixin xikaha tsíkjih'e ch'án. ¹⁵ A ntá jnkójín tí jehe sín ntáchro sín kixin:

—Tí ch'in a mé takitsje ch'án nchakuen tí jínahya kixin ch'óna ch'án kjuachaxiéntí tí ch'in Beelzebú mé tí ch'in Tsochren, na mé jehe ch'án mé t'etueñhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxín sín tí ch'in Jesús ntá kjuanchehe sín ch'án ijnko kjuaxroan náxrjón kuénte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etóanxín sín, la ko tí sín jnkokóá nchia jnkokónhya tjenkayáxin sín xitjahya ts'ejóko kichó sín jnkokóá. ¹⁸ A ntá kjaxin tí ch'in Tsochren chrókjuánjonko kichó ch'án, ¿la nkexrí chrókóna ch'án kjuachaxin náxa chrók'uetóan ch'án tí chrók'uaxrje tí jínahya? A ntá jahará ntáchrorá kixin janhan takítsjé nchakuen tí jínahya kixin tí kjuachaxiéntí ch'in Tsochren chonta janhan, ichrorá. ¹⁹ A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxín sín kixin jahará ntoáhya tjenkayáxinrá. ²⁰ A ntá tí kjuachaxiéntí Dios mé takítsjéxian tí nchakuen tí jínahya na mé chrókónoaxínrá kixin tí kjuachaxiéntí Dios t'etóan ch'án mé ó kui tí tjejorá.

²¹ A ntá ijnko chojni jiehe yamá chica t'ayakonhen ch'án ntóe ch'án kixin tí nkehe ch'óna ch'án ts'itjáyannya. ²² A ntá itsi ijnko nkexro antsí má tsehe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kixin imá jieéxín ch'án. A ntá tí ch'in antsí tsehe mé tsakja ch'án kaín nkehe sín ntiha. ²³ Tí nkexro titekakónhya tí janhan mé nínkakonna ch'án. A ntá tí nkexro tjinkítsahya tí janhan mé t'inkákonhen tí xra t'a —ichro ch'án.

Jnko tí nchakuen tí jínahya mé tsokjan inaá
(Mt. 12.43-45)

²⁴ A ntá ijnko nchakuen tí jínahya tsik'axrjéxín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntóna k'uaxrjéxian.” ²⁵ A ntá tió kjan la éxi ijnko chojni tsik'ánjón ntóe la náxrjón tsjehe tí nkaxenhen nchia. A ntá k'uikon tí jínahya xikaha tjen nchia ²⁶ a ntá sákujuakajín yato nchakuen tí jínahya antsí má jínahya. A ntá antsí má jínahya kónhen tí ch'in a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'in Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixín tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón
(Mt. 12.38-42; Mr. 8.12)

²⁹ Ntá nchónhya chojni sitójnoktsé sín tí tjen ch'in Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni sín jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjákoxínhya í jnko kjuaxroan la jehó tí nkehe tsíkónhen ch'in Jonás. ³⁰ Ntá éxi yóhe kónhen ch'in Jonás kónoexín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni sín jie. ³¹ A ntá tí yaon tsitóexín ijie chojni tjejó jie la mé tí tjan reina k'uetóan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjin kjuixín tjan tsinhin tjan nkexrí imá k'ueñohe ch'in Salomón. * A ntá jie itjén janhan antsí chonta kjuachaxin, a ntá ch'in Salomón la kénhyó. ³² La ko tí sín chjasin Nínive kjaxin ts'inkatjen sín tió tsitóexín ijie chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tío kuínhin tí sín Nínive chrónka ch'in Jonás itén Dios la kjuítóxinhin sín ntje sín. A ntá jie itjén janhan antsí má chonta kjuachaxin, a ntá ch'in Jonás la kénhyó.

* 11:31 1 Reyes 10.1-10

Xrohi t'inkaséyanxín cuerpo kuènte chojni
(Mt. 5.15; 6.22-23)

³³ 'Nijnko chojni chrokjuinchek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhi. Noi chrókjuak'e xrohi chrókjuak'enkáya candelero kixin ts'inkonxin chojni tí t'inkaséyan.[†] ³⁴ Tí ikonrá mé éxi yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jina la ntá kuènté cuerpo kuèntará chóna xrohi. A ntá tí chontará ikonrá jínahya la ntá kuènté cuerpo kuèntará la sitié tjen. ³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjeorá. ³⁶ A ntá tí kuènté tí cuerpo kuèntará chróchóna xrohi la ko nit'o chrók'uixitiéhya la ntá kuènté la chrók'uikonrá jina la éxi ijnko lámpara kuènté ch'e xra jina.

Ch'in Jesús chrónka kixin ntoáhya tjako tí sín fariseo la ko tí sín tjako ley
(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'in Jesús ntá ijnko ch'in fariseo chrónóhe ch'án tí ch'in Jesús kixin sátsjiko ch'án ntoge ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxin ch'in Jesús chjino tjen tí mesa a. ³⁸ A ntá tí ch'in fariseo chrakon ch'án k'uikon ch'án kixin ch'in Jesús k'óntihya ch'án tja ch'án senó tí sine ch'án éxi tinkáchónki tí jehe sín. ³⁹ Kjánchó lñchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxin. ⁴⁰ Jahará lontirá. ¿A noahyará kixin tí nkexro kjuich'éna tí ntója la koí tí nkaxenhen kjuich'éna ch'án? ⁴¹ Tí chrókjuinchekitonhénrá chojni nòa kain asánrá tí nkehe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kain kaxroan tsjiko tí nkehe sineni. A ntá tahyará kuèntá tí nkehe ntoá la ko nkexri chrótuéhérá Dios la ko nkexri chrótuéhérá kichuará. Jina chróchjehérá Dios nkehe la ko chrók'uitjáyanhyará tí chrókjuinkitsará kichuará.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkójina tsonixjahará sín tió tsoxétará sín ntasin.

⁴⁴ 'Nòará jahará maestro tjákorá tí ley la ko jahará fariseorá. Ntoáhya tjenkayáxinrá ch'iará. Jahará éxi yóhe tóye tsixravá chojni tsik'en t'ikonhya chojni la t'atsinka sín nátaón la noehya sín kixin tsixravá chojni ntiha.

⁴⁵ A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrúa la, ¿á kjaxinhya jeheni kain ní t'ántaxinhinni ní? —ichro sín.

⁴⁶ A ntá ntáchro ch'in Jesús kixin:

—Kjaxin nòará tí jahará tjákorá tí ley. Tétuènhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjára chrókjuinkitsará tí nkehe imá ye yámá sín.

⁴⁷ 'Nòará tí jahará. Ch'énará tjt'oge tí sín k'uéchrónka itén Dios óse tsik'óyan tí sín k'uaxrjenixinrá. ⁴⁸ Xikaha jahará tjákoxinrá kixin ó nchoxon tí nkehe kjuich'e tí sín k'uaxrjenixinrá óse kixin jehe sín k'óyan sín tí nkexro k'uéchrónka itén Dios óse. A ntá jahará ch'énará tjt'oge tí tsixravá sín.

⁴⁹ 'Mé xikaha Dios chóna kjuaxrexinkaon imá jina ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyan jnkójini tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni sín jie kixin k'uitji ijnjé kain tí sín k'uéchrónka itén ch'án óse desde tí xrankixin k'óna chjasintajni ⁵¹ la mé xrankixixin k'uitji ijnjé ch'in Abel la mé kjuixixin k'óyan sín ch'in Zacarias k'óyanxin sín ch'án jnkosiné tí tjen tí altar la ko tí njnko. Ntá Dios sinchejasóte ch'án tí sín sín jie kixin xikaha ik'uén kain tí sín a.

⁵² 'Nòará jahará maestro tjákorá tí ley. Jahará tjinkáonhyará kixin í so chojni tsonohe sín tí nkehe chaxín la ni jahará tjinkáonhyará sinchexiteyará la ko tjtóehyará kixin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'in Jesús kain tíha ntá tí sín maestro tjako tí ley la ko tí sín fariseo imá kóninkakonhen sín ch'án ntá kjuankixin sín kjuanchankíhi sín ch'án nchónhya nkehe ⁵⁴ chrókjuachaxin sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'in Jesús chrónka kixin ntoáhya ch'e tí sín fariseo

¹ A ntá nchónhya mil chojni kójnkotsé sín ntá tinkák'intate kichó sín. Ntá ch'in Jesús saoxín kjuankixin chénka ch'án tí sín k'uájiko ch'án ntáchro ch'án kixin:

—Chrókuítekákonhyará tí nkehe ntoáhya tjenkayáxin tí sín fariseo ch'ia sín, na mé éxí yóhé tí xroan nchek'ánkí niotja tí nkehe tjako sín. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítíé la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ Jahará chojni chóxin kichó ni mé tjonkará kixin chróchrakuenhyará tí chojni t'oyán tí cuerpo, a ntá chr'éxin la kohya nkehe tsjacha sín chrókjuich'e sín. ⁵ Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí siín xrohi tsjasótexin sín. Tí nkexro a mé chróchrakonhénrá ch'án má.

⁶ ¿Á chrókóxiixinhya in'ó koxroxé yaá chichaon ntsíntí? Kjánchó Dios la ts'itjáyenhya ch'án nijnko tí jehe va. ⁷ Kjóté tí kaxihí chóna ikjárá la nohe ch'án nkekjaín ka chontará. Méxra chrakonhyará tí jahará kixin antsí má tjete sínkí tí jahará. A ntá kjóté nchónhya koxroxé la kánhyó sínkí tíha.

Chróchrónkani kixin tinkáchónkini Inchéni Jesucristo nkayakon chojni

(Mt. 10.32-33; 12.32; 10.19-20)

⁸ Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuénte Dios. ⁹ A ntá tí sín sinchemá sín kixin chónhyana sín nkayakon chojni la ntá kjaxian janhan sjntamá kixin chonhya tí jehe sín nkayakon tí sín ángel kuénte Dios.

¹⁰ A ntá jnkojin nkexro ts'ántaxínjin sín tí Xjeen Dios K'óna Chojni naxa jina ts'itjáyán tí jie k'uántaxínjin sín. A ntá tí nkexro ts'ántaxínjin tí Nchakuen Dios la xitjahya tsjin tí jie tí xikaha tsixro sín.

¹¹ Tió tsjikoará sín nkaxenhen nijnko Israel la ko tí tjejó tí sín t'etóan la ko tí tjejó tí síxreé la tóxakuanhyará nkehe tsjatéherá la ko tóxakuanhyará nkehe tsixrorá ¹² kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sín tsikójnkotsé ntáche ch'án tí ch'ín Jesús kixin:

—Maestro, ntáche tí kichó ni a kixin tsjanjon ch'án tí nkehe tónhenni tocar tsikitóhe it'éní tsakjani —ichro ch'án.

¹⁴ Ntá kjuátéhe ch'ín Jesús ntáchro ch'án kixin:

—Lontia jaha. ¿Nkekuénte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nqntee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kixin: “Ó nòna nkehe sjt'a jie. Ts'oxíka tí t'ínkachjinayá noa chonta ntá sjt'ána ijnko antsí jie ts'ínkachjinayá kaín nkehe k'ónana jie chonta. ¹⁹ Ntá tsontátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ók'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xikaha ichrua la, kixin ijie tie itsi nkexro tsjanchia asán. A ntá tí nkehe kjuásíchjina la, ¿xá nkexro kuénte tíha?” ichro ch'án. ²¹ Mé xikaha tsonhen tí nkexro chóna nchónhya nkehe chjasintajni ntíhi, a ntá naxa kjuéyahya ch'án nkehe kuénte nkaya nkajni —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uitsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uitsará. ²⁴ Xraxinkaonrá nkexrí siín tí kontálo. T'enkahya va la ko tjáhya va la ko chónahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjeotan, a ntá tí ko xritjaka la kénhyó. ²⁵ ¿Á tjejó jnkojinrá tjenkayáxinrá kixin tí chrókóxakonhanrá má ntá naxa chrók'uankirá it'o metro ntétoxinrá ínaá? ²⁶ A ntá xitjahya chrókjuich'erá tíha kjóté ijnko nkehe ntsí, ¿a ntá nkehe tsonhen tóxakonhanrá í so nkehe siín?

²⁷ Xrâxinkâonrá nkexrí sí't'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uek'inkáya ch'án naxa kjuíncheyóehya ch'án kixin ántsí náxrjón tí tsjo a. ²⁸ A ntá xikaha Dios mé nchek'ítsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chro'uitsará jahará. ¿Ntá nkekuènte kixin naxa titekákonhyará ch'án? ²⁹ ¿Ntá nkekuènte ixrírâ tóxakonhanrá xritjéyará nkehe sinterá la ko nkehe its'írâ? ³⁰ A ntá tí chojni chjasintajni xritjéyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete síin nkaya nkajni
(Mt. 6.19-21)

³² 'Chrakonhyará jahará kolélo kuèntana. Kjónté tsjéhyará la It'ará tóxrjínjin ch'án tsotjáhará ch'án tí kjuachaxin kuènte ch'án. ³³ Nchekjírâ kaín nkehe chontará la ntá chjehérâ tí chichaon tí sín chóntahya. A ntá xikaha sích'erá la tí tjoa t'inka chíchakoanrá tsontaxinhya kixin tí nkehe tjete síin nkaya nkajni tsjéjehya la ko ntaha kohya xíché la ko ts'ínhya kué la ko ts'ítjáyannya. ³⁴ A ntá tí nkaya nkajni tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhemi

³⁵ T'ichjánxin listo ts'ejochonhénrá la ko tsjak'ekoarâ xrohi tjeche. ³⁶ Listo chrók'uejorâ éxí chojni ch'e xra tjejóchónhen sín tsokjanxin tí lámge sín tí tsikótehe chojni kixin tió tsi ch'án la ts'èya ch'án, la ntá tsakitjehé sín tí puerta tjoka. ³⁷ Náxrjón tí nkexro ch'e xra tió chrókjan tí lámge sín chrók'uikon ch'án kixin naxa tjejótsehe sín. Ntá chaxín ntáxrjan kixin tí ch'ín lamo ts'etóan ch'án kixin ts'ejótjâxin sín tí tjen mesa ntiha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o chrókui ch'án nantóye mé xikaha chrók'uikon ch'án kixin tjejótsehe sín la náxrjón tí sín ch'èhe ch'án xra. ³⁹ Chrókónohará tíhi kixin tí chrókónohe tí inché nchia nke hora chrókui tí xíché ntá chrókjuak'etsjehé ch'án chrókuitóehya ch'án chrók'uixenhen xíchée tí ntóe ch'án chrókueé. ⁴⁰ Ntá jahará kjaxinrá xikaha chrók'uejotsjehérâ kixin titâyá tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína
(Mt. 24.45-51)

⁴¹ A ntá ch'ín Pedro kjuanchankí ch'án kixin:

—Inchéni, ¿á jehóni kaín ni kjuíncheyóéxian nkehe ntáchrua o kaín chojni? —ichro ch'án.

⁴² Ntá ntáchro Inchéni kixin:

—¿Nkexro tí t'etóan tí xra jína, a ntá tí lámge ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintí tí hora a? ⁴³ Náxrjón tjen tí nkexro a tió tsi tí lámge ts'íkon ch'án kixin naxa tjeche tí xra. ⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etóan tí ch'ín a. ⁴⁵ A ntá tí ch'ín t'etóan sitónhen xra tsjenkayáxin kixin tjokahya tsokjan tí lámge ch'án, a ntá tsjan kixin ch'án tsóninkakonhen ch'án tsjanjonko ch'án tí í so chojni ch'è xra, tí chojni ntoa la ko tí chojni chjin, a ntá jehe ch'án sine ch'án la its'í ch'án la tsokoa ch'án. ⁴⁶ A ntá tí lamo tsokjan tí yáon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuitóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámge ch'án la tóxakunehya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámge ch'án ntá ch'e ch'án nkehe chrókjuasótéxín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhé nchónhya nkehe la ántsí tsjé xra ts'áyéhé ch'án sích'e ch'án; la ko ántsí tsjé xra tsoxranchehe tí nkexro k'uáyéhé itsjé nkehe.

Jnkokoáhya tsjenkayáxin chojni kixin ó kui Inchéni Jesús
(Mt. 10.34-36)

⁴⁹ Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya tsóna tsjasótena. Tóxakonna tsoxiteyájia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha. ⁵² Kixin ijie xrankixixín in'ó chojni naxa kjéhya jnkokoáhya tsjenkayáxin sín. Tí iní tsóninkakonhen tí yaá. Tí yaá tsóninkakonhen tí iní. ⁵³ A ntá tí it'é tsóninkakonhen tí xjeen ntoa, la ko tí xjeen ntoa tsóninkakonhen tí it'é. A ntá tí iné tsóninkakonhen tí xjeen chjin, la ko tí xjeen chjin tsóninkakonhen tí iné. Tí ich'ee tsóninkakonhen tí tükinté la ko tí tükinté tsóninkakonhen tí ich'ee tjan.

Tí nkehe chronkaxín nkehe tsónhen
(Mt. 16.1-4; Mr. 8.11-13)

⁵⁴ Ch'ín Jesús kjaxin ntáche ch'án tí chojni síin kixin:

—A ntá ts'ikónrá ts'áya tjuj tí tjiatóxin yaon, a ntá ntáchrórá kixin ts'aniá chrin, a ntá xikaha chaxin tsonghen ts'aniá chrin. ⁵⁵ A ntá tí chjéhe xrinto nó sur ntá ntáchrórá kixin tsosó, a ntá xikaha chaxin tsosó. ⁵⁶ Jahará ntoáhya tjenkayáxinrá. Ó nohará tjenkayáxinrá nkexri tsonghen nkajni la ko chjasintajni. ¿Ntá nkexri naxa tiénxinhyará nkehe sitónhen tí tjejorá jie?

Chrókóxakonhenni kjuaxróxin chrók'uejókoni tí sín nínkakohenni
(Mt. 5.25-26)

⁵⁷ ¿Nkekuènte tjejáhyará jahará nkehe tí jína? ⁵⁸ Tí nkójín nkexro tsjanchia jie sátjikoará ch'án nkayakon tí sín t'etqan na tí ntja ó chrónkakjórá ch'án kixin tsoyóxin ts'ixinhya kjuanínkaon kixin sátsjikoahará nkayakon tí ch'ín juez, kixin tí ch'ín juez chrók'uetqan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntqechiso. ⁵⁹ Ntáxrjan kjá ni chrók'uaxrjéxinhyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kixin nkexri kjuich'e ch'ín Pilato k'uetqan its'en iso chojni tsíkjin estado Galilea k'uitji ijiné sín kójnkoiéko tí ijiné tí ko k'oyán sín kjuanchexin sín kjuasáyé Dios. ² A ntá kjuátehe ch'ín Jesús ntáchro ch'án kixin:

—¿Á tjenkayáxinrá jahará xikaha kónhen tí sín tsíkjin estado Galilea kixin antsí jie jie chóna sín, a ntá tí í so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá kixin antsí má k'uechóna jie tí dieciocho chojni ik'uéen xrátja sín tí torre Siloé, a ntá tí í so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'tjáyánrá kjaxin.

Ch'ín Jesús kjuíncheyóxin ch'án éxi ijnko nta to higo t'ónahya to

⁶ A ntá ch'ín Jesús kjuíncheyóxin ch'án ntáchro ch'án kixin:

—Ijnko chojni chóna ijnko nta to higo nóntqe ch'án. Ntá sákjuitsjehe ch'án á k'óna to. A ntá náhi k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrinjian tí nta kixin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, títqhé ijie nánó kixin sjintantá nche la ko tsjiko ncheqatjehe. ⁹ A ntá tí xikaha ách'e ts'óna to. A ntá tí náhi na ntá ts'ochrinjian chr'éxin.”

Ch'ín Jesús kjuínchekitohe jina ijnko tjan níhi tí yaon t'ok'éhe chojni

¹⁰ Ch'ín Jesús kjuáke ch'án ijnko nínko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jinahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uikon ch'án kixin xikaha tjen tjan ntá k'uíyehé ch'án tjan ntáchro ch'án kixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'án chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'ín t'etqan kuènte nínko kónínkaon ch'án kixin ch'ín Jesús kjuínchekitohe jina ijnko chojni ijnko yaon t'ok'éhe sín, ntá ntáche ch'án tí chojni a kixin: —Síin injon yaon mé chrókónhen xra chrók'uinkará chrókuitqohará jina na jehya tí yaon t'ok'éheni chrókónhen tíha —ichro ch'án.

¹⁵ A ntá Ínchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintánkeehyará tí koxintaará la o tí kolóchqará chrókjuíkoará va ntá tí yaon t'ok'éheni ní? ¹⁶ A ntá tí tjan mé tsik'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jina kjaxin chrókjuasintánka tí nkehe tsikóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'ín Jesús la ntá kaín tí sín kónínkakohen ch'án la kósuéhe sín. A ntá kaín tí chojni síin ntaha chéhe sín k'uikon sín kaín tí kjuaxroan jie kjuakoxin tí jehe ch'án.

Kjuíncheyóxin ch'ín Jesús éxi ijnko tje ntsí kuènte nta mostaza

(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóxin tí t'etqan Dios tí kjuachaxin kuènte ch'án la ko nkehe jina chrókjuintayóaxian? ¹⁹ Éxi yóhe ijnko tje kuènte nta mostaza k'uengka ijnko chojni nóntqe ch'án. A ntá tío k'uánkí kóyóhe éxi ijnko nta jie. A ntá tí koxroxé xritjaká mé kui va kjuich'éna va káké va chrik'á tí chaon tí nta.

Ch'in Jesús kjuíncheyóexin éxi tí xroan t'ánkixin niotja
(Mt. 13.33)

²⁰ Ntá ntáchro ch'in Jesús inaá kixin:

—¿Nkehe chrokuíntayóaxian tí t'etóan Dios tí kjuachaxin kuènte ch'án? ²¹ Éxi yóhe tí xroan nchek'ánki niotja kjuínkíkjanxin ijnko chojni chjin ini medida harina. A ntá tí ch'o la k'uánkí.

Tí puerta tekahya
(Mt. 7.13-14, 21-23)

²² K'uaúsinka ch'in Jesús kaín chjasin hyé la ko kaín chjasin ntsínsi nkákjako ch'án tí tan jina kixin jehe ch'án ó sátsji ch'án chjasin Jerusalén. ²³ A ntá ijnko nkexro kjuanchankí ch'án kixin:

—Inchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixeenxinrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí inché nchia ts'ikjéhe ch'án tí puerta. A ntá chr'éxin jahará ts'ejorá ntója ts'eyará ts'inkará tí puerta tsontáchrórá kixin: “Tadá, takítjéhe nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Non-ahya nketi k'uinkaxinrá jahará”, tsixro ch'án. ²⁶ A ntá tsjankixinrá tsontáchrórá kixin: “Kjóneni la ko k'uini jnkokóá la ko jaha kjuákoxian tí ntasjinni”, tsixrorá. ²⁷ A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tjtohérá tí janhan sájtirá ókjé kaín tí jahará jínahya kjuích'erá.” ²⁸ Ntaha tsotsjankará la ko sintetaónrá nénorá tí ó ts'ikonrá kixin ch'in Abraham la ko ch'in Isaac la ko ch'in Jacob la ko kaín tí sín k'uéchronkaxin itén Dios mé tjejó sín tí tjen Dios t'etóan ch'án, a ntá jahará la ts'axrjéxinrá ntója ntiha. ²⁹ Tsjixin chojni nó tjtoxin yaon la ko nó tjátóxin yaon la ko nó norte la ko nó sur ntá ts'ejótjixin sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'in Jesús
(Mt. 23.37-39)

³¹ A ntá tí yaon a ikui iso sín fariseo ntáche sín tí ch'in Jesús kixin:

—Sátjixian ntihi kixin ch'in Herodes tjinkaon chrók'óyan ch'án tí jaha —ichro sín.

³² A ntá jehe ch'án kjuátehe ch'án ntáchro ch'án kixin:

—Sájtirá chenkará tí ch'in jínahya ch'ia kixin: “Tjie la ko ntóye tsakítsje nchakuen tí jínahya la ko sintakítjohá chojni nihi jina la ntá tí nixin yaon a ntá tsjixinna tí xra kuèntana,” tsixrorá. ³³ Kjánchó t'ichjánxin kixin naxa sájtija tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uexin ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítará. Imá itsejé veces tjínkavan chrókójnoksotérá la chrók'uáyakonhanrá éxi ijnko cochiká mé t'ayakonhen xjeen va chrínki kanengee va mé xikaha tjínkavan chrók'uáyakonhanrá tí jahará. Kjánchó jahará la tjínkákonyará xikaha. ³⁵ Chrókónohará kixin Dios la tsítóhe ch'án tí jahará la ts'ikonnyará tí janhan tsjixrakájia tí yaon tsontáchrórá kixin: “Jina tí nkexro kjuíxin kjuachaxin ihnjé Inchéni Dios.”

14

Ch'in Jesús kjuínchekitóhe jina ijnko nkexro tsik'atjoyé kuenté

¹ A ntá tí yaon t'ok'éhe sín sákjuí ch'in Jesús ntóe ijnko ch'in fariseo t'etóan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án. ² A ntá ntiha ntói chók'éxin tí tjen ch'án itjen ijnko chojni tsik'atjoyé kuenté. ³ A ntá ch'in Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A siin kjuachaxin sinchekitoheni jina ijnko chojni nihi tí yaon t'ok'éheni o náhi? —ichro ch'án.

⁴ A ntá jehe sín la tání sín. A ntá ch'in Jesús sákjuíko ch'án tí ch'in nihi la kjuínchekitóhe ch'án jina la k'uétuenhen ch'án kixin sátsji ch'án. ⁵ A ntá ntáche ch'án tí sín fariseo kixin:

—Jnkojin tí jahará chontará kolóchoará o koxíntaará chrókjuítsinkáya va tóye ¿á senóhya chrókuaítsjetaónrá va tóye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuátehehya sín kixin xikaha ichro ch'án.

Tí sín tsik'íyehé sín sátsji sín kia tsikótéhe chojni

⁷ Ntá k'uikon ch'in Jesús kixin tí sín tsikóhchina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió jnkojin nkexro ts'iyaha sín kixin tsjasán ijnko kia tsotéhe chojni la tjéyáha tí nta silla kuènte tí sín t'etóan kixin ách'e tsi jnkojin nkexro antsi t'etóan ⁹ a ntá tí nkexro

k'uíyahará yóirá itsi ch'án tsjanchará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuàha sátsjia tsjak'etjaxian tí silla kjuixixín.¹⁰ Íchá jína tió t'yaha sín chrókjuak'etjaxian tí silla tjetuanhya, kixin ntá chrókui tí ch'ín tsík'yaha tsontáχρο ch'án kixin: "Jína tjoni la t'atsínka tjak'etjaxian tí silla antsí náxrjón", kixin ntaha tsjikosáyaha sín nkayakon kaín tí sín ts'ejótjaxínkoa sín ntiha.¹¹ Kixin tí nkexro sinchehnkehe asén kixin imá chrók'uetōan ch'án la mé chr'éxin Dios tsjanjonhya kjuachaxin kixin ts'etōan ch'án. A ntá tí nkexro k'uek'etōanhya la mé chr'éxin Dios tsjanjon kjuachaxin kixin antsí ts'etōan ch'án.

¹² Kjaxin ntáche ch'án tí nkexro tsik'yiehe ch'án kixin:

—Tió tsjásian kia it'o yaon la o tsonjin la t'yieéhya tí sín choxian la ko tí sín kichuá la ko tí sín naxa kjéhya la ko tí sín rico chjino ntōa, kixin jehe sín la chr'éxin ts'yaha sín inaá la xikahó la ó kjuixin kjan tí k'uíyehé sín.¹³ Íchá jína chrók'uíyehé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya.¹⁴ Ntá chrókócháha jaha kixin jehe sín xitjahya ts'yaha sín tsjasin sín kia. A ntá tió tsoxechónjian tí sín jína la mé Dios mé tsjenkáha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

¹⁵ A ntá kuínhin ijnko tí sín tjeótjaxín sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niōtja tí tjen Dios t'etōan ch'án —ichro ch'án.

¹⁶ Ntá ntáχρο ch'ín Jesús kixin:

—Ijnko chojni kjuasin ijnko kia jié ijnko kónjin la k'uíyehé ch'án nchónhya chojni tsi sín tí kia a.¹⁷ A ntá ó kuichjina tí hora sine sín ntá k'uetuenhen ch'án ijnko chojni ch'ehe ch'án xra tsjichenka ch'án kaín tí sín ó tsik'yiehe ch'án kixin chrókóchjina sín kixin ó tjejóchónhen kaín nkehe sine sín.¹⁸ Ntá kaín sín kjuankixin sín chrónòla sín kixin xitjahya tsjiji sín sine sín. A ntá tí ch'ín saoxín kjuitsjehe ch'án ntáχρο ch'án kixin: "Na ntá k'uenani ijnko nontēeni la t'ichjánxin tsjitsjeheni la xitjahya tsjijini tí t'yiehēni ch'án, ntá chénka ch'án kixin chrókóninkakuenhyani ch'án", ichro ch'án.¹⁹ A ntá í jnko ch'ín ntáχρο ch'án kixin: "Na ntá k'uenani in'ó yunta koxinta, a ntá t'ichjánxin tsotsjeheni á jina ch'e va xra, ntá chénka ch'án kixin chrókóninkakuenhyani ch'án", ichro ch'án.²⁰ A ntá í jnko ch'ín ntáχρο kixin: "Na ntá kóteheni, méxra xitjahya tsjijini", ichro ch'án.²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáχρο sín. A ntá tí ch'ín lámo kuínhin ch'án xikaha la ntá kóninkaon ch'án ntá ntáche ch'án tí ch'ín ch'ehe ch'án xra kixin: "Tjoka sátsjia kaín ntia tjájin í la tsjiko ntihi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya", ichro ch'án.²² A ntá chr'éxin ntá kjan tí ch'ín ch'e xra chénka ch'án tí lámo kixin: "Ó kjuínchexiteyáni xikaha kuétueñhēni la kjónté naxa xranka chrókui chojni", ichro ch'án.²³ A ntá tí ch'ín lámo ntáche ch'án tí ch'ín ch'ehe ch'án xra kixin: "Sátsjia kaín ntia jié la ko kaín ntia ntsi la tēuñhēn chojni sín chrókui sín chrók'uíxixenhen nchia ntōna naxa xranka.²⁴ Kixin ntáxrjan kixin nijnko tí sín k'uíyahá senó chrókui sín chrókjone sín tí nkehe chrótjahá sín", ichro ch'án.

Ixra tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuínkátjía ch'án kotónhen ch'án ton ch'án ntáχρο ch'án kixin:

²⁶ —A ntá jnkojin chojni tsotjinkaon tsochréhe tí janhan la antsí má tjeōan chrótjuana sín la kjónté kénhyó chrótjuēhe it'é sín la ko iné sín la ko ichjién sín la ko xjeen sín la ko kichó sín ntōa la ko kichó sín chjin la ko kjónté kénhyó chrótjuēhe asén sín. A ntá náhi la xitjahya ts'óna discípulo kuéntana jehe sín.²⁷ Tí nkexro tsamáhya tí ntacruz kuente sín tsochréhya sín tí janhan la xitjahya ts'óna discípulo kuéntana.²⁸ A ntá jnkojin tí jahará chrókjuich'énará ijnko tjt'ō nteto, zá senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchōxon chrókjuixixín chrók'ónaxín tí tjt'ō a?²⁹ A ntá tió tsjankixínrá sjich'énará tí tjt'ō ntá chr'éxin xitjahya tsjixin sjich'énará, ntá kaín chojni ts'ikon sín tsjanoárá sín³⁰ tsontáχρο sín kixin jaha kjuankixian kjuich'éna, a ntá jje xitjahya sjincheckjixian ts'óna, tsixro sín.³¹ A ntá jnkojin tí ch'ín rey t'etōan tsjanjonko í jnko rey t'etōan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etōan.³² A ntá tí chrókjuachahya ch'án chrókjuanjonko ch'án tí í jnko ch'ín rey, ntá naxá ikjin tjen ch'án la íchá jína chróchr'án ch'án ijnko nkexro tsochronóhehe ch'án kixin chrók'uíxinhya kjuanínkaon.³³ Mé xikaha jnkojin tí jahará tí tsjtoéhyará kaín nkehe ntóahya tjenkayáxinrá xitjahya ts'óna discípulo kuéntana.

Tí xjnta tsik'ánkéhé tí jni
(Mt. 5.13; Mr. 9.50)

³⁴ A ntá jína tí xjnta, kjánchó tí chrók'uánkéhé tí jní la ntá xitjahya chrórókjní inaá. ³⁵ Ntá tí xikaha la ní tí nche xitjahya tsjiko la chrók'ónahya nkehe la chrók'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'in Jesús éxi ijnko kolélo tsik'itjáyán
(Mt. 18.10-14)

¹ Kaín tí sín nchekjènkjé la ko tí sín chóna nchónhya jie kóchjinehe sín tí ch'in Jesús kixin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankixin sín tjonta sín ch'án ntáchro sín kixin:

—Tí ch'in i la kjónté tí sín chóna nchónhya jie la t'ito ch'án la ko neko ch'án —ichro sín.

³ Ntá ch'in Jesús kjuíncheyóexin ch'án ntáchro ch'án kixin:

⁴ —A ntá jnkojin tí jahará, tí chontará ijnko ciento kolélo ntá chrók'uitjayan ijnko va, zá chrók'uitjéhyará tí noventa y nueve va tí nteje ó, a ntá á chrók'uitjéhyará tí ko tsik'itjáyán hasta chrók'uitjájíará va ní? ⁵ A ntá tí ts'itjájíará va ntá tsamárá va tsócháhará. ⁶ Ntá tió tsokjanrá ntógará ntá ts'iyehérá kaín tí sín choxinrá tjórá jína la ko tí sín chjinaxón ntógará ntá tsontácherá sín kixin: “Tsóchéheni ts'ejóni jie kixin ó k'uitjá tí kolélo tsik'itjáyán.” ⁷ Na mé kjaxin xikaha tsotjónkará kixin antsí tsóchéhé kaín tí sín siín nkaya nkajní tió ijnko chojni tsítohe kaín tí jie tsikjenkayáxin ch'án. Ntá kánhyó tsóchéxin tí sín nkaya nkajní kixin tí noventa y nueve chojni jína t'ichjánxienhya chrókuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyán

⁸ A ntá ijnko chojni chjin chóna ite chichaon, a ntá tí chrókjuinçek'itjáyán tjan ijnko tí chichaon a la, zá chrókjuinçek'ákjenhya tjan xrohi kixin chrókjuéyáxin tjan la ko chrók'uanjón tjan tí nchia kixin chrótsjehe tjan jína hasta chrók'uitjájíará tjan? ⁹ A ntá tió chrók'uitjájíará tjan la ts'iyehé tjan kaín tí chojni chjin jína tjo tjan la ko tí sín chjinaxón ntóje tjan la ntá tsontáche tjan sín kixin: “Tsóchéheni ts'ejóni kixin ó k'uitjani tí chichaon kjuínçek'itjáyáni.” ¹⁰ Ntá kjaxin xikaha tsotjónkará kixin imá tsóchéhé kaín tí sín ángel kuente Dios tió ijnko chojni tsítohe kaín tí jie tsikjenkayáxin ch'án.

Ch'in Jesús kjuíncheyóexin ch'án éxi ijnko ch'in kuicháxinhin chichaon

¹¹ Kjaxin ntáchro ch'in Jesús kixin:

—Jnko nkexro chóna yaá xjeen ch'án. ¹² A ntá tí ch'in tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'óhe ch'án tí nkehe chóna ch'án. A ntá tí ch'in tsoyo k'uáyéhé tí nkehe kuente ch'án. ¹³ A ntá kánhyó tsjé yaon chr'èxin tí xjeen ch'án tsoyo kjuínčekjé ch'án kaín nkehe tsik'áyéhé ch'án, ntá sákjuiko ch'án tí chichaon sákjuí ch'án ókjé chjasin kjin. A ntá ntiha kjuínčekjénhen ch'án kaín chichaon chóna ch'án kixin jehya tí jína kjuích'e ch'án. ¹⁴ A ntá tió kjuixin kjuéhe ch'án tí chichaon kuicháxinhin ch'án ntá xrinahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'enxin ch'án kjinta. ¹⁵ Ntá jehe ch'án sákjuíkujéyá ch'án xrá sich'e ch'án. Ntá chjasin ntaha tjen ijnko ch'in kjuanchehe ch'án xrá. Ntá tí ch'in a kjuanjón ch'án xrá ntá k'ugtoan ch'án kixin sátsji ch'án nontee ch'án kixin ntiha ts'ayakonhen ch'án cochino. ¹⁶ A ntá jehe ch'án t'enxin ch'án kjinta ntá tjinkaon ch'án chrórókjé ch'án tí nkehe ine tí cochino kixin ninkexró tí ntiha chrohya tsjanjón nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni siín ntóje t'aná ch'e sín xrá la chóna sín nkehe sine sín. Ntá janhan tjet'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'éni, kjuasinni jie kuítekakuenhya It'éni nkaya nkajní la ko kjuasinhanhi jie kuítekakanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'énani éxi ijnko chojni t'aha xrá”, mé xikaha kjuenkayáxin ch'án tsontáchró ch'án. ²⁰ Ntá kuákja ch'án ntja xrakoa ch'án tí ntóje it'é ch'án.

A ntá kjónté naxa kjin kui ch'án a ntá tí it'é ch'án la ó tsik'ikon ntá kuikonógehé ch'án tí xjeen ch'án. Ntá kuínká ch'án la kjuixinhin ch'án ntja la kjóá ch'án la ko kjóneko ch'án kochíto. ²¹ Na ntá ntáchro tí xjeen kixin: “It'éni kjuasinni jie kuítekakuenhyani Dios la ko kjuasinhanhi jie kuítekakanhyani tí jaha. Tósuèheni tsontáchrúa kixin xjaan tí jeheni”, ichro ch'án. ²² A ntá tí it'é ch'án k'uíyehé ch'án tí sín ch'ehe ch'án xrá ntáchro ch'án kixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjóa. ²³ La ko tjicakjinrá koxintáxjan tsanka la t'oyánrá va kixin sinekoni ch'án tsjasinhinni ch'án kia. ²⁴ Kixin tí xjanna i la éxi ó tsik'en ch'án xikaha ntá jie la éxi ó xechón ch'án la tsik'itjáyán ch'án la ntá jie la ó kónoxin ch'án inaá”, ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án saó la nonte tjech'e ch'án xrá. A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyehé ch'án ijnko ch'in ch'e xrá ntá kjuanchankíhi ch'án kixin nkekuente xikaha sitónhen. ²⁷ A ntá tí ch'in a ntáchro

ch'án kixin: “Kíchuá la ó tsíkjan. A ntá it'á la k'u'et'ogan k'u'én koxintáxjan tsanka kixin jina xikjan ch'án”, ichro ch'án. ²⁸ A ntá tí ch'ín sa'o la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóeh'e ch'án kixin chrók'uixenhen nchia. ²⁹ Kjánchó jehe ch'án kjuát'eh'e ch'án ntáche ch'án it'é ch'án kixin: “Nchónhya nánó t'ahani xra, la xráxín kuít'ekakonhanni kaín nkehe kuétoan la kjuánjonhya nijnko koténts'o chrók'jonekoni tí sín ch'óxinni. ³⁰ A ntá jie ikui tí xjaan i kjuínchek'it'jáyán ch'án kaín nkehe ch'ehé ch'án kjuínchek'it'jáyán ch'án chojni chjin. A ntá jie ikjan ch'án la naxá t'oyán koxintáxjan tsanka”, ichro ch'án. ³¹ A ntá ntácho tí it'é ch'án kixin: “Xjeenni jaha, xráxín t'ejóko kichó ni ntíhi. Kaínxín nkehe kuéntana la kuénta jaha kjaxin. ¿Nkeuente ninkávan? ³² A ntá jie la t'ichjánxin tsjasinhinni kichuá kia tsochéheni kixin éxi tsík'en ch'án la ntá jie la ó tsíxechón, la tsík'it'jáyán ch'án xikaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxi tí ch'ín k'uáyéhe xra la ntá kjuích'ehya xra jina

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó ch'óna ch'án ijnko nkexro ch'jéhe ch'án kjuachaxin kixin ts'et'ogan ts'onen xra. Ntá kui ijnko nkexro chénka tí lamó kixin: “Tí nkexro t'et'ogan nchexénhen ch'án tí nkehe chonta”, ichro ch'án. ² A ntá tí ch'ín lamó k'uáyéhe ch'án tí ch'ín ch'ehé ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuénta tí xra kjuích'e kixin ijie i sích'ehya xra tsétoan ntíhi”, ichro ch'án. ³ A ntá tí ch'ín t'et'ogan tónhen xra kjuenkayáxin ch'án kixin: “¿Nkehe chrók'juit'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nqntee chojni la ko tósuána kixin chrók'uájia chrók'juánchák'á nkehe. ⁴ Ó n'ona nkehe sít'a kixin ntá tsochonta nkexro tsjanjon kjuachaxin tsjak'é nt'ee sín tí í tsochontahya xra sít'a”, ichro tí ch'ín t'et'ogan. ⁵ Ntá k'uáyéhe ch'án jnkojnko jnkojnko tí sín síkéhe tí lám'ee ch'án. A ntá tí ch'ín sa'o kui ntá tí ch'ín t'et'ogan mé kjuanchankíhi ch'án kixin: “¿Nkejain tjasik'éhé lám'g'eni?” ichro ch'án. ⁶ A ntá jehe ch'án kjuát'eh'e ch'án ntácho ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'et'ogan ntácho ch'án kixin: “Ntíhi t'jen xroon tsjénkaxian. A tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkejain tjasiká?” ichro ch'án. Ntá ntácho ch'án kixin: “Ijnko ciento medida noatrigó síkani”, ichro ch'án. A ntá ntácho tí ch'ín t'et'ogan kixin: “Tí xikaha la ntíhi t'jen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'ín lamó kjuát'ogan ch'án kixin kjónté jehya xra jina kjuích'e tí ch'ín t'et'ogan kjuích'ehé ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'íyehé kichó sín, a ntá tí sín ixri tí t'inkaséyan la xikaha chrók'juenkayáxin sín chrók'juích'ia sín, chrók'juenkayáxin sín tí jina.

⁹ Janhan la tétuanhanrá kixin chrók'juích'ia sín ch'íyehé sín ch'íyehé kichó sín, a ntá tí sín ixri tí t'inkaséyan la jehé sín ts'ejóchónhen sín nkaya nkajni ts'áyáhará sín jnkochríxin.

¹⁰ Tí nkexro k'uáyakonhen tí nkehe ch'óna kjónté ts'jehya la kjaxin chrók'juacha chrók'uáyakonhen itsjé nkehe chróch'óna. A ntá tí nkexro kjuachahya k'uáyakonhen tí nkehe ts'jehya ch'óna la kjaxin chrók'juachahya chrók'uáyakonhen tí tsjé nkehe chróch'óna ch'án. ¹¹ Mé xikaha tí xitjahya t'ayakonhénra tí chichaon kuénte chjasintajni ntíhó la, ¿ntá nkexrí chrók'uáyéherá nkehe t'jete chaxín kuénte nkaya nkajni? ¹² Mé xikaha tí kjuachahyará k'uáyakonhénra tí chichaon kuénte ókjé nkexro, ¿ntá nkexro chrót'jáhará jahará tí nkehe chaxín t'jete chrók'uáyakonhénra?

¹³ Nijnko nkexro xitjahya sích'ehé yaá lamó xra kixin ijnko la tsonínkakonhen ch'án la ko tí í jnko tsotjuéhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrók'juích'ehé chojni xra Dios tí tjinkaon sín tsoch'óna sín itsjé chichaon —ichro ch'án.

¹⁴ A ntá tí sín fariseo imá kóxrjínjin sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. ¹⁵ Na ntá ch'ín Jesús ntáche ch'án sín kixin:

—A ntá jahará tjínkáonrá chrók'uejóxínra jina nkayakon chojni. A ntá Dios la ch'óxin ch'án asánra. A ntá tí nkehe imá tóxrjínjin ch'e chojni la Dios la tóxrjénhya ch'án.

Tí ley la ko tí t'et'ogan Dios tí kjuachaxin kuénte ch'án

¹⁶ Naxá kjuakohya ch'ín Juan la k'uékjako sín tí ley kuénte ch'ín Moisés la ko tí nkehe k'uékjin tí sín k'u'échronka itén Dios ósé. A ntá kui ch'ín Juan la chrónka ch'án tí tan jina nkexrí ts'et'ogan Dios tí kjuachaxin kuénte ch'án ntá kaín chojni imá tjínkaon sín chrók'juacha sín chrók'uejó sín tí t'jen Dios t'et'ogan ch'án.

¹⁷ Antsí xrahya chrók'uit'jáyán tí nkehe síin nkajni la ko chjasintajni. A ntá xitjahya kixin chrók'xiteyáha kjónté ijnko nkehe tsí t'et'ogan tí ley.

Ch'in Jesús tjako ch'án kixin chrókjuák'ehya kichó chojni
(Mt. 19.1-12; Mr. 10.1-12)

¹⁸ A ntá ijnko chojni tsjakehe ichjién la ntá tsakja ch'án í jnko chojni chjin la ijje tíha. A ntá tí ch'in tsakja ijnko tjan tsíkítsinkehe la kjaxin ijje tíha.

Tí ch'in rico la ko tí ch'in Lázaro

¹⁹ Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. ²⁰ A ntá ntója ntøe ch'án kjuák'etjaxin ijnko ch'in nòa mé it'in ch'án Lázaro tjanhak'á ch'án la ko níhi ch'án tsíchr'enka kuenté ntøe ch'án. ²¹ A ntá tí ch'in nòa la imá kjuak'e asén ch'án chrókjone ch'án la ko chrókókjeexin ch'án tí nkehe töt'ø tsjixènjinkixin mesa kuènte tí ch'in rico. A ntá tí konja la kjuamá va tí tösóa chónta ch'án. ²² A ntá ijnko yaon mé ik'uén tí ch'in nòa. A ntá tí sín ángel mé sákjuiko ch'án tí náxrjón tjen ch'in Abraham. La ko kjaxin ik'uén tí ch'in k'uériko la sákjuikjavá sín ch'án. ²³ Ntá tjen ch'án tí sátsji tí sín tsík'en tjetjasóte ch'án. Ntá kontá ch'án k'uíkon ch'án kixin ikjín náxrjón tjen ch'in Abraham tjeko ch'án tí ch'in Lázaro. ²⁴ Ntá k'uèya tí ch'in k'uéchénta tsje nkehe ntáchro ch'án kixin: "It'éni Abraham, tikonóana tétuènhén tí ch'in Lázaro kixin sinchekjtaxin ch'án kóhe dedo tja ch'án ìntá ntá tsi ch'án tsjak'etak'á ch'án nejen kixin tsoxruehe kixin tjinahya sóa tí xrohi sín ntihi", ichro ch'án. ²⁵ Kjánchó ntáchro ch'in Abraham kixin: "Xjeenni, xráxinkávan kixin tió kjuák'e chjasintajni na ó k'uayéhé itsje nkehe náxrjón. A ntá ch'in Lázaro mé k'uayéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. ²⁶ A ntá kjaxin jnkosiné tjen tsaka imá jie xitjahya ts'átøye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átøye sín itsji sín ntihi", mé ichro ch'in Abraham. ²⁷ A ntá tí ch'in k'uériko mé ntáchro ch'án kixin: "Ntá xrjanóaha jaha It'éni Abraham kixin tétuènhén tí ch'in Lázaro sátsji ch'án ntøe t'aná ²⁸ kixin ntaha kuitøhe in'ó tí sín kíchiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi", mé ichro ch'án. ²⁹ Kjánchó kjuátehe ch'in Abraham ntáchro ch'án kixin: "Ó chónta sín tí nkehe tsíkjin ch'in Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a", ichro ch'án. ³⁰ Ntá ntáchro tí ch'in a inaá kixin: "Náhi, It'éni Abraham. Chrókójina sáchrókjuitsjehe ijnko chojni tsík'en ntá chrókuiteakon sín chrókuítóhe sín ijje sín", ichro ch'án. ³¹ Ntá ntáchro ch'in Abraham kixin: "Tí tsitekakonhya sín tí nkehe tsintáchro ch'in Moisés la ko tí nkehe tsintáchro tí í so sín tsichronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka inaá", ichro ch'án.

17

Tí kjuaxikaon naça tjasin chojni jie
(Mt. 18.6-7, 21-22; Mr. 9.42)

¹ Ch'in Jesús ntáche ch'án tí sín k'uájiko ch'án kixin:

—Xráxin siín nkehe tsjasixín chojni jie. Kjánchó nòa tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tsjasixín jie ijnko chánjan naça noehya. ³ Tóxakonhanrá kixin xikahya chrókjuasínrá nkehe.

A ntá tí kíchuará chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jína tí xikaha kjuít'ahará ch'án. A ntá tí chrókuiteakon ch'án chrókjuitoxinhin ch'án tí tjenkayáxin ch'án, ntá chrók'uitjáyahanrá tí nkehe kjuít'ahará ch'án. ⁴ Kjónté chrókjuasinhanrá ch'án jie yato veces jnkokóá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjáyahanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Jnko yaon tí sín k'uájiko Ìnchéni ntáche sín ch'án kixin:

—Tjínkítsani kixin ántsi chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjónté intsi chrókuinkáchónkírá tí janhan éxi jíéxin ijnko tje ntsi kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenxáxin jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

⁷ Jnkojin tí jahará tí chróchontará ijnko nkexro t'ahará xra, a ntá tí chrókjanxin ch'án nontáará kjuínchenta ch'án nche ø k'uáyakonhen ch'án tí ko kuéntará, zá chróntácherá ch'án kixin senó chrókjuak'e ch'án chrókjone ch'án? ⁸ Kjá náhi. Kjá chrókuétuènhénrá ch'án kixin senó chrókjuinchechján ch'án tí nkehe sinte la ko chrókóyáxinhin ch'án kixin tsjanjon ch'án nkehe nachrohe chrókjonte la ko chrók'uaia. A ntá tsjixin sinte la ntá tsjak'e ch'án sine

ch'án la ko its'i ch'án. ⁹ ¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuenhénrú ch'án? Kjá náhi. ¹⁰ Mé kjaxin xikaha tí jahará tíó chrókjuixin kain tí xrá k'uétuanhanrá Dios chróntáchrohyará kixin jína kjuich'erá xrá kixin ó jehó tí nkehe k'uítuanhanrá kjuínchexiteyará, tsixrorá.

Ch'in Jesús kjuínchekitohe ch'án jína ite chojni chóna chinlepra

¹¹ Ntá sátsji ch'in Jesús chjasin Jerusalén ntá k'uátsinka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóehéni kain ní —ichro sín.

¹⁴ Ntá k'uikon ch'in Jesús tí jehe sín ikjín tjejó sín ntáche ch'án sín kixin:

—Sátsjirá tjákoherá tí sín nchaj'á kixin ó kuítóhará jína, ichrorá.

Nachrohe sákjuí sín tinkákitóhe sín jína. ¹⁵ Ntá ijnko tí jehe sín tíó kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exin toch'in ch'án chrínkí tóté ch'in Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'in a mé tsíkixin ch'án estado Samaria. ¹⁷ A ntá ch'in Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? ¹⁸ ¿Á jehó tí ch'in i kjónté ikjín tsíkixin ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'in a kixin:

—T'ínkatjen sátsjia. Kixin tí kuítekáván Dios la kuítóha jína —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'in Jesús kixin nkesá tsi tí kjuachaxin kuénte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuénte Dios la me tíha ijnko nkehe xitjahya ts'ikon chojni.

²¹ Xitjahya tsontáchrorá kixin: “Ntíhi tjen,” o “Ntíha tjen,” o “Ntíha tjen”; kixin tí kjuachaxin kuénte Dios itjen jnkosiné tí tjejorá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójin yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchro sín kixin ntíhi tjen ch'án, o ntíha tjen ch'án. Kjánchó sáchrókjuihyará la ko chróchréhyará sín. ²⁴ Kixin éxí ts'ikonrá tsjonkíxín ts'inkaséyanxín kuénté nkajní mé xikaha tsónhen tíó itsi tí Xjeen Dios K'óna Chojni. ²⁵ T'ichjánxin senó tsjasóte ch'án nchónhya la ko tí sín sín jie tsitekakuenhya sín ch'án. ²⁶ Éxí kónhen tí yaon kjuák'e ch'in Noé mé xikaha tsónhen tíó tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'in Noé tí ntabáro ntá k'uániá chrin, a ntá tí sín kuítóhe ntója la kain sín k'uitjáyán sín.* ²⁸ Mé kjaxin xikaha kónhen tí kjuák'e ch'in Lot k'uékjine sín la ko k'uék'i sín la ko k'uék'ena sín nkehe la ko k'uékjincheki sín nkehe la ko k'uék'enka sín nontee sín la ko k'uékjich'ena sín nchia. ²⁹ A ntá tí yaon k'uaxrjéxín ch'in Lot tí chjasin Sodoma, na mé nkajní kuixín xrohi la ko azufre, na mé tíha k'uénxín kain xín tí sín ntíha.† ³⁰ Mé xikaha tsónhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkójin nkexro chrítaón nchia tjejót'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjuí sín ókjé. Kjaxin xikaha jnkójin chojni tjejó sín nontee sín la í chrókjanhya sín ntóe sín. ³² Xráxinkáonrá nkehe kónhen ichjién ch'in Lot.‡ ³³ Tí nkexro tjinkaon kixin kohya nkehe chrókónhen na mé ts'itjáyán. A ntá tí nkexro chrókjuinchek'itjáyánxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejójuá yaá chojni la ijnko la sátsji la ko tí í jnko la tsitóhe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitóhe. ³⁶ Yaá chojni ts'ejóch'e sín xrá nonte, la ijnko la sátsji a ntá ijnko la tsitóhe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsónhen tíha, Inchéni? —ichro sín.

A ntá jehe ch'án kjuátehe ch'án ntáchro ch'án kixin:

—Tí tjen tí cuerpo kuénte chojni tsík'en la mé ntíha tsojnkotsé tí kontexjuen —ichro ch'án.

18

Ch'in Jesús kjuíncheyóxín ch'án éxí ijnko tjan k'án la ko ijnko ch'in juez

* 17:27 17.26-27 Génesis 6.5—7.24 † 17:29 17.28-29 Génesis 18.20—19.25 ‡ 17:32 Génesis 19.26

¹ A ntá ch'in Jesús kjuíncheyóexin ch'án kjuakoxin ch'án kixin jnkochrínin chrónixjehe chojni Dios la ko chrókóxrjéhya sín. ² Ntá ntáche ch'án sín kixin:

— Ijnko chjasin kjuák'e ijnko ch'in juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuitsjehe tjan tí ch'in juez kjuanchia tjan jie ntáchro tjan kixin chrókuitóexin kixin ijnko chojni nínkakohen tjan ntiha. ⁴ Nchónhya veces tjitsjehe tjan tí ch'in juez la chrohya ch'án chrókjuínchekitoexin ch'án. Ntá chr'éxin kjuenkayáxin ch'án ntáchro ch'án kixin: “Kjóté í tsjikosáyahya Dios la ko ninkexró tsjikosáyahya ⁵ a ntá tí tjan k'án jnkoyaxón tjan ch'án tjan jie, la tsjínkitsa tjan tsitóexin tí jie tjan ch'án tjan kixin í jnkoyaxónhya itsi tjan tsochronòta tjan kixin ó kjuixin kónínkavan jie”, ichro ch'án.

⁶ Ntá ntáchro Inchéni kixin:

— Mé xikaha ichro tí ch'in juez jínahya. ⁷ ¿Xá chrókjuínkítsahya Dios tí sín kjueyá ch'án tí chróchronóehje sín ch'án nchakotjin la ko tie? ¿Á tjokahya chrókjuatehe chrókjuínkítsa sín ch'án? ⁸ Ntáxrxan kixin kjá tjoka chrókjuínkítsa sín ch'án. A ntá tíó itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? — mé chro ch'án.

Ch'in Jesús kjuíncheyóexin ch'án éxi ijnko ch'in fariseo la ko ijnko ch'in nchekjénki

⁹ Ntá ch'in Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhi, ichro sín. Ntá ntáchro ch'án kixin:

¹⁰ — Iyó sín ntoa sákjuj nkaxenhen njnko kixin tsonixjehe sín Dios. Ijnko la fariseo la ko ijnko la ch'in nchekjénki. ¹¹ A ntá tí ch'in fariseo tjejin ch'án toté ch'án nixjehe ch'án Dios ntáchro ch'án kixin: “It'éni Dios, kjuasáya tjahá kixin jeheni la chóntahyani jie éxi tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxi tí ch'in nchekjénki tjinhin. ¹² Jeheni la nehanyi iyó yaon jnkojnko semana la ko kjaxin tjanjonni tí chichaon tjaxani tí diezmo kuéntá”, ichro ch'án. ¹³ A ntá tí ch'in nchekjénki la imá kjin kuitóhe ch'án kóxakohen ch'án chrókonta ch'án nkajni la mé chjéhe ch'án ntakuin ch'án ntáchro ch'án kixin: “It'éni Dios tjikonóehéni tí jeheni kixin nchónhya jie chóntani”, ichro ch'án. ¹⁴ Tjonkará kixin tí ch'in nchekjénki tíó kjan ch'án ntoe ch'án la Dios kujkonóehé tí jehe ch'án la kjuimhin ch'án tí jie chóna ch'án, a ntá tí ch'in fariseo la náhi. Kixin kain chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuénte sín.

Ch'in Jesús kjuíncheyoan ch'án chánjan

(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsintí tí tjan ch'in Jesús kixin chrókjuíncheyoan ch'án xjan. Kjánchó tíó k'uikón tí sín k'uájiko ch'án la í kjuanjonhya sín kjuachaxin kixin tsochjinako sín xjan. ¹⁶ A ntá ch'in Jesús k'uiyéhe ch'án sín ntáchro ch'án kixin:

— Tjtohérá chánjan méhe xrakoa tí tjeñ janhan la t'ínkakuènyará xjan kixin tí sín kuénte kjuachaxin kuénte Dios la mé tóyóhe tí jehe xjan. ¹⁷ Ntá chaxin ntáxrxan kixin tí nkexro ts'ónahya éxi ijnko chánjan xitjahya ts'ejó sín tí ts'etóan Dios tí kjuachaxin kuénte ch'án.

Ijnko ch'in ntasoá ríco kjuínixjehe ch'án tí ch'in Jesús

(Mt. 19.16-30; Mr. 10.17-31)

¹⁸ Ijnko ch'in t'etóan kuénte njnko kjuanchankíhi ch'án tí ch'in Jesús kixin:

— Jaha la ijnko maestro jína la, ¿nkehe naxá t'itjáyán chrókjuich'eni kixin chróchóntani kjuachón jnkochrínin? — ichro ch'án.

¹⁹ Ntá kjuátéhe ch'in Jesús ntáchro ch'án kixin:

— ¿Nkeuente ntáchrua kixin jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'uetoan Dios kixin chrókjuacheéhya kichuárá, la ko chrók'oyánhya chojni, la ko chrókueghya, la ko chróntáchrohya nínkeho nkehe chaxínhya kuénte ókjé chojni, la ko chrókjuikosáyehé it'á la ko iná — ichro ch'án.

²¹ A ntá jehe ch'án kjuátéhe ch'án ntáchro ch'án kixin:

— Kain tíha kjuínchexiteyáni desde xjanntsíni — ichro ch'án.

²² A ntá kúinhin ch'in Jesús kain tíha ntá jehe ch'án ntáchro ch'án kixin:

— A ntá jnkokoá nkehe naxá t'itjáyán chrókjuich'e, chrókjuínchekjia kain nkehe chonta la chróchjéhe tí chichaon tí sín nóa. A ntá tí nkehe tjele la tsochonta nkaya nkajni. A ntá tíó tsjixin sínchekitónhén sín nkehe, a ntá tsjihá ntá chréhe tí janhan — ichro ch'án.

²³ A ntá tí ch'in a kúinhin ch'án xikaha la kóxakohen ch'án kixin imá itsjé nkehe chóna ch'án. ²⁴ Tíó k'uikón ch'in Jesús kixin kóxakohen tí ch'in a la ntá ntáchro ch'án kixin:

— Imá xra kixin tí chojni chóna itsjé nkehe chrók'uíxnenhen sín tí tjan Dios t'etóan. ²⁵ Antsí xrahya chrók'uatínka ijnko kocamello ijnko tjar'i ntachica tjejrja, a ntá antsí má xra kixin ijnko chojni chóna itsjé nkehe chrókjuak'e tí t'etóan Dios — ichro ch'án.

²⁶ **A** ntá kuínhin sín kixin xikaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kain tíha —ichro ch'án.

²⁸ **A** ntá ch'ín Pedro ntáchro ch'án kixin:

—Ínchéni, jeheni la ó kuítgheni kain nkehe chóntani kixin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsojtjonkará kixin jnkójnínrá chrókjuítgherá ntqa, la o chrókjuítgherá it'á la ko iná, la o chrókjuítgherá kichuárá, la o chrókjuítgherá ichjiánrá, la o chrókjuítgherá xjaanrá kixin chrókjuich'erá xra kuénte Dios ³⁰ la antsí nkehe ts'ayéherá ntíhi chjasintajni la ko tí chr'éxin la ts'ayéherá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Íje sátsjini Jerusalén. **A** ntá ntaha tsoxiteyá kain tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án. ³³ Tsjate sín ch'án, **a** ntá chr'éxin la ts'óyán sín ch'án. **A** ntá nixin yaon tsoxechón ch'án —ichro ch'án.

³⁴ **A** ntá jehe sín la ninkehó kiexínnya sín tí nkehe níxja ch'án kixin tíha ijnko nkehe naxa tsjachahya sín chrókiexín sín.

Ch'ín Jesús kjuínchekithe ch'án jina ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ **A** ntá ch'ín Jesús tió chjina chrók'uixenhen ch'án chjasin Jericó ntá ntíha chrínta ntja tjetjaxín ijnko ch'ín t'ikonhya tjanchak'á ch'án. ³⁶ Ntá xringhaya kuínhin tí ch'ín t'ikonhya kixin sit'atsínka nchónhya chojni, ntá kjuanchankí ch'án kixin:

—¿Xa nkerí sitónhen? —ichro ch'án.

³⁷ Ntá chénka sín ch'án kixin ch'ín Jesús tsíkixín chjasin Nazaret ts'atsínka ch'án ntíha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjenixian ch'ín David, tikonóghéni —ichro ch'án.

³⁹ **A** ntá tí sín tsitaón ntja la k'uéuñenhen sín ch'án kixin tsojtání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjenixian ch'ín David, tikonóghéni —ichro ch'án.

⁴⁰ **A** ntá ch'ín Jesús ntá ntahó kjuák'echónhen ch'án ntá k'uéuñen ch'án kixin tsjikakjín sín tí ch'ín a. Ntá tió kuikágo sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ínchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítgha jina kixin kuítekávan tí janhan —ichro ch'án.

⁴³ Ntá tuénxín k'uikon tí ch'ín k'uék'ikonhya, **a** ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kain tí sín k'uikon kixin xikaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

¹ **A** ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² **A** ntá ntíha tjen ijnko chojni rico it'ín ch'án Zaqueo, t'etuñenhen ch'án tí sín nchekjénki. ³ Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni siín la xitjahya t'ikon ch'án kixin intsi ch'án. ⁴ Ntá kuínká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús.

⁵ **A** ntá tió k'uátsínka ch'ín Jesús ntíha konta ch'án tí nta ntáchro ch'án kixin:

—Zaqueo, tjoka tjasinkajján kixin ntqa ntahó tsitona jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kain sín k'uikon sín xikaha ntá kjuankixin sín tjonta sín tí ch'ín Jesús, ntáchro sín kixin ntqa ijnko chojni chóna nchónhya jie tsitohé ch'án. ⁸ Ntá ch'ín Zaqueo kjuák'exín toté ch'án ntáche ch'án Ínchéni kixin:

—Jaha Ínchéni, chrókónoha kixin tsjánjuan jnkosiné tí nkehe chonta sintakjtonhan tí sín nòa. **A** ntá tí jnkójnín nkexro kjuít'áyahá kuaáha la noó veces ts'okjanhan sín tí chichaon jie —ichro ch'án.

⁹ A ntá ntácho ch'in Jesús kixin:

—A ntá jie la tsaa' chojni tí nchia i kixin tí ch'in a mé k'uaxrjenixin ch'in Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaa' tí chojni ch'óna jie.

Ch'in Jesús kjuíncheyóexin ch'án éxi ite chichaon imá tjete sínkí

¹¹ A ntá tí chojni síin ntiha nachrohe tjejótinhin sín nkerí tjechro ch'in Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la ách'e ó tuénxin tsi, ichro sín. ¹² A ntá ntácho ch'án kixin:

—Tjen ijnko nkexro tsik'axrjenixin ijnko nkexro imá k'uék'etóan. Ntá sákjuí ch'án ókjé nacióon kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tíó chjina sátsji ch'án ntá k'uúyehé ch'án ite tí sín ch'ehe ch'án xra ntá chjéhe ch'án jnkojnto tí jehe sín jnkojnto chichaon imá tjete sínkí. Ntá k'uetóan ch'án kixin: “Tsjan kixínra' ch'ekoará xra tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakohen sín ch'án, ntá ich'rán sín iso chojni chréhe sín tí sákjuí ch'án tsochenka sín tí sín síin ntiha kixin tjinkakonhya sín tí nkexro a ts'óna rey ts'etueñhen sín. ¹⁵ Kjonté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetóan ch'án xrakoa tí sín ch'ehe ch'án xra, na mé tí sín tsik'áyéhe tí chichaon, kixin tsonohe ch'án nkehe tí xra kjuich'eko sín tí chichaon k'uáyéhe sín. ¹⁶ A ntá tí ch'in xrankixín kóhjjina la ntácho ch'án kixin: “Tí chjíchakjan la kjuachani ite chichaon inaá”, ichro ch'án. ¹⁷ A ntá kjuátehe tí ch'in rey kixin: “Ó nchoxon tí xíkaha jaha la ijnko chojni jina ch'e xra. Jina kjuich'e xra kjonté jehya xra jie ntá tsjánjuan kjuachaxin tsétoan ite chjasin”, ichro ch'án. ¹⁸ A ntá kóhjjina tí ch'in í jnko a inaá ntácho ch'án kixin: “Tí chjíchakjan la kjuachani in'ó chichaon inaá”, ichro ch'án. ¹⁹ A ntá xíkaha inaá kjuátehe tí ch'in rey kixin: “Tsjánjuan kjuachaxin tsétoan in'ó chjasin”, ichro ch'án. ²⁰ A ntá kóhjjina tí ch'in nixin ntácho ch'án kixin: “Tí chjíchakjan la tjinhin. K'uánkintani panitoéni ²¹ kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuénkaxian”, ichro ch'án. ²² A ntá tí rey ntácho ch'án kixin: “Jehya chojni jina ch'e xra jaha. Tí nkehe ntáchrua tsjáncháxian jie. Jaha la ó noha kixin jiena janhan tsákjaá tí nkehe kjuakéhya, ichrua, la ko tsotja tí nkehe kuénkaha. ²³ Ntá nkekuènte kixin chr'anhya tí chichaon ijnko banco chrókjuich'exín xra? A ntá tíó kjan ntona la antsí tsjé chichaon chrók'uayáha tí chrókjuacha kichó chica”, ichro ch'án. ²⁴ A ntá ntáche ch'án tí sín síin ntiha kixin: “Takítsjehérá ch'án tí chichaon tsik'áyéhe ch'án la ntá chjehérá tí ch'in ch'óna ite chichaon”, ichro ch'án. ²⁵ A ntá jehe sín ntácho sín kixin: “¿Nkekuènte chrók'uáyéhe ch'án kixin ó ch'óna ch'án ite chichaon?” ichro sín. ²⁶ A ntá tí ch'in rey kjuátehe ch'án ntácho ch'án kixin: “Kjonté jnkojín nkexro itsjé ch'óna la ts'áyéhe má. A ntá tí nkexro ch'ónahya la kjonté tí ntsí ch'óna ch'án la ts'axrjehe ch'án. ²⁷ A ntá tí sín nínkakkona sín tjinkakonhya sín kixin ts'ónana rey la xrákoará sín ntihi ts'ikónxin kuán ts'ochrínjinrá kja sín.”

Ch'in Jesús k'uixnenen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

²⁸ Tíó kjuixin ntácho ch'in Jesús tíhi ntá chr'in ch'án sátsji ch'án chjasin Jerusalén. ²⁹ A ntá ó kjuíji chjinaxón tí chjasin Betfage la ko chjasin Betania chjinaxón tí jna nchek'in sín Olivo, ntá k'uetuñhen ch'án iyó tí sín k'uájiko ch'án ³⁰ ntáche ch'án sín kixin:

—Sátjirá tí chjasin ntsí chok'èxin ntihi, a ntá tíó tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintankehérá va la tsjúkuanárá va ntihi. ³¹ A ntá tí jnkojín nkexro tsjanchankihará nkekuènte tjasintankehérá va la ntácherá sín kixin: “Inchéni ts'ichjánxinhin va”, tsixrorá.

³² A ntá tí sín k'uituñhen sákjuí sín k'uitja sín éxi ntácho ch'án. ³³ A ntá tíó tjejóttjasintankehe sín va la ntá tí sín inché va kjuanchankíhi sín kixin:

—¿Nkekuènte tjasintankehérá tí kolócho? —ichro sín.

³⁴ A ntá jehe sín kjuátehe sín kixin:

—Inchéni ts'ichjánxinhin va —ichro sín.

³⁵ Ntá sákjuíkohe sín va tí ch'in Jesús, la ntá tí iké sín kjuínchekamá sín va, ntá kjuíták'á ch'in Jesús tí kolócho a. ³⁶ A ntá tinkákji tí kolócho tjejen ch'án la tinkák'ikjínxin sín tí iké sín ntja kixin nátaón tí ka ts'atsínka tí kolocho tjejen ch'án. ³⁷ Ntá tíó kjuíjichjina sín tí chjinaxón tí t'inkajínxin chojni tí jna Olivo, a ntá kaín tí sín kuíteakon tí jehe ch'án chréhe sín kjuankixin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uikónxin kon sín. ³⁸ Ntá ntácho sín kixin:

—Jina tí nkexro Rey kjuixin kjuachaxin ihnjé Dios. Tsjak'e kjuaxróxin nkaya nkajni la ko kjuasáyé Dios tjen nkaya nkajni —ichro sín.

³⁹ A ntá iso tí sín fariseo tjejóyákjan sín í so chojni tjejónxeroan sín ntiha ntácho sín kixin:

—Maestro, tétuénhén tí sín chréhe tí jaha kíxin tsotání sín —ichro sín.

⁴⁰ A ntá ch'ín Jesús kjuátehe ch'án ntáche ch'án sín kíxin:

—A ntá tí sín í tsotání sín la ixro tsotsje —ichro ch'án.

⁴¹ A ntá tío kjujichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kíxin kuítékakonhya sín ⁴² ntáchro ch'án kíxin:

—Chrókuiénxínrá la ko chrókónohará nkexrí chrók'uayèxinrá tí kjuaxróxin, kjánchó jahará kuítékákonhyará. A ntá ó kjuixín k'uátsínka tí kjuaxróxin chrók'uikonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tjat'q ts'antatjen tí chjasin tjejorá ntihi ts'ínkákonhen kíxin xitjahya ts'axrjéxinrá chjasin ntihi kíxin nkuíxín ts'ejó sín ts'ínkákonhanrá sín ⁴⁴ ntá ts'óxíka sín kaín tí tjat'q síin ntihi la ko ts'óyán sín kaín tí chojni síin la ko tsítqehya sín kíxin ninkehó xró naxá ts'ejókjen kíxhó, kíxin jahará kjuátsoanhyará kíxin kuítsejehe Dios tí chjasin tjejorá ntihi.

Ch'ín Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uíxénhen ch'án tí nínko jie, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha. ⁴⁶ Ntá ntáchro ch'án kíxin:

—A ntá ntáchro xroon itén Dios chrónka kíxin: “Tí ntqna i mé it'ín nchia tsonixjanaxián chojni”,* ichro. A ntá jahará tí nchia í tsíkijch'énará itjueé xíchee —ichro ch'án.

⁴⁷ A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchat'á t'etoan la ko tí maestro tjako tí ley la ko kjáxin tí sín t'etoan tí chjasin ntiha kjueyá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kíxin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuakqhe ch'án chojni tí tan jina tsaáxin sín. A ntá kjui tí sín nchat'á t'etoan la ko tí sín maestro tjako tí ley la ko kjáxin tí sín t'etoan kuénte nínko. ² Ntá kjuanchankíhi sín ch'án kíxin:

—Chrónka nkehe tí kjuachaxin chonta kíxin xíkaha ch'e. ¿Nkexro kjuanjón tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kíxin:

—Kjáxin janhan tsjánchánkíhará ijnko nkehe síná nkexrí tsjateherá. ⁴ ¿A ntá nkexro k'uetuénhen tí ch'ín Juan kíxin tsíkíte ch'án chojni? ¿Á Dios ní q chojni ó? —ichro ch'án.

⁵ Ntá kjuankíxin sín tjo sín kíxhó sín ntáchro sín kíxin:

—¿Nkehe chrókjuáteheni? A ntá tí tsontáchroni kíxin Dios tsíchr'án tí ch'ín Juan la ntá tsjanchankí ch'án kíxin nkekuénte kuítékakuenhyani ch'án. ⁶ A ntá tí tsontáchroni kíxin chojni ó k'uetuénhen sín ch'án la ntá kaín chojni tsónínkaon sín la ixro ts'óyánxinni sín kíxin tjenkayáxin sín kíxin ch'ín Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín kíxin noehya sín nkexro tsíchr'án tí ch'ín Juan. ⁸ Ntá ntáchro ch'ín Jesús kíxin:

—Kjáxin janhan tsqrxjankahya nkexro kjuanjón kjuachaxin tjet'á tíhi —ichro ch'án.

Ch'ín Jesús kjuíncheyóexín ch'án éxí tí sín ch'ehya xrá jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús níxjehe ch'án chojni kjuíncheyóexín ch'án ntáchro ch'án kíxin:

—Kjuák'e ijnko chojni k'uénkaxín ch'án nta to uva tí nontqee ch'án, a ntá chr'éxin kjuínchekjen ch'án tí iso tí sín ch'e xrá. A ntá kjuixín ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetuénhen ch'án ijnko nkexro ch'ehe ch'án xrá kíxin tsíkjanchehe ch'án tí sín ch'e xrá nontqee ch'án kíxin tsjanjón sín tí to tónhen ch'án tocar. A ntá jehe sín kjuate sín ch'ín a la ntá k'uínkíté sín ch'án la ninkehó tsíchjéhya sín ch'án. ¹¹ A ntá tí ch'ín nontqee ichr'án ch'án í jnko nkexro ch'ehe ch'án xrá. A ntá kjáxin k'uántaxínhín sín ch'án la ko kjuate sín ch'án la ko kjáxin ninkehó tsíchjéhya sín ch'án inaá. ¹² A ntá tí ch'ín nontqee ichr'án ch'án í jnko nkexro. A ntá tí sín ch'e xrá kjáxin xíkahó tsíkijch'ehe sín inaá, tsík'ínkíté sín ch'án.

¹³ Ntá tí ch'ín nontqee ntáchro ch'án kíxin: “¿Nkexrí chrókjuít'a jie? Tsochr'an tí xjánna imá tjuahá. Ách'e chrókuitekakonhen sín ch'án chróchéntehe sín ch'án kjuasáya”, ichro ch'án. ¹⁴ A ntá kjónté kui ch'án la k'uíkon tí sín ch'e xrá ntá chénka sín kíxhó sín kíxin: “Tí ch'ín i mé

* 19:46 Isaiás 56.7

ts'áyéhe ch'án kaín nkehe kuénte it'é ch'án. Ts'óyánni ch'án káxin jeheni tsitǝgekoni kaín tí nkehe a." ichro sín. ¹⁵ A ntá ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús káxin:

—A ntá tí inché nonte la, ¿nkehe chrǝkjuich'e ch'án káxin xíkaha kónhen tí xjeen ch'án?

¹⁶ Chrǝkui ch'án chrǝkjuinček'itjáyán ch'án tí sín ch'e xǝ káxin xíkaha kjuich'e sín k'óyán sín tí xjeen ch'án, a ntá chrǝkjéhe ch'án í sǝ nkexro chrǝkjuich'e xǝ tí nonte a —ichro ch'án.

A ntá tió kuínhin sín xíkaha ntáchro sín káxin:

—Kjá Dios la xíkaha tjinkaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án káxin:

—¿A ntá nkehe t'axrjexín tí nkehe ntáchro xroon itén Dios ntáchro xíkíhi?:

Tí xǝ náxrjónhya kuitǝnta tí sín ch'éna tǝt'ǝ, a ntá mé jie k'óna tí xǝ tǝtoan.*

¹⁸ A ntá jnkójin chojni tsjitsínka chrítaón tí xǝ í tsǝkuen ch'án. A ntá ts'ánótjen tí xǝ í tsǝxratǝ ijnko chojni la tsǝkuen, ts'óna nche.

Tí xǝ tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí ncha't'á t'etǝan la ko tí maestro tjako tí ley tjinkaon sín chrǝs'é sín tí ch'ín Jesús tuénxin tí hora a káxin ó kónohe sín káxin jehe sín kuakitsjexín tí nkehe nixǝ ch'án. Kjánchó xitǝjaha tsǝts'é sín ch'án káxin chrakǝnhen sín tí chojni síin. ²⁰ Ntá k'uetǝnhen sín chojni tsǝtsáyehé sín ch'án, éxi chojni chóna kjuasáyé ch'án chrǝkjo sín ch'án jnkójina káxin ách'e ichrén nkehe ntoáhya tsonixǝ ch'án. A ntá jina tsǝancháxin sín jie tsjikaán sín ch'án tí tǝn tí ch'ín gobernador. ²¹ Mé xíkaha kjuanchankíhi sín ch'án nkehe, a ntá ntáchro sín káxin:

—Maestro, ó noheni káxin kaín nkehe ntáchrua la ko kaín nkehe tjákua la cháxin ntoá la ko jehya nkexri tsjehe chojni tjenkayáxixián káxin á jina sín, la ntá ntoá tjákua ntǝ Dios. ²² A ntá jie la chrǝnka, ¿á jina chrǝkjuenkeheni tí gobierno romano ǝ náhi? —ichro sín.

²³ A ntá ch'ín Jesús la ó kónohe ch'án káxin ntoáhya tjenkayáxin sín ntá ntáchro ch'án káxin:

—¿Nkeuente chrǝkjuacháxinráni? ²⁴ Tǝákonará ijnko tí chichaon méhe. ¿Nkexro tí tsík'axrjexín tjenkáni tí chichaon í la ko nkexro ihníé chóna méhe? —ichro ch'án.

Ntá kjuátǝhe sín káxin:

—Tí ch'ín t'etǝan mé tjenkáni ch'án —ichro sín.

²⁵ Ntá ntáchro ch'án káxin:

—Chrǝchjehérá tí ch'ín gobierno t'etǝan tí nkehe kuénte ch'án; a ntá tí nkehe kuénte Dios chrǝchjehérá Dios —ichro ch'án.

²⁶ A ntá ninkehó kjuachahya sín kjuacháxin sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátǝhe ch'án la ntá tí sín kjuanchankí la tání sín kohya nkehe ichro sín.

Kjuanchankí sín káxin á tsǝxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuitsjehe sín tí ch'ín Jesús. Kjánchó tí sín saduceo titekakónhya sín káxin tsǝxechón chojni tsík'en. Xíkaha ntáche sín tí ch'ín Jesús káxin:

²⁸ —Maestro, ch'ín Moisés tsíkjin ch'án tí xroon ley ntáchro káxin tió ts'en ijnko chojni la ntá tsitǝhe ichjién, tí chónahya sín xjeen, la t'ichjánxin káxin kichó tí ch'ín tsík'en tsǝtǝhe tí tǝn k'án káxin tsǝchóna sín xjeen sín éxi xjeen tí ch'ín sǝo tsík'en ts'íkon sín.† ²⁹ A ntá k'uéjó sín yato sín jnkokóá kichó sín. A ntá tí ch'ín sǝo la kótǝhe ch'án. Ntá k'uéén ch'án la chónahya ch'án ninkehó xjeen ch'án. ³⁰ A ntá tí ch'ín yóxin kichó ch'án la kótǝhe tí tǝn k'án. Kjáxin k'uéén ch'án chónahya sín xjeen sín. ³¹ A ntá tí ch'ín níxin xíkótǝhe jehe tǝn inaá. Kjáxin xíkaha kayatoé sín. Kaín sín k'uéén sín ninkehó xjeen sín chónahya sín. ³² A ntá kjuixixín kjáxin jehe tǝn ik'uéén tǝn. ³³ A ntá tió tsǝxechón chojni tsík'en, ¿ntá nkexro tí jehe sín ts'óna ichjién tí jehe tǝn káxin yato tí jehe sín kótǝhe tǝn? —ichro sín.

³⁴ Ntá ch'ín Jesús kjuátǝhe ch'án ntáchro ch'án káxin:

—Ntihi chjasintajni tí chojni ntoa la ko tí chojni chjin tótǝhe sín takǝ kichó sín. ³⁵ A ntá tí sín kuítǝkaon sín tí janhan ntá tsǝacha sín tsǝxechón sín inaá la í tsǝtǝehya sín la koí tsǝtǝehya tí xjeen sín. ³⁶ Káxin tí sín a la xitǝjaha ts'en káxin éxi tí sín ángel ts'ejó sín káxin xjeen Dios tí jehe sín káxin Dios kjuínchexechón ch'án sín. ³⁷ Kjáxin ch'ín Moisés tió chrǝnka ch'án kuénte tí nta tjeche kjuínchenoheni ch'án káxin tí sín tsík'en tsǝxechón sín. Ntáchro ch'án káxin Inchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ ³⁸ Tí Dios í la jehya tinkáchónki tí sín tsík'en. Náhi. Tí Dios í la tinkáchónki tí sín tǝjéjochón, la Dios la t'íkon ch'án káxin kaín chojni la síchón —ichro ch'án.

³⁹ A ntá iso tí sín tjako tí ley la ntáchro sín káxin:

—Jina kjuákua la ko jina ntáchrua, Maestro— ichro sín.

* 20:17 Salmo 118.22 † 20:28 Deuteronomio 25.5 ‡ 20:37 Éxodo 3.6

⁴⁰ **A** ntá chrakon sín la í ninkehó kjuanchankíehya sín ch'án.

*¿Xá nkexro tí it'é tí Cristo?
(Mt. 22.41-46; Mr. 12.35-37)*

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David? ⁴² **A** ntá ch'ín David ikjin ch'án tí libro Salmos la ntáchro ch'án kixin:

Ínchéni Dios ntáche tí Ínchéni kixin:

“Tjak'e tjaná chjina ntíhó tsétoan

⁴³ tsjixinjian kaín xín tí sín nínkakonhan la tsjachahya sin ts'etóan sín kixin jahvá mé tsétoan.”[§]

⁴⁴ *¿Xá nkexrí kixin Cristo chrók'óna it'é David, kixin jehe David kuikítexín ch'án Ínché ch'án tí Cristo? —ichro ch'ín Jesús.*

*Ch'ín Jesús kjuanchia ch'án jie tí sín tjako tí ley
(Mt. 23.1-36; Mr. 12.38-40; Lc.11.37-54)*

⁴⁵ Kaín chojni tjejótnihin sín nixjehe ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntasin la ko tjeýá sín silla antsi náxrjón chrók'uejóýá sín nkaxenhen nínko la ko tjeýá sín kixin jina chrók'uejó sín tí sátsji sín kia, ⁴⁷ la ko kjaxin takitsjehe sín ntóe tí chojni chjin k'án. **A** ntá kjuixin kjuich'iyehé sín chojni ntá náxrjón nixjehe sín Dios. **A** ntá jehe sín antsi má sinchekjasóte sín Dios kixin xikaha kjuich'ia sín.

21

*Tí chichaon kjuanjon ijnko tjan k'án nòa
(Mr. 12.41-44)*

¹ **A** ntá tí nkaxenhen nínko ch'ín Jesús k'uikon ch'án kixin tí sín ricó kjuikao sín chichaon chr'áxenhen sín tí ntacajón tjetóxroyéya chichaon. ² **A** ntá kjaxin k'uikon ch'án ikjui ijnko tjan k'án nòa la ntá jehe tjan chr'áxenhen tjan yaá chichaon ntsintí. ³ Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòa tjan kjánchó antsi tjehe sínki tí chichaon kjuanjon tjan kixin kaín asén tjan kjuanjon tjan, **a** ntá tí sín kjuanjon nchónhya la náhi. ⁴ Kixin kaín tí chichaon kjuanjon sín la chichaon síxèhe sín. **A** ntá jehe tjan kjónté nòa tjan na kjuanjon tjan kaín tí chichaon chrókuicháxínhin tjan —ichro ch'án.

*Ch'ín Jesús ntáchro ch'án kixin tí nínko ts'itjáyan
(Mt. 24.1-2; Mr. 13.1-2)*

⁵ Iso sín tjejóto sín kixin nkexrí tsjehe nínko tsík'óna xro náxrjón la ko í so nkehe tsíkjanjon chojni éxi ijnko nkehe chjehe sín Dios. **A** ntá ch'ín Jesús ntáchro ch'án kixin:

⁶ —**A** ntá tsi ijnko yaon tí nínko tjejokomará ntíhi la tsoxíka. **A** ntá tsókohya ninkehó xro ts'ejóksen kichó inaá —ichro ch'án.

*Tí nkehe tsóhnen tí naxa ts'itjáyanhya chjasintajni
(Mt. 24.3-28; Mr. 13.3-23)*

⁷ Ntá kjuanchankíhi sín ch'án kixin:

—Maestro, ¿nkesá tsóhnen tíha? ¿Nkexrí tsóhnen tí tsónoexinni tí nkehe tsóhnen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá tjejóehyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Íje mé tsoxiteýá tsóhnen.” Kjónté xikaha tsontáchro sín la chrókuitekákuenhyará tí jehe sín. ⁹ **A** ntá tío tsinhínrá tsontáchro chojni kixin ó sín kjuanínkaon tjanjónko kichó sín, kjónté xikaha naxa chróchrakonhyará kixin kaín tíha t'ichjánxin ts'atsínka senó tí naxa tsjixixínhya ts'itjáyan chjasintajni —ichro ch'án.

¹⁰ Naxa tjechrónka ch'án ntáchro ch'án kixin:

—Íjnko nación la tsjanjónko í jnko nación la ko ijnko chjasin tsjanjónko í jnko chjasin.

¹¹ Kjaxin imá tjan tsínki nonte la ko tsókjinta la ko tsóníhi chojni nchónhya chjasin, **a** ntá nkajni nchónhya kjuachakon jie ts'ixin ts'ikon chojni.

¹² Naxa ts'atsínkahya tíha la tsónínkakonhanrá sín tsotsérá sín sátsjikoará sín tí nínko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá nina. ¹³ **A** ntá tí yaon xikaha tsóhnen la ts'ixin kjuachaxin

kixin tsochronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsjánjuan kjuaxrexinkaon jina tsonixjárá kixin njnko tí sín nínkakonhanrá xitjahya tsonáchro sín kixin ntoáhya tí nkehe tsjateherá. ¹⁶ Kixin kjónté it'ará la ko kichuárá la ko tí sín kjéhyará la ko tí sín tjórá jina mé sintakjirá sín. Jehe sín ts'óyán sín jnkojínrá. ¹⁷ Kaín chojni chjasintajni tsonínakonhanrá sín kixin tinkachónkirá nina. ¹⁸ Kjánchó xikaha la njnko kaxihó chóna kjárá ts'itjáyanya. ¹⁹ Tí tsjotéhyará tinkachónkirá tí janhan la tsochontará kjuachón jnkochríxín.

²⁰ 'A ntá tió ts'ikonrá kixin kuente chjasin Jerusalén tsík'ántatjen sín soldado ntá tsonoaxínrá kixin í séhya ts'itjáyán tí chjasin a. ²¹ 'A ntá tí sín tjejó sín Judea la t'ichjánxín sátsjixín sín ntiha sátsji sín jnā. 'A ntá tí sín siín chjasin Jerusalén kjaxín t'ichjánxín sátsjixín sín ntiha la ko tí sín tjejó sín nqntee sín la í xitjahya tsokjan sín chjasin. ²² Kixin tí yaon ts'ixín tsjasóte chojni tsoxiteyá tsonhen kaín nkehe nixja xroon itén Dios. ²³ Nòā tí chojni chjin tjejóyá tí yaon a la ko tí sín chóna xjanhnté naxā nchekakí sín. Kixin tí yaon a la ts'ixín kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkojínrá ts'énxínrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótiará kaín tí í so nació. 'A ntá tí sín jehya judío tsjixín ókjé nació tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. 'A ntá chr'éxín tsonáchro ch'án kixin: "La í kohya nkehe tsonhen."

A ntá tió itsi tí Xjeen Dios K'óna Chojni
(Mt. 24.29-35, 42-44; Mr. 13.24-37)

²⁵ 'A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konoté. 'A ntá chjasintajni tsokohya kjuaxróxin kaín nació la ko tsochracon chojni kixin imá tsojna ntayoon. ²⁶ 'A ntá chojni la tsóijnhín sín kixin tsochracon sín tsjenkayáxín sín nkehe tsonhen chjasintajni kixin kaín tí nkehe sínkáni nkajní la tsínkí. ²⁷ Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuj tsíkao ch'án tí kjuachaxin jié kuente nkaya nkajní. ²⁸ 'A ntá tió tsoxrankíxín tsonhen kaín tíha chrókócháhará chrókjuaya kjárá ntá chróntáchrórá kixin kjínhya tjen tí nkexro tsaáxínrá —ichro ch'án.

²⁹ Kjaxín kjuíncheyóexín ch'án í jnko nkehe ntáchro ch'án kixin:

—Tjenkayáxínrá nkexrí siín tí nta t'óna to higo la ko kaín tí í so nta. ³⁰ Tió ts'ikonrá kixin tinkák'ayan kahnté tí nta, ntá tsonoaxínrá kixin í séhya ts'ixenhen nchakuen chrin. ³¹ Mé kjaxín xikaha tió ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuente Dios la ó chjino tjen.

³² Mé chaxín ntáxrjan kixin kaín tíhi tsonhen senó naxā t'enhya chojni tjejó jie. ³³ 'A ntá tí nkajní la ko tí chjasintajni mé ts'itjáyán. 'A ntá tí nkehe ntáxrjan la ts'itjáyanya, tsoxiteyá tíha.

³⁴ Chrókóxakonhanrá chrókjuotéhyará kixin chrókjuichróerá kixin tí imá chrókjónterá la ko tí chrókókoanrá. Kixin tí xikaha la ntá titáya tsi tí yaon la chrók'uejochoényará. ³⁵ Na mé éxi ijnko trampa xrínahya ts'ikjehe mé xikaha itsi tí yaon a, la ko xikaha tsonhen kaín chojni siín chjasintajni tí ts'ejóchoénhya sín. ³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xikaha la ntá tsjinkítsará ch'án tsaará kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'in Jesús kjuák'ekjakoxín ch'án tí njnko ntiha jnkojnko yaon, 'a ntá tie la sákjuí ch'án tí jnā nchek'in sín Olivo, la ntaha kútohe ch'án. ³⁸ 'A ntá kaín chojni kóchjina sín tí njnko jnkojnko nchítjen kixin tsinhín sín tí nkehe tsochronka ch'án.

22

Imó kjuenkayáxín sín nkexrí tsotsé sín tí ch'in Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkíxín niotja na mé tí kia nchek'in sín pascua. ² Ntá tí nchat'á t'etóan la ko tí sín maestro tjako tí ley kjuenkayáxín sín nkexrí chrók'óyán sín tí ch'in Jesús kixin chrakonhen sín tí chojni chjasin ntiha.

³ 'A ntá ch'in Tsochren k'uixenhen asén ch'in Judas, mé kjaxín it'in ch'án Iscariote, mé jehe ch'án ijnko tí teyó tí sín k'uájiko ch'in Jesús. ⁴ Tí ch'in a mé sákjuítsjehe tí sín nchat'á t'etóan la ko tí sín t'etóan kuente njnko, ikjo kichó sín kixin nkexrí tsjikaán sín tí ch'in Jesús. ⁵ Ntá jehe sín kóchéhe sín la ko ntáchro sín kixin tsjenkehe sín tí ch'in Judas. ⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'in Jesús tí kohya chojni.

Kjuixixín kjoneko sín tí ch'in Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxín niotja, 'a ntá t'ichjánxín ts'óyán sín tí kolélo sine sín kuente tí kia pascua. ⁸ 'A ntá ch'in Jesús k'ueuñenhen ch'án tí ch'in Pedro

la ko tí ch'ín Juan kixin sátsji sín sincheyaxín sín tí nkehe sine sín kuènte tí kia pascua. ⁹ Ntá jehe sín kjuanchankíhi sín ch'án kixin:

—¿Nketí tjínkávan sincheyaxínini? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjiá ntá. Chréherá ch'án sátsjirá tí nchia ts'ixenhen ch'án. ¹¹ Tsontácherá tí ìnehé tí nchia kixin: “Ntácho Maestro kixin: ¿Nketí tjen tí cuarto tsjánjuan kjuachaxin tsøyaxín sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jíé tí yóxin piso la ntiha síin nkehe t'ichjánxin, la ntaha sincheyaxínrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxi tsíchronka ch'ín Jesús. Ntá ntiha kjuíncheyaxín sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjaxín sín tí tjen tí mesa. ¹⁵ Ntá ntácho ch'ín Jesús kixin:

—Imá tjínkávan kixin tsjasinni kia sinékianrá tí yaon pascua naxá ts'énhya janhan.

¹⁶ Ntáxrjan kixin sinéhya janhan xikaha inaá tí naxá tsoxiteyáhya tíha tió tsi kjuachaxin kuènte Dios —ichro ch'án.

¹⁷ Ntá kuákja ch'án tí nkehe tjiá ínté to uva ntá chjéhe ch'án kjuasáya Dios ntá ntácho ch'án kixin:

—Tákjára tíhi la its'irá kaín rá ¹⁸ kixin ntáxrjan kixin xík'ikianhyará tí ínté to uva tí naxá tíhya tí kjuachaxin kuènte Dios —ichro ch'án.

¹⁹ A ntá kjuixin ntá kuákja ch'án tí niótja ntá kjuanchehe ch'án kjuasáyé Dios, ntá kóchrít'ó ch'án chjéhe ch'án tí jehe sín ntácho ch'án kixin:

—Tíhi mé cuerpo kuèntana kixin ts'ényákonhanrá. Mé xikaha tsoxráxinkákonxínrá tí janhan —ichro ch'án.

²⁰ Kjaxin xikaha kjuanjón ch'án tí nkehe tjiá ínté to uva tió kjuixin kjóne sín la ntácho ch'án kixin:

—Tí nkehe tjiá tí vaso chronkaxin tí nkehe nixin tsonhen tsoxiteyá kixin tí jnina ts'ítjít'í tsojtjuáxin tí ijjárá.

²¹ Tí nkexro sinchekjina mé tjekjan tí tjen mesa ntíhi. ²² Méxra tí Xjeen Dios K'óna Chojni its'en éxi k'uituenhen; kjánchó nóa tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankíxin sín tjanchankíhi kichó sín:

—¿Xá nkexro sinchekji ch'án? —ichro sín.

Ijko sín kixin nkexro tí imá ts'etóan

²⁴ A ntá jehe sín mé tjo sín kixin nkexro ántsi ts'etóan. ²⁵ A ntá ntácho ch'ín Jesús kixin:

—Tí sín reyes kuènte tí naciones imá t'etóan sín. A ntá tí chojni mé ntácho sín kixin tí sín t'etóan la mé chojni ch'e xra jíina. ²⁶ A ntá jahará xikahya chrókjuich'erá. Íchá jíina tí nkexro imá t'etóan chrók'óna éxi tí nkexro ántsi ntasoá chróchóxin chrók'uituenhen, na mé tí nkexro t'etóan chrók'óna éxi ijnko nkexro ch'exón xra. ²⁷ ¿A ntá nkexro tí ántsi t'etóan, á tí nkexro lámó tjetjaxín tí tjen mesa ntá sine ch'án, ó á ántsi t'etóan tí nkexro kuikao tí nkehe sine ch'án? Náhí. Tí nkexro tjetjaxín tí tjen mesa mé ántsi t'etóan ch'án. Mé xikaha janhan tjénakjánrá éxi ijnko nkexro ch'exón xra tí janhan.

²⁸ Jahará xráxin k'uéjontaxínrá k'uikonrá kaín nkehe náxrjónhya kónna. ²⁹ Méxra janhan tsjánjuan kjuachaxin tsétoanrá éxi chjina T'aná tí tétóan janhan ³⁰ kixin sinterá la ko its'irá tí tsjak'e mesa kuèntana tí tsétoan janhan nkaya nkajni la ko tsétoanrá sinchekitoxénrá tí ijíé kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án (Mt. 26.31-35; Mr. 14.27-31; Jn. 13.36-38)

³¹ Ntá ntácho ìnehéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéhe ch'án tí jahará éxi noatrigo. ³² Kjánchó janhan xrjanóaha T'aná kixin jaha chrók'uitóehya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'ítjáyanhya tinkachónkia tí janhan ntá sinchekéhé kichuárá —ichro ch'án.

³³ A ntá ntácho ch'ín Simón kixin:

—Ìnehéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátehe ch'ín Jesús ntácho ch'án kixin:

—Pedro, ntáxrjan kixin ijie jaí naxá tsjehya kochíntoa sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kíxín:

—Tió kuétuanhanrá sákjuírá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tokate na, zá naxá t'itjáyán ichrén nkehe ní? —ichro ch'án.

Ntá kjuátehe tí jehe sín ntáchro sín kíxín:

—Náhi. Ninkehó nkehe t'itjáyánhya —ichro sín.

³⁶ Ntá ntáchro ch'án kíxín:

—A ntá jie tí nkexro chóna kabolsa la tsakja sátsjiko la ko kjaxín tí nkehe t'inka chichaon. A ntá tí nkexro chónahya chica espada chrókjuinchejki ch'án tí ka t'inkáya ch'án kíxín chrók'ueanaxín ch'án ijnko chica. ³⁷ Ntáxrxjan kíxín t'ichjánxín tsoxiteyá tsona éxi nixja xroon itén Dios ntáchro kíxín: “Éxi yóhe ijnko chojni kjuasin jie mé xíkaha ts'ikon sín ch'án.”* Mé xíkaha kain nkehe chrónka xroon itén Dios kíxín tsona mé t'ichjánxín tsoxiteyá —ichro ch'án.

³⁸ A ntá jehe sín ntáchro sín kíxín:

—Inchéni, ntihi tjejó yáa chica espada —ichro sín.

Ntá kjuátehe ch'án kíxín:

—Kjonté ó táhó la ó nchoxon —ichro ch'án.

Ch'ín Jesús nixjeexín ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'ín Jesús sákjuixín ch'án chjasin Jerusalén sákjuí ch'án ijna Olivo kíxín xíkaha kuénhen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kíxín:

—Nixjehérá Dios kíxín tsjinkítsa ch'án tí jahará kíxín tsjásinhyará jie —ichro ch'án.

⁴¹ Ntá ch'ín Jesús k'uaxrxjenta ch'án tí jehe sín sákjuí ch'án ijnko kjinxín éxi chrók'ue chojni xro. Ntá kjuák'exín toch'in ch'án kíxín tsonixjehe ch'án Dios. ⁴² Ntá ntáchro ch'án kíxín:

—It'éni, tí tjinkávan chrókjuinchekaáni kain nkehe náxrxjónhya chrók'uaatsinkani. Kjánchó jehya éxi tjinkaonni jeheni chrókónhenni. Náhi. Éxi tjinkávan jaha —ichro ch'án.

⁴³ Ntá xrinahya k'uikon ch'án itjen ijnko ángel tsíkixín nkaya nkajni kíxín tsjinkítsa ch'án.

⁴⁴ A ntá imá tóxakonhen ch'án, a ntá ántsi fuerte nixjehe ch'án Dios, ntá k'uixín ch'án ntáchjin éxi yóhe jni xíkaha k'uitji k'uánótjen nonte.

⁴⁵ Ntá tió kjuixín nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kíxín tjejójua tí jehe sín kíxín kjuachahya sín imá t'ává sín.

⁴⁶ A ntá ntáchro ch'án kíxín:

—¿Nkekuénte tjejochrinrá? T'áyará. Nixjehérá Dios kíxín tsjinkítsará ch'án kíxín tsjachroehyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxá tjenixja ch'án ntá xrinahya kui nchónhya chojni yamá chica. Tí ch'ín it'ín Judas, ijnko tí teyo sín k'uájiko ch'ín Jesús, kuitáon ch'án ntiha, ntá kóchjinehe ch'án tí ch'ín Jesús kíxín sineko ch'án kochító. ⁴⁸ A ntá ntáchro ch'ín Jesús kíxín:

—Judas, zá ijnko kochító ó sjnchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uikon sín kíxín xíkaha kónhen ntá kjuanchankíhi sín ch'án kíxín:

—Inchéni, zá chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etqan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kíxín:

—Táhó, tjtóhé, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitóhe ch'án jina. ⁵² Ntá tuénxín ch'ín Jesús ntáche ch'án tí sín nchat'á t'etqan la ko tí sín t'etqan kuénte njnko la ko tí sín t'etqan mé tí sín tsíki sátsjiko sín ch'án ntáchro ch'án kíxín:

—¿Nkekuénte k'uinkakoará chica espada la ko inta éxi chrótsérá ijnko xíchee? ⁵³ A ntá kain yaon kjuak'é janhan k'uejóni kjuákoáxinrá tí njnko ntiha la ninkehó tsehyará tí janhan. A ntá jie mé tí hora kuéntará ntá kjuacha tí kjuachaxin kuénte sítié —ichro ch'án.

Ch'ín Pedro kjuínchemá ch'án kíxín chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án ntqje nchat'á t'etqan. A ntá ch'ín Pedro ikjin tinkáchréhe ch'án. ⁵⁵ A ntá tí ntáxin ntiha kjuaka sín xrohi síxrohe sín. A ntá ch'ín Pedro kjaxín kjuák'entaxín ch'án tí tjejó sín ntiha. ⁵⁶ A ntá ijnko tjachjin ch'e xra

* 22:37 Isaías 53.12

tió k'uikon tjan kixin koí ch'in Pedro tjechjixrohe ch'an ntiha ntá komá tjan tí jehe ch'an ntá ntáχρο tjan kixin:

—Kjaxin tí ch'in i xriko tí ch'in Jesús —ichro tjan.

⁵⁷ Ntá ch'in Pedro kjuínchemá ch'an ntáχρο ch'an kixin:

—¿Nkekuènte xikaha ichrua jaha? Ni chonhya tí nkexro a —ichro ch'an.

⁵⁸ A ntá antsikoá chr'èxin ikui í jnko chojni k'uikon tí jehe ch'an ntá ntáχρο kixin:

—Kjaxin jaha xrikoa tí nkexro a —ichro.

Ntá ch'in Pedro ntáχρο ch'an kixin:

—Náhi, janhya —ichro ch'an.

⁵⁹ Ntá éxi ijnko hora chr'èxin ntá nixja í jnko ch'in chénka tí í so sín kixin:

—Tí ch'in i chaxin xriko tí ch'in Jesús kixin kjaxin tsikjixin ch'an estado Galilea —ichro ch'an.

⁶⁰ Ntá ntáχρο ch'in Pedro kixin:

—Nonahya janhan nkehe tí ntáχροa —ichro ch'an.

Ntá tuénxin naxá tjenixja ch'an ntá xrínahya ó tsje kochíntoa. ⁶¹ Ntá Ìnchéni kuinkátjá ch'an komá ch'an tí ch'in Pedro. Ntá ch'in Pedro xraxinkaon ch'an kixin xikaha tsíchronka Ìnchéni kixin: "Naxá tsotsjehya kochíntoa sínchemána iníya."[†] ⁶² Ntá ch'in Pedro sákjuí ch'an ntója, tsjánka ch'an xraxinkaon ch'an tí jie kjuasin ch'an.

Kjuanoá sín tí ch'in Jesús

(Mt. 26.67-68; Mr. 14.65)

⁶³ Tí sín sákjuíko ch'in Jesús kjuanoá sín ch'an la ko kjuate sín ch'an. ⁶⁴ K'uikjéhe sín ka kon ch'an ntá kjuate sín ch'an ntá kjuanchankíhi sín ch'an kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáχρο sín k'uatáxinhin sín ch'an.

Ntá sákjuíko sín tí ch'in Jesús nkayakon tí sín t'etōan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etūenhen tí sín judío, la ko tí nchat'á t'etōan, la ko tí sín maestro tjako tí ley la sákjuíko sín tí ch'in Jesús nkayakon tí sín imá t'etōan. Ntá ntiha kjuanchankíxín sín ch'an kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'an kjuátehe ch'an kixin:

—Tí tsontáxrjan kixin chaxin janhan na tsitekákonhyará. ⁶⁸ A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjaxin tí tja chjina kuènte Dios chóna kaín xín kjuachaxin —ichro ch'an.

⁷⁰ A ntá tuénxin kaín sín kjuanchankíhi sín ch'an kixin:

—¿Á chaxin jaha tí Xjeen Dios? —ichro sín.

A ntá kjuátehe ch'in Jesús ntáχρο ch'an kixin:

—Chaxin janhan xikaha ntáχροrá tí jahará —ichro ch'an.

⁷¹ Ntá kjo sín kichó sín kixin:

—¿Nkehe tsōnhen naxá chróchronka í so chojni? Jeheni kaín ni kuínhini nkehe k'uaxrxjén ir'va ch'an —ichro sín.

23

Sákjuíko sín tí ch'in Jesús nkayakon tí ch'in Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uinkatjen sín ntá sákjuíko sín tí ch'in Jesús nkayakon tí ch'in Pilato. ² A ntá ntiha kjuankíxín sín t'eka sín jie tí jehe ch'an ntáχρο sín kixin:

—K'uitjani tí nkexro i tjachroe ch'an chojni nación kuénténi ntáχρο ch'an kixin chrókjuenkeehyani tí gobierno romano, la ko kjaxin ntáχρο ch'an kixin jehe ch'an mé Cristo ch'an, na mé ijnko rey tíha —ichro sín.

³ A ntá ch'in Pilato kjuanchankíhi ch'an tí ch'in Jesús ntáχρο ch'an kixin:

—¿Á jaha tí Rey t'etūenhen tí sín judío a ní? —ichro ch'an.

Ntá ch'in Jesús kjuátehe ch'an ntáχρο ch'an kixin:

—Chaxin xikaha ntáχροa jaha —ichro ch'an.

⁴ A ntá ch'in Pilato ntáche ch'an tí sín nchat'á t'etōan la ko tí chojni tsíkikao sín kixin:

—T'itjáhya nijnko jie chóna tí nkexro í —ichro ch'an.

⁵ A ntá jehe sín antsí itsen nixja sín ntáχρο sín kixin:

—Tjachroe ch'an kaín xín chojni estado Judea kixin tí nkehe tjako ch'an. Kjuankíxín ch'an kjuako ch'an estado Galilea, a ntá jie ó kui ch'an ntiha la xikaha tjako ch'an —ichro sín.

† 22:61 Lucas 22:34

Sákjuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xíkaha ntáchro sín ntá kjuanchankí ch'án á tí ch'ín i la á Galilea tsíkixín ch'án. ⁷ A ntá kjuátehe sín kixin ntaha tsíkixín ch'án, ntá k'uetōan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. ⁸ A ntá ch'ín Herodes k'uikon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Pilato kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrók'uaqōxín ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxin ntiha k'uejó tí sín nchat'á t'etōan la ko tí sín maestro tjako tí ley la ntá nchónhya jie k'ueka sín ch'án kixin nínkakonhen sín ch'án.

¹¹ A ntá ch'ín Herodes la ko tí sín soldado kuente ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjehe náxrjón éxi t'inkáya tí sín rey. A ntá tuénxin ch'ín Herodes k'uetōan ch'án kixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuankixin sín tjuèhe kichó sín kixin tí senó la k'uénínkakonhen kichó sín.

K'uetōan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uiyehé ch'án tí nchat'á t'etōan la ko tí sín gobernador la ko káin chojni chjasin ntiha kixin tsjokotsé sín ¹⁴ ntá ntáche ch'án sín kixin:

—Jahará kjuikuánará tí nkexro i ntáchorá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchankíha ch'án itsjé nkehe kuínhinrá ntá k'uikonrá kixin k'uitjahya ninkehó tí jie tékará ch'án. ¹⁵ La ko kjaxin ch'ín Herodes k'uitjahya ch'án tí jie tékará tí ch'ín Jesús ntá chr'án ch'án inaá ntihi. Ó k'uikonrá kixin ninkehó jie chónthaha ch'án chrók'uenxín ch'án. ¹⁶ Sín takjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kía a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xíkaha kuénhen sín ósé. ¹⁸ Ntá káin sín kjuankixin sín k'óyako sín ntáchro sín kixin:

—¡Tí nkexro la náhi! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kixin jehe ch'án la ko i so chojni kónínkakonhen sín tí chjasin ntiha la ko tsík'óyán ch'án chojni. ²⁰ A ntá ch'ín Pilato tjinkaon ch'án chrók'uanjon ch'án kjuachaxin sátsjók'jui ch'ín Jesús. A ntá xíkjanchankíhi ch'án tí chojni sín ntiha inaá. ²¹ Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakénkanirá ch'án ntacruz! —ichro sín.

²² Nixin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuíche ch'án? Janhan la k'uitjahya ninkehó jie chónthaha ch'án chrók'uenxín ch'án. Sín takjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrók'uaen'enkáni ch'án ntacruz. A ntá k'óyako sín la ko k'óyako tí sín nchat'á t'etōan ntá kjuacha sín kjuanchia sín tí nkehe tsonhen. ²⁴ A ntá ch'ín Pilato kjuanjon ch'án kjuachaxin xíkaha tsonhen tí nkehe kjuanchia sín. ²⁵ A ntá kjuanjon ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uijkéhe sín kixin k'uekje ch'án kjuánkaon la ko k'uek'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxi tjinkaon sín.

Kjuak'enkani sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuiko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkixín chjasin Cirene it'ín ch'án Simón, mé kjuixín ch'án nqntee ch'án, ntá kjuínchekamá sín ch'án tí ntacruz tsjak'enkani ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkamá sín ch'án. ²⁸ Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjaanrá. ²⁹ Kixin itsi yaon tsonáchorá kixin náxrjón tí sín chónthaha xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankixin chojni tsonáche sín tí jnq kixin tsoxrátja sín la ko tsonáche sín tjo kixin tsjavá sín. ³¹ Kjónté tí nta yoa la ó sitónhen káin tihí la íchá tió chróxámá tí nta la ¿nkehe tí kaá chrókónhen tí nta tsixámá? —ichro ch'án.

³² Kjaxin sákuuko sín iyó sín tsíkjasin jie kixin ts'óyánko sín ch'ín Jesús. ³³ Ntá tió kjuíji sín tí jna tikitexín sín tí jna Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín ch'óna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin. ³⁴ Ntá tió kjuixín kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkáuènhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikeye sín iké ch'án ch'exín sín suerte kixin tsonoxén sín nkexro tsakja tí ka a. ³⁵ Kaín chojni chjasin ntiha tjejótsjehe sín kixin xikaha sitónhen la ko kjaxin tí sín t'etgoan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókuínchekaá ch'án asén ch'án tí chaxín jehe ch'án tí Cristo tí nkexro tsíkjeýá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrxónhja chjéhe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókuínchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntáchro kixin: “Tíha mé Rey kuènte tí sín judío”, ichro.

³⁹ Ijnko tí sín ch'óna jie tjenkani ntacruz k'uántaxínhin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókuínkajian asán, ntá tsjixín ntá chrókuínkajian tí jeheni —ichro ch'án.

⁴⁰ A ntá tí ch'ín jnko a k'uètuènhen tí í jnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejótsjásoteni? ⁴¹ Yóini na nchoxon tjejótsjásoteni tjejótsjenkani tí jie kjuasinni. A ntá tí nkexro í ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétoan jaha —ichro ch'án.

⁴³ Ntá kjuátéhe ch'ín Jesús ntáchro ch'án kixin:

—Chaxín ntáxrxjan kixin ijie jaí ts'ejóko kichó ni nkaya nkajni —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uixin tie kuènté chjasintajni hasta las tres kónjin. ⁴⁵ Ik'uén yaon, la ko tí ka t'inkáuènxín nkaxenhen njnko k'uichje jnkosiné. ⁴⁶ Ntá ch'ín Jesús k'uèya ch'án itsen ntáchro ch'án kixin:

—It'éni tjen nkaya nkajni, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie ch'ónahya —ichro ch'án.

⁴⁸ A ntá kaín tí chojni tsikójnkotsé ntiha k'uikon sín xikaha kónhen ntá sákjuixin sín ntiha chrakon sín tjate sín ntaquin sín kixin xikaha kónhen. ⁴⁹ A ntá kaín tí sín ch'ón ch'ín Jesús la ko kjaxin tí chojni chjin k'uèkinkáchónki sín ch'án tsíkixín sín estado Galilea ikjin tjejó sín tjejótsjehe sín nkerí sitónhen.

Sákuikjavá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'ín José, chjasén ch'án mé Arimatea estado Judea. Kjaxin jehe ch'án ijnko tí sín imá t'etgoan kuènte tí sín judío, jehe ch'án mé ijnko nkexro jína. ⁵¹ Jehe ch'án kjuak'echónhen ch'án itsi tí kjuachaxin kuènte Dios. Méxra kórxjénhja ch'án nkexri kjuích'e tí sín í so t'etgoan. ⁵² Méxra sákjuítsjehe ch'án tí ch'ín Pilato kjuikjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin. ⁵³ Ntá sákjuí sín tsjinkajinxín sín ch'án ntacruz. Ntá kjuixín kjuinkajin sín ch'án ntá kjuínchek'ísímá sín ch'án ijnko ka jie, ntá sákjuiko sín tsoxravá ch'án ijnko tòye xráxín tsíkij'héna ch'ín José jehó tjó la ko naxá ninkexró tsíxraváhya ntiha. ⁵⁴ Kaín tíha kónhen tí yaon viernes kónjin. Tí yaon mé tjejóyaxínhin sín kixin í séhya tsoxrankixin tí yaon t'ok'éhe sín sábado kixin kohya kjuachaxin sích'e sín ninkehó xra.

⁵⁵ A ntá tí chojni chjin nkáchréhe kjuikoxín ch'ín Jesús estado Galilea kjaxin sákjuiko sín sákjuítsjehe sín tí tòye tsoxravá ch'án la ko k'uikon sín jína nkexri kjuak'e sín tí cuerpo kuènte ch'án. ⁵⁶ A ntá tió kjan sín tí nchia tjejó sín k'óyaxínhin sín kjuéyá sín xroan xraxé náxrxón itsa ntóé ch'án kixin xikaha k'uèkinkáchónki tí sín judío. A ntá t'ok'éhe sín tí yaon sábado éxi t'etgoan tí ley.

24

*Ó xechón ch'in Jesús**(Mt. 28.1-10; Mr. 16.1-8; Jn. 20.1-10)*

¹ Tí yaon domingo, mé tí yaon xrankixixín semana tí chojni chjin na xikjan sín inaá tí tsixravá ch'in Jesús sákjuiko sín xroan xraxé tsik'ena sín. La ko í so chojni chjin sákjuikotoxin sín. ² Ntá ó kjuíji sín ntiha k'uikon sín tí xro tsikjèxín tí tòye la í xikahya tjen tí sákjuí sín. ³ Ntá k'uixenhen sín tòye ntá k'uitjahya sín cuerpo kuente Ìnchéni Jesús. ⁴ Ntá chrakon sín ntá noehya sín nkehe sich'e sín. Ntá xringhya k'uikon sín iyó chojni ntoa tjejóxin tqté chjinaxón tí tjejó sín, la iké sín la tjákiní tsjehe. ⁵ A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuente xritjéyará tí nkexro tjechón tí siín tí sín tsik'en? ⁶ Tjenhya ch'an ntihi la ó xechón ch'an. Xráxinkáonrá nkehe ntáchro ch'an tí kjuák'e ch'an estado Galilea ⁷ ntáchro ch'an kixin jehe ch'an tí Xjeen Dios K'óna Chojni t'ichjánxin tsotsé tí sín chóna jie tsjak'enkanı sín ch'an ntacruz la ko tí nixin yaon tsoxechón ch'an inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'in Jesús, ⁹ a ntá tíó kjanxin sín tí tsixravá ch'an ntá chénka sín tí tejnko tí sín k'uék'ajiko sín la ko kaín tí í so sín. ¹⁰ A ntá tí sín sákjuichenka tí sín apóstol la mé tjan María Magdalena la ko tjan Juana la ko tjan María iné ch'in Jacobo la ko tí í so chojni chjin. ¹¹ A ntá tí sín apóstol kuínhin sín éxi ijnko nkehe chaxínhya tí nkehe chrónka tí jehe sín ntá kuítekakonhya sín.

¹² Kjánchó ch'in Pedro k'uaxrjéxín ch'an nchia tinká ch'an sín sákjuitsjehe ch'an tí tsikjixravá ch'in Jesús. Ntá kjuíji ch'an k'uikon ch'an tí nkaxenhen tòye k'uikon ch'an kixin jehó tí ka tsik'isimá ch'an ntaha tjen. Ntá kjan ch'an tí nchia tjen ch'an chrakon ch'an kixin xikaha tsikónhen.

*Tí ntia Emaús sákjuí sín la kjuíjichréhe Ìnchéni**(Mr. 16.12-13)*

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjinxin tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsikónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'in Jesús kóchjinehe ch'an tí jehe sín sákjuiko sín ch'an. ¹⁶ Kjonté k'uikon sín ch'an la kjuanjonyha Dios kjuachaxin kixin chrókjuatsqan sín tí jehe ch'an. ¹⁷ A ntá ch'in Jesús kjuanchankíhi ch'an sín ntáchro ch'an kixin:

—¿Nkehe tí tinkakjórá tí k'uinkará ntja? ¿Nkekuente kixin t'avará? —ichro ch'an.

¹⁸ A ntá ijnko tí jehe sín mé it'in Cleofas, mé kjuátehe ch'an kixin:

—Kaín chojni ó nohe sín nkehe tí tsikónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsikónhen tí yaon a ní? —ichro ch'an.

¹⁹ A ntá jehe ch'an kjuanchankíhi ch'an tí jehe sín kixin:

—¿Xá nkehe tsikónhen? —ichro ch'an.

Ntá chénka sín ch'an kixin:

—Tí nkehe tsikónhen ch'in Jesús tsikjixín ch'an chjasin Nazaret. Jehe ch'an na ijnko nkexro k'uéchronka itén Dios, na mé kjuakoxín ch'an kjuachaxin kuente nkaya nkajní kaín tí nkehe k'uékjich'e ch'an la ko kaín nkehe k'uéntáchro ch'an mé xikaha k'uikon Dios la ko k'uikon sín chojni. ²⁰ A ntá tí nchat'a t'etqan la ko tí sín gobiernu kjuínchek'áyéhe sín ch'an kixin its'en ch'an la tsjak'enkanı sín ch'an ntacruz. ²¹ A ntá jeheni k'uejóchónhenni kixin jehe ch'an chrókjuíncheká ch'an tí sín Israel. A ntá jie ó chóna iní yaon xikaha kónhen. ²² A ntá iso chojni chjin kjaxin k'uékinkáchónki sín ch'an kjuínchekhrakon sín tí jeheni kixin jehe sín tsikjitsjehe sín tí tsixravá ch'an imá nchítjén ²³ la mé tsik'itjahya sín tí cuerpo kuente ch'an, ntá kjan sín chrónka sín kixin tsik'ikon sín iyó sín ángel chrónka sín kixin ch'in Jesús la tjechón ch'an, ichro sín. ²⁴ Ntá tuénxin iyó tí sín k'uájikoni kjaxin sákjuitsjehe sín tí tsixravá ch'an la kuik'itja sín éxi chrónka tí chojni chjin, kjánchó ch'in Jesús la k'uikonhya sín —ichro tí yaá sín a.

²⁵ Ntá kjuátehe ch'in Jesús ntáchro ch'an kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uejó ósé. ²⁶ ¿Xá t'ichjánxinhya chrókjuasóte Cristo senó ntá chrók'uyéhe ch'an tí kjuachaxin chrók'uetqan ch'an? —ichro ch'an.

²⁷ Ntá kjuankixin ch'an chronkaxín ch'an nkexrí t'axrjéxín kaín tí nkehe nixja xroon itén Dios kixin nkehe tsonhen tí jehe ch'an la mé kjuankixixín ch'an chronkaxin ch'an tí nkehe tsikjin ch'in Moisés la ko kjuintaxín chronkaxín ch'an tí nkehe tsikjin tí í so sín profeta.

²⁸ Ntá kjuíji sín tí chjasin ntsí a, a ntá ch'in Jesús tsjehe ch'an éxi naxá sáchrókjui ch'an kjin. ²⁹ A ntá jehe sín mé chronóhehe sín ch'an kixin ntahó chrókuitqhe ch'an, ntáchro sín kixin:

—Titqha ts'ejóni ntihi kixin ntá ó kóntó la ó ts'ixitie —ichro sín.

Ntá ch'in Jesús la k'uixenhen ch'an nchia kixin tsitqeko sín ch'an. ³⁰ A ntá tjejótxajínko sín ch'an tí tjen tí ntamesa, ntá ntiha xranjon nkehe sine sín, ntá kuákja ch'an tí niqtja

la kjuanchehe ch'án kjuasáyé Dios la kóchrít'o ch'án kuákja tí jehe sín. ³¹ Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kíchó sín ntáchro sín kixin:

—¿Á chaxínhya chéhe asénni tí kuikaooni ch'án ntja kixin chronkaxín ch'án nkexrí t'axrxjén tí itén Dios tsíkjin sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokóá tjejó sín la ko tí i so sín. ³⁴ A ntá tí sín ntíha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsikónhen tí ntja sákjuí sín kixin nkexrí kjuátsoanxín sín tí ch'ín Jesús tí kóchrít'o ch'án niotja kjuanjon ch'án.

Titáyá k'uikuén sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naxá tjejóto sín kaín tí nkehe tsikónhen, a ntá xrínahya ch'ín Jesús kjuák'e jnkošiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejórá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uikon sín ijnko xrintoe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkeuente chrakonrá? ¿Nkeuente xikaha tjenkayáxin asánrá? ³⁹ Tsjehérá tjaná la ko totená kixin chaxín janhan. Itserána la ko komárana, kixin ijnko xrintoe chojni chóntahya nto la ko chóntahya hueso éxí t'ikonrá kixin chonta janhan —ichro ch'án.

⁴⁰ A ntá xikaha ichro ch'án ntá kjuako ch'án itja ch'án la ko toté ch'án. ⁴¹ Ntá kjónté xikaha k'uikon sín la naxá kuitekakhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntíhi ní? —ichro ch'án.

⁴² Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjá tsjen.

⁴³ A ntá jehe ch'án kuákja ch'án kjóne ch'án k'uikonxín kon sín. ⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxá k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án. ⁴⁷ A ntá t'ichjánxin tsjakoxin sín ihnié ch'án tsjankixixin sín chjasin Jerusalén la ko chrókuinhin chojni kuenté chjasintajni kixin chrókuiftohe sín ijje sín chrókuitekaon sín tí jehe ch'án kixin jehe ch'án mé chrókjuincheyaon tí ijje sín. ⁴⁸ A ntá jahará mé tsochronkaxínrá kixin xikaha k'uikonrá kaín tíha. ⁴⁹ Ntá tsochr'an janhan tí Nchakuen T'aná éxí tsintáchro ch'án. Kjánchó chjasin Jerusalén ntahó titohará tsoxiteyája ts'ayéhérá kjuachaxin tsjixín nkaya nkajni.

Ch'ín Jesús sákjuí ch'án nkaya nkajni

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrxjén sín chjasin Jerusalén sákjuí sín chjasin Betania. Ntá kjuáya ch'án tja ch'án kjuincheyaon ch'án tí jehe sín. ⁵¹ A ntá kjuixin kjuincheyaon ch'án sín ntá k'uaxrxjenta ch'án tí jehe sín ntá sákjuí ch'án nkaya nkajni. ⁵² A ntá jehe sín k'uikon sín xikaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen njnko tjanchehe sín Dios kjuasáya. Amén.

Tí tan jína chrónka ch'in Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxá k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xrankíxixín na mé tí nkexro xráxín kjuák'eko Dios ³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án. ⁴ Jehé ch'án na mé kjuanjon kjuachaxin kaín nkehe síhón síin chjasintajni la ko jehé ch'án mé xrohi t'inkaséyanxínhin jnkójnko ntje chojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'ánka tí xrohi a, kjánchó kjuachahya k'ók'ánka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a. ⁸ A ntá tí ch'in Juan la jehya tí xrohi a. Ó k'uituēnhón ch'án kui ch'án kixin tsochrónka ch'án nkerí kuènte tí xrohi a. ⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxá kjuátsoanhya sín ch'án. ¹¹ Ikui ch'án tí tjejó tí sín judío k'uaxrjeníxín ch'án, kjánchó kuítekakuenhya sín ch'án. ¹² A ntá tí sín kuítekaon sín ch'án mé k'uáyéhe sín kjuachaxin kixin ts'óna sín xjeen Dios. ¹³ Ntá yóehya ts'axrjeníxín sín it'é sín chjasintajni ntíhyó la ko yóehya ijnko it'é chrókuēnkayáxín ch'án chrókuich'éna ch'án ijnko xjan. Náhi. Dios mé kjuéyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuéhé ch'án chojni chjasintajni la ko imá ntoá chrónka ch'án. Kuayeni k'uikonní kixin imá t'etoan ch'án kixin jehé ch'án mé tí jnkokoáxón Xjeen It'éni tjen nkaya nkajni na mé xíkaha imá t'etoan ch'án.

¹⁵ Ch'in Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjákohará kixin chr'éxín tsi tí nkexro a, na mé antsí má t'etoan ch'án, a ntá janhan la náhi kixin tí janhan naxá kohyana la tí jehé ch'án la ó xráxín tjen ch'án —mé xíkaha chrónka ch'in Juan.

¹⁶ Kaínni ó k'uáyéheni tí kjuachaxin jie tjetjanjon ch'án la ko antsí má tjencheyaonni ch'án la ko tjencheyaonni ch'án. ¹⁷ Dios mé tsík'etuenhen ch'in Moisés kixin tsokjin ch'án tí ley. A ntá Ínchéni Jesucristo mé kjuákoxín ch'án kixin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé antsí ntoá. ¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehé ch'án mé ó kjuínchekónoheni ch'án nkexrí tjen It'é ch'án nkaya nkajni.

*Ch'in Juan mé chrónka ch'án nkexrínchi tjen ch'in Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuínixjehé sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

²¹ Ntá xíkjanckankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'in Juan la xíkjatéhe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanckankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'in Juan inaá kixin:

—Náhi. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsohoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátéhe ch'in Juan ntáchro ch'án kixin:

—Janhan mé tí nkexro tsjak'e nteje ts'èya tsoxrxanka kíxin: “Takitjehérá ijnko ntjá ntoi tsixín Inchéni” —mé xíkaha ichro ch'án kjuátexín ch'án itén ch'ín Isaiás k'u'échronka xroon itén Dios ósé.*

²⁴ A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan. ²⁵ A ntá kjuanchankíhi sín ch'án kíxin:

—Ó ntáchrúa kíxin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'u'échronka itén Dios ósé. ¿A ntá nkekuénté tikíte chojni tí xíkaha? —mé ichro sín.

²⁶ Ntá ntáchró ch'ín Juan kíxin:

—Janhan na mé intá ó tikítexián chojni. Ó ntihi tjenkákjan ijnko nkexro naxa jtásoanhyará. ²⁷ Jehe ch'án mé tsi ch'án nóton tí janhan. A ntá antsí má t'etóan ch'án, a ntá janhan na kénhyó. A ntá tósuána chrókjuasíntanka tí correa tokaté ch'án —ichro ch'án.

²⁸ Kaín tíha mé tsíkónhen tí chjasin it'ín Betábara tí nó tjtóxin yaon tóhe tí ntárió Jordán tí kjuák'e ch'ín Juan kuikíte chojni.

Ch'ín Jesús na mé éxi yóhe ijnko kolélo kuènte Dios

²⁹ A ntá tí yaon chr'éxin mé k'uíkon ch'ín Juan kíxin ó tjekui ch'ín Jesús. Ntá nixjehe ch'án tí sín tsíkóhina ntáchró ch'án kíxin:

—Tsjehérá tí nkexro tjekui mé tí Kolélo kuènte Dios jehe ch'án. Tíha mé tsjínxin ijíe chojni chjasintajni. ³⁰ Janhan mé k'uéxrxanka kíxin tí iton tí janhan mé tsíchréhe ijnko nkexro antsí t'etóan, a ntá janhan la kénhyó tétóan kíxin naxa kohyana na jehe ch'án la ó xráxin tjen ch'án.

³¹ Kjaxín janhan naxa chonhya nkexro tíha. A ntá xra ó k'uínka kjuák'é kuikítexián chojni intá kíxin tí chojni nacióan Israel mé chrókjuátsoanxin sín ch'án —ichro ch'ín Juan

³² Kjuintaxín ntáchró ch'ín Juan kíxin:

—Ó k'uíkuan kíxin tí Nchakuen Dios mé k'uínkajinxín nkaya nkajni na éxi yóhe ijnko kntóá k'uínkajin la ko kjuák'e va ntoi tí tjen ch'án. ³³ A ntá janhan kjaxín naxa chonhya nkexro tíha. A ntá tí nkexro k'uetuanna kíxin tsjak'é tsíkítexián chojni intá mé tsíchrónka ch'án kíxin tí Nchakuen Dios mé ts'inkajin tsjak'e ntoi tí tjen ijnko chojni na mé tsjatsóanxián janhan kíxin tí nkexro a mé tsíkítexín ch'án Nchakuen Dios chojni. ³⁴ A ntá janhan jie mé ó k'uíkonxin kuan kíxin xíkaha kónhen tí jehe ch'án, a ntá xrxankaxián kíxin táha mé Xjeen Dios tíha —mé xíkaha chrónka ch'án.

Tí sín sqoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án, ³⁶ a ntá xrináhya k'uíkon ch'án k'uátsínka ch'ín Jesús. Ntá ntáchró ch'ín Juan kíxin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjá ch'ín Jesús k'uíkon ch'án kíxin tinkáchréhe sín ntá kjuanchankíhi ch'án sín kíxin:

—¿Xá nkehe xritjéyará? —ichro ch'án.

Ntá ntáchró sín kíxin:

—Maestro, ¿xá nketí nchia itjen? —ichro sín.

³⁹ Ntá kjuátéhe ch'án ntáchró ch'án kíxin:

—Intá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjóko sín ch'án kuénté tí kónjin kíxin kjuíji sín ntiha como las cuatro kónjin.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'ín Andrés. Jehe ch'án chóna ch'án ijnko savé mé it'ín Simón Pedro. ⁴¹ Na ntá tuénxin tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kíxin:

—Ó k'uitjani tí nkexro Mesías —ichro ch'án. Tíha mé t'axrxéxin kíxin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchró ch'án kíxin:

—Jaha mé Simón, it'á mé it'ín Jonás. Ntá jie sjíntak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrxéxin kíxin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjuí ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kíxin:

—Chréhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'ín Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjeýá ch'án tí ch'ín Natanael na ntá chénka ch'án kíxin:

* 1:23 Isaiás 40.3

—Ó k'uitjani tí nkeexo tsi éxi k'u'échrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'u'échrónka tí itén Dios chr'éxin mé k'u'échrónka sín kixin itsi tí nkeexo a. Na ntá ó k'uitjani ch'án na mé jehe ch'án mé it'ín Jesús, la it'é mé it'ín José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrxéjin tí chjasin Nazaret a? —ichro ch'án. Ntá kjuátéhe ch'ín Felipe ntáchro ch'án kixin:

—Xrákiá ts'íkuan —ichro ch'án.

⁴⁷ Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankihi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátéhe ch'ín Jesús ntáchro ch'án kixin:

—Naxá nixjáahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuñhén tí nación Israel —ichro ch'án.

⁵⁰ Ntá kjuátéhe ch'ín Jesús ntáchro ch'án kixin:

—Jehya tí nkehe ntáxrxan k'uíkuan tjenkankiá nta t'óna to higo, jehya táhó tsítékákonxian. Náhí. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsöxrxanka kixin tsoxitjehé tí nkajní ts'ikonrá itsi itsjé tí sín ángel kuente Dios mé ts'it'óñen la ko ts'inkajin tí tñen janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsik'iyehé sín tjan la ntiha tjen tjan koí. ² Kjaxin tsik'iyehé sín tí ch'ín Jesús la ko tí sín k'uájiko ch'án kixin sátsji sín tí tsikótehe sín ntiha. ³ Ntá ó tsik'ankehé sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsik'ánká xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsöñhen chrónka? Naxá kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetuanhanrá ch'án chrókjuinchesitheyará —ichro tjan.

⁶ A ntá sín ntiha injon chí tsik'óna xro na mé tíha tjá ntá t'ònti sín kixin xikaha mé ts'axrjehé tí jié chóna sín koí, mé xikaha kuinkáchónki tí sín judío. Na mé jnkojnko chí mé tjacha tikia ochenta litro la o ciento litro ntá. ⁷ Ntá k'uetuñhen ch'ín Jesús tí sín ch'e xra kixin:

—Tikjará ntá kaín tí chí a tsókaón —ichro ch'án.

Ntá kjuínchesitheyá sín kjuínchekaón sín ntá jnkojnko tí chí a. ⁸ A ntá ntáche ch'ín Jesús tí jehe sín inaá kixin:

—Tákiá intsí nta tjá chí tjikuehé tí ch'ín t'etqan tí kia a —ichro ch'án.

Ntá xikaha kjuich'e sín kjuínchesitheyá sín. ⁹ A ntá tí ch'ín t'etqan tí kia a mé tsjexín ch'án tí ntá tsik'óna xranvino kjónté noehya ch'án nketí kuixín tí xran a. Jehó tí sín ch'e xra kuikáqo sín mé nohe sín kixin jehe sín mé tsikakitsje sín ntá. Ntá tí ch'ín t'etqan mé k'uiyehé ch'án tí ch'ín tsikótehe. ¹⁰ Ntáche ch'án kixin:

—Xráxín tí sín tjasin kia la senó tí xranvino náxrxón tjanjon sín na tió chrók'uihya tí sín tsikóchjina na ntá tjanjon sín tí xranvino náxrxónhya. A ntá jaha la náhi. Senó kjuakéchjina tí xranvino antsí má náxrxón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuich'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuente ch'án, a ntá tí sín k'uájiko ch'án mé kuitekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrxjenhen sín ntiha iso yaon.

*Ch'ín Jesús mé kjuínchetjóá ch'án tí njnko jié
(Mt. 21.12-13; Mr. 11.15-18; Lc. 19.45-46)*

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjui ch'án chjasin Jerusalén. ¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótxajin tí sín tjinkíxixín chichaon. ¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntalesa tjinkítóxixín sín tí chichaon mé kótéka ch'án tsikjaminkí xènjín tí chichaon a. ¹⁶ Ntá k'uetuènen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntøe T'aná ntihi —ichro ch'án.

¹⁷ Ntá xráxinkaon tí sín k'uájiko ch'án tí nkehe tsíkjin sín ósé kixin: “Éxí xrohi k'uákjen asenná nínkavan kixin tí ntøa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xíkaha kjuích'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxikará tí nínko i ntá inikoa yaon la ó sít'ána nixin tsjak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjé sín kjuích'éna sín tí nínko i, a ntá jaha ntáchrúa kixin iní yaon koá sích'éna inaá, ichrúa —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án. ²² Ntá tió kjuixín xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án. ²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni ²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjéhe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetooan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjéhe ch'án ntáchro ch'án kixin:

—Maestro, kónoheni kixin It'eni tjen nkaya nkajní mé tsíchr'án k'uinka tsjákohéni kixin tí jehya Dios chrókuak'ekoa la xitjahya chrókuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjetooan. Tí nkexro tsokjehya nixien mé xitjahya ts'ikon tí kjuachaxin ts'etøan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetooan. Jehó tí sín tsíkokjixén ntá la ko kjaxin tsíkokjixén Nchakuen Dios mé ts'áyéhe sín tí kjuachaxin kuènte Dios. ⁶ Tió ijnko xjan ts'axrjenixin chojni na mé tí xjan mé chojni ó. A ntá tí Nchakuen Dios tsókjixén nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka kixin “Kain chojni t'ichjánxin tsokjíhi nixien.” ⁸ Éxí yóhe tí tinhín tí chjéhe xrintø ntá noahya nketí kuixín tí xrintø la ko noahya nketí sátsji na mé kjaxin xíkaha kónhen kaín tí nkexro tsíkokjixén Nchakuen Dios —ichro ch'án.

⁹ Ntá xíkjanckí ch'ín Nicodemo inaá kixin:

—¿Nkekuènté kixin xíkaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etøan tí nación Israel ntá naxá tiénxinhya tí nkehe ní? ¹¹ Chaxín tjetjonka tí nkehe nóna la ko tí nkehe k'uíkuan ntá titekákonnahya jaha. ¹² Tí nkehe tjetjonka la kuènte chjasintajni ó ntá kjónté la titekákonnahya jaha. ¿Ntá nkexrí chrókuítekavan tí chrótjonka nkehe kuènte nkaya nkajní? ¹³ Kohya í jnko nkexro k'ujit'øtjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. ¹⁴ Éxí yóhe ch'ín Moisés tió k'uixin sín tí ntjeje, a ntá Dios mé k'uetøan kixin sinchekjanøya ch'án ijnko konche tsjak'enkanı ch'án ijnko nta, ntá xíkaha kjuích'e ch'án

* 2:17 Salmo 69.9

kjuak'enkani ch'an tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkáni ch'an ijnko ntacruz ¹⁵ kixin mé xikaha kaín nkexro tsinkáchónki tí jehe ch'an mé tsaá sín tsochónta sín kjuachón jnkochrín.

Dios imá tjuèhe ch'an tí chojni chjasintajni

¹⁶ Kixin Dios mé imá tjuèhe ch'an chojni chjasintajni ntá kjuanjon ch'an jnkokoqáxon Xjeen ch'an, kixin ntá jnkojnko chojni tsinkáchónki tí Xjeen ch'an mé ts'itájanyha sín tsochónta sín kjuachón jnkochrín. ¹⁷ Chr'ánhya Dios tí Xjeen ch'an chjasintajni kixin sinchekjasóte chojni kixin tí jje kjuasin sín. Náhí. Ó jehí ichr'án ch'an tí Xjeen ch'an chjasintajni kixin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuinchekitqexín Dios tí jje sín tsjasóte sín kixin titekakuenhya sín tí jnkokoqáxon Xjeen Dios. ¹⁹ Na mé xikaha Dios sinchekjasóte sín jnkochrín kixin ó kui tí nkexro t'inkaséyanxin chjasintajni na kjónté ntá antsí má tóxrjnhin sín tí sítié a. A ntá tí t'inkaséyan la náhi kixin naxa tóxrjnhin sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjnhya sín t'inkaséyan chrókóhjhinehya sín kixin tsonoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jina a na mé chéhe sín tóhjhinehe sín tí t'inkaséyan kuénte Dios kixin tsonoxín tí nkehe ch'e sín kixin ntá kaín xin chojni mé tsjatsqan sín kixin tjejóch'e sín tí nkehe tóxrjnhin Dios.

Ch'in Juan Bautista chrónka inaá kuénte ch'in Jesús

²² Na ntá chr'éxin ch'in Jesús la ko tí sín k'uájiko ch'an na sákjuí sín estado Judea. Ntaha k'uéjoko sín ch'an kuikite ch'an chojni. ²³ Kjaxin ch'in Juan kjuák'e ch'an chjasin Enón chjino tí chjasin Salim na mé ntiha kjuák'e kuikite ch'an chojni kixin ntiha mé yeé ntá síin. Na ntá nkáki sín kuikite sín. ²⁴ Mé xikaha kónhen naxa kjuák'echjinhya ch'in Juan.

²⁵ Ntá tí sín k'uájiko ch'in Juan la ko tí sín judío mé kjuachaxin kichó sín kixin nkexrí íchá jina chrókótuáxin chojni, ichro sín. ²⁶ A ntá tí sín k'uájiko ch'in Juan sákjuitsjehe sín ch'an chénka sín ch'an kixin:

—Maestro, tí ch'in kjuák'ekoa tóhe ntarío Jordán, na mé tí nkexro tsíchronka kuénte ch'an, la mé itjen ch'an tükite ch'an chojni la ko kaín xin chojni mé tjichréhe sín ch'an —ichro sín.

²⁷ Na ntá ntáchro ch'in Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínrá ntoá k'uéxrjanka senó kixin janhya tí Cristo. Náhí. Janhan ó kuítuanuá kuítónxián ntia tsoxrjanka kixin ó tsi ch'an. ²⁹ Éxi yóhe ijnko ch'in tsoqtehe na mé jehe ch'an mé ts'áyéhe ch'an tí ichjién ch'an. A ntá tí ch'in chóxin ch'an mé chéhe asén ch'an tjetinhin ch'an tjenixja tí ch'in ts'áyéhe ichjién a. Mé xikaha janhan imá chána kixin xikaha sitónhen kixin itsjé chojni sitóhjhinehe sín tí ch'in Jesús tsinhin sín nkehe tí tjenixja ch'an. ³⁰ A ntá jehe ch'an t'ichjánxin antsí ts'etqan ch'an. A ntá janhan la kénhyó —mé chro ch'in Juan.

Tí nkexro kuixin nkaya nkajni

³¹ Tí nkexro kuixin nkaya nkajni mé kaín nkehe t'etuenhen ch'an. A ntá ijnko chojni kuénte chjasintajni ó mé chrónka kuénte chjasintajni ó. A ntá tí nkexro kuixin nkaya nkajni mé kaín nkehe t'etuenhen ch'an. ³² Jehe ch'an mé chrónka ch'an tí nkehe tsik'ikon ch'an la ko tí nkehe tsíkinhin ch'an. Kjánchó kohya chojni titekaon sín tí nkehe chrónka ch'an. ³³ A ntá jnkojin nkexro titekaon sín tí nkehe chrónka ch'an na mé xikaha tjakoixin ch'an jie kixin chaxin ntoá chrónka Dios ³⁴ kixin tí nkexro ichr'án Dios mé nixja itén Dios kixin jehya intsóá tí Nchakuen Dios k'uáyéhe ch'an. Náhí. ³⁵ It'eni Dios mé tjuèhe ch'an tí Xjeen ch'an na mé xikaha ó tsíchjéhe ch'an kjuachaxin kixin kaín xin nkehe ts'etuenhen ch'an. ³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'in Jesús ikjo ch'an ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'in Jesús kuikite ch'an sín na ntá tí chojni chréhe sín tí ch'in Juan la kánhyó tsjé sín. ² Kjánchó jehya ch'in Jesús kuikite ch'an chojni. Méxra tí sín k'uájiko ch'an mé kuikite sín chojni. ³ A ntá tió kónohe ch'in Jesús kixin xikaha tsíkinhin tí sín fariseo ntá k'uaxrjexin ch'an tí estado Judea xikjan ch'an estado Galilea inaá.

* 3:14 Números 21.9

⁴ Ntá t'ichjánxìn ts'átsinka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'in Jacob tí xjeen ch'án José. ⁶ La ó chjino tjen tí tóye takitsje chojni intá mé it'in Inté Jacob. Na ntá ó chonkíxin kjuí sín ntiha. Méxra tí ch'in Jesús la imá kóxrje ch'án kixin imá kjin tí ntja kjuixìn ch'án ntá kjuák'etjaxìn ch'án chrínta tí tóye takitsje sín intá. ⁷⁻⁸ Ntahó kuitóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan intá. Ntá ntáchro tí ch'in Jesús kixin: —Chjina intsi ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'in Jesús kixin: —¿Nkekuénté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'in Jesús kixin:

—Chrókónoha tí nkehe tjanjon Dios la ko chrókjuatsəan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'in Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tóye i la imá njnka? ¿Ntá nkexrí tsochjina tí ntá tjechón tjimé? ¹² Tí nkexro k'uaxrjeníxinni mé Jacob mé kuitoeheni tí tóye tjíá ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsi má tjettoan jaha, a ntá jehe ch'án la kénhyó ní? —mé kjuanchankíhi tjan tí ch'in Jesús.

¹³ Na ntá kjuátəhe ch'in Jesús ntáchro ch'án kixin:

—Tí sín it'í sín tí ntá ntihi tí tóye i nántaxón its'en sín ntá inaá. ¹⁴ A ntá tí sín its'í sín tí ntá sintakítjonhan sín mé í ts'enhya sín ntá inaá. Tí ntá sintakítjonhan sín mé ts'óna éxí yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochríxin —ichro ch'án.

¹⁵ Ntá ntáchro tí tjan a inaá kixin:

—Chjina tí ntá, a ntá ts'énhyana ntá inaá la ko ts'inkahya ntihi tsakítsje ntá —ichro tjan.

¹⁶ Ntá k'ueəəan ch'in Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kixin:

—Chontahya xíná —ichro tjan.

Ntá ntáchro ch'in Jesús kixin:

—Chaxín ntáchrúa kixin chontahya jaha xiá. ¹⁸ K'uéchonta jaha in'ó xiá, a ntá tí ch'in chonta jie jehya xiá. Na mé chaxín tí nkehe ntáchrúa kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uixín ósé mé k'uéxraxinkakonxín sín Dios tí jnā ntihi. Kjánchó jahará chojni judío mé ntáchrórá kixin tí njnko jie chjasin Jerusalén kaín ní chróxraxinkakonxinni Dios —ichro tjan.

²¹ Ntá ch'in Jesús ntáche ch'án tjan kixin:

—Titekávan kixin tjetsi tí hora a tsoxráxinkákonxínhyará It'éni Dios tí jnā ntihi la ko tsoxráxinkákonxínhyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkáonrá. Ntá kaín ní chojnini judío mé chóxinni tí nkexro xráxinkaonni. Méxra tí nkexro tsjakjiihin chojni tí jie yámá sín mé ts'axrjeníxin tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrjínhin ch'án kixin chojni xikaha chrókjuch'e sín chróxraxinkakonxín sín ch'án. ²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxìn kixin asén sín ó tsoxraxinkakonxín sín ch'án —mé xikaha chrónka ch'in Jesús.

²⁵ A ntá ntáchro tí tjan a kixin:

—Ó nóna kixin itsi tí nkexro Mesías, tí nkexro a mé Cristo. Tió tsi ch'án ntá tsjakqeheni ch'án kaín xín nkehe —ichro tjan.

²⁶ Ntá ntáchro ch'in Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanxìn sín tí chjasin a, ntá chrakon sín k'uikon sín kixin tjenixjehe ch'án ijnko chojni chjin. Kjánchó njnko sín kjuanchankíehya sín ch'án kixin nkehe tjinkaon ch'án na nkekuénté nixjehe ch'án tí tjan a. ²⁸ A ntá tí tjan mé kjuak'e tjan tí toá nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Intará sátsjitsjeheni ijnko ch'in chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóhe sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkójin sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxi yóhe chrókjóné nkehe mé tí sjt'a tí xra la ko tsjixinna tí xra kuènte tí nkexro chr'ánna k'uinka. ³⁵ Ntáchorá kixin: “Noó nitjó naxa t'itjayan tsochónhenni ntá tsotjáni noatrigó”, ichrorá. Kjánchó ntáxrxan kixin chrótsjehérá tí no a kixin ó tsicha la ko ó tinkáxamá kixin ó jina chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrixin. Ntá tí sín k'uenká sín nonte la ko tí sín tjá sín jnkokón tsochéhe sín. ³⁷ Mé xikaha tsoxitéyá tí nkehe ntáchro sín kixin: “Ijko nkexro mé t'enká noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijko nonte tsik'énkahyará. Na mé ókjé sín kjuich'e sín xra ntá jahará tsjachará tí xra kjuich'e tí sín a —ichro ch'án.

³⁹ A ntá itjsé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xikaha chrónka tjan kixin jehe ch'án ó chrónka ch'án kaín xín nkehe kjuich'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóhe sín ch'án kixin tsitóhe ch'án ntiha. Ntá kuitóhe ch'án ntiha iyó yaon. ⁴¹ Ntá itjsé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitóhe jina ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrxjéin ch'án estado Samaria ntá sákjuí k'án nó estado Galilea. ⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehya sín ch'án jina kixin kjaxin sín sátsíkji sín tí kia pascua chjasin Jerusalén tsik'íkon sín kaín tí kjuaxroan kjuasixín ch'án tí kia ntiha.

⁴⁶ Ntá xikjan ch'ín Jesús inaá chjasin Caná, estado Galilea, na mé ntiha tsikjinchekjamina ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsikixín ch'án estado Judea ntá sákjuíchréhe ch'án chrónóhe ch'án tí ch'ín Jesús kixin sáchrókjui ch'ín Jesús ntóe ch'án sinchekitóhe jina tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókuásian la chrókuinkachónkihyará tí janhan —ichro ch'án.

⁴⁹ Ntá chrónóa tí ch'ín ch'ehe xra gobierno ntáchro ch'án kixin:

—¿A chrókjínahya sáchrókjui ni ntóna jai kixin xjanna ó tjet'en? —ichro tí ch'ín a.

⁵⁰ Ntá kjuátéhe ch'ín Jesús ntáchro ch'án kixin:

—Ikjan sájtja ntóe kixin tí xjaan na ó jina tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntóe ch'án ntá xringhya tí sín ch'ehe sín ch'án xra kjuixínhin sín ntja chrónka sín kixin:

—Xjaan la ó jina tjen —ichro sín.

⁵² Ntá kjuanchankíhi ch'án sín kixin nkehora kjuankixin kuitóhe xjan jina, na ntá chrónka sín kixin:

—Ijna la una kónjin mé kjuin tí sóa —ichro sín.

⁵³ Ntá kónohe tí it'é xjan kixin xikaha tí hora tsintáchro ch'ín Jesús kixin tí xjeen ch'án na ó jina tjen. A ntá jehe ch'án la ko kaín tí sín siin ntóe ch'án mé kuinkáchónki sín tí ch'ín Jesús.

⁵⁴ Tiha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitóhe jina ijnko ch'ín tsik'en tote chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xikjan ch'án chjasin Jerusalén inaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siin in'ó cuarto ntsínsí. ³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsik'en tóté. Tjejóchónhen sín kixin nkehora tsinkí ntá ⁴ kixin nántaxón k'uínkajin

ijnko ángel kjuiánki ntá kjuínchekinki ntá. A ntá tí nkexro senó tsjiánki ntá mé tsitohe jína kjónte cualquiera chin chóna. ⁵ A ntá ntaha kjuák'e ijnko ch'in na mé chóna ch'án treinta y ocho nánó níhi ch'án. ⁶ A ntá tío k'u'íkon ch'in Jesús kixin tjetsínka tí ch'in a la ko kónohe ch'án kixin ósé níhi ch'án, ntá kjuanchanki ch'án kixin:

—¿Á tjínkáván tsitohe jína? —ichro ch'án.

⁷ Ntá ntáchro tí sjíníhi kixin:

—Chóntahyani ninkexró tsjínkítsani tsjiánkíni ntá. A ntá tí tjínkaonni chrókjuiánkíni ntá la ntá ókjé nkexro tjítaón ntá tjíánki ntá senó —mé chro tí sjíníhi.

⁸ A ntá k'uetóan ch'in Jesús kixin:

—Ijie la t'ínkatjen, tjatsíyan kaniáa, itjia —ichro ch'án.

⁹ Ntá tuénxín kuitóhe ch'án jína, ntá kjuatsen ch'án kanié ch'án kjuankíxin itji ch'án. Kjánchó yaon sábado tíha mé tí yaon t'ók'éhe sín. ¹⁰ Mé xíkaha tí sín judío ntáche sín tí ch'in kuitóhe jína kixin:

—Ijie tí yaon t'ók'éheni ntá kohya kjuachaxin tsamá kaniáa —ichro sín.

¹¹ A ntá ntáchro tí ch'in a kixin:

—Tí nkexro kjuínchekitóna jína mé k'uetuáanna kixin tsjatsíyan kaniána la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetuánhan kixin tsjatsíyan kaniáa la ko sátsjia? —ichro sín.

¹³ A ntá tí ch'in tsíkitohe jína na í kjuátsoanhya ch'án tí nkexro kjuínchekitohe ch'án jína kixin ntaha la sín nchónhya chojni, a ntá ntahó k'uitjáyanxín ch'in Jesús. ¹⁴ A ntá chr'éxín ch'in Jesús xeta ch'án tí ch'in a nkaxenhen tí njnko jie ntá ntáchro ch'án kixin:

—Tsjehe kixin ijie la ó jína tjen jaha la í tjásínhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'in a ntá chénka ch'án tí sín judío kixin jehe ch'in Jesús mé kjuínchekitohe ch'án jína. ¹⁶ Mé xíkaha tí sín judío antsí tjínkaon sín chrók'óyán sín ch'án kixin kuitékauenhya ch'án tí ley kuénte tí yaon t'ók'éhe sín la ko kjaxin ntáchro ch'án kixin tí It'é ch'án la mé Dios, mé xíkaha ncheyóhe ch'án asén ch'án Dios.

—Méxra T'aná naxá tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xíkaha tí sín judío antsí tjínkaon sín chrók'óyán sín ch'án kixin kuitékauenhya ch'án tí ley kuénte tí yaon t'ók'éhe sín la ko kjaxin ntáchro ch'án kixin tí It'é ch'án la mé Dios, mé xíkaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'in Jesús tí jehe sín kixin:

—Ijnko nkehe tjeotan tsojtónkará kixin tí Xjeen Dios nkaya nkajní tí jehó kjuachaxin kuénte ó la mé xitjahya sich'e xra. Jehó tí xra t'íkon ch'án tjech'e It'é ch'án mé kjaxin ch'án xíkaha ch'e ch'án. ²⁰ A ntá tí It'é mé tjuéhe tí Xjeen ch'án, la ko tjákohe ch'án kaín xín xra ch'e ch'án, la ko antsí tjeotan tí xra naxá tsjakohe ch'án kixin ntá tsochraonrá kixin ts'íkonrá tí xra sich'e ch'án. ²¹ Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjínkaon tsochjéhe ch'án. ²² A ntá It'é la í sinchekitóexínhya ch'án ijje ninkexró. Kaín tí kjuachaxin kuénte ch'án chjéhe ch'án tí Xjeen kixin sinchekitóexín ch'án ijje chojni chjasintajni ²³ kixin ntá kaín chojni tsjikosáyehe sín tí Xjeen éxi yóhe tjikosáyehe sín tí It'é ch'án. Tí sín tjikosáyehe tí Xjeen xíkaha kjaxin tjikosáyehe sín tí It'é kixin jehe ch'án mé tsíchr'án tí Xjeen.

²⁴ Ijnko nkehe tjeotan tsojtónkará kixin tí jnkojinrá tjeotinhínra tí nkehe tjákua la ko tinkachónkirá tí T'aná, mé tí nkexro ichr'ánna, na mé xíkaha ó chontará tí kjuachón la ko tsjasótíahyará, na mé kuitóhérá tí ntá chrók'uéxínra, la ntá jie kjuankíxinrá tsochontará tí kjuachón jnkochríxín. ²⁵ Ijnko nkehe tjeotan tsojtónkará kixin ó tsí tí yaon, na mé jie tíha, mé xíkaha tsonhen kixin tí sín tsík'en tsinhín sín tsonixja tí Xjeen Dios. A ntá tí sín tsítekaon sín na mé ts'ejóchón sín. ²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitóexín tí ijje chojni chjasintajni kixin jehe mé tí Xjeen Dios K'óna Chojni. ²⁸ Chraonhyará tjetónkará xíkaha. Na mé ó tsí tí yaon kixin kaín tí sín tsík'en mé tsinhín sín tsonixja ch'án. ²⁹ A ntá ts'axrxéxín sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

³⁰ Tí jehó kjuachaxin kuéntana xitjahya sit'a ninkehó xra. A ntá jie ntákitóaxián tí ijie éxi k'uetuáanna T'aná. A ntá tí nkehe ntákitóaxián la jína ntoá kixin tjínkaonhya sit'a éxi tjínkavan. Náhi. Éxi tjínkaon T'aná, tí nkexro ichr'ánna, mé xíkaha tjét'a. ³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya.

³² Tjen í jnko nkebro tjechrónka nkexrí tjén janhan a ntá ó ñona kíxín tí nkehe chrónka ch'án la sínkí. ³³ Jahará tsíkétuénhénrá chojni kjuíkjanhankíhi sín tí ch'ín Juan kíxín nkexrínchi tjén janhan. A ntá tí nkehe tsíkjetéhe ch'án la chaxín ntoá tiha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kíxín jahará jina chrókuaará. ³⁵ Tí ch'ín Juan kjuák'e éxí yóhé ijnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxrjínhanrá tí xrohi a. ³⁶ Kjánchó síin nkehe antsí tjetean tjakoxxín nkexrí tjén janhan, a ntá kánhyó tjetean tí nkehe tsíchrónka tí ch'ín Juan. Tí xra tjét'a, mé tí xra kjuanjon T'aná sit'a tsjixinna tí xra, na mé tíha mé tjakoxxín kíxín chaxín T'aná tsíchr'án k'uinka. ³⁷ Kjaxin jehe T'aná, tí nkebro ichr'anna, mé chrónkaxín ch'án nkexrí tjén janhan. A ntá jahará naxa kíénhyará tí nkehe nixja ch'án la ko k'uínkonhyará ch'án ³⁸ la ko kjaxin itén ch'án kuítóehya nkaya kjára kíxín tjínkákonhyará tsítekaonrá tí Xjeen Dios tsíchr'án tsiki. ³⁹ Jahará nchekuáxinrá jina tí xroon tsíkjin tí sín tsíchrónka itén Dios ósé kíxín ntáchrórá kíxín ntaha ts'itjaxínrá tí kjuachón tsochontará jnkochr'ín. A ntá tí nkehe tsíkjin sín ósé mé chrónka kuénte janhan. ⁴⁰ Kjánchó jahará tjínkákonhyará tsochjinará tí tjén janhan kíxín chrók'uayéhérá tí kjuachón a.

⁴¹ Janhan na tjéyáhya kíxín chojni chrókjuikosáyana sín. ⁴² A ntá janhan ó ñona kíxín jahará la tjeéhyará Dios. ⁴³ Mé k'uinkaxian janhan tí kjuachaxin kuénte T'aná. Kjánchó jahará la títekákonnyará. A ntá tí chrókú í jnko nkebro kjuachaxin chrókuaikitsjenixín asén ó, a ntá tíha mé tjínkáonrá chrókúitekákónhénrá. ⁴⁴ ¿Nkexrí chrókúitekáonrá jahará kíxín tjéyará kíxín tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoqá Dios? ⁴⁵ Tsontáchróhyará kíxín janhan tsjánchá jje tí jahará nkayakon T'aná. Náhi. Ch'ín Moisés mé tsjanchia ch'án jje tí jahará kíxín tsontáchrórá kíxín jehe ch'án kuinkachónkirá. ⁴⁶ Kja tí jahará chrókúitekáonrá nkehe tsintáchro ch'ín Moisés ntá chrókúitekáonrá tí janhan kíxín tí xroon tsíkjin ch'án mé chrónka kuénte tí janhan. ⁴⁷ A ntá tí títekákonnyará tí nkehe tsíkjin ch'án, ¿ntá nkexrí chrókúitekákónnará nkehe ntáxrjan janhan? —ichro ch'án.

6

*Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)*

¹ A ntá chr'éxin ntá sákjuí ch'ín Jesús k'uátóye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kíxín k'uíkon sín tí kjuaxroan jíe kjuasin ch'án kjuínchekitóhe ch'án jina tí sínníhi. ³ A ntá jehe tí ch'ín Jesús chr'ín ch'án ijnko jna na ntá ntaha kjuák'etjaxín ch'án la koí tí sín k'uájiko ch'án a. ⁴ A ntá í séhya ts'ixín tí kia pascua a mé kié tí sín judío a. ⁵ A ntá tí ch'ín Jesús k'uíkon ch'án kíxín nchónhya chojni chr'ín sín kjuichréhe sín ch'án ntá kjuanchankíhi ch'án tí ch'ín Felipe kíxín:

—¿Nketí chrók'uenani nkehe sine kaín tí chojni a? —ichro ch'án.

⁶ Mé xíkaha ntáchro ch'án kíxín síná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjan ch'án. ⁷ Ntá kjuátehe ch'ín Felipe ntáchro ch'án kíxín:

—Kjónité doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkoinko sín tot'ó tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kíxín:

⁹ —Níhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kíxín nchónhya chojni síin? —ichro ch'án.

¹⁰ A ntá ntáchro ch'ín Jesús kíxín:

—Tétuénhén tí sín síin a kíxín ts'itjaxín sín —ichro ch'án.

A ntá nchónhya ika yoa sín na ntá ntaha k'uítjaxín sín na mé éxí in'ó mil chojni k'uíxin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikeyehe sín chjéhe sín kaín tí sín sitjaxín a. Xíkaha kjaxin k'óxikeyehe sín tí koche. A ntá kaín sín kjóne sín éxí tjínkaon sín. ¹² Kjuixin kjóne sín ntá k'uetuénhen ch'ín Jesús tí sín k'uájiko ch'án ntáchro ch'án kíxín:

—Tjénájínrá tí nkehe tot'ó síxéhe sín kíxín ts'itjáyanya ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ó tí in'ó niotja tsík'óna noa cebada síxéhe sín tí kjuixin tsíkjine sín. ¹⁴ A ntá tí sín kjóne tí niotja k'uíkon sín tí kjuaxroan jíe kjuasin ch'ín Jesús ntáchro sín kíxín:

—Jehe ch'án mé chaxín tí nkebro tsíchr'án Dios kíxín itsí tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kíxín tjínkaon sín sáchrókjuiko sín ch'án chróchr'áxénhen sín ch'án tí xra rey kíxín chrók'uetóan ch'án. A ntá jehe ch'án tjínkakonyaha ch'án tíha ntá jehó ch'án sáxíkji ch'án nteje inaá kjuák'e ch'án ntíha.

Éxi ijnko ntja xikaha kjuítaón ch'in Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'in Jesús k'uínkajinxin sín jnà sákjuí sín chrínta ntayaon ¹⁷ k'uit'ótjen sín ijnko ntabárcó kjuankíxin sín ts'atòye sín ntayaon sátsji sín chjasin Capernaum. Na ó k'uíxin tie na naxá kjanhya ch'in Jesús. ¹⁸ Ntá kjuankíxin chjéhe xrínto tsanqa ntá kjuankíxin tinkákjaminkí ntá. ¹⁹ A ntá tió kjuacha sín á in'ó o injon kilómetro ntá xrinahya k'uikon sín tí ch'in Jesús tinkákóchjinehe ch'án tí ntabárcó, éxi ijnko ntja tjetjitaón ch'án tí ntá, ntá k'uikon sín ntá imá chrakon sín. ²⁰ Kjánchó ntáchro ch'án kíxin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcó. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'in Jesús

²² A ntá tí yaon chr'éxin na mé tí sín kúitohe tóhe ntayaon na mé ó nohe sín kíxin jnkokoáxón ntabárcó k'uékjak'e ntíha la ko ó nohe sín kíxin ch'in Jesús kjá ní sátsjikohya sín ch'án na mé k'uikon sín kíxin jehó tí sín k'uájiko ch'án sátsikí sín. ²³ Kjánchó sín ntabárcó úxín chjasin Tiberias tinkákóchjinehe tí nó kjónexín sín tí niotja kjuanchaxín ch'in Jesús kjuasáyé Dios. ²⁴ A ntá tió k'uikon sín kíxin kohya ch'in Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcó ntá sákjuí sín chjasin Capernaum sákjuíkjeýá sín tí ch'in Jesús.

Ínchéni Jesús mé éxi niotja tjanjon kjuachón

²⁵ A ntá tóhe ntayaon xéta sín tí ch'in Jesús ntá kjuanchankíhi sín ch'án kíxin:

—Maestro, ¿nesá k'uinka ntíhi? —ichro sín.

²⁶ Ntá kjuátéhe ch'in Jesús ntáchro ch'án kíxin:

—Ó nòna kíxin jahará tjéýará tí janhan kíxin kjónterá niotja kókjahará, la jehya kíxin kiéxinxrá tí kjuaxroan kjuásian. ²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjeýará tí nkehe chrókjejehya chrókjónterá chrók'uayéxinxrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kíxin It'é ch'án mé tjakoxín ch'án kíxin tí Xjeen ch'án mé chóna kjuachaxién tí jehe ch'án —ichro ch'in Jesús.

²⁸ A ntá kjuanchankíhi sín ch'án kíxin:

—¿Nkexrí chrókjuich'eni chrokjúinchesteyáni nkexrí tjinkaon Dios? —ichro sín.

²⁹ A ntá kjuátéhe ch'in Jesús ntáchro ch'án kíxin:

—Dios mé tjinkaon ch'án kíxin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kíxin:

—¿Nkehe tí kjuaxroan chrókjuáogéxianni chrók'uikonni kíxin ntá chrókuitekaonni tí jaha? ¿Nkehe tí xra ch'e jaha? ³¹ Tí sín tsík'axrjenúxinni k'uéjío sín ósé mé kjóne sín maná k'óna niotja tió k'uíxin sín nteje mé xikaha tí xroon kuénte Dios tsíkjin ijnko nkexro ósé ntáchro kíxin: "Kjuanjon ch'án tí nkehe kjóne sín mé niotja tsíkíxin nkaya nkajní"* —ichro sín.

³² A ntá kjuátéhe ch'in Jesús ntáchro ch'án kíxin:

—Ijngo nkehe tjeoan tjekará kíxin jehya ch'in Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jína k'uínkajinxin nkaya nkajní. ³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kíxin:

—Jaha ínchéni, jnkochrín chjehéni tí niotja a —ichro sín.

³⁵ A ntá ntáchro ch'in Jesús kíxin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá. ³⁶ Kjánchó éxi k'uétjonkará senó na ó k'uikonrá tí janhan na kjónté naxá titekákonhyará. ³⁷ A ntá kaín tí sín chjina T'aná la tsoghjina sín tí janhan. A ntá kaín tí sín tjejótóchjinehe sín tí janhan la tsétuanhya sín kíxin sátsji sín. ³⁸ Janhan k'uínkaxian nkaya nkajní jehya tí xra tóxrjina chrókjuí't'a. Náhí. K'uinka kíxin chrókjuí't'a tí xra tóxrjinhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kíxin sintak'itjáyanyha nínkexró tí sín chjina ch'án na mé tjinkaon ch'án kíxin janhan mé sintaxechón kaín sín tí yaon tsjixín. ⁴⁰ Mé xikaha tjinkaon tí nkexro tsíchr'ánna kíxin kaín tí sín ts'íkon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixín —ichro ch'án.

⁴¹ A ntá tí sín judío kjuankíxin sín kjonta sín tí ch'in Jesús kíxin tsíntáchro ch'án kíxin jehe ch'án mé tí niotja k'uínkajinxin nkaya nkajní. ⁴² Mé ntáchro sín kíxin:

* 6:31 Salmo 78.24

—¿Á Jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuènté ntáchro ch'án kixin nkajni k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Tjtoherá tjóntahyará tí janhan. ⁴⁴ Kohya nkekro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kain chojni.”[†] A ntá kain tí sín tsikinhin tí nijxa T'aná la ko kjuakohe ch'án sín mé sitóchjina sín tí tjén janhan.

⁴⁶ Jehya kixin itjen ijnko chojni tsik'ikon T'aná. Náhí. Jehó tí nkekro kujxin tí tjen Dios mé tsik'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrixín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjenixínrá k'uéjé ósé kjóne sín tí maná k'óna niotja tió k'uéjé sín nteje, a ntá kjónté ik'uén sín k'uíjtáyan sín. ⁵⁰ Tí nkehe xrjanka mé tí niotja k'uínkajinxin nkaya nkajni, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uínkajinxin nkaya nkajni. A ntá tí sín sine tí niotja a mé ts'ejóchón sín jnkochrixín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sitjité sín itjo sín kíchó sín ntáchro sín kixin:

—¿Nkexrí chrókjuanjon ch'án ntøe ch'án chrókjóneni? —ichro sín.

⁵³ A ntá kjuátehe ch'ín Jesús ntáchro ch'án kixin:

—Ntá tsotjonkará kixin tí sintehyará ntøe tí Xjeen Dios K'óna Chojni, la ko tí ts'ihyará ijnjé ch'án, ntá tsochontahyará kjuachón jahará. ⁵⁴ Tí sinterá ntóna la ko it'irá jnina ntá tsochontará kjuachón jnkochrixín la ko janhan mé sintaxechónrá tí yaon tsjixixín. ⁵⁵ Kixin ntóna na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntóna la ko it'í sín jnina mé jnkokoá tjenkayáxinkian sín la ko janhan mé xríkian sín. ⁵⁷ T'aná tsíchr'án ch'án tí janhan mé chónta kjuachaxin, a ntá janhan mé tjechónxin tí jehe ch'án. Ntá tí sín sine tí ntóna mé ts'ejóchónxin sín tí janhan. ⁵⁸ A ntá tjénixja kuènté tí niotja k'uínkajinxin nkaya nkajni na mé yóehya tí maná tsik'óna niotja kjóne tí sín tsik'axrjenixínrá ósé kixin jehe sín na kjónté k'uén sín. A ntá tí sinterá tí niotja k'uínkajinxin nkaya nkajni ntá ts'ejóchónrá jnkochrixín —mé chro ch'ín Jesús.

⁵⁹ Kain tíha mé kjuakohe ch'án tí sín tsikójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrixín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkekro chrókuinhin tíha? —ichro sín.

⁶¹ A ntá kónohe ch'ín Jesús kixin xikaha tóxakonhen sín kíenxínhya sín tí nkehe tsíntáchro ch'án ntá kjuanchankíhi ch'án sín kixin:

—¿Á kjaxínrá tjínkákonhyará tsinhúnra tíhi? ⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixín ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjetjónkará na mé kuènté tí Nchakuen Dios na mé tjejóchónxin chojni. ⁶⁴ Kjánchó isorá naxa titekákonnahyará —ichro ch'án.

Mé xikaha ichro ch'án kixin tí xrankixín ó kónohe ch'án kixin nkekro tí sín tsitekakuenhya sín ch'án la ko kónohe ch'án kixin nkekro sinchekji ch'án. ⁶⁵ A ntá ntáchro ch'án kixin:

—Méxra xikaha k'uétjónkará kixin ninkexró tsochjina tí tjén janhan tí tsjínkítsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrinahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxínrá tjínkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Ínchéni, ¿nkekuènté tjanchankíhíni á sáchrókjuiini ókjé? Jaha tí tan chrónka a mé tsochóntaxínni kjuachón jnkochrixín ⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kain rá teyórá la ko jnkójnra ntíhi mé ts'ónará ijnko jínahya —ichro ch'án.

⁷¹ Tíha mé t'axrxénin tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'ín Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'in Jesús mé kuítékakuenhya sín ch'án

¹ Ntá kjuixin tíha ntá k'uáji ch'in Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia. ³ A ntá tí sín kichó ch'in Jesús ntáche sín ch'án kixin:

—Chrókuítéahya ntihi. Sáchrókjuia estado Judea kixin ntá kjaxín tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tíó tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxín jehe sín titekakuenhya sín tí jehe ch'án. ⁶ A ntá kjuátéhe ch'in Jesús ntáchro ch'án kixin:

—Naxá kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín. ⁸ Jahará la sájtírá tí kia a. A ntá janhan la tjíhja kixin naxá kjuixrakáhya tí hora kuéntana —ichro ch'án.

⁹ Mé xikaha ntáchro ch'án ntá kuítéhe ch'án estado Galilea.

Itjen ch'in Jesús tí kia a

¹⁰ A ntá ó kjuixin sátsíkji tí sín jnkokoá kichó ch'in Jesús ntá jehe ch'án la kjaxín sákjuj ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'in a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jina ch'án”; kjánchó í so sín ntáchro sín kixin: “Jehya chojni jina ch'án, méxra imá ch'iehe ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosíné tí kia a ntá k'uixenhen ch'in Jesús tí nínko jie ntá kjuankixin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'in í nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátéhe ch'in Jesús ntáchro ch'án kixin:

—Tí nkehe tjákua la jehya kuéntana na mé tí xra kuénte tí nkexro tsíchr'ánna k'uinka. ¹⁷ Tí jnkójnirá tjinkáonrá chrókjuincheitexyéhérá éxí tóxrjínjin Dios la tsonohará á chaxín kuénte Dios tí nkehe tjákua ó á kuéntana tíha. ¹⁸ A ntá tí nkexro tjako tí nkehe t'axrjenixin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'in Moisés tjáhará tí itén Dios chrókuítékáonrá? Kjánchó nijnkorá kuítékakuenhyará tí nkehe tsikjin ch'án. ¿Méxra nkekuénté tjinkáonrá chrók'oyánrá tí janhan? —ichro ch'án.

²⁰ Ntá kjuátéhe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátéhe ch'in Jesús ntáchro ch'án kixin:

—Jnkokoá kjuaxroan tjáon tí yaon t'ok'éheni ntá chrakonrá.† ²² A ntá ch'in Moisés tsik'étoan kixin xjaanrá toa itsa xjan xroye, (kjánchó jehya ch'in Moisés kjuankixin ch'án kjuako ch'án tíha, na mé tí sín tsík'axrjenixinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni. ²³ A ntá xikaha nchekará xjan xroye tí yaon t'ok'éheni kixin xikaha chrókjuinchejt'ájayankíhyará nínkehó tí nkehe k'uétoan ch'in Moisés, ¿ntá nkekuénté kixin nínkákonnará tí janhan kixin kjujntakítóha jina ijnko chojni tí yaon t'ok'éheni? ²⁴ Chrókjuanchahyará jie kixin tí nkehe t'ikonzínrá ikonrá ó. Chrókjuenkayáxinrá tí nkehe jina tóxrjínjin Dios —mé chro ch'in Jesús.

Ch'in Jesús chrónka kixin nketí k'uaxrjenixin ch'án

²⁵ A ntá iso sín chjasín Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'in a xritjeyá sín chrók'óyán sín? ²⁶ Ntá jie noxín tjen ch'án nixja ch'án kohya nínkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. ²⁷ Kjánchó ó noheni nketí tsíkjin ch'án. A ntá tíó tsi tí nkexro Cristo ntá nínkexró tsonohya nketí tsjxin ch'án —ichro sín.

* 7:2 Levítico 23.34 † 7:21 Juan 5.2-9

²⁸ A ntá ch'ín Jesús kjuák'ekjako ch'án tí n̄ínko jié ntá kuínhin ch'án ḱíxin x̄ikaha kjo sín, ntá itsen nixja ch'án ntáchro ch'án ḱíxin:

—Chaxín choxinrá tí janhan la ko nohará nketí chjasin tsíkj́ixian. Kjánchó jehya ḱíxin k'uinka sintaxiteyá tí nkehe ntáchro asenná ó. Ó k'uinka ḱíxin ichr'ánna tí nkexro chaxín tjechón tjen nkaya nkajní. Jahará naxá chonhyará tí nkexro a. ²⁹ Janhan la choxian ch'án ḱíxin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echj́ina sín ch'án ntá kjónté ninkexró tséhya sín ch'án ḱíxin naxá kjuanjonhya Dios kjuachaxin chrótsé sín ch'án. ³¹ Kjánchó itsjé chojni kuítekaon sín tí jehe ch'án. A ntá ntáchro sín ḱíxin:

—A ntá tíó chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echj́ina sín ch'án

³² A ntá tí sín fariseo kuínhin sín nkehe tí ntáchro chojni ḱíxin nkexrí tjen ch'ín Jesús, ntá jehe sín la ko tí sín nchat'á t'et'otan k'u'et'ughen sín iso sín policia kuénte n̄ínko tsotsé sín ch'án tsjak'echj́ina sín ch'án. ³³ A ntá ntáchro ch'ín Jesús ḱíxin:

—Kj́axin í séhya tsjak'é ntihi ts'ejóni ntá sáxikj́iya tí tjen tí nkexro ichr'ánna. ³⁴ A ntá jahará tsjéyará tí janhan na ts'itjahyará ḱíxin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuanḱixin sín kjuanchankíhi sín kíchó sín ḱíxin:

—¿Ntá nketí nó sátsj́i ch'án ḱíxin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkíva griego ḱíxin ntá tsjakohé ch'án tí sín griego?

³⁶ ¿Nkexrí t'axrxéjin tí nkehe ntáchro ch'án ḱíxin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntario tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án ḱíxin:

—Kj́a tí jnkójínrá ik'uénrá ntá xrákirá its'irá ntá. ³⁸ A ntá éxi ntáchro xroon Itén Dios ḱíxin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

³⁹ Mé x̄ikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxá tíhya tí Nchakuen Dios ḱíxin ch'ín Jesús naxá sátxj́ihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tíó kuínhin sín tí nkehe ntáchro ch'ín Jesús ntá ntáchro sín ḱíxin:

—Kj́a chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín ḱíxin:

—Jehe ch'án mé tí nkexro Cristo —ichro sín.

A ntá í so sín ntáchro sín ḱíxin:

—¿Xá nkekuénté chrókjuixín Galilea tí nkexro Cristo? ⁴² Tí xroon tsíkjin sín ósé mé chrónka ḱíxin tí nkexro Cristo mé ts'axrjeníxin tí sín k'uaxrjeníxin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé x̄ikaha jnkokoáhya kjuenkayáxin sín káin sín ḱíxin nkexro tí ch'ín Jesús. ⁴⁴ Iso sín tjínkaon sín sáchrókjuiko sín ch'án chrókjuikjéhe sín ch'án kjánchó ninkexró kjuich'ehya x̄ikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuénte n̄ínko mé kjan sín tí tjejó tí sín fariseo la ko tí sín nchat'á t'et'otan. Ntá tí sín a mé kjuanchankíhi sín tí sín policia ḱíxin:

—¿Nkekuénté kjuíkoahyará ch'án? —ichro sín.

⁴⁶ Ntá kjuátéhe tí sín policia ḱíxin:

—Kohya ninkexró nixja éxi x̄ikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia ḱíxin:

—¿Á kj́axinrá kuítóhérá kjuít'ayahará ch'án? ⁴⁸ ¿Á kuítekaon tí jehe ch'án jnkójín tí sín t'et'otan kuénténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín ḱíxin:

⁵¹ —Tí ley kuénténi la kohya kjuachaxin sinchekjasóteni ijnko chojni tí naxá kienhyani nkehe nixja ch'án la ko kienhyani tí jié kjuasin ch'án —ichro ch'án.

⁵² Ntá kjuátéhe sín ntáchro sín ḱíxin:

—¿Á kj́axian jaha kjuíxian estado Galilea ní? Nchekuáxian tí xroon itén Dios ntá tsónoha ḱíxin nijnko tí sín k'uéchrónka itén Dios tsíkj́ixínhya sín tí estado Galilea —ichro sín.

Ijnko tjan kjuasin jie chóna ókjé chojni ntoa

⁵³ Ntá jnkojnko tí sín xíka sín sákjuí sín ntqje sín.

8

¹ Ntá ch'ín Jesús mé sákjuí ch'án tí jna Olivo. ² Ntá tí kóyaon nchítjen ikjan ch'án k'uúixenhen ch'án tí njnko jié a la ko kain xín tí chojni mé kóchjinehe sín ch'án. Ntá kjuák'etjaxín ch'án kjuankíxín ch'án kjuako ch'án. ³ Ntá tí sín tjako tí ley la ko tí sín fariseo mé kjuíkao sín ijnko tjachjin kónoxín kixin chóna tjan ókjé chojni ntoa. Ntá kjuak'e sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxín kixin kjuasin tjan jie chóna tjan ókjé chojni ntoa. ⁵ A ntá tí ley tsíkjin ch'ín Moisés mé t'etqan kixin ixro chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kixin tjinkaon sín kixin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxín ch'án dedo tja ch'án monte a.

⁷ Ntá naxa tinkákjanchankíhi sín ch'án. Ntá k'uínkatjen ch'án k'uetqan ch'án kixin:

—Xá nkexro tí tjejorá ntihi chónahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'uetqan ch'ín Jesús ntá kósuèhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kain tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha. ¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Ínchéni, ninkexró —ichro tjan.

Ntá ntáchro ch'ín Jesús kixin:

—Kjaxin janhan sjntakjasótiahya. Sátjia la í tjásinnya jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehé ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítíe a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínnya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjetjonkará nkexrí tjén na kjónté chaxín xrxjanka kixin ó nòna nketí nó k'uínkaxian la ko nòna nketí sátsjiyá. A ntá jahará noahyará nketí k'uínkaxian la ko noahyará nketí sátsjiyá. ¹⁵ Jahará la éxi chojni chjasintajni ó tékará jie. A ntá janhan la tékahya jie ninkexró. ¹⁶ Kjánchó ntoá chrókjuantakitqaxián ijíé chojni kixin jehya janhván t'a tíha, T'aná tjékjan, na mé tí nkexro k'uetuanna k'uinka ntihi na mé jehe ch'án mé tjékjan ch'án ntihi ntakitqaxínkian ijíé chojni. ¹⁷ A ntá tí ley tsíkjin ch'ín Moisés mé ntáchro kixin tí tsonoxín iyó sín tsochónka á chaxín xíkaha tsíkónhen ntá chrókuitekaon chojni. ¹⁸ Ntá janhan na mé tjéxrxjanka nkexrí tjén janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chónka ch'án nkexrí tjén janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xíkaha chro ch'ín Jesús tí kjuák'ekjakoixin ch'án tí njnko jié chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijíará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kíchó sín kixin:

—¿Á ts'óyan ch'án asén ch'án kixin xíkaha ntáchro ch'án kixin xitjahya tsjjini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixín. A ntá janhan la nkaya nkajní k'uaxrjénixian. Jahará la kuènte chjasintajni ntihi. A ntá janhan la janhya kuènte chjasintajni. ²⁴ Mé xikaha tjonkará kixin tió ts'énrâ naxâ tsochontará ijjárâ kixin tí tsitékâkonhyará tí janhan, mé tí nkexro xráxin tjen,* ntá kjónté ts'énrâ naxâ tsochontará tí ijjárâ —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátêhe ch'ín Jesús ntáchro ch'án kixin:

—Tí xrankixín kjuankixian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókjuintakitoaxián tí jje chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuñhãn chrónka ch'án mé tjáqõhã tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní. ²⁸ A ntá ntáchro ch'án kixin:

—Tió sijnchek'it'ójenrâ noi tí Xjeen Dios K'óna Chojni, ntá tsonohará kixin janhan mé tí nkexro xráxin tjen.[†] Ntá tsonohará kixin jehya janhan tétõan tí xrâ tjét'ã. Náhi. Jehó tí nkehe kjuakõna T'aná mé tjétjãkua. ²⁹ Tjéjian tí nkexro k'uetuanna k'uinka kixin jehí xráxin T'aná la kuítõnahya janhván kixin xráxin ntãxiteyãhã tí nkehe tóxrjinhin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijje sín

³¹ Ntá nixjehe ch'ín Jesús tí sín judío kuínkáchónki sín ch'án ntáchro ch'án kixin:

—Tí tsitóéhyará tí tan kjuákohará ntá jahará chaxín discípulo kuèntãna ³² la ko tsjátõanrâ tí nkehe chaxín, la ko tí nkehe chaxín mé tsotjáharâ kjuachaxin tsaáxinrâ, a ntá tsõkohya nkehe ts'inkákonhen —ichro ch'án.

³³ Ntá kjuátêhe sín ntáchro sín kixin:

—Jeheni mé tsík'axrjenixinni ch'ín Abraham na í xráxin kohya nkexro k'uena tí jeheni. ¿Nkekuènté ntáchrúa jaha kixin ts'áyéhëni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jje mé éxi chojni k'uínã chrokjuahya tsítóhe sín ijje sín. ³⁵ A ntá ijnko chojni k'uínã la jnkochrínxínhya tsjak'e ch'án tí ntõe tí nkexro a. A ntá tí xjeen tí nkexro na mé jnkochrínxín tsítóhe ntiha. ³⁶ Ntá tí tsaáxinrâ tí Xjeen Dios ntá chaxín tsochontará kjuachaxin, a ntá tsõkohya nkehe ts'inkákonhen. ³⁷ Ó nõna kixin jahará tsík'axrjenixínrâ ch'ín Abraham. Kjánchó tjínkãonrâ chrók'oyánrâ tí janhan kixin titekákonhyará tí nkehe tjéxrjanka. ³⁸ Janhan xrjanka tí nkehe k'uikuã kixin nkexrí tjen T'aná. A ntá jahará tjejonchexiteyéhérâ tí nkehe kuñhínrâ chrónka it'árâ —ichro ch'án.

³⁹ A ntá jehe sín kjuátêhe sín ntáchro sín kixin:

—It'ëni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxi kjuich'e ch'án.

⁴⁰ A ntá tjétjonkará tí tan chaxín kuñhãn chrónka Dios na kjónté chrók'oyánrâ tí janhan. A ntá ch'ín Abraham xikahya kjuich'e ch'án. ⁴¹ Jahará tjejoch'erá éxi kjuich'e it'árâ —ichro ch'án.

Ntá ntáchro sín kixin:

—Jehya k'ónamá tí jeheni. Náhi. Chóntani jnkokoqá It'ëni mé Dios —ichro sín.

⁴² Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'árâ la ntá chrótxuanará kixin janhan kjaxin k'uaxrjenixinna Dios k'uinkaxian tí tjen ch'án. Jehya kixin janhván k'uinka. Náhi. Dios mé ichr'ãna k'uinka. ⁴³ ¿Nkekuènté kixin tiénxínhyará tí nkehe tjonkará? Jehí tjínkákonhyará chrókuinhínrâ tí nkehe xrjanka. ⁴⁴ Jahará mé xjeen Tsochren la ko jahará tsík'axrjenixínrâ ch'án la ko tjínkãonrâ sijnchexiteyárâ tí nkehe tjínkaon ch'án. Tsochren mé xrankixín kjuaya ch'án. Nunca k'uénixja ch'án ntoá. Xráxin ch'ia ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá titekákonnyará. ⁴⁶ ¿Á tjejorâ jnkoinrâ nohará nkerí jje kjuásian janhan? A ntá tí ntáxrjan tí nkehe ntoá, ¿ntá nkekuènté titekákonnyará? ⁴⁷ Tí sín tinkáchónki Dios mé tjínkaon sín chrókuinhin sín itén Dios. A ntá jahará la tinkáchónkihyará Dios ntá tjínkákonnyará chrókuinhínrâ itén ch'án —ichro ch'ín Jesús.

Cristo la ó xráxin tjen ntá chr'ëxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

* 8:24 Éxodo 3.14 † 8:28 Éxodo 3.14

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátēhe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáha nkexro tsjikosáyana. Kjánchó itjen ijnko nkexro tjínkaon ch'án chrókjuikosáyana chojni, a ntá jehe ch'án mé tsjanchia jie tí sín kuitekakonhya. ⁵¹ Imá tjetoan tí nkehe tjétjonkará kixin tí tsitekaónrá tí nkehe tjákua la í ts'énhyará —ichro ch'án.

⁵² Ntá kjuátēhe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsitekaónni tí nkehe tjákua jaha ntá í ts'énhyani, ichrua. ⁵³ ¿Xá imá tétōan jaha la ntá kánhyó t'etōan it'éni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátēhe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrorá kixin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntaxrjan kixin janhan chonhya ch'án ntá chrókóyōna tí jahará chrókjuit'ayahará. Kjánchó janhan na choxian ch'án la ko ntaxiteyáha tí nkehe t'etōan ch'án. ⁵⁶ Ch'ín Abraham tí nkexro tsik'axrjenixinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uikon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuénté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátēhe ch'ín Jesús ntáchro ch'án kixin:

—Imá tjetoan tí nkehe tjétjonkará kixin naxa kohya ch'ín Abraham mé xráxin itjen janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án njnko ntá chr'éxin k'uaxrxjin ch'án ntiha. K'uátsinka ch'án jnkōsiné tí tjejó sín sákjuí ch'án.

9

Ch'ín Jesús kjuínchekitōhe jína ijnko ch'ín tsikokjéxin t'ikonhya ch'án

¹ K'uátsinka sín ijnko ntá k'uíkon ch'ín Jesús ntiha tjen ijnko ch'ín tsikokjéxin t'ikonhya ch'án. ² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuénté tsikokjéxin ch'án t'ikonhya ch'án? ¿Á ijé it'é o iné ch'án o á ijé ch'án? —ichro sín.

³ Ntá kjuátēhe ch'ín Jesús ntáchro ch'án kixin:

—Jehya ijé ch'án la ko jehya ijé it'é la ko iné ch'án. Náhí. Jehí xikaha tsikónhen ch'án kixin tí kjuachaxién Dios tsjakoxin kixin tsitōexin ch'án jína. ⁴ Naxa nchakotjin t'ichjánxin sít'a tí xra tjínkaon tí nkexro tsich'ránna. Ntá ts'ixin tie ntá kohya ninxeró tsjacha sich'e xra. ⁵ Naxa itjen janhan mé ntihi chjasintajni na mé janhan xrohi t'inkaséyanxin tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkite ch'án ntaten ch'án intsi nche k'óna nchet'o ntá kuátematōxin ch'án ikon tí ch'ín t'ikonhya. ⁷ Ntá k'uētūenhen ch'án tí ch'ín t'ikonhya kixin:

—Sátjia tí pila tjá ntá it'in Siloé t'ontia kuan —ichro ch'án. (A ntá tí ihnié Siloé mé t'axrxjin nkívee sín kixin K'uítūenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án. ⁸ Ntá tí sín ntōe chjinaxón ntōe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjāxin ch'án k'uékjanchak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátēhe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátēhe ch'án ntáchro ch'án kixin:

—Ijnko ch'in mé it'in Jesús mé kjuích'éna ch'an nchet'o kuátematóxin ch'an kuən la ntá k'ueṭuanna ch'an kixin satsjia ti pila tjiá ntá nchek'in sín Siloé ts'ontia kuən, ichro ch'an. Ntá sákjuia k'ontia, ntá xríñahya ó k'uíkuan —ichro ch'an.

¹² Ntá kjuanchankíhi sín ch'an ntáχρο sín kixin:

—¿Nketi tjen tí ch'in a? —ichro sín.

Ntá kjuáteḡhe ch'an ntáχρο ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'in k'uek'ikonhya kuitḡhe jina

¹³ Ntá tí sín a sákjuiko sín tí ch'in k'uek'ikonhya sákjuichréhe sín tí sín fariseo a. ¹⁴ A ntá tí yaon t'ok'éhe sín mé tsíkijich'éna ch'in Jesús tí nchet'o kjuínchekitoéxín jina tí ch'in k'uek'ikonhya. ¹⁵ A ntá tí sín fariseo xíkjančankíhi sín ch'an inaá kixin nkexrí kuitḡhe ch'an jina t'ikon ch'an jie. Ntá kjuáteḡhe ch'an ntáχρο ch'an kixin:

—Kuátematóxin ch'an nchet'o kuən, ntá k'ontia kuən ntá jie t'íkuan —ichro ch'an.

¹⁶ Ntá iso tí sín fariseo ntáχρο sín kixin:

—Tí chojni a jehya kuénte Dios kixin chántahya ch'an kjuasáyé tí yaon t'ok'éheni —ichro sín.

Kjánčó ikjé sín ntáχρο sín kixin:

—¿Xá nkexrí chrókuasin ch'an kjuaxroan jie tí chánta ch'an jie? —ichro sín.

Mé xíkaha jnkokónhya kjuenkayáxin tí jehé sín. ¹⁷ Ntá xíkjančankíhi sín tí ch'in k'uek'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuáteḡhe ch'an ntáχρο ch'an kixin:

—Janhan ntáxrjan kixin jehé ch'an mé ijnko nkexro chrónka itén Dios —ichro ch'an.

¹⁸ Kjánčó tí sín judío kuitékakónhya sín kixin chaxín k'uek'ikonhya ch'an ntá jie t'ikon ch'an. Ntá k'uiyehé sín tí it'é la ko tí iné tí ch'in tsíkitoḡhe jina. ¹⁹ Kjuanchankíhi sín ntáχρο sín kixin:

—¿Á xjaan tíhi tí ntáχrorá kixin tí tsíkokjéxin ch'an t'ikonhya ch'an? ¿Ntá nkexrí jie t'ikon ch'an? —ichro sín.

²⁰ Ntá kjuáteḡhe tí it'é la ko tí iné ch'an ntáχρο sín kixin:

—Ó noheni kixin xjeenni ch'an la ko noheni kixin tí kokjéxin ch'an t'ikonhya ch'an.

²¹ Kjánčó noehyani nkexrí kixin t'ikon ch'an jie la ko noehyani nkexro kjuínchekitoḡhe ch'an jina. Tjančankíhírá ch'an, ó ntḡto ch'an, ntá jehé ch'an tsochrónka ch'an kixin nkexrí kuitḡhe ch'an jina —ichro sín.

²² Mé xíkaha kjuáteḡhe tí it'é la ko tí iné ch'an kixin chrakonḡen sín tí sín judío kixin ó kjuixín chrónka tí sín judío kixin tsjanjonhya sín kjuachaxín ts'ixenhen njnko tí sín titekaon kixin ch'in Jesús mé tí nkexro Cristo. ²³ Mé xíkaha ntáχρο tí it'é la ko tí iné ch'an kixin chrókjuanchankíhi sín ch'an, ó ntḡto ch'an, ichro sín.

²⁴ Ntá yóxin xik'iyehé tí sín judío tí ch'in k'uek'ikonhya ntá k'ueṭuənhen sín ch'an kixin:

—Tjetsjehe Dios ntá ntoá chrónka kixin ó noheni kixin tí ch'in a na chánta ch'an jie —ichro sín.

²⁵ Ntá tí ch'in k'uek'ikonhya kjuáteḡhe ch'an kixin:

—Nonahya á chánta ch'an jie ó á chántahya ch'an jie. Jnkokóá nkehe nóna kixin senó k'uek'ikonhya ntá jie t'íkuan —ichro ch'an.

²⁶ Ntá xíkjančankíhi sín ch'an inaá kixin:

—¿Nkexrí kjuích'e ch'an kixin kjuíntak'ikuan ch'an? —ichro sín.

²⁷ Ntá kjuáteḡhe ch'an ntáχρο ch'an kixin:

—Ó kjuixín tjonkará kjánčó titekákonhyará. ¿Nkeuènté tjnkáonrá kixin tsotjjonkará inaá? ¿Á kjaxinrá tjnkáonrá tsochréhérá ch'an? —ichro ch'an.

²⁸ Ntá kóninkakonhen sín ch'an la k'uántaxínḡin sín ch'an la ko kjuáteḡhe sín kixin:

—Jaha la chréhé tí chojni a. A ntá jeheni na chréhéni tí nkehe k'ueṭoan ch'in Moisés. ²⁹ Ó noheni kixin Dios k'uenixjehé ch'in Moisés. A ntá tí ch'in a la noehyani nketi tsíkijxin ch'an —ichro sín.

³⁰ Ntá kjuáteḡhe tí ch'in ntáχρο kixin:

—Imá ókjé tíha. Tí ch'in a mé kjuínchek'ikonnya. A ntá jahará ntáχrorá kixin noahyará nketi tsíkijxin ch'an. ³¹ Ó noheni kixin tienhya Dios tí nkehe tjanchia tí chojni chánta jie. Jehó tinḡin ch'an tí nkehe tjanchia tí sín titekaon Dios la ko nchexiteyéhé sín tí nkehe tjinkaon ch'an. ³² Nunca kienhyéni kixin ijnko nkexro chrókjuínchek'ikon ijnko chojni tsíkokjéxin t'ikonhya. ³³ A ntá tí nkexro a tí chrókujxinhya ch'an tí tjen Dios la kjá ninkehó nkehe xitjahya chrókjuích'e ch'an —ichro ch'an.

³⁴ Ntá kjuáteḡhe tí sín fariseo ntáχρο sín kixin:

—Jaha la nchónhya jje chonta tió kokjíha. A ntá jie zá tjinkávan kixin jaha chrókuáukohéni ní? —ichro sín.

Ntá kótéka sín tí ch'ín a kixin ts'axrjexín ch'án tí nínko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xikaha k'uetuénhen tí sín judío kixin ts'axrjexín nínko tí ch'ín k'uek'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—Zá tinkachónkia tí Xjeen Dios K'óna Chojní? —ichro ch'án.

³⁶ Ntá kjuátéhe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátéhe ch'ín Jesús ntáchro ch'án kixin:

—Ó k'uikuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án tqté ch'ín Jesús ntáchro ch'án kixin:

—Ije kuítekavan tí jaha Ínchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uejontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—Zá kjaxin jeheni ntakótáni? —ichro sín.

⁴¹ Ntá kjuátéhe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahará jje. Kjánchó ntáchrorá kixin t'ikonrá. Méxra chontará jje —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjetoan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjehé ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsqan va itén ch'án. Ntá t'iyexín ch'án jnkojnko ihníjé jnkojnko tí kolélo kuènte ch'án ntá ts'axrjexín va ntqé va. ⁴ Ntá t'íkon ch'án kixin k'uaxrje kaín va ntá kuítónhen ch'án va ntja ntá tinkáchréhe va kixin tjatsqan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsqanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús inaá ntáchro ch'án kixin:

—Ijnko nkehe tjetoan tsotjonkará kixin janhan la éxi tí puerta t'ixenxín tí kolélo tí t'inkachjina va. ⁸ Kaín tí sín kuítónxin ntja kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsáará la mé tsyóhárá tí kolélo siín kjuachaxín ts'axrjexín va tí kórré va sátsjikjine va la ko siín kjuachaxín ts'ixenhen va tí ts'inkachjina va inaá.

¹⁰ A ntá xíchee mé jehó chrókueé la ko tjinkaon chrók'óyán la ko chrókuinçek'itjáyan kaín nkehe. A ntá janhan k'uinka kixin tsochontaxínrá kjuachón na mé kjuachón jnkochrín. ¹¹ Janhan mé ijnko pastor jína a ntá tí pastor jína mé ts'enyákonhen tí kolélo a. ¹² A ntá tí nkexro ch'e xra tjinkaon chrókuacha ó na mé ts'íkon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsínká va la sátsjichroe va. ¹³ Mé xikaha tí chojni tjinkaon chrókuacha tí xra chrókuich'e ó la mé sátsji. A ntá tí kolélo la ántosén ch'án kuáhya ch'án kuènté tí jehe va.

¹⁴⁻¹⁵ A ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxi kolélo kuèntana la ko jehe sín mé chóxin sín tí janhan. Ntá ts'ényákonhan tí sín éxi kolélo kuèntana. ¹⁶ Kjaxin chonta kolélo naxa jehya kórré va ntihi mé kjaxin t'ichjánxin sátsjicakján va. A ntá tí tsitekakonna va ntá ts'óna jnkokqá kórré va la ko jnkokqá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna inaá. ¹⁸ Kohya nkexro tsakitsjena tí kjuachón chonta janhan tí chrókuánjonhya kjuachaxin. Chonta janhan kjuachaxin its'én

la ko chonta janhan kjuachaxin tsoxechónna inaá. Tíhi mé k'uetuanna T'aná —ichro ch'in Jesús.

¹⁹ Tió kuínhin tí sín judío tí nkehe ntáchro ch'in Jesús ntá kjuankíxin jnkokoáhya kjuenkayáxin sín. ²⁰ Nchónhya tí jehe sín ntáchro sín kíxin:

—¿Nkeuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kíxin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'in Jesús

²² A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjin tsík'óna nínko. ²³ Ntá ch'in Jesús itjen ch'án tí nínko tí ntaşin kuènte Salomón. ²⁴ Ntá tí sín judío k'uantatjen sín tí ch'in Jesús kjuanchankíhi sín ch'án kíxin:

—¿Hasta nkesá ts'ejóchónhenni tsinhinni jína? A ntá jie chronka ntoá kíxin á chaxín jaha tí Cristo —ichro sín.

²⁵ Ntá kjuátêhe ch'in Jesús kíxin:

—Ó tjonkará ntá naxa titekákonhyará. Kaín tí xra tjet'á janhan tí kjuachaxin kuènte T'aná mé tjakoxín nkexro tí janhan. ²⁶ Kjánchó jahará titekákonhyará kíxin jahará la jehya kolélo kuéntana éxi tjonkará senó. ²⁷ Tí kolélo kuéntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan. ²⁸ Janhan mé tjahá va tí kjuachón jnkochrín la í ts'itjáyannya va la ko ninkexró tsjachahya tsakitsjexín va tjaná. ²⁹ Ó kjuanjon T'aná, mé tí nkexro tjetóxin t'etoan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá. ³² Ntá kjuátêhe ch'in Jesús ntáchro ch'án kíxin:

—Nchónhya nkehe jína k'uikonrá kjuákoşian kjuachaxin kuènte T'aná. ¿Ntá nkeuènté chróchjinárá xro? —mé chro ch'án.

³³ Ntá kjuátêhe tí sín judío kíxin:

—Jehya tí kjuaxroan jína tjásian chrótjixiánni xro. Náhí. Jaha ijnko chojni ó ntá kjuinchejóhé asán Dios na mé tsotjixiánni xro —ichro sín.

³⁴ Ntá ntáchro ch'in Jesús kíxin:

—Ntá ntáchro xroon itén Dios tsíkjin sín ósé kíxin ntáchro Dios kíxin: “Kjaxinrá éxi Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya sitekakonhyani tíha. Mé xikaha ntáchro Dios kíxin éxi Dios jnkojnko nkexro k'uáyéhe itén ch'án. ³⁶ A ntá kjuéyána Dios ichr'ánna ch'án chjasintajni, ¿ntá nkeuènté ntáchrorá kíxin k'uantaxinhan Dios kíxin janhan ntáxrjan kíxin Xjeen Dios tí janhan? ³⁷ Kja tí chrókjuit'ahya tí xra ich'e T'aná la chrókuítékákonhyará. ³⁸ A ntá kjónté tjet'á tí xra a kjónté titekákonhyará tí janhan na mé chrókuítékáonrá tí xra tjet'á chrókoáoşinrá chrókiénxinrá kíxin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'in Jesús inaá chrók'uijkjéhe ch'án ntá kjuachahya sín ntá sákjuí ch'án.

⁴⁰ Ntá ch'in Jesús xikjan ch'án tí í jnko lado ntarío Jordán inaá tí k'uékjak'e ch'in Juan k'uékjítexín ch'án chojni senó. ⁴¹ Ntá nchónhya chojni sákjuichréhe sín ch'án ts'ikon sín ch'án ntáchro sín kíxin:

—Chaxín ch'in Juan kjuasinhya ch'án kjuaxroan jié la kjónté ntoá tí nkehe chónka ch'án kuènte tí ch'in i —ichro sín.

⁴² Ntá nchónhya sín kuítékaon sín tí ch'in Jesús tí kjuíji sín ntiha.

11

Ik'uéen ch'in Lázaro

¹ Itjen ijnko ch'in níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'in Lázaro mé tí ch'in níhi na mé jehe tjan mé tí tjan kuíkítexín aceite xraxé toté Inchéni la ko kjuínchexámáxin tjan kaxíhi tjan toté ch'án.* ³ A ntá yóí tí kichó ch'án chjin ichr'án sín ijnko nkexro tsochéna tí ch'in Jesús kíxin:

—Inchéni jaha, tí nkexro choxian tjuéhé la níhi ch'án —ichro ch'án.

⁴ Ntá kuínhin ch'in Jesús ntá ntáchro ch'án kíxin:

* 10:34 Salmo 82.6 * 11:2 Juan 12.3

—Tí chín chóna ch'án jehya kixin ónaá chrók'uitjáyanxón ch'án tí ts'en ch'án. Náhí. Tíha mé tsjakoxin tí kjuachaxin jié kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhè ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na k'jonté kuitohe ch'án iyó yaon inaá tí nó kjuák'e ch'án. ⁷ A ntá chr'éxín ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naḡa séhya tí sín judío ntiha chrótjáha sín xro tjincaon sín chrók'óyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'éxín ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḡa ch'án —ichro ch'án.

¹² Ntá ntáchro tí sín k'uájiko ch'án kixin:

—Ínchéni, tí k'uájua ch'án la mé chrókuitohe ch'án jina —ichro sín.

¹³ Kjánchó tí nkehe ntáchro ch'ín Jesús mé t'axrxjéxín kixin ó tsikjixin tsík'en tí ch'ín Lázaro. Ntá tí sín k'uájiko ch'án kjuenkayáxín sín kixin ó jehí tjeua ch'ín Lázaro. ¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xikaha tsitékákoxínra. A ntá jie íntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxín tikjéxín sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni Ínchéni —ichro ch'án.

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsikjixravá ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjinxín. ¹⁹ A ntá itsjé tí sín judío sátsikjitsjehe sín tí tjan Marta la ko tí tjan María tjeónixjehe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrxjéxín tjan nchia tsjixinhin ntja. A ntá tí tjan María kuitohe tjan nchia. ²¹ Ntá tí tjan Marta ntáche tí ch'ín Jesús kixin:

—Ínchéni jaha. Chrókjuak'e ntihi ntá chrók'uenhya kichó ni. ²² Kjánchó ó nõna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntáchro tjan Marta kixin:

—Ó nõna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntaxechón chojni la ko tsochóna sín kjuachón. Tí nkexro tsitekaon sín tí janhan na k'jonté ó tsík'en sín la naḡa sintaxechón sín inaá. ²⁶ La ko kaín xín tí sín naḡa tjejóchón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

²⁷ Ntá ntáchro tjan kixin:

—Chaxín Ínchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsikjixravá nkexro Lázaro

²⁸ Ó kjuixín ntáchro tjan Marta xikaha ntá sákjuik'íyehé tjan kichó tjan María ntá imó chénka tjan kixin:

—Ntiha tjan Maestro t'iyḡá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuitsjehe tjan tí ch'ín Jesús. ³⁰ Naḡa tsík'ixenhya ch'án chjasin naḡa tjan ch'án tí xéta ch'án tjan Marta. ³¹ Ntá tí sín judío tjeónixjehe tjan María kixin kánhyó ts'ává tjan, mé k'uikon sín kixin tjoka k'uaxrxjéxín tjan nchia, ntá kjuíchréhé sín tjan kjuenkayáxín sín kixin sátsji tjan tí tsikjixravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjan ch'ín Jesús ntá kjuák'exín toch'in tjan toté ch'án ntáchro tjan kixin:

—Ínchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uikon ch'ín Jesús kixin tsjánka tí tjan María la ko tí sín judío kjuikotoxín tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Inchéni, zá sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'íkonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetóan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Inchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátèhe ch'ín Jesús ntáchro ch'án kixin:

—Ó tjonka kixin tsitekávan ntá ts'ikuan tí kjuachaxin jié kuènte Dios —ichro ch'án.

⁴¹ Ntá kjuakjiin sín tí xro a. Ntá ch'ín Jesús konta ch'án nkajní ntáchro ch'án kixin:

—It'eni, tjáncháha kjuasáya kixin ó kuínhín tí nkehe ntáxrxjan. ⁴² Janhan na ó ñona kixin xráxín tjetinhín tí nkehe ntáxrxjan ntá xjakahá ntáxrxjan jie kixin tsinhín tí sín tjejóntaxín ntíhi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxín ch'án tòye, na tí tja ch'án la ko tí toté ch'án naça tjejóchróntetoxín ka la ko tí nkayakon ch'án tjejkèxin ijnko ka. Ntá k'uetóan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxin sín tí tjan María mé k'uikon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuitsjehe sín tí sín fariseo kjuíchénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchat'á t'etóan jnkokoá kójnkotséko sín tí sín antsí t'etóan, la ntáchro sín kixin:

—¿Xá nkexrí chrókuich'ehe ní ch'ín a kixin jehe ch'án mé tjasin ch'án kjuaxroan jié? ⁴⁸ A ntá tí chrókuítóheni ch'án xjakahó ntá kaín xín chojni chrókuítekaon sín tí jehe ch'án, ntá tsi tí sín romano t'etóan sinchek'itjáyán sín tí nínkoéni la ko tí xra chóntani la ko tí nacióan kuènténi —ichro sín.

⁴⁹ Ntá ch'ín Caifás mé tí nkexro t'etuehenen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjasénni kixin ntá chrók'uitjáyanhya kuènté tí nacióan kuènténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetuehenen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nacióan judía. ⁵² A ntá jehya tí nacióan kuènte sín ó chrók'uenyákonhen ch'án. Náhí. Kjaxin kixin sinchekaaá ch'án kaín tí sín ts'óna xjen Dios tjejó sín kuènté chjasintajni. ⁵³ A ntá tí yaon a tí sín t'etuehenen tí sín judío mé kjuankixin sín kjuenkayáxin sín kixin chrók'óyan sín tí ch'ín Jesús.

⁵⁴ A ntá ch'ín Jesús la í noxinhya k'uáji tí k'uéjó tí sín judío, na mé k'uaxrjéxín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítóeko ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjéxín sín chjasén sín sákjuí sín chjasin Jerusalén kixin ntaha tsoyaxínhin sín kixin tsotjóá sín kjónté naça xránkixinhya ts'ixin tí kia pascua. ⁵⁶ Ntaha k'uájikjeyá sín tí ch'ín Jesús k'uéjoxenhen sín tí nínko jié ntá kjuanchankíhi sín kichó sín kixin:

—¿Jahará nkechorrá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuehenen tí sín nchat'á na ó k'uetóan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Jnko tjan kjuíncheká tjan aceite xraxé náxrjón toté tí ch'in Jesús
(Mt. 26.6-13; Mr. 14.3-9)

¹ Naxa t'itjayan injon yaon ntá ts'ixín tí kia pascua. A ntá ch'in Jesús sákjuí ch'án chjasin Betania tí tjen ch'in Lázaro. Tí ch'in Jesús mé tsíkjinchexechón ch'án. ² Ntá ntíha kjóne sín ijnko kónjin kjuikosáyehe sín tí ch'in Jesús. A ntá tí tjan Marta mé kjuíncheyaxín tjan. A ntá tí ch'in Lázaro la ko í so sín k'uéjío sín kjóneko sín tí ch'in Jesús. ³ Ntá tjan María kujukao tjan it'ó litro aceite tsík'óna xroaon nardo imá tjehe tsík'enaxín tjan ntá kjuíncheka tjan toté ch'in Jesús ntá kaxihí tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroaon. ⁴ Ntá ch'in Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'in Jesús, na mé tí ch'in sinchekji tí ch'in Jesús chr'éxin, mé ntáchro ch'án kixin:

⁵ —¿Nkekuénté kóxiha tí xroaon xraxé, chrókóxiin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'in Judas la jehya ntáchro ch'án xikaha kixin chrókjuikonóhe ch'án tí sín nòà. Náhí. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjínká chichaon ntá xráxin teé ch'án tí chichaon tsíxrenájín ntiha. ⁷ Ntá ntáchro ch'in Jesús kixin:

—Nté títqherá tjan. Tsíkjak'echjina tjan tí xroaon a kixin tí yaon tsoxrávána. ⁸ Tí sín nòà jnkochrín ts'ejokoará sín. A ntá janhan jnkochrínhya ts'ejóni —ichro ch'án.

Tí sín judío itjo sín nkexi chrók'óyan sín tí ch'in Lázaro

⁹ A ntá itsjé tí sín judío k'uixikónohe sín kixin ch'in Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'in Jesús ó. Náhí. Kjaxin tjínkaon sín chrókjuitsjehe sín tí ch'in Lázaro mé tí ch'in tsíkjinchexechón ch'in Jesús. ¹⁰ Ntá tí sín nchat'á t'etoan mé kójnkotsé sín kjuenkayáxin sín chrók'óyan sín tí ch'in Lázaro kjaxin ¹¹ kixin itsjé tí sín judío kuítekaon sín tí ch'in Jesús kixin xikaha kjuínchexechón ch'án tí ch'in Lázaro ntá k'uaxrjekjanxín sín tí sín nchat'á.

K'uixenhen ch'in Jesús chjasin Jerusalén
(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'in Jesús tí chjasin ntiha. ¹³ Ntá kóchrínjin sín chaan ntakajni kjuixinhin sín ntja itsjé ch'in Jesús, itsje sín, ntáchro sín kixin:

—Tjancheheni Dios kjuasáya. Imá jina tí nkexro kjuixín tí kjuachaxién It'eni tjen nkaya nkajni. Imá jina tí ch'in Rey ts'etuñenhen tí nació Israel —ichro sín itsje sín.

¹⁴ Ntá tsík'itja ch'in Jesús ijnko kolócho la ntá kjuák'ekjen ch'án, éxi nixja itén Dios kixin:

¹⁵ Chrakonhyará jahará tjejorá chjasin Jerusalén, tsjehérá ó tje kui tí ch'in Rey kuéntará,

tjekjen ch'án ijnko kolócho.*

¹⁶ A ntá tió kónhen tíha kíenxinhya tí sín k'uájiko ch'in Jesús kixin nkekuénté xikaha kónhen. A ntá chr'éxin tió kjuixín sákjuijia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios ósé nkexri tsñhen ch'án, na ntá xikaha chaxín xiteyá tí chrónka sín senó kixin xikaha tsñhen ch'án.

¹⁷ Mé xikaha kaín tí sín tsíkójnkotsé tí kjuák'e ch'in Jesús tió k'uíyehé ch'án tí ch'in Lázaro kixin ts'axrjexín ch'án tí tóye tsíkjixravá ch'án ntá xechón ch'án mé tí sín a mé chrónka sín tí nkehe k'uíkon sín. ¹⁸ Mé xikaha sákjuixinhin sín tí ntja tsjixín ch'in Jesús, k'uixikónohe sín kixin xikaha tsíkjasin ch'in Jesús tí kjuaxroan jíé. ¹⁹ Mé xikaha ntáchro tí sín fariseo itjo sín kichó sín kixin:

—Tsjehérá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'in Jesús

²⁰ Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'in Felipe, chjasén ch'án mé Betsaida, estado Galilea, chrónóhehe sín ch'án kixin:

—Tjínkaonni chrók'uikonni tí ch'in Jesús —ichro sín.

²² Ntá ch'in Felipe sákjuíchenka ch'án tí ch'in Andrés. Na ntá yóí sín sákjuíchenka sín tí ch'in Jesús. ²³ Ntá ntáchro ch'in Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxín kuénte It'é. ²⁴ A ntá tsojtjonkará ijnko nkehe chaxín kixin tí chrókjuítsinkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uén

* 12:15 Zacarías 9.9

tí noa a ntá chrók'óna nchónhya noa kixin chrótjá sín. ²⁵ A ntá tí nkexro imá tjuèhë asén kixin kohya nkehe chrók'uatinsinka na mé tsochóntahya ch'án kjuachón jnkochrín. A ntá tí nkexro tjekuénhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochóna ch'án kjuachón jnkochrín. ²⁶ A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xikaha na mé T'aná mé tsjikosáyehe tí jehe sín.

Ch'in Jesús chrónka ch'án kixin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sincheakaána ch'án tí nkehe tsona jie o náhi? Kjánchó xra ó k'uinka xikaha tsona. ²⁸ Jaha It'éni, tjákoxian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuákoxian tí kjuachaxin la ko xikaha xikjákoxian inaá.

²⁹ A ntá tí sín tjejóntaxín tsikinhin sín mé ntáchro sín kixin kjóna, la ko í so sín ntáchro sín kixin:

—Ijnko ch'in ángel nixjehe ch'án —ichro sín.

³⁰ Kjánchó ntáchro ch'in Jesús kixin:

—Náhi. Jehya kixin janhan tí jie chrókujnhan tí nixja ch'án. Náhi. Nixja ch'án kixin tsinhínra jahará. ³¹ Ntá jie tsitoxén tí ijíe chojni chjasintajni na mé tí nkexro t'etóan chjasintajni mé ts'axrjehe ch'án tí xra t'etóan ch'án. ³² A ntá tíó tsjak'énkánia ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

³³ Mé xikaha chrónkaxin ch'án kixin nkexrí ts'énxin ch'án. ³⁴ A ntá kjuátehe tí sín ntiha ntáchro sín kixin:

—Kuínhinni nkekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuènté ntáchrua kixin tí Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'in Jesús kixin:

—Naxa tjeen tí xrohi tjejókoará, kjánchó í séhya tsjak'e. Chrók'uajirá tí naxa tjeen tí xrohi t'inkaséyanxin ntja. A ntá náhi la ó ts'ixin tie. A ntá tí sín ixri tí sítié a mé noehya sín nketí sátsji sín. ³⁶ Titekáonrá tí xrohi tí naxa tjeen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'in Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítékakonhya sín tí ch'in Jesús

³⁷ K'uékjasin ch'in Jesús nchónhya kjuaxroan jie k'uikonxín kon sín ntá kjónté kuítékakuenhya sín ch'án ³⁸ kixin mé xikaha tsoxiteyá tí nkehe tsintáchro ch'in Isaías tsíkjin ch'án ósé kixin:

Ínchéni, kohya nkexro kuítékaon tí nkehe chrónkani.

Kohya nkexro kjuínchenohe Dios tí kjuachaxin jie kuènte ch'án.†

³⁹ Méxra kuítékakuenhya sín tí ch'in Jesús éxi tsíkjin ch'in Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuíntakitóha sín jina.‡ ⁴¹ Xikaha k'uéchrónka ch'in Isaías imá ósé kixin k'uék'ikon ch'án tí kjuachaxin jie kuènte Jesús ntá k'uéchrónka ch'án nkexrí tsjak'e tí ch'in Jesús.

⁴² Kjánchó itsjé tí sín judío t'etóan kuítékaon sín tí ch'in Jesús kjánchó noxínhya chrónka sín. Chrakonhen sín tí sín fariseo kixin chrókóninkaon sín la í chrókjuanjonhya sín kjuachaxin chrók'uixenhen sín tí njnke sín judío. ⁴³ Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjuéyá sín kixin chrókjuikosáyehe sín Dios.

Tí nkehe ntáchro ch'in Jesús mé tsitoxénin ijíe chojni

⁴⁴ Ntá itsen nixja ch'in Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uetuanna k'uinka. ⁴⁵ Éxi tí t'ikonrá tí janhan mé xikaha t'ikonrá tí nkexro k'uetuanna k'uinka. ⁴⁶ A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a. ⁴⁷ A ntá tí jnkójínra tindhínra tí nkehe xrxanka ntá titekákonnahyará la jehya janhan sintakjasótíar kixin jehya kixin k'uinka sintakjasóte chojni chjasintajni. Náhi. K'uinka kixin sintakaá chojni. ⁴⁸ A ntá tí titekákonhyará tí janhan la ko titekákonhyará tí tan kuèntana la ó sín nkexrí tsitoxénin ijíar, na mé éxi tí tan xrxanka mé Dios sinchekitóxénin ijíará tí yaon tsjixixín chjasintajni. ⁴⁹ Jehya tí nkehe

† 12:38 Isaías 53.1 ‡ 12:40 Isaías 6.10

kuèntana tjéxrjanka. Náhí. T'aná na mé tí nkexro k'ueṭuanna k'uinka mé k'ueṭuanna nkehe tsoxrjanka la ko nkehe tsjáku. ⁵⁰ A ntá nõna kixin tí nkehe k'ueṭoan T'aná mé xranjonxin tí kjuachón jnkochrixín. Mé xíkaha tí nkehe ntáxrjan mé tjéxrjanka kixin T'aná mé k'ueṭuanna.

13

Ch'in Jesús kjuínchek'onti ch'an toté tí sín k'uájiko ch'an

¹ A ntá tí yaon xíka tí ntóye tsjasín sín tí kia pascua. A ntá ch'in Jesús ó nohe ch'an kixin ó kjuixraká tí hora tsitöhe ch'an chjasintajni sátsjichréhe ch'an It'é ch'an. Xrácín tjuèhé ch'an tí sín kuènté ch'an chjasintajni, a ntá jie tsjákoxin ch'an kixin imá tjuèhe ch'an tí jehe sín.

² A ntá tí ch'in Tsochren tsík'etuenhen asén ch'in Judas Iscariote, it'é mé it'in Simón, kixin sinchekji ch'an tí ch'in Jesús. ³ Ntá ch'in Jesús la ó nohe ch'an kixin tsíkixín ch'an tí tjen Dios la ko xíkjan ch'an sátsjichréhe ch'an Dios inaá. La ko ó nohe ch'an kixin It'é ch'an tsíkjanjon kjuachaxin ts'etuenhen ch'an kaín xín nkehe. ⁴ Ntá naṣa tjejóne sín ntá k'uínkatjen ch'in Jesús kuakitsje ch'an tí ka titsáte ch'an la kuákja ch'an ijnko ka xámáxin chojni t'ónti k'uínkat'óxin ch'an. ⁵ Ntá kuíkja ch'an ijnko nkehe ntá, ntá kjuankíxin ch'an kjuínchek'onti ch'an toté jnkoinko tí sín k'uájiko ch'an la ko kjuínchexámáxin ch'an tí ka k'uínkat'óxin ch'an.

⁶ Na ntá tió kjuixraká tí tjen ch'in Pedro, a ntá ntáchro ch'in Pedro kixin:

—Jaha Inchéni la, ¿nkekuènté chrókjuínchek'ontia toténi? —ichro ch'an.

⁷ Ntá kjuátehe ch'in Jesús ntáchro ch'an kixin:

—Jaha la naṣa tiénxinha tí nkehe tjet'a janhan. Chr'éxin ntá tsiénxian nkekuènté tjet'a tíha —ichro ch'an.

⁸ Ntá ntáchro ch'in Pedro kixin:

—Jaha la sinchek'ontihya toténi —ichro ch'an.

Ntá ntáchro ch'in Jesús kixin:

—Tí sintak'ontihya tí jaha la kjá ninkehó tsochontahya tí janhan —ichro ch'an.

⁹ Ntá kjuátehe ch'in Simón Pedro ntáchro ch'an kixin:

—Náhí, Inchéni. Jehya tí toténi ó chrókjuínchek'ontia. Kjaxin itjani la ko ikjani chrókjuínchek'ontia —ichro ch'an.

¹⁰ Ntá ntáchro ch'in Jesús inaá kixin:

—Tí sín tsíkixín tsík'onti la t'ichjánxinha kuenté sín ts'ónti sín inaá. Náhí. Jehó toté sín ó mé t'ichjánxin naṣa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'an.

¹¹ Mé xíkaha ntáchro ch'in Jesús kixin kénhya sín tjóá sín kixin ó nohe ch'an nkexro sinchekji ch'an.

¹² Ntá tió kjuixin kjuínchek'onti ch'an toté sín kaín sín ntá xík'inkáya ch'an inaá tí ka kuítsáte ch'an ntá kjuák'etjaxín ch'an tí k'uínkatjenxin ch'an. Ntá ntáchro ch'an kixin:

—¿Á kiénxinrá tí nkehe kjuít'a? ¹³ Jahará la ntáchrorá kixin janhan Maestro kuèntará la ko Inchárá. Chaxín ntoá ntáchrorá kixin janhan tíha. ¹⁴ Janhan tí Maestro kuèntará la ko inchárá kjuíntak'ontia totará. A ntá jahará kjaxin xíkaha chrókjuínchek'ontirá toté kíchuará. ¹⁵ Janhan mé kjuákoxián kixin xíkaha chrókjuich'erá éxi kjuít'a janhan. ¹⁶ Ijnko nkehe chaxín tsóṭjonkará kixin tí sín ch'exón xra mé t'etóanhya sín éxi t'etóan tí lámqe sín, la ko tí sín k'uáyéhe sín ijnko xra t'etóanhya sín éxi t'etóan tí sín kjuanjon tí xra a. ¹⁷ Tí chrókiénxinrá nkehe tíha la ko chrókjuínchexitheyará la chrókócháhará má.

¹⁸ Jehya kaín rá xíkaha ntáxrjan. Ó nõna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: “Ijnko nkexro tjeñekian mé tsjanjonkian.”*

¹⁹ Mé xíkaha tjetjonkará senó kixin tió ts'atsínka tíha ntá tsitekáonrá kixin janhan mé tí nkexro xrácín tjen. ²⁰ Ijnko nkehe tjeṭoan tjetjonkará kixin tí tsjánjonrá kjuachaxin tsitöhe tí chojni ichr'an janhan, mé éxi yóhe chrókjuánjonrá kjuachaxin chrókuitöhe tí janhan, a ntá tí tsjánjonrá kjuachaxin tsitona janhan mé éxi yóhe chrókjuánjonrá kjuachaxin chrókuitöhe tí nkexro k'ueṭuanna k'uinka —ichro ch'in Jesús.

Ch'in Jesús chrónka kixin ch'in Judas sinchekji ch'an

(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'in Jesús tíha, ntá kóxakonhen asén ch'an má ntá ntoá chrónka ch'an kixin:

—Ijnko nkehe tjeṭoan tsóṭjonkará kixin jnkoinrá tjejorá ntihi mé sinchekjiráni —ichro ch'an.

²² Ntá tí sín k'uájiko ch'an kjuanjín komáxin la ko í komáxin kíchó sín kixin noehya sín nkexro tí ntáchro ch'an. ²³ A ntá ijnko ch'in k'uájiko ch'in Jesús imá tjuèhe ch'an itjen

* 13:18 Salmo 41.9

ch'án chjinaxón tí tjen ch'in Jesús tjejóne sín. ²⁴ Ntá ch'in Simón Pedro kjuákoexín seña k'ueŕtuenhen ch'án tí í jnko ch'in a kixin:

—Tjanchankíhí ch'án nkeŕro tíha —ichro ch'án.

²⁵ A ntá tí ch'in a na mé ántsí kóchjinehe ch'án tí ch'in Jesús, ntá kjuanchankí ch'án ntáchro ch'án kixin:

—Inchéni, ¿nkeŕro tíha? —ichro ch'án.

²⁶ A ntá kjuátehe ch'in Jesús ntáche ch'án tí ch'in a kixin:

—Sintakjata it'ò nioŕtja, a ntá tí nkeŕro tsotjaha tí t'ò nioŕtja a mé tí nkeŕro a —ichro ch'án.

A ntá mé xikaha kjuínchekjata ch'in Jesús it'ò nioŕtja ntá chjéhe ch'án tí ch'in Judas Iscariote, it'é ch'án mé it'in Simón. ²⁷ Ntá k'uáyéhe ch'án tí nioŕtja ntá tuénxín k'uixenhen ásén ch'án tí ch'in Tsochren. Ntá ntáche ch'in Jesús tí jehe ch'án kixin:

—Tí xra tjinkávan sích'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuénté xikaha ntáchro ch'án.

²⁹ Ch'in Judas la t'ayakonhen ch'án tí nkehe tjínká chichaon ntá iso sín kjuenkayáxin sín kixin ách'e ch'in Jesús mé k'ueŕtuenhen ch'án tí ch'in Judas kixin ichrén nkehe sátsjik'ena ch'án kuénte tí kia a, o ách'e ichrén nkehe sinchekitqñhen ch'án tí sín nóa a. ³⁰ Ntá k'uáyéhe ch'in Judas tí nioŕtja, a ntá k'uaxrxjén ch'án ntiha. A ntá ó k'uixín tie.

Ijnko nkehe nixin k'ueŕtoan ch'in Jesús

³¹ A ntá ó kjuixín sátsíkji ch'in Judas, ntá ntáchro ch'in Jesús kixin:

—A ntá jie tsonoxín tí kjuachaxín jie kuénte tí Xjeen Dios K'óna Chojni la ko tsjakoŕxín ch'án tí kjuachaxín jie kuénte Dios. ³² Na mé xikaha tí Xjeen Dios K'óna Chojni mé tsjakoŕxín tí kjuachaxín jie kuénte Dios. A ntá Dios mé tsjakoŕxín ch'án tí kjuachaxín kuénte Xjeen ch'án la tjoka tsoxiteyá. ³³ Xjeenni, í séhya naxá tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'ueŕtjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.† ³⁴ Ijnko nkehe nixin tétuqñhanrá ijie kixin chróŕtjuehérá kichuárá éxí yóhe tjuahará mé xikaha chróŕtjuehérá kichuárá. ³⁵ Tí tsotjuehérá kichuárá ntá tsonoxín kain xín chojni síin chjasintajni kixin tinkachónkirá tí janhan —ichro ch'án.

Chrónka ch'in Jesús kixin ch'in Pedro sinchemá ch'án kixin chónhya ch'án tí jehe ch'án
(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhí ch'in Simón Pedro tí ch'in Jesús kixin:

—Inchéni, ¿nketí sátsjia? —ichro ch'án.

Ntá kjuátehe ch'in Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'in Pedro kixin:

—¿Nkekuénté xitjahya tsochráha tí jaha jaí? Kjónté chrók'uényákonhán —ichro ch'án.

³⁸ Ntá kjuátehe ch'in Jesús ntáchro ch'án kixin:

—¿Á chaxín ts'enyákónna jaha? Ijnko nkehe chaxín tsotjonka kixin naxá tsotsjehya tí kochíntqa la ó tsjixin sinchemána nía kixin chonhyana, tsixrua.

14

Jesús mé ntja sátsjixinni tí tjen It'éni tjen nkaya nkajni

¹ Tóxakuanhyará jahará. Titékáonrá Dios la ko kjaxín titékáonrá tí janhan. ² Ntoqe T'aná nchónhya nchia síin ts'ejóni. A ntá tí xikahya chrók'uixin la xikahya chróŕtjonkará. Méxra sátsjiyá sintayóxian tí chrók'uejóni. ³ A ntá tí sátsjiyá sintayóxian, ntá tíó tsjixin ntá ts'inka inaá, ntá sátsjini kixin jahará kjaxín chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí ntja a —ichro ch'án.

⁵ Ntá kjuátehe ch'in Tomás ntáchro ch'án kixin:

—Inchéni, noehyani nketí sátsjia jaha. ¿A ntá nkeŕrí chrókónoheni tí ntja a? —ichro ch'án.

⁶ Ntá kjuátehe ch'in Jesús ntáchro ch'án kixin:

—Janhan mé tí ntja la ko janhan mé tí tan chaxín la ko janhan mé tsjánjuan tí kjuachón. Jehó tí nkeŕro tsitekaon tí janhan mé jina tsjiji tí tjen T'aná. ⁷ Tí chrókjuátsqanrá tí janhan ntá xikaha chrókjuátsqanrá T'aná kjaxín. Na ntá ó choxinrá ch'án jie la ko ó tjejókomará ch'án —ichro ch'án.

⁸ Ntá ntáchro ch'in Felipe kixin:

—Inchéni, títohéni kixin tsochóximni It'á. Táho mé tjinkaonni —ichro ch'án.

⁹ Ntá kjuátehe ch'in Jesús ntáchro ch'án kixin:

—Felipe, ósé tjejóni, ¿a ntá naxá tjátsqanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuénté tjanchána kixin chrókujtoha chrók'uikonrá tí

T'aná? ¹⁰ ¿Á títékákonhya jaha kixin janhan jnkokoá tjékian T'aná, la ko T'aná tjen tí t'jen janhan? Tí nkehe níxja janhan la jehya kuéntana. Náhi. T'aná tjékian janhan mé tjeche ch'án tí xra kuénte ch'án. ¹¹ Títékáonrá kixin jnkokoá tjékian T'aná, a ntá T'aná itjen tí t'jen janhan. Kjonté kuítékákonhyará xikaha la chrókuítékáonrá kixin tí kjuaxroan jíe kjuákoxian k'uikonrá. ¹² Ijnko nkehe chaxín tjonkará kixin tí chaxín tsítékáonrá tí janhan ntá kjaxinrá tsjachará s'ich'erá xra yóhe t'jé'ta la ko kjaxin ixra antsí jíe tsjachará s'ich'erá kixin janhan la ó sátsjyá tí t'jen T'aná. ¹³ Kaín nkehe tsjanchatóxixínrá tí n'ina na mé tsjánjuan kixin xikaha tsjákoxian tí kjuachaxin kuénte T'aná. ¹⁴ Tí chrén nkehe tsjanchatóxixínrá n'ina la janhan la tsjánjuan.

Ch'in Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxín tjuèhérá tí janhan ntá chrójuinchexiteyéhérá tí nkehe kuétuanhanrá. ¹⁶ Ntá tsoxrjannóhã T'aná kixin tsochr'án ch'án Nchakuen ch'án kixin tsjinkítsa tí jahará la ko sinchechéhe asánrá la mé ts'ejokoará jnkochr'ín. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'íkonhya sín ch'án la ko chónhya sín ch'án. Kjánchó jahará ó choxinrá ch'án kixin t'ejokoará ch'án la ko ts'ejokoará ch'án jnkochr'ín. ¹⁸ Janhan na tsjtoáhyará nòerá jahórá, na mé tsokjan inaá kixin ts'ejóni. ¹⁹ A ntá séhya ntá tí sín chjasintajni ts'íkonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na t'jéchuã. ²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá t'ejóni. ²¹ Tí nkexro nohe tí nkehe tétogan la ko sinchexiteyéhé sín mé xikaha tsjákoxín sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehé sín la ko kjaxin janhan tsotjuahã sín la ko tsjákoxian nkexrí t'jen janhan —ichro ch'in Jesús.

²² A ntá tí ch'in Judas, jehya tí ch'in Iscariote tíha, na mé kjuanchankí ch'án kixin: —Inchéni, ¿nkekuénte jehóni tjákoxian, a ntá tjákoéxinhya tí chojni chjasintajni? —ichro ch'án.

²³ Ntá kjuátéhe ch'in Jesús ntáchro ch'án kixin:

—Tí nkexro tjuèhe tí janhan mé sinchexiteyéhé tí nkehe tétogan. La ko T'aná mé tsotjuèhe tí jehé sín la ntá T'aná la ko janhan ts'ejókoni sín. ²⁴ A ntá tí sín tjuèhya tí janhan la mé nchexiteyéhya sín tí nkehe tjákua. A ntá tí nkehe tjákua t'ejotinhínrá la jehya kuéntana. Náhi. Kuénte T'aná tí nkexro k'uetuanna k'uinka.

²⁵ Naxa t'ejóni la t'jetjonkará kaín tíhi. ²⁶ A ntá Nchakuen T'aná tsochr'án ch'án kjuachaxin n'ina mé tsjinkítsa tí jahará la ko sinchechéhe asánrá la ko tsjákoahará kaín nkehe la ko sinchexraxinkaonrá kaín nkehe xrxanka.

²⁷ Kjuaxróxin tsjtóhã la ko kjuaxróxin kuéntana tsotjahará. Jehya éxi tí kjuaxróxin chrókuanjon tí sín chjasintajni. Náhi. Chrókóxakuenhya asánrá la ko chróchrakonhyará. ²⁸ Ó kuínhínrá ntáxrxan kixin sátsjyá la ko tsokjan janhan ts'ejóni inaá. Tí chaxín tjuèhérá tí janhan ntá chrókócháhará tí kuínhínrá kixin sátsjyá tí t'jen T'aná kixin antsí t'etogan ch'án la kánhyó tétogan janhan. ²⁹ Senó t'jetjonkará tíhi kixin tíó tsonhen tíha la ts'ikonrá ntá tsítékáonrá jahará.

³⁰ Ntá jie la í séhya tsonixjahará kixin tí jie itsi tí ch'in Tsochren, mé tí nkexro t'etuenhen tí sín chjasintajni. A ntá jehé ch'án la ninkehó t'etuannahya tí janhan. ³¹ Kjánchó t'ichjánxin kixin xikaha tsonhen ntá tí sín chjasintajni mé tsonhe sín kixin tjuahã T'aná la ko nchexiteyéhã tí nkehe k'uetuanna ch'án. Ntá jie t'inkatjenrá sátsjixinni ntíhi.

15

Tí nta t'óna to uva la ko tí chaan nta

¹ Janhan mé éxi yóhe ijnko ntanòã t'jéchón itsa to uva la ko T'aná mé éxi yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uetjonkará senó. ⁴ Tí tsjtoéhyará tí janhan ntá kjaxin janhan tsjtoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahórá tsjachahyará s'ich'erá tí xra kuéntana tí tsjtohérá tí janhan.

⁵ Janhan na mé yóhe tí ntanòã, a ntá jahará la tí chaan tí ntanòã tsík'ayanta. Tí nkexro jnkokoá t'jenkayáxinkian mé tsjacha ts'óna nchónhya to. A ntá tí tsínkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhya t'jenkayáxinkian na mé éxi yóhe tí nta ch'ehya xra tsíkóchrínjin sín tsík'itji sín chrínta tí nonte a tsoxámá ntá tsoxrejo ntá tsoche.

⁷ Ntá tí chaxín tsjtoéhyará tsínkáchónkirá tí janhan la ko ts'itjáyanyhará tí nkehe kjuákoahará ntá tsjanchiará ichrén nkehe tjínkáonrá la ts'ayéhé. ⁸ A ntá T'aná la tsochéhe ch'án tí ts'ónará itsjé to. Mé xikaha tsjákoxínrá kixin tsínkáchónkirá tí janhan. ⁹ Janhan tjuahará tí jahará éxi tjuãna T'aná. Chrókónohará kixin tjuahará. ¹⁰ Tí tsítékáonrá tí nkehe

kuétuñhanrá ntá tsonohará kixin tjuahará éxi yóhe kjaxin janhan ntaxiteyá tí nkehe k'uetuanna T'aná ntá kónona janhan kixin tjuana ch'án.

¹¹ Mé xikaha tjonkará kaín tíha kixin ntá éxi chána mé xikaha tsjintaxín tsochéhe asánra. ¹² Tí nkehe kuétuñhanrá la mé tíhi kixin chrójuéhérá kichuára éxi tjuahará xikaha. ¹³ Ninkexró chrókóyóhe éxi tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. ¹⁴ Jahará la chojni choxian tí tsitékaónrá tí nkehe tétuñhanrá. ¹⁵ Ntáxrjanha janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámge sín a. Náhi. A ntá jahará la chojni choxian kixin kaín xín nkehe kjuakona T'aná mé kjuakohará. ¹⁶ Jehya kixin jahará kjuéyará tí janhan. Náhi. Janhan mé kjuéyá tí jahará kixin tsotjahará xra, a ntá éxi yóhe to xé mé chrók'uaxrje jina tí xra sich'enará kixin chrók'uitjányaha. A ntá T'aná mé tsotjahará ch'án kaín xín nkehe tsjanchexínra nina. ¹⁷ Mé xikaha tétuñhanrá kixin tsotjuéhérá kichuára.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín. ¹⁹ Tí chrókókuéntará chjasintajni ntá tí sín chjasintajni chrójuéhérá sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékjanxínra tí sín síin chjasintajni. A ntá tí sín chjasintajni nínkakonhanrá sín kixin jahará jahará kuéntará chjasintajni. ²⁰ Xráxinkáonrá tí nkehe tsítjonkará kixin tí sín ch'ehe lámge sín xra tjetóxinha ts'etoan sín.* Éxi yóhe chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuakoha sín ntá kjaxin tsítekaon sín tí nkehe naxa tsjáohérá sín. ²¹ Mé xikaha sit'ahará sín kixin jahará tinkachónkirá tí janhan la ko jehe sín chónha sín tí nkexro ichr'ánna k'uinka ntihi.

²² Tí chrók'uinkaha janhan ntihi chrónixjaha sín ntá chrókuamáha sín jie. Ntá jie koha nkerí tsaáxin sín kixin tí jie tinkájasin sín. ²³ Tí sín nínkakonna mé xikaha nínkakonhen sín T'aná. ²⁴ Chróchóntaha sín jie tí chrók'uejókianha sín ntihi chrókjuásinha janhan kjuaxroan jie éxi tsíkjasinha ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. ²⁵ Mé xikaha tsonhen kaín tíha kixin ntá tsoxiteyá tí nkehe ntáchro tí ley kuénte sín kixin: "Kohya jie kjuásian janhan ntá kjónté kónínkakonna sín."† ²⁶ A ntá tsi tí nkexro tsjinkítsa la ko sinchechéhe asánra. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuénte T'aná. A ntá jehe ch'án mé tsochrónka nkexrí tjén janhan ²⁷ la ko jahará kjaxínra tsochronkará nkexrí tjén janhan kixin tí xrankixín la k'uéjóni jnkokoá.

16

¹ Kaín tíhi tjetjonkará kixin chrókuítóéhyará tí nkehe kjuakohará. ² Tí sín judío tsjanjonha sín kjuachaxin ts'ixenhenrá njnqé sín la ko tsjixraká tí yaon kixin tí sín ts'yóyan sín tí jahará tsonáchro sín kixin xikaha mé tjejóh'e sín xra kuénte Dios, tsixro sín. ³ Mé xikaha sich'e sín kixin chónha sín T'aná la ko chónhyana sín. ⁴ A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

Tí xra ch'e Nchakuen Dios

Tí xrankixín k'uétjonkahyará tíhi kixin jnkokoá k'uék'ejóni. ⁵ Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá. ⁶ Ntá kjuixin tjonkará tíha ntá imá t'avará kixin kuínhínra xikaha xrxanka. ⁷ A ntá chaxín tí nkehe tjetjonkará kixin ichá jina sátsjiyá kixin jahará jina chrók'uejorá. A ntá tí sáchrókjuíha ntá chrókuihya tí nkexro tsjinkítsará. A ntá tí sátsjiyá janhan ntá tsétoan kixin itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntá ntoá chrókuakja sín la ko Dios mé sinchekitoxén tí jie kjuasin sín. ⁹ Xikaha chóna sín jie kixin tinkáchónkíha sín tí janhan. ¹⁰ A ntá tsonhe sín kixin itjen tí ntá ntoá kixin sátsjiyá tí tjen T'aná ntá ts'ikonhyará tí janhan inaá, ¹¹ la ko tsonhe sín kixin Dios sinchekitoxén ijie kixin ó kjuixin kuítóexín ijie tí nkexro t'etóan chjasintajni kixin tsjasóte.

¹² Naxa chonta janhan itsjé nkehe chrótjonkará, kjánchó chrókjuachahyará chrókiénxínra jie. ¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjáohará ch'án kaín xín nkehe ntoá. Méxra jehya tí nkehe kuénte ch'án tsochrónka ch'án na mé tí nkehe tsinhin ch'án mé tsochrónka ch'án tsjáohará ch'án tí nkehe tsonhen chr'éxin. ¹⁴ Jehe ch'án mé tsjikosáyana ch'án kixin ts'áyéhe ch'án tí nkehe kuéntana ntá tsjáohará ch'án nkehe tíha. ¹⁵ Kaínxín nkehe chóna T'aná na mé kuéntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjáohará ch'án nkehe tíha.

Senó ts'ává sín ntá chr'éxin tsochéhe sín

* 15:20 Juan 13.16 † 15:25 Salmo 35.19; 69.4

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kíchó sín kixin:

—¿Nkexri t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án? ¹⁸ ¿Nkexri t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjetotjanchankíhírá kichuárá ní? ²⁰ Tjéjtonkará ijnko nkehe chaxín kixin inaá tsotsjanekará la ko ts'avará. A ntá tí chojni chjasintajni la tsóchéhe sín. A ntá jahará ts'avará la ko sintaníhará kjónté chr'éxin tsócháhará má. ²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexri kjoté tjan kixin chéhe tjan kokjíhi ijnko xjan ntihi chjasintajni. ²² Mé xikaha jahará ijie ts'avará. Ntá xik'ikuán tí jahará inaá ntá imá tsóchéhe asánra la ko tsokohya ninxeró tsáksajahará tí kjuachéhe tsóchontará.

²³ Tíó tsi tí yaon a ntá tsjanchankínahyará ninkehó. Chaxín tí nkehe tjéjtonkará kixin T'aná tsotjáhará ch'án kaín nkehe tsjanchatóxixínra nina. ²⁴ Naxa kjuánchatóxixínhyará ninkehó tí nina. Ntá jie tjanchiará la ts'ayéhé, a ntá tsjintaxín tsócháhará.

Ínchéni Jesucristo mé kjuacha ch'án k'uetóan ch'án, ntá chjasintajni la náhi

²⁵ Tí nkehe tjéjtonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjtonkará nkexri tjen T'aná. ²⁶ A ntá tí yaon a mé tsjanchaxínra nkehe nina. Ntá ntáxrjanhya tíhi kixin tsonixjayákonhanrá tí tjen T'aná ²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsjtoha chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya. ³⁰ Ntá jie tienxíni kixin jaha mé noha kaín xín nkehe la ko t'ichjánxinhya kixin jnkojín nkexro chrókuanchankíha sín íchrén nkehe. Méxra xikaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátéhe ch'ín Jesús ntáchro ch'án kixin:

—¿Á jie kuítekáonrá ní? ³² Ntá tsi tí yaon na mé jie tíha na ntá tsóchakonrá jnkojinkorá tsóxikará sátsjirá ntá tsjtonará janhván tsjak'é. Kjánchó jehya janhván tjén. T'aná mé tjékian. ³³ Tjéjtonkará kaín tíhi kixin ntá kjuaxróxin ts'ejó asánra tinkachónkirá tí janhan. A ntá ntihi chjasintajni kjónté kjuaxróxinhya tjejorá tjetotjasóterá kjánchó chrakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etóan —ichro ch'án.

17

Ch'ín Jesús chrónóhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. ² Jaha tsichjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsóchjéhe kjuachón jnkochríxín kaín tí sín tsichjehé ch'án. ³ Tí kjuachón jnkochríxín mé t'axrjexín kixin tsóchóxian sín tí jaha tí jnkokoá Dios chaxín tjechón la ko kjaxin tsóchóxin sín Jesucristo la mé jaha kuétuenhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sít'a. ⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxa k'onahya chjasintajni.

⁶ Ó kjuixin kjuákoḡa tí sín chjina chjasintajni kixin nkexro tí jaha. Jaha mé k'uékuentá sín tí ósé ntá jie chjina tí janhan la ó kjuákoḡa sín itán la ntá ijie la ó kuítekaon sín. ⁷ Ntá jie ó kjuátsoan sín kixin kaín tí kjuachaxin chonta janhan la jaha tsikjánjuan. ⁸ Kixin ó kjuixin kjuákoḡa sín tí tán chjina jaha, ntá kuítekaon sín, ntá kuienxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóḡa kixin chrók'uayakonhén tí jehe sín. Jehya kixin xrjanóḡa kixin chrók'uayakonhén kaín tí chojni síin chjasintajni. Náhi. Jehó xrjanóḡa kixin chrók'uayakonhén tí sín chjina kixin kuéntá sín. ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jie kuéntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitóhe sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí

kjuachaxin tí ihnjá káxin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. ¹² A ntá tí naxa k'uejókian tí jehe sín ntihi chjasintajni la k'uáyakuànxian sín tí kjuachaxin tí ihnjá chjina. Nijnko tí jehe sín k'uitjáyanyha sín. A ntá jnkokoá nkexro mé k'uitjáyany mé tí ch'in xráxin ts'itjáyany káxin xikaha tsoxiteyá éxi níxja tí xroon tsikjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi káxin ntá tsochéhe sín éxi yóhe imá chàna. ¹⁴ Janhan mé kjuákoğa sín itán jaha, a ntá jie tí sín chjasintajni mé nínkakonhen tí jehe sín káxin jehe sín la jehya kuènte chjasintajni éxi kjaxin janhan na janhya kuèntana chjasintajni. ¹⁵ Tjáncháha káxin chrókuakítsjehé sín chjasintajni. Náhi. Tjáncháhá káxin chrók'uayakonhén sín káxin chrókjuich'iyehya sín tí Jínahya. ¹⁶ Jehé sín la jehya kuènte chjasintajni éxi yóhe janhan kjaxin janhya kuènte chjasintajni. ¹⁷ Nchetjuáxian sín tí kjuachaxin kuèntá káxin itán jaha mé tí tan chaxin ntoá. ¹⁸ Éxi yóhe jaha kuétuanna k'uinka chjasintajni mé xikaha janhan tétuannan sín káxin chrók'uejókian sín tí sín chjasintajni. ¹⁹ Jehó tí xra kuèntá chrókjuít'a káxin chrókjuinkitsa tí jehe sín, a ntá jehe sín kjaxin chrókjuich'e sín tí xra kuèntá káxin kuínhin sín itán chaxin ntoá.

²⁰ Kjánchó jehya káxin xrjanóğa káxin chrókjuinkitsa tí jehó sín. Náhi. Kjaxin xrjanóğa káxin chrókjuinkitsa kaín tí sín tsitekaon sín chr'éxin tsinhin sín tí nkehe tsochrónka tí sín a. ²¹ Mé xikaha xrjanóğa káxin kaín tí jehe sín jnkokoá chrókjuenkayáxin sín éxi jaha It'eni la ko janhan jnkokoá tjenkayáxinni mé xikaha xrjanóğa káxin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín káxin jaha tsikétuanna k'uinka ntihi. ²² A ntá tí kjuachaxin jie chjina na mé tjağa tí jehe sín káxin ntá kaín sín jnkokoá chrókjuenkayáxin sín éxi yóhe jaha la ko janhan jnkokoá tjenkayáxinni. ²³ Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín káxin jaha kuétuanna k'uinka la ko kjaxin chrókónohe sín káxin jaha tjuéhé tí jehe sín éxi yóhe tjuana tí jaha.

²⁴ Jaha It'eni, tí sín kjuánjuan la tjínkavan káxin tí jehe sín chrók'uejókian sín tí tsjak'é janhan káxin chrók'uikon sín tí kjuachaxin jie chjina; káxin xráxin naxa k'ónahya chjasintajni k'uétjuana jaha. ²⁵ It'eni jaha, imá jina jaha. Kjóté tí sín chjasintajni naxa chónhya sín tí jaha, ntá janhan na ó xráxin choxian tí jaha la ko kaín tí sín i kjaxin ó nohe sín káxin jaha kuétuanna k'uinka. ²⁶ Ó kjuákoğa sín káxin nkexro tí jaha la ko xikaha naxa tsjákoğa sín, káxin éxi tjuana jaha mé xikaha chrótjuéhe sín kichó sín la ko janhan chrók'uejókian tí jehe sín —mé xikaha chrónógehe ch'in Jesús tí It'é ch'an.

18

Ch'in Jesús sákjuiko sín ch'an tsjak'echjina ch'an
(Mt. 26.47-56; Mr. 14.43-50; Lc. 22.47-53)

¹ Ó kjuixin ntáchro ch'in Jesús kaín tíha na ntá jehe ch'an la ko tí sín k'uájiko ch'an k'uaxrxjén sín ntiha k'uatóye sín tí tsaka Cedrón. Ntaha tjen ijnko nonte sín nchónhya nta k'uixenhen ch'in Jesús la ko tí sín k'uájiko ch'an. ² Kjaxin ch'in Judas tí ch'in sinchekji tí ch'in Jesús mé nohe ch'an káxin ntaha tjen tí huerto a káxin ntaha jnkoyaxón kójnkotséko ch'in Jesús tí sín k'uájiko ch'an a. ³ A ntá ch'in Judas ó kjuikao ch'an nchónhya sín soldado la ko iso sín policia kuènte njnko tsík'etuenhen tí sín nchát'a t'etöan la ko tí sín fariseo. Ntá kjuí sín kaín sín xraá sín chica la ko kjuikao sín xrohi t'inkaséyanxín tí kjuixin sín. ⁴ A ntá ch'in Jesús ó nohe ch'an kaín xín nkehe ts'atsínka ch'an, ntá sákjuí ch'an kjuanchankíhi ch'an sín ntáchro ch'an káxin:

—¿Nkexro xritjéyará? —ichro ch'an.

⁵ Ntá kjuátehe sín ntáchro sín káxin:

—Tjeyáni tí ch'in Jesús tsíkjin chjasin Nazaret —ichro sín.

Ntá kjuátehe ch'in Jesús ntáchro ch'an káxin:

—Janhan tíha —ichro ch'an.

A ntá ch'in Judas tí ch'in tsíkjinchekji tí ch'in Jesús mé koí tjenkákjan ch'an tí jehe sín ntiha.

⁶ A ntá tíó kjuátehe ch'in Jesús káxin jehe ch'an tíha, ntá jehe sín xráchonka sín kjuítsínka sín nonte. ⁷ Ntá xikjanhankí ch'in Jesús inaá ntáchro ch'an káxin:

—¿Nkexro xritjéyará? —ichro ch'an.

Ntá xintáchro sín káxin:

—Tjeyáni tí ch'in Jesús tsíkjin chjasin Nazaret —ichro sín.

⁸ Ntá ntáchro ch'in Jesús káxin:

—Ó kjuixin tjonkará káxin janhan tíha. Tí xritjéyará tí janhan ntá tjuóherá sátsji tí í so sín xrikjan —ichro ch'an.

⁹ Mé xikaha ntáchro ch'in Jesús káxin ntá tsoxiteyá tí nkehe tsintáchro ch'an káxin: “Tí sín kjuanjon T'aná la ninkexró kjuíntak'itjáyanyha.”* ¹⁰ Ntá ch'in Simón Pedro kuakitsje ch'an

* 18:9 Juan 17.12

tí chica espada chrinkatoxin ch'án kóchrínjin ch'án tatsjon chjina ijnko ch'ín it'ín Malco, mé ijnko ch'ín ch'ehe nchat'á t'et'otan xra. ¹¹ Kjánchó ch'ín Jesús ntáche ch'án tí ch'ín Pedro kixin: —Chr'axenhén tjoé chica espada méhe. Kjá ntáchrúa kixin tsjasótehyana, kjá ichrua. Kjánchó T'aná kjuanjón kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuenhen tí sín nchat'á
(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuenhen sín la ko tí sín policía judío kuénte nijnko mé itsé sín tí ch'ín Jesús kjuínchenteto sín ch'án. ¹³ A ntá sákjuiko sín ch'án ntøe ch'ín Anás ich'ee tí ch'ín Caifás mé tí nkexro tsik'áyéhe xra nchat'á t'et'otan tí nánó a. ¹⁴ A ntá tí ch'ín Caifás, jehe ch'án na mé tí nkexro tsintáche tí sín judío kixin íchá jina kixin jnkokóá chojni chrók'uenyákonhen kaín tí sín chjasén ch'án.[†]

Ch'ín Pedro kjuínchemá ch'án kixin chóxin ch'án tí ch'ín Jesús
(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko íjnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'et'otan. Ntá k'uixenko ch'án tí ch'ín Jesús tí ntásin ntøe tí nchat'á t'et'otan. ¹⁶ Kjánchó ch'ín Pedro kuitøhe ch'án ntója ntásin ó. Ntá tí ch'ín ijnko a chóxin tí nchat'á t'et'otan mé k'uaxrje ch'án ntásin nixjehe ch'án tí tjan t'ayakonhen tí ntója ntásin chrónøgehe ch'án tjan ntá xranjón kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntásin kjuanchankíhi tjan tí ch'ín Pedro kixin:

—¿Á jahya kjaxin xrikoa tí ch'ín a? —ichro tjan.

Ntá kjuátehe ch'ín Pedro kixin:

—Náhi, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'et'otan mé kjuanchankíhi ch'án tí ch'ín Jesús
(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'et'otan kjuankixin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakohe ch'án sín. ²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xráxin k'uék'jákoxian kaín xín tí nijnko ntsí la ko tí nijnko jie tójnkotséxin kaín xín sín judío. Ninkehó nkehe kjuákohya imó. ²¹ ¿Nkekuénte tjanchankina tí janhan xikaha? Chrók'juanchankíhi tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policía kuénte nijnko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xikaha jiehe tsjátehé tí nchat'á t'et'otan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tíntoáhya tí nkehe xrjanka ntá chrónka nkehe tí ntoáhya. A ntá tí ntoá tí nkehe xrjanka, ¿ntá nkekuénte kixin tjatena? —ichro ch'án.

²⁴ Ntá k'uet'otan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'et'otan.

Ch'ín Pedro xikjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxá tjejin toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xrikoa tí nkexro í ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

²⁶ A ntá ijnko ch'ín ch'ehe tí nchat'á t'et'otan xra, na mé tí ch'ín a mé naxá kjéhya ch'án tí ch'ín tsikóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uikuñan tjekea ch'án tí huerto ní? —ichro ch'án.

²⁷ Ntá ch'ín Pedro xikjinchemá ch'án inaá kixin jehya ch'án, ichro ch'án. Ntá xrinahya tuéxín itsje ijnko kochíntøa.

Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrxéxin sín ntøe ch'ín Caifás, sákjuiko sín ch'ín Jesús tí palacio t'et'otanxín tí ch'ín gobernador. Ntá ó kjuankixin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xikaha chrók'uixenhen sín tí nchia a la chrókuamá sín tí jie síin ntiha

[†] 18:14 Juan 11.49-50

la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etqanxín ch'án kjuanchankíhi ch'án sín kixin:

—¿Nkehe tí jie chóna tí nkexro í? —ichro ch'án.

³⁰ Ntá kjuátehe sín ntáchro sín kixin:

—Tí chróchónahya ch'án jie jíe la chrókjuikqahyani ch'án —ichro sín.

³¹ Ntá k'uetqan ch'ín Pilato kixin:

—Sátjikoará ch'án nchekitqexinrá nkerí jie chóna ch'án kixin éxí ntáchro tí ley kuèntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chónahyani kjuachaxin ts'óyanni ninkexró —ichro sín.

³² Mé xikaha tsoxiteyá tí nkehe tsintachro ch'ín Jesús kixin nkexrí ts'enixín ch'án. ³³ Ntá ch'ín Pilato xik'ixenhen ch'án tí nchia t'etqanxín ch'án ntá k'uíyehé ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuñhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankíná, ¿á jahyá kjuenkayáxian xikaha, o á í jnko nkexro kjuanchia jie kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etqan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhí. Tí chrókuétoan chjasintajni ntá tí sín xrikjan chrókjuanjnko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrxjanka nkehe tí chaxín noá. Kaín tí sín titekaon tí nkehe chaxín noá mé tjejótnihin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín noá, ichrúa? —ichro ch'án.

Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjehé ch'án sín ntáchro ch'án kixin:

—K'uitjáhya ninkehó jie chóna tí nkexro í. ³⁹ Kjánchó jahará la ó kuánhanrá kixin tí kia pascua tsánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etuñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetqan ch'án kixin tsjate sín tí ch'ín Jesús. ² Ntá tí sín soldado kjuich'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehé sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kixin:

—Isé tsjak'e tsétuñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etqanxín ch'án inaá nixjehé ch'án tí sín tsikójnkotsé ntáchro ch'án kixin:

—Tsjeherá tsakítsjexián ch'án ntihi kixin tsoñohará kixin k'uitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsik'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín nchat'á t'etqan la ko tí sín policia kuènte njnko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'in Pilato kixin:

—Jahará tjiakoará ch'án tjaké nkanirá ch'án ntacruz kixin janhan k'uújtáhya ninkehó jie ch'óna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé ch'óntani ijnko ley t'et'əoan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'in Pilato tíha ntá antsi chrakon ch'án ⁹ ntá xík'ixenhen ch'án tí nchia t'et'əoanxín ch'án inaá kjuanchankíhi ch'án tí ch'in Jesús kixin:

—¿Nketí k'uinkaxian jaha? —ichro ch'án.

Ntá ch'in Jesús ninkehó kjuáteehya ch'án.

¹⁰ Ntá ntáchro ch'in Pilato kixin:

—¿Jaha nkekuenté tjátéehya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátehe ch'in Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'ueén o sáchrókjuaa tí Dios chrótjáhya tí kjuachaxin. A ntá tí chojni kjuikaána tí tjen jaha la antsi jie jie ch'óna sín, a ntá jaha la kánhyó —ichro ch'án.

¹² Ntá kuínhin ch'in Pilato tíhi ntá kjuankixin ch'án kjuéyá ch'án nkexrí chrók'ueətoan ch'án kixin sáchrókjui ch'in Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsjotóhé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'in t'et'ueñhen tí nacióon kuenténi. Tí nkexro ch'éna asén ch'án éxi ijnko rey mé nínkakonhen ch'án tí ch'in t'et'ueñhenni —ichro sín.

¹³ Ntá kuínhin ch'in Pilato tíhi ntá k'ueətoan ch'án kixin tsakitsje sín tí ch'in Jesús ntója ntá ch'in Pilato kjuak'etjəxín ch'án tí silla nchekitoexín ch'án jie, mé nkíva hebreo mé it'in Gabata, mé t'axrjəxín kixin t'əat'ə noi jehó xro tsík'óna. ¹⁴ Na mé ó chjina chonkixin ntá tí tsonjin la mé ó tsjasin sín tí kia pascua. Ntá ch'in Pilato ntáche ch'án tí sín judío kixin:

—Ntíhi itjen tí ch'in rey kuentará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'in Pilato kixin:

—¿Á tjínkáonrá kixin janhan chrókjuakénkanía ijnko ntacruz tí ch'in rey kuentará ní? —ichro ch'án.

Kjánchó tí sín nchət'á t'et'əoan mé kjuátehe sín kixin:

—Náhi. Chóntahyani í jnko rey, jehó tí ch'in César —ichro sín.

¹⁶ Ntá ch'in Pilato kjuanjon ch'án kjuachaxin sátsjiko sín tí ch'in Jesús tsjak'enkáni sín ch'án ntacruz. Ntá sákjuiko sín ch'án.

Kjuak'enkáni ch'in Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuiko sín tí ch'in Jesús kuámá ch'án tí ntacruz tsjak'enkáni ch'án. Ntá kjuújiko sín ch'án ijnko tjo tükjətəxín sín Hueso Kja Chojni. A ntá nkíva hebreo mé tükjətəxín sín Gólgota. ¹⁸ Ntaha mé kjuak'enkáni sín ch'án tí ntacruz. Ntá kjaxin yaá sín nánánko k'uejó jnkojnko sín ntá jnkosiné kjuak'e ch'in Jesús. ¹⁹ Ntá k'ueətoan ch'in Pilato kixin tsokjin sín ijnko ntachiso tsjak'enkáni sín ikja tí ntacruz ntáchro kixin: “Ch'in Jesús kjuixín ch'án chjasin Nazaret, mé tí ch'in Rey kuente tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkáni sín ch'in Jesús ntacruz la ko íni nkíva tsíkjin sín, na mé ijnko nkíva la hebreo, la ijnko nkíva la griego, la ijnko nkíva la latín. ²¹ Ntá tí sín nchət'á t'et'əoan kuente tí sín judío mé ntáche sín tí ch'in Pilato kixin:

—Chrókjinhya jaha xíkaha kixin jehe ch'án mé tí “Ch'in Rey kuente tí sín judío.” Náhi. Íchá jina chrókjian jaha kixin “Jehe ch'án ntáchro ch'án kixin jehe ch'án mé tí ch'in Rey kuente tí sín judío” —ichro sín.

²² Kjánchó kjuátehe ch'in Pilato kixin:

—Tí letra kuétoan k'óna la ó k'óna, kjónté xíkahó tsitóhe —ichro ch'án.

²³ Ntá tí sín soldado tió tsíkjin sín tsíkjak'enkáni sín tí ch'in Jesús tí ntacruz ntá kuákja sín tí ké ch'án la k'óxikayehe sín jnkojnko ka kuákja sín kanoé sín. La ko kjaxin kuákja sín tí ka kjínjin k'uek'inkáya ch'án. Tí ka mé tsixronhya ka la me jnkokoá ka tíha. ²⁴ Ntá tí sín soldado kjo sín kichó sín ntáchro sín kixin:

—Tsótséjehyani tí ké ch'án. Íchá jina sich'exínni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáχρο xroon itén Dios tsíkjin sín ósé ntáχρο kixin: “Kjuích'exín sín suerte ntá k'óxikayehe sín kaná.”* Mé xikaha kjuích'e tí sín soldado.

²⁵ A ntá chjino tí ntacruz kjuák'enkáni ch'in Jesús mé kjuák'e tí iné ch'án la ko tí tjan kichó tjan mé tjan María ichjién ch'in Cleofas, la ko tí tjan María Magdalena. ²⁶ A ntá tió k'uikon ch'in Jesús kixin itjen tí iné ch'án la ko chjino tjen tí ch'in antsi tjuéhé ch'án k'uék'ajiko ch'án, ntá nixjehé ch'án tí iné ch'án, ntáχρο ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehé ch'in Jesús tí ch'in a ntáχρο ch'án kixin:

—Tsjehe kixin ntaha itjen iná —ichro ch'án.

A ntá tí ch'in a mé k'uáyéhe ch'án tí tjan a sákjuiko ch'án tjan ntqe ch'án k'óna éxí iné ch'án xikaha.

Ik'uén ch'in Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'in Jesús kixin kaín xra ó kjuixin xiteyá ntá tjinkaon ch'án kixin tsoxiteyá kain nkehe ntáχρο tí xroon tsíkjin sín ósé ntá xikaha ntáχρο ch'án kixin:

—Ik'uén ntá.

²⁹ Ntá ntaha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuák'ekjen sín ijnko nta kjinjin, ntá kjuínchekhriin sín tí tjen ir'va ch'án. ³⁰ Ntá ik'uí ch'in Jesús tí xranvino sán ntá ntáχρο ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'in Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuénte tí sín tsík'en naxa ts'ejoyáni tí ntacruz tí yaon t'ok'éhe sín kixin tí yaon pascua mé ijnko yaon imá jíé, ichro sín. Mé xikaha kjuanchehe sín tí ch'in Pilato kixin ts'ejoan ch'án kixin tsochjenjin toté tí sín tjejoyáni tí ntacruz la ko ts'inkajin tí cuerpo kuénte tí sín tsík'en.

³² Ntá tí sín soldado sákjuí sín k'óchjenjin sín tí toté tí ch'in saxoxín tjen la ko k'óchjenjin sín tí toté tí ch'in tjen nángo a tjejoyáni sín tí ntacruz tí tjen ch'in Jesús. ³³ Ntá kjuíji sín tí tjen ch'in Jesús ntá k'uikon sín kixin ó tsíkjin sín tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'in soldado mé chr'áte ch'án chica yo tí chjia tí ch'in Jesús ntá tuénxín k'uaxrje jni la ko intá. ³⁵ A ntá janhan mé tjékjian tí xroon í mé kjuak'é ntaha k'uikuan kixin xikaha kónhen ntá ntoá tjejrjanka kixin jahará kjaxinrá chrókuítekaonrá. ³⁶ Mé xikaha kónhen tíha kixin tsoxiteyá tí nkehe ntáχρο xroon itén Dios tsíkjin sín ntáχρο kixin: “K'óchjenjinhya sín ninkehó huésqe ch'án.”† ³⁷ Kjaxin itjen í jnko nketí nixja tí xroon itén Dios tsíkjin sín ósé ntáχρο kixin: “Tsokomá sín tí nkexro tsíchr'áte sín chica.”‡

Xravá ch'in Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'in José, mé ijnko ch'in kjuixin chjasin Arimatea, mé kjuanchehe ch'án tí ch'in Pilato kjuachaxin kixin tsjinkajinxin ch'án tí ntacruz tí cuerpo kuénte ch'in Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'in Jesús kixin chrakonhen ch'án tí sín judío. Ntá ch'in Pilato mé kjuanjon ch'án kjuachaxin ntá sákjuiko ch'in José tí cuerpo kuénte ch'in Jesús. ³⁹ Kjaxin ch'in Nicodemo, tí ch'in kjuínixjehé tí ch'in Jesús ijnko tie a mé kjuí ch'án kjuíkao ch'án treinta kilo xroan xraxé tjiko xroan mirra la ko xroan áloes. ⁴⁰ Mé xikaha ch'in José la ko ch'in Nicodemo k'uáyéhe sín tí cuerpo kuénte ch'in Jesús kjuínchek'ísímá sín ijnko ka kjinjin tsika tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkáni ch'in Jesús ntacruz ntá chjinaxón ntaha tjen ijnko huerto itjen ijnko tóye nixjin naxa ninkexró tsíxráváyha ntaha. ⁴² Ntaha kjuavá sín tí ch'in Jesús kixin chjinaxón tjen tí tóye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'in Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankixin semana ntá tí tjan María Magdalena naxa sítíe sákjuí tjan tí tjen tí tóye, ntá k'uikon tjan kixin ó tsíkjin tí xro tsík'ikjexin tí tóye a. ² Ntá kuinká tjan sákjuí tjan tí tjen tí ch'in Simón Pedro la ko tí ch'in í jnko, mé tí nkexro imá k'uétjuéhe ch'in Jesús, ntá ntáχρο tjan kixin:

* 19:24 Salmo 22.18 † 19:36 Salmo 34.20 ‡ 19:37 Zacarías 12.10

—Ó tsíkakitsjexín sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xíkaha ntá sákjuj sín tí tjen tí tòye a. ⁴ Ntá yóí sín kuínká sín sákjujko kichó sín. Kjánchó tí ch'ín í jnko antsí tjián kuínká ch'án ntá kánhyó tjián kuínká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. ⁵ K'uisén ch'án tsjehe ch'án nkaxenhen tí tòye a. A tí ka tsík'isimá ch'ín Jesús mé naxa tjejó k'uikon ch'án, kjánchó jehe ch'án k'uixenhya ch'án tí tòye a. ⁶ Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uikon ch'án kixin tjejó tí ka tsík'isimá ch'ín Jesús ⁷ la ko k'uikon ch'án tí ka tsík'isimá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsík'iji senó na kjaxin k'uixenhen ch'án tí tòye ntá k'uikon ch'án tí nkehe tsikónhen ntá kuítekaon ch'án. ⁹ Kixin naxa k'uékiexínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús. ¹⁰ A ntá tí sín sátsikjitsjehe tòye la xíkjan sín ntøe sín.

Titàya k'uikuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuitøhe tjan ntója tí tòye tsjánka tjan. Naxa tsjánka tjan k'uisén tjan tsjehe tjan nkaxenhen tí tòye ¹² ntá xrinahya k'uikon tjan yaá sín ángel tjejóyá sín ka tjoá tjejójaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. ¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáχρο tjan kixin:

—Sátsík'iko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáχρο tjan tíha ntá kuínkátjía tjan ntá k'uikon tjan kixin itjen ch'ín Jesús, kjánchó kjuátsoanhya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáχρο ch'án kixin:

—Naná, ¿nkekuènté tsjánka? ¿Nkexro tjejá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáχρο tjan kixin:

—Kja tí jaha sákjuíko ch'án ntá jie chrónka nketí sákjuíko ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáχρο ch'án kixin:

—¡María! —ichro ch'án.

Ntá kuínkátjía tjan ntá nixjaxin tjan nkiva hebreo ntáχρο tjan kixin:

—¡Raboni! —ichro tjan. Tíha mé t'axrxéxin kixin Maestro.

¹⁷ Ntá ntáχρο ch'ín Jesús kixin:

—Tatjántana kixin naxa sátiíhya janhan tí tjen T'aná. Sátjia tjitsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

¹⁸ Ntá tí tjan María Magdalena sákjuichénka tjan tí sín k'uék'ajiko ch'ín Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsintáχρο ch'án.

Tí sín k'uék'ajiko ch'ín Jesús titàya k'uikuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ A ntá ó kónjin tí yaon a mé tí yaon xrankixín semana, a ntá tí sín k'uék'ajiko ch'ín Jesús jnkokóá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xrinahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án kjuajná tí sín k'uék'ajiko ch'án ntáχρο ch'án kixin:

—Jína tjejorá —ichro ch'án.

²⁰ Ntá kjuixin ntáχρο ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uikon sín Ìnchéni. ²¹ Ntá ntáχρο ch'ín Jesús inaá kixin:

—Kjuaxróxin ts'ejorá. Yóhe T'aná k'uètuanna k'uinka, a ntá jie la janhan tétuaghan tí jahará —ichro ch'án.

²² Ntá k'uánote ch'án tí jehe sín ntáχρο ch'án kixin:

—T'ayéherá Nchakuen Dios. ²³ Tí ts'itjáyahanhárá tí jie kjuasin jnkójin chojni ntá xíkaha tsjin tí ijé sín. Ntá tí ts'itjáyahanhárá tí jie kjuasin jnkójin chojni ntá naxa kjuinhyá tí ijé sín —ichro ch'án.

Ch'ín Tomás k'uikon ch'án kixin tsíxechón Ìnchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tjiktéxin sín ch'ín Nóhé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uíkoni Ìnchéni —ichro sín.

Kjáńchó ntáchro ch'ín Tomás kixin:

—Tí ts'ikǝnhyá janhan tí tsikjiatexin chica clavo itja ch'án la ko tsochr'ánxianhyá dedo tjaná ntiha la ko tí tsochr'ánxianhyá tjaná tí chjia ch'án, ¿na mé nkexrí chrókuítekǝvan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsik'ikjehe sín ntója nchia jina ntá xrinahya titàya kónohe sín k'uíkoni sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsikjiatexin chica clavo tjaná la ko xrákoa tjá chr'axénhén chjiana. Chróntáchrohya kixin chaxínhyá. Tsítekǝvan kixin chaxín —ichro ch'án.

²⁸ Ntá kjuátǝhe ch'ín Tomás ntáchro ch'án kixin:

—¡Ìnchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uíkoni jan ntá kuítekǝvan. Ntá ántsi náxrjón tjejó tí sín kjónté k'uíkonihyá la titekaon sín —ichro ch'án.

Tíhi mé chrónka nkekuénte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uíkoni tí sín k'uájiko ch'án kjónté chrónkahya tí xroon i kixin xíkaha kónhen. ³¹ Tí nkehe chrónka tí xroon i ikjian janhan kixin chrókuítekǝvanrá jahará kixin Jesús mé tí Cristo, mé tí Xjeen Dios kixin ntá kaín ní chróchóntani kjuachón jnkochrixin kixin chrókuítekaonni ch'án.

21

Yato tí sín k'uék'ajiko ch'ín Jesús xrinahya titàya k'uíkoni sín ch'án

¹ A ntá chr'exin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xíkaha kónhen ² kixin jnkokoá k'uéjó sín ch'ín Simón Pedro la ko ch'ín Tomás, me tí ch'ín tikjitexin sín ch'ín Nóhé, la ko ch'ín Natanael kujxin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátǝhe sín kixin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabárcǝ. Kjáńchó ninkehó koche tséhyá sín kuenté tie.

⁴ A ntá ó chjina ts'inkaséyan ntá xrinahya titàya k'uíkoni sín itjen ch'ín Jesús chrínta ntayaon, kjáńchó kjuátǝanhyá tí sín k'uék'ajiko ch'án kixin jehe ch'án. ⁵ Ntá kjuanchankihi ch'án sín kixin:

—Jahará ntasoá, ¿á naxǝ ninkehó koche tsehyará? —ichro ch'án.

Ntá kjuátǝhe sín ntáchro sín kixin:

—Naxǝ ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí náńko chjia chjina tí ntabárcǝ la tsotserá va —ichro ch'án.

Ntá xíkaha kjuích'e sín k'ue sín nchísén ntá í tjachahya sín tsakitsjenkixin sín ntǝ tí nchísén kixin nchónhyá koche tjinká. ⁷ A ntá tí ch'ín ántsi tjuéhe ch'ín Jesús mé ntáche ch'án tí ch'ín Pedro kixin:

—¡Ìnchéni tí méhe! —ichro ch'án.

Ntá kuínhin ch'ín Simón Pedro kixin Ìnchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuíanki ch'án ntǝ. ⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuíkǝo sín tí ntabárcǝ tinkánkákjentóxin tí nchísén tjinká koche chrítaón ntǝ kixin ijnko ciento metro kjínxin tí chrínta ntǝ k'uéjó sín. ⁹ Ntá kjuíji sín chrínta ntǝ ntá k'uínkajinxin sín tí ntabárcǝ ntá k'uíkoni sín tjeche xrohi síxénki xrinta ntá chrítaón tí xrinta tjekjen ijnko koche la ko náńko siín niotja. ¹⁰ Ntá kjuanchia ch'ín Jesús ntáchro ch'án kixin:

—Xrákoará iso koche tsitserá nǝntǝ —ichro ch'án.

¹¹ Ntá ch'ín Simón Pedro k'uit'ótjen ch'án tí ntabárcǝ kuákja ch'án tí nchísén kuínkánkákjen ch'án xráko ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhyá va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

Ḃ ntá nijnko tí sín k'uek'ajjiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha. ¹³ Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xikaha xíkjanjon ch'án tí koche.

¹⁴ Tíhi mé níxin k'uikon tí sín k'uek'ajjiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsi tjuana jaha, Ḃ ntá tí í so la kánhyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuéntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuéntana —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjinkávan tí janhan? —ichro ch'án.

Ḃ ntá k'uává ch'ín Pedro kixin níxin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha káin xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuéntana. ¹⁸ Ntá ijnko nkehe chaxín tjétjonka kixin tí naḂa k'uéntasoyá jaha k'uek'inkaya ká jahvá la ko k'uekjia tí k'uekóxrjínhan jaha. Ḃ ntá tíó tsotáda jaha ntá tsjéntó tá ntá íjnko nkexro sintak'inkaya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ Ḃ ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsi tjuèhe ch'ín Jesús

²⁰ Ntá kuinkátjá ch'ín Pedro ntá k'uikon ch'án kixin tinkáchréhe tí ch'ín antsi tjuèhe ch'ín Jesús, na mé tí nkexro kjuák'e chjinxónn tí kjuák'e ch'ín Jesús tí kjóne sín tsikjanchankíhi ch'án tí ch'ín Jesús kixin nkexro sinchekji ch'án.† ²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿á ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naḂa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uek'ajjiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjinkaon ch'án naḂa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen íjnko chojni.

²⁴ Ḃ ntá tí nkexro a mé tí nkexro chrónka kixin chaxín kónhen káin tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ NaḂa síin nchónhya nkehe kjuakoxín ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka káin tí xroon chrók'óna xikaha. Amén. Ó tjen.

* 21:14 Juan 20.19,26 † 21:20 Juan 13.25

Tí xra kjuich'e tí sín kjueyá ch'ín Jesús

Itsi Nchakuen Dios

¹ Tjuaha jaha Teófilo na tí libro saxóin mé kjan kaín nkehe kjuako ch'ín Jesús la ko tí xra kjuich'e ch'án tí xrankixixín ² hasta tí yaon sákjuj ch'án nkaya nkajní. A nta tí naxa sákjujha ch'án nkajní la kjueyá ch'an tí sín sich'ehe ch'án xra la ntá tí Nchakuen Dios mé kjuinkitsa ch'án ntá nixjehe ch'án sín la k'uetuennen ch'án sín kixin tsonohe sín nkehe tí xra chrókjuich'e sín. ³ Tió kjuixin k'uén ch'án ntá kónoxín kixin tjechón ch'án, k'uikon tí jehe sín la ko cuarenta yaon mé k'uikon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuènte Dios.

⁴ Tí naxa kójnkotséko ch'án tí sín k'uájiko ch'án la jehe ch'án mé k'uetuennen ch'án sín kixin naxa sátsjixinnya sín tí chjasin Jerusalén. Chrónka ch'án kixin:

—Chróchonhéna ntiho chrók'uayéhérá tí nkehe tsjanjon T'aná, me tí nkehe kuinhínra xrxanka janhan. ⁵ A ntá chaxín ch'ín Juan intá ó kuikítexín ch'án chojni. A ntá ijie kánhyó itsjé yaon ntá jahará la Nchakuen Dios la tsikitiaxínra.

Sákjuj ch'ín Jesús nkaya nkajní

⁶ Ntá tí naxa kójnkotséko sín ch'ín Jesús, kjuanchankíhi sín ch'án kixin:

—Jaha Inchéni, ¿á tsjanjonhya kjuachaxin jaí ts'etóanni chjaséni Israel inaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etóan tíha. ⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xra kjuj'ta, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuénté chjasintajni.

⁹ Ntá kjuixin nixja ch'ín Jesús ntá xrinahya tinkák'it'ótjen ch'án sákjuj ch'án la tjejótsehe sín. Sákjuj ch'án hasta kjuák'enkákjan ch'án ijnko tjuj. Ntá í t'ikonhya sín nkerí kjujji ch'án. ¹⁰ Ntá naxa tjejókota sín tí sákjuj ch'ín Jesús nkajní, a ntá xrinahya titáya k'uikuén sín yaá chojni ntoa tjejóya sín ka tjóá tjejó sín chjinaxón tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuixinra estado Galilea, ¿nkehe tsonhen naxa kontará nkajni? Xikaha tjejokontará sákjuj Jesús la ko mé xikaha xiki ch'án inaá —ichro sín.

Xreyá ch'ín Matías tsjiatehe lúké ch'ín Judas

¹² Na ntá kjanxin sín tí jna it'in Olivo na ikjan sín chjasin Jerusalén. Tíha a mé kjinhyó tjen kixin ó xikahó k'uetóan tí ley sátsji sín tí yaon t'ok'éhe sín. ¹³ Na ntá kjujji sín tí chjasin ntiha ntá k'ujt'ótjen sín tí yóxin piso tí nchia tsikjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehe sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín tqté ch'án jnkqsiné tí tjejó tí sín tinkáchónki Inchéni mé ijnko ciento ikán chojni mé tsikójnkotsé ntiha. Ntá ntáchro ch'án kixin:

¹⁶ —Kichóni, t'ichjánxin tsoxiteyá éxi nixja xroon itén Dios éxi tsinixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjujkaó ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyekoni ch'án. ¹⁸ A ntá jehe ch'án mé sákjuik'énaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sjintanóé ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrxjén kixin ijnko nonte siín ijni. ²⁰ Tí xroon Salmo mé nixja xikihí:

Tsitqhe ntqé ch'án a,

la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkin ch'ín David.

²¹ Tí tjejóni ntihi la siín chojni ó k'uájikoni xráxín tí k'uék'ajikoni Inchéni Jesús ²² desde k'uíkonni nkexrí kuikíte ch'ín Juan tí jehe ch'án la ko hasta k'uíkonni sákjuj ch'án nkaya

* 1:20 Salmos 69.25; 109.8

nkajní. Ntá ijie t'ichjánxin tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'íkón ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjáhóhéní nkexro tsonhen tocar xra tí yaá tí nkexro í kónoxín ²⁵ tsjiatehe xra apóstol kuente ch'ín Judas. A ntá tí ch'ín Judas mé kuithe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuíuch'e sín suerte ntá xrinahya kónhen tocar tí ch'ín Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjueya Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xrinahya kuínhin sín jnko tóvéntó kuixín nkajní. Tí tóvéntó mé éxi ijnko xrinto fuerte chjehe. Kuenté tí nchia tjejóxehen sín mé kóvéntó kjaxin. ³ Ntá xrinahya k'uíkon sín nkehe éxi xrohi nene tsjehe. Ntá tíha xíkayehé la k'uéjókjen jnkojnko kja tí jehe sín. ⁴ Na ntá kaín sín k'uáyehé sín tí Nchakuen Dios ntá kjuankixin sín nixja sín í jnko nkiva kixin Nchakuen Dios kjuínkítsa sín nixja sín.

⁵ A ntá tí yaon a la tí chjasin Jerusalén k'uéjó chojni judío tjinkaon sín sinchexiteyehé sín tí nkehe tinkáchónki sín, mé tsíkijxin sín nkuixín chjasintajni. ⁶ A ntá jehe sín mé tsikinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín. ⁷ Ntá síxranka sín, chakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkijxin sín estado Galilea? ⁸ La ¿nkekuenté tjejótinhinni kixin nixja sín jnkojnko nkíveeni? ⁹ Kixin ntíhi mé síin chojni tsíkijxin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuixín Africa antsi nó ntaha Cirene. La ko kjaxin chojni romano tjejó ntíhi. Iso tí sín a mé chaxín tsíkókjiéxín judío, la í so la tinkáchónki sín Dios éxi tí sín judío xíkaha. ¹¹ La kjaxin síin chojni tsíkijxin Creta, la ko Arabia. Mé xíkaha kaín ní tsíkijxin ní tí chjasin a mé tsikinhinni tjejónixja tí sín a tí kjuaxroan kuente Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chakon sín ntá kjuanchankíhi kichó sín kixin:

—¿Nkehe t'axrxéxín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'ín Pedro chénka tí sín síin

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínra tí nkehe tsoxrjanka. ¹⁵ Tí sín tjejó ntíhi la jehya tsékoan sín éxi ntáchrorá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchronka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín ntá tsochr'an Nchakuenná ntá ts'áyehé chojni.

Ntá tí xjaanrá ntoa la ko tí xjaanrá chjin mé tsonixja tan kuéntana.

La ko tí sín ntasoá mé titàya ts'íkuèn sín tí nkehe tsjákoḡa sín.

La ko tí sín ó táda la kotáchríen sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyehé kaín tí síntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjákoxiān ijnko kjuachrakon nkajní.

A ntá chjasintajni tsjákoxiān kjuaxroan:

mé ts'ixín ijñi la ko xrohi la ko itjuj tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijñi.

Xíkaha senó tsonhen ntá itsi Ìnchéni.

Tíhi mé ijnko yaon imá jíe la imá náxrxón.

²¹ A ntá kaín tí nkexro tsjanchehe ihnjé Ìnchéni kixin tsjinkítsa sín mé tsaá sín.*

Mé xíkaha tsíchronka ch'ín Joel.

* 2:21 2.17–21 Joel 2.28–32

²² Jahará chojni israelita tinhínrâ tí nkehe tsoxrjanka. Tí ch'ín Jesús tsíkijín chjasin Nazaret mé Dios kjuakoxín ch'án kixin tsíchr'án ch'án kixin tsíchr'án ch'án itsjé kjuaxroan jié k'uikónrâ la ko kjuako ch'án kixin Dios tsíchjéhe ch'án kjuachaxin kixin tjínkaon ch'án chrók'uikónrâ. Jahará ó jína noharâ kaín tíha. ²³ Kjonté xikaha k'uikónrâ la jahará itserâ ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkaní sín ch'án ijnko ntacruz. ²⁴ Kjánhó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá tí kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchronka ch'án kuènte Jesús ntáchro ch'án kixin:

Jaha Ínchéni t'íkuan kixin jnkochríxin tjétaón ntia tí xritjak'é janhan.

Jaha mé itjen tjanâ chjina kixin chrókohya jie chrókjuásian.

²⁶ Méxra imá chéhe asennâ. Ir'vâ tsjexian tí nkehe náxrjón.

Ó nóna kixin kohya nkehe ts'atsínka kjonté its'én.

²⁷ Ó nóna kixin tí jaha tsjtóehya asennâ chríkjan tí siín chojni tsík'en.

Tsjánjonhya kjuachaxin kixin tsoxíka ntóna kixin janhan mé ijnko nkexro t'aha xra jína tjuéhe.

²⁸ Jaha mé kjuákona tí ntia tsjanjon kjuachón. Jaha mé nchechána kixin t'ayakonna.[†]

Mé xikaha tsíkjin ch'ín David.

²⁹ Kíchóni tjtóhérá tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkixravâ ch'án. Ntá naxâ noheni nketí tsíxravâ ch'án. ³⁰ A ntá ch'ín David mé ijnko nkexro tsíchronka itén Dios la ó nohe ch'án kixin chaxín Dios chrónka kixin ijnko nkexro ts'axrjeníxin ch'án mé ts'óna rey mé ts'etóan éxí jehe ch'án k'uetóan ch'án. ³¹ Mé xikaha ch'ín David la ósé ó nohe ch'án nkehe tsohnen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsitóehya tí siín tí sín tsík'én la ts'itjáyanyha tí cuerpo kuènte ch'án. ³² Méxra Dios kjuínchexechón tí ch'ín Jesús, mé k'uikonni kaín ní la mé chrónkani kixin chaxín tíha. ³³ Ntá ijie Jesús mé sákjuiko ch'án Dios la nánko itja chjina Dios mé tjen ch'án. Ntá tsintáchro It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uikónrâ la ko kuínhínrâ nkehe kónhen. ³⁴ Tí ch'ín David la jehya jehe ch'án sákjuí nkaya nkajní, kixin jehe David ntáchro ch'án kixin:

Ínchéni Dios mé ntáche tí Ínchéni kixin:

“Tjak'e tjanâ chjina ntihó tsétóan,

³⁵ tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétóan.”[‡]

Mé xikaha tsíkjin ch'ín David.

³⁶ Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanírâ tí ntacruz la Dios mé kjuích'éna Ínhará ijie, mé tí Cristo —mé xikaha chrónka ch'ín Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyâ ch'ín Jesús. Ntáchro sín kixin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátéhe ch'ín Pedro ntáchro ch'án kixin:

—Chrókujtóhérá tí ijjarâ la chróxráxinkáonrâ Dios. Ntá chrókuikitaxínrâ ihníé Jesucristo ntá Dios mé tsjakjínhanrâ tí ijjarâ ntá jehe ch'án tsjanjon ch'án Nchakuen ch'án ts'ayéhérá. ³⁹ Dios mé sinchekjítjonhanrâ ch'án tí Nchakuen ch'án ts'ayéhérá jahará la ko xjanrâ la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyâ ch'án.

⁴⁰ Mé xikaha ntáchro ch'ín Pedro la ko í so nkehe ntáchro ch'án. Nta nixjéhe ch'án sín inaá, ntáchro ch'án kixin:

—Chrókujtóhérá tí jínahya tjenkayáxin tí chojni siín chjasintajni kixin jahará me jína chrókuaárâ.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mül chojni kjuankixin tinkáchónki Ínchéni Jesús la k'uíto tí sín ó xráxin siín. ⁴² Ntá kaín sín mé jína k'ué'ejó sín mé kuítekaon sín tí nkehe kjuako tí sín kjueyâ Jesús la kjuínkítsa sín kjuanjón sín tí nkehe chrókjóné tí í so sín la ko chjéhe sín Dios kjuasáya la ko kójnksé sín kixin sine sín niotja xraxinkakonxín sín kixin ik'úén Ínchéni.

Mé xikaha k'uejó tí sín xrankixín tinkáchónki Ínchéni

⁴³ La ntá kaín tí í so sín mé chrakon sín kixin tí sín tsíkijeyâ Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkoqá k'uejó sín la jnkoqá chóna sín tí nkehe sine sín. ⁴⁵ Kjuínchekji sín tí nkehe chóna sín ntá k'óxikayehe sín tí chichaon la chjéhe sín tí sín chóntahya. ⁴⁶ Jnkojnko yaon kójnksé sín tí nínko la ntá jnkojnko ntqe sín kjóneko kíchó

sín. La ko k'jóné sín nioṭja kíxín xraxinkakonxín sín kíxín ik'uén Ìnchéni la ko kjuaxróxín k'uejó sín la kohya nkexro kjuínchehne. ⁴⁷ Kjuanchehe sín kjuasáyé Dios. Ntá kaín chojni k'uechóntehe sín kjuasáya. A ntá jnkojnko yaon Ìnchéni mé kjuéyá iso chojni kíxín tsotsjé tí sín tsaá.

3

Kuítohe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chr'in sín sákjuí sín tí tjen tí njnko. Mé kjuíji sín las tres kónjín, tí hora mé nixjehé sín Dios. ² Kaín yaon kjuák'e ntíha ijnko ch'ín tsíkókjéxín xitjahya tji. Sátsíkiko sín ch'án tí njnko la tsíkjak'etjaxín sín ch'án tí ntója puerta mé it'ín Ntója Náxrxjón. Ntaha tjetjanchak'éhe ch'án chichaon tí sín sit'ixenhen ntíha. ³ Ntá xrináhya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín njnko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kíxín:

—Tsjehé ntíhi.

⁵ A ntá tí ch'ín a tjetsjehe ch'án jína kíxín ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kíxín:

—Na chontahya plata ní oro kjánchó tí nkehe chonta la tsotjahá. Mé kjuachaxín ihnjé Jesucristo, tí nkexro tsíkijxín chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrináhya ó kósóji tí nta ntoá toṭé ch'án. ⁸ Ntá tí ch'ín xitjahya tji la chrika ch'án la kjuák'exín toṭé ch'án ntá kjuankíxín ch'án itji ch'án. Ntá k'uixenko sín ch'án nkaxenhen njnko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni sín tí chjasin ntíha la k'uíkon sín kíxín ó tji ch'án la ko chjéhe ch'án kjuasáya Dios. ¹⁰ Ntá chrakon sín kíxín xikaha tsíkónhen kíxín tsíkatsjoan sín kíxín jehe tí nkexro kjuák'etjaxín kjuanchak'á ch'án chichaon ntója njnko it'ín Ntója Náxrxjón.

Nixjehé ch'ín Pedro tí chojni sín tí ntasin Salomón

¹¹ Na tí ch'ín xitjahya tji la mé títóehya ch'án tí ch'ín Pedro la ko ch'ín Juan. Ntá kaín xín tí sín sín ntíha chrakon sín kuínká sín sákjuitsjehe sín tí ntasin kuénte njnko it'ín ntasin Salomón kíxín ntaha tjejó tí sín a. ¹² Ntá tí k'uíkon ch'ín Pedro xikaha la ntáche ch'án sín kíxín:

—Jahará chojni israelita, ¿nkekuénte chrakonrá jahará la ko nkekuénte komaráni? ¿A tjenkayáxínrá kíxín jehóni kjuínchekitóheni jína tí ch'ín i kíxín jehóni chóntani kjuachaxín la ko kíxín imá tinkáchónkini Dios? ¹³ Náhí. Tí Dios k'uekinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxín tí Xjeen ch'án Jesús. Kjánchó jahará tsíkijkenhenrá ch'án tí sín t'etjoan. Ntá tí ch'ín Pilato mé tjínkaon ch'án chrók'uatjánta ch'án tí ch'ín Jesús kjánchó jahará la tjínkákonhyará xikaha. ¹⁴ A ntá jahará chrók'juanchiará chrók'uítohe sáchrók'jui tí nkexro tjóá jína asén. A ntá náhi. A ntá jahará mé tjínkáonrá sátsji ijnko chojni chóna nchónhya jie. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchehexón tí jehe ch'án la mé xikaha k'uíkonni la chrónkani. ¹⁶ Tí kjuachaxién ihnjé Jesús mé tinkáchónkini la ntá tíha mé kuítóexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé xikaha ó k'uíkonrá kaín rá.

¹⁷ Kíchóni ó ñona kíxín tió jahará la ko tí sín t'etjoan k'oyánrá Jesús la ni kónoahyará nkehe kjuích'erá. ¹⁸ Ntá ó xiteyá tí nkehe tsintáchro Dios tsínixjaxín tí sín tsíchrónka itén ch'án kíxín tí Cristo t'ichjánxín tsjasóte ch'án. ¹⁹ Méxra tsitohérá ijíará ntá xraxinkáonrá Dios ntá jehe ch'án mé ts'óxika ijíará ntá Ìnchéni mé sinchekitóhará ch'án jína. ²⁰ Ntá jehe ch'án mé tsochr'án Jesucristo inaá la xra ó tsí kíxín tsaáxínrá. ²¹ Na ntá ijie la Jesucristo la nkaya nkajni ntahó tsitóhe ch'án hasta tsjasiyóxínjian Dios kaín nkehe éxí tsintáchro ch'án tsínixjaxín ch'án tí sín tsíchrónka itén ch'án ósé. ²² A ntá senó tí ch'ín Moisés tsíchénka tí sín tsík'axrjeníxinni kíxín: “Ìnchéni Dios mé tsochr'án ijnko nkexro ts'axrjeníxínrá tsochrónka itén ch'án éxí tsíchr'án ch'án tí janhan. T'ichjánxín tindhínrá kaín tí nkehe tsontáchro ch'án. ²³ A ntá tí chojni titekakhonya tí nixja tí nkexro a la ts'itjáyán sín la tsitóhe sín tí nación Israel,”* mé xikaha tsíchrónka ch'ín Moisés.

²⁴ Kaínxín tí sín tsíchrónka itén Dios kjuankíxín ch'ín Samuel la ko kaín tí sín kui chr'éxín mé chrónka sín kíxín kaín tíha tsonhen xikaha tí yaon i. ²⁵ Mé tí nkehe tsintáchro Dios tsínixjaxín ch'án tí sín tsíchrónka itén ch'án kíxín xikaha chrók'uayéherá jahará tí nkehe chrók'juanjon ch'án kíxín chrók'uejorá jína. Dios tsíkijich'éna ch'án ijnko pacto mé nixjehé ch'án tí sín tsík'axjeníxínrá mé tsintáche ch'án tí ch'ín Abraham kíxín: “Kaínxín

* 3:23 3.22–23 Deuteronomio 18.15,19

chojni chjasintajni mé tsɔyaonxín sín kixin ijnko nkexro ts'axrjeníxin tí jaha."[†] ²⁶ Dios kjuínchexechón ch'án tí Xjeen ch'án la sɔoxín ichr'án ch'án tí tjejórá jahará isralitará kixin chrókujntayaonrá ch'án kixin jnkojnko tí jahará chrókuítóhéra tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etɔan

¹ Ch'ín Pedro la ko ch'ín Juan la naxá tjejónixjehe sín tí sín tsíkójnkotsé ntá xrinahya ikui tí sín nchát'á la ko tí ch'ín t'etueñhen tí sín soldado kuente tí nínko la ko tí sín saduceo. ² Imá kónínkaon sín kixin ch'ín Pedro la ko ch'ín Juan kjuakohe sín tí sín tsíkójnkotsé nkexrí tsoxechón chojni tsík'en kixin xikaha xechón ch'ín Jesús. ³ Ntá kuínhin sín xikaha ntá itsé sín tí sín a ntá sákjuíko sín, chr'áxehnen sín ntóechiso. Ntahó k'uéjé sín hasta kóyaon kixin ó ntá kóntó. ⁴ Ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ Ntá tí yaon chr'éxin kójnkotsé tí chjasin Jerusalén tí sín t'etɔan kuente tí sín judío la ko tí sín tjako tí ley. ⁶ Mé kjaxin ntaha tjen ch'ín Anás, mé jehe ch'an mé tí nchát'á imá t'etɔan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchát'á t'etɔan. ⁷ Ntá k'uétoan sín kixin síxrakoa ch'ín Pedro la ko ch'ín Juan. Ntá k'uéjé sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'ín Pedro imá chóna ch'án kjuachaxin kuente Nchakuen Dios ntá kjuátehe ch'án ntáchro ch'án kixin:

—Jahará chojni t'etɔan kuente chjasin la ko jahará sín táda kuente chjasin Israel, ⁹ jahará mé tjanchankirá kixin nkexrí kuitóhe ijnko chojni níhi jína kixin tjínkaonrá tsonohará. ¹⁰ Ntá tinhinrá jína tí nkehe tsochrónkaxinni kixin kaín rá chojni chjasin Israel tsonohará kixin tí ch'ín í itjen ntíhi mé kuitóhe ch'án jína kjuachaxién ihnié Jesucristo, tí nkexro tsíkijxin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá. ¹¹ Tí ch'ín Jesús í mé tí xro náxrjónhya kuitóéntará tíó kjuich'énará tját'o ntá mé jie k'óna tí xro tjetóan.* ¹² Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntíhi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí síxreé mé k'uíkon sín kixin ch'ín Pedro la ko ch'ín Juan mé níxja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etɔan ntá kjuátsoan sín kixin tí sín a mé tsík'ajiko ch'ín Jesús. ¹⁴ Ntá tí ch'ín tsíkítóhe jína mé ntíha tjejóko sín ch'án. Méxra xitjahya tsjanchia sín jie tsjasóte tí sín a. ¹⁵ Ntá tí síxreé a mé k'uétoan sín kixin tí sín a ts'axrje sín ntója ntá jehó sín k'uéjóxehnen sín nchia ikjo sín kíchó sín. ¹⁶ Ntá ntáchro sín kixin:

—¿Nkehe chrókuich'eheni tí sín a? Kaínxin tí chojni ntíhi chjasin Jerusalén mé ó k'uíkon sín kixin kjuínkísa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. ¹⁷ Í tjinkakonhyani kixin naxá tsochrónka sín tíha kixin naxá tsinhin chojni. Méxra ts'etɔanni kixin í tsochénkahya sín ninkexró tí ihnié Jesús.

¹⁸ Na ntá k'uíyehé sín tí sín a inaá ntá k'uétuñhen sín kixin ninkehó chrónixja sín la ko chrókujako sín ihnié Jesús, ichro sín. ¹⁹ Ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókujntaxiteyáharáni jahará o chrókujntaxiteyéhéni tí jehe ch'an? ²⁰ Ntá jeheni la xitjahya tsítoheni tsochrónkani tí nkehe ó k'uíkonni la ko tí nkehe kuínhini —ichro sín.

²¹ Ntá kjónté xikaha kuínhin tí síxreé la jiehe k'uétoan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntíha chjéhe sín Dios kjuasáya kixin tí kjuaxroan kjuich'e sín. ²² Na mé tí ch'ín kuitóhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uétoan tí sín nchát'á t'etɔan la ko tí sín táda. ²⁴ Ntá kjuixin kuínhin tí sín tsíkójnkotsé na ntá kaín sín níxjehe sín Dios la ntáchro sín kixin:

—Inchéni, jaha mé kjuich'éna nkajni la ko chjasintajni la ko tí ntayaon la ko kaín xín tí nkehe síin. ²⁵ Jaha mé kjuachaxién Nchakuan níxjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni naciòn ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey síin chjasintajni la ko kaín tí sín tí chjasin kójnkotsé sín

nínkakonhen sín Ìnchéni la ko Cristo.[†]

Mé xíkaha tsíkjin ch'ín David ósé.

²⁷ Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntíhi kixin kónínkakonhen sín tí Xjaan Jesús chóntahya jje, mé tí nkexro tsíkijéyá jaha sit'aha xra. ²⁸ Mé xíkaha kjuínchexiteyá sín tí nkehe ósé tsíkjenkayáxian kixin t'ichjánxin xíkaha tsonhen. ²⁹ A ntá Ìnchéni, tsjehé kixin imá jiehe k'uetóan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxián sínchekítóexín jina tí chojni níhi la ko tsjákoxian kjuaxroan kjuachaxián ihnié tí nkexro Jesús t'aha xra —mé xíkaha níxjehe sín Dios nkaya nkajni.

³¹ A ntá tí kjuixin níxjehe sín Dios a ntá tí tjejó sín mé kuínkí nonte. La ntá kaín sín antsi k'uíyehé sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe síin la kaín sín mé kuènte sín

³² La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntácho kixin jehó kuènte tí nkehe síin. Náhí. Kaín sín mé kuènte sín. ³³ Tí sín tsíkijéyá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsi kjuíncheyaon kaín sín. ³⁴ Kohya nínkexró nóaxínhya tjejó ntíha kixin kaín tí sín chóna nontee sín o ntóe sín kjuínchekji sín. Na ntá tsíkijikao sín tí chichaon ³⁵ chjéhe sín tí sín kjuéyá Jesús. A ntá tí sín k'óxiakayehe sín tí chichaon, kuákja tí sín nóa. ³⁶ Mé xíkaha kjuích'e ijnko ch'ín levita it'ín José. Jhehe ch'án la tsíkjin ch'án nonte Chipre jnkosiné ntayaon. Tí sín kjuéyá Jesús mé kjuínchek'in sín ch'án Bernabé, mé t'axrxén kixin tí ch'ín nchechéhe asén chojni. ³⁷ Jhehe ch'án a mé kjuínchekji ch'án ijnko nontee ch'án ntá kjuíkao ch'án tí chichaon kjuínchek'áyehé ch'án tí sín kjuéyá Jesús.

5

Jje kjuasin ch'ín Ananías la ko tjan Safira

¹ A ntá í jnko ch'án mé it'ín Ananías, a ntá ichjién ch'án mé it'ín Safira, mé jhehe sín mé kjuínchekji sín ijnko nontee sín. ² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjuéyá Jesús la kjuanjón ch'án éxi kaín. ³ Ntá ntácho ch'ín Pedro kixin:

—Ananías, ¿kuènté chjehé kjuachaxin tí Tsochen kixin k'uetuènen asán? Ntá kjuích'iyehé tí Nchakuen Dios kixin kjuínchemá iso chichaon kjuínchekjixián nontaa.

⁴ ¿Á jehya nontaa tíha? Ntá tíó kjuínchekjia la, tí chichaon la, ¿á jehya kuèntá? ¿Kuènte kjuenkayáxian síche tíha? Kjuích'iyehé Dios, jehya chojni kjuích'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntíha kónohe sín nkehe kónhen tí ch'ín a la imá chrakon sín. ⁶ Na ntá ikjuí iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíko sín, sákjuíkjavá sín.

⁷ Ntá k'uítsínka iní hora ntá kjuíj ichjién ch'ín Ananías k'uíxnen tjan tí nchia ntaha a. La noehya tjan nkehe tsíkónhen tí ntíha. ⁸ Ntá ch'ín Pedro mé kjuanchankíhi tí tjan a, ntácho ch'án kixin:

—Chrónka, ¿á chaxín xíkahó kóxiín tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín xíkahó kóxiín.

⁹ Ntá ntácho ch'ín Pedro kixin:

—¿Nkekuènte jnkokoá kjuenkayáxinrá kjuích'iyehérá Nchakuen Ìnchéni? Kjá ntáchrórá kohya nkehe chrókónhanrá. Ntíhi ó kúu tí sín ntasoá sákjuíkjavá sín xia na ntá jai sátsjiko sín tí jaha —mé xíkaha ichro ch'ín Pedro.

¹⁰ Ntá tuénxín kjuítsínka tjan Safira tóte tí itjen ch'ín Pedro ntá ik'uén tjan. Ntá k'uíxnen tí sín ntasoá tí nchia a ntá k'uíkon sín kixin tsíkjin tsík'en tjan. La ntá sákjuíko sín tí cuerpo kuènte tjan la kjuavá sín tjan tí chjinaxón tsíxrává tí xii tjan. ¹¹ Na kaín tí sín kuènte njnko la ko tí í so sín kuínhin tí xíkaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjuéyá Jesús mé kjuakoxin sín nchónhya kjuaxroan tí síin chojni ntíha la ko kaín sín mé kójnkotsé sín tí ntásin it'ín Salomón. ¹³ Chrakon iso sín k'uítohya tí jhehe sín la kjónté la kaín chojni tjikosáyehe tí jhehe sín. ¹⁴ La ntá xringhya nchónhya chojni nto la ko chojni chjin kjuankixin tinkáchónki sín Ìnchéni. ¹⁵ Ntá itsje chojni mé kuakitsje sín tí chojni níhi k'uejo sín ntja. Tjejóták'á sín chritaón cama la ko kania kixin ts'atsínka ch'ín Pedro ntá

[†] 4:26 4.25–26 Salmo 2.1–2

kjónté its'uëgen ch'án ó ts'atsínka tí tjejó sín mé chrókuítogéxín sín jína. ¹⁶ Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuíkəo sín tí chojni níhi la ko tí chojni chóna nchəkuen tí jínahya. La kaín sín a mé kuítoghe sín jína.

Ch'in Pedro la ko ch'in Juan mé chónkhi sín

¹⁷ Na ntá tí sín nchət'á t'etəoan la ko tí sín kuènte tí sín saduceo mé imá kóchjinoxínhin sín. ¹⁸ Na ntá itsé sín tí sín kjueyá Jesús la chr'áxenhén sín ntəochiso. ¹⁹ A ntá ijnko ángel kuènte Ìnchéni ikui tí tie a kuakitjehə ch'án ntója ntəochiso ntá kuakitsje ch'án tí sín a. La ntá k'uetuənhén ch'án sín kixin:

²⁰ —Sátjirá nínko la tsjákohérá kaín tí sín ntiha tí tan nixín tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixenhén sín tí nínko kjuako sín.

A ntá tí nchət'á t'etəoan la ko tí sín k'uéjóko ch'án mé k'uíyehə sín tsojnkotsé kaín tí síxreé, mé tí sín t'etəoan kuente Israel. Na ntá k'uetəoan sín kixin tsoxrakoa tí sín tjejóchjina tsíkjeýá Ìnchéni. ²² A ntá kjuíji tí sín policía tí ntəochiso a ntá k'uitjahya sín tí sín a. La ntá ikjan sín la ²³ ntáchro sín kixin:

—Kjuíjini ntiha la k'uíkonní tsíkjehe jína ntəochiso a la k'uéjó tí sín soldado a ntója. Ntá kuakitjehəni ntəochiso la k'uitjahyani ninkexró tí nkaxenhén —ichro sín.

²⁴ Ntá kaín tí nchət'á t'etəoan la ko tí ch'in k'uetuənhén tí policía kuènte nínko la ko i so tí sín nchət'á t'etəoan mé kuínhin sín ntá ntáchro sín kixin xá nkexrí chrókónhén chrók'uitjəyan tí xra kuènte tí sín a. ²⁵ Na ntá tuénxín kjuíji ijnko nkexro ntáchro kixin:

—Tí sín k'uejochjinará jahará mé ó nkaxenhén nínko ntaha tjejó sín tjejótkəoghe sín chojni —ichro ch'án.

²⁶ La ntá tí ch'in k'uetuənhén tí sín policía mé sákjuíko ch'án tí sín policía la kjuíkəkjin tí sín tjako. Nínkehó kjuich'ehya tí sín policía tí sín tjako kixin chrakon sín kixin ách'e tí sín sín ntiha mé tsjak'e sín xro, ichro sín. ²⁷ Na ntá tíó kjuíkəo sín tí sín a la k'uéjó sín nkayakon tí sín t'etəoan ntá tí nchət'á t'etəoan ntáchro ch'án kixin:

²⁸ —Jeheni kjuanjonhyani kjuachaxin kixin tsjákorá ihnjé tí nkexro a. ¿A ntá nkehe kjuich'erá jahará? Kuènté chjasin Jerusalén tsíkjakorá. La tjínkáonrá tsékaráni jje kixin jeheni tsík'óyánni tí ch'in a —ichro ch'án.

²⁹ A ntá ch'in Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni. ³⁰ Tí Dios tsíkínkáchónki tí sín tsík'axjenixinni ósé mé kjuínchexechón Jesús, tí nkexro a mé kjuakénkanirá tí tacruz tsík'oyánrá. ³¹ Ntá ijje tjeko ch'án Dios nkaya nkajní la nángo itja chjina Dios mé tjen ch'án la Dios kjuích'éna ch'án ijnko nkexro t'etəoan kixin sinchekaa ch'án chojni kixin tí nación Israel chrókjan chrókuínkáchónki sín Dios ntá chrók'uitjəyan tí jje chóna sín. ³² La ko kjaxin jeheni chrónkani kaín tí nkehe k'uíkonní kjuachaxién Nchəkuen Dios. Tí Nchəkuen ch'án mé chjéhe Dios kaín tí nkexro chaxin sinchexiteyéhe tí jehe ch'án.

³³ La ntá tí sín t'etəoan a mé kuínhin sín tíha ntá kónínkaon sín la ko tjínkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetəoan ch'án kixin tí sín tsíkjeýá Ìnchéni mé ts'axrje sín ntója intsí, ichro sín. ³⁵ Na ntá nixjehə ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a. ³⁶ Xráxínkáonrá kixin senó kjuák'e ijnko ch'in it'in Teudas la tónhen asén ch'án kixin imá t'etəoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'in a la ntá kaín tí sín kuínkáchréhe tí jehe ch'án mé xika sín sákjuí sín ntá ntahó kjuéxín tí xra k'uekjich'e sín. ³⁷ Ntá chr'éxin tíó xrenájín kaín ihnjé chojni k'uéjó na ntá ikjui í jnko ch'in mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xika sín sákjuí sín inaá. ³⁸ Méxra títoghérá tjiatəhyará tí jehe sín a. A ntá tí tjejóch'e sín xra kuènte chojni ó la kjaxin ts'itjəyan. ³⁹ A ntá tí chaxín tjako sín kjuachaxién Dios ntá tsjachahyará sinchek'itjəyanrá tíha. Méxra títoghérá sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehə sín tí sín kjueyá Jesús. La ntá kjuate sín la xík'etuehén sín kixin í tsonixjahya sín ihnjé Jesús la ntá kjuanjon sín kjuachaxin kixin sátsji sín. ⁴¹ Ntá tí sín kjueyá Jesús mé k'uaxrxéxín sín tí tjejó tí sín t'etəoan kjónté xíkaha kónhén sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnjé Jesús. ⁴² Kuítogehya sín tsjako sín kuènte Jesucristo kaín yəon tí nkaxenhén nínko la ko tí jnkójnko ntəe chojni.

6

Kjueyá sín yato chojni tsjinkítsa

¹ Na ntá tí yaon a tjoka sitinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakhonen sín tí sín nixja nkíva hebreo. Ntáchro sín kíxín tí sín chjín k'án kuénte sín la kánhyó jína k'uáyéhe tí nkehe síxíkayéhe sine sín jnkojnko yaon, ichro sín. ² Na ntá tí teyó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehé sín, ntáchro sín kíxín:

—Jeheni la jehya jína tsítóheni tí xrá tjakoni itén Dios, kíxín ntá sit'aharáni xra ts'óxíkayeheni tí nkehe sine tí sín k'án. ³ Méxra jahará kíchó ni tsjéýará yato chojni ntoa tí tjejorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinček'áyeheni tí xrá a. ⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxín kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkjixín ch'án chjasin Antioquia la óse mé tsíkinkáchónki ch'án tí nkehe tinkáchónki tí sín judío. ⁶ Ntá kjuixín kjueyá sín tí sín a ntá kjuikao sín tí tjejó tí sín tsíkjeýá Ìnchéni. La ntá tí sín a mé nixjehé sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sitinkákji la tinkákótsjé tí sín tinkáchónki Ìnchéni chjasin Jerusalén. Kjaxín itsjé tí sín nchat'á judío kjuankíxín sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxín kíxín Dios tsíkjincheyon ch'án la nchónhya kjuaxroan kjuakoxín ch'án tí sín chojni. ⁹ A ntá iso sín tsíkjixín tí núnko judío kuénte tí sín senó k'uejó esclavo sín tsíkjixín sín chjasin Cirene, la ko Alejandria, la ko Cilicia, la ko estado Asia, mé kjuankíxín sín ikjo sín ch'ín Esteban. ¹⁰ Kjónté xíkaha la kjuachahya sín kíxín Nchakuen Dios mé kjuínkítsa tí ch'ín Esteban nixja ch'án. ¹¹ Na ntá jehé sín mé kjuenkehe sín ókjé chojni kíxín tsochrónka sín kíxín kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xíkaha k'uixité kaín chojni la ko tí sín t'etqan kuénte núnko la ko tí sín tjako tí ley. La ntá itsé sín tí ch'ín Esteban la tinkánkájen sín ch'án sákjuiko sín ch'án tí sín tí síxreé a. ¹³ Kjaxín kjueyá sín chojni tsochrónka kíxín ntoáhya kjuako ch'ín Esteban la ntáchro tí sín a kíxín:

—Tí ch'ín a mé títoehya ch'án t'ántaxínhin ch'án tí núnko kuénténi la ko tí ley. ¹⁴ Ó kuínhinni kíxín chrónka ch'án kíxín tí ch'ín Jesús, tí ch'ín tsíkjixín chjasin Nazaret, mé sinček'itjáyan ch'án tí núnqeni ntíhi la ko tsjítóxínhin ch'án tí nkehe tinkáchónkini mé tí nkehe tsík'etqan ch'ín Moisés —mé xíkaha ichro sín.

¹⁵ Ntá tí síxreé la ko kaín tí sín sítxaxín ntíha la komá sín tí ch'ín Esteban la mé k'uíkon sín kíxín tí kàré ch'án mé éxi ijnko ángel mé xíkaha tsjehe tí jehé ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etqan kjuanchankíhi sín tí ch'ín Esteban kíxín:

—¿Á chaxín kaín tíhi tsíntáchrúa?

² Na ntá jehé ch'án kjuátehe ch'án ntáchro ch'án kíxín:

—Kaínrá kíchó ni Israel la ko sín táda tinhínrá tí nkehe tsontáxrjan. Dios kuénteni chóna kjuachaxín mé kjuakohé ch'ín Abraham tí nkexro k'uaxrjeníxini tió kjuák'e ch'án nación Mesopotamia tí naxá sátjinya ch'án tsjak'e ch'án nonte Harán. ³ Dios tsíntáchró kíxín: “Títqhé chjasán la ko kaín tí nkexro kjéhya. Na ntá sátjia tí nonte tsjákohá jaha.”* ⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixín ik'uén it'é ch'án na ntá Dios kjuikao tí jehé ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'q nonte hasta ni tí tsjak'e toté ch'án la chónahya ch'án. A ntá chrónka Dios kíxín chaxín chr'éxín tió tsjixín ts'en ch'ín Abraham la tí sín ts'axrjeníxín ch'án mé ts'áyéhe sín tíha. Kjónté naxá kohya núnko xjeen ch'án la mé xíkaha ntáchro Ìnchéni. ⁶ Kjaxín tsíntáchró Dios kíxín tí sín ts'axrjeníxín ch'ín Abraham la ts'ejó sín ókjé nonte, la ko sich'exón sín xrá la ko náxrjónhya ts'ejó sín noó ciento nánó. ⁷ La kjaxín xíntáchró Dios inaá kíxín: “Ntá chr'éxín janhan síntakjasóte tí sín kjuínčekjasóte xjaan. La ntá tí xjaan mé tsokjan sín ntíhi ntá tsoxraxinkaxonxín sín tí janhan,” mé xíkaha ichro Dios. ⁸ Na ntá Dios mé tsíkjo ch'ín Abraham kíxín kaín tí chojni ntoa ts'axrjeníxín ch'án mé itsa sín xroye.

* 7:3 Génesis 12.1

Na ntá xikaha tió kokjilhi xjeen ch'an Isaac ntá ch'in Abraham mé chjéhe ch'an xjan xroye tió xéjhe xjan ijní yaon. Ntá kjaxin xikaha kjuich'e ch'in Isaac tió chóna ch'an xjeen ch'an Jacob, la ntá ch'in Jacob la xikaha kjuich'e ch'an inaá. Ntá tí sín a mé k'óna it'é tí teyo tribu tsik'axrjenixin tí sín Israel.

⁹ Tí xjeen ch'in Jacob mé tí sín k'uaxrjenixinni ósé la jehe sín k'uechjinqxínhin sín tí kichó sín José ntá kjuínchejji sín ch'an la tí sín k'ueña la sákjuiko sín ch'an nó nación Egipto, kjánchó Dios mé kjuínkítsa tí jehe ch'an. ¹⁰ Dios mé kjuínchekaá ch'an tí náxrjónhya k'uekjak'e ch'an. La ko Dios kjuanjón kjuachaxin kixin imá tsonohe ch'an. Na ntá k'uikon ch'in Faraón tí rey kuènte nación Egipto a xikaha tí xrá jína kjuich'e ch'in José ntá kjuanjón ch'an kjuachaxin kixin ts'etoan ch'in José tí nación Egipto la ko tí ntqe ch'an.

¹¹ Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsik'axrjenixinni la k'uitjahya sín nkehe sine sín. ¹² A ntá tsikinhin ch'in Jacob kixin tí nación Egipto mé sitóxi noa trigo ntá k'uetuènen ch'an tí sín xjeen ch'an kixin sátsji sín ntiha tsjik'ena sín noa, la jehe tí sín a mé tí sín tsik'axrjenixinni. Tíha mé tí saoxin sákjuí sín. ¹³ Ntá tí yóxin sákjuí sín ntiha ntá ch'in José kjuínchenohe ch'an sín kixin tí sín a la savé ch'an. La ntá kjuakohe ch'an tí ch'in Faraón tí sín naxa kjéhya ch'an. ¹⁴ La ntá k'uetqan tí ch'in José kixin sátsjikakjín sín it'é ch'an Jacob la ko kaín tí sín kjéhya ch'an, mé ijnko setenta y cinco chojni kjéhya ch'an. ¹⁵ Mé xikaha kónhan la tí ch'in Jacob mé sákjuí ch'an la kjuák'e ch'an nación Egipto ntá chr'éxin ntiha mé k'uénxin ch'an. La ntá chr'éxin kjaxin tí sín tsik'axrjenixinni k'uénxin sín ntiha. ¹⁶ Ntá chr'éxin kuakitsjexin sín tòye tí huésóé tí ch'in Jacob la sákjuiko sín tí nonte Siquem, la ntá ntiha mé kjuavá sín tí nonte tsik'ena ch'in Abraham mé tsik'enehe ch'an tí xjeen ch'in Hamor chjasin Siquem.

¹⁷ La ntá ó kuichjina tsoxitéyá tí nkehe tsintáchro Dios tsikjo ch'in Abraham ntá tí sín Israel imá kótsjé sín nación Egipto. ¹⁸ A ntá xrínahya í jnko ch'in rey kjuankixin k'uetqan nación Egipto la k'uechónhya ch'an tí ch'in José. ¹⁹ La ntá tí ch'in rey kjuich'iyehe ch'an tí sín naxa kjéhyani la ko kjuínchejasóte ch'an sín. La tsik'etqan ch'an kixin tí xjan ntoa na ntá kokjilhi mé tsjik'itji sín xjan kixin its'en xjan. ²⁰ Na ntá tí yaon a tsikokjilhi ch'in Moisés ntá imá kóxrjínhin Dios tí xjan a. It'é la ko iné xjan mé k'uechóna sín xjan iní nitjío koá ntqe sín. ²¹ Ntá chrokjuahya tsjak'ema sín xjan la ntá kjuikjaka sín xjan. La ntá xjeen tí ch'in rey kuènte Egipto mé kjuikakja tjan xjan la sákjuiko tjan ntqe tjan la kjuínchek'ánkí tjan xjan éxi xjeen tjan xikaha. ²² La ntá tí ch'in Moisés mé k'uitja ch'an kaín nkehe nohe tí sín Egipto a la imá tjeotan tí nkehe k'uéntáchro ch'an la ko tí nkehe k'uekjich'e ch'an.

²³ La ntá tió chóna tí ch'in Moisés cuarenta nánó ntá tjinkaon ch'an tsjitsjehe ch'an tí sín israelita naxa kjéhya ch'an. ²⁴ Ntaha mé k'uikon ch'an kixin ijnko chojni Egipto kjuate ijnko chojni naxa kjéhya tí jehe ch'an. Ntá chrókjuinkítsa ch'an tí sín naxa kjéhya ch'an ntá k'óyán ch'an tí ch'in Egipto a. ²⁵ Kjuenkayáxin ch'an kixin tí sín naxa kjéhya ch'an, mé tí sín israelita, mé tsonoéxin sín kixin Dios mé tsichr'an tí jehe ch'an sinchekaá sín ch'an. Kjánchó tí sín a kjuátsoanhya sín. ²⁶ La ntá í jnko yaon tí ch'in Moisés k'uikon ch'an kixin yaá sín israelita tjanjonko kichó sín. La ntá tjincaon ch'an chrókjuít'oxin ch'an kixin chrokjuanjónhya sín. La ntáchro ch'an kixin: "Jahará jnkokoá kichuára la, ¿nkekuènté tjanjonrá?". ²⁷ A ntá tí nkexro chóna tí jje mé kónínkaon ch'an la kótéka ch'an tí ch'in Moisés. Ntá ntáchro ch'an kixin: "¿Nkexro kjuanjón kjuachaxin kixin jaha k'óna juez kuènténi? ²⁸ ¿Á tjinkávan ts'oyánni kjaxinni éxi k'oyán tí ch'in Egipto ijna ní?" ²⁹ A ntá kuínhin tí ch'in Moisés tíha ntá tjoka sákjuí ch'an. Sákjuí ch'an tí nación Madián ntá ntiha kjuák'e ch'an éxi ijnko chojni tsikjixín ókjé. Ntá ntaha tsikótehe ch'an la ko kjuich'éna ch'an yaá xjan ntoa.

³⁰ Na ntá k'uatínka cuarenta nánó ntá tí nteje chjino jna it'in Sináí mé xrínahya k'uikon ch'an ijnko ángel tjenkákjan tí xrohi chrikjan tí ntayoa tjeche. ³¹ Ntá tí ch'in Moisés la chrakon ch'an kixin xikaha k'uikon ch'an la ntá kóchjinehe ch'an kixin chrótsjehe ch'an la ntá kuínhin ch'an itén Ìnchéni ntáchro kixin: ³² "Janhan mé Dios tinkáchónki tí sín tsik'axrjenixian mé Abraham, la ko Isaac, la ko Jacob," mé xikaha ichro Dios. Ntá tí ch'in Moisés la kjuankixin chrakon ch'an la síxránká ch'an ntá í tjinkakonhya ch'an tsotsjehe ch'an. ³³ Na ntá ntáchro Ìnchéni kixin: "Takítsje tokatá kixin tí nonte tinkatja la nonte tjóá chónahya jie. ³⁴ Ó k'uikuán kixin tí sín kuèntana mé imá tjejetjasóte sín nación Egipto. La ó kuínhan kixin t'eya sín. La ntá ijje ó k'uinka kixin tsjikítsa sín. Méxra xrákia jaha tsétuanhan jaha sátsjia nación Egipto,"[†] ichro Dios.

³⁵ Tí sín israelita mé kjuanoá sín tí ch'in Moisés. Tsintáchro sín kixin: "¿Nkexro kjuanjón kjuachaxin kixin jaha k'óna juez?" ichro sín. Kjánchó Dios ichr'an ch'an tí ch'in Moisés kixin ts'etoan ch'an la ko sinchekaá ch'an tí sín israelita kjuachaxin tí ángel k'uikon ch'an chrikjan tí nta. ³⁶ Ntá tí ch'in Moisés kuakitsjexin ch'an Egipto tí sín tsik'axrjenixinni ósé. La imá itsjé kjuaxroan kjuasin ch'an la itsjé kjuakoxin ch'an tí nación Egipto, la ko tí Ntayaon Kjátse, la

† 7:34 7.30-34 Éxodo 3.1-10

ko tí nteje k'úají sín cuarenta nánó. ³⁷ Jehé tí ch'ín Moisés a mé chénka tí sín israelita kíxin: “Dios mé tsochr'án ijnko chojni tsonixja itén Dios ts'axrjeníxin tí sín kíchuará éxí ichr'án ch'án tí janhan. Títekákonhénrá tí jehe ch'án.”* ³⁸ Tí ch'ín Moisés mé kjuák'eko ch'án tí chojni tí k'uéjó sín tí nteje. Nta ijnko ángel mé nixjehé ch'án tí jna Sinaí la ko tí sín k'uaxrjeníxinni mé k'uáyéhé sín tí tan tjanjon kjuachón, ntá tí tan mé k'uátsínka tí jeheni ijie.

³⁹ A ntá tí sín k'uaxrjeníxinni ósé mé tjínkakonhya sín kíxin chrókuitekaon sín la kjuanoá sín tí ch'ín Moisés la ko tjínkaon inaá chrókjan sín nacióon Egipto. ⁴⁰ A ntá ntáche sín ch'ín Aarón kíxin: “Tjínkaonni síh'éna ijnko dios kíxin tsínkáchónkini kíxin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni nacióon Egipto.”[§] ⁴¹ Ntá kjuínchekjanoya sín ijnko koxintáxjan la ntá k'óyán sín iko kjokehé tí nkehe tsíkjanoya a la imá kóchéhé sín k'uúkon sín tí nkehe tsík'ónaxín tja chojni. ⁴² A ntá Dios mé kuitóhe tí jehe sín kíxin tsínkáchónki sín tí konotsé síin nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi: Jahará chojni Israel, ¿á k'oyánrá tí iko kjókanará tí janhan

tí cuarenta nánó k'uejorá nteje ní?

⁴³ Kja náhi, jehó tí nkehe kjuíh'énará mé kjókehérá tí ko a. Kjuíkoará tí nínkóe tí dios Moloc la ko kjaxin kjuíkoará tí konotsé kuénte dios Renfán.

A ntá tí nkehe tsíkjich'énará jahará mé xráxinkákonxínrá éxí Dios kuéntará.

Méxra janhan tsakítsjexínrá tí tjejorá la tsétuanhánrá sátsjirá chjasin Babilonia.*

Mé xíkaha ntáchro Dios ósé.

⁴⁴ Naxá k'uéjó tí sín k'uaxrjeníxinni tí nteje la chónka sín ijnko nínko kamantá chónka tí ley tsík'etoan Dios. Tíhi kjuíh'éna sín éxí tsík'etuenhen Dios tí ch'ín Moisés kíxin síh'éna ch'án kaín nkehe k'uúkon ch'án. ⁴⁵ Ntá tí sín tsík'axrjeníxinni mé k'uáyéhé sín tí nínko kujtonhen sín. Ntá tí sín kjuíkáo ch'ín Josué mé kjuíkáo sín tí nínko tíó kjuacha sín k'uáyéhé sín í jnko nonte kuénte í so chojni kuakítsje Dios, kíxin ts'áyéhé tí jehe sín. Mé xíkaha kónhen hasta tí yaon kjuankíxin k'uetóan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjínkaon ch'án síh'éna ch'án ijnko nínko kuénte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuíh'énahya ch'án tí nínko a. Tí ch'ín Salomón mé kjuíh'éna. ⁴⁸ Kjánchó Dios nkaya nkajní chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kíxin:

⁴⁹ Janhan Dios nkaya nkajní itjén tétóanxián ntá chjasintajni tjekjen totená.

¿Xá nkexéhé tí nchia chrókjuíh'énará?

¿Xá nketí chrókjuak'é chrók'ók'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†

Mé xíkaha ichro Dios.

⁵¹ A ntá jahará la icha asánrá xráxín títekákonhyará. Jahará tinhínrá kjánchó ich'erá éxí chojni chónhya Dios. Xráxín tjánjonkoará Nchakuen Dios. Jahará mé tóyóhará tí sín tsík'axrjeníxinrá ósé. ⁵² Tí sín tsík'axrjeníxinrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kíxin itsi tí nkexro chóntahya jje. A ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'uetóan Dios senó, mé tí nkehe chrónka tí ángel, la kjónté xíkaha kuitekákonhyará —ichro ch'ín Esteban.

Ik'úen ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kíxin nínkakonhen sín ch'án. ⁵⁵ A ntá ch'ín Esteban antsí chónka ch'án Nchakuen Dios la kontá ch'án nkajní k'uúkon ch'án kjuachaxién Dios la ko k'uúkon ch'án kíxin ch'ín Jesús tjexín tóté ch'án nángo tja chjina Dios. ⁵⁶ Ntá ntáchro ch'ín Esteban kíxin:

—Tsjehérá kíxin k'uúkuán kíxin xitjehé nkajní la ntaha itjen tí Xjeen Dios K'óna Chojni nángo tja chjina Dios.

⁵⁷ A ntá jehe sín la k'uíkjehe sín natsjon sín la itsen k'uúxité sín ntá sákjuí sín k'uúxitja sín ch'án ⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jje mé kuakítsje sín iké sín la k'uejo sín tóté ijnko ch'ín ntasoá it'ín Saulo kíxin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóehé ch'án Ínchéni la ntáchro ch'án kíxin:

—Ínchéni Jesús takjá nchakuenná.

⁶⁰ Ntá tuénxín kjuák'exín toch'ín ch'án la k'uèya ch'án itsen ntáchro ch'án kíxin:

—Ínchéni jaha mé tahya kuéntá tí jje kjuasin sín.

Mé xíkaha ichro ch'án ntá ik'úen ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

Á ntá tí yaon a na mé kjuankíxín sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxín tinkáchónki Cristo mé xikayehe sín sákjuí sín nkuixín estado Judea la ko estado Samaria. Á ntá jehó tí sín tsíkjejá Jesús mé kuitóhe sín ntíha. ² Na iso sín imá tinkáchónki Dios mé kjuavá sín ch'ín Esteban la ko tsjánkamá sín ch'án la ko t'avéhe sín ch'án. ³ Á ntá tí ch'ín Saulo la kjuankíxín kónínkakonhen ch'án tí sín tinkáchónki Cristo. K'uixenhen ch'án jnkojnko jnkojnko ntóe sín la itsé ch'án tí sín ntoa la ko tí chojni chjin. La ntá kuínkánkákjen ch'án sín sákjuíko ch'án sín kíxín ts'ejóhjiná sín.

Kjuako sín itan jína tí estado Samaria

⁴ Á ntá tí sín sákjuixín chjasin Jerusalén mé xritjako sín nkexrí tí tan tsáaxinni nkuixín tí sákjuí sín. ⁵ La ijnko ch'ín it'ín Felipe mé sákjuí ch'án ijnko chjasin estado Samaria la kjuankíxín ch'án chrónka ch'án itan kuente Cristo. ⁶ Na ntá nchónhya chojni kójnkontsé ntíha la kaín sín kuínhin sín jína tí nkehe ntáchro ch'ín Felipe kíxín ó k'uikon sín tí kjuaxroan kjuakoxín ch'án. ⁷ Itsje chojni chóna nchakuen tí jínahya mé kuitóhe sín jína la tí nchakuen tí jínahya k'óyako k'uaxrxjén tí jehe sín. La nchónhya tí sín chóna chin xitjahya itji la ko tí sín sixénká tóte mé kuitóhe sín jína. ⁸ Á ntá imá kóchéhe kain tí sín siín chjasin ntíha.

⁹ Tí chjasin a mé kjuák'e ijnko ch'ín it'ín Simón mé ijnko ch'ín ósé mé k'uékjinchexroan ch'án. K'uékjich'iyéhe ch'án tí sín estado Samaria ntáchro ch'án kíxín ijnko chojni imá tjetoan tí jehe ch'án. ¹⁰ La kaín tí sín ntíha k'uejó sín kuínhin sín jína, mé tí chánjan ntsínsi hasta tí chojni imá táda la k'uéntáchro sín kíxín:

—Tí ch'ín i imá chóna ch'án tí kjuachaxin kuente Dios —ichro sín.

¹¹ K'uékitekakonhen sín ch'án kíxín k'uékjinchexroan ch'án k'uékjich'iyexín ch'án sín itsjé nánó. ¹² Ntá tíó kuítekaon sín tí tan jína kjuako ch'ín Felipe kuente tí kjuachaxin kuente Dios la ko Jesucristo la ntá chojni ntoa la ko chojni chjin mé kuíte sín. ¹³ Á ntá kjaxin tí ch'ín Simón, mé kuítekaon ch'án la kuíte ch'án, koí ch'án. Ntá kjuankíxín k'uájiko ch'án tí ch'ín Felipe la imá chrakon ch'án kíxín k'uikon ch'án tí kjuaxroan jíe kjuasin tí ch'ín Felipe.

¹⁴ Á ntá tí sín apóstol, mé tí sín tsíkitohe chjasin Jerusalén, kuínhin sín kíxín itsjé tí sín estado Samaria ó kuítekaon sín itén Dios. Ntá k'uétuénhen sín ch'ín Pedro la ko ch'ín Juan sátsji sín ntíha. ¹⁵ Ntá tíó kjuíji sín ntá kjuanchehe sín Dios kíxín tí sín ntíha tinkáchónki Cristo chrók'uáyéhe sín Nchakuen Dios ¹⁶ kíxín nijnko tí jehe sín ntíha naxá tsík'áyéhya sín Nchakuen Dios. Jehó tsíkikitexín sín ihnjé Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaon kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uikon ch'án kíxín tí sín apóstol k'uejotja itja sín chrítaon kja tí sín a ntá k'uáyéhe tí sín a Nchakuen Dios. La ntá xróxin ch'án chichaon ¹⁹ la ntáchro ch'án kíxín:

—Chjehéni jeheni tí kjuachaxin kíxín kjaxin jeheni chrókjuak'etja itjani chrítaon ikja jnkojín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kíxín:

—Jaha la ko tí chíchakoán ts'ítájankoa kíxín tjenkayáxian kíxín chrók'uèna tí kjuachaxin kuente Dios. ²¹ Jaha chontahya kjuachaxin ts'ixenhen tí xra a kíxín ó nohe Dios kíxín jaha la tjuáhya asán. ²² Méxra tsjtohé tí ijí la chrónóhé Dios kíxín ách'e tsjakjinhin ch'án tí jie tjenkayáxian. ²³ Ó t'íkuan kíxín imá chjinqxínhin asán la ko nchónhya jie chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kíxín:

—Nixjehérá Ìnchéni kíxín tí janhan kíxín chrókónnahya tí janhan éxí tí ntáchrórá —ichro ch'án.

²⁵ Ntá kjuixín chrónka tí sín apóstol tí tan kuente Dios ntíha ntá sákjuí sín kjuako sín tí tan tsjanjon kjuachón nchónhya tí chjasin ntsínsi estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkijxin nación Etiopía

²⁶ Á ntá kjuixín tíha ntá ijnko ángel kuente Ìnchéni mé ntáche tí ch'ín Felipe kíxín:

—T'ínkatjen sátsja nó sur tsoxeta tí ntja t'ínkajinxín chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntja. La ntíha xringhaya xeta ch'án ijnko chojni tsíkijxin nó nación Etiopía. Jehe ch'án mé ijnko chojni eunuco mé tja ch'án siín chíchakoen tí tjan reina Candace t'etuénhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios. ²⁸ Á ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios. ²⁹ La ntá tí Nchakuen Dios mé k'uétuénhen tí ch'ín Felipe ntáchro kíxín:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsikjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuianxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjajin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxi ijnko kolélo kjuiko sín ts'óyán sín.

La éxi ijnko kolélo tsjánkahya tió kjinhin sín kaxree va

mé xikaha jehe ch'án ninkehó xitjeehya ir'va ch'án.

³³ K'uíkon sín ch'án éxi ijnko chojni chóna jig la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjeníxin ch'án

kixin jehe ch'án la k'uénxín ch'án chjasintajni.*

Mé xikaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chronka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

³⁵ La ntá tí ch'ín Felipe kjuankixin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jina kuènte Jesús. ³⁶ A ntá xrínahya kjuíji sín tí tjia ntá, ntá ntáchro tí ch'ín eunuco kixin:

—Tsjehe tjia ntá. ¿Á xitjahya chrókuíkítina? —ichro ch'án.

³⁷ Na ntá ntáchro tí ch'ín Felipe kixin:

—Tí kuítekávan kaín asán la kjá jina tsikitia.

La ntá kjuátehe tí ch'ín a, ntáchro ch'án kixin:

—Títekavan kixin tí Jesucristo la Xjeen Dios —ichro ch'án.

³⁸ La ntá tí ch'ín tsikjixín Etiopía a k'uetqan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsikjixín Etiopía mé k'uínkajin sín ntá kjuíankí sín ntá la tí ch'ín Felipe kuíkíte ch'án tí ch'ín a. ³⁹ La ntá kjuixin k'uaxrjenkí sín ntá la ntá tí Nchakuen Inchéni sátsikjiko tí ch'ín Felipe ókjé. A ntá k'uíkonhya kichó sín inaá. Ntá kjónté xikaha la tí ch'ín eunuco sákjuí ch'án la antsí chéhe asén ch'án. ⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Inchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo

(Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Inchéni Jesús. Méxra sákjuítsjehe ch'án tí ch'ín nchat'á t'etqan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí njnko chjasin Damasco tsjeyá ch'án tí sín kuákja ntá njxin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuíji ch'án chjinaxón chjasin Damasco, a ntá xrínahya titáya ikui ijnko xrohi t'inkaséyan kuíxin nkaya nkajni k'uántatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án njxia ijnko nkexro kixin:

—Saulo, Saulo, ¿nekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha. ⁶ T'áya sátjia. T'ixenhén tí chjasin Damasco, ntá ntíha mé tsinhín nkehe sjch'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuiko sín ch'án chjasin Damasco. ⁹ A ntá ntíha kjuák'e ch'án la iní yqan k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Inchéni it'ín Ananías. La ntá titáya k'uíkuèn ch'án Inchéni ntáchro kixin:

—Ananías.

* 8:33 8.32-33 Isaías 53.7-8

Ḃ ntá ch'in Ananías mé kjuátehe ch'án kixin:

—Ntíhi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sájtia tí ntja it'in Ntja Ntoí. Ntá tíó tsjasán ntge ch'in Judas tjanchankíhi sín á ntahya itjen ijnko ch'in tsikjixín chjasin Tarso me it'in ch'án Saulo. Jehé ch'án mé tjechrónóga ch'án. ¹² Ḃ ntá titáya k'uikuèn ch'án kixin tsjji ijnko ch'in it'in Ananías ts'ixenhen ch'án tsjak'etja tja ch'án chrítaón kja tí jehé ch'án kixin xik'íkon ch'án inaá —ichro Ìnchéni.

¹³ Ntá kuínhin ch'in Ananías tíha ntá ntáchro ch'án kixin:

—Ìnchéni náhi, tsjlyhani kixin ó kuínhini chrónka nchónhya chojni kixin nkexrí xéhe tí ch'in a. Imá tsjé nkehe jehya jina kjuich'ehe ch'án tí sín kuítekaon tí jaha chjasin Jerusalén. ¹⁴ Ḃ ntá jie la ó kjuí ch'án ntíhi kixin tsik'áyéhe ch'án kjuachaxin kuente ncha't'á t'etóan kixin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sájtia. Janhan kjuéyá tí ch'in a kixin tsjako ch'án tanná. Tsjakohe ch'án tí sín ókjé nacióñ la ko tí sín rey la ko kjaxin tí sín israelita. ¹⁶ Janhan tsjáqoha ch'án kixin nchónhya tsjasóte ch'án kixin tsinkáchónkina ch'án.

¹⁷ Ḃ ntá ch'in Ananías sákjuí ch'án tí nchia itjen ch'in Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'in Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uikuan tí ntja k'uinkaxian, mé k'uetuanna kjuíha kixin sjintak'íkan inaá la ko ts'ayéhé Nchaquen ch'án —ichro tí ch'in Ananías a.

¹⁸ Ntá tuénxín k'uanotjénxín ikon ch'in Saulo ijnko nkehe éxí kje koche xikaha. Ntá xik'íkon ch'án inaá. La ntá k'uinkatjen ch'án la ko kuíkite ch'án. ¹⁹ La ntá chr'éxín ntá kjóne ch'án la ntá ikjan asén ch'án inaá. Ntá kuítge ch'án iso yaon k'uejóko ch'án tí sín tinkáchónki Ìnchéni chjasin Damasco.

Kjuako ch'in Saulo chjasin Damasco

²⁰ Na ntá kjuankixin ch'in Saulo kjuakoxín ch'án iso njnko Israel kixin Jesús mé Xjeen Dios. ²¹ La kaín tí sín tjejótinhin imá chakon sín la ntáchro sín kixin:

—¿Ḃ jehya tí ch'in i tjinkaon sincheh'itjáyan ch'án kaín tí chojni tinkáchónki Jesús chjasin Jerusalén? ¿Ḃ jehya tí xra a kjuixín ch'án ntíhi kixin tsotsé ch'án sín la sátsjiko ch'án sín tí tjejó tí sín ncha't'á t'etóan? —ichro sín.

²² Kjánchó antsi má fuerte kjuako ch'in Saulo kixin chaxin tí ch'in Jesús mé tí Cristo. La tí sín judío k'uejó chjasin Damasco kjuachahya kjuachaxín sín ch'án.

Kjuachahya tí sín judío chrótsé sín tí ch'in Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'in Saulo. ²⁴ Ḃ ntá ó kuínhin ch'án nkehe kjuenkayáxin sín. Ḃ ntá nchaqotjin la ko tie tjejóchónhen tí sín chrók'óyán tí jehé ch'án tí ntója ts'axrjéxin ch'án chjasin. ²⁵ Ḃ ntá tí sín tinkáchónki Ìnchéni mé kjuak'enkaya sín tí ch'in Saulo ijnko ntaxra jie ijnko tie. Ntá kjuinkajinxín sín tí ntaxra tjenkáya tí ch'in Saulo nóton tí tja't'ó tsik'antatjen tí chjasin a. Ntá kuaá ch'án.

Ch'in Saulo sákjuí chjasin Jerusalén

²⁶ Ntá tí kjuíji ch'in Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chakonhen sín ch'án kixin kuítekakhya sín kixin á chrókóchaxín kjaxin ch'án tinkáchónki ch'án Ìnchéni. ²⁷ Ḃ ntá ch'in Bernabé mé sákjuíko ch'án tí ch'in Saulo tí tjejó tí sín apóstol la ntá chrónka ch'án kixin ch'in Saulo mé tsik'íkon ch'án Ìnchéni tí ntja sákjuí ch'án ntá Ìnchéni mé nixjehé ch'án. Méxra chjasin Damasco k'uejkako ch'án ihnjé Ìnchéni la chakonhya ch'án. ²⁸ Méxra ch'in Saulo kuítge ch'án chjasin Jerusalén la ko k'uájiko ch'án tí sín a. La chakonhya ch'án kjuako ch'án kjuachaxién ihnjé Ìnchéni Jesús. ²⁹ La ikjo ch'án tí sín judío nixja nkiva griego. Ḃ ntá jehé sín la tjinkaon sín chrók'óyán sín tí jehé ch'án. ³⁰ Ḃ ntá tí sín kichó ni tinkáchónki Cristo mé tsikinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuénhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uejó sín la antsi má tinkáchónki sín Ìnchéni. K'uechónta sín kjuasáyé Ìnchéni la ko tí Nchaquen Dios kjuínkítsa sín la ntá antsi má sítinkákótsjé sín.

Ch'in Eneas kuítge ch'án jina

³² Na ntá tí ch'ín Pedro xristsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin:

—Eneas, Jesucristo mé sintakitõha jina ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín siín chjasin Lida la ko chjasin Sarón k'uikon sín kixin kuítõhe ch'án jina la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjexín kixin Dorcas. A ntá tí tjan a mé jina kjuích'e tjan tí k'uékjak'e tjan la kjuinkítsa tjan tí chojni nõa. ³⁷ Ntá ijnko yaon imá kónihi tjan ntá ik'uén tjan. La ntá kjuínchek'ónti sín cuérpõe tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsonátche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuiko sín ch'ín Pedro. Ntá kjuíji sín ntiha ntá tuénxín sákjuiko sín ch'án tí tjan tí cuérpõe tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. ⁴⁰ A ntá k'uetõan ch'ín Pedro kixin kaín sín ts'axrje sín ntõja. Na ntá kjuák'exín toch'in ch'án nixjehẽ ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenkí tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehẽ ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítõhe ch'án itsjé yaon tí chjasin a la kjuák'e ch'án ntõqẽ ch'ín Simón, ijnko ch'ín nchentá tjeó iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuõnhen tí sín soldado italiano. ² Tí ch'ín a la imá jina ch'án la kaín tí sín kjéhya ch'án mé imá xraxinkaon sín Dios. Kjaxin kjuanjõn ch'án nõhõnya chichaon kixin tjinkaon ch'án tsjinkítsa tí sín judío la ko xráxin nixjehẽ ch'án Dios. ³ La ntá ijnko yaon las tres kõnjõn titáyã k'uikuèn ch'án ijnko ángel kuènte Dios k'uíxõnhen tí tjan ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kõxrjínhin kixin tí nixjehẽ ch'án la ko tí jina ch'e tjinkítsa tí sín nõa. ⁵ Ntá jaha tétuõnhen jnkõjín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntõqẽ ijnko ch'ín kjaxin it'in Simón. Tí ch'ín a mé nchentá tjeó iko. Mé tjen ntõqẽ ch'án chjinaxón tí ntayaon a.

⁷ Ntá tió sákjuí tí ángel nixjehẽ ch'ín Cornelio la ntá jehe ch'án k'uíyehẽ ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chõntõhe sín kjuasáya kichó sín. ⁸ Ntá kjuíxin chénka ch'án kaín sín tí nkehe k'uikon ch'án ntá k'uetuõnhen ch'án sín sátsji sín chjasin Jope.

⁹ Íjnko yaon chr'éxin chjina chonkixin tjejóyá sín ntja chjino chjasin Jope ntá ch'ín Pedro mé k'uit'õtjen ch'án chrítaõn nchia kixin ntaha nixjexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjõne ch'án. Nachrohe tsochján tí nkehe sine ch'án la ntá titáyã k'uikuèn ch'án nkehe ¹¹ mé k'uikon ch'án kixin xitjehẽ nkaya nkajní ntá ntiha k'uínkajjõn ijnko ka jíé. Kanoé punté tí ka tjejóte. ¹² Tí nkaxõnhen tí ka a tjinká ko noó toté la ko konche la ko kaín ko xritjaká. ¹³ Ntá kuínhin ch'án nixja ijnko nkexro ntáchro ch'án kixin:

—Pedro, t'aya, t'oyán tí ko a ntá inte.

¹⁴ Ntá ch'ín Pedro kjuátõhe ch'án kixin:

—Náhí, Ìnchéni. Nunca nehyani tí nkehe tjuáhya.

¹⁵ Ntá kjuátõhe tí tan inaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

¹⁶ Xikaha kõnhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uikon ch'án la xringhya ó kui tí sín ichr'án ch'ín

Cornelio ntója nchia. Ó tsíkjančankí sín nketí tjen ntøe ch'ín Simón. ¹⁸ Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

¹⁹ Naḡa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha. ²⁰ T'aya t'inkajián sátjikoá tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjínkaonrá?

²² Ntá kjuátehe sín ntáchro sín kixin:

—K'uetøan tí ch'ín capitán Cornelio ikuihi ntihi. Jehé ch'án me ijnko chojni imá jína la ko xraxinkaon ch'án Dios. Kaín tí sín judío tjíkosáyehe ch'án la ko tjeuhe sín ch'án. Ijnko ángel kuènte Dios mé nixjehe ch'án chénka ch'án kixin chrók'uíyehe ch'án tí jaha kixin chrókjuia ntøe ch'án la ntá chrókuinhin ch'án tí nkehe tsontáchrúa —mé xíkaha chrónka sín.

²³ Na ntá tí ch'ín Pedro kjuanjøn kjuachaxin kixin ntahó chrók'ok'éhe sín tí tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jøpe mé sákjuíkotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehe ch'án tí jehe sín kixin tsinhin sín. ²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjéxin ch'án nchia nixjehe kíchó sín. Ntá kjuák'exín toč'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínček'ínkatjen ch'án tí ch'ín a la ntáchro ch'án kixin:

—T'ínkatjen. Tjak'exián toťá. Janhan mé ijnko chojni éxí tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uíkon tí ch'ín Pedro kixin nchónhya chojni tsíkójnkotsé ntiha. ²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsøjnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakøna kixin xitjahya tsontáxrjan kixin tuáhya nijnko chojni. ²⁹ Méxrá tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xrínahya k'uíkonni ijnko chojni chónka iké tjákini. ³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjínkítsa jaha tí chojni nòa. ³² Méxrá tétuènhén chojni sátsji chjasin Jøpe kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchéntá ch'án tjejó iko. Chjino tí ntayaon a itjen ntøe ch'án,” ichro tí ángel. ³³ Méxrá xíkaha tjoka ichr'anni sín tsíkjeyá sín tí jaha. Jína k'uinka ntøeni. Ntá ijie ó nohe Dios kixin kaín ni tjínkaonni tsinhinni nkehe tí k'uetuanhan Ìnchéni tsøchronka tsinhinni.

Ch'ín Pedro kjuakøhe ch'ín Cornelio ntøe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'íkon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjínhe ch'án. ³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehé ch'án mé Ìnché ch'án kaín nkehe. ³⁷ Jahará ó nohará jína kaín tí nkehe tsíkónhen nkuíxin tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni. ³⁸ Jahará ó nohará kixin Dios kjuanjøn kjuachaxiè ch'án la ko Nchakuen ch'án k'uáyéhe tí ch'ín Jesús tí nkexro tsíkijixè chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínčekitøhe ch'án jína kaín chojni tjasótéxin kaín tí kjuachaxiè tí jínahya. Mé xíkaha jína kjuích'e ch'án kixin Dios tjejó tí jehe ch'án. ³⁹ A ntá jeheni mé chaxín k'uíkonni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkanı sín ch'án ijnko ntacruz la k'óyán sín ch'án. ⁴⁰ A ntá Dios kjuínčekexchón ch'án tí níxin yaon la kjuanjøn ch'án kjuachaxin kixin k'uíkonni ch'án inaá. ⁴¹ Jehya kixin kaín chojni chrók'uíkon sín ch'án. Náhí. Jehó tí sín tsíkjeyá Dios kixin ts'íkon chaxín xechón ch'án. Jeheni kjónekoni ch'án la ko k'uíkøoni ch'án tió xíxechón ch'án inaá. ⁴² K'uetøan ch'án kixin jeheni tsjakøhèni chojni la tsochrónkani kixin jehe ch'án mé tí nkexro juez sínčekitøexín ijie tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kixin jnkojnko tí sín tinkáchónki Jesús mé ts'ókíka ch'án ijie sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naḡa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuíkotoxin ch'ín Pedro la chrakon sín kixin Dios mé

kjuanjon Nchakuen ch'an, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkoinko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'in Pedro kixin:

—Jehé sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'an.

⁴⁸ La ntá k'uetóan ch'in Pedro kixin tsikite kaín sín kjuachaxiénd ihnjé Jesucristo. Ntá tí sín kuikite mé kjuanchia sín kixin chrókuitóhe tí ch'in Pedro ntiha iso yaon.

11

Nixjehé ch'in Pedro tí sín tinkáchónki Cristo chjasin Jerusalén

¹ Na ntá tí sín tsikjeyá Ìnchéni la ko kaín tí sín tinkáchónki Ìnchéni k'uéjé estado Judea mé kuínhin sín kixin tí sín jehya judío ó tinkáchónki sín itén Dios. ² Na ntá ch'in Pedro ikjan ch'an chjasin Jerusalén. La ntá iso tí sín judío tinkáchónki sín Ìnchéni tjonta sín ch'an.

³ Kjuanchankíhi sín ch'an ntáchro sín kixin:

—¿Nkeukénté kjuítsjehé tí sín jehya judío, la ko kjóntekoa tí jehé sín? —mé xikaha kjuanchanki sín.

⁴ Ntá tí ch'in Pedro kjuankixin ch'an chrónka ch'an desde tí xrankixixin kaín nkehe tsikónhen ch'an. Ntáchro ch'an kixin:

⁵ —Janhan mé kjuak'é chjasin Jope kjuak'énixjaha Dios. La ntá titáya k'uikuén ijnko ka jie k'uínkajinxin nkaya nkajni. Kanoé punté tí ka tjejóte la kjuak'e chjino tí tjén. ⁶ Ntá tsjaha jina tí nkehe la k'uikuán kixin tí nkaxenhen tí ka tjinka ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntáchro ch'an kixin: “Pedro, t'aya t'oyán tí ko a ntá inte.” ⁸ A ntá kjuátaha kixin: “Náhi, Ìnchéni. Nunca nehyaní tí nkehe tjuáha.” ⁹ A ntá kjuátehe tí tan kuixin nkaya nkajni a inaá chrónka kixin: “Tí nkehe a mé ó kjuínchetjóa Dios. La ntáchrohya kixin tjuáha,” ichro ch'an. ¹⁰ Xikaha kónhen iní veces. Ntá sákjuí kaín tí nkehe a nkaya nkajni inaá. ¹¹ Ntá xringhaya tuénxin kjuíji iní chojni ntoa tí nchia tjejóni. Tsikjixin sín chjasin Cesarea xritjeyá sín tí janhan. ¹² Tí Nchakuen Dios mé k'uetóan kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaíni k'uixenhenni ntóe tí ch'in a. ¹³ A ntá tí ch'in ntóe ntiha mé chrónka ch'an kixin k'uikon ch'an ijnko ángel tjexín toté la nixja ntáchro kixin: “Tétuénhén chojni sátsji chjasin Jope kixin tsjikakjín sín ijnko ch'in it'in Simón la ko kjaxin it'in ch'an Pedro. ¹⁴ Jehé ch'an mé tsonixjaha ch'an tsochrónka ch'an nkexrí tsaá jaha la ko kaín tí sín kjéha.” ¹⁵ Ntá kjuankixian nixjaha sín na ntá ó kui tí Nchakuen Dios k'uáyéhe sín éxi k'uáyéhe ni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'an kixin: “A ntá chaxin ch'in Juan intá ó kuikjitéxin ch'an chojni, a ntá ijie jahará tsikitiáxinrá tí Nchakuen Dios.” ¹⁷ Éxi xikaha jeheni tió kjuankixin kuinkáchónkini Ìnchéni Jesucristo ntá kjuanjon Dios Nchakuen ch'an k'uáyéhe ni mé xikaha ijie la kjuanjon Dios tí Nchakuen ch'an k'uáyéhe tí jehé sín kjaxin. ¿Xá nkexro tí janhan kixin chrókjuanjonkian Dios? —ichro ch'in Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsikónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrixín —mé xikaha ichro sín.

Tí ninko chjasin Antioquía

¹⁹ Tí kjuixin k'uén ch'in Esteban ntá kjuankixin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayon la ko sákjuí sín chjasin Antioquía. Kjuakohe sín tí sín judío nkexrí tjen tí tan jina. A ntá tí sín jehya judío la náhi.

²⁰ A ntá í so sín tinkáchónki Ìnchéni tsikjixin chjasin Chipre la ko tsikjixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jina kuénte Ìnchéni Jesucristo. ²¹ Tí kjuachaxin kuénte Ìnchéni mé chóna tí jehé sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsikónhen chjasin Antioquía. Ntá ichr'an sín ch'in Bernabé sákjuí ch'an ntiha. ²³ Ntá tió kjuíji ch'an ntiha ntá k'uikon ch'an kixin Dios imá kjuínkítsa tí sín ntiha kjaxin. Ntá imá kóchéhe asén ch'an. Ntá nixjehé ch'an sín kixin kaín asén sín ts'ejó sín tsinkáchónki sín Ìnchéni. ²⁴ Ch'in Bernabé la ijnko chojni imá jina asén la antsí chóna ch'an Nchakuen Dios la jina tinkáchónki ch'an; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'in Bernabé sákjuí ch'an chjasin Tarso sákjuikjeyá ch'an tí ch'in Saulo. ²⁶ Ntá tió k'uitja ch'an ntá sákjuiko ch'an chjasin Antioquía. Ntá k'uejóko sín tí sín

tinkáchónki Ìnchéni ntiha kuenté ijnko nánó la kjuakõhë sín itsjë chojni. Ntiha chjasin Antioquía kjuankíxin sín kuikítexin sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuuji sín chjasin Antioquía. ²⁸ Ijnko ch'in it'in Agabo k'uínkatjen ch'án kjuák'exín toté ch'an tí tsikójnkotsé tí sín tinkáchónki Jesús la kjuachaxién Nchakuen Dios chrónka ch'án kíxin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'in Claudio k'uetõan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kíxin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjõn sín tí nkehe chónka sín. ³⁰ Mé xikaha kjuenájín sín chichaon sákjuíko ch'in Bernabé la ko ch'in Saulo chjéhe sín tí sín t'ayakonhen njnko estado Judea.

12

Ik'uen ch'in Jacobo la ko kjuák'echjina ch'in Pedro

¹ A ntá tí yaon a tí ch'in rey Herodes mé ntá kjuankíxin ch'án kónínkakhõnen ch'án tí sín tinkáchónki Jesús. ² La k'uetõan ch'án kíxin tí ch'in Jacobo ts'enxín ijnko chica espada tjate. Jehe ch'án mé kichó ch'án tí ch'in Juan a. ³ Ntá k'uíkon ch'in Herodes kíxin imá kóchéhe tí sín judío kíxin xikaha kónhen la ntá kjaxin itsé ch'án tí ch'in Pedro. Tíha mé kónhen tí yaon kia pascua tió kjónë sín niõtja chónthaha tí xroan nchek'ánki niõtja. ⁴ Kjuixín itsé ch'in Herodes tí ch'in Pedro ntá chr'áxenhõn ch'án ntõechiso. Ntá ntiha mé tjejõnta noó grupo soldado la mé noó soldado jnkojnko grupo. Kjuenkayáxin ch'in Herodes kíxin tsjixin ts'átsínka tí kia pascua ntá sátsjiko ch'án tí ch'in Pedro tí siín tí sín israelita kíxin ts'íkon kuenté chjasin ntiha kíxin nkexrí its'en ch'án. ⁵ Méxra ch'in Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehë sín Dios kaín asén sín kíxin tsjinkítsa Dios tí ch'in Pedro.

Dios kjuínkítsa ch'in Pedro k'uaxrjexín ch'án ntõechiso

⁶ Tí tie a mé kjuenkayáxin ch'in Herodes kíxin tsõyaon ntá tsakitsje ch'án ch'in Pedro sátsjiko ch'án tí siín tí sín chjasin. A ntá ch'in Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejõnta sín ntója ntõechiso. ⁷ A ntá xrinahya tuénxín ikui ijnko ángel kuente Ìnchéni, a ntá tí nkaxenhõn ntõechiso imá k'uínkaséyan ijnkòyé ntiha. Kjuak'etja itja tí ángel tí chjia ch'in Pedro kjuínchekjayehe ch'án. Ntá k'uetõan tí ángel ntáchro kíxin:

—Tjoka t'áya.

La ntá tí chica cadena tjejóchróntetoxín itja ch'in Pedro mé k'uánótjen. ⁸ Ntá xik'etõan tí ángel ntáchro kíxin:

—T'inkaya iká la tjanka tokatá.

Ntá kuítekaon ch'in Pedro la kjatëe xik'etõan tí ángel ntáchro kíxin:

—T'ítsate iká ntá chréhe sátsjini —ichro ch'án.

⁹ Ntá ch'in Pedro chréhe ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel ó náhi. Ntáchro ch'án kíxin ách'e ijnko nkehe k'uíkonxón ch'án. ¹⁰ Ntá kjuixín k'uátsínka sín tí tjejó tí soldado saoxín la kjuixín xik'átsínka sín tí tjejó tí soldado a yóxin. La ntá kjuuji sín ijnko puerta chica ijíe chjinaxón ntja. La ntá tí puerta chica la jehó xitjehë. Ntá k'uaxrje sín tjejótji sín ijnko ntja la ntá xrinahya tí ángel ó sákjuí la ntá jehó ch'in Pedro kuitghe ch'án. ¹¹ A ntá tí ch'in Pedro kónohe ch'án kíxin chaxín kónhen tíha. Ntá ntáchro ch'án kíxin:

—Ntá ó noheni kíxin chaxín Ìnchéni tsíchr'án tí ángel kuente ch'án kíxin sinchekaáni kíxin ts'yóanhyani ch'in Herodes la ko tsõenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntõe ijnko tjan María, iné ch'in Juan kjaxin tikítexín sín Marcos. Ntaha tsikójnkotsé itsjë sín tinkáchónki Ìnchéni tjejónixjehë sín Dios. ¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kíxin nkexro tíha. ¹⁴ A ntá tió kjuátsõan tjan itén ch'in Pedro ntá k'uitjáyehõn tjan kuakitjehya tjan tí ntója a kíxin imá kóchéhe tjan. Kuinká tjan sákjuíchrónka tjan kíxin ntója puerta ntiha itjen ch'in Pedro. ¹⁵ Ntá ntáchro sín kíxin:

—Lontia.

La naxa chrónka tjan kíxin chaxín jehe ch'án ntá xíntáchro sín kíxin:

—Jehya jehe ch'án. Kjá tí xrintõe ch'án.

¹⁶ A ntá ch'in Pedro naxa t'ínka ch'án tí ntója puerta la ntá tió kuakitjehë sín la k'uíkon sín ch'án ntá chrakon sín. ¹⁷ A ntá kjuakõxín ch'in Pedro itja ch'án kíxin tsotáni sín ntá chrónka ch'án kíxin Ìnchéni mé kuakitsjexín ch'án ntõechiso. Ntá k'uetõan ch'án ntáchro ch'án kíxin:

—Chenkará ch'in Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro.
¹⁹ La ntá k'uetóan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetóan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjéxin ch'án estado Judea ntá sákjuí ch'án chjasin Cesarea la ntíha kjuák'e ch'án.

Ik'uéen ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokóá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uáyakonhen ch'án ntóe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etóan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítxixin tí nkehe ine sín. ²¹ Ntá ch'ín Herodes k'uíyehé ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrxjón kuénte chojni t'etóan la kjuák'enkáya ch'án ijnko silla kuénte chojni t'etóan. La ntá kjuankixin ch'án nixjehé ch'án tí sín tsikójkotsé. ²² A ntá tí sín a kjuankixin k'uèya sín, ntáchro sín kixin:

—Jehe chojni tjenixja. Dios tjenixja —ichro sín.

²³ A ntá tuénxín ijnko ángel kuénte Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosínto kjóne nkaya tsee ch'án ntá k'uéen ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixrā kuénte sín chjasin Jerusalén la ntá sáxíkji sín chjasin Antioquía la sákjuiko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí njnko chjasin Antioquía la sín iso sín nixja sín itén Dios la kjuakóhe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etóan estado Galilea, la ko ch'ín Saulo. ² Ijnko yaon la tjejtótójkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xrx sich'e sín.

³ Ntá nixjehé sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uíxenhén sín ijnko ntabárcó sákjuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Ntaha kjuakoxín sín itén Dios tí njnko kuénte tí sín judío. Kjaxin kjuíjiko sín ch'ín Juan kixin tsjinkítsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuich'ia ch'án ntáchro ch'án kixin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehé ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkíva griego mé tikítexín sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'etóan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuénte kixin ch'éna jínahya tí ntia ntoá kuénte Ìnchéni? ¹¹ A ntá ijie la Ìnchéni sintakjasótia. Tsitóha ntakótán iso yaon la ts'ikonhya tí xrohi kuénte yaon —ichro ch'ín Pablo.

Ntá tuénxín tí ch'ín Elimas la k'uíxítie tjen ch'án. La ntá kjuéyá ch'án ijnko nkexro tsinkátséhe tja ch'án sátsjiko ch'án kixin t'ikónhya ch'án. ¹² A ntá xíkaha mé k'uikón tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uikón ch'án tí kjuachaxin kuénte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uíxenhén sín ntabárcó sákjuí sín kjuíji sín chjasin Perge estado Panfilia. Ntá ntaha ch'ín Juan* kuitóhe

* 13:13 Hechos 12:25

tí jehe sín ntá kjan ch'án chjasin Jerusalén. ¹⁴ Ntá sákjuúxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uúixhenhén sín tí núnko Israel na ntaha k'u'éjótjāxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'u'échrónka itén Dios ntá tí sín t'etōan kuènte núnko mé k'uúyehé sín tí sín a ntá ntáchro sín káxin:

—Kíchóni tí chonta nkehe tsōchroónka káxin antsí má tsōchéheni la chroónka jie tsinhinni —ichro sín.

¹⁶ Ntá ch'ín Pablo k'uúinkatjen ntá kjuáqōxin itja ch'án káxin tsotáni sín. Ntá ntáchro ch'án káxin:

—Chrōkuinhínrá jahará chojni israelita la ko kjaxin chrōkuinhínrá jahará tsíkjāxinrá chjasin ókjé tí chaxín tjínkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjōn kjuachaxin káxin chrókótsjé tí jehe sín tí naxá k'u'éjō sín chjasin Egipto. Éxí chojni tsíkjāxin ókjé k'u'éjō sín a ntá chr'éxin ntá kjuachaxiéhén Dios kjuínkítsa sín k'uaxrjexin sín tí nonte ntiha inaá. ¹⁸ Dios kjuínkítsa sín tí cuarenta nánó k'u'éjō sín tí nteje. ¹⁹ Ntá chr'éxin kjuínchek'itjāyan ch'án yato nación k'uék'ejō nonte Canaán, káxin tí sín tsík'axrjeníxinni chrók'uáyehé tí nonte a. ²⁰ Ntá káin sín k'u'éjō sín ntiha ijnko cuatrocientos cincuenta nánó. K'uék'etōan tí sín juez hasta ikjuí tí ch'ín Samuel ijnko ch'ín k'u'échrónka itén Dios. ²¹ Ntá kjuanchia tí sín israelita ijnko ch'ín rey ts'etuehénhén sín. Ntá kjueyá Dios tí ch'ín Saúl la k'uetojan ch'án cuarenta nánó. Jehe ch'ín it'é ch'án mé ch'ín Cis la k'uaxrjeníxin ch'án ch'ín Benjamín. ²² Ntá chr'éxin Dios kuakitsjehe ch'ín Saúl tí xra kjuák'e ch'án ntá k'uáyehé ch'ín David tí xra rey. Ntá ntáchro Dios káxin: “Ó k'uitjā ch'ín David, it'é ch'án mé Isaí. Jehe ch'án mé ijnko chojni nchekhāna mé sinchexiteyāna ch'án káin nkehe tjínkavan”. ²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án káxin sinchekáá tí sín israelita. Mé xíkaha tsíntáchro ch'án. ²⁴ Naxá tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án káxin chrókjan sín chrórxaxinkaon sín Dios ntá chrokuíkite sín. ²⁵ Ntá chjina its'en ch'ín Juan ntá ntáchro ch'án káxin: “Janhan na jehya tí nkexro tjenkayáxinrá. Náhi. Chr'éxin na itsi í nkexro la chrókósuāna chrókósuāntānka tí correa tōkātē ch'án káxin antsí mé t'etōan tí jehe ch'án la kánhyó t'etōan tí janhan,” mé xíkaha tsíntáchro ch'ín Juan.

²⁶ Jahará kíchó ní tsík'axrjeníxinrá ch'ín Abraham tinhínrá la ko káin rá chojni tsíkjāxin ikjín nchexiteyéhérá Dios, tinhínrá tí tán tsaáxinrá. ²⁷ Méxra tí sín k'uék'ejō sín chjasin Jerusalén la ko tí sín t'etōan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'u'échrónka itén Dios senó tió kjuínchekuáxin sín tí xroon tí nkaxenhen núnko jnkōjnko tí yaon t'ok'éhe sín. Mé xíkaha jehe sín tió kjuínchekjasóte sín tí ch'ín Jesús la kjuínchexiteyá sín éxí nixja tí xroon a. ²⁸ Ntá k'uitjāhya sín ninkehó jie káxin chrók'uen ch'án ntá kjónté kjuanchehe sín tí ch'ín Pilato káxin ts'etōan ch'án káin its'en ch'án. ²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuínkajjāxin sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uúkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjejonixja sín nkexrí kjuako ch'ín Jesús, tjakohe sín káin chojni.

³² A ntá jie jeheni tjakoni tí tan jina, mé tí nkehe tsíkjanjon Dios tsík'áyehé tí sín tsík'axrjeníxinni ósé. ³³ Mé xíkaha xiteyá k'uáyehéni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxí nixja tí xroon yóxin Salmo, ntáchro káxin: “Jaha mé xjānna. Janhan mé tjahá kjuachón jie.”† ³⁴ Ntá tsíntáchro Dios káxin sinchexechón ch'án tí ch'ín Jesús káxin tsōxíkaha cuérpōé ch'án. Mé xíkaha chrónka tí xroon itén Dios. Ntáchro káxin: “Janhan mé sintaxiteyá tí nkehe chaxín tjanka ch'ín David.”‡ ³⁵ La ko í jnko Salmo mé ntáchro xíkíhi: “Jaha tsjānjōnhya kjuachaxin káxin tsōxíka tí cuérpōé tí nkexro tjóá kjuít'axra xra.”§ ³⁶ A ntá ch'ín David kjuínchexiteyá ch'án éxí tsík'etōan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntōe ch'án. ³⁷ A ntá tí cuérpōé tí nkexro kjuínchexechón Dios la kótjehya. ³⁸ Méxra kíchó ní t'ichjānxin tsōnohará káxin nkexrí tsjīn ijjārā káxin Jesús mé k'uenyákonhánrá. ³⁹ A ntá káin nkexro tinkáchónki Jesús mé ó kjuínchetjóá ch'án asén sín. A ntá tí ley k'uetojan ch'ín Moisés kjuachahya kótjuáxin tí jie. ⁴⁰ Chrókóxakonhanrá káxin chrókóxakonhanrá xíkaha éxí tsíkjin tí sín ósé xíkíhi:

† Tsjehérá jahara chojni titekakonhya. Ijie la tsochrakonrá káxin nkehe tsōnhen

káxin janhan Dios tsjākōxiān ijnko nkehe jie ijnko yaon

kjānchó tsítékákonhyarā kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrxjéxín sín nkaxenhen tí nínko, a ntá chrónóta tí sín jehya sín judío tsíkokjféxín, kjuanchia sín kíxín í jnko semana tí yaon t'ok'éhe sín la inaá tsochrónka ch'án éxí tí kjuako ch'án. ⁴³ Ntá tí kjuixín xíkaxín sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxínkaon sín Dios, la mé imá kóxrjínhín sín tí nkehe kjuako ch'ín Pablo la ko ch'ín Bernabé la ntá sákjuichréhe sín. A ntá jehe sín mé k'uetqan sín kíxín antsí jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuéxín, tí yaon t'ok'éhe sín la kójnkotsé kaín tí sín síin tí chjasin ntiha kíxín tjínkaon sín tsinhín sín itén Dios. ⁴⁵ A ntá k'uíkon tí sín judío a kíxín nchónhya chojni tsíkokjnkotsé, ntá imá kóchjínnoxínhín sín, ntá kjuankíxín sín k'uántaxínhín sín tí ch'ín Pablo. ⁴⁶ A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kíxín:

—T'ichjánxín senó jahará judiorá chrókuinhínrá itén Dios. Kjánchó tjínkákonyará tsinhínrá tí nkehe jína tsjanjon kjuachón jnkochrín. A ntá ijie la tsitohará tí jahara judiorá la ntá jeheni la sátsjini tsjakqheni tí sín jehya judío ⁴⁷ xíkaha tsík'etqan Ínchéni. Ntáchro ch'án kíxín:

Janhan ichr'an tí jahará éxí xrohi ts'inkaséyanxín kaín nació

kíxín sátsjikoará tí tan tsjanjon kjuachón tsaáxín chojni hasta tí antsí má kjin kjuéxín chjasintajni.[†]

Mé xíkaha k'uetqan Dios.

⁴⁸ A ntá kuínhín tí sín jehya sín judío tíha la kjuankíxín kóchéhe sín la ntáchro sín kíxín tí tan kuénte Ínchéni la nkehe jína, ichro sín.

La ntá kjuankíxín kuinkáchónki kaín tí sín tsíkítqenxín sín kíxín tsochóna sín kjuachón jnkochrín. ⁴⁹ Ntá xíkaha xrankíxín xrako tí itén Ínchéni nkuixín tí chjasin ntiha. ⁵⁰ A ntá tí sín judío nixjehe sín iso chojni chjin jína tjetoan la ko tí chojni ntoa t'etqan tí chjasin ntiha la ntá kjuínchekónínkaon tí sín a la ntá kjuankíxín sín chrók'óyán sín tí ch'ín Pablo la ko tí ch'ín Bernabé ntá sákjuixín sín chjasin ntiha. ⁵¹ A ntá jehe sín la kósjénka sín tokaté sín kíxín tsoxénjin tí nche chóna toté sín. Tíha mé kjuakoxín sín kíxín ntoáhya kjuenkayáxín tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Ínchéni la imá chéhe sín kíxín antsí chóna sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uíxénhen sín nínkqé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonyha la ntá kjuankíxín nchekónínkaon sín tí chojni jehya judío kíxín tsoínkakonhen sín tí sín tjako. ³ A ntá tí sín tjako la isé kuitqhe sín ntiha la chrakonhya sín nixja sín la ko tinkáchónki sín Ínchéni Jesús. La ntá Ínchéni kjaxín kóxrjínhín ch'án tí nkehe nixja sín kíxín nkexrí tjuèheni Dios la kjuanjón ch'án kjuachaxín tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxín sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ínchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etqan kíxín sínchekrakon sín tí sín tsíkjejá Ínchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxín tí sín a ntá sákjuí sín chjasin Listra la ko chjasin Derbe estado Licaonia la nkuixín ntiha. ⁷ La kjaxín ntaha kjuako sín tí tan jína kuénte Ínchéni.

Chéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kíxín tsíkokjlexín ch'án xitjahya itji ch'án. ⁹ Méxra ó tjetjaxínkoá ch'án ntá kuínhín ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kíxín tí ch'ín antsí tinkáchónki ch'án Ínchéni kíxín tsitqhe ch'án jína. ¹⁰ Ntá jehe ch'án itsen ntáche ch'án tí ch'ín a kíxín:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexín sín nkívee sín Licaonia ntáchro sín kíxín:

—Dios tsík'óna chojni mé tsíkíxín nkajni tjejókoni ntíhi —ichro sín.

¹² La ntá kjuínchek'ín sín ch'ín Bernabé mé tí dios Júpiter a ntá ch'ín Pablo mé tí dios Mercurio kíxín imá nixja ch'án. ¹³ Ntá tí ch'ín nchat'á kuénte tí dios Júpiter mé chóna ch'án

[†] 13:47 Isaías 42.6; 49.6

n̄nko tí t'ixenx̄inni ikon chjasin ntá kjuj̄kao ch'án koxinta tjeteyá tsjo. A ntá jehe ch'án la ko kaín tí chojni la chréhe sín k̄ixin tjinkaon sín chrók̄juikosáyehe sín tí sín tjako la ko tjinkaon sín chrók'óyán sín tí koxinta chrók'uaýéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín t̄iha ntá kjuank̄ixin sín kótséchje sín iké sín la sákjuik̄jakjan sín tí chojni síin ntiha la t'óyako sín ntáchro sín k̄ixin:

¹⁵ —¿Kuénté k̄ixin tjejoch'erá x̄ikaha? Jeheni chojni éxi tí jahará. Tí x̄ra ó kuini k̄ixin tsochrónkani itén Dios k̄ixin ts̄t̄ohérá kaín tí nkehe ninkehó sínk̄iha la ntá chrók̄janrá chrók̄uin kachónkirá Dios t̄jéchón. Jehe ch'án mé kjuich'éna ch'án nkajni la ko chjasintajni la ko tí ntayaon la ko kaín tí nkehe síin. ¹⁶ Ntá ósé mé kuit̄ohe Dios chojni k̄ixin jehó ts'aji sín nt̄je sín. ¹⁷ K̄jonté la Dios tjakox̄in ch'án k̄ixin jehe ch'án t'etoan ch'án k̄ixin kjuich'éna ch'án kaín nkehe. Jehe ch'án mé t'etoan k̄ixin ts'aniá chrin ntá ts'enkani la j̄ina ts'óneheni, la jehe ch'án tjanjon ch'án nkehe k̄ixin jnkochr̄ix̄in ts'ixin nkehe sineni, la ko jehe ch'án mé nchechéheni ch'án —mé x̄ikaha ichro ch'ín Pablo.

¹⁸ K̄jonté x̄ikaha ichro tí sín tjako la nax̄a tjinkaon tí chojni chrokuikosáyehe sín chrók'óyán sín koxinta chrók̄jok̄ehe sín tí sín tjako.

¹⁹ A ntá ikui iso tí sín judío kjuix̄in sín chjasin Antioquía la ko chjasin Iconio. Nixjehe sín tí sín ntiha k̄ixin ts̄t̄ohe sín tí nkehe jehya j̄ina tjako tí sín a ntá kóninkaon sín ntá kjuank̄ixin ch̄jehe sín x̄r̄o tí ch'ín Pablo. La ntá ách'e ó kjuix̄in tsík'en ch'án ntá kuinkánkákjen sín ch'án sákjuiko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uaýa ch'án x̄ikjan ch'án tí chjasin ntiha inaá. Ntá tí yaon chr'éxin ntá sákjuiko ch'án tí ch'ín Bernabé chjasin Derbe.

²¹ A ntá ó kjuix̄in chrónka sín tí tan j̄ina la ko kjuacha sín itsjé chojni kuinkáchónki Ìnchéni ntiha ntá kjan sín chjasin Lистра la ko chjasin Iconio la ko chjasin Antioquía. ²² Nkuix̄in tí chjasin k'uaúsinka sín mé kjuinchechéhe sín tí sín kuinkáchónki Ìnchéni. K'uet̄oan sín k̄ixin nax̄a j̄ina chrók̄uin kachónki sín Ìnchéni la ntáchro sín k̄ixin tí ts'ixenheni tí kjuachaxin kuénte Dios t'ichj̄ánx̄in tsjasóteni. ²³ A ntá ntiha k̄jueyá sín chojni jnkójnko n̄nko k̄ixin ts'et̄uenhen sín tí sín tinkáchónki Jesús k̄ixin j̄ina ts'ejó sín. Ntá nixjehe sín Dios tí nax̄a k̄jónehya sín la ntá ntáche sín Ìnchéni k̄ixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uaúsinka sín estado Pisidia la ntá kjuj̄i sín estado Panfilia. ²⁵ Ntá chjasin Perge kjuako sín tí tan kuénte Ìnchéni la ntá kjuix̄in ntá sákjuí sín chjasin Atalia. ²⁶ Ntá ntiha k'uíx̄enx̄in sín ntabárc̄o ntá sákjuí sín chjasin Antioquía tí chjasin k'uénix̄jehe chojni Dios k'uek̄janchia sín k̄ixin Dios ts̄jnk̄itsa sín a sich'e sín tí x̄ra. La ntá ó kjuix̄in x̄iteyá. ²⁷ Ntá tió kjuj̄i sín chjasin Antioquía ntá kójnkotsé kaín tí sín tinkáchónki Jesús. Ntá kjuank̄ixin chrónka ch'ín Pablo nkexri kjuink̄itsa Dios tí jehe sín la ko nkexri kjuanj̄on Dios kjuachaxin tsjak̄ohe sín tí chojni jehya judío k̄ixin k̄jaxin sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsjé yaon k'uejóko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsík̄ix̄in sín estado Judea ntá kjuj̄i sín chjasin Antioquía. Ntá kjuank̄ixin sín kjuak̄ohe sín tí sín kichó ni k̄ixin xitjahya tsaáxin sín tí chóntahya sín tí x̄roye tsík'et̄oan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuank̄ixin kjuanj̄onkox̄in sín kichó sín. Ntá áxri ntá kónox̄in k̄ixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha ts̄onix̄jehe sín tí sín apóstol la ko tí sín t'et̄oan n̄nko k̄ixin nkexri ts̄onhen tí x̄roye tsík'et̄oan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uaúsinka sín estado Fenicia la ko estado Samaria la tinkáchrónka sín k̄ixin nkexri sín ókjé jehya sín judío kjuitox̄inhin tí k'uek̄jenkayáxin sín ntá kuákja sín nt̄je Dios. Ntá kaín tí sín kichó ni imá kóchéhe sín tí kuínhin sín x̄ikaha.

⁴ La ntá kjuj̄i ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'et̄oan kuénte n̄nko mé kjuanj̄on sín kjuachaxin ts'ejó sín a. Ntá chrónka sín k̄ixin Dios imá kjuink̄itsa tí jehe sín. ⁵ Ntá iso tí sín fariseo ó síkitekao Ìnchéni mé k'uínkatjen sín ntá ntáchro sín k̄ixin:

—T'ichj̄ánx̄in itsa x̄roye tí sín jehya judío tinkáchónki Ìnchéni la ko t'ichj̄ánx̄in ts'ítuenhen sín sinchex̄iteyēhe sín kaín tí ley —ichro sín.

⁶ Na ntá kaín tí sín apóstol la ko tí sín t'et̄oan n̄nko mé kójnkotsé sín kjuenkayáxin sín nkexri ts̄onhen k̄ixin x̄ikaha ichro tí sín judío. ⁷ Ntá imá nixjehe kichó sín ntá k'uínkatjen ch'ín Pedro ntáchro ch'án k̄ixin:

—Jahará kichó ni ó nohará nkexrí káxin senó Dios tsíkjeýá tí jeheni káxin tsjakoheni kaín tí sín jehya judío káxin tsínhin sín tí tán jína kuente Cristo káxin kjaxin jehe sín tsitekaon sín.⁸ Dios mé ó nohe ch'án nkexehe kaín asén chojni. Kjuakoxin ch'án káxin k'uáyéhe ch'án tí sín jehya judío káxin ch'éhe ch'án sín Nchakuen ch'án éxi tí xikaha k'uáyéheni tí jeheni.⁹ Dios la t'ikon kaín chojni jnkokón éxi tí jeheni. Ntá kjuínchetjóá ch'án asén sín káxin ó tinkáchónki sín Ìnchéni.¹⁰ Méxra znekuenté titekáonhará tí nkehe kjuíche Dios la ntá tétuénhénrá chojni sínchexiteyá sín kaín tí nkehe ixrá tsitekaon sín? Ní jeheni la ko ní sín tsík'axrjeníxinni kjuachahya sín kjuínchexiteyá sín tíha.¹¹ Náhí. Ó noheni káxin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo káxin Dios kjuínkítsa sín kjuasin sín itsjé kjuaxroan k'uíkon tí sín jehya sín judío.¹³ Kjuixin nixja ch'ín Pablo la ko ch'ín Bernabé ntá kjuankáxin nixja ch'ín Jacobo, ntáchro ch'án káxin:

—Kíhóni, tinhínrú tí nkehe tsoxrjanka.¹⁴ Ch'ín Simón Pedro chrónka nkexrí kjuakoxin Dios káxin tjuéhe ch'án tí chojni jehya judío la nkexrí kjuéyá Dios iso tí sín káxin tsínkáchónki sín tí jehe ch'án.¹⁵ Mé xikaha chaxín chrónka tí xroon tsíkjin tí sín k'u'échrónka itén Dios káxin:¹⁶ Janhan mé tsokjan chr'éxin.

Tió ts'inka ntá sjt'ána nixin tí nchia tsík'oya kuente David la janhan la tsjínkítsa sín ts'etóan sín.

¹⁷ Káxin kjaxin kaín xín chojni mé tsjeýá sín Ìnchéni la ko kjaxin kaín xín tí sín ókjé nacióon mé tí sín kótjuáxin nina mé tsínkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuente ch'án.* Mé xikaha ichro itén Dios

¹⁹ Méxra ntáxrjan káxin tí sín jehya judío la t'ichjánxinhya sínchexiteyá sín kuenté tí ley káxin ó kuítóhe sín tí nkehe kuínkáchónki sín senó káxin jína chrókjuéyá sín Dios.²⁰ Méxra tsochr'énhenni sín ijnko xroon la jehó ts'etúehenni sín káxin chrókjónehya sín tí nto tsíkókehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuente ko tsíchrinjinhya ikja va la ko chrókjónehya sín ijné va.²¹ A ntá jnkojnko chjasin siín nkexro chrónkaxín tí ley kuente ch'ín Moisés nchekuáxin sín tí nkaxenhen nínko jnkojnko tí yaon t'ók'éhe sín —ichro ch'ín Jacobo.

²² Ntá kaín tí sín tsíkjeýá Ìnchéni la ko tí sín t'etóan kuente nínko la ko kaín tí í so sín tinkáchónki Ìnchéni kjuéyá sín iso chojni tsochr'án sín chjasin Antioquia, mé kjuéyá sín ch'ín Judas, t'íkjetexin sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetóan ntíha.²³ Ntá ichr'án sín tí xroon sákjuíko tí sín a ntáchro káxin:

“Jeheni chojni tsíkjeýá Ìnchéni la ko chojni t'etóan kuente nínko ntíhi la nixjahaaráni tí jahará, kichó ni jehya judío, tjejórá chjasin Antioquia la ko estado Siria la ko estado Cilicia.²⁴ Ó noheni káxin iso chojni tsíkáxin chjaséni kjónté k'u'échóntahya sín kjuachaxin la kjuínchexakonhanrá sín káxin ntáchro sín káxin t'ichjánxin itsará tí xroye tsík'etóan ch'ín Moisés.²⁵ Ntá jnkokoá kjuenkayáxinni tsjeýáni nkexro tjejó ntíhi káxin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo káxin imá tjuéheni sín.²⁶ Tí sín a mé ántósen sín kjónté chrók'uenxín sín káxin tí tinkáchónki sín Ìnchéni Jesucristo.²⁷ Méxra tsochr'ánni ch'ín Judas la ko ch'ín Silas tsjiji sín káxin jehe sín mé tsonixjahaará sín tsochrónkaxín sín kaín tíha.²⁸ Jína káxin Nchakuen Dios mé kjuínkítsani kjuenkayáxinni káxin jehya chrók'uetuághanraní ijnko nkehe imá xra. Náhí. Jehó tí nkehe kánhyó xra t'ichjánxin sínchexiteyará mé t'etóanni:²⁹ chrókjóntehyará tí iko tsíkókehe chojni tí nkehe tsíkjanoya la ko kjaxin chrókjóntehyará ijné tí ko a la ko chrókjóntehyará tí nto kuente tí tsíchrinjinhya kja la ko kjaxin ninkexró chrókuakjahya í jnko chojni chjin ókjé. Ntá tí sínchexiteyará kaín tí nkehe t'etóanni la jína ts'ejorá.” Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquia. Ntá tió kjuíji sín ntíha ntá kójnkotsé tí sín tinkáchónki Jesús ntá kjuanjón sín tí xroon a.³¹ Ntá tió kjuínchekuáxin tí sín kichó ni tí xroon a ntá imá kóchéhe sín káxin xikaha chrónka tí xroon a.³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kichó ni káxin tí nkehe nixja sín.³³ Ntá ntahó k'u'éjó sín iso yaon, ntá tió sátsjin sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkáxin sín tí tjejó tí sín tsích'án sín.³⁴ Kjánchó ch'ín Silas kjuenkayáxin ch'án káxin ntahó chrókuítóhe ch'án.³⁵ A ntá ch'ín Pablo la ko ch'ín Bernabé kuítóhe sín chjasin Antioquia. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankáxin tí yóxin viaje

* 15:18 15.16-18 Amós 9.11-12

³⁶ A ntá chr'éxin ch'in Pablo nixjehe ch'an ch'in Bernabé. Ntáchro ch'an kixin: —Sátsjtsjeheni tí sín kichó ní kain tí chjasin kjuakoxinni itén Ìnchéni ósé. Tsjtsjeheni nkexrí tjejó sín ntiha —ichro ch'an.

³⁷ A ntá ch'in Bernabé la tjinkaon ch'an kixin kjaxin sáchrókjuiko sín ch'in Juan kjaxin tikjtéxin sín ch'an Marcos. ³⁸ A ntá ch'in Pablo kóxrjienhya sátsjiko sín tí ch'in Marcos a kixin jehe ch'an kuitóhe ch'an sín estado Panfilia la kjuínkítsahya ch'an kixin naxa sntonhen tí xra. ³⁹ Méxra jnkokóahya kjuenkayáxin sín la ntá xikayehe sín la ókéjé sákjuí sín. Ch'in Bernabé sákjuiko ch'an tí ch'in Marcos la k'uixenhen sín ijnko ntabárcó sákjuí sín monte Chipre. ⁴⁰ A ntá tí ch'in Pablo la jehó ch'an mé kjueyá ch'an tí ch'in Silas ntá chr'éxin sákjuí sín. Tí sín kichó ní ntiha kjuanchehe sín Dios kixin jína ts'ayakonhen sín ch'an la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni njnko ntiha.

16

Ch'in Timoteo sákjuiko ch'an ch'in Pablo la ko ch'in Silas

¹ Ntá kjuíji ch'in Pablo chjasin Derbe la ko chjasin Listra. Ntá ntaha itjen ijnko ch'in tinkáchónki Jesús it'in ch'an Timoteo. Jehe ch'an mé xjeen ijnko tjan judía tinkáchónki Ìnchéni. A ntá it'é ch'an mé ijnko ch'in griego. ² Ntá tí sín kichó ní tjejó chjasin Listra la ko chjasin Iconio mé nixja sín kixin jína tí ch'in Timoteo. ³ A ntá ch'in Pablo mé tjinkaon ch'an sáchrókjuiko ch'an tí ch'in Timoteo. Ntá senó k'uetóan ch'an chrókua tí ch'in Timoteo a tí xroye kixin tsonínkakahya tí sín judío tí chjasin sátsji sín kixin ó nohe tí sín a kixin it'é ch'in Timoteo la mé griego. ⁴ Ntá sákjuí sín la kain tí chjasin k'uátsínka sín la nixjehe sín tí sín kichó ní la chrónkaxín sín tí nkehe tsík'etóan tí sín apóstol la ko tí sín t'etóan kuente njnko chjasin Jerusalén. ⁵ Ntá tí chojni tinkáchónki Ìnchéni mé antsí má toá k'uejó sín la ko jnkojnko yaon sitinkákótsjé sín.

Xrínhya titáya k'uikuén ch'in Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxín kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxín kixin sátsji sín nó ntiha. ⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínhya titáya k'uikuén ch'in Pablo ijnko ch'in estado Macedonia kjuák'exín toté ch'an chrónòa ch'an kixin: “T'átsínka Macedonia tsjinkítsani,” ichro ch'an. ¹⁰ Méxra tíha tsík'ikon ch'in Pablo la ntá tuénxín kóyaxínhinni kixin sátsjini estado Macedonia kixin kónoexinni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'in Lucas ikjinni tí xroon í k'uéjókotoxinni kichó ní ntiha.]

Ch'in Pablo la ko ch'in Silas, k'uejó sín chjasin Filipos

¹¹ Ntá ntaha chjasin Troas k'uixenxinni ijnko ntabárcó ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchénta tí sín romano ósé ntá ijnko chjasin antsí má tjetóan tí it'ó tí estado Macedonia. Ntaha mé k'uejóni iso yaon. ¹³ Ntá tí yaon t'ok'éhe sín ntá k'uaxrjexinni tí chjasin Filipos ntá sákjuíni ijnko chrínta ntario mé ntiha kuénhen sín tsojnkotsé sín tsonixjehe sín Dios. Mé ntaha k'uejótjaxinni la kjuankixinni kjuakoheni iso chojni chjin tsíkójnkotsé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsíkjixín tjan chjasin Tiatira. Jehe tjan mé nchekji tjan ika náxrxón kjátse tié. Ntá jehe tjan xraxínkaon tjan Dios la jína tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'in Pablo. ¹⁵ Ntá jehe tjan la ko kain tí sín tjejó ntqé tjan mé kuíkite sín. Ntá chrónóhehe tjan tí ch'in Pablo ntáchro tjan kixin:

—Tí chaxín tjátsóan kixin chaxín tinkáchónkini Ìnchéni la jína chrókuitóha ntóeni ntihi —ichro tjan.

Ntá kjónté kuitóheni ntiha.

¹⁶ Ntá ijnko yaon sákjuíni tí nó kuénhen sín nixjeexín sín Dios ntá ó xétani ijnko tjan tjarisoá chónnta nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kixin xíkaha tónohe tjan. ¹⁷ A ntá tí tjan tjarisoá a kjuankixin tjan tinkáchréhe tjan tí ch'in Pablo la ko tí jeheni ntá t'èya tjan ntáchro tjan kixin:

—Tí sín í ch'ehe sín xra Dios nkaya nkajni la tjako sín ijnko ntja jína tsaáxin chojni.

¹⁸ Mé xíkaha kjuích'e tjan itsjé yaon. Ntá kóchjinhin ch'in Pablo la nkátjía ch'an nixjehe ch'an tí nchakuen tí jínahya chónnta tí jehe tjan, ntáchro ch'an kixin:

—Kjuachaxién ihnjé Jesucristo tétuánhán kixin ts'axrxéxian tí jehe tjan —ichro ch'an.

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uikon sín nkehe kónhen tjan la ó nohe sín kixin í tsjachahya sín chichaon kuente tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuiko sín tí tjejó tí síxreé ntasin tjeoan. ²⁰ Ntá kjuikaán sín ntaha tí tjejó tí sín juez la ntáchro sín kixin:

—Tí sín í mé sín judío la imá sítjeti sín chjasénni. ²¹ Tjako sín tí nkehe kuènyani tsonoheni la tòxrijènyani sich'eni kixin jeheni mé chojni romanoni.

²² Kaín tí sín ntaha kónínkakonhen sín tí jehe sín. Ntá tí sín juez mé k'uetjoan ts'axrjehe sín iké sín ntá ts'ekonxín sín nta sé. ²³ Ntá tíó kjuixín k'uékón sín nchónhya ntá chr'áxènhen tí sín a ntogechiso ntá k'uetuènhen sín tí ch'ín t'ayakonhen ntogechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntogechiso mé k'uáyèhe ch'án kjuachaxín ntá chr'áxènhen ch'án tí sín a ijnko cuarto chríka ntogechiso kixin ts'axrjehya sín. Ntá chr'áxènhen ch'án toté sín tí nta tjejóxra la ko ch'ína ye.

²⁵ A ntá tíó k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuente Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín. ²⁶ Ntá xrínhya tjian kuínki nonte la kjuínchekínki kuente tí xrankíxixín ntogechiso ntá tuénxín kaín tí ntója puerta mé xítjehe la ko k'uánótjen tí ch'ína cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntogechiso mé k'uàya ch'án. Ntá k'uikon ch'án kixin síxítjehe tí ntója puerta ntogechiso a. Ntá kuakítsje ch'án ch'ína espada ntá chrók'óyán ch'án asén ch'án kixin kjuenkayáxín ch'án kixin ó kjuixín tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ni náxa tjejóni ntihyó —ichro ch'án.

²⁹ Ntá tí ch'ín t'ayakonhen ntogechiso kjuanchia kixin ts'ákjen xrohi ntá k'uixènhen ch'án kuínká ch'án la síxrànká ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakítsjexín ch'án sín ntaha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátèhe sín ntáchro sín kixin:

—Títekávan Ìnchéni Jesucristo la tsaá jaha la ko tí sín tjejó ntog.

³² Ntá kjuakoghé sín tí jehe ch'án a la ko kaín tí sín tjejó ntog ch'án tí tan kuente Ìnchéni. ³³ Na kjónté sítíe la tí hora a sákjuiko ch'án sín kjuínchek'íjmá ch'án tí tsíchrí'ò sín. Ntá tuénxín jehe ch'án la ko kaín xín sín tjejó ntog ch'án mé kuíkite sín. ³⁴ Na ntá chr'èxín tí jehe ch'án sákjuiko sín ntog ch'án. Ntá ntaha kjuánjon ch'án nkehe sine sín. Imá chéhe ch'án la ko kaín tí sín ntog ch'án kixin ó kuítekaon sín Dios.

³⁵ Ntá kóyagon nchítjen ntá tí sín juez k'uetuènhen sín tí sín policía sátsjitsjehe sín tí ch'ín t'ayakonhen ntogechiso kixin chrókjuánjon ch'án kjuachaxín ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntogechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etjoan sín kixin tsjánjuan kjuachaxín kixin sátsjirá. Méxra sátjirá kjuaxróxín —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jìe chótani. Náhi. Kjónté la chr'áxènheni sín ntogechiso. A ntá ijie la z'á imó chrókkuakítsjeni sín ní? Náhi. Tsjijia tí jehe sín tsakítsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónoghé sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntaha ntá chrónòda tí sín a sátxixin sín tí chjasín ntaha. ⁴⁰ Ntá ch'ín Pablo la ko ch'ín Silas tíó k'uaxrjexín sín tí ntogechiso ntá kjuíji sín ntogé tí tjan Lidia. Ntá tíó kjuixín sákjuítsjehe sín tí sín kíchó ní la kjuínchéchéhe sín ntá sákjuíxín sín ntaha.

17

Kónínkaon tí chojni chjasín Tesalónica

¹ Ntá ch'ín Pablo la ko ch'ín Silas la k'uátsínka sín chjasín Anfípolis la ko chjasín Apolonia ntá kjuíji sín chjasín Tesalónica. Ntaha itjen ijnko njnko judío. ² A ntá ch'ín Pablo sákjuí ch'án njnko éxi kuènhen ch'án la jnkojnko yaon t'ók'éhe sín chjina ini semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án kixin tí nkexro Cristo mé t'ichjánxín its'én la ko chr'èxín tsoxèchón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsínhínrá jahará mé Cristo tíha.

⁴ A ntá iso tí sín judío kuítekaon sín ntá k'uító sín tí ch'ín Pablo la ko tí ch'ín Silas. Ntá kjaxín kuítekaon itsjé tí sín griego xraxínkaon Dios a la ko kjaxín nchónhya chojni chjín tjeoan kuítekaon. ⁵ A ntá iso tí sín judío tínkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uixité sín la kjuínchexakonhen

sín tí sín siín chjasén sín. Ntá itsjé sín k'uixenhen sín ntøe ijnko ch'in it'in Jasón kjueyá sín ch'in Pablo la ko ch'in Silas kixin tjinkaon sín sáchrókjuikohe sín tí sín a tí sín t'etøan. ⁶ A ntá k'uitjahya sín tí sín a ntá kjónté itsé sín tí ch'in Jasón la ko í so tí sín tinkáchónki Ìnchéni ntá kuinkánkákjen sín sákjuiko sín tí siín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín í mé kjuínchexakonhen chojni kuénté chjasintajni. La ntá ó kjui sín chjasénni ntíhi kjaxin. ⁷ La ntá tí ch'in Jasón a mé kjuanjøn ch'an kjuachaxin kixin tí sín a mé ts'ejó sín ntøe ch'an. Kaín sín titekakonhya sín tí ley kuènte tí ch'in romano t'etøan. Ntáchro sín kixin itjen í jnko nkexro antsi má t'etøan, ntá tíha mé Jesús —ichro sín.

⁸ Ntá tíó kuínhi kaín tí sín tsikójnkotsé la ko tí síxreé ntá k'uixité sín kónínkaon sín. ⁹ Ntá ch'in Jasón la ko tí sín tjejóko ch'an kjuenka sín ntá tí síxreé kuitøhe sákjuí sín.

Ch'in Pablo la ko ch'in Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'an sín ch'in Pablo la ko ch'in Silas kixin sátsji sín chjasin Berea. Ntá tíó kjuíji sín ntaha k'uixenhen sín tí njnkoé tí sín judío. ¹¹ A ntá tí sín judío ntíha la antsi má jína asén sín, ntá tí sín chjasin Tesalónica la náhi. Antsi má kóxrjínhi sín tsinhin sín tí itén Dios la jnkojnko yaøn kjuínchekuáxin sín tí xroon chóna itén Dios kixin tsonøhe sín á chaxin ntoá xikaha tí ntáchro tí sín a. ¹² Méxra nchónhya tí jehe sín kuitekaon sín la ko kjaxin nchónhya tí chojni chjin griego tjetøan mé kuitekaon la ko kjaxin tí chojni ntoa. ¹³ A ntá tí sín judío chjasin Tesalónica kónøhe sín kixin ch'in Pablo mé kjuakoxin itén Dios chjasin Berea inaá. Ntá sákjuí sín ntíha a ntá kjuínchekónínkaon tí sín a. ¹⁴ A ntá tí sín kichó ni tinkáchónki Ìnchéni ichr'an sín tí ch'in Pablo sátsji nó chrínta ntayaøn. A ntá ch'in Silas la ko ch'in Timoteo naça kuitøhe sín tí chjasin Berea. ¹⁵ Ntá íso tí sín ntíha sákjuiko sín tí ch'in Pablo la kjuíji sín tí chjasin Atenas. Ntá kjan sín chjasén sín kixin k'uøtøan ch'in Pablo kixin tsochrónka sín kixin tjoka chrókoxakonhen tí ch'in Silas la ko tí ch'in Timoteo tsjiji sín ntíha tsoxéta sín ch'an.

Ch'in Pablo itjen chjasin Atenas

¹⁶ Ntá nachrohe kjuák'echónhen ch'in Pablo kixin itsji tí ch'in Silas la ko tí ch'in Timoteo chjasin Atenas ntá imá k'uáv asén ch'an kixin k'uíkon ch'an kixin tí chjasin ntíha siín nchónhya tí nkehe tsikjanøya. ¹⁷ Ntá tí njnko ntíha kjuakohe ch'an íso sín judío la ko íso tí chojni xraxínkaon Dios. La kaín yaøn ntasin kjuák'e ch'an kjuakoxin ch'an tí chojni siín ntíha. ¹⁸ La íso tí sín kjuínchekuáxin tí xroon kuènte tí chojni it'in epicúreo la ko íso tí sín kjuínchekuáxin tí xroon kuènte tí chojni it'in estoico kjuankixin nixjehe sín tí ch'in Pablo. Íso sín ntáchro sín kixin:

—¿Nkekuènté kixin ánta tjenixja tí nkexro a?

La íso sín ntáchro sín kixin:

—Méxra tjenixja ch'an kuènte í jnko dios.

Mé xikaha ichro sín kixin kjuako ch'in Pablo tí tán jína kuènte Jesús la ko kjuako ch'an kixin Jesús kjónté k'uén ntá xechón. ¹⁹ Ntá sákjuiko sín ch'in Pablo ijnko tjo it'in Areópago. Ntíha mé kuènnen sín tójnkotsé sín kixin tjenkayáxixín sín. Ntá nixjehe sín tí ch'in Pablo, ntáchro sín kixin:

—Tjinkaonni tsochrónka tí nkehe njxin kjuíkoa. ²⁰ Itsjé tí nkehe ókjé tjetjàkua la tjinkaonni tsonøheni nkehe t'axrxéxin kaín tíha —ichro sín.

²¹ Ntá kaín tí sín chjasin Atenas la ko tí sín tsikjixin ókjé tjejó ntíha mé tóxrjénhya sín í jnko xra, jehí tóxrjínhi sín chrókuinhin sín la ko chrónixja sín ijnko nkehe njxin.

²² Ntá ch'in Pablo k'uínkatjen ch'an kjuák'exin toté ch'an tí siín tí jehe sín chrítaón tí Tjo Areópago. Ntá ntáchro ch'an kixin:

—Jahará tjejórá chjasin Atenas tinhínrá. Janhan ó k'uíkuañ kixin jahará la itsjé dios tinkachónkirá. ²³ Ntá tí kjuak'é ntíha k'uájia la k'uíkuañ itsjé tí nketí tjásixínrá culto ntá k'uitja íjnko altar ts'ínixín kixin: "Ntíhi xraxínkakoxínni ijnko Dios naça chónhyani". Méxra tí Dios xraxínkáonrá kjónté naça chonhyará mé tí Dios a mé tjákoahará.

²⁴ Tí Dios mé kjuich'éna ch'an chjasintajni la ko kaín nkehe siín chjasintajni. Jehe ch'an mé inché nkajni la ko chjasintajni. La tjexenhya ch'an ijnko njnko tsikjich'énaxin chojni tja.

²⁵ La t'ichjánxjenhya ch'an kixin chojni chrókjuinktsa tí jehe ch'an kixin jehe ch'an mé chjéhe kjuachón kaín chojni la ko tjanjon ch'an xríntø la ko kaín nkehe siín.

²⁶ Kaín tí naciøn k'uaxrjenixin jnkokoá chojni kixin chrók'uejó sín nkuixín chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxin tsjeyáni Dios kixin ntá tsienxínni nkexrí ts'itjani ch'an. Jehya imá ikjin itjen ch'an, chjino tí tjejóni itjen ch'an. ²⁸ Jehe ch'an tjejóchónxinni ch'an la ko nchekinkini ch'an la jehe ch'an t'ayakonhenni ch'an. Mé xikaha tsintáchro jnko ch'in chjasánrá ósé kixin: "Jeheni mé naça kjéhya Dios." ²⁹ Jeheni mé naça kjéhyani Dios méxra xitjahya tsjenkayáxinni kixin sich'énani Dios chica oro ø chica plata ø xro kixin éxí tsikjenkayáxin chojni kixin sich'éna sín dios kuènte sín. ³⁰ Senó

Dios kónínkakhonya ch'án káxin ó nohe ch'án káxin *naxa* chónhya sín ch'án. Ntá ijie t'etuenhen Dios kaín xín chojni síin chjasintajni tsokjan sín la tsínkáchónki sín tí jehe ch'án. ³¹ Dios tsíkjeýá ijnko yaon sinchekitoxén ijie chojni chjasintajni. Tsíkjeýá ch'án ijnko chojni la kjuakoxín kaín kjuachaxin káxin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín káxin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín káxin:

—Chr'éxin tsinhinni inaá tí nkehe ntáchrua —ichro sín.

³³ Ntá ch'ín Pablo kuítóhe ch'án tí jehe sín. ³⁴ Na ntá iso sín kjuichréhe sín ch'ín Pablo la kjuankáxin tínkáchónki sín Ìnchéni. Ijnko tí sín tínkáchónki a mé it'in ch'án Dionisio mé ijnko tí síxreé kjuínchekitoxén ijie chojni chrítaón tí Tjo Areópago la ko ijnko tjan tínkáchónki tjan mé it'in tjan Dámaris la ko í so sín kjaxin kjuankáxin sín tínkáchónki sín Ìnchéni.

18

Sákuí ch'ín Pablo chjasin Corinto

¹ Ntá kjuixin tíha ntá ch'ín Pablo sákuíxin ch'án chjasin Atenas la sákuí ch'án chjasin Corinto. ² Ntiha mé xéta ch'án ijnko ch'ín judío it'in Aquila. Jehe ch'án mé tsíkjixín ch'án estado Ponto la séhya jehe ch'án la ko ichjién ch'án Priscila mé kjuixín sín nació Italia káxin t'ichjánxin ts'axrjexín sín ntiha káxin tí ch'ín t'etóan mé it'in Claudio k'uetóan ch'án káxin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. ³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntaó kuítóko kichó sín káxin jnkokoá sich'e sín tí xra a. ⁴ Ntá jnkojnko tí yaon t'ok'éhe sín sákuí ch'ín Pablo tí núnko nixjehe ch'án tí sín judío la ko tí sín jehya judío káxin tjinkaon ch'án káxin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios káxin tsonohe tí sín judío káxin Jesús mé tí nkexro Cristo. ⁶ Ntá tí sín judío mé kjuankáxin kónínkakhonen sín tí ch'ín Pablo la imá k'uántaxínhin sín ch'án. Ntá jehe ch'án k'ótsjénka ch'án iké ch'án káxin kjuakoxín ch'án káxin xíkaha tsjasóte sín. Ntá ntáchro ch'án káxin:

—A ntá ijie la jahará kjuéýará tí jje ts'itjáyanxínra. A ntá janhan la í chontahya jje káxin ó kjuáko hará tí tán jína, a ntá kuítékákonhyará. A ntá ijie la ichá jína sátsjia tsjákoqá tí sín jehya judío —ichro ch'án.

⁷ Ntá k'uaxrjexín ch'án núnko ntá sákuí ch'án ntóe ijnko chojni mé it'in Justo mé jehe ch'án xraxinkaon ch'án Dios. Ntóe ch'án mé chjinaxón núnko. ⁸ Ntá ch'ín Crispo, ijnko nkexro t'etóan kuénte núnko, la ko kaín tí sín tjejó ntóe ch'án, mé kjuankáxin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankáxin sín kuítekaon sín Ìnchéni la kuikte sín. ⁹ Ntá ijnko tie titáya k'uíkuén ch'ín Pablo Ìnchéni nixjehe ch'án ntáchro káxin:

—Chrakonhya tjákua itan kuéntana. Tjtoéhya tsochronka ¹⁰ káxin janhan tjejóko kichó ni káxin ninkexró kohya nkehe sit'aha. Káxin janhan la chonta itsjé chojni tí chjasin ntihi tínkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'q ntiha chjasin Corinto, kjuakoqhe ch'án sín itén Dios.

¹² A ntá tí yaon k'uetóan ch'ín Galión estado Acaya, ntá itsjé tí sín judío kónínkakhonen sín tí ch'ín Pablo. Ntá itsé sín ch'án sákuíko sín ch'án tí tjejó tí sín t'etóan. ¹³ A ntá ntáche sín tí ch'ín t'etóan káxin:

—A ntá tí nkexro í xiri ch'án tjachroe ch'án chojni káxin ókjé nkexrí chrókuínkáchónki sín Dios la ko tsitekakhonya sín tí nkehe t'etóan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío káxin:

—Tí chaxín ijnko jje jíe kjuasin tí ch'ín í ntá kjónté chrókuínhan tí nkehe ntáchrórá jahará judiorá. ¹⁵ A ntá jehí tjanjónxinra tí nkehe nixjará la ko ihnjé chojni la ko tí ley tínkáchónkirá. Méxra jahórá chrókuínchekitoxénra tíha káxin janhan tjínkakhonya ts'óna juez sjntakitoxian kuénte tí nkehe a —ichro ch'án.

¹⁶ Ntá k'uetóan ch'án káxin sátsjixín sín ntiha. ¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'etóan kuénte tí núnko judío, la ntaó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquia ntá sákuí ch'án nixin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uixenhen ch'án ntabárcó sákuí ch'án nó estado Siria a sákuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá *naxa* k'uixenhya ch'án ntabárcó inaá la ikjín ch'án móloé káxin xíkaha kjuakoxín ch'án káxin kjuínchexiteýá ch'án tí nkehe chrónka

ch'án. ¹⁹ Ntá tió kjuúji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsikójnoksé ntiha. ²⁰ Ntá jehe sín chrónòda sín kixin chrókuitohe ch'án isé ntiha, kjánchó jehe ch'án la chrohya ch'án. ²¹ Ntá tuénxín nixjehé ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahá tí jahará tí naxá tjínkaon Dios —ichro ch'án.

Ntá kuítóhe ch'án sín ntá k'uixenhen ch'án ntabárcó sákjuíxin ch'án chjasin Éfeso. ²² Ntá tió kjuúji ch'án chjasin Cesarea ntá sákjuí ch'án chjasin Jerusalén na ntá sákjuínixjehé ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquía. ²³ Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkjiixin ch'án chjasin Alejandria. Jehe ch'án mé ijnko nkexro antsí nohe chrónka kixin chóxin ch'án xroon itén Dios. ²⁵ Jehe ch'án ó xrakohe ch'án ntje Ìnchéni ntá imá tóxrjínhin ch'án nixja ch'án la ko tsjako jina kuénte ch'ín Jesús. Kjánchó jehó nohe ch'án nkexrí kuíkíte chojni ch'ín Juan. ²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxá noehya ch'án kuénte ntje Dios. ²⁷ Ntá tjínkaon ch'ín Apolos sátsji ch'án estado Acaya. Ntá tí sín kíchó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tejó ntiha kixin jina tsjanjon sín kjuachaxin tsjak'e ch'án. Ntá tió kjuúji ch'án estado Acaya ntá kjuínkítsa ch'án kjuakohe ch'án tí sín tsíkinkítsa Dios tsíkitekaon sín ch'án. ²⁸ Ntá kjuakohe sín ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxá itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jna la ntá kjuúji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án.

Ntá kjuátéhe sín kixin:

—Náhi, kíenhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxiэн kuikitiará? —ichro ch'án.

Ntá kjuátéhe sín kixin:

—Éxi kjuako ch'ín Juan kuikiteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuíkíte ch'án chojni kixin chrókan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tiha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkíte sín kjuachaxiэн ihnjé Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uayéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án nínko la kjuako ch'án kaín asén ch'án. Nixjehé ch'án chojni la chrónka ch'án nkexrí tjen tí kjuachaxin kuénte Dios. ⁹ A ntá iso sín la kjónté la imá icha asén sín tjínkakonhya sín tsinkáchónki Ìnchéni. Ntá imá l'ántaxínhin sín tí tan jina kuénte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakohe sín ch'án kaín yaon. ¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjé ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakohe sín kjuaxroan jié kixin tí nixja ch'ín Pablo. ¹² Ntá itsjé chojni kjuíkaon sín pañitgé sín la ko iké sín kuákóxin ch'ín Pablo ntá sákjuíko sín kjuínchekekakóxin sín tí sín níhi ntá kuítóhe sín jina la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjínkaon sín tí kjuachaxiэн ihnjé Jesús. La ntá ntáche sín tí nchakuen tí jínahya kixin:

—Kjuachaxiën ihñjé tí Jesús tjako tí ch'in Pablo t'etqanxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'in judío it'in Esceva mé ijnko nchat'a t'etqan.
¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáχρο kixin:

—Chóxinni nkexro ch'in Jesús la ko ó noheni nkexro ch'in Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'in chóna tí nchakuen tí jínahya kjaminkitaón ch'an tí jehe sín a la ntá imá tsehe ch'an kjuacha ch'an kjuíncheníhi ch'an kaín sín la imá kjoté sín. Ntá k'uaxrxjén sín ntqe sín tjóchin sín la ko síchrít'o cuérpé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihñjé Inchéni Jesús, ichro sín.

¹⁸ Kjaxin itsjé tí sín tinkáchónki Inchéni mé kjuíchrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exin sín xra ntá kjuaka sín tí libro a la k'uikon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Inchéni sitinkák'ánkí la tjakoxin kixin chaxin chóna kjuachaxin.

²¹ Ntá kjuixin tíha ntá ch'in Pablo mé kjuenkayáxin ch'an chrókjuitsjehe ch'an tí sín nó Macedonia la ko Acaya ntá ntaha sáchrókjuixin ch'an chjasin Jerusalén. Ntá kjaxin ntáχρο ch'an kixin tsjixin sátsji ch'an chjasin Jerusalén ntá kjaxin t'ichjánxin sátsji ch'an chjasin Roma. ²² Ntá ichr'an ch'an iyó tí sín tjinkítsa ch'an sátsji sín estado Macedonia, mé ch'in Timoteo la ko ch'in Erasto, ntá nachrohe jehe ch'an naxa kuítqhe ch'an estado Asia iso yaon.

Kóninkaon k'uixité chojni chjasin Éfeso

²³ Ntá itsjé chojni chjasin Éfeso kóninkaon sín la k'uixité sín kixin kóxrjénhya sín tí itén Inchéni. ²⁴ Kixin ntiha mé itjen ijnko ch'in it'in ch'an Demetrio. Kjuíchéna ch'an nkehe chica plata tsjehe éxi njnko kuénte tí dios Diana la nchónhya chichoan kjuacha ch'an la ko tí sín kjuíche'eko ch'an xra. ²⁵ Ntá kójnkotséko sín í so sín jnkokón tí xra ch'e sín. Ntá ntáχρο ch'an kixin:

—Jahará nohará kixin tí xra ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhínrá tí nkehe xritjako ch'in Pablo. Tjako ch'an kixin tí nkehe tsikjanoya mé jehya Dios. Kjánchó jehya chjasin Éfeso ó. Náhi, nkuixín estado Asia kuítekaon chojni. ²⁷ Imá tóxakonhenni kixin tí xra ch'eni ts'itjáyán la kjaxin tóxakonhenni tsontáχρο sín kixin chónkó tí njnqoe tí dios Diana imá jié la ko ts'itjáyán tí kjuachaxin kuénte tjan. Ntá í tsitekakonhya sín tí kjuachaxin kuénte tjan nkuixín estado Asia la ko kuénte chjasintajni —ichro ch'in Demetrio.

²⁸ Ntá tí kuínhin sín xikaha la imá kóninkaon sín ntá k'uèya sín ntáχρο sín kixin:

—Ts'itjáyánhya tí dios Diana kuénte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'in Gayo la ko tí ch'in Aristarco mé iyó sín tsikjixin sín Macedonia. Ntá kuínkánkákjen sín kuikao sín tí nchia jié tójnkotséxin sín xráxin. ³⁰ Ntá ch'in Pablo tjinkaon ch'an chrók'uixenhen ch'an tí nchia kixin tsonixjehe ch'an sín, a ntá tí sín tinkáchónki Inchéni mé chrohya sín kixin ts'ixenhen ch'an tí nchia a. ³¹ Kjaxin iso tí síxreé kuénte tí estado Asia mé chóxin sín ch'in Pablo, ntá k'uetqan sín kixin tsochéna chojni tí ch'in Pablo kixin chrókjuiatéhya ch'an tí sín sín ntiha. ³² A ntá iso tí sín tsikójnkotsé ntáχρο sín ijnko nkehe, la í so sín ntáχρο sín ókjé nkehe kixin nínkaon sín. La itsjé sín la í noehya sín nkehe xra tsikójnkotséxin sín kixin nínkaon sín. ³³ La iso sín judío chénka sín ijnko ch'in it'in Alejandro nkeri xra kjuixin sín kixin tsonixja ch'an. Ntá kjuák'e ch'an jnkosin ntá kjuakoxin ch'an itja ch'an kixin tsotáni sín ntá tsonixjajxin ch'an tí sín judío tsinhin kaín chojni. ³⁴ Ntá tió kjuátsoan tí sín tsikójnkotsé kixin kjaxin tí ch'in a mé judío ch'an ntá kaín sín k'oyako sín chjina iyó hora ntáχρο sín kixin:

—Ts'itjáyánhya tí dios Diana kuénte tí sín chjasin Éfeso —ichro sín.

³⁵ Ntá tí ch'in secretario kuénte tí chjasin ntiha mé k'uetqan ch'an tsotáni sín. Ntá ntáχρο ch'an kixin:

—Chojni chjasén Éfeso tinhínrá. Kuénte chjasintajni nohe sín kixin tí sín chjasin ntihi mé t'ayakonhen sín tí njnko kuénte tí dios Diana. Tí retrato kuénte tjan mé tsikjixin nkaya nkajni. ³⁶ Kohya nkexro tsontáχρο kixin chaxínhya tíha. Méxra tánírá. Tjenkayáxinrá jína nkehe chrókjuich'erá. ³⁷ Jahará kjuíkoará tí sín a ntihi la kjánchó k'uántaxiéhya sín tí njnqoeni la ko k'uántaxiéhya sín tí tjan santo kuénténi. ³⁸ Méxra ch'in Demetrio la ko tí sín ch'eko ch'an xra la tí tjanchia sín jie jnkójn nkexro la siin juez sinchekitqexin. Méxra tsochrónka sín tí tjen tí ch'in juez kixin jnkójnko sín la chrókuitqexin tí jie chóna

sín. ³⁹ Ntá tí síin ijnko nkehe tsjanchará ntá t'ichjánxin tsojnkotsérá la ntoá chrókuitogéxin. ⁴⁰ Tóxakonhenni kixin kjá tí sín t'etogán ts'ekani sín jie kixin jehya jina k'uixiténi kónfkaonni. Noehyani nkehe tsjateheni kixin tí tsjanchankí sín nkeuènte k'uixiténi, tsixro sín.

⁴¹ La ntá k'uetogán ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixin k'uixité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jina, ntá nixjehé kichó sín ntá sákíjki ch'án nó estado Macedonia. ² Ntá nkúixin k'uatínka ch'án la kjuínchehé ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia. ³ Ntiha kuítóhe ch'án iní nitjótá ntá chrók'uíxenhén ch'án ijnko ntabárcó ntá sáchrókjui ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuiko ch'ín Pablo mé tí ch'ín Sópater mé jehe ch'án tsíkjin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjin sín chjasin Tesalónica, la ko ch'ín Gayo tsíkjin ch'án chjasin Derbe, la ko kjaxin sákjuiko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjin sín estado Asia. ⁵ Ntá tí sín kichó ni a mé kuitónxin sín ntja ntá tjejóchónhen sín tí jeheni chjasin Troas. ⁶ Kjuixin k'uatínka tí kia tíó kjóne sín niotja chóntahya tí xroán t'ánkixin niotja, ntá k'uíxenhenni ijnko ntabárcó k'uaxrjexinni Filipos ntá k'uatínka in'ó yáon ntá kjuíjini chjasin Troas ntá ntiha xétani tí sín kuitónxin sín ntja. A ntá ntiha kuítóheni yato yáon.

Ch'ín Pablo sákjuí chjasin Troas

⁷ Ntá tí yáon xrankíxixin semana ntá kójnkotséni kixin tsochrít'ó niotja tsoxraxinkakonxinni Ìnchéni. Ntá ch'ín Pablo nixjehé ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yáon chr'éxin, ntá antsí má sé tí nkehe chrónka ch'án la naxá tjenixja ch'án k'áxrórtjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaon ventana. Ntá tí ch'ín Pablo imá sé nixja ch'án ntá tí ch'ín ntasoá mé tsikihi ch'án kotáchrin. A ntá xrináhya tsik'ajua ch'án ntá tsik'anótjénxin ch'án tí ventana tí nixin piso ntiha ntá sákjuíkatsen sín ch'án la ó tsíkjin tsik'en ch'án. ¹⁰ Ntá ch'ín Pablo k'uínkajin ch'án ntá kjuítsinkaták'a ch'án chrítaon tí ch'ín tsik'anótjen a la kjóa ch'án. Ntá ntáche ch'án tí sín kichó ni kixin:

—Chrakonhyará tsik'enhya ch'án, tjechón ch'án —ichro ch'án.

¹¹ Ntá ch'ín Pablo k'uit'ótjen ch'án inaá tí k'uínkajinxin ch'án kixin ntiha ts'óxikeyehé ch'án niotja sine sín tsoxraxinkakonxin sín Ìnchéni. Ntá naxá tjenixja ch'án hasta k'uínkaséyan a ntá sákjuí ch'án. ¹² Ntá tí ch'ín ntasoá tsik'anótjen sákjuiko sín la tjechón ch'án kohya nkehe xehe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuíji ch'án chjasin Mileto

¹³ Jeheni mé kuitónxinni ntja saoxin la k'uíxenhenni ijnko ntabárcó sákjuini nó chjasin Asón kixin ntiha tsoxetani ch'ín Pablo éxi tsintáchro ch'án kixin tjinkaon ch'án sátsjixin ch'án toté ch'án ntiha. ¹⁴ Ntá ó xetani tí jehe ch'án chjasin Asón ntá k'uíxenhén ch'án tí ntabárcó kjaxin ch'án ntá sákjuikoni ch'án nó chjasin Mitilene. ¹⁵ Ntá tí sákjuixinni ntiha ntá tí yáon chr'éxin ntá k'uatínkani estado Quío ntá tí yáon chr'éxin kjuíjini chjasin Samos. Ntá inaá k'uíxenhenni tí ntabárcó ntá sákjuini chjasin Trogilio ntá ntiha k'ók'éheni. Ntá xik'ixenhenni ntabárcó inaá ntá tí yáon chr'éxin kjuíjini chjasin Mileto. ¹⁶ Mé xikaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuiji ch'án chjasin Jerusalén kixin ntiha chrókjuak'e ch'án tí yáon Pentecostés, ichro ch'án.

Nixjehé ch'ín Pablo tí sín t'etughen nínko chjasin Éfeso

¹⁷ Tí itjen ch'ín Pablo tí chjasin Mileto k'uíyehé ch'án tí sín t'etughen tí nínko chjasin Éfeso. ¹⁸ Ntá tíó kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuákua desde tí yáon xrankíxixin k'uínka estado Asia. ¹⁹ Ó nohará kixin kaín tí yáon k'uejóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. ²⁰ Janhan la kuítóghya kjuákua kaín tí nkehe jina t'ichjánxin tsonohará. Mé xikaha kjuákua tíó kójnkotsérá la ko xikaha kjuíkjuakuxian jnkojnko ntogará. ²¹ Kjuákgha kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. ²² Ntá ijie sátsjiyá chjasin Jerusalén kixin

Nchaqúen Dios k'uetuanna la í nonahya nkehe tsonna ntiha. ²³ Ntá jehó nõna kixin kaín chjasin ts'atsínka la chrónka Nchaqúen Dios kixin tsjak'echjinana la ko tsjasótena. ²⁴ Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàna kixin tí xra chonta la chrókjuintaxín la chrókjuintaxiteyá tí xra chjina Inchéni Jesús kixin tsjúka tí tan jina nkexrí tjuéhe Dios chojni.

²⁵ Ntá jie ó nõna kixin tí jahará kjuákoahará kjuachaxin kuènte Dios la nijnkora ts'ikonhyará tí janhan inaá. ²⁶ Méxra tinhíná ijie kixin í jehya jigena kixin jnkójíná chrók'uitjáyáná. ²⁷ Kixin ó kjuákua kaín tí nkehe tjinkaon Dios kixin tsonohará la í t'itjáyánha ninkehó. ²⁸ Méxra xráxinkáonrá ts'ejorá jnkójina la ts'ayakonhéná kaín tí sín tinkáchónki Inchéni kixin Nchaqúen Dios mé tjáhará tí xra pastor kixin ts'ayakonhéná tí sín kuènté tí ninkeqe ch'án k'uenaxín ch'án tí ijnié ch'án. ²⁹ Ó nõna tió sátsjia ntá itjsi í so chojni éxi kolóbo jiehe tsotjinkaon sinchek'itjáyán tí sín tinkáchónki Inchéni. ³⁰ La ntá kjónté jahará la isorá tjeorá ntihi tsjankixíná tsjákorá kjuach'ia chrínki chrókjuákoherá kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxra chrórxáxinkáonrá kixin chjina iní nánó kjuak'é kjuákoahará nchaqotjin la ko tie la kuitoahya kjujintaxáxinkávan hasta kjuínchenihi asenná nixjahará jnkójnko tí jahará.

³² A nta jie la jahará kichó ni tjetjáncháha Dios kixin t'ayakuanxíná ch'án tí itén ch'án kixin tjuahará ch'án. Jehé ch'án imá chóna kjuachaxin tsjinkitsará ntá ts'ayéherá kaín tí nkehe tjinkaon ch'án tsochéhe ch'án kaín tí chojni tsikótjóá. ³³ Janhan mé kjuakéhya asenná ch'ucháqon chojni ó iké jnkójín chojni. ³⁴ Náhi. Jahará ó nohará jina kixin janhan na mé tjaná kjuít'axián xra kjuácha k'uenaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian. ³⁵ Méxra kjuákuaxíná xikaha s'ich'erá xra kixin jina tsjinkitsará tí chojni chónahya. Xráxinkáonrá kixin tsintáchro Inchéni Jesús kixin: "Antsí tsóchehëni kixin tí nkehe chrókjuanjónni, a ntá kánhyó tsóchehëni kixin tí nkehe chrók'uáyéhëni."

³⁶ Ntá kjuixín ntáchro ch'in Pablo xikaha ntá jehé ch'an la ko kaín sín k'uejóxín toch'in sín ntá nixjehé sín Dios. ³⁷ Ntá kaín sín tsjánka sín la ko kjóá sín ch'án la ko tséhe sín tja ch'an. ³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuikotoxín sín ch'án nó tí tjeen tí ntabárcó sátsjiko ch'án.

21

Sákjuí tí ch'in Pablo nó chjasin Jerusalén

¹ A ntá tió kuitóhëni tí sín kichó ni ntá k'uíxenhëni ntabárcó la ntá tuénxín sákjuíni estado Cos. Ntá tí yáon chr'éxín sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabárcó sátsji nó estado Fenicia. Ntá k'uíxenhëni tí ntabárcó a ntá sákjuíni. ³ Ntá tió k'uátsínkani la k'uíkonní tí nonte Chipre itjani ikjon kuitóhe ntá k'uátsínkani estado Siria. Ntá tí ntabárcó la ts'atsínka tsitóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Inchéni a ntá ntiha kuitóhekoni sín yato yáon. A ntá jehé sín mé kjuínchenohe sín Nchaqúen Dios chénka sín tí ch'in Pablo kixin sáchrókjuíhya ch'án chjasin Jerusalén. ⁵ Ntá kjuixín k'uátsínka tí yato yáon a ntá sákjuixinni ntiha. La kaín tí sín tinkáchónki Inchéni la ko ichjién sín la ko xjeen sín sákjuikotoxínni tí k'uaxrjantani ikon chjasin ntá sákjuíni chrínta ntayaon. K'uejóxinni toch'inni nixjehëni Dios ⁶ ntá tuénxín nixjehëni sín jnkójina ntá tséhe tja kichó ni. Ntá k'uíxenhëni tí ntabárcó, a ntá jehé sín ikjan sín ntqë sín.

⁷ Ntahó chjasin Tiro kjuixín tí k'uíxenhëni tí ntabárcó ntá kjujini chjasin Tolemaida. Ntiha kjuínixjehëni tí sín kichó ni tinkáchónki Inchéni. Ntá ntiha k'uejókoni sín ijnko yáon.

⁸ Ntá tí yáon chr'éxín sákjuixinni ntiha ntá kjujini chjasin Cesarea. Ntá ntiha sákjuíni ntqë ch'in Felipe, ijnko ch'in kjaxin tjako itén Inchéni. Jehé ch'án mé ijnko tí sín yatqoxin tjinkitsa tí sín kjueyá Inchéni. A ntá jeheni mé kuitóhëni ntiha. ⁹ Tí ch'in Felipe a mé chóna ch'án noó xjeen ch'án chjin náxa tóteehya sín. Tí xjeen ch'án a mé chrónkaxin sín tí itén Dios. ¹⁰ Ntá ntaha k'uejókoni sín itsjé yáon ntá ikjuí ijnko ch'in nixja itén Dios it'in Agabo, tsíkixjin ch'án estado Judea. ¹¹ Ikjuí ch'án kjuinixjehé ch'án tí jeheni la ntá kuákja ch'án tí tjóq t'ínkat'óxin ch'in Pablo na ntá kjuínchentoxín toté ch'án la ko itja ch'án ntá ntáchro ch'án kixin:

—Tí Nchaqúen Dios mé ntáchro kixin mé xikaha chjasin Jerusalén tí sín judío sinchenteto sín inché tí tjóq sinchek'áyéhe sín ch'án tí sín jehya judío —ichro ch'án.

¹² Ntá kjuixín kuínhinni tíha ntá jeheni la ko tí sín chjasin Cesarea chrónóhëni tí ch'in Pablo kixin sáchrókjuíhya ch'án tí chjasin Jerusalén. ¹³ Ntá kjuátehe ch'in Pablo kixin:

—¿Nkekuénté tsjankará la ko nkekuénté nchek'ávárani? Janhan na chrakonhya kjónté jehya tí sinchentetona sín ó. Náhi. Kjónté kjaxin chrók'uénxian chjasin Jerusalén tí tinkáchónkia Inchéni —ichro ch'án.

¹⁴ Ntá kjuachahyani nixjeheni ch'án ntá kuitoheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tiha ntá kóyaxínhinni ntá sákjuúni nó chjasin Jerusalén. ¹⁶ Ntá sákjuúkoni iso tí sín tinkáchónki Ìnchéni tsíkijxin chjasin Cesarea. Sákjuúkoni sín ntøe ijnko ch'ín tsíkijxin Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketi kuitoheni.

Ch'ín Pablo sákjuútsjehe tí ch'ín Jacobo

¹⁷ Tió kjujini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín. ¹⁸ Ntá tí yaon chr'éxin ch'ín Pablo sákjuúkoni ch'án kjuútsjeheni ch'ín Jacobo la ntaha tjejó kaín tí sín t'etoan kuènte njnko. ¹⁹ Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xra kjuich'e Dios tió kjuakohe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kichóni, jaha k'uúkaon kixin sín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítøehyani tí ley. ²¹ Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetøan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékinkáchónkini ósé. ²² Ntá nkehe chrókuich'eni? Kixin tió tsinhin sín kixin kjuihá la tsojnkotsé nchónhya sín. ²³ Méxra íchá jina jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios. ²⁴ Jaha sáchrókjuúko sín la chróktjóá jaha la ko jehe sín. La ko kjaxin chrókuénka tsokjín sín ntá tsonoxén tí sín judío kixin chaxínhya tí nkehe tsíkinhin sín la ko tsonoxén sín kixin kjaxian jaha nchexiteyéhe tí ley. ²⁵ A ntá tí sín jehya judío tsíkitekaoon Ìnchéni la ikjinni ijnko xroon ó chr'énhenni sín. K'uetuènhenni sín kixin sinehya sín tí nto tsíkjokehe chojni tí nkehe tsíkjanøya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí njnko

²⁶ Ntá ch'ín Pablo sákjuúko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uúxenhén ch'án tí njnko kixin tsochrónka ch'án kixin ó kjuixin kjuínchexiteyá ch'án tí nkehe k'uútenhen ch'án. Tíhi mé t'axrjexín kixin jnkojnko sín tsíkjo sín nkehe tsjanjon sín.

²⁷ Ó chjina chróxétja tí yato yaon ntá iso tí sín judío tsíkijxin estado Asia mé tsík'ikon sín ch'ín Pablo nkaxenhen tí njnko. Ntá kjuínchekónkaon sín kaín chojni chjasin ntíha ntá itsé sín tí ch'ín Pablo. ²⁸ Ntá k'uèya sín ntáchro sín kixin:

—Kaínra chojni chjasin Israel tsjínkisaráni kixin tsotséni tí ch'ín i. Jehe ch'án mé ixri nkúxín xritjakohe ch'án chojni nkehe jehya jina kuènte chjaséni, la ko titekakonhya ch'án tí ley kuènte Moisés, la ko titekakonhya ch'án njnkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí njnko tjóá —ichro sín.

²⁹ Mé xíkaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkijxin chjasin Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen njnko.

³⁰ Ntá kuénté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkaxenjin sín ch'án nkaxenhen njnko la kuakitsje sín ch'án ntója ntá tuénxín k'uúkjehé sín tí puerta njnko. ³¹ Ntá tjinkaon sín chrók'óyán sín ch'án ntá ijnko ch'ín comandante k'uetuènhén itsjé tí sín soldado romano kuínhin ch'án kixin kuénté tí chjasin Jerusalén k'uúxité nínkaon sín. ³² Ntá tí ch'ín comandante sákjuúko ch'án iso sín soldado la ko tí sín k'uetuènhén tí soldado a la kuinká sín sákjuú sín tí sín tí chojni. Ntá tió k'uúkon tí sín a kixin ó kjuíji tí ch'ín comandante la ko tí sín soldado a ntá kuitøhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetøan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuich'e ch'án. ³⁴ A ntá tí chojni tsíkójkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xíkaha kjuich'e sín kixin k'uúxité sín. Ntá k'uetøan ch'án kixin tí sín soldado sátsjiko sín tí ch'ín Pablo tí cuartel sín tí sín soldado. ³⁵ La ntá tió kjuújiko sín ch'án tí t'it'ótjénxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókuate sín ch'án kixin nínkaon sín. ³⁶ Kaín tí chojni chréhe nóton t'éya sín ntáchro sín kixin:

—Chrók'uén ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáχρο ch'án kíxín:

—¿Á jína tsonixjahani jaha intsi? —ichro ch'án.

Ntá kjuátehe tí ch'ín comandante ntáχρο ch'án kíxín:

—¿Jaha la á noha nixja griego? ³⁸ Méxra ¿á jehya jaha tí chojni tsíkixín Egipto kjuínchenínkaon chojni la ko sákjuiko nteje tí noó mil chojni tsíkjàya? —ichro ch'án.

³⁹ Ntá kjuátehe ch'ín Pablo ntáχρο ch'án kíxín:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkixín ijnko chjasin imá tjetooan. A ntá ijie xrjannógha kíxín tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuároxín ch'án kíxín tsotáni sín. Ntá táni sín ntá kjuankíxín nixjaxín ch'án nkíva hebreo. Ntáχρο ch'án kíxín:

22

¹ —Jahará kíchó ni la ko chojni it'é xjan tinhínrá nkehe tí tsóxrjanka kíxín chontahya jie —ichro ch'án.

² Ntá kuínhin sín kíxín nixjaxín ch'án nkíva hebreo ntá ántsi má táni sín. Ntá ntáχρο ch'ín Pablo inaá kíxín:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankíxian ntihi chjasin Jerusalén la kjuúntakuáxian tí nkehe kjuako tí ch'ín Gamaliel la títeqavan tí ley tsíkinákáchónki tí sín tsík'axrjeníxinni ósé. Tjínkavan chrókjuít'aha Dios xra kaín asenná éxi tjínkáonrá jahará jí'erá tí yaon ijie. ⁴ Tí senó k'uénínkakonhan chrók'oyán tí sín tinkáchónki Ínchéni kjuúntanteto chojni ntoa la ko chojni chjin kíxín chrók'uejóchjina sín. ⁵ A ntá tí sín nchat'á t'etooan la ko kaín tí sín táda t'ayakonhen njnko la mé nohe sín kaín tíha kíxín jehe sín mé kjuanjon sín xroon ts'áyéhe tí sín kíchó ni judío tjejó chjasin Damasco. Ntá sákjuia nó ntiha kíxín chrókjuíkjàyá tí sín tinkáchónki Ínchéni kíxín chrótsé sín ntá chrókjuíkian sín ntihi Jerusalén chrokjuasóte sín.

*Ch'ín Pablo chrónka nkexrí kjuankíxín tinkáchónki ch'án Ínchéni
(Hch. 9.1—9; 26.12—18)*

⁶ A ntá tió kjuasán chjina chjasin Damasco chjina chonkíxín ntá xrinahya k'uinkáséyan jnkontajtén tí tjén ijnko xrohi imá t'inkaséyan kuixín nkajni. ⁷ Ntá kjuachr'itsinka nonte ntá tuénxín kuínhan itén ijnko nkexro nixjana ntáχρο kíxín: “Saulo, Saulo, ¿nkekuènté ninkákonna xritjéyá tí janhan?” ⁸ Ntá kjuánchánkiá kíxín: “¿Xá nkexro jaha?” Ntá kjuátehe ch'án ntáχρο ch'án kíxín: “Janhan mé tí nkexro Jesús tsíkixín chjasin Nazaret, mé tí nkexro xritjéyá.” ⁹ La ntá tí sín k'uájikian mé k'uikon sín tí xrohi la chrakon sín kjánchó kuiénhya sín itén tí nkexro nixjana. ¹⁰ Ntá kjuánchánkiá kíxín: “¿Xá nkehe tsonhen tjínkavan sít'aha jaha?” Ntá kjuátehe ch'án ntáχρο kíxín: “T'aya sátjia t'ixenhén chjasin Damasco ntá ntiha tsochrónka sín kaín nkehe sjch'e.” ¹¹ Ntá tí xrohi a mé k'uixenka ikuán ntá í xitjahya t'íkuán. Ntá tí sín chríkjan mé kuinkátséna sín sákjuíkjan sín chjasin Damasco.

¹² Ntá ntaha kjuák'e ijnko ch'ín it'in Ananías ijnko chojni jína kjuínchexiteyéhé ch'án tí ley kuènte ch'ín Moisés. Kaín tí sín judío sín chjasin Damasco tjikosáyehé sín tí jehe ch'án. ¹³ Ntá ch'ín Ananías mé kuitsjehe ch'án tí janhan ntá tió kui ch'án ntáχρο ch'án kíxín: “Kíchóni Saulo, ijie la ts'áyéhé kjuachaxin ts'íkuan inaá.” Ntá ó jína t'íkuán. ¹⁴ Ntá tuénxín ntáχρο ch'án inaá kíxín: “Tí Dios kuinkáchónki tí sín tsík'axrjeníxinni la ó tsíkjeýá ch'án tí jaha kíxín tsonoha nkehe tjínkaon ch'án la ko kíxín ts'íkuan tí nkexro jína la ko tsinhín tan k'uaxrjéxín ir'va ch'án. ¹⁵ Jaha mé tsochrónka tí nkehe k'uíkuan la ko tí nkehe kuínhin tsinhin kaín tí chojni chjasintajni. ¹⁶ A ntá jie la í choénhya má. T'aya la tsikitiaxián ihnié Ínchéni kíxín mé ts'imáxin ijia,” ichro ch'ín Ananias.

Pablo chrónka kíxín Dios ichr'án ch'án tsjakohé tí sín jehya sín judío

¹⁷ Na ntá tió xíkjan chjasin Jerusalén ntá sákjuia njnko tsonixjahá Dios ntá titàya k'uikuén ¹⁸ Ínchéni ntáχρο ch'án kíxín: “Tjoka ts'axrjéxian chjasin Jerusalén kíxín tsitekakuenhya sín tí nkehe tjákua mé tí tan kuéntana.” ¹⁹ Ntá janhan ntátjan ch'án kíxín: “Ínchéni, jehe sín ó nohe sín kíxín senó k'uék'atsínka kaín tí njnko la k'uétse tí sín tinkáchónki tí jaha la sákjuíkjan sín ntóechiso k'uékon sín. ²⁰ Tíó k'óyan sín tí ch'ín Esteban tí nkexro k'uékjit'aha xra, k'uénixja tí tan kuénta ntá janhan kjaxin tjéntaxián ntiha la janhan ntáxrjan kíxín ó nchoxon its'en ch'án la k'uáyakonhan tí iké tí sín kjuàya.” ²¹ Ntá Ínchéni xínixja inaá, ntáχρο ch'án kíxín: “Tétuqanhan jaha kíxín sátjia chjasin kjín kíxín tsjakohé tí chojni jehya judío.”

Ntá tí ch'ín comandante k'uáyéhé tí ch'ín Pablo kíxín tsjasóte ch'án

²² Ntá tí sín tsikójnkotsé mé kuínhin sín kaín tíha ntá kjuankíxin k'uèya sín ntáchro sín kíxin:
—Its'en ch'án, í tsjak'echónhya ch'án —ichro sín.

²³ Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.
²⁴ Ntá tí ch'ín comandante mé k'uëtuénhen ch'án tí sín soldado a kíxin sátsjiko sín ch'ín Pablo nkaxenhen tí cuartel kuènte sín. Ntá ntiha k'uëtoan ch'án kíxin tsjatexín sín ch'án chikoté ntá tsonoxín tí ch'ín comandante nkekuènte imá t'óyako sín nínkakonhen sín tí jehe ch'án.
²⁵ Ntá kjuixin kjuínchenteto sín ch'án kíxin tsjate sín ch'án ntá nixjehé ch'ín Pablo ijnko ch'ín capitán itjen ntiha ntáchro ch'án kíxin:

—¿Á chontará kjuachaxin tsjaterá ijnko chojni romano, kíxin naxa kjuéyáhyará nkerí jie chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kíxin:

—¿Nkehe sjich'e jaha kíxin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kíxin:

—¿Á jaha chaxín chojni romano? —ichro ch'án.

Ntá kjuátéhe ch'ín Pablo kíxin chaxín jehe ch'án.

²⁸ Ntá ntáchro tí ch'ín comandante kíxin:

—¿Á ntá nkexrí kíxin janhan nchónhya chichaon kjuènká kíxin ts'ónana chojni romano?

Á ntá ntáchro ch'ín Pablo kíxin:

—Janhan na chojni ntiha tsíkokjínaxián.

²⁹ Na ntá tí sín soldado chrókjuate ch'ín Pablo mé kuínhin sín kíxin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kíxin tí ch'ín Pablo a mé ijnko chojni romano ch'án chaxín. Ntá chrakon ch'án kíxin tsíkjinchenteto ch'án.

Ch'ín Pablo nixjehé ch'án tí sín t'etóan kuènte tí sín judío

³⁰ Á ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanka ch'án chica cadena tsíchróntetoxín tja tí ch'ín Pablo ntá k'uëtoan ch'án kíxin tsojnkotsé kaín tí nchat'á t'etóan la ko tí sín t'etóan kuènte sín judío, a ntá kuakitsje ch'án tí ch'ín Pablo la kjuak'e ch'án jnkqsiné tí síin tí jehe sín.

23

¹ Ntá ch'ín Pablo komá tí sín t'etóan kuènte sín judío ntá ntáchro ch'án kíxin:

—Kíchóni, tí k'uékjak'é hasta ijie la Dios tjetsjehe kíxin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín nchat'á t'etóan mé k'uëtuénhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátéhe ch'ín Pablo kíxin:

—Dios mé sinchekjasóte tí jaha kíxin ntoáhya kjuich'e. Tjetjaxian méhe kíxin tsjéyá nkehe tí jie chonta éxi nixja tí ley. Á ntá ¿nkekuènte kuítekákonhya tí ley, la kuétoan kíxin ts'ékonna? —ichro ch'án.

⁴ Á ntá tí sín síin ntiha ntáchro sín kíxin:

—¿Á xikaha ts'antaxínhín tí nchat'á t'etóan kuènte Dios?

⁵ Ntá kjuátéhe ch'ín Pablo ntáchro ch'án kíxin:

—Kíchóni, kjuatsqanhya janhan kíxin jehe ch'án mé tí nchat'á t'etóan. Ntáchro tí xroon itén Dios kíxin: “Chrók'uantaxienhya tí chojni t'etóanhen chjasán” —ichro ch'án.

⁶ Ntá ch'ín Pablo mé kónohe ch'án kíxin iso chojni síin ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kíxin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kíxin janhan mé tinkachónkia kíxin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankíxin sín ikjo kichó sín ntá xikaha jnkokónhya kjuenkayáxin tí sín tsikójnkotsé ntiha. ⁸ Kíxin tí sín saduceo a mé ntáchro sín kíxin tsoxechónhya chojni tsík'en la ko kjaxin kohya sín ángel la ko kohya nchakuen. Á ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kíxin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehé ch'án —ichro tí sín fariseo.

* 23:5 Éxodo 22:28

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchequen sín tí ch'ín Pablo ntá k'uetuenhen ch'án tí sín soldado a kixin sátsjikakjín sín ch'án la tsjkaó sín ch'án inaá tí cuartel kuènte tí sín soldado.

¹¹ A ntá tí tie a na ntá xrinahya titàya k'uikuèn ch'ín Pablo Inchéni nixja ch'án, ntáchro kixin: —Chrakonhya Pablo kixin éxi chrónka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenxin sín ihnjé Dios chaxín tsoxiteyá la sinehya sín la ko ts'ihya sín ninkehó tí naḡa ts'óyánhya sín ch'án. ¹³ Chjina cuarenta sín kjuenkayáxin sín kixin xikaha sich'e sín. ¹⁴ Ntá sákjuichenka sín tí sín ncha'tá t'etqan la ko tí sín t'etuenhen kuènte tí sín judío la ntáche sín kixin:

—K'uákjenxinni ihnjé Dios kixin chaxín tsoxiteyá kixin í sinehyani ninkehó tí naḡa ts'óyánhyani tí ch'ín Pablo. ¹⁵ Méxra ntá jahará la ko í so tí sín t'etuenhen tí sín judío tsonátcherá tí ch'ín comandante a kixin tsjikaó sín tí ch'ín Pablo ntihi tí tjeorá ntóye nchítjen kixin antsí má tsjanckankihirá ch'án nkehe siná á chaxín tí jie t'iká ch'án. A ntá jeheni senó ts'ejóchónhenni tí tsjixín ch'án ntá ts'óyanni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsikinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kixin tsochronka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uiyehé ch'án ijnko tí sín capitán la ntáchro ch'án kixin:

—Sátsjiko a tí ch'ín ntasoá tí tjen tí ch'ín comandante kixin tjinkaon ch'án tsochronka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án tí tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uiyeheni ch'án kixin tsjikaoni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochronka? —ichro ch'án.

²⁰ Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanckaha sín kixin ntóye nchítjen sátsjiko ch'ín Pablo tí tsojnkotsé tí sín judío t'etqan. Sit'ayaha sín tsonátchro sín kixin tjinkaon sín tsjanckankíhi sín ch'ín Pablo tí nkehe antsí má xra. ²¹ A ntá jaha la chrókuítekákonhya kixin chjina cuarenta chojni tjejóchónhen sín imó la k'uákjenxin sín ihnjé Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonhe sín nkehe tsixrua jaha —ichro ch'án.

²² A ntá tí ch'ín comandante a mé nixjehé ch'án tí tí ch'ín ntasoá la k'uetqan ch'án kixin:

—Tsochenkahya ninkexró kixin xikaha kjuichronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uiyehé ch'án yaá tí sín capitán a ntá k'uetqan ch'án kixin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uituenhen sín sinckemá sín kokate tsjiták'á ch'ín Pablo la ts'ayakonhen sín ch'án jina kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ikjin ch'án ijnko xroon a, ntáchro kixin:

²⁶ “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jina, nixjaha. ²⁷ Tí sín judío a mé itsé sín tí ch'ín i kixin chrók'óyán sín ch'án. Ntá tíó kónona kixin ijnko chojni romano tí jehé ch'án la ntá sákjuikian sín soldado kjujntakaá ch'án. ²⁸ Tjinkávan tsonona nkekuènte kixin ninkakonhen sín ch'án. Ntá sákjuikian ch'án tí tsikójnkotsé tí sín judío. ²⁹ Ntá kónoxín kixin ninkakuenxin sín ch'án kixin tí ley kuènte sín kjuinchexiteyáhya ch'án, ichro sín. Jehya jie jie tsikjasin ch'án kixin chrók'óyán sín ch'án o chrókjuak'echjina sín ch'án. ³⁰ Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuancháha tí sín a kixin chrókjuiji sín tí tjen jaha chrókjuá sín kixin nkekuènte ninkakonhen sín ch'án. Kjuasáya. Ó tjen.”

³¹ Ntá tí sín soldado a mé kjuinchexiteyá sín éxi k'uituenhen sín a ntá sákjuíko sín tí ch'ín Pablo tí tie a chjasin Antipatris. ³² Ntá tí yaon chr'éxin tí sín soldado xrixín toté ó a mé xikjan sín tí cuartel kuènte sín. Ntá tí sín k'uejókjen kokate a mé naḡa sákjuíko sín tí ch'ín Pablo. ³³ Ntá tíó kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuincké'áyehé sín ch'án tí ch'ín Pablo. ³⁴ Ntá kjuixin kjuinckeuáxin tí ch'ín gobernador a tí xroon ntá kjuanchankí ch'án nketí chjasén

ch'ín Pablo. La ntá kónohe ch'án kixin estado Cilicia tsíkixín tí ch'ín a. ³⁵ Ntá ntáchro ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uetuhenen ch'án tí sín soldado a kixin ts'áyakonhen sín tí ch'ín Pablo tí nchia kuènte ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí ncha'tá imá t'etoan, kjuíji ch'án chjasin Cesarea. Kjaxin kuikao ch'án iso tí sín t'etoan kuènte nínko a la ko ijnko ch'ín abogado it'ín Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuènte ch'ín Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjeóni la kjuasáyá kixin imá noha kjuíncheyóxian tí nacióon kuènteni. ³ Kjuasáyá jaha Félix. Imá jína jaha kixin k'uáyéheni kaín tíha. ⁴ Tjínkakonhya sjntak'itjáyahan nchónhya tiempo la xrjanógha kixin chrókjuak'é chrókuinhín intsikoa tí nkehe tsóxrjanka. ⁵ A ntá ijie ó k'uitjani kixin tí ch'ín i mé éxi ijnko chin t'óxika kuènté chjasintajni kixin ch'iyehé ch'án tí sín judío ntá xika sín. Jehe ch'án mé t'etoan ch'án tí sín tinkáchónki tí ch'ín tsíkixín chjasin Nazaret. ⁶ Jehe ch'án mé kjaxin chrókjuinckejita ch'án tí nínko. A ntá itséni ch'án ntá chrókjuinckitoxéxinni tí ijie ch'án éxi t'etoan tí ley kuènteni. ⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'uetóan ch'án kixin sín tjanchia jie chrókuitsjehe sín tí jaha kixin jaha chrókjuanchankíhi ch'án kixin chrókónoha jína nkexéhe tí jie chrókjuinckjasótéxin sín ch'án —ichro tí ch'ín Tértulo.

⁹ Ntá ntáchro kaín tí sín judío síin ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuènte tí nacióon ntihi la nchónhya nánó tétóan. ¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsóxráxinkakonxínni Dios. ¹² Kónoxinhya kixin nijnko nkexro chrókjuachaxínni, la ko kjuínchexakuenhyani ninkexró nínko la ko ní tí nínko la ko ninketó chjasin. ¹³ Tí sín i la xitjahya tsontáchro sín kixin xikaha tí jie kjuasinni. ¹⁴ Janhan chaxín xrjanka kixin t'ahá xrá tí Dios k'uéinkáchónki tí sín tsik'axrjenixinni mé yóhe tí ntja nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios. ¹⁵ Kjaxin tinkáchónkia tí Dios tinkáchónki tí jehe sín kixin tjéchnhan kixin Dios sinchexechón kaín chojni jina la ko kaín chojni jínahya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

¹⁷ Ntá kjuixin k'uatésínka iso nánó ixrini ókjé ntá kjuíjini chjasénni kixin tsjanjonni chichao la ko kjaxin tsochjéheni Dios nkehe. ¹⁸ Méxra mé xikaha tjenni nkaxenhen nínko nta iso sín judío tsíkixín estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni. ¹⁹ A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín. ²⁰ A ntá tí náhi la tí sín tjejó ntihi chróchrónka sín kixin nkehe tí jie k'uitjaxin sín tió kjuak'eni tí tjejó tí sín t'etoan kuènte tí sín judío. ²¹ Kjá tí tsontáchro sín kixin náxrxónhya ijnko nkehe itsen k'uèya ntáxrjan kixin: “Ijie sinchekitoxéxínrá jiena kixin sinchekjasótenará kixin janhan tinkáchónkia kixin tsóxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntja nixin. Ntá kjuínchekitoxéxinhya ch'án ijie ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jie tjanchiará ntá tsonóna —ichro ch'án.

²³ Ntá k'uetuhenen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsi la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjén ch'án, mé ijnko tjan judía. Ntá k'uetóan ch'án kixin tsjik'iyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuhenen chojni asén sín kixin ch'ehya sín tí jínahya la ko nkexrí Dios sinchekitoxéxín ijie chojni tí tsjixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sájtia. Ntá ts'iyaha tió chonta tiempo —ichro ch'án.

²⁶ A nta ch'in Félix tjechónhen ch'an kixin kjá ch'in Pablo tsjanjon ch'an chichaon ntá tsjanjon ch'an kjuachaxin sátsji ch'an. Ntá jnkoyaxón k'uúyehé ch'an tí ch'in Pablo kixin tsonixjehe ch'an. ²⁷ Ntá xikahó kónhen hasta k'uatásínka iyó nánó ntá tí ch'in Félix kuitóhe ch'an tí xra gobernador la ntá í jnko ch'in it'in Porcio Festo mé k'uixenhen ch'an tí xra a ínaa. A ntá ch'in Félix mé kuitóhe ch'an tí ch'in Pablo tjechjina ch'an kixin tjinkaon ch'an chrókuinchexiteyá ch'an tí nkehe tjinkaon tí sín judío.

25

Ch'in Pablo nkayakon tí ch'in Festo

¹ Ntá tí ch'in Festo kjuíji ch'an ntiha kixin ts'ixenhen ch'an tí xra gobernador. Ntá íni yaon chr'éxin ntá sákuixin ch'an chjasin Cesarea la kjuíji ch'an chjasin Jerusalén. ² Ntiha tí sín ncha'tá t'etóan la ko tí sín judío imá tjetóan mé kjuanchia sín kixin tsjasóte ch'in Pablo. ³ Kjuanchia sín kixin xra ó chrók'uetóan ch'an kixin chrók'ui ch'in Pablo ntiha chjasin Jerusalén. Kixin jehe sín ó tsikjenkayáxin sín kixin tsochr'an sín iso chojni tsochónhen tí ntiha ts'óyan sín tí ch'in Pablo. ⁴ Kjánchó ch'in Festo kjuátehe ch'an ntáchro ch'an kixin ó tsikjenkayáxin ch'an kixin í séhya tsjak'e ch'an ntiha. Méxra tí ch'in Pablo la tjechjina ch'an chjasin Cesarea la xitjahya ts'etóan ch'an kixin tsjixrakoa. ⁵ Ntá ntáchro ch'an kixin:

—Tí chojni tjetóan kuéntará sáchrók'juikian ntiha chjasin Cesarea. A ntá tí chaxin tsikjasin ch'an jie ntá ntiha la jína tsjanhia sín jie —ichro tí ch'in Festo.

⁶ Ntá ch'in Festo kjuák'e ch'an chjasin Jerusalén chjina ijní o ite yaon ntá ikjan ch'an chjasin Cesarea ínaa. Ntá tí yaon chr'éxin a kjuák'etjaxin ch'an tí tjet'etóanxín ch'an ntá k'uetóan ch'an kixin tsjikakjín sín tí ch'in Pablo. ⁷ Ntá tíó k'uixenhen ch'in Pablo ntiha ntá tí sín judío kuixin Jerusalén kóchijineh sín ch'an ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'an jie. ⁸ A ntá tí ch'in Pablo a chrónka ch'an kixin kjuasinhya ch'an jie. Ntáchro ch'an kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuente tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'in gobernador romano.

⁹ A ntá ch'in Festo tjinkaon ch'an kixin tsonínkakuenhya ch'an tí sín judío ntá kjuanchankíhi ch'an tí ch'in Pablo ntáchro ch'an kixin:

—¿Á tjinkávan sátsjia chjasin Jerusalén kixin ntaha janhan chrók'juinktakitóaxián nkehe tí jie chonta jaha? —ichro ch'an.

¹⁰ Ntá kjuátehe ch'in Pablo kixin:

—Náhi, jeheni ó ntihi tjenni tí t'etóanxín tí sín gobierno romano la jína chrók'juinchekitóexián ijéni kixin jaha la ó noha kixin ninkehó ijie kjuich'ehyani tí sín judío.

¹¹ Kja tí chaxin kjuásian ichrén jie jie chrók'ueñxian la chrakonhyana kjónté chrók'ueñ. A ntá tí chaxínhya xikaha t'ekana sín jie la ninkexró chóntahya kjuachaxin chrók'uetóan sáchrók'juikoni tí jehe sín. A ntá tjánchiá kixin jehe tí ch'in imá t'etóan mé sinchekitóexín tí jie —ichro ch'an.

¹² Ntá ch'in Festo mé kjuanchankíhi ch'an iso tí sín tjinkítsa ch'an ntá ntáchro ch'an kixin:

—Jaha mé tjanchia kixin tí ch'in imá t'etóan sinchekitóexín ch'an ijíá. Méxra tétuanhan sátsjia tí tjen tí ch'in a —ichro ch'an.

Ch'in Pablo nkayakon tí ch'in rey Agripa

¹³ Ntá k'uatásínka iso yaon ntá tí ch'in rey Agripa la ko tjan Berenice kjuíji sín chjasin Cesarea kixin tsonixjehe sín tí ch'in Festo. ¹⁴ Ntá ntiha mé kuitóhe sín itsjé yaon ntá ch'in Festo a mé chénka ch'an tí ch'in rey nkehe kuente tí ch'in Pablo. Ntáchro ch'an kixin:

—Ntihi itjen ijnko ch'in tjechjina tsikítóhe ch'in Félix. ¹⁵ A ntá tíó kjuak'é chjasin Jerusalén ntá tí sín ncha'tá t'etóan la ko tí sín t'etuenhen tí sín judío a mé kjuíjitsjehe sín tí janhan ntá kjuanchia sín jie kuente ch'in Pablo. Kjuanchia sín kixin chrók'óyánni tí jehe ch'an. ¹⁶ Ntá janhan kjuátahá kixin: Jeheni chojni t'etóan kuente sín romano mé kuénhyani ts'etóanni its'en ninkexró tí naxa tsochjinahya tí ch'in kjuasin jie kixin tsontáchro ch'an á chaxin tí jie tjanchia sín ó náhi. ¹⁷ Ntá tí sín judío kui ntihi ntá chuánhya má. Kjónté tí yaon chr'éxin kjuak'etjaxian tí ntakitóexián ijie chojni la kuétoan kixin síxrakoa tí ch'in Pablo. ¹⁸ A ntá tí sín kóchjina kohya ninkehó ichro sín kuente tí jehe ch'an éxi kjuenkayáxin janhan chróntáchro sín. ¹⁹ Jehó nínkakuenxín sín ch'an kixin tí nkehe tinkáchónki ch'an la ko nínkakuenxín sín ch'an kixin tí nkexro it'in Jesús mé ik'ueñ ch'an ntá jie ntáchro ch'in Pablo kixin tjechón ch'an ínaa. ²⁰ Janhan la nonahya nkexri tsitóexín tí ijie ch'an ntá kjuánchánkíhā tí ch'in Pablo á tjinkaon ch'an sátsji ch'an chjasin Jerusalén kixin ntaha tsitóexin tí jie ch'an. ²¹ A ntá jehe ch'an tsikjanchia ch'an kixin tí ch'in imá t'etóan mé chrók'juinchekitóexín ch'an ijie ch'an. Ntá kuétoan janhan kixin naxa ntihyó tsjak'echjina ch'an tsononajia janhan nkesá tsétuanhan ch'an sátsji ch'an ntiha —ichro ch'an.

²² A ntá ch'ín Agripa ntáche ch'an tí ch'ín Festo kixin:

—Kjaxian janhan tjinkavan tsinhan tí nkehe tsochrónka tí ch'ín a.

Ntá kjuátêhe ch'ín Festo ntáchro ch'án kixin:

—Ntôye tsinhín nkehe tsochrónka ch'án.

²³ Ntá tí yaon chr'éxín tí ch'ín Agripa la ko tí tjan Berenice kjuíji sín la k'uúixenhen sín la ko tí sín soldado t'etqan tsíkijkaó sín, la ko k'uúixenko sín iso chojni tjetqan kuente chjasin ntiha. Ntá k'uetqan ch'ín Festo kixin tsjixrakoa tí ch'ín Pablo. ²⁴ Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójkotsérá ntihi. Tsjehérá tí ch'ín Pablo itjen ntihi. Kaín tí sín judío k'uueka sín ch'án jie tí chjasin Jerusalén la ko kjaxin chjasin Cesarea ntihi la kuitqehya sín, tjanchana sín kixin chrók'uen ch'án. ²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'ín imá t'etqan chrókjuinchekitoxín ijie ch'án. Ntá kjuenkayáxian kixin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'áyêhe tí ch'ín t'etqan. Ntá jie kuétoan kjuukajín sín ch'án tsjukqo sín ch'án tí tjejóni ntihi kixin tjetqan kixin jaha ch'ín Agripa la ko kaín rá tjejórá ntihi tsjanchankihírá ch'án kixin mé tsonóna janhan nkehe tsokjian. ²⁷ Méxra náxrxónhya chróchr'an ijnko tí chojni tjechjina náxá nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntáchro ch'án xikihí:

² —Chàna kixin tsonixja nkayakuan tí jaha rey Agripa tsóxrjanka kaín tí jie t'ekana tí sín judío. ³ Ó noheni kixin jaha la ó noha jina kuente tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kichó sín. Méxra xrxjannóaha kixin tjak'etinhín jina.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí náxa k'uéntasoána. ⁵ Kjaxin jehe sín la ó nohe sín la kjá jina chróchrónka sín kixin tí náxá k'uéntasoána la k'uéfariseona. A ntá tí sín fariseo a mé antsí má kjuínchexiteyêhe sín tí ley kuente tí nkehe tinkáchónkini. ⁶ Ntá ijie sñchekitoexián jiëna kixin nínkaon tí sín judío a kixin tjechonhan kixin Dios mé sinchexechón chojni inaá xikaha tsíchénka ch'án tí sín tsik'axrjenixinni. ⁷ Tí teyó tribu tsik'axrjenixin ch'ín Israel mé tjejóchónhen sín kixin ts'íkon sín tsoxiteyá tí nkehe tsíchronka Dios. Méxra xraxinkao sín Dios nchakotjin la ko tie. Méxra mé xikaha tjechonhan, jaha rey Agripa, la mé xikaha nínkakonna tí sín judío ijie. ⁸ ¿Á títékakonhyará jahará kixin Dios sinchexechón chojni tsik'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkijxin chjasin Nazaret. ¹⁰ Mé xikaha kjaxin k'uékjit'a chjasin Jerusalén. Tí sín nchat'á t'etqan mé kjuanjon sín kjuachaxin kixin janhan tsochr'áxanhan ntqechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrxan kixin ó nchoxon xikaha kónhen. ¹¹ Nchónhya veces kjujntakjasóte tí sín tinkáchónki Ìnchéni kixin chrókuítqhe sín tí nkehe tinkáchónki sín. Mé xikaha k'uékjit'a kaín xín núnko kixin imá k'uénínkakonhan tí jehe sín la xikaha k'uájichráhā sín kjónté sátsíkji sín chjasin ókjé.

Chrónka ch'ín Pablo nkexrí kuínkáchónki ch'án Ìnchéni

(Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etqan mé ó kjuanjon sín kjuachaxin kixin xikaha t'aha sín xra. ¹³ A ntá tí ntia a jaha rey chrókónoha kixin chonkixin k'uúikuan éxi ijnko xrohi t'ínkaséyan kuixín nkaya nkajní antsí má fuerte la kánhyó fuerte tí xrohi kuente yaon la tí t'ínkaséyan mé k'uantatjen tí janhan la ko tí sín xrxíjan. ¹⁴ Ntá kaín ni kjuítsínkani nonte ntá xrináhya kujinhan nixja ijnko nkexro mé nkíva hebreo nixjaxín ch'án. Ntáchro tí nkexro a kixin: “Saulo, Saulo, ¿nkekuente nínkakónna xritjéyá tí janhan? Jahvá nchekjasóte asán kixin tjanjonkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátêhe kixin: “Janhan mé Jesús mé tí nkexro chréhé jaha. ¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uúikuan tí janhan ijie kixin jaha sñch'ena xra. Janhan kjuéyá tí jaha kixin tsochéna chojni kixin k'uúikuan tí janhan la ko tsochrónka tí nkehe tsjákohá inaá tí xik'íkuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétqan satsjia. ¹⁸ Méxra tétqan sátsjia tí tjejó tí jehe sín kixin takitjenkia ikon sín kixin í ts'ajihya sín ntia sítie la ts'aji sín ntia t'ínkaséyan

la ko tsochóntahya tí jínahya kjuachaxiën ts'etuënhen tí jehe sín. Jehe sín mé tsínkáchónki sín tí janhan. Ntá janhan ts'áyáha sín la tsjiin ijié sín la ko tsjónhen sín tí nkehe ts'áyéhe kaín tí sín tsíkjinchetjóá Dios," ichro Inchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xíkaha jaha rey Agripa kjuíntaxiteyáha tí nkehe k'uikuán kuixín nkaya nkajni. ²⁰ Saoxín kjuákohá tí sín siín chjasin Damasco, la ntá chr'éxin chjasin Jerusalén, la ko kuénté tí estado Judea ntá kjaxin kjuákohá tí sín jehya judío. Kjuákohá sín kixin chrókuítóhe sín ijié sín, la chrókjan sín chrókuinkáchónki sín Dios, la ko chrókuakoqxín sín xra jína kixin chaxín ó kjuítóxinhin sín tí nkehe tinkáchónki sín. ²¹ Mé xíkaha tí xra tséxinna tí sín judío a nkaxenhen nínko la tjinkaon sín chrók'óyánna sín. ²² Ntá kjuasáyé Dios kjuinkítsana la ntoá itjén ijié tjákohá kaín chojni ntsínti la ko chojni ihyé la ninkehó k'uantaxianhya kuénte tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen, ²³ kixin t'ichjánxin its'en Cristo la ko tsoxechón ch'án inaá. Tí itén ch'án éxi ijnko xrohi ts'ínkaséyanxín tí sín siín ntíhi la ko tí sín siín í so naciön kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Inchéni

²⁴ Mé xíkaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xíkaha tsíkólókoxián —ichro ch'án.

²⁵ Ntá kjuátéhe ch'ín Pablo kixin:

—Jehya tsík'ixikjánna. Jaha Festo imá tjuáha. A ntá tí nkehe ntáxrjan la ijnko nkehe jína la ijnko nkehe chaxín. ²⁶ Ntíhi itjen tí ch'ín rey Agripa. Jehe ch'án mé jína nohe ch'án kaín tí nkehe a. Méxra tjenixjáha ch'án jnkojína kixin ó ñona kixin jehe ch'án ó nohe ch'án kaín nkehe kónhen kixin jehya ijnko nkehe imó kónhen tíha. ²⁷ Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó ñona kixin titekávan jaha.

²⁸ Ntá kjuátéhe ch'ín Agripa ntáchro ch'án kixin:

—Ó antsíkoá chrokuacha chrókuachróena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka ó á séhya la Dios mé tjinkaon kixin jehya jahvá chrókuinkáchónkia ch'án. Náhi. Kjaxin tjinkaon ch'án kixin kaín nkexro tjejótinhin chrók'óna sín éxi tí janhan kjánchó xíkahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxjxin ntíha. ³¹ Ntá kaín sín k'uaxrjenta sín la ikjo sín kichó sín. Ntáchro sín kixin:

—Kohya jie tsíkjasin tí ch'ín a kixin chrók'uenxín ch'án la ko chrókuak'echjinaxín ch'án ntóechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchóxon chrókuánjuan kjuachaxin sáchrókjui tí ch'ín a tí jehe ch'án chrókuanchahya ch'án kixin tí ch'ín imá t'etóan sinchekitóexín ijié ch'án —mé xíkaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uétóan sín sátsjini naciön Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'ín Julio. Jehe ch'án me ijnko policía kuénte tí ch'ín t'etóan Augusto César. ² Ntá k'uixenhenni ijnko ntabárcó tsíkjinín nó puerto Adramitio, la ó hjína sátsji tí puerto nó estado Asia. Kjaxin tjejókoni tí ch'ín Aristarco tsíkjinín chjasin Tesalónica nó estado Macedonia. ³ A ntá tí yaon chr'éxin mé kjujini tí puerto chjasin Sidón. Ntá ch'ín Julio mé ikjo jnkojína ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntíha kixin tsjinkítsa sín ch'án. ⁴ Ntá chr'éxin sákjuixinni chjasin Sidón. Ntá kjujini ijnko isla it'ín Chipre la nó tja kjonni kuítóhe tíha la imá chjéhe xrintó. ⁵ Ntá k'uatóyeni tí ntayaon chjinaxón chjasin Cilicia la ko Panfilia la ntá kjujini chjasin Mira estado Licia.

⁶ A ntá ntíha tí ch'ín capitán, tí ch'ín k'uétuënhen tí sín soldado a, mé k'uitja ch'án í jnko ntabárcó tsíkjinín nó chjasin Alejandría sátsji nó naciön Italia. Ntá ntáchro ch'án kixin tíha sátsjikoni kixin tsjijini ntíha. ⁷ Nchónhya yaon kjujixinni kixin imá iyó la imá xra kjujini chjino chjasin Gnido. Ntá naxá chjéhe xrintó tsanká ntá k'uátsínkani chjinaxón Salmón ntá kuinkátjixinni chjino tí isla Creta. ⁸ Ntá xíkahó imá xra k'uátsínkani chjino chrínta ntá kjujini ijnko chjasin it'ín Puertos jína chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcø chrítaon ntayaon kixin ó kóchjina tí nchakuen kin. Méxra ch'ín Pablo nixjehé tí sín a.
¹⁰ Ntáchro ch'án kixin:

—Tinhínrǎ tí nkehe tsøxrjanka. T'íkuañ kixin nchónhya kjuachrakon tsonhen. Sinchek'itjáyanni tí ntabárcø a la ko tí nkehe tjínká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuènte tí sín soldado a mé antsí má tjínkaon ch'án chrókuinhin tí nkehe chrónka tí ch'ín tjiko ntabárcø la ko tí nkehe chrónka tí inché tí ntabárcø a ntá tí nkehe ntáchro ch'ín Pablo la náhi. ¹² Jehya jina kixin tí puerto ntahó chrók'uejóni ntá chrók'uatšínkajia tí nchakuen kin, ichro sín. Kaín sín kjuenkayáxin sín kixin ichá jina sátsjixínni ntiha kixin ákué xitjahya chrókjujini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatšínkajia tí nchakuen kin.

Tí xrintø chjéhe chrítaon ntayaon

¹³ Ntá kjuankixin chjehe xrintø kjuixín nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixínni ntiha kjánchó kjónté naşa sákjuíni chjinxón tí chrínta ti isla Creta a. ¹⁴ A ntá chr'éxin ikjui ijnko xrintø kjuixín noroeste k'uíntaté tí ntabárcø. ¹⁵ La kjuankixin xrintø sákjuíko tí ntabárcø kixin tsjachahyani sátsjini tí sítjixín tí xrintø a. Ntá t'ichjánxin kuitøhenni sákjuíko xrintø tí ntabárcø tjejóxenhenni. ¹⁶ Ntá k'uatšínkani chjino ijnko isla ntá sí it'in Claudia kixin ntiha mé kánhyó tjian chjéhe xrintø. Ntá imá xra k'uitjáianni tí ntabárcø ntá t'etenixin nóton ntabárcø jíé. ¹⁷ Ntá kjuixín kjuínchek'it'ótjen sín tí ntabárcø ntá imá chrakon sín ntá kjuínchenteto sín tí ntabárcø jíé kixin kohya nkehe tsonhen. Kjaxin tóxakonhen sín chrakon sín tsíkjin nchesen tí ntabárcø tí tsjiji sín tí it'in Sirte. Ntá kuakjinjin sín tí ka chónka ntabárcø ntá kuitøhe sín sátsjiko xrintø. ¹⁸ Ntá tí yaon chr'éxin ntá naşa imá tjian chjéhe xrintø. Ntá ik'ue sín tí nkehe sítjínká tí ntabárcø a chrínta ntayaon kixin kánhyó tsøye. ¹⁹ A ntá tí yaon níxin a mé itjani ó kuakitsjexínni tí nkehe kuènte tí ntabárcø. ²⁰ Isé k'uíkonhyani yaon la k'uíkonhyani konosté kixin imá tjian chjéhe xrintø la ko kjaxin ó k'uitjáyenhenni kaín tí tjenkayáxinni kixin naşa chrókuaáni.

²¹ Ntá ó k'uatšínka itsjé yaon kjónehyani ntá k'uíntatjen ch'ín Pablo nixjehé ch'án kaín tí sín tjejóxenhenn ntabárcø a ntáchro ch'án kixin:

—Chrókuitékáonrá tí nkehe xrjanka kixin chrókuitøhenni tí estado Creta ntá chrók'uitjáyenhanyi tí nkehe tjínká tí ntabárcø a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcø la ts'itjáyán. ²³ Ntá tí tie a mé k'uíkuñ ijnko ángel tsíchr'án Dios tinkachónkia la ko t'aha xra. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etøan la kjaxin Dios la tsjinkítsa jaha la ko tí sín tjejókoa kixin ts'enhya sín.” ²⁵ Méxra chróchrakonhyará jahará kixin tí Dios tinkachónkia la chaxín nchexiteyá túha, éxi tsíntáchro tí ángel. ²⁶ Kjónté ó jehi t'ichjánxin sátsjikoni xrintø ijnko nonte jnkosiné ntayaon —ichro ch'án.

²⁷ Kjuixín k'uatšínka iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabárcø ijnko lado la i jnko lado ti xrintø. Ntá chjino k'áxrótjen ntá tí sín tjiko ntabárcø mé ó kónohe sín kixin ó chjina kjuixraká sín ijnko nonte xamá. ²⁸ Ntá kjuáchroa sín tí nkekjañ nínkaxín tí ntá mé chónka treinta y seis metro nínkaxín. Ntá sákjuíni kjínhya la ó xíkjachroa sín la veintisiete metro ó nínkaxín. ²⁹ Imá chrakon sín kixin ts'itjatøn tí ntabárcø itjo ntá kjuínkajin sín nóo chica gancho tí nóton tí ntabárcø a kixin ntahó tsochónhen tí ntabárcø hasta chrók'uinkaséyan. ³⁰ Ntá tí sín tjiko ntabárcø kjuenkayáxin sín sáchrókjui sín ntá kjuankixin kjuínkajin sín tí ntabárcø ntá chrítaon ntá éxi tjínkaon sín chrókjuínkajin sín tí gancho chónka tí kja ntabárcø. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitøehya tí sín i ntihi nkaxenhen ntabárcø ntá xitjahya tsaará —ichro ch'án.

³² Ntá tí sín soldado a mé kóchrínjint'ø sín tí hnø kuènte ntabárcø ntá tsitøhe sín tsjankí ntá.

³³ Ntá chjina t'inkaséyan a ntá ch'ín Pablo nixjehé ch'án kaín tí sín síin ntiha ntáchro ch'an kixin chrókjóne sín ichrén nkehe. Ntáchro ch'án kixin:

—Ó k'uatšínka iyó semana k'uejóchrinhyará la ko kjóntehyará. ³⁴ Tinhínrǎ t'ichjánxin chrókjónterá ichrén nkehe tí tjínkáonrá tsaará kixin ntihi la kohya nkexro ts'itjáyán la nijnko tí kaxihi chónka kjará ts'itjáyán.

³⁵ Ntá xjíkaha ichro ch'ín Pablo ntá kuákja ch'án ijnko niøtja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ø ch'án ntá kjuankixin kjóne ch'án. ³⁶ Ntá kóchéhe sín kaín sín kjuankixin kjóne sín kjaxin. ³⁷ Kaínni tsík'ixenhenni ntabárcø mé iyó ciento setenta y seis chojni. ³⁸ Ntá kjuixín kjóne sín la kókjehé sín ntá ik'ue sín tí noa trigo a tjínká tí ntabárcø a chrínkí tí ntayaon a kixin kánhyó tsøye tí ntabárcø a.

Tí ntabárcø kjuixin k'uániánkí ntø

³⁹ A ntá ó k'uínkaséyan, a ntá tí sín tjiko ntabárcø la kjuátsoanhya sín tí nonte ntá k'uíkon sín ijnko chrínta ntø. Ntáχρο sín kíxin ákué tsjachahya sín sátsjiko sín tí ntabárcø ntíha. ⁴⁰ Ntá kóchrínjint'ø sín tí hnø síchroéxin tí gancho kíxin ntabárcø tsítøhe chrínkí ntayaon. Ntá kjuínchentá sín tí nkehe tjikoxín sín tí ntabárcø a. Ntá kjuínchek'ít'ótjen sín tí ka tjiko nkayakon tí ntabárcø. A ntá tí ntabárcø kjuankíxin sákjuu chrínta ntø. ⁴¹ Xríñahya kjuíji ntabárcø tí iyó kójnkójiéxin ntayaon ntá ntíha kjuíkjiat'ó tí kja tí ntabárcø tí nchesen síin ntíha. Ntá í xitjahya nchekínkí ninkehó, a ntá nóton tí ntabárcø kjuankíxin síxíka kíxin imá sítji chjéhe ntø a. ⁴² Ntá tí sín soldado a mé tjinkaon sín chrók'óyan sín tí sín tjejóchjina kíxin tjinkakonhya sín kíxin ninkexró sáchrókjuí ókjé. ⁴³ A ntá tí ch'ín t'etuenhen tí sín soldado a mé tjinkakonhya ch'án kíxin its'en ch'ín Pablo ntá kjuanjonhya ch'án kjuachaxin. Íchá k'uetøan ch'án kíxin tí sín jína tjítaon ntø la senó sátsji sín kíxin tsjiji nonte xámá ⁴⁴ la ko tí sín noehya tsjítaon ntø a mé sátsjiko sín tí ntabárcø. Ntá xíkaha kaín ní kjuíjini tí nonte xámá la ó kuaáni.

28*Itjen ch'ín Pablo tí isla Malta*

¹ Ntá tíó tjejóni kaín ní kuaáni ntá kónoheni kíxin tí isla la mé nchek'in sín Malta. ² A ntá tí sín chjasin ntíha mé imá jína kjuínkítsa sín kaín ní la kjuaka sín ijnko xrohi jíé kíxin imá kíxín sí't'aniá chrín. Ntá k'uéya sín kíxin tsochjínani kaín ní tsochjínroheni. ³ A ntá ch'ín Pablo mé sákjuikalja ch'án í so njo tsixámá ntá kjuasínkátø ch'án tí xrohi a. Ntá xríñahya k'uaaxrjenkíxin ijnko konche tí xrohi a kíxin imá sóa ntá xríñahya k'uísímá itja ch'ín Pablo. ⁴ Ntá tí sín chjasin ntíha mé k'uíkon sín tí konche kjtíjankítjen itja ch'án ntá íkjo sín kíxó sín. Ntáχρο sín kíxin:

—Kjá tí ch'ín a la ijnko chojni tsíkjàya a kíxin kjónté kuaá ch'án k'uénxinhya ch'án ntayaon la Dios la í tjinkakonhya kíxin naxá tsjak'echón ch'án.

⁵ A ntá jehe ch'án kótsjénka ch'án itja ch'án chrítaon tí xrohi kíxin ntíha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kíxin ách'e ts'atjójø itja ch'án ø ách'e its'en ch'án. Ntá kjuixin k'uejóchónhen sín isé la k'uíkon sín kíxin kohya nkehe kónhen ch'án ntá kjuítøxin sín tí nkehe kjuenkayáxin sín la ntáχρο sín kíxin jehe ch'án mé ijnko díos tíha, íchro sín.

⁷ Ntá chjino tí k'uejóni a mé itjen nontøe ijnko ch'ín t'etøan kuénte isla me it'in Publio. Mé jína kjuanjon ch'án kjuachaxin k'uejóni ntøe ch'án la kjuanjon ch'án nkehe kjóneni iní yaon. ⁸ Ntá it'é tí ch'ín Publio a mé tjejsínka ch'án kíxin níhi ch'án chóna ch'án sóa la ko chinjní. Ntá ch'ín Pablo sákjuítsjehe ch'án la kjuixin níxjehe ch'án Dios, ntá kjuák'etja itja ch'án tí ch'ín a ntá kuitøhe ch'án jína. ⁹ Mé xíkaha kjaxin kóchjina í so tí sín níhi síin tí isla ntá kaín sín kuitøhe sín jína. ¹⁰ Na ntá imá kjuíkosáyøhe sín ch'án. A ntá chr'éxin tíó kjuixin k'uíxenhenni ntabárcø inaá ntá kjuanjon sín kaín nkehe t'íchjánxínhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní níjtø tjejóni tí isla ntá k'uíxenhenni ijnko ntabárcø mé ntahó tsíkítøhe k'uátsínkajia tí nchækuen kíxín. Tí ntabárcø a mé tsíkíjxin chjasin Alejandría la ko mé chóna nkehe tsíkjangya chóna ihnjé díos Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuitøhenni iní yaon. ¹³ Ntá xík'ixenhenni tí ntabárcø la k'uátsínkani chjínaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xrintø kjuíxin nó sur, ntá yaon yóxin ntá kjuíjini chjasin Puteoli. ¹⁴ Ntá ntíha xetani iso kíxó ní, a ntá tjinkaon sín ts'ejókoni sín ntíha. Ntá k'uejókoni sín ijnko semana ntá chr'éxin sákjuíni chjasin Roma. ¹⁵ Ntá tí sín kíxó ní chjasin Roma la ó nohe sín kíxin tsjijini. Ntá iso sín la xetani sín ntíja chjasin Foro Apio la ko í so sín xetani sín chjasin Tres Tabernas. Tíó tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tíó kjuíji sín chjasin Roma ntá tí ch'ín capítan kjuíkénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuitøhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyøhe ch'án kaín tí sín judío tjeøan kuénte chjasin Roma. Ntá tíó kjuixin kójnkótsé kaín sín ntá ntáχρο ch'án kíxin:

—Kíxóni, kohya ninkehó jíé kjuásian kíxin chrókónínkakonna tí sín judío la jehya kíxin nínkaxonxian tí nkehe k'uekínkáchónki tí sín tsík'axrjeníxinni. A ntá kjónté itséna sín kjuák'echjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jíé chóna. Ntá tjinkaon sín chrók'uatjántana sín kíxin k'uitjahya sín ninkehó jíé chrók'ueúnxian. ¹⁹ A ntá tí sín judío a mé imá kónínkaon sín tjanchia sín jíé. Ntá t'íchjánxín tsjanchiani kíxin tí ch'ín César mé chrókjuínchekítøexín ch'án nkehe tí jíé chónanti,

kjónté chóntahyani ninkehó jje ts'eka tí sín tí nació n kuènténi. ²⁰ Méxra k'uíyahará kixin tjinkaonni ts'íkuan tí jahará la ko tsonixjaharáni kixin tinkáchónkini tí nkexo tjejóchónhen kaín tí sín israelita mé xikaha t'ikonrá kixin tjechrontetoxinni cadena ntihi.

²¹ Ntá ntáchro sín kixin:

—K'uáyèhyani ninkehó xroon chrókuixin Judea kuènte tí jaha la ko kuihya nijnko tí sín kichó ni judío chróntáchro sín ichrén nkehe jínahya tsíkijch'e. ²² Tjinkaonni chrókuinhini nkexrí tjenkayáxian kixin ó noheni kixin itsjé chjasin t'ántaxinhin sín tí nkehe nixin tjákua —mé xikaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuèté yaon chrónka ch'án nkexrí tí kjuachaxin kuènte Dios. Nixjehé ch'án sín kixin chrókuitekaon sín tí nkehe kjuako ch'ín Jesús, la chrónkaxin ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjenixinni ósé chrónkaxin ch'ín profeta Isaías ntáchro kixin:

²⁶ Sátjia nixjehé tí chojni a kixin jehe sín kjónté tjejótinhin sín la tienxínhya sín, la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha la ntatsjon sín la tsík'ikjehé la ikon sín la tsíchr'áto

kixin t'ikonxínhya sín kixin tinhín sín la tjinkakonhya sín chrókuienxín sín, la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan chrókjuuntakitohá sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjé tí sín kjujitsjehe ch'án. ³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

* 28:27 28.26–27 Isaías 6.9-10

Tí xroon ikjin ch'ín Pablo chr'énnen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjákuá tí tan jína tsaáxinni.

² Tíha mé tsintácho Dios senó kixin tsoxiteyá éxi níxja tí xroon níxjaxin tí sín tsíchronka itén ch'án ósé. ³ Tí tan a mé chrónka nkexrí tjen Ìnchéni Jesucristo Xjeen Dios. Jehé ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jie mé kjuákoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetóan. ⁵ Kjuasáyé Jesucristo k'uáyéheni kjuachaxin kixin sich'eheni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuehe sín ch'án. ⁶ Jahará k'uék'ejorá éxi tjejó tí jehe sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuahará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjínkaon chrókjuitsjehe ch'án chjasin Roma

⁸ Xrankixín kjuachaxién Jesucristo tjáncháxian Dios kjuasáya kixin jahará ó kuítekáonrá ch'án la ko nkuixín chjasintajni níxja sín nkexrí tinkáchónkirá ch'án. ⁹ Dios, tí nkexro t'ahá xrá kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxínkavan tí jahará tíó níxjahá ch'án. ¹⁰ Xráxín tjáncháha Dios kixin tí chrókjuanjón ch'án kjuachaxin la chrókjuasántsahará. ¹¹ Kixin tjínkavan chrókjuasántsahará tí jahará kixin chrókjuinkítsa tí jahará kixin chrók'uitjará jína nkexrí chrók'uejórá ntoá. ¹² Mé xíkaha tsócháhará la ko tsóchána kixin jnkokoá tinkáchónkini Ìnchéni, jahará la ko janhan.

¹³ Kichóni, tjínkavan chrókónohará kixin nchónhya veces tjínkavan chrókjuasántsahará kjánchó náxa xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni kixin chrókjuachani nchónhya chojni chrókuinkáchónki Dios éxi kjuít'a xrá í so chjasin náxa chónhya sín Dios. ¹⁴ T'ichjánxin tsjákohe kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xrá ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuènte tí tan jína

¹⁶ Tósuánahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷ Kixin tí tan jína kuènte Dios tjákuexin tí jeheni kixin chrókótjuáxin ijéni kixin tinkáchónkini ch'án la jehó ch'án tinkáchónkini. Exí ntácho xroon itén Dios kixin: "Tí nkexro kótjóá kixin kuítekaon sín Dios mé táhó ts'ejóchónxin sín."*

Tí jie tjasin chojni

¹⁸ Dios tjen nkaya nkajni mé tsonínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. ¹⁹ Jehé sín ó nohe sín jína nkexrí tjen Dios kixin jehe ch'án kjuakuexin ch'án tí jehe sín. ²⁰ Tí kjuachaxin kuènte Dios kjónté t'ikonhyani la kjánchó noexinni kixin tí nkehe kjuích'éna ch'án. Kixin tí náxa k'ónahya chjasintajni kónoxín kixin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontácho sín kixin k'uénoehya sín. ²¹ Kjónté nohe sín kixin xíkaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítie ó kuítóhe sín. ²² Kjónté ntácho sín kixin imá nohe sín kjánchó imá lonjí sín kixin ántsi kjuasin sín jie. ²³ A ntá ó kjuixin kjuínki sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá jie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

²⁴ A ntá xíkaha Dios kuítóhe ch'án tí jehe sín kixin chrókjuích'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósuéxin sín ch'ehe kichó sín ²⁵ kixin kuítekakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkijch'éna Dios. A ntá tí nkexro kjuích'éna tí nkehe la

* 1:17 Habacuc 2.4

titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe sín mé kuènte ch'án. Amén.

²⁶ La ntá xikaha kjuich'e sín ntá Dios kuítøhe ch'án tí jehe sín kixin chrókjuich'e sín tí nkehe chrókøsuèxin sín chrókjuich'e sín. Kjónté tí chojni chjin la kuítøhe sín tí ichjin sín la ntá kjuich'èna sín asén sín chojni ntoa. ²⁷ A ntá kjaxin xikaha tí chojni ntoa kuítøhe sín chróhonta sín chojni chjin la tjinkaon sín tí nkehe ntoáhya. La ntá ch'e sín nkehe chrókøsuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótèxin sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítøhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chónta sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróhonta sín tsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ía sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakonhen sín Dios, la ko jehó sín chrók'uetøan sín, la ko nchehnke sín, la ko jehó sín ch'èna sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexitèyáhya sín nkehe níxja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichren jie kjuasinhin kichó sín, la ko tikonóèhya kichó sín. ³² Jehe sín ó nohe sín jína kixin nkexrí k'uetøan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naḡa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitøexín ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótèxinrá kjaxin kixin jahará jnkokón jie tjásinrá. ² Ó noheni kixin ntoá sinchekitøexín Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ⁴ ¿A tjenkayáxinrá kixin tsjachará tsinkehérá tí sinchekjasótiará Dios ní? ⁴ ¿A kjoniehérá tí kjuaxróxin tsjéjehya tjanjon Dios kixin tjechónhen ch'án naḡa nínkakuanhyará ch'án? A ntá jahará la kuiénxinhyará kixin Dios tjuáhará kixin tjinkaon ch'án chrókjuítøhérá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókjuítøhérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótèxinrá tí yaon tsjixixín tió tsnoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkojnko chojni nkehe tí xṛa tsíkjich'e sín. ⁷ Tsjanjon ch'án kjuachón ts'áyéhe tí sín tjeýa sín tí nkehe náxrón la ko tí kjuachaxin ts'itjáyanhya la ko xráxín kjuich'e xṛa jína. ⁸ A ntá tsónínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhi, la íchá má kóxrjinhjin sín kjuich'e sín tí nkehe jínahya. ⁹ Mé xikaha tsjasóte sín la ko kjuaxróxinhya tsønhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikósáyehe ch'án kaín tí sín kjuínchexitèyèhe ch'án kjuich'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótèxin sín. ¹³ Jehya tí sín ó chrókuinhón tí ley la ó chrókótjuáxin ijé sín. Náhi. Tí sín sinchexitèyèhe sín tí nkehe k'uetøan Dios mé tsotjuáxin ijé sín. ¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuínchexitèyèhe sín éxí níxja tí ley la jéhi jehó sín t'etuenhen asén sín. ¹⁵ Kixin tí kjuínchexitèyá sín ch'e sín tí nkehe jína mé tjakoxín sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhi. ¹⁶ Itsí tí yaon la Dios mé sinchekitøexín kjuachaxin Inchéni Jesucristo kaín nkehe imó kjuich'e chojni éxí níxja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kixin jahará judiorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuakøhará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohí ts'ínkáséyanxín tí sín ixri sitié, ichrorá. ²⁰ Ntáchrórá kixin nohará tsjákohérá tí sín noehya la ko tsjínkítsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í

so chojni, a ntá jahará, ¿nkekuènté tjákoéhyará asánrá xíkaha? Jahará tjákoherá chojni kixin chrókueéhya sín, a ntá jahará la, ¿nkekuènté teerá? ²² Ntáchrórá kixin xitjahya tsochónta chojni yaá chojni chjin, a ntá jahará la, ¿nkekuènté xíkaha ch'erá? Ntáchrórá kixin titekákonhyará tí nkehe tsikjanoya, kjánchó jahará, ¿nkekuènté teerá tí nkehe tjete siin nkaxenhen nijnko? ²³ Nchehnerá kixin chontará tí ley, a ntá jahará chontahyará kjuasáyé Dios kixin kjuinchexiteyéhyará éxí k'uetóan tí ley. ²⁴ Ntoá ntáchro tí xroon itén Dios kixin: "Tí sín jehya judío la t'ántaxínjin sín Dios kixin tí ijjárá."

²⁵ A ntá tí chaxín kjuinchexiteyará tí ley tsíkjin ch'in Moisés la ntá jehya chónkó tsíkará xroye. A ntá tí kjuinchexiteyéhyará tí ley la éxí tsíkahará ninkehó xroye. ²⁶ A ntá tí sín tsíkaha xroye kjánchó titekaon sín nkexrí t'etóan tí ley la tjejó sín éxí ó tsíka sín xroye kjónté chaxínhya chónta sín. ²⁷ A ntá tí nkeexo kuáhya xroye tí cuerpo chónta kjánchó nchexiteyéhe tí ley, mé jehe sín tsjanchia sín jie tí jahará kixin jahará kuitekákonhyará kjónté chontará tí xroon nixja tí ley la ko kjónté ó tsíkará xroye. ²⁸ A ntá tí xíkaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuépporá ó, chontará. ²⁹ A ntá tí chojni chaxín judío la t'ichjánxin chróchónta sín xroye nkaya asén sín. Jehya tí ley chrók'uetóan xíkaha chrókonhen. Náhi. Táha la Nchakuen Dios. Jehya kixin chojni chrókórxjínjin kixin ó nchóxon. Náhi. Dios mé tsórxjínjin kixin nchóxon tíha.

3

¹ ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xíkaha jína kixin Dios kjuanjón tí itén ch'án saoxín k'uáyéhe tí sín judío kixin chrókjuinchexiteyá sín. ³ A ntá ¿nkehe tsonhen tí jnkójin tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsintáchro ch'an? ⁴ Kjá náhi. Dios la sinchexiteyá kaín nkehe tsintáchro ch'án kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjácoxín kixin Dios mé nohe nkexrí sinchekitogexín ch'án ijje chojni. ¿A ntá nkehe chróchroni? ¿A ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.) ⁶ Kjá náhi. A ntá tí jehya ijnko nkeexo jína tí jehe ch'án, ¿ntá nkexrí chrókjuinchekitogexín ch'án ijje chojni chjasintajni?

⁷ A ntá tí chrókjuínkítsa tí kjuach'ia kuéntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ekaráni jie kixin janhan mé ijnko chojni chónta jie? ⁸ Tí xíkaha la, ¿á chrókjuich'eni tí nkehe jínahya kixin ntá chrókuí tí nkehe jína? Mé xíkaha ichro iso chojni t'ekani jie kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Kaíni chóntani jie

⁹ ¿Ntá nkexrí? Jeheni judióni la, ¿á antsi má tjetoanni, a ntá tí sín í so la, á náhi? Kjá náhi. Kixin kaín ni chojni judióni la ko tí sín jehya judío mé kaín ni kjuinchexiteyéheni tí jie kjuasinni. ¹⁰ Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tiénxín,

Kohya ninkexró chrókjuéyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya, kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tóye tsíxrankehe tsíxravá chojni

kixin tí nejen chojni ch'iyaxín.

La tí veneno kuènte konche chónta ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kixin tjínkaon sín chrók'óyán sín chojni.

¹⁶ Tí ntja k'uáji sín tíó xíkaha kjuich'e sín mé kjuínchek'itjáyán sín kaín kjuaxróxin k'uéchónta ókjé chojni.

¹⁷ Chónhya sín tí ntja tjanjon kjuaxróxin*
 * 3:4 Salmó 51.4 † 3:12 3.10–12 Salmó 14.1–3, Salmó 53.1–3 ‡ 3:13 Salmi 5.9, 140.3 § 3:14 Salmó 10.7 * 3:17

¹⁸ Kixin kjuenkayáxínhya sín chróchrakonhen sín Dios.†

Mé xíkaha ntáchro itén Dios.

¹⁹ Ó noheni kixin kaín tí nkehe nixja tí xroon chónta tí ley mé k'uetuénhen kaín tí sín tinkáchónki tí ley kixin ntá kaín chojni chjasintajni chrótáni sín kixin kaín chojni tsjasóte kixin Dios mé sinchekitogexín ijje kaín chojni. ²⁰ Kixin ninkexró chrókjuacha chrókótjuáxin

* 3:4 Salmó 51.4 † 3:12 3.10–12 Salmó 14.1–3, Salmó 53.1–3 ‡ 3:13 Salmi 5.9, 140.3 § 3:14 Salmó 10.7 * 3:17
 Isaías 59.7-8 † 3:18 Salmó 36.1

ijjé sín káxin chrókuinchesteyéhe sín tí nkehe t'etqan tí ley. Tí ley la jehó ch'e xra tsoñoexinni káxin chóntani jie.

Tsaáxinni káxin tinkáchónkini Cristo

²¹ A ntá jehya tí ley chrókuaáxinni. La ntá ó kónoxin nkexrí Dios tsaáxinni lá kjaxin tí xroon chóna ley la ko tí nkehe nixja tí sín profeta la ó nixja xikaha. ²² Tsotjuáxin ijjiéni káxin titekaonni Jesucristo káxin kaín chojni chrókuaáxin tí tsitekaon sín tí jehe ch'an káxin t'ikon ch'an káxin jnkokón tsjehe kaín chojni. ²³ Káxin kaín xín chojni kjuasin jie la k'uáyéhya sín tí kjuachaxin chrókuaáxin sín. ²⁴ A ntá kjuasáyé Dios káxin k'uenyákonhenni Cristo Jesús la kótuáxin ijjiéni. ²⁵ Dios mé ichr'an ch'an Cristo, kuamá ijjiéni, k'uenyákonhenni ch'an káxin chrókuincháxónkini ch'an ntá chrókuaáxinni. Mé xikaha kjuich'e Dios káxin kjuaxoxin ch'an káxin ntoá kjuenkayáxin ch'an káxin kónínkakohya ch'an kjónté nchónhya jie tsikjasinni senó. ²⁶ Xikaha kónhen kjuaxoxin Dios káxin jina ch'an ijie la naxa tjechónhen ch'an sinchetjóá ch'an ijje tí sín kuítekaon Jesús.

²⁷ A ntá ¿nkekuènté chrókuinchehnenki? Xitjahya sinchehne chojni nkayakon Dios káxin jehya káxin kjuinchesteyéheni tí nkehe k'uetqan tí ley ntá chrókuaáxinni. Náhí. Káxin Inchéni kuítekaonni ntá kuaáni. ²⁸ Mé xikaha ó noheni káxin tsotjuáxin ijjiéni tí tsitekaonni Dios káxin Dios tahya cuenta á kjuinchesteyéheni tí nkehe k'uetqan tí ley.

²⁹ ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. ³⁰ Káxin kohya í jnko Dios la jehe ch'an sinchetjóá ch'an ijjiéni káxin tinkáchónkini ch'an la tahya ch'an cuenta á chóntani xroye o náhi. ³¹ A ntá tí tinkáchónkini Inchéni, la ¿á í chrókuinchesteyáhyani tí ley? Kjá náhi. Ichá antsí má jina chrókuinchesteyéheni tí ley.

4

Tí kjuaxoxin ch'in Abraham

¹ ¿Nkehe tsixroni káxin nkehe k'uitja ch'in Abraham, tí nkexro k'uaxrjenixinni ósé? ² Ntá ch'in Abraham tí chrókótuáxin ijje ch'an káxin tí xra kjuich'e ch'an ntá chrókóhne ch'an, kjónté jehya nkayakon Dios. ³ A ntá ntáchro xroon itén Dios káxin: "Ch'in Abraham kuítekaon Dios ntá táhó kuaáxin ch'an la ko kótuáxin ijje ch'an."* ⁴ Jnkojin chojni kjuich'e xra la jehya k'uáyéhekoá ch'an tí chichaon. Náhí. Táha la tí xra kjuich'e ch'an mé kjuacha ch'an. ⁵ A ntá kjónté jnkojin chojni kjuich'ehya ninkehó xra ntá chrókuitekaon ch'an Dios á ntá Dios la sinchetjóá ch'an kjónté tí nkexro chóna jie, káxin tí kuítekaon ch'an Dios la táhó mé kuaáxin ch'an. ⁶ Mé kjaxin tsintáchro ch'in David káxin náxrxón tí nkexro kótjóá káxin Dios kuáhya kuéntá nkeri jie tsikjasin ch'an. ⁷ Ntáchro ch'in David káxin:

Náxrxón tjejó tí nkexro kjuincheaon Dios kjónté jínahya kjuich'e sín la kjuakjin ch'an ijje sín. ⁸ Náxrxón tjejó tí nkexro káxin Inchéni kuáhya ch'an kuéntá tí jie k'uéchóna sín.†

⁹ ¿Á jehó tí sín ikuá xroye la náxrxón tjejó sín o á kjaxin náxrxón tjejó tí sín chóntahya xroye? Ó chrónkani káxin Dios la kuikonóhehe tí ch'in Abraham káxin kuítekaon tí jehe ch'an la táhó mé kótuáxin ijje ch'an.‡ ¹⁰ ¿A ntá nkesá tsikjincheyaoon Dios tí ch'in Abraham? ¿Á ó tsika ch'an xroye o naxa náhi? Kjá naxa náhi. Senó tsikjincheyaoon Dios tí jehe ch'an. ¹¹ Ntá chr'éxin ch'in Abraham ikuá ch'an tí xroye éxi jnko sello kjuaxoxin Dios káxin ó kótuáxin ch'an káxin kuinkáchónki ch'an Dios. Káxin ntá xikaha ts'óna ch'in Abraham xjeen kaín chojni tinkáchónki Dios, kjónté chojni tsikahya xroye. Ntá kjaxin jehe sín la Dios sinchetjóá ijje sín. ¹² La ko jehe ch'in Abraham mé ts'axrjenixin ch'an kaín tí sín tsika xroye káxin ntá chrókuincháxónki sín éxi kuinkáchónki tí jehe ch'an kjónté naxa tsikahya ch'an xroye.

Tí nkehe tsintáchro Dios la tsoxiteyá káxin tinkáchónki sín tí jehe ch'an

¹³ Dios tsintáche ch'in Abraham káxin jehe ch'an la ko tí sín ts'axrjenixin ch'an ts'áyéhe sín chjasintajni ts'ejó sín. A ntá tí nkehe ts'áyéhe ch'in Abraham la jehya káxin kuítekaon ch'an tí ley. Náhí. Ts'áyéhe ch'an tíha káxin kuítekaon ch'an Dios la ntá Dios mé kjuinchetjóá ijje ch'an. ¹⁴ A ntá tí jehó tí sín tsikjinchesteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóhónko xikaha la ko tí nkehe tsintáchro Dios la kjá ninkehó sínkíhya tí xikaha. ¹⁵ Káxin tí ley la tjikao káxin tsjasótéxin chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxra tí nkehe tsintáchro Dios la kjuasáyé ch'an tsjanjon ch'an káxin kuinkáchónki ch'in Abraham tí jehe ch'an la ntá Dios sinchekitonhen tíha kaín tí sín tsik'axrjenixin ch'an. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxi kuítekaon ch'in Abraham mé ts'áyéhe sín tíha. A ntá jehe ch'an mé k'óna ch'an

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

it'é kaín ni. ¹⁷ Éxí nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”⁸ Mé xikaha tjetsjehe Dios kixin jina kuítekaon ch'in Abraham tí jehe ch'án. Tí Dios a mé sinchexechón tí chojni tsik'en la ko t'et'əoan ch'án kixin ts'óna tí nkehe naḡa kohya.

¹⁸ Kjónté k'uéchóntahya ch'in Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxí tsíchronka Dios kixin xikaha nchónhya chojni ts'axrjenixin ch'án. ¹⁹ Ch'in Abraham k'uéchónta ch'án chjina ijnko ciento nánó la kjánchó k'uitjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naḡa chróchónta sín xjeen sín. ²⁰ Ch'in Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'in Abraham kixin Dios chóna kjuachaxin sinchexiteyá kaín nkehe tsintáchro ch'án. ²² Dios k'uikon kixin jehe ch'in Abraham kuítekaon ch'án ntá Dios kjuínchetjóá ijíé ch'án.

²³ La jehya kixin tsik'óna tí xroon kixin tí ch'in Abraham ó. ²⁴ Náhi. Tsikjin sín xroon kixin kjaxin jeheni chrókótjuáxin ijíéni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jje chóntani. Ntá xechón ch'án inaá kixin tsotjuáxin ijíéni kixin ó kuítekaonni tí jehe ch'án.

5

Kótuáxin tí jje chóntani

¹ Kótuáxin tí jje chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jina tsochjinehene Dios kixin tinkáchónkini ch'án ntá ts'áyéheni kjuachaxin kuénte ch'án. Ntá tí kjuachaxin la jina tsjinkítsa kixin jina ts'ejóni la ko tsóchéheni ts'ejóchónhenni kixin ntá tsjintaxín ts'áyéheni tí kjuachaxin jje kuénte Dios. ³ Kjaxin jehya táhó. Náhi. Kjaxin tsóchéheni kjónté nchónhya nkehe tsónhenni kixin ó noheni kixin xikaha tsónhenni kixin ntá ts'itjani tsónínakonhyani. ⁴ A ntá tí xikaha jina chrók'uejóni ntá tsjachani kixin jina ts'ejóchónhenni. ⁵ A ntá tí tjejóchónhenni la tósuehyani kixin Dios imá tjuèheni ch'án la tí Nchakuen ch'án kjuanjon ch'án mé nchexéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jje chóntani. ⁷ Kjá ninkexró chróntáchro chrók'uenyákonhen sín íjnko chojni kjónté ijnko chojni imá jina tjuèhe kichó. Kohya nkexro xikaha chrókjuich'e. ⁸ A ntá Dios mé kjuakoxin kixin imá tjuèheni ch'án kixin kjónté naḡa chóntani jje la Cristo k'uenyákonhenni. ⁹ A ntá Dios mé kjuínchetjuáxin ch'án ijíéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótéxinni. ¹⁰ Kjónté naḡa k'uénínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án. ¹¹ La jehya chrókótíhó. Kjaxin tsóchéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxinni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jje ntá k'uixin jje kuénté chjasintajni. Mé xikaha kjuankixin k'uén chojni ntá kaín chojni kjuankixin k'uén kixin kaín sín kjuasin sín jje. ¹³ Kixin ósé la k'uékohya ley ntá ó xráxin k'uixin jje chjasintajni kjánchó naḡa kohya ley chrókjuanchia jje chrókjuasótéxín sín. ¹⁴ Desde kjuák'e ch'in Adán hasta kjuák'e ch'in Moisés la k'uéchónta kjuachaxin tí kjuach'én kixin tí jje kjuasin sín mé k'uénxín sín. Kjánchó tí jje kjuasin sín la yóghya tí nkehe kjuích'e ch'in Adán, kuítekakonhya ch'án tí nkehe k'uetəoan Dios. Ntá ch'in Adán yógh tsotsjehe éxí tí nkexro tsí chr'éxín.

¹⁵ Ntá tí jje kjuasin ch'in Adán la xitjahya chrókóyóghé tí nkehe tsjanjon Dios kixin tí jje kjuasin jnkokoá chojni la ntá nchónhya chojni k'uénxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jina tíha kixin tsaáxin nchónhya chojni. ¹⁶ A ntá tí jje kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jje kjuankixin kjuasótéxín chojni kixin kjuasin jnkokoá chojni jje. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jje chóntani kjónté nchónhya jje kjuasin chojni. ¹⁷ Tí kjuach'én la k'uéchónta kjuachaxin kixin tí jje kjuankixín kjuasin jnkokoá chojni. A ntá kjuasáyé Dios kjuínchetjóá ch'án tí jje chóntani la ntá antsí tsochóntani kjuachaxin ts'ejóni jina kixin k'uenyákonhenni jnkokoá nkexro, mé Cristo tíha.

¹⁸ A ntá tí jje kjuasin ch'in Adán la ntá kaín chojni kjuasin sín jje chrokjuasótéxín sín. A ntá ijie la Cristo mé kótuáxin ijíé kaín chojni kixin tí jina ch'án k'uenyákonhenni ch'án. ¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jje. A ntá

jnkokoqá nkexro jína kuítekaon kjuaqoxin, mé Cristo tíha, a ntá nchónhya chojni tsaáxin tí jehe nt'án kjónté k'uéchonta sín jie.

²⁰ Ikui tí ley kuínhin sín ntá kónoxín kixin íchá antsi kjuasin sín jie. A ntá antsi k'uúxin jie la kjónté xikaha la antsi má kuikónógheni Dios kixin jehe ch'án tsjinkitsani ch'án tsaáxinni. ²¹ Mé xikaha tí jie k'uúxin k'uéchóntha kjuachaxin kjuikqo kjuach'én chrók'uénxinni. A ntá kjuasáyé Dios kjaxin antsi má chóntha ch'án kjuachaxin sinchetjóá ch'án tí ijéni la ko tsjanjon ch'án kjuachón jnkochrixín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jie ntá Cristo kjuínchexechónni

¹ A ntá ijie ¿nkehe tsixroní? ¿A naxa chrókjuasinni jie kixin ntá Dios naxa chrókjuaqoxin ch'án kixin chrókjuikónógheni ch'án? ² Kjá náhi. A ntá jeheni la éxi chojni tsík'en chrokuahya tsjasin jie. ¿A ntá nkeuente naxa chrókjuasinni jie inaá? ³ ¿A noahyará jahará kixin tí kuíkiteni kixin tinkáchónkini Cristo la yóhe k'uénkoni ch'án? ⁴ Tí kuíkiteni la éxi yóhe xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntja nixin mé xikaha Cristo xechónxin ch'án tí kjuachaxin jie chóntha tí It'é ch'án.

⁵ Kixin tí chaxín k'uénxinni éxi ik'uén tí jehe ch'án la ntá kjaxin tsoxechónni éxi xechón tí jehe ch'án. ⁶ Ó noheni kixin nkexrí k'uejóni senó mé táha mé k'uénxín Cristo kjuák'enkánixín ch'án ntacruz kixin ntá chrók'uitjáyanxín kain tí jie k'uékjasinni kixin ijie í chrókjuinchexiteyéhiani tí jie. ⁷ Tí nkexro ó k'uén la ntá ó kuítóhe tí jie. ⁸ A ntá jeheni tí k'uénxinni Cristo la ó noheni kixin ts'ejókoni tí jehe ch'án. ⁹ Kixin ó noheni kixin Cristo jnkokoqá vez xechón ch'án a ntá í ts'enhya ch'án inaá kixin tí kjuach'én í chónthaha kjuachaxin kixin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijéni. Ntá xechón ch'án ijie kixin tsjak'eko ch'án Dios. ¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jie kixin ntá ijie la xíxechonrá chrókjuich'eherá xra Dios kixin tinkáchónkirá Cristo Jesús, mé Ìnchéni tíha.

¹² Méxra chrókjuítóghyará kixin chrókjan tí jie chrók'uetuennen tí cuérporá inaá kixin tí jie chrók'uetoan kixin chrókjuinchexiteyéhérá tí nkehe tjenkayáxinrá. ¹³ Tjánjonhyará tí cuérporá kixin chrók'lóna nkehe chrókjuásixinrá jie. A ntá íchá jína chróchjehérá asánrá Dios éxi ijnko chojni tsík'en ó xíxechón inaá. Chjehérá Dios tí cuérporá ts'óna ijnko nkehe sich'exin ch'án xra jína. ¹⁴ Kixin tí jie la í chónthaha kjuachaxin ts'etuennen tí jahará. Jehya tí ley ts'etqon ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etuennyani tí ley? Kjá náhi. Kjuasáyé Dios tsaáxinni la kjá í chrókjuasinhanyi jie. ¹⁶ Jahará ó nohará jína kixin tí sich'eheni ijnko lámō xra la tsitekakonhenni ch'án la tí xikaha la t'ichjánxin ch'eheni xra tí lámō la t'ichjánxin sinchexiteyéheni ch'án. Mé xikaha tónhen tí naxa sinchexiteyéheni tí jie la táha mé ts'enxinni. A ntá tí tsitekaonni Dios la mé chrók'uejóni jnkójina. ¹⁷ Jahará la ósé k'uékjásinrá jie, a ntá ijie kjuasáyé Dios kuikónóghará ch'án kixin kain asánrá kuítekaonrá tí nkehe xrakohará. ¹⁸ A ntá ó kuítóghérá tí k'uékjinchexiteyéhérá tí jie. A ntá ijie ó kjuánjonrá asánrá kixin sich'erá xra jína kuente Ìnchéni. ¹⁹ A ntá jie nixja éxi ijnko chojni ó kixin jahará la tiénxinhyará jína tí nkehe í. A ntá xikaha tí senó kjuínchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuentará kixin chrókjuich'exinrá tí xra jína éxi tjínkaon Dios kixin ntá jehe ch'án chrókjuinchetjórá ch'án.

²⁰ A ntá tí jahará tió naxa kjuínchexiteyéhérá tí jie la ntá xitjahya sich'erá tí xra jína ntoá. ²¹ ¿A ntá nkehe chrókjuachará kixin xikaha kjuich'erá tí nkehe chrókósuáxinrá ó? Ntá xikaha kjuéyará tí nkehe ts'énxinrá ó. ²² Na ntá ijie ó kjuin tí nkehe k'uék'etuánhanrá k'uékjásinrá jie. A ntá ijie ch'eherá xra Dios. Táha la tsjinkitsa kixin ts'ejoxinrá jína kixin ntá tsjixixín tsotjuáxinrá ts'ayéhérá kjuachón jnkochrixín. ²³ A ntá tí chrókjuasinni jie la chrókjuachani kixin éxi chrók'uenni ó. A ntá tí nkehe chrókjuinchetjónhenni Dios la kjuachón jnkochrixín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuente tí sín tsikótehe

¹ Kíchóni, jahará ó choxinrá tí ley la ó nohará kixin tí ley chóntha kjuachaxin ts'etuennen tí chojni naxa tjejóchón ó. ² Tíha mé ts'axrxén éxi ijnko chojni chjin tsikótehe la tí xú tjan chóntha kjuachaxin ts'etuennen tjan kixin naxa tjechón ch'án. A ntá tió tsík'en tí xú la ntá tí tjachjin la ó kuítóhe tí k'uék'etuennen ch'án tjan. ³ A ntá tí jehe tjan chrókjuakja í jnko chojni

ntoa tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uek'etueñhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xíkaha jahará kíchó ni mé k'uenyákonhenni Cristo la ntá jahará la éxi tsík'enrá kixin í t'etuanhyará tí ley la éxi chrókuájkárá í jnko xiará la mé xíkaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xra Dios. ⁵ Tió naxa k'uekjasinni jie a ntá tí ley chrókjuich'e xra kixin chrókjuasinhyani jie, a ntá ichá antsí má kjuasixínni jie tí cuerpo kuénténi, la táha mé kjuixín tí ts'énxínni. ⁶ A ntá ijie la éxi yóhe ik'uénni, a ntá tí ley chónthaha kjuachaxin naxa ts'etueñhenni. A ntá ijie í kohya nkehe t'inkákonhen kixin jína sich'ehe ni xra Dios kixin k'ónani ijnko chojni nixin kixin tí Nchakuen Dios k'uáyéheni. A ntá í t'etueñhyani tí ley ntaxin tsík'óna.

Tí jie naxa chonta

⁷ A ntá tí xíkaha la, ¿nkehe chróchroni? Kixin tí ley la, ¿a jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé. ⁸ A ntá tió kónóna tí ley a ntá tí jie antsí kjuacha k'uetóan. La ntá k'uixín kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jie la ntá ó nóna kixin tí jie kjuásian me ts'énxian. ¹⁰ Mé xíkaha kónhen kixin tí ley chrókjuanjon kjuachón ntá kjuíkao tí ts'énxínni. ¹¹ Ntá tí jie mé kjuacha k'uetóan kixin sjntaxiteyáha tí ley. A ntá tí ley mé kjuanchia jie ts'énxian.

¹² Mé xíkaha tí ley la chaxín jína la ko tí nkehe t'etóan Dios la kjaxin jína. ¹³ Mé xíkaha tí nkehe jína la ¿a táha chrók'uenxian? Kjá náhi. Tí jie kjuásian mé ts'énxian. Mé xíkaha kjuákoxin tí nkehe jie kixin tsonoxín tí jie kixin tí ley la jína. Mé xíkaha kjuákoxin tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuénte Dios tíha. A ntá janhan la kjuíntaxiteyáha tí ntáchro asenná kixin tí jie kjuacha k'uetuanna. ¹⁵ A ntá tí janhan la tí nkehe tjé't'a la kjaxin naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjínkakonhya chrókjuít'a tíha mé it'a la mé xíkaha jtátsoanxián kixin tí ley la jína. ¹⁷ A ntá jehya janhan it'a tíha. Náhi tí jie chonta mé ch'e tíha. ¹⁸ Kixin janhan ó nóna kixin tí ntáchro asenná la kohya nkehe jína chrókjuít'a. Tjínkavan chrókjuíntaxiteyá tí nkehe jína kjánchó tjachahya sit'a tíha. ¹⁹ T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a. ²⁰ A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónóna tíhi. Tí tjínkavan chrókjuít'a tí nkehe jína la mé ichá antsí it'a janhan tí nkehe jínahya. ²² Kjónté xíkaha la tóxrjínna chrókjuíntaxiteyáha tí ley kuénte Dios. ²³ T'íkuan kixin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jie chonta mé éxi tjéchinaxián tíha.

²⁴ Nóna tí janhan. ¿Xá nkexro chrókjuatsen tí jie chóna tí cuerpo kuéntana chrók'uenxian? ²⁵ Kjuasáya tjaħa Dios kixin ikui Ínchéni Jesucristo kuaáxinni. Mé xíkaha tí janhan la it'óna tjenkayáxian kixin chrókjuíntaxiteyáha Dios a ntá tí t'óna mé ntáchro asenná chrókjuíntaxiteyáha tí nkehe kuénte tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótéxín sín. Jehe sín í tjínkakonhya nchexiteyá sín xíkaha ntáchro asén sín. Jehó tjínkaon sín sinchexiteyéhe sín Nchakuen Dios. ² Kixin tí nkehe t'etóan Nchakuen Dios mé tjanjon kjuachón kixin tinkáchónki Cristo Jesús. Tíha mé kjuatsen tí nkehe kuénte jie chrók'uenxínni. ³ A ntá Dios kjuich'e tí nkehe kjuachahya kjuich'e tí ley kuénte ch'ín Moisés kixin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxi chojni. La xra ó kui ch'án k'uenyákonhen ch'án tí ijéni kaín ni ntihi chjasintajni la kjuatsen ch'án tí jie chrók'uitjayanxínni. ⁴ Mé xíkaha kónhen kixin ntá jeheni jína chrókjuinchexiteyéheni tí nkehe t'etóan tí ley la chrókjuinchexiteyéheni tí nkehe ntáchro asénni ó. Náhi. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjínkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjínkaon nchexiteyéhe Nchakuen Dios la ntá xritjeyá sín tí nkehe kuénte Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'énxín sín. A ntá tí sín tóxakonhen tí nkehe kuénte Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjínkakonhya sín la ko titekakonhya sín tí ley. ⁸ Tí sín tóxrjínhin sín tí nkehe ntáchro asén sín ó la xitjahya sinchexéhe sín Dios.

⁹ A ntá jahará la nchexiteyéhyará tí nkehe ntáchro asánrã. Náhi. Jahará nchexiteyéhérá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrã la tjechón kixin Dios kuikonóghará, kjuínchetjóá ch'án tí ijjará, kjánchó tí cuerpo la éxi tsík'en kixin tí jie chontará. ¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjé ch'án kjuachón nixin tí cuerpo kuéntará kjónté chóna jie kixin tí Nchakuen Dios chontará jahará.

¹² Mé xikaha kichó ní, ó chóntani nkehe sinchexiteyéheni, kjánchó í chrókjuenkayáxinhanyi tí nkehe ntáchro asénni. ¹³ A ntá jahará tí chrók'uejorá éxi ntáchro asánrã la tíha la mé chrók'ueñxinrã. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrã la ntá jehó Nchakuen Dios chrók'uejochonxínrã.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuanhanrã ósé kixin chróchrakonrã. Náhi. Ntá tí Nchakuen chóntani la k'ónaxinni xjeen Dios. A ntá tí Nchakuen ch'án nchexraxinkaonni tsonotáchroni kixin: "It'éni Dios kuéntá tí jeheni." ¹⁶ Tí Nchakuen Dios tónoxin nchakuenni kixin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxi tsintáchro ch'án ósé. Mé ts'áyékoni Cristo tí nkehe tsjanjon Dios. Tí chaxín tsjasóteni éxi Cristo kjuasóte ntá chr'éxin ts'ejókonni ch'án kjuaxróxin.

Tí kjuachaxin jie itsi chr'éxin

¹⁸ A ntá ijje la tóxakuenhyani kjónté nkehe ts'atsínkani tsjasótexinni kixin tíha la ninkehó sinkíhya kixin tíha la xitjahya tóyóhé tí nkehe ts'áyéheni chr'éxin kixin antsí má jína náxrxón tíha. ¹⁹ Tí nkehe tsík'óna tjejóchónhen kixin ts'íkon tí sín tsík'óna xjeen Dios. ²⁰ Kjónté kaín nkehe tsík'óna sín la ts'itjáyán tíha la jehya kixin xikaha tjinkaon tí nkehe tsík'óna. Náhi. Jehí xikaha tsík'etqan Dios. Ntá tjejóchónhen kaín nkehe tsík'jich'éna Dios ²¹ kixin chróchóna kjuachaxin chrók'uitjáyanhya. Ntá náxrxón ts'ixin kaín nkehe éxi náxrxón ts'ejó tí sín tsík'óna xjeen Dios. ²² Ó noheni kixin kaín tí nkehe kjuích'éna Dios la naça tsjasóte éxi yóhé tjetóxin ijnko chojni nchekokjilhi xjeen. ²³ A ntá jehya jehó tí nkehe tsík'óna t'íkon chojni chrókjoté. Náhi. Kjaxin jeheni tsasóteni kjónté chóntani Nchakuen Dios kixin tí Nchakuen Dios la mé tí nkehe xrankixixín kuákjani la naça ts'áyéheni inaá tí nkehe naça tsjanjon Dios. Tjejótsasóteni la ko tjejóchónheni kixin tsjintaxin ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naça tjejóchónheni tí nkehe t'íkonhyani. Tí k'uikonní tí nkehe tjejóchónheni ntá t'ichjánxinhya chrók'uejochónheni. Tí nkehe ó t'íkonni la t'ichjánxinhya chrók'uejochónheni naça chrók'uikonní inaá. ²⁵ A ntá tí chónheni tí nkehe naça t'íkonhyani la ntá t'ichjánxin tsonínkakonhyani tsochónheni.

²⁶ Mé kjaxin xikaha tí Nchakuen Dios tjinkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxi chrónixjani. A ntá tí Nchakuen Dios tjinkítsa nixjaxin ch'án tí jeheni kjónté noehyani nkexrí tsochrónóaxinni éxi tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxi tjinkaon Dios la nixjaxin ch'án tí sín tinkáchónki Dios.

²⁸ Ó noheni kixin Dios la k'uetqan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xikaha tjinkaon ch'án. ²⁹ Tí sín tsík'jeyá Dios ósé la ntá tsík'íyehé ch'án kixin ts'óna sín éxi tí Xjeen ch'án kixin ntá tí Xjeen ch'án mé ts'etuenhen nchónhya tí sín kichó ch'án. ³⁰ Mé xikaha tí sín tsík'jeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijjé sín la ntá tí sín kjuínchetjóá ch'án ijjé la kjuanjon ch'án kjuachaxin kuénte ch'án tsochóna sín.

³¹ ¿A ntá nkehe chróchroni tí xikaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni? ³² Kixin Dios la kjiakuènhya tí Xjeen ch'án. Kjuanjon ch'án k'uenyákonheni kaín ní, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jie chrókónínkakonhen tí sín kjueyá Dios? Kixin Dios la ó kjuínchetjóá ijjé tí sín a. ³⁴ ¿Nkexro chrókjuinchekjásóte tí jehé sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechrona ch'án kixin kaín tí jeheni. ³⁵ ¿Xá nkexro chrók'uejochónheni tí tjuèheni Cristo? Kjónté ichrén nkehe chrókónheni la ko chrókónínkakonhen chojni tí jeheni la ko kjónté chrók'uenxinni kjinta la ko chróchóntahyani ikéni ó kjónté tí kjuaxikaon chrók'uenxinni la chrók'uejohya ch'án tí jeheni. ³⁶ Éxi ntáchro xroon itén Dios kixin: Tí tinkáchónkini tí jaha la sín kjuaxikaon kaín yaon chrók'uenxinni.

Chrók'óyánni sín éxi t'óyán sín kolélo tí matanza.*

³⁷ Kaín tíha la antsí chrókjuachaxinni kixin kjuachaxién tí nkexro tjuèheni. ³⁸ Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, ó kjónté

* 8:36 Salmo 44.22

tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sitónhen ijie, o tí nkehe tsonhen chr'éxin. ³⁹ o kjónté tí nkehe siín nkaya nkajni, o tí nkehe imá njnka siín chjasintajni, o íjnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Inchéni Jesucristo.

9

Dios kjuéyá tí sín Israel

¹ Ntoá xrxanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxin. ² Imá t'avá asenná la ko náxrjónhya tjèn ³ kixin tjínkavan kjónté chrók'uitjáyanxinna tí tinkáchónkia Cristo kixin ntá jína chrókúinkáchónki Cristo tí sín kichiná naxa kjéhyana. ⁴ Jehe sín mé tsik'axrjenixin sín tí sín Israel la Dios k'uáyéhe sín éxi xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetqan Dios la ko tí ley tsikjin ch'ín Moisés la ko k'uáyéhe sín kjuachaxin ts'etqan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsintácho Dios. ⁵ Tsik'axrjenixin sín tí sín tsik'axrjenixinni ósé la kjaxin Cristo tsik'axrjenixin tí sín israelita tió k'óna ch'án chojni. Jehe ch'án mé Dios kuènte kain nkehe la tinkáchónkini ch'án jnkochrixin. Amén.

⁶ A ntá tí nkehe chrókúakja tí sín Israel kjuanjon Dios la jehya kixin chrókixetáyehya tíha. Náhí. Kixin jehya kain tí sín tsik'axrjenixin tí sín israelita mé chrók'óna sín chojni chjasin Israel. ⁷ Kixin kénhya tí sín k'uaxrjenixin ch'ín Abraham chrók'óna xjeen ch'án. Dios mé tsintáche ch'ín Abraham kixin: "Tí sín ts'óna kjéhya jaha mé ts'axrjenixin sín tí ch'ín Isaac."* ⁸ Tíhi mé tienxinni kixin ninkexró xitjahya ts'óna xjeen Dios kixin tí tsik'axrjenixin sín chojni ó. Náhí. Jehó tí sín tinkáchónki tí nkehe tsichenka Dios tí ch'ín Abraham mé jehe sín mé chaxin tsik'axrjenixin sín ch'án. ⁹ Tí nkehe tsichenka Dios tí ch'ín Abraham mé tíhi: "Itsi ijnko yaon mé tjan Sara sich'éna tjan ijnko xjan."†

¹⁰ A ntá jehya táhó. Náhí. Kjaxin tí yaá chánjan tsíkijch'éna tjan Rebeca mé chóna jnkokóá it'é xjan mé it'ín Isaac, mé tsik'axrjenixinni ch'án. ¹¹ A ntá tí xjan la naxa kokjéhya xjan la ninkehó nkehe jina o jínahya kjuích'e xjan. Ntá kjuakoxin Dios kixin chóna ch'án kjuachaxin éxi tsikjenkayáxin ch'án tsjeyá ch'án nkexro ts'íyehé ch'án la tahya ch'án kuéntá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kixin: "Tí ch'ín saqo mé sich'ehe xra tí ch'ín tsoyo."‡ ¹³ Mé kjaxin xikaha ichro xroon itén Dios kixin: "Tjuahá Jacob, a ntá Esaú la náhi."§

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhi. ¹⁵ Kixin tsintáche Dios tí ch'ín Moisés kixin: "Tsojtuahá tí nkexro tjínkavan tsojtuahá la ko tsikonógha tí nkexro tjínkavan tsikonógha."* ¹⁶ Jehya éxi tjínkaon chojni o jehya kixin tí nkehe ch'e chojni. Náhí. Ó jehí Dios tsíkikonóghé tí jehe sín. ¹⁷ Tí ntácho xroon itén Dios mé nixjehé Dios tí ch'ín rey Egipto kixin: "Kjuánjuan kjuachaxin kixin jaha k'óna rey kixin tjínkavan chrókjuakoxian kjuachaxin kuéntana kixin ntá kuénté chjasintajni chrókónohe la chrókuitekaon tí njna."† ¹⁸ Mé xikaha tí tjínkaon Dios tsikonóghé ch'án chojni la tsikonóghé ch'án, a ntá tí nkexro tjínkakonhya ch'án tsikonóghé ch'án la tsikonóghya ch'án.

¹⁹ A ntá tsontáchorá kixin: "A ntá tí xikaha la, ¿nkekuènté t'eka Dios chojni jie? ¿Nkexro chrókjuacha chrókjuanjnko tí nkehe t'etqan Dios?" ²⁰ ¿Xá nkexro tí jahará kixin chróntácherá Dios xikaha? ¿Á tí chí tsik'óna nchetje chróntáche tí inché chí kixin: "¿Nkekuènté xikaha kjuích'énani?" chróchro. ²¹ A ntá kjaxin tí nkexro ch'éna chí mé chóna kjuachaxin tjínkaon sich'éna ch'án tí nkehe tóxrjínhen ch'án sich'éna ch'án, tí tjínkaon ch'án nchetje sich'éna ch'án nkehe imá náxrjón o tjínkaon ch'án sich'éna ch'án nkehe náxrjónhya.

²² Tjínkaon Dios chrókjuakoxin ch'án tí kjuachaxin kuènte ch'án chrókjuinckjasóte ch'án chojni la kjónté xikaha kónhen la kjuacha ch'án kóninkakonhya ch'án la kuikonóghé ch'án tí sín chrókjuinckjasóte ch'án kixin chrókjuinck'itjáyan ch'án sín. ²³ Mé xikaha kjuích'e ch'án kjuakoxin ch'án tí kjuachaxin imá jie chóna ch'án kixin jehe ch'án kuikonógheni ch'án kixin xikaha tsikjenkayáxin ch'án ósé kixin náxrjón chrók'uejókoni tí jehe ch'án. ²⁴ Mé xikaha Dios tsikjeyá ch'án iso tí sín judío la ko iso tí sín jehya judío. ²⁵ Mé xikaha ntácho tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uétjuahya mé tsojtuahá sín ijie.‡

²⁶ Tí chjasin ntíha tsintácho ch'án kixin: "Jahará jehya chjasenná",

a ntá ijie sintak'ian xjeen Dios tjechón.§

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19

† 9:17 Éxodo 9.16 ‡ 9:25 Oseas 2.23 § 9:26 Oseas 1.10

Mé xikaha ichro itén Dios. ²⁷ Kjaxin nixja ch'ín Isaías kuènte tí sín israelita tsintáχρο ch'án kixin: “Nchónhya chojni ts'axrjenixin tí sín Israel éxí tí nchónhya nchesen síin ntayaron kjánchó tsjéhya tí jehe sín tsjacha sín tsaá sín. ²⁸ Ntá tjoka tsonhen tí nkehe tsintáχρο Inchéni sinchexiteyá ch'án.”^{*} ²⁹ Ntá kjaxin ch'ín Isaías tsintáχρο ch'án ósé kixin:

Tí Inchéni chóntha kaín kjuachaxin kuítoghya chrók'uitjáyán kaín tí sín k'uaxrjenixin Israel éxí k'uitjáyán tí sín chjasin Sodoma la ko Gomorra.[†]

Tí sín judío la ko tí tan jína

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo. ³¹ A ntá tí sín israelita chrókuinchexiteyéhe sín ley kixin chrókótjuáxin ijíé sín kjánchó kjuachahya sín kjuinchexiteyéhe sín tíha. ³² ¿A ntá nkekuènté kixin xikaha k'uitjahya sín nkexri chrókuinkáchónki sín Dios? Kixin kjueyáhya sín nkexri chrókuinchetjóá ch'án ijíé sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín. ³³ Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'anótjénxin sín.

A ntá tí sín chrókuitekaon tí jehe la chrókósuèhya sín.[‡]

10

¹ Kichóni, kaín asenná níxjaha Dios kixin tjínkavan kixin tí sín israelita chrókuaá sín. ² Janhan ntáxrjan kixin tí sín israelita imá tjínkaon sín chrókuich'ehe sín xra Dios kjánchó chaxínhya kixin jehe sín la tienxínhya sín. ³ Kjaxin noehya sín kixin nkexri chrókuinchetjóá Dios tí ijíé sín. A ntá jehó sín xritjeyá sín nkexri chrókótjóá sín la tjínkakonhya sín chrókuinchexiteyéhe sín Dios. ⁴ A ntá Cristo mé kjuinchexiteyá kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijíé sín.

⁵ A ntá tí chrókótjóá ijíé sín kixin tí ley la ch'ín Moisés mé tsíkin ch'án xíkíhi: “Tí nkexro chrókuinchexiteyéhe kaín tí ley la táhó chrókuaáxin sín.”^{*} ⁶ A ntá tí chrókuinchetjóá Dios tí ijíéni kixin tí tinkáchónkini ch'án ó mé ntáχρο xíkíhi: “Ntáχροhyará kixin, ¿Xá nkexro sáchrókjuí nkaya nkajní? (Tí xikaha la t'axrjéxin kixin naça chrókui Cristo.) ⁷ La ko ntáχροhyará kixin: ¿Xá nkexro chrók'uinakajin tí imá njínka?” (Mé t'axrjéxin tíha kixin chrókuinkakajin sín Cristo chrók'uaxrjetaón ch'án kixin itjen ch'án tí sín tí sín tsík'en, ichro sín.) ⁸ ¿A ntá nkehe ichro? Ntáχρο kixin: “Itén Dios la chjinaxón tjen tí tjejará kixin ó nohará la ko xraxínkaon asánrá.”[†] Tí tan a mé tí nkehe tinkáchónkini kjuakoni. ⁹ Tí ir'va tsontáχροxian kixin choxian Jesucristo mé Inchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáχροxian kixin choxian Jesucristo ntá sinchekaá ch'án tí jaha.

¹¹ Ntáχρο xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”[‡] ¹² Dios la t'íkon jnkokón tsjehe kaín chojni á tí sín judío ó á tí sín jehya judío. Tí Inchéni la mé Inchéni kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáχρο xroon itén Dios kixin: “Kaín tí sín tjanchaxín nkehe ihnjé Inchéni la tsaá sín.”[§] ¹⁴ ¿A ntá nkexri chrókjuanchehe sín ch'án kixin chrókjuinkítsa ch'án sín tí naça kuítekakonhya sín ch'án? ¿A ntá nkexri chrókuitekaon sín tí jehe ch'án tí naça kuíénhya sín nkexro tí jehe ch'án? ¿A ntá nkexri chrókuinhin sín tí kohya nkexro tsjakohe sín tí itan a? ¹⁵ ¿La nkexri chrókuichronka sín tí tan tí kohya nkexro ich'án sín sátsji? Éxí ntáχρο xroon chóntha itén Dios kixin: “Náxrjón tí sín xrichronka itan jína.”^{*}

¹⁶ Kjánchó kénhya sín titekaon sín tí itan tsaáxinni. Tsintáχρο ch'ín Isaías kixin: “Inchéni ¿Xá nkexro ó kuítekaon tí tan xrichronkani?”[†] ¹⁷ Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkia kixin: ¿A kuíénhya sín tí tan? Kjá ó kuínhin sín. Ntáχρο xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”[‡]

¹⁹ Ntá tjánchánkia inaá: ¿Xá tí sín Israel la naça kiénxínhya sín ní? Senó ntáχρο ch'ín Moisés kixin:

Ijnko chjasin jehya chjasin kuéntana la tsqninkákonhénrá sín

kixin ijnko chjasin tjínkakonhya tsinhin la tsqninkákonhénrá sín.[§]

* 9:28 Isaías 10.22-23 † 9:29 Isaías 1.9 ‡ 9:33 Salmo 118.22 * 10:5 Levítico 18.5 † 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21

20 Ntá ntáchro ch'ín Isaiás kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaqxián tí sín kjuanchankíhya kixin nkexro tí janhan.*

21 La ko nixja ch'ín Isaiás kuènte tí sín israelita kixin: “Kuenté yaon k'uíyaha ijnko chjasin síin chojni titekakonhya sín la ko jjehe sín.”†

11

Tí sín Israel tsíkjeyá Dios

1 A ntá ijie tjánchánkiá kixin: ¿Dios la á kuitohe ch'án tí sín Israel? Kjá náhi, kixin janhan kjaxian israelitana la t'ikinixinna ch'ín Abraham la ko k'uaxrjenixinna ch'ín Benjamín. 2 Kixin óse tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itíjáyanyha ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehé ch'án Dios tjanchia ch'án jje kuènte tí sín Israel? Mé ntáchro xíkíhi: 3 “Ínchéni, jehe sín k'óyán sín tí sín chrónka itán la ko k'óxiá sín tí altar kuéntá ntá jehóni kuitoheni tjechónni la tjinkaon sín kjaxin chrók'óyán sín tí jeheni.”* 4 A ntá Dios kjuátéhe ch'án kixin: “Naxá kuitohe yato mil chojni kuítekaon sín tí janhan kjuíxienhya sín toch'ín sín tí nkehe tsíkjanoya Baal.”† 5 Ntá kjaxin xíkaha ijie naxá kuitohe iso tí sín naxá tinkáchónki Dios. Kjuasáyé Dios kixin kuikonóhehe ch'án tí sín la tsíkjeyá ch'án kixin tsaá iso tí jehe sín. 6 Mé xíkaha kjuasáyé Dios sinchekaá ch'án tí jehe sín kixin jehya tí xra kjuíuch'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra kjuíuch'e sín ntá chrókuaáxin sín la jehya kjuasáyé Dios tí xíkaha.

7 A ntá tí xíkaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín i so a la icha asén sín la kuítekakonhya sín. 8 Éxi ntáchro xroon itén Dios kixin: “Dios kjuanjonhya kjuachaxin chrókienxin tí sín a la ko mé kjaxin xíkaha naxá sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókienxin sín.”† 9 Kjaxin tsintáchro ch'ín David kixin:

Tí kia tjasin sín mé tjasixín sín jje,

tsjasótéxin sín.

10 Tí ikon sín ts'ikonxínhya sín kixin ts'óna sín ntakótán

ntá tí jje kuènte sín mé jnkochrínin yámá sín.‡

Tsaá tí sín jehya sín judío

11 A ntá ijie tjánchánkiá: Tí sín judío la tí kjuasin sín jje la ¿á ó naá kuitéxon Dios tí jehe sín? Kjá náhi. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. 12 A ntá tí jje kjuasin tí sín judío, a ntá kuitohe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuíuch'e tí sín judío ntá tí sín jehya judío kjuacha sín kuaá sín. A ntá tí chrókanjín tí sín judío chrókuítekaon sín Cristo la antsí má náxrjón tíha.

13 Chonta iso nkehe chrókuinhínrá jahará jehya judiorá kixin Dios mé chr'ánna kixin tsjakohá tí sín jehya judío la antsí tjetean tí xra kuènte Ínchéni chrókuít'a. 14 Tjínkavan kixin tí sín chjasenná chrókóhjinóxinhin sín kixin jahará tinkachónkirá Dios kixin ntá chrókjuacha chrókuaá iso tí jehe sín. 15 Kuitohe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuítekaon tí sín judío kjaxin la yóhe éxi chróxechón chojni tsík'en tí jehe sín. 16 Tí chrókuinchetjóá Dios tí niotja xrankixixín chrók'óna tí ich'o la ntá kuénté tí ch'o chrókuinchetjóá ch'án. A ntá kjaxin tí chrókuinchetjóá ch'án tí nuéé ijnko nta la kjaxin kaín tí chaon tí nta chrókuinchetjóá ch'án.

17 Ntá iso tí sín judío la éxi iso chaon tí nta olivo mé xíkaha tsíchrinjin la ntá jahará la éxi ijnko chaon nta olivo nteje tsík'óna injerto mé xíkaha ts'ejóchónxin tí nta chaon tí tronco tí nta olivo jína xráxin tjechón. 18 Ntáchrohyará kixin tí chaon tí nta la antsí jína. Íchá jína tsontáchorá kixin jehya tí nta t'etuenhen tí nuéé nta. Náhi. Tí nuéé mé tsjínkítsa tí nta mé xíkaha tí jahará.

19 Ntá jahará tsontáchorá kixin: “A ntá tí chaon tí nta la tsíchrinjin kixin ntá jeheni tsitoheni lüké tí nta chaon tsíchrinjin”. 20 Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntíha kixin tinkachónkirá Dios. A ntá chrokjuinchehnkehýará. Íchá jína chróchrakonrá. 21 Kixin Dios la kuikonóhehe ch'án tí nta chaon kuènte tí nta tronco la ntá mé xíkaha kjaxin tí jahará la tsikonóhyará ch'án. 22 Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkítsa ch'án

* 10:20 Isaiás 65.1 † 10:21 Isaiás 65.2 * 11:3 1 Reyes 19.10, 14 † 11:4 1 Reyes 19.18 ‡ 11:8 Deuteronomio 29.4; Isaiás 29.10 § 11:10 Salmo 69.22-23

tí jahará. Kjánchó chrók'uejorá jnkojína éxí tjinkaon tí jehe ch'án. A ntá tí náhí la chaxín jahará la tsítohará ch'án. ²³ A ntá tí sín judío tsítohe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxín ch'án tí tronco ínaá kixin jehe ch'án la imá chóna ch'án kjuachaxín kixin xikaha sich'e ch'án. ²⁴ A ntá jahará jehya judiorá mé tsíkóchrínjinrá ch'án nta olivo nteje. A ntá ántsi má xrá tsotséxín tí nta olivo jína. A ntá tí sín judío la nta chaon kuènte tí tronco nta olivo jína la ántsi xrahya tsjatsuenhen tsotséxín kichó ínaá kixin ó nta chaon kuènte.

Tí tsjixín ntá tsaáxin tí sín Israel

²⁵ Kichóni, tjínkavan tsonohará tí nkehe jehó Dios nohe kixin sinchehnkehyará jahorá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsjixín ch'án chjasin Jerusalén la tsjatsen ch'án tí jie kuènte tí sín tsík'axrjeníxin ch'ín Jacob.

²⁷ Tíhi mé kjuachaxín nixin kuèntana ts'áyehé tí jehe sín

kixin janhan mé kjuatsiyán ijie sín.*

²⁸ Xikaha kixin tí tan nixin tsaáxinni ntá tí sín judío mé tsonínkakohen sín Dios kixin ntá jahará ts'ayehérá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsíkjeýá ch'án tí sín tsík'axrjeníxin tí jehe sín. ²⁹ Kixin tí kaín nkehe kjuanjón Dios la tsakitsjehya ch'án la ko tsítoehya ch'án tí sín tsík'íyehé ch'án. ³⁰ Senó la jahará k'uékitekákonhyará Dios a ntá ijie la tí sín judío titekakonhya sín. A ntá jahará la kjónté la kujkonóghará Dios. ³¹ Mé xikaha jehe sín kuítekakonhya sín Dios la ntá kjónté xikaha la jehe ch'án tsikonóehé tí jehe sín éxí kujkonóghará ch'án. ³² Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxxín ch'án tí kjuachaxín kuènte ch'án kixin sinchetjóá ch'án kaín sín kjónté chojni chóna jie.

³³ A ntá tí kjuachaxín kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntá kuènte ch'án. ³⁴ Ntáchro xroon itén Dios kixin: “¿Xá nkexro chrókiexín nkexrí tjenkayáxin Inchéni la xá nkexro chrókjuinkítsa chrókjuakohe tí jehe ch'án? ³⁵ ¿Xá nkexro kjuanjón nkehe senó k'uáyehé Dios a ntá ijie tjinkaon chrók'uáyehé ínaá?”† ³⁶ Kixin kaín nkehe la tixín tí tjen Dios kixin kaín nkehe la kjuich'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kixin sinchetjóá ch'án

¹ Mé xikaha kichó ni, xrjanóghará kixin Dios ó kujkonóghará ch'án ntá jahará chróchjehérá cuérporá Dios éxí ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrjínjin ch'án. Tíhi mé ijnko nkehe ntoá t'ichjánxin chróchjeheni ch'án. ² Chrókóxrjínjinyará tí nkehe siín chjasintajni. Náhi. Chrókónxin tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxí tóxrjínjin ch'án.

³ Kjuasáyé Dios kjuanjón ch'án tí xrá tjet'aha ch'án. Mé xikaha nixjahará kaín rá kixin chrókjuenkayáxinhará kixin imá tjetooaná. Náhi. Chrókjuenkayáxinrá jína éxí tí kjuachaxín tjáhará Dios éxí nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xrá chrókjuich'e. ⁵ Mé kjaxín xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxinni kixin ó k'ónani jnkokoá cuerpo.

⁶ Dios kjuanjón nchónhya clase xrá éxí tjinkaon ch'án chróchjehé ch'án jnkojnko chojni tí xrá. Ntá t'ichjánxin jína sich'eni tí xrá kjuanjón ch'án. A ntá tí kjuanjón ch'án kjuachaxín kixin tsochronkaxinni tí tan kuènte ch'án ntá t'ichjánxin sich'eni tí xrá éxí titekaonni ch'án. ⁷ A ntá tí kjuanjón ch'án xrá tsjinkítsani í jnko nkexro ntá t'ichjánxin jína sich'eni tí xrá a. A ntá tí nkexro tsík'áyehé kjuachaxín tsjako la t'ichjánxin jehó la t'ichjánxin jehe tí xrá a chrókjuako. ⁸ Tí nkexro tsík'áyehé kjuachaxín nchexraxinkaon í jnko nkexro la kaín asén chrókjuich'e ch'án tí xrá a. A ntá tí nkexro tsjanjón ichrén nkehe la chrókójhéhya chrókjuanjón ch'án. A ntá tí nkexro t'etóan la jína chrókjuich'e ch'án xrá la ko tí nkexro chrókjuinkítsa tí sín chónahya la kjuaxróxin chrókjuinkítsa sín.

Tí nkehe chrókjuich'e tí sín tinkáchónki Cristo

* 11:27 Salmo 14.7, Isaías 59.20 † 11:35 Isaías 40.13-14

⁹ Kaín asánrá chrótuèherá kichuárá. Chrókuítòherá tí nkehe jínahya tjenkayáxinrá la chrókuenkaýáxinrá tí nkehe jína. ¹⁰ Chrótuèherá kichuárá la ko chaxín chrókuikosáyehérá kichuárá.

¹¹ Chrókósáhyará la chrókuich'eherá Ìnchéni xra kaín asánrá.

¹² Chrókócháhará kixin tjejóchonhénrá la chrókóninkákonhyará kjónté chrókuasótiará. Chrókuítòehyará chrónixjehérá Dios.

¹³ Chrókuinkítsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijinxjehará sín.

¹⁴ Nixjehérá Dios la tsjancheherá ch'án kixin sincheyaan ch'án tí sín chonkíhará. Tjancheherá Dios tsjinkítsa tí jehe sín la jehya kixin chrókóninkákonhénrá sín.

¹⁵ Tócháhaóará tí sín tjejóchéhe sín la ko tí tjejótsjanka sín la koírá chrótsjankará.

¹⁶ Kjuaxróxin chrók'uejorá. Chrókuinchehnkehyará. Náhi. Chrókóyóhará éxi tí sín noá. Chrókuinchehnkehyará kixin nohará.

¹⁷ Chrókuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókuáóxínrá nkehe jína kixin chrók'uikon kaín chojni. ¹⁸ Chrókuéyará njkojína chrók'uejorá. Éxi nkexrí chrókuachará la kjuaxróxin chrók'uejorá kaín rá. ¹⁹ Tjuahará kichó ni, la chrókuinchekjásótehyará jahorá tí sín ichrén nkehe kjuít'ahará. Náhi. Tjtoherá kixin Dios sinchekjásóte tí sín a. Ntáchro xroon itén Dios kixin: "Ixra kuéntana sintakitqaxián tíha. Janhan tsjénkahá tí sín a, ichro Ìnchéni."* ²⁰ Kjaxin ntáchro xroon itén Dios kixin: "Tí sín nínkakonhan t'enxín sín kjinta la chróchjehé sín nkehe chrók'jone sín la tí t'enxín sín ntá la kjaxin chróchjehé sín nkehe chrók'ui sín. Mé xíkaha chrókuich'e kixin chrókósuèhe sín kixin tí nkehe kjuich'e sín."† ²¹ Chrókuítòehyará kixin chrókuacha tí nkehe jínahya chrók'uetuanhanrá. Náhi. Chrókuich'erá tí nkehe jína kixin chrókuachahya tí nkehe jínahya chrók'uetqan.

13

¹ Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxián Dios. ² Mé xíkaha tí sín tjanjonko tí sín t'etqan la kjaxin nínkakonhen sín tí nkehe k'uetqan Dios. A ntá tí sín xíkaha ch'e la mé jehe sín tjeýá sín jje tsjasótexín sín. ³ A ntá tí sín gobierno t'etqan la sinchekjásótehyará sín tí nkexro titekaon ch'e nkehe jína. Náhi. Tsónínkakonhen sín tí nkexro ch'e tí jínahya. Tí tjinkáonrá tsónínkakuanhyará sín la chrók'uejorá njkojína. Chrókuinchejitéyehérá sín kixin chrókóninkakuanhyará sín. ⁴ Kixin Dios k'uetqan tí xra tjejóch'e sín kixin ntá jahará la jína chrók'uejorá. A ntá tí chrókuich'erá nkehe jínahya la chróchakonrá kixin jehya chónkó tjejó tí gobierno. Náhi. Chóna sín kjuachaxin sinchekjásótiará sín kixin jehe sín la Dios k'uetqan tjejó sín tí xra a kixin sinchekjásóte sín tí sín jínahya tjenkayáxin. ⁵ Mé xíkaha t'ichjánxin sinchexiteyéherá tí gobierno la jehya jehí kixin chrókuinchekjásótiahayará sín. Náhi. Ó jehí jahará chrórxáinkáonrá kixin t'ichjánxin sinchexiteyéherá sín. ⁶ La kjaxin jehya táhó. Náhi. T'ichjánxin chrókuenkehérá gobierno tí chichaan kuénte tí xra ch'erá tjanchia sín kixin tí gobierno la Dios k'uetqan tjejó sín t'etqan sín.

⁷ Kjaxin chrókuenkehérá kaín chojni tjasikéherá. Tí nkexro síká kuénte xra la chrókuenka sín kuénte tí xra, la tí nkexro síká ichrén nkehe nchejji ntá tíha kjaxin chrókuenka sín, la kjaxin chrókuikosáyehérá tí sín t'etqan. ⁸ Kjaxin chrókuasikéhyará ninkexró. T'ichjánxin chrótuèherá kichuárá kixin tí nkexro tjeúhe kichó la mé xíkaha kjuinchejitéyá tí nkehe k'uetqan tí ley. ⁹ Kixin ntáchro tí mandamiento kixin: "Tjakéhya asánrá í jnko chojni chjin la ko t'oyánhyará kichuárá la ko teehyará la nixjahyará kjuach'ia kuénte í jnko chojni. La ko tjakéhya asánrá nkehe ókjé."* Kaín tíha la ko í so nkehe t'etqan Dios mé tienxínni t'axrxjén kixin: "Chrótuèheni kichó ni éxi tjeúxín asénni." ¹⁰ Tí chojni tjeúhe kichó la ninkehó nkehe jínahya sich'ehe kichó. Mé xíkaha chrótuèhe kichuárá la mé xíkaha mé chróxitéyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótsheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la isé tsjixín ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuítòeheni tí nkehe ch'eni kuénte sítié la chróchóntani kjuachaxin kuénte Nchakuen Dios kixin tsjinkítsa ts'ajjini tí t'inkáséyan, éxi ijnko soldado t'inkáyate ch'án ka tsik'óna chica kixin kohya nkehe tsónhen ch'án. ¹³ Chrók'uejóni njkojína éxi nkexrí chrók'uajini chaxín ntoá tí t'inkáséyan a. Chrókuasinhyani kia chrókuanjonxin chojni la ko chrókókoanhyani la ko chrókuenkaýáxinhyani chróchóntani nchónhya chojni chjin la ko chrókuenkaýáxinhyani

* **12:19** Deuteronomio 32.35 † **12:20** Proverbios 25.21-22 * **13:9** Éxodo 20.13-15, 17; Deuteronomio 5.17-19, 21; Levítico 19.18

tí nkehe ntáchro asénni la ko chrókjueyáhyani kjuanínkaon la ko chrókóhjinoxienhyani. ¹⁴ A ntá jahará tákjárá tí kjuachaxin kuènté Ìnchéni Jesucristo tsjinkítsará la tíha mé éxí chrók'uinkayará nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjontahyará kichuárá

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjontahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín. ³ Tí nkexro chrókjóné kaín nkehe chrókjonéhyá sín tí sín chrókjóné sín kaín nkehe kixin kjónté xíkaha la Dios tsakja tí jehe sín. ⁴ Xá nkexro jaha kixin chrókjóné sín nkexro ch'ehe xra í jnko nkexro? Tíha la xra kuènté tí lámqé ch'án tsontáchro á jína kjuich'e ch'án xra o náhi. A ntá kjá tsjak'e ch'án jína kixin Ìnchéni chóna ch'án kjuachaxin tsjinkítsa ch'án tsjak'e tí ch'ín a jína.

⁵ Iso sín tjenkayáxin sín kixin imá tjeoan ijnko yaon a ntá í jnko yaon la náhi. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xíkaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xíkaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xíkaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uejotanni la ko jehya jehí chrók'uenni. ⁸ Tí tjejóni la tjejóni kixin sich'eheeni xra Ìnchéni la kjónté its'enni la kuènté ch'án tí jeheni. Méxra kjónté chrók'uejóchónni o kjónté chrók'uenni la kuènté ch'án tí jeheni. ⁹ Méxra xíkaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejóchón.

¹⁰ A ntá jahará la, ¿nkekuènté tjóntará tí kichuárá o nkekuènté chontehyará kaín sín kjuasáya? Kixin kaín ní tsqchjinani tí tjen Dios kixin tsontáchro ch'án á jína xra kjuich'eni o náhi. ¹¹ Ntáchro xroon itén Dios kixin:

Méxra janhan takjénxian asénná, ichro Ìnchéni, kixin tí tjeñ la ts'ejóxin toch'in kaín chojni kixin kaín chojni la tsjanchia sín kjuasáya kixin janhan mé Dios kuènté sín.*

¹² Mé xíkaha jnkojnkonni chrókónoheni kixin tsochenkani Dios nkexrí kjuich'eni.

Tjachruehyará kichuárá

¹³ Méxra chrókjontahyará kichuárá. Íchá jína kixin ninkehó nkehe chrókjuich'ehyará kixin ntá tí sín kichó ní chrókjuasinxinhya sín jie kixin tí chrókjuasin sín jie ntá xíkaha chrók'uitjáyánxín tí tinkáchónki sín Ìnchéni. ¹⁴ Janhan tinkáchónkia Ìnchéni Jesús la ntá xíkaha ó nóna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xíkaha tjenkayáxin ch'án. ¹⁵ Tí tjenkayáxin tí kichuá kixin tí nkehe inte la ntoáhya a ntá tí xíkaha ch'e la tjuéhya tí kichuá. Kixin jehya tí nkehe chrókjóné ó chrókjuinche'itjáyánxián tí kichuá kixin Cristo k'uenyákonhen ch'án kjaxin. ¹⁶ Chrókjuich'ehyará nkehe jínahya kixin ntá xíkaha chrók'uañtaxínhin sín tí nkehe jína tinkáchónkirá. ¹⁷ Kixin tí kjuachaxién Dios la jehya tí nkehe chrokjóneni o tí nkehe chrok'uini. Náhi. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéni kixin chónani Nchaquen Dios. ¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xíkaha chrókjueyáni kaín tí nkehe tjikao kjuaxróxin kixin ntá tsjinkítsani tí sín kichó ní kixin ntá kjaxin sín antsí chrókuiñkáchónki sín Ìnchéni. ²⁰ Chrókjuinche'itjáyánhyará tí xra kuènté Dios kixin tí nkehe chrókjónterá ó kixin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xíkaha la í so chojni chrók'uitjáyánxín tí nkehe tinkáchónki sín. ²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuich'ehyará tí xíkaha chrókjuasixín jie kichuárá. ²² Tí nkehe tinkáchónkirá la jahórá chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixinhya ch'án jie tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kixin tsjasixín sín jie ntá chaxín xíkaha yámá sín jie kixin kénhya asén sín kjóné sín tí nkehe. La tíó kénhya asén sín tjenkayáxin sín la ó kjuasin sín jie.

*

15

Nchechéhéra kichuára la jehya jahóra

¹ Tí antsí tinkáchónkini Inchéni ntá chrókuinkitsani tí sín kánhyó tinkáchónki tí jehé ch'án la chrókuich'ehyani tí nkehe chrókóchéxinni jehóni. ² Kjaxin kaín ni chrókuinchechéheni kichó ni kixin chrók'uejó sín jína la ko kixin antsí chrókuinkáchónki sín Inchéni. ³ Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhí. Kjuínchexiteyá ch'án éxi ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkaonhen Dios."* ⁴ Kaín nkehe chrónka xroon itén Dios senó la tsíkin sín óse kixin chrókónoheni kixin ntá chrók'uejóchónhenni la chrókónínkaonhyani kixin tíha mé nchechéheni. ⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkojína la ko jnkokón tsjenkayáxinkoará kichuára kixin xikaha kjuáoxin Cristo Jesús. ⁶ Kixin kaín ni jnkokóá chrók'uákjexinni Dios la chrókjuancheheni kjuasáyé ch'án mé jehé ch'án mé It'é Inchéni Jesucristo.

Tí tan jína xrakohe tí sín jehya judío

⁷ Chrókuánjonrá kjuachaxin ts'ejó í so chojni la chrótjuéherá sín kixin éxi Cristo tsík'áyéhe ch'án tí jahará mé xikaha tsjikosáyehérá Dios. ⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsichenka Dios tí sín tsík'axrjenixinni óse kixin xikaha tsjáoxin kixin Dios la jína ch'án la sinchexiteyá ch'án tí nkehe tsintáchro ch'án. ⁹ La kjaxin ikui ch'án kixin kjónté tí sín jehya sín judío la chrókjuanchehe sín kjuasáyé Dios kixin kuíkonóhe ch'án sín éxi chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios la ko tsotsjeni himno kixin ts'ákjexinni ihníé ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháhaokará kaín tí sín kuénté Dios.‡

¹¹ Kjaxin ntáchro xroon itén Dios inaá kixin:

Tjanchehéra kjuasáyé inchéni Dios kaín rá kjónté jehya judíora

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkin kixin:

Ts'axrjenixin ch'ín Isaí ijnko nkexro

la ts'etuenhen ch'án kaín tí sín jehya judío,

á ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehé ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehé ch'án kixin ntá ts'ánkí tí kjuachéhe tjejóchónhenni kjuachaxién Nchakuen ch'án.

¹⁴ Kichóni, chaxin tónona kixin jahará la jína tjejórá la kaín xín kjuaxrexinkaon jína tjenkayáxinrá la nohará tsjinkitsará chénkará kichuára. ¹⁵ La kjónté xikaha la chrakonhya ikjian tí xroon í chr'anhánra xrjanka kaín tí nkehe kixin chrók'uitjáyanhyará chrórxáinkáonrá kaín nkehe. Mé xikaha it'á tí xra kixin kjuasáyé Dios kjuanjon ch'án tí xra. ¹⁶ Kixin sít'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxi ijnko nkehe tsoxrjínjin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha sín kjuachaxin tsochána kixin t'aha xra Dios. ¹⁸ Chrókjuahya tsohnke tsontáxrjan í jnko nkehe. Jehó tsoxrjanka nkexri tí kjuachaxin kjuanjon Cristo chjína kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuitekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxién Dios mé kjuáoxian tí kjuásian kjuaxroan la ko kjuáoxian tí kjuachaxin kuente Nchakuen Dios. Mé xikaha kjuintaxixin kjuákua tí tan jína tsaáxin chojni Cristo xrankixín chjasin Jerusalén la nkuíxin chjinaxón ntiha la hasta estado Ilírico. ²⁰ Mé xikaha tjínkavan tsjókákua tí tan tsaáxinni tí chjasin naxa tienhyé sín ihníé Cristo kixin tí janhan tjínkakonhya tsjixrónkáxin tí xra kuente í jnko chojni xráxin tjech'e xra. ²¹ Íchá jína éxi ntáchro xroon itén Dios kixin:

Chrókuinhin tí sín naxa kienhyé sín tí tan kuente ti jehé ch'án.

La ko chrókienxin tí sín naxa kienhyé tí tan kuente ch'án.†

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjaḡa tí jahará kjánchó naxa xitjahya kjuasán ntiha. ²³ Kjánchó ijie la ó kjuixinna tí xra nkuíxin tí tjeñ ntihi. Ntá itsje nánó tjínkavan

* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1

* 15:12 Isaías 11.10 † 15:21 Isaías 52.15

chrókjuasántsjahá tí jahará ²⁴ a ntá ijie ts'atsínka tsonixjahará tí sátsjia naci6n España. Ntá tsochána ts'íkuan tí jahará ntá tsjixin ntá chr'éxin tjínkavan kíxin jahará tsjínkítsará tí sátsjia. ²⁵ A ntá ijie la sátsjia chjasin Jerusalén, sátsjikian tí nkehe tsjínkítsa tí sín kíchó ni ntíha. ²⁶ Kíxin tí sín estado Macedonia la ko estado Acaya kjuenkayáxin sín tsjejo sín chichaon kíxin tsochr'énhen sín tí sín kíchó ni ntíha tsochjéhe tí sín nõa tjejó kjasin Jerusalén. ²⁷ Jehé sín kóxrjínjin sich'e sín xíkaha kíxin tí sín judío tinkáchónki Cristo kjuínkítsa tí jehe sín tsonohe sín itén Dios. Ntá ijie la jehe sín chrókjuínkítsa sín ínaá chrókjuanjon sín iso tí nkehe ch6nta sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ O nõna kíxin tió sátsjia la Cristo mé imá sincheyaon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsojtúeheni kíchó ni mé xrxannóghará kíxin jnkokoá chrókjuenkayáxinni kíxin tí xra tjet'a la ko chrónixjehérá Dios kíxin tí janhan. ³¹ Tjanchehérá Dios kíxin tsjínkítsa ch'án tí janhan kíxin kohya nkehe tsonna kíxin kaín tí sín titekakonhya Dios siín chjasin Judea. La ko tjanchiará kíxin jina sátsjikian tí nkehe tsjínkítsa tí sín kíchó ni tjejó chjasin Jerusalén kíxin jina chrók'uáyéhe sín. ³² Ntá tí tjínkaon Dios la tsochána tsjasán tí tjejórá jahará la ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín ch6xin ch'án

¹ Tétuanhanrá tsjínkítsará tí tjan kíchó ni Febe ch'e tjan xra njnko chjasin Cencrea ² mé tjánjonrá kjuachaxin tsjak'e tjan kjuachaxién ihnjé Ìnchéni éxi ch'eherá í so sín kíchó ni tinkáchónki Ìnchéni. Tsjínkítsará tjan ichrén nkehe t'ichjánxínhin tjan kíxin jehe tjan kjaxin kjuínkítsa tjan nchónhya chojni la kjaxin kjuínkítsa tjan tí janhan.

³ Nixjehérá tjan Priscila la ko ch'ín Aquila. Jehé sín jnkokoá kjuích'ekoni xra kíxin kjaxin sín mé ch'ehe sín Cristo xra. ⁴ Jehé sín chrók'uenxín sín kíxin kjuínkítsana sín tí janhan mé xíkaha tjaha sín kjuasáya la jehya janhván, kjaxin kaín sín kíchó ni njnkoé tí sín jehya judío. ⁵ Nixjehérá kjaxin kaín kíchó ni tóchjina nt6e tjan Priscila la ko ch'ín Aquila. Nixjehérá tí ch'ín choxian jina Epeneto mé jehe ch'án la s6oxin kuitekaon ch'án Cristo estado Acaya. ⁶ Nixjehérá tjan María kíxin kjaxin tjan kjuích'e tjan xra tí tjejórá ntíha. ⁷ Kjaxin nixjehérá tí sín tsíkixjín chjasenná mé ch'ín Andr6nico la ko ch'ín Junias. Tí k'uíkjena nt6echiso la kjaxin tí jehe sín k'uíkjehe sín. Kjaxin kaín tí í so sín ap6stol la tjikosáyehé sín tí sín a. Jehé sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kíxin jehe ch'án mé ijnko nkexro choxian la ko tjaha tinkáchónki Ìnchéni. ⁹ Nixjehérá ch'ín Urbano kíxin jnkokoá kjuít'akian ch'án xra kuente Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehé ch'án la kx6nté nchónhya nkehe k6nhen ch'án kjuasóte ch'án kíxin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhyana Herodi6n la ko kjaxin nixjehérá kaín tí sín kjéhya ch'ín Narciso kíxin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuích'e sín xra kuente Ìnchéni la ko nixjehérá kjaxin tí tjan kíchó ni Pérsida. Kjaxin kjuínkítsa tjan kjuích'e tjan xra kuente Ìnchéni. ¹³ Kjaxin nixjehérá ch'ín Rufo, ijnko chojni tsíkjevá Ìnchéni la ko nixjehérá tí iné ch'án kjaxin kíxin kjaxin tjan kjuínkítsa tjan tí janhan la éxi naná k'uikuan tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntíha. ¹⁵ Nixjehérá kjaxin ch'ín Fil6logo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpas la ko kaín tí sín kíchó ni tinkáchónki Ìnchéni tjejóko sín ntíha.

¹⁶ Kjaxin tshérá tja kíchuará kjuachaxin ihnjé Ìnchéni. Kaín tí sín njnko kuente Cristo ntíhi xraxinkaon sín tí jahará la nixjahará sín.

¹⁷ Kíchóni, xrxannóghará kíxin chr6tsjehérá nkexro tí sín tjixrónkáxin chrók'6xíka tí sín jnkokoá tinkáchónki Ìnchéni. Jehé sín titekakonhya sín tí itén Dios kjuákohará k'uitjará. Tí xíkaha ch'e sín la chrók'uaxrjekjanxínrá ntíha. ¹⁸ Tí nkexro xíkaha ch'e la jehya Ìnchéni Jesucristo ch'ehe xra. Náhí. Jehí tjínkaon sín chrókjuixrónkáxin sín la nixja sín tí nkehe náxrjón ó la xíkaha ch'iyehé sín asén tí chojni naxa noehya. ¹⁹ Kaín chojni ó nohe kíxin jahará la ó kuitekáonrá Ìnchéni. Mé xíkaha chána tí janhan la tjínkavan chrók6xakonhanrá chrókjuích'erá xra jina. Jehya kíxin chrókjuích'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etuenhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjaxin nixjahará kjuachaxién Inchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntoe ch'án la ko kaín tí sín kuènte nínko tójnkotsé ntoe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjaxin nixjahará ch'án.

²⁴ Inchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkitsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxin chrónka éxí Dios k'uetqan nchenoheni ch'án tí nkehe ninkexró k'uénoehya desde k'lóna chjasintajni. ²⁶ A ntá ijie kaín ni tsonoexinni nkexrí nixja xroon ikjin tí sín profeta kixin nkexrí k'uetqan Dios itjen jnkochrixin. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Inchéni Jesucristo jnkochrixin. Amén. Ó tjen.

Tí xroon saxín ikjin ch'ín Pablo chr'énhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí ninko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókuji't'aha ch'án xra. Janhan la ko kichó ni Sóstenes mé ² ikjinni tí xroon i chr'ánhanrání tí jahará tójnkotsérá ninko chjasin Corinto. Ó kjuínchetjóará Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín Ìnchéni Jesucristo kixin chrókujink'itsa ch'án sín, tíha mé Ìnché sín la ko Ìnchéni. ³ Kjuasáyé It'eni Dios la ko Ìnchéni Jesucristo chrókujintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochr'ín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jina nohará chrónkaxínrá kixin nkexrí tinkachónkirá Ìnchéni la ko kjaxin antsí jina tiénxinrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nchakuen Dios, la í ninkhé t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsjtóghyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsikjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnjé Ìnchéni Jesucristo kixin jnkokoá chrókuenkayáxinrá la ko chrók'uaxrjentahyará ókjé na mé jnkokoá chrókuenkayáxinkoará kichuárá. ¹¹ Kichóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrorá kixin jahará chréhérá tí janhan Pablo, la ko í sorá ntáchrorá kixin jahará chréhérá tí ch'ín Apolos, la ko í sorá ntáchrorá kixin jahará chréhérá tí ch'ín Pedro, la ko í sorá ntáchrorá kixin chréhérá Cristo. ¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuikitexínrá tí njina ní? ¹⁴ Tjáncháha Dios kjuasáya kixin nijnko tí jahará kuik'itjahyará ntiha. Jehó ch'ín Crispo la ko ch'ín Gayo mé kuikite janhan. ¹⁵ Na mé nijnkorá xitjahya tsontáchrorá kixin njina kuikitexínrá. ¹⁶ Kjaxin jehó kuikite tí ch'ín Estéfanas la ko tí sín kjéhya ch'án. Xráxinkakonhya á kuikite í so sín o náhi. ¹⁷ Kixin tí xra chjina Cristo jehya kixin chrókuikite chojni. Náhi. Tí xra chjina Ìnchéni kixin tsoxrjankaxián tí tan tsaáxinni. Tjínkakonhya kixin chrókuákoxián palabra náxrjón noi kixin xikaha chrókuákuua ntá chrókujintamá tí kjuachaxin jie kónoxin tí k'uénxin Ìnchéni Jesús tí ntacruz, kjuák'enkáni ch'án, k'uényákonhenni ch'án.

Cristo mé tjákoxin tí kjuachaxién Dios la ko tjákoxin ch'án kixin imá nohe Dios

¹⁸ Chronkaxínni kixin k'uényákonhenni Cristo tí ntacruz. A ntá tí tsinhin tí sín xráxin ts'itjáyán ntá ts'ikon sín tíha éxi nkehe chónkó. A ntá kaín ni chojni kuaáni mé t'ikonni kixin kjuachaxin jie tíha. ¹⁹ Mé xikaha ntáchro xroon itén Dios tsikjin sín ósé kixin Dios mé sinchek'itjáyán tí nkehe tjenkayáxin tí sín imá nohe, la ko tsitqenta ch'án tí nkehe ntáchro tí sín imá tiénxin sín.*

²⁰ ¿Mé nkehe tsónhen ntáchro sín kixin imá nohe sín la ko nkehe tsónhen tjako sín la ko nkehe tsónhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kixin lontj sín kixin xikaha ichro sín. ²¹ Kixin Dios antsí nohe ntá xikaha kuíteghya ch'án kixin kjuachaxin kuènte sín ó chrókuacha sín chróchóxián sín ch'án. Ntá kóxrjínhin Dios chrókujeyá ch'án chrókuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jie, ichro sín. A ntá tí sín nkvia griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjákoxinni.

* 1:19 Isaías 29.14

Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèhèni chrókuinkáchónkini tíha, ichro sín. A ntá tí sín jehya judío ntáchro sín kixin chojni lonṭi tí jeheni kixin xikaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhèni ch'án. Mé xikaha tjakoṣin Dios tí kjuachaxin jié la ko tí kjuaxrexinkaon jina kuènte ch'án. ²⁵ Ntá jehe sín ntáchro sín kixin éxi ijnko nkehe chónkó tí nkehe kjuenkayáxin Dios, na kjónté xikaha la ántsi tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chóna Dios. A ntá tí sín ántsi má chóna kjuachaxin ntihi chjasintajni kjónté la tóyóhya sín Dios kixin ántsi chóna ch'án kjuachaxin t'etqan ch'án. ²⁶ Kichóni, xráxinkáonrá nkexri k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétqanrá la ko tsjéhyará k'uaxrjenáxinrá tí sín imá k'uék'etqan. ²⁷ Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kjueyá Dios iso tí sín chónahya kjuachaxin éxi t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá chóna kjuachaxin ntihi chjasintajni. ²⁸ Dios mé kjueyá ch'án iso tí sín t'etqanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinchesuèhe ch'án kjuachaxién tí sín jehó chrók'etqan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkachónkirá Cristo Jesús, a ntá chónaxinni Cristo kjuaxrexinkaon jina, la ko tí kjuachaxin kuènte ch'án kóxika tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'uénaxinni ch'án. ³¹ Mé xikaha éxi chrónka tí xroon tsikjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoṣin ch'án kixin imá t'etqan tí kjuachaxin kuènte Dios."[†]

2

Ch'in Pablo mé tjako ch'án kixin Jesucristo kjuák'enkáni ch'án ntacruz

¹ Kichóni, tió kjuasán ntiha chjasánrá níxjohará chrókjuákoahará nkexri tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kixin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. ³ K'uéjóni jnkokoá ntiha la ntá jahará ó nohará kixin janhan kjuak'é éxi chrókjuachahya kixin síxránka, chrákonna. ⁴ Tí kjuankixian níxjohará la ko xrjankaxián tí tan tsaáxin chojni, la tjínkakhonya chrókjuachuáxinrá tí nkehe náxrijón níxja chojni tsíkónohe má. Náhi. Tió kjuákoahará kónoxin kixin tjékjan Nchakuen Dios la ko kónoxin tí kjuachaxin jié kuènte ch'án, ⁵ kixin jehya kjuaxrexinkaon kuènte chojni tsíkónohe má chrókjuinkachónkirá. Náhi. Tí kjuachaxin kuènte Dios mé chrókjuinkachónkirá.

Nchakuen Dios mé tsochóxixinni ch'án

⁶ Kjánchó tió tjákoḣá tí sín chaxin ó nohe sín tinkáchónki Ìnchéni mé xrjanka tí kjuaxrexinkaon ántsi noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etqan chjasintajni, na mé tí kjuachaxin kuènte sín la tjoka ts'itjayan. ⁷ Jeheni mé ántsi chrónkani tí nkehe jehó Dios nohe, na mé tí nkehe tsikjenkayáxin ch'án náxa k'ónahya chjasintajni kixin nkexri tsaáxinni. ⁸ Nijnko tí sín t'etqan chjasintajni kienxínhya sín tí nkehe tsikjenkayáxin Dios. A ntá tí chrókiénxin sín tíha la ntá chrókjuak'enkanihya sín Ìnchéni tjetqan tí ntacruz. ⁹ Éxi ntáchro xroon itén Dios tsikjin sín ósé kixin: Náxa k'uíkonhya chojni la ko náxa kíenhya chojni, la ko náxa kjuenkayáxinhya chojni

kixin nkexri síin kaín xín nkehe kjuích'éna Dios ts'áyéhe tí sín tjuèhe ch'án.*

¹⁰ A ntá Dios mé nchenoexinni kaín tíha kixin chónantani Nchakuen ch'án. Na mé tí Nchakuen Dios mé tjetsjehe kixin nkexri síin kaín xín nkehe la ko kjaxin nkexri tjen tí nkehe tjenkayáxin Dios.

¹¹ Na mé ninkexró mé noehya nkexri tjenkayáxin asén chojni. Na mé jnkojnko chojni mé nohe kixin nkexri tónhen asén. Méxra xikaha kjaxin kohya nkexro nohe nkexri tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheni. Náhi. Tí Nchakuen kuixin tí tjen Dios mé k'uáyéheni kixin ntá tsoñoexinni kixin kaín xín nkehe kjuínchekitónhèni Dios. ¹³ Kjaxin jeheni chrónkani tíhi, a ntá jehya chronkaxinni tí nkehe tsíkónohe chojni ó. Náhi. Tí Nchakuen Dios mé nchenoexinni nkexri tsjakqexinni tí sín chóna Nchakuen ch'án.

¹⁴ Kjánchó tí sín naḡa chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'ikon sín kaín tíha kíxin jehó tí sín chónṭa Nchakuen Dios mé tsjacha sín tsienxín sín tíha. ¹⁵ A ntá tí nkexro chónṭa Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jié tí jehe ch'án. ¹⁶ Méxra ntáchro xroon itén Dios kíxin: ¿Xá ninkexró chrókónohe kíxin nkexrí tjenkayáxin Ìnchéni kíxin chrókjuacha sín chrókjuakohe sín ch'án inaá?† Kjánchó jeheni la ó chónṭani tí kjuaxrexinkaon kuente Cristo.

3

Tí sín jnkokoá kjuich'ehe sín Dios xra

¹ Mé xikaha, kichó ni, kjuachahya janhan chrónixjahará éxi chojni t'etuenhen asén sín Nchakuen Dios. Náhi. Éxi chojni naḡa nchexiteyéhe sín tí nkehe ntáchro asén sín, na mé éxi xjan ntsínsi na ntá kjuankíxin kuinkáchónki Cristo mé xikaha tí jahará. ² Janhan na kjuakoáxinrá nkehe xrahya éxi yóhe ijnko xjanhnté tí jahará naḡa nchekaki iné tsjen kíxin naḡa xitjahya sine nkehe cha. Mé xikaha tí jahará naḡa xitjahya sinterá nkehe cha ³ kíxin naḡa éxi chojni ó nchexiteyéhérá tí nkehe ntáchro asánrá kíxin tí naḡa siín kjuachjijnóxinhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni. ⁴ Isorá ntáchrorá kíxin chréhérá tí janhan Pablo, la ko í sorá ntáchrorá kíxin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehi ijnko chojni kjuich'ehe Dios xra, a ntá jahará kuinkachónkirá Ìnchéni kíxin janhan kjuakohará. Jnkojnkoní kjuich'eni tí xra kjuanjon Ìnchéni. ⁶ Janhan kuènga, a ntá ch'ín Apolos intá kjuáka ch'án, a ntá Dios la mé kjuinček'ánkí ch'án tí nkehe a. ⁷ Méxra tí nkexro k'uengaxin la ko tí nkexro tjáka ntá la kánhyó tjeotan kíxin Dios mé chónṭa kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuich'e sín. ⁹ Méxra jeheni mé jnkokoá ch'ehe ni Dios xra, a ntá jahará mé éxi tí nonṭee Dios, ntaha ch'e ch'án xra, la ko kjaxin jahará mé tí nchia tjech'ena ch'án. ¹⁰ Janhan mé tí maestro ch'ena nchia kíxin Dios kjuanjon kjuachaxin tsjaké tí xro xrankíxixín, a ntá í jnko nkexro sich'ena nchia chrítaón tí xro a. A ntá jnkojnko nkexro t'ichjánxin ntoá chrókjuich'ena sín nchia chrítaón tí xro a, ¹¹ kíxin kohya ninkexró tsjacha tsjak'e í jnko xro xrankíxixín tí nchia a kíxin táha la ó tsíkjin tsík'óna, kíxin Jesucristo tíha. ¹² A ntá chrítaón tíha mé tsjacha sich'ena chojni nchia tsík'óna chica oro, la ko chica plata, la ko xro náxrjón tje, la ko inta tabla, la ko kanj, la ko ntaxro. ¹³ Na mé tsonoxín nkehe tí xra kjuich'e jnkojnko chojni tió tsi tí yaon tsjixixín. Kíxin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuich'ena ijnko nchia tsochehya la mé tsjacha ch'án tí xra kjuich'e ch'án. ¹⁵ A ntá tí chróche tí nchia kjuich'ena ijnko chojni, ntá chrók'uitjáyan kuenté. A ntá tí nkexro kjuich'ena nchia la tsaá éxi yóhe chrókuinkéhe ch'án xrohi.

¹⁶ ¿Á noahyará kíxin jahará kaín rá na mé ijnko ninkoe Dios la ko Nchakuen Dios mé chónṭa asánrá? ¹⁷ A ntá jnkojín nkexro tjinkaon ts'ókíka tí ninkoe Dios na mé Dios mé sinček'itjáyan tí nkexro xikaha sich'e kíxin tí ninkoe Dios la tjóá tíha. A ntá tí jnko a mé jahará tíha.

¹⁸ Ninkexró chrókjuenkayáxin kíxin imá nohe. Tí jnkojínrá tónhen asánrá kíxin imá nohará éxi nohe chojni chjasintajni ó, na ntá chrókjanrá chrók'ónará éxi chojni noehya kíxin ntá chrók'uitjárá chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontj t'ikon Dios. A ntá ntáchro tí xroon itén Dios tsíkjin sín ósé kíxin: “Tí nkehe tsík'itjá sín ch'iyaxín sín la tíha mé tsokjan ts'enixín sín.”* ²⁰ La ko kjaxin ntáchro xroon itén Dios kíxin: “Ìnchéni la ó nohe ch'án kíxin kaín nkehe tjenkayáxin tí sín ntáchro sín kíxin imá nohe sín la mé ijnko kjuaxrexinkaon lontj tíha, ichro Dios.”† ²¹ Méxra chrókjuinchehnkehyará jahará kíxin chréhérá ijnko chojni imá nohe, kíxin kaín xín nkehe siín la kuèntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítonhen jie, la ko tí nkehe tsonhen chr'éxin, la kaín la kuèntará tí jahará. ²³ A ntá jahará la Cristo mé t'ayakonhanrá. Kíxin Cristo la jehe ch'án la mé kuente Dios.

4

Tí xra kjuich'e tí sín kjueya Ìnchéni

¹ Jahará chrók'uíkonrá tí jeheni éxi chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'uénoehya. ² A ntá ijnko chojni k'uáyéhe xra ts'etoan chrókjuakoxín kixin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'ahá Dios, la ko kjaxin tóxakonnahya tí nkehe chróntácho rí so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kixin chonta jie. Kjánchó jehya xíkaha tsontáxrjan kixin Dios t'íkon kixin chontahya jie janhan. Náhí. Jehe Ìnchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuinchekitóexínrá íchrén jie. Chonhénrá tí tsi Ìnchéni kixin jehe ch'án mé sinchenoxín ch'án kaín tí nkehe símá tí sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchéni, nixjahará tí nkehe í kixin jína chrók'uejorá jahará ntá xíkaha kjuintayóaxian éxi ch'ín Apolos la ko éxi janhan kixin chrók'uitjará kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsóchóntehya sín kjuasáyé tí í jnko chojni. ⁷ ¿Méxra nkexro ntácho kixin jahará antsí tjeoanrá? ¿Xá nkehe chontará naxa kjuanjonha Dios kixin? Tí kjuanjon Dios kaín nkehe chontará, ¿ntá nkeuente nchehnkerá kixin jahórá tsíkjéyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la í t'ichjánxianhyará ninkehó tí jeheni kixin naxa chrókjuinkítsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'ueñoanni. ⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókjuixixín chrók'uejóni éxi chojni kuítóhenni kixin noxín chrók'ueenni ts'íkon kaín xín chojni chjasintajni la ko ts'íkon tí sín ángel kjaxin. ¹⁰ A ntá jeheni tinkáchónkini Cristo, a ntá xíkaha t'íkon sín tí jeheni éxi chojni lontj. A ntá t'íkon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'énxinni kjínta, la ko t'énxinni ntá, la ko chóntahyani ikéni, la ko nínkakóhenni chojni, la ko chóntahyani nkerí ts'ejóni. ¹² La ko tóxrjéni kixin ítjani ch'exínni xra. A ntá tíó t'ántaxínhjni sín la tjancheheni Dios kixin sincheyaon ch'án tí jehe sín. La ko tíó chónkíhi sín tí jeheni la tónínkakuenhyani sín. ¹³ Tíó t'ántaxínhjni sín la jnkojína tjeheheni tí jehe sín. T'íkon sín tí jeheni éxi chjíninó ntihi chjasintajni, na mé éxi ijnko nkehe ninkehó sínkíhya la ko mé xíkaha naxa sítónhen tí yaon jie.

¹⁴ Íkjian tíhi na jehya kixin chrókjuintasuàhará. Náhí. Tjínkavan chrókjuintaxráxinkáonrá kixin éxi xjanna t'íkuan tí jahará, tjuahará. ¹⁵ Kjónté chróchontará ite míl chojni chrókjuakohará nkexrí tjen Cristo la chontahyará itjé it'ará. Ntá janhan mé k'óna it'ará tí jahará tíó kuítekáonrá Cristo Jesús kixin kjuákohará tí tan jína tsaáxinni. ¹⁶ Mé xíkaha xrjanóahará kixin chrókjuakoxínrá éxi tí janhan.

¹⁷ Méxra kuétuanhan tí ch'ín Timoteo kixin tsjiji ch'án ntiha. Na mé éxi xjanna t'íkuan tí jehe ch'án, tjuahá ch'án, kixin kjuákohá ch'án ntá kuítekaon ch'án Ìnchéni ntá xráxin jína ch'e ch'án xra. Ntá tsjiji ch'án sintaxráxinkáonrá ch'án nkexrí tjákoxxian tí ntje Cristo éxi xráxin tjákua kaín xín njnko t'atsínka tí janhan. ¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókjuasántsahará. ¹⁹ A ntá tjoka chrókjuasántsahará tí chaxín xíkaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuínhan. Náhí. Na mé ts'íkuan á chaxín chóna sín kjuachaxin kixin xíkaha nixja sín. ²⁰ A ntá tí kjuachaxién Dios la jehya tí nkehe tsonixjani ó. Náhí. Tí tjákoxxinni la tí kjuachaxién Dios. ²¹ ¿Nkehe tjínkáonrá tí jahará, kixin á chrókjuasán chrókjuintakjasótiará? o ¿á tjínkáonrá kixin jnkojína chrókjuasán?

5

Tsítóexín ijnko jie tjachéhe kíchó chojni

¹ ¿Á chaxín tsík'íkon sín kixin tí tjejorá ntiha la ijnkorá mé chontará nájoanrá éxi ichjiánrá? Tíha mé ijnko jie jie, la mé kjónté tí sín chónhya Dios la xíkahya ch'e sín. ² A ntá kjónté xíkaha tsíkónhen la imá ihnkerá. Íchá jína imá chrók'uavará. A ntá tí xíkaha ch'e ijnko chojni ntá chrókuétuénhénrá ch'án sáchrókjui ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjén éxi chrókjuak'é janhan, ntá t'akjénxian ihnié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xíkaha tsíkjich'e. ⁴ Tíó tsójnkotsérá kaín rá ntiha la éxi koyá tsjak'é ntiha la kjánchó nchakuenná ó la ko kóí tí kjuachaxién Ìnchéni Jesús ts'ejókoará ntiha. ⁵ A ntá tí ch'ín la nchek'ayéhérá tí ch'ín Tsochren kixin tsjasóte tí cuerpo kuénte ch'án. Ntá tíó tsokjan Ìnchéni mé tsaá asén ch'án.

⁶ Jahará chrókjuinchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsikóá tí xroan nchek'ánki niotja, ntá kjónté la tsósán kain tí ch'o? ⁷ Méxra chrókuakítsjerá ntója kain tí xroan ntaxin nchek'ánki niotja, kixin ntá jahará ts'ejorá éxi niotja tsík'óna ch'o nixin tsíkjikohya xroan nchek'ánki niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyan sín tí yaon pascua, mé k'uenyákonhenni ch'án. ⁸ Á ntá chrókjuasinni tí kia a la kain asénni chrórxaxinkaonni, tíha la éxi tí niotja chóntahya xroan nchek'ánkixin. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroan ntaxin nchek'ánki tí niotja a.

⁹ Á ntá í jnko xroon chr'anhánra k'uéntáxrjan kixin ninkehó chrók'uítohyará tí sín tjasin jie chóna tjojni chjin ókjé. ¹⁰ Ntá jehya kixin kuétuanhanrá kixin chrók'uítohyará tí sín chjasintajni tjasin jie chóna chojni chjin ókjé, la ko tí sín tjínkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xikaha chrókjuich'erá la t'ichjánxin chrók'uaxrjéxinrá tí chjasintajni. ¹¹ Méxra ó kuétuanhanrá kixin chrók'uítohyará ninkehó jnkojin chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjínkaon sín jehó sín tsochóna sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahýará sín. ¹² Jehya xrana chrókjuintakitoaxián tí ijie tí sín jehya kuente njnko ntiha. Á ntá tí xra kuéntará jahará kixin chrókjuinchehkitóexinrá tí ijie tí sín kichó ni tójnkoatsé njnko ntiha. ¹³ Á ntá Dios mé sinchekitóexin ch'án ijie tí sín jehya kuente njnko. Méxra, takítsjekjanxinrá tí ch'in jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'in juez tinkáchónkihya Inchéni

¹ Á ntá jnkojinrá chrókjuánjonkoará kichuára chrókjuikjanahýará jie nkayakon tí ch'in juez tinkáchónkihya Inchéni. Íchá jína chrókjuirá chróchenkará tí sín tinkáchónki Dios. ² ¿Á noahýará kixin tí sín tinkáchónki Inchéni mé sinchekitóexin sín ijie kain xín chojni chjasintajni? Á ntá xikaha sinchekitóexinrá ijie kain xín chojni chjasintajni, ¿ntá nkekuente tsjachahýará sinchekitóexinrá kjónté ijnko jie ntsi? ³ ¿Á noahýará jahará kixin kjónté tí sín ángel tsotsjeheni nkehe tí xra kjuich'e sín? Á ntá ijnko nkehe intsí ntihyó, la ¿á xitjahya chrókjuasiyóxinrá? ⁴ Á ntá xikaha chrókjuánjonkoará kichuára, ¿ntá nkekuente tjikjanchará jie nkayakon tí sín tikiníxinhya kuente njnko? ⁵ Ntáxrjan xikaha kixin chrókjuintasuahará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijie kichó ni? ⁶ Jahará jnkokoá kichuára ntá tjanjonrá, la ko kjaxin sátjékjanchará jie nkayakon tí ch'in juez tinkáchónkihya Inchéni.

⁷ Kjónté ijnko jie ntsi ntá imá tjanjonkoáxinrá kichuára; tíha mé t'óna ijnko jie jie. Íchá jína chrókónínkáonhyará kixin tí nkehe jínahya kjuít'ahará sín. Íchá jína chrókúitohérá sín kjónté tsaahará sín. ⁸ Kjánchó kjaxin jahará ntoáhya tjejoch'erá kixin kjónté jnkokoá kichuára la tehehá sín.

⁹ ¿Á noahýará kixin tí sín jínahya ch'e la ts'áyehya sín kjuachaxin kuente Dios? Chrókúitóehýará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tóxrjínhin kichó sín, ¹⁰ la ko tí xichee, la ko tí sín tjínkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyehya sín kjuachaxin kuente Dios. ¹¹ Xikaha k'uéjorá isorá senó. Ntá jie ó k'uújmára, kjuínchetjóará Dios, ntá ó xika ijjará kjuachaxin ihnié Inchéni Jesucristo la ko kjuachaxin kuente Nchakuen Dios.

Tí cuerpo ó tsikótjóa

¹² Siín kjuachaxin kain nkehe chrókjuít'a, kjánchó iso nkehe la ó chónkó. Siín kjuachaxin kain nkehe chrókjuít'a, kjánchó chrókúitóahya ninkehó nkehe chrók'uetuanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjájyan yóí tíha. Á ntá k'ónahya tí cuerpo kuénteni kixin chrókjuasixinni jie. Náhí. Tí cuerpo kuénteni mé k'óna kixin tsochjéxinni Inchéni kjuasáya, la ko jehe Inchéni mé ts'ayakonhen ch'án tí cuerpo kuénteni. ¹⁴ Méxra Dios mé kjuínchexechón Inchéni, mé xikaha sinchexechónxinni ch'án tí kjuachaxin kuente ch'án.

¹⁵ ¿Á noahýará kixin jnkojnko cuerpo kuéntará mé it'ó tí cuerpo kuente Cristo? ¿Á chrókjuít'a janhan kixin it'ó tí cuerpo kuente Cristo chrók'óna it'ó cuerpo kuente ijnko chojni chjin ch'iyehé nchónhya chojni ntoa? Méxra kjá náhi. ¹⁶ ¿Á noahýará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín

chrók'óna sín jnkokoá cuerpo? Kíxin ntáchro xroon itén Dios kíxin: "Yóí sín la ts'óna sín jnkokoá chojni."* ¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókuitohérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kíxin jnkojnko cuerpo kuèntará mé éxi ijnko njnko itjen Nchakuen Dios kjanjon ch'án k'uayéhérá, la ko chontará tí Nchakuen ch'án tjóá? Jahará la jehya inché tí cuerpo kuèntará ²⁰ kíxin jahará la tjete k'uenaxínrá Dios. Méxra chjééxínrá kjuasáyé Dios tí cuerpo kuèntará la ko tí nchakónrá kíxin yóí la kuènte Dios.

7

Chenka ch'án tí sín tsíkótehe kíxin nkexrí chrók'uejó sín

¹ A ntá jie tsjatahá tí nkehe tsíkjinrá kjuanchankinará, na mé ntáxrjan kíxin chaxín chrókójina kíxin tí chojni ntoa chrókualjahya ichjién. ² Kjánchó tí xikaha imá tjinkaon sín tsochónta sín itsjé chojni chjin tsjasinko sín jie, la íchá jina jnkojnko chojni ntoa chróchónta jnkojnko ichjién kuènte la ko jnkojnko chojni chjin chróchónta jnkojnko xii kuènte. ³ Tí chojni ntoa la ko tí chojni chjin chrókjuinchexiteyéhe sín kíchó sín. ⁴ Tí chojni chjin jehya inché tí cuerpo kuènte tjan, na mé kuènte xii tjan. Ntá kjaxin xikaha tí chojni ntoa la jehya inché tí cuerpo kuènte ch'án, na mé kuènte ichjién ch'án. ⁵ Chrókjuincheniéhýará kíchuará, jehí jnkokoá chrókjuenkayáxínrá yóírá kíxin tsochonteherá iso yaon kíxin ntá kaín asánrá chrónixjehérá Dios. Ntá tsjixin ntá chrókóchjineherá kíchuará inaá kíxin chrókuitóehýará kíxin ch'in Tsochren chrókjuacha chrókjuachroerá ch'án chrókjuásínrá jie.

⁶ Kaín tíhi tjonkará kíxin tsonohará kíxin sín kjuachaxin xikaha na kjánchó jehya kíxin xikaha tétuanhánrá. ⁷ A ntá janhan ntáxrjan kíxin chrókójina kíxin kaín ntá chojni ntoará chrókóyóhará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxá tóteghya la ko tí chojni tsíkók'án na ntátjan sín kíxin chrókójina kíxin xikahó chrók'uejó sín chrókóteghya sín éxi tí janhan xikaha. ⁹ Kjánchó tí chrókjuachahya sín tí tjak'e asén kíchó sín, naxá chrókjuasin sín jie, ntá íchá jina chrókótehe sín kíxin jehya jina kíxin jnkochríxín chrókjuak'ó asén sín.

¹⁰ A ntá jahará ó tsíkjin tsíkótahará, la tétuanhanrá tíhi: a ntá jehya kíxin kjuachaxin kuèntana tétuanxínrá. Náhi. Kjuachaxin kuènte Ìnchéni mé tétuanxínrá kíxin tí chojni chjin chrókjuákehya xii. ¹¹ A ntá tí chrókjuákehé ijnko chojni chjin tí xii, ntá xikahó chrókuitóhe tjan jehó tjan la ko chrókójina chrókóyóxin, chrókjuinhin tí kjuanínkaon kíxin tí kjuákehé kíchó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuèntana janhván, jehya kuènte Ìnchéni, kíxin tí tjen ijnko ch'in kíchó ní chóna ch'án ichjién ch'án tinkáchónkihya Ìnchéni, na kjónté naxá tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjen ijnko tjan kíchó ní chóna xii tjan tinkáchónkihya Ìnchéni, ntá kjónté naxá tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kíxin tí xii tjan tinkáchónkihya Ìnchéni ntá jie ó kótjóá ch'án kíxin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kíxin tí xii tjan mé tinkáchónki Dios. A ntá tí xikahya, la tí xjeen sín chrókótuághya, na ntá jie la mé ó kótjóá tí xjeen sín. ¹⁵ A ntá tí ch'in ntoa o tí tjachjin tinkáchónkihya Ìnchéni tjinkaon chrókjuákehé kíchó sín, la ája nohe sín tjákehé kíchó sín, kíxin Dios tjinkaon kíxin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kíxin nkexrí chrókuaá xiará? La ko jahará chojni ntoará, ¿nkexrí chrókónohará kíxin nkexrí chrókuaá ichjiámrá?

¹⁷ A ntá jnkojnko chojni chrók'uejó sín éxi tsíkjanjon Ìnchéni kjuachaxin tsík'áyéhe sín, la ko éxi tí k'uejó sín tió k'uíyéhe sín Dios, kjánchó chrókuitóehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyéhe Dios ijnko ch'in chóna xroye, ntá xikahó chrókuitóhe ch'án. A ntá tí chrók'uíyéhe Dios ijnko ch'in chónahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhaya á chóna chojni tí xroye o á chónahya chojni tí xroye. Na mé tí nkehe tjetuan kíxin chrókjuinchexiteyéheni tí nkehe k'uetóan Dios. ²⁰ Chrók'uejóni jnkojnkonni éxi k'uejóni tí k'uíyéheni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhaya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. ²² Kíxin tí nkexro kjuich'exón xra tió k'uíyéhe Ìnchéni kíxin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uituenhaya tió k'uíyéhe Ìnchéni la mé jie mé ch'ehe ch'án xra Cristo. ²³ Dios imá tjete

* 6:16 Génesis 2.24

k'ueñaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna inchárá. ²⁴ Méxra kichó ní, éxí k'uejorá tíó k'uíyáhará Dios kixin tsinkachónkirá ch'án, la xikahó ñaxa chrók'uejorá jie kixin chontará Ìnchéni tsjínkítsa.

²⁵ A ntá tí chojni ñaxa tóteehya sin na mé janhan chontahya nkehe kuènte Ìnchéni chrókuétuanhān sín. Kjánchó tsoxrjanka tí nkehe tjenkayáxian janhvān, a ntá chrókuítekáonrá tí janhan kixin kujkonóana Ìnchéni. ²⁶ Mé xikaha tónna kixin chrókójína kixin jnkojnko chojni chrókuitohe sín éxí tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá ichá jína chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochónta sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

²⁹ Mé xikaha tjetjonkará kichó ní kixin tsjéhya yaon ñaxa t'itjāyan tsokjan Ìnchéni. Mé xikaha tí chojni ntoa chóna ichjién sín, la antsí tjetoon saoxin chrórxaxinkaon sín Ìnchéni, la ntá chr'éxin chrótuèhe sín ichjién sín. ³⁰ A ntá tí sín tsjanka la chrók'uejó sín éxí chrótsjankahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín. ³¹ La ko tí sín kjuacha nkehe síin chjasintajni la chrók'uejó sín éxí ninkehó chróchóntahya sín, kixin kaín nkehe t'ikonní chjasintajni ntihi mé tjoka tsjeje.

³² Tjínkakhonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhe ch'án tí nkehe tóxrjinhin Ìnchéni. ³³ A ntá tí ch'ín tsíkótehe antsí tóxakonhen tí nkehe síin chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe síin chjasintajni kixin xikaha sinchechéhe tjan xii tjan.

³⁵ Tjetjonkará tíhi kixin tjínkavan kixin jína chrók'uejorá, jehya kixin xikaha chrókuétuanhanrá. Náhi. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsótehe tjan na mé jehya jie. ³⁷ A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí tjetohérá xjaanrá chjin kixin tsótehe tjan la ó nchoxon. La ko kjaxin tí tjínkakhonhya tjan kixin chrókótehe tjan na mé antsí jína tíha.

³⁹ Tí tjan tsíkótehe mé k'uítuenxín tjan kjuachaxin tí ley kixin tsjak'eko tjan tí xii tí ñaxa tjechón ch'án. A ntá tí chrók'uen ch'án ntá tsochónta tjan kjuachaxin tsótehe tjan inaá tí nkexro tsoxrjinhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ní noheni tíha. Ntá chrókóxakonheni kixin tí chrók'uitjani má ntá chrókóhnkeni má. Antsí tjetoon chrótuèheni kichó ní kixin xikaha antsí chrókuinkáchónkini Ìnchéni. ² Tí jnkojín nkexro ntáchro kixin nohe ch'án, na mé chaxínhya tíha la ñaxa t'itjāyan tí nkehe chrókónohe ch'án. ³ A ntá jnkojín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuanhya ninkehó ntihi chjasintajni, la ko ó noheni kixin jnkokoá Dios tjan.

⁵ A ntá síin nkehe nchek'in sín díos nkaya nkajni la ko chjasintajni na, kjánchó tí xikaha la kjá chrók'uixin itsjé díos la ko itsjé inché sín. ⁶ A ntá jeheni chóntani jnkokoá Dios na mé It'eni tíha, la jehe ch'án mé kjuich'ena ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuich'ena ch'án la ko kjaxin tí jeheni tsíkjach'ena ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tíó ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin ñaxa noehya sín má, ntá ntáchro sín kixin ó kuamá sín tí jie kuènte tí nkehe tsíkjanoya. ⁸ Ó noheni chaxín kixin jehya kixin chrókóxrjinhin Dios tí jeheni kixin tí nkehe jína chrókjóneni. Náhi. Jehya kixin chrók'uejójinni jína kixin

tí nkehe chrókjóneni na ko tí nkehe chrókjónenyani. ⁹ Méxra títóéhyará kixin tí kjuachaxin chontará sinterá kaín xín nkehe mé xíkaha chrókjuachroe ijnko chojni kichó ni naḡa noehya jína tinkáchónki Ìnchéni ntá tíha chrókjuasixín sín jie. ¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko nínkoe nkehe tsíkjanoya, ntá tí chojni kichó ni naḡa noehya jína ntá chrók'uikon sín xíkaha ntá kjaxin jehe sín tsojtínkaon sín sine sín tí nkehe tsíkókehe chojni ijnko dios chaxínha. ¹¹ A ntá jahará ó nohará jína ntá xíkaha tjejoch'erá itsará sincheh'itjáyanrá tí kichó ni naḡa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin. ¹² Méxra tí xíkaha chrókjuich'erá la chrókjuásinhínra jie tí sín kichó ni naḡa tinkáchónkihya sín Ìnchéni jína, na mé xíkaha kjaxin chrókjuásinrá jie chrókuitekákuenhyará Cristo. ¹³ Méxra tí xíkaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónenyani nto inaá kixin xíkaha ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uikuán ch'án. Jahará mé tjákoḡínrá tí xra kjuít'a kuénte Ìnchéni. ² Iso sín ntáchro sín kixin tjátsoanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókjuátsoanrá tí janhan kixin tí kuitekáonrá kuinkachónkirá Ìnchéni mé xíkaha tjákoḡínrá kixin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kixin: ⁴ Janhan chonta kaín kjuachaxin chrók'uayáha nkehe chrókjoné la ko chrók'ua. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjeýá Ìnchéni, la ko tí sín kichó Ìnchéni, la ko éxí chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá ch'chakqoen ch'án ó chrókuiháxinhin? Nkexro k'uenka nta to uva ntá kjonéhya ch'án ó? ¿La ko nkexro t'ayakonhen kolélo ntá k'uíhya tí tsjen t'énnen sín va? ⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xíkaha níxja. ⁹ Méxra kjaxin ntáchro tí xroon tsíkjin ch'ín Moisés óse kixin: “Chrókjuéjáyahará kamposa ir'iva koxinta tí tsinkátja va noatrigo tió tsónkéhe sín noa.”* Tíha mé t'axrjéxín kixin jehya koxinta ó tóxakonhen Dios. ¹⁰ Náhí. Tóxakonhen ch'án kixin tí jeheni. Méxra xíkaha níxja tí xroon kixin chrók'uejóxinni jína. A ntá tí nkexro kjuíncentá nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna. ¹¹ A ntá tí k'uenkanı tí itén Dios asánra, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xíkaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xíkaha la kjuanchahyani nkehe, kjonté kánhyó náxrjón k'uéjóni kixin tjínkaonhanyi chrókjuanchiani nkehe chrók'uichjánxinhinni kixin ách'e xíkaha ntá chrók'uinkákonhen tí itén Cristo chrókjuakoni. ¹³ Jahará ó nohará kixin tí sín ch'e xra kúente nínko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntqé tí ko t'óyánxin sín ntiha. ¹⁴ Méxra xíkaha kjaxin k'uetqan Ìnchéni kixin tí sín ch'e tí xra ó chrónka sín tí tan tsaáxinni na mé tí xra á chrók'uaxrjeníxin tí nkehe chrókjóné sín. ¹⁵ Kjonté janhan siín kjuachaxin xíkaha chrókjuít'a, la xíkaha kjuít'a la ko kjaxin xíkaha ikjian tí xroon í kixin jahará chróchjinará ichrén nkehe. Náhí. Kjonté chrók'uénxian kjinta chrókjuáncháhyará nkehe kixin tjínkaonhya kixin ninkexró chrókuakitsjena tí kjuachéhe chonta.

¹⁶ Jehya kixin chrojuíntahnke chrókjuákua tí tan tsaáxinni. Náhí. Janhan na ó jehí s'it'a tí xra á. Nóa tí janhan tí chrókjuákohya tí tan jína chrókuaáxin chojni. ¹⁷ A ntá tí janhvàn tjínkavan chrókjuákua la xíkaho chrókjuacha janhan. A ntá tí tjákua itén Dios kixin xíkaha kuítuanna ntá xíkaho ntaxitéyá tí xra chjina Dios. ¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókchóna má kixin chrókjuákua tí itan tsaáxinni la ninkehó chrókjuáncháhya chrókjuacha la ntá tí xíkaha la chrókuákjáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xíkaha antsí tsjé chojni chrókjuacha janhan kixin chrókuitekaon sín Cristo. ²⁰ Tí tjén tí siín tí sín judío ntayóha éxí jehe sín xíkaha janhan kixin xíkaha chrókjuacha jnkojín sín chrókuitekaon sín. Na mé t'axrjéxín kixin tí chrókjuacha iso tí sín nchexitéyéhe tí ley k'uetqan ch'ín Moisés, la t'ichjánxin kixin kjaxin janhan chrókjuíntaxitéyá tí ley kjonté janhan la xíkaha t'etuanna tí ley. ²¹ A ntá tí chrókjuacha jnkojín tí sín nchexitéyéha tí nkehe k'uetqan ch'ín Moisés la

* 9:9 Deuteronomio 25.4

ntayóhã éxí tí jehe sín xíkaha janhan kjaxin, kjónté chaxín t'etuanna tí nkehe k'uętoan Dios méxra ntaxiteyá tí nkehe k'uętoan Cristo. ²² Tió tjen tí sín tí sín tienxínhya jına, ntá kjaxin janhan t'óna éxí tí jehe sín kixin xíkaha chrókjuacha jnkójín tí jehe sín chrókuitekaon sín. Méxra ntayóhã éxí kaín xín chojni xíkaha janhan kixin xíkaha chrókjuacha janhan kixin chrókuaá iso tí jehe sín. ²³ Mé xíkaha kaín tíha tjet'a kixin chrókuinhin sín tí tan chrókuaáxin sín la ko kjaxinna ąntsí má chrókjuaintayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsjtonhen nkehe. A ntá jahará xíkaha chrókuinkará kixin chrók'uayéhérá tí nkehe chrókjujtonhanrá. ²⁵ Tí sín tinkáko kichó sín na mé jına t'ayakonhen sín asén sín, títohe sín kaín xín nkehe chrókjuich'ehe sín dañó kixin tjinkaon sín chrókjuacha sín, chrók'uáyéhé sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xra kuente Inchéni kixin ntá ts'áyéhéni ijnko nkehe chónhya tsoxámá. ²⁶ A ntá janhan jehya éxí ijnko chojni t'ikonhya chrókuinka. Jehya éxí xrintó ó chrókjuánjonkian. ²⁷ Náhí. Janhan tjanjonkian tí cuerpo kuentana, tétuanhan kixin jına chrókjuinchexiteyána kixin tóxakonna kixin chrókjuásian ichrén jie ntá janhan chrókjuachahya kjónté senó kjuákghá itsjé chojni.

10

Tí nkehe t'ętoan ch'án kuente tí nkehe tsikjanoya

¹ Tjinkavan janhan kixin chrókónohará kichó ní kixin tí sín k'uaxrjenixinni ósé, kaín sín k'uixinkánki sín chrínki tí tjuj, la ko kaín sín k'uátóye sín Ntayaon Kjátse, ² la ko kaín sín k'uéchréhé sín ch'in Moisés éxí yóhé chrókuikite sín kixin jnkokoá k'uéjó sín tí tjen tí tjuj la ko tí ntayaon la ko kjuínchexiteyéhé sín ch'án kixin jehe ch'án k'uék'ętoan ch'án. ³ La ko kaín sín kjóne sín jnkokón nkehe kjuixín nkaya nkajní ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexin ijnko tjo kjuíncheyaoon Dios, na mé tí tjo a la mé t'axrjexin kixin Cristo tíha. ⁵ Kjánchó itsjé tí jehe sín kjuínchexehya sín Dios, méxra kónínkaon ch'án la tí nteje ó k'uénxin tí sín a.

⁶ Kainxín tíha kónhen kixin chrórxaxinkakonxinni jeheni, chróntáchrohya asénni chrókjuich'eni tí nkehe jínahya éxí kjuich'e tí jehe sín. ⁷ Méxra chrókuinkachónkihyará jahará nkehe tsikjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: "Kaín sín k'uéjótjajxin sín kjóne sín la ko ik'ui sín, ntá kjuixin la k'uínkatjen sín la ité sín".* ⁸ Méxra chrókjuasinkohyani jie chojni chjin ókjé éxí kjuich'e iso jehe sín ntá ik'uén sín, ventitres mil sín, jnkokoá yaon.† ⁹ Kjaxin chrókjuinchekóninkakonhyani Inchéni éxí kjuich'e sín ntá ik'uén sín kixin kjónehe sín konche,‡ ¹⁰ la ko chrók'uántaxínhyani Dios éxí k'uántaxínhin tí jehe sín ntá tí ángel kuente kjuach'én mé kui k'óyán sín.§

¹¹ Kaín tíha kónhen tí sín k'uaxrjenixinni ósé kixin chrókónoexinni la ko k'óna xroon chrónka xíkaha kixin nchexaxinkaoonni tí jeheni tjejóni jie kixin í séhya tsjixixín tsjeje chjasintajni. ¹² A ntá tí nkexro ntáchro kixin ntoá tjen na chrókóxakonhen kixin chrókjuichroehya. ¹³ Jahará naxá k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxáinkáonrá Dios kixin jehe ch'án chrókuítęehya ch'án tí jahará kixin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkjtsará ch'án kixin chrókjuachará chrók'uatsínkará tí nkehe chrókónhanrá.

¹⁴ Méxra tjuahará jahará kichó ní, la ntá ntáxrjan kixin chrókjuítęéhérá tí nkehe tsikjanoya. ¹⁵ Nixjahará jahará kixin jahará chojni ó tienxín. Méxra jahórá chrokJuenkayáxinrá kixin á jına tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjakoxinni tí ijnjé Cristo ó k'uítji. La ko tió tóchrít'óni tí niotja ineni, na mé kaín ni jnkokoá tjakoxinni tí cuerpo kuente Cristo. ¹⁷ Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuente Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xíkaha tjakoxin sín kixin xíkaha tinkáchónki sín. ¹⁹ Ntáxrjanhya kixin tí nkehe tsikjanoya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsikjanoya la ąntsí chóna kjuachaxin. ²⁰ Náhí. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jínahya la jehya Dios tjokehe sín tíha. Méxra janhan tjínkakonhya kixin xíkaha chrókjuich'erá jahará chrórxáinkáonrá tí nchakuen tí jínahya. ²¹ Tí its'ini tí nkehe xraxinkakonxinni ijnjé Inchéni ntá kjaxin tí chrók'uini tí nkehe xraxinkakonxin sín tí nchakuen tí jínahya la jehya jına tí xíkaha chrókjuich'eni chrók'uini. Tí sineni tí nkehe xraxinkakonxinni tí cuerpo kuente Inchéni ntá kjaxin tí chrókjóneni tí nkehe xraxinkakonxin sín tí nchakuen tí jínahya la jehya jına tí xíkaha chrókjuich'eni chrókjóneni tí nkehe. ²² ¿A jına

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

chrókuincheqóninkaonni Ìnchéni ní? *¿Á jeheni aqntsí chóntani kjuachaxin la ntá jehe ch'án la náhi ní?*

Chóntani kaín kjuachaxin kaín xín nkehe na kjónté aqntsí tjeotan tsotjuèhèni kíchó ní

²³ Síin kjuachaxin ichrén nkehe chrókuich'eni. Kjánchó jehya kixin kaín nkehe la jína. Síin kjuachaxin ichrén nkehe chrókuich'eni na kjánchó kénhya nkehe chrókuinkítsa chrókónoheni t' nkehe kuènte Dios. ²⁴ Chrókuéyáhyará t' nkehe chrók'uejóxinrá jína jahorá. Náhi. Kjaxin chrókuéyárá t' nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin t' xíkaha ntá ntoáhya chrókjuenkayáxinrá, ²⁶ kixin kuènte chjasintajni la kaín xín nkehe síin la kuènte Ìnchéni.

²⁷ *À* ntá jnkójín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchóxon chrókjónterá t' nkehe tjáhará sín la chrókóaxuanhyará chrókjuanchankíhyará ninkehó. ²⁸ Kjánchó t' chróntácho jnkójín sín kixin t' nto la ó tsíkjokehe sín ijnko nkehe tsíkjanoya, ichro sín, ntá t' xíkaha la chrókjóntehyará jahará, chrókóaxakonhanrá kixin ntoáhya chrókjuenkayáxin t' nkexro chrónka xíkaha. ²⁹ Méxra ntáxrjan tíhi kixin tjínkakonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóaxakonhanrá nkehe chrókjuenkayáxin ókjé chojni kixin t' kjuachaxin chontará. ³⁰ Tí tjáncháha Dios kjuasáya kixin t' nkehe inè, ¿ntá nkekuènte kixin chrókjontana chojni kixin kuènte kjonè? ³¹ Tí chrókjónterá nkehe la ko chrók'uirá nkehe la ko ichrén xra chrókuich'erá la chrókjuáqoxinrá kixin Dios kjuinkítsará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o t' chojni njnkoé Dios. ³³ Janhan mé tjéyá kixin kaín xín xra tjet'á chrókóxrjinhin kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11

¹ Chrókjuáqoxinrá jahará éxi kjuáqoxian janhan kixin janhan mé kjuáqoxian éxi kjuáqoxin Cristo.

Jína chrók'uejó t' chojni chjin tió tójnksé chojni

² Kíchóni, chàna kixin xráxin xráxincháonrá t' janhan la ko nchexiteyéherá t' nkehe kjuakohará. ³ *À* ntá tjínkavan kixin chrókiénxinrá kixin Cristo t'etuenhen jnkójnko chojni ntoa, la ko kjaxin xíkaha jnkójnko chojni ntoa mé t'etuenhen t' ichjién, la ko kjaxin xíkaha Dios mé t'etuenhen Cristo. ⁴ *À* ntá t' jnkójín chojni ntoa xrasixin kachjinke ch'án t' tjenixjehé ch'án Dios, o xrasixin ch'án kachjinke ch'án t' tjechronka ch'án iten Dios, mé xíkaha tjáqoxin ch'án kixin chóntehya ch'án kjuasáyé t' Ìnchéni t'etuenhen ch'án. ⁵ *À* ntá ijnko chojni chjin tjóchin kja tjan t' tjenixjehé tjan Dios la o tjóchin kja tjan t' tjechronka tjan iten Dios, mé xíkaha tjáqoxin tjan kixin chóntehya tjan kjuasáyé t' xii tjan. Mé tóyóhé éxi tsíkjin tjan xíkaha. ⁶ *À* ntá t' chojni chjin tjínkakonhya kixin chrók'uíáxin kja tjan nkehe mé chrókjin tjan. Kjánchó t' chrókósuèhé tjan chrókjin tjan, ntá chrók'uíáxin kja tjan tóte tió tójnksé. ⁷ Kixin t' chojni ntoa chrókjuasinhya ch'án kachjinke ch'án kixin jehe ch'án mé éxi retratóé Dios la ko t'inkaséyanxin ch'án t' kjuachaxin kuènte Dios. *À* ntá t' chojni chjin mé t'inkaséyanxin tjan t' kjuachaxin kuènte t' xii tjan. ⁸ Kixin t' chojni ntoa sqoxin k'óna mé k'uaxrjenixinhya ch'án chojni chjin. Náhi. Tí chojni chjin mé k'uaxrjenixin t' chojni ntoa. ⁹ Chaxin k'ónahya t' chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin t' chojni chjin ts'íáxin kja sín tóte chrókjuáqoxin sín kixin t'ituenhen sín kixin xíkaha ts'íkon t' sín ángel. ¹¹ Kjánchó kaín ní tinkáchónkini Cristo t'ichjánxin kixin t' chojni ntoa chrókuinkítsa t' chojni chjin la ko t' chojni chjin chrókuinkítsa t' chojni ntoa. ¹² Kixin chaxin t' chojni chjin na t' chojni ntoa k'uaxrjenixin. *À* ntá jie t' chojni chjin na mé t'axrjenixin t' chojni ntoa. *À* ntá kaín ní k'uaxrjenixinni Dios.

¹³ Jahará nkechrorá, ¿á ó nchóxon kixin ijnko chojni chjin tjóchin kja tjan chrónixjehé tjan Dios? ¹⁴ Jahorá chrókónohará kixin chrókósuèhé t' chojni ntoa chóna kaxihi kjinjin. ¹⁵ *À* ntá t' chojni chjin chóna kaxihi kjinjin la mé ntoá tíha kixin ó kuítuénxin tjan kixin tsochóna tjan kaxihi tjan kjinjin kixin tsotjóchinhya kja tjan. ¹⁶ *À* ntá t' tjan jnkójín nkexro titekakonhya tíha xíkaha ntá chrókónohará kixin jeheni la ko kaín xín t' sín njnkoé Dios la xíkachó kuènhenni.

Ntoáhya kjóne sín t' niotja xraxinkakonxin sín Ìnchéni

¹⁷ Méxra t' nkehe tjékjian la mé ijnko nkehe tóxrjinnahya tjejoch'erá. Tió tójnksérá ntiha la ijnko nkehe jína chrókuich'erá. *À* ntá náhi la ijnko nkehe jínahya tjejoch'erá. ¹⁸ Na mé sqoxin na mé ntácho sín kixin tió tójnksérá la jnkokoáhya tjenkayáxinrá. Ntáxrjan kixin ách'e chaxin xíkaha tjejorá. ¹⁹ ¿Xá t'ichjánxin kixin chrók'uaxrjentará kixin chrókónoexinni kixin nkexro chaxin tinkáchónki Ìnchéni la ko nkexro t' náhi? ²⁰ Méxra t' xíkaha jnkokoáhya

tjenkayáxinrá ntá tió tójkotsérá chrókjónterá niotja la chaxínhya xraxinkákoxínrá Ìnchéni tí xíkaha. ²¹ Kíxin tió sinterá la senó isorá tjejonterá tí nkehe tsíkjasánkoará, la isorá la kjónté naxá t'énxinrá kjinta, la í sorá la tsíkókoanrá. ²² ¿Á chontahyará nchia ntoará? Ntahó chrókjóntexínrá la ko chrók'uíxinrá nkehe. Mé xíkaha chontahyará kjuasáyé tí nínkoe Dios la ko nchesuehérá tí sín nóa chóntahya ninkehó. ¿Nkehe tsontáxrjan? ¿Á tsontáxrjan kíxin jína tjejoch'erá? Kjá náhi. Jehya jína tjejoch'erá.

Jína chrórxaxinkakoxínni Ìnchéni

(Mt. 26.26-29; Mr. 14.22-25; Lc. 22.14-20)

²³ Kíxin Ìnchéni mé chjína ch'án tí nkehe kjuákoará: kíxin tí tie tsíkóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'ó ch'án tí niotja ntá ntáchro ch'án kíxin: "Tíhi mé ntona xránjon its'en kíxin jína ts'ejóxin tí jahará. Méxra xíkaha sích'erá kíxin tsoxraxinkákoxínrá tí janhan", ichro ch'án. ²⁵ La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: "Tíhi mé tjákoxin kíxin chaxín tsoxiteya ijnko nkehe njixin kuente Dios kíxin ts'ítji njína. Tió its'irá tíhi mé tsoxraxinkákoxínrá tí janhan", mé chro ch'án. ²⁶ Kíxin tí interá tí niotja la it'irá tí inté to uva mé xíkaha tjejotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóne ní niotja kuente Ìnchéni

²⁷ A ntá jnkojín nkexro chjini chrókjóne sín tí niotja la ko chrók'ui sín tí inté to uva xraxinkakoxínni Ìnchéni, mé xíkaha chrókjuasin sín jie chrókjuikosáyehya sín tí cuerpo la ko tí ijnjé Ìnchéni. ²⁸ Méxra jnkojnkoní chrókjuenkayáximni senó kíxin á chóntahyani jie na ntá chrókjóne ní niotja la ko chrók'uini tí inté to uva. ²⁹ A ntá tí xíkaha chjini chrókjóne ní la ko chjini chrók'uini la chaxínhya chrórxaxinkakoxínni tí cuerpo kuente Ìnchéni la mé tí xíkaha chrókjuich'eni la chrókjuasótexiní tíhi. ³⁰ Mé xíkaha itsjérá níhará la ko itsjérá tsánkayhará la ko jnkojínrá k'uénrá. ³¹ A ntá tí chrókjuatsóanni nkexrí tjen asénni jeheni ntá Ìnchéni t'ichjánxienhya chrókjuinчекjasóteni ch'án. ³² A ntá kjónté chrókjuinчекjasóteni Ìnchéni ntá chrók'uitjani chrókjuinчекxiteyéhéni ch'án, ntá chrókjuasótehyani éxi tsjasóte tí í so chojni chjasintajni.

³³ Méxra kichó ní, tió tójkotsérá sinterá la chróchonhénrá chrókui tí í so sín ntá chrókjóntekoará sín jnkojá. ³⁴ A ntá tí nkexro ik'uén kjinta la íchá jína senó chrókjónexín nkehe nteó ó kíxin ntá chrókjuinчекjasótehyará Dios kíxin xíkaha ntoáhya tójkotsérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kíxin tsoonohará jína kíxin nkexrí siín tí kjuachaxin tjanjon Nchakuen Dios t'áyéhe jnkojnko chojni.

² Jahará ó nohará jína kíxin tió naxá kuinkachónkehyará Ìnchéni na mé kuinkachréhérá tí nkehe tsíkjangya níxjahya. ³ Méxra chrókónohará kíxin níjnko nkexro níxjaxin kjuachaxin Nchakuen Dios tsjacha ts'ántaxínhin Jesús, la ko níjnko nkexro tsjacha tsontáchro sín kíxin Jesús mé Ìnché sín tí níxjaxínhya sín tí kjuachaxin Nchakuen Dios.

⁴ A ntá nchónhya xra kuente kjuachaxin Nchakuen Dios siín la kjánchó jnkokoá Nchakuen Dios mé tjetjanjon. ⁵ La ko siín nchónhya nkexrí sích'eheni xra Ìnchéni, kjánchó Ìnchéni la ójnkó nkexro tíhi. ⁶ La ko nchónhya nkehe t'axrxjén tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exínni xra kaín ní. ⁷ Jnkojnko chojni mé kuitqñhen kíxin chrókjuákoxin kjuachaxin kuente Nchakuen Dios kíxin xíkaha chrókjuinkítsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jína kíxin tjinkítsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuente Dios noehya tí í so sín kíxin Nchakuen Dios mé tjinkítsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kíxin Nchakuen Dios mé tjinkítsa. La ko í so chojni mé ts'áyéhe kjuachaxin sinčekitohe chojni jína. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kíxin Dios sinchenohe sín ijnko nkehe tsochenka sín tí í so kichó ní, la ko í so chojni mé ts'áyéhe kjuachaxin tsjatsóanxín á kjuachaxin kuente Nchakuen Dios ó á kjuachaxin kuente ijnko nchakuen jínahya chronkaxin ijnko chojni, la ko í so chojni mé ts'áyéhe kjuachaxin kíxin ijnko nkíva ókjé naxá k'uitjahya sín tsonixjaxin sín ijnko nkehe kuente Dios, la ko í so chojni mé ts'áyéhe kjuachaxin tsochronkaxin nkexrí t'axrxjén tí nkehe ókjé nkíva tsichronka tí í jnko chojni. ¹¹ Kjánchó kaín tíhi jnkokoá Nchakuen Dios mé tjinkítsa, na mé k'uáyéhe

jnkojnko chojni jnkojnko kjuachaxin éxi tjinkaon tí Nchakuen Dios nkerí xra chrókjuich'e sín.

Káinni k'ónani jnkokoá cuerpo kuènte Cristo

¹² Cristo la éxi yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Inchéni Cristo la ójnkó tí jehe ch'án. ¹³ Káinni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ituenhya, káin ni na mé jnkokoáxón Nchakuen Dios kuikitejinni, na káin ni k'ónani jnkokoá cuerpo kuènte Cristo, na mé éxi jnkokoá nkehe ik'uúni káin ni na mé k'uúyéheni tí jnkokoá Nchakuen Dios.

¹⁴ Kíxin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo. ¹⁵ Tí chróntáchro tí toteni kíxin: "Jehya itja tí jeheni na mé jehya jeheni kuènte tí cuerpo", na mé chaxínhya tíha kíxin ó jehe cuerpo kuènte. ¹⁶ Kjaxin tí chróntáchro ijnko ntatsjoni kíxin: "Jehya ikon tí jeheni na mé jehya jeheni kuènte tí cuerpo a", na mé chaxínhya tíha kíxin ó jehe cuerpo kuènte. ¹⁷ Tí chaxín kuènté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuènté cuerpo kuènteni chrók'óna ntatsjoni, ¿ntá nkexrí chrók'ónaxaxéheni? ¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kíxin jehe ch'án nkexrí tjinkaon ch'án kóxrjínjin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kíxin: "T'ichjánxjenhyani tí jaha", la ko kjaxin tí kjani xitjahya tsontáche tí toteni kíxin: "T'ichjánxjinnahya tí jaha." ²² Náhi. Tí nkehe kuènte tí cuerpo tónhenni kíxin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kíxin tsonoxínhya. ²⁴ A ntá tí nkehe náxrjón na mé t'ichjánxjenhya ka ts'ítsá. Mé xikaha Dios kjuíncheyóxin káin tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kíxin ninkehó xitjahya chróxiakayehe tí cuerpo kíxin káin tí nkehe la jnkokón tjinkítsa kichó. ²⁶ Tíó tsikóníhi ijnko parte kuènte tí cuerpo la káin tí í so parte la kjaxin tjeté; la ko tíó tjikosáyehe sín ijnko parte la kuènté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxra Dios kjuéyá ch'án chojni sich'ehe ch'án xra kuènte njnko, na mé saoxin kjuéyá ch'án tí sín apóstol; la ko yóxin kjuéyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjuéyá Dios iso chojni chjéhe ch'án kjuachaxin tsjako sín itén ch'án, la ko kjaxin kjuéyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjuéyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjuéyá ch'án í so kjojni chjéhe ch'án kjuachaxin antsí tjinkítsa kichó, la ko kjaxin kjuéyá ch'án í so chojni chjéhe ch'án kjuachaxin ts'etóan xra kuènte ch'án, la ko kjaxin kjuéyá ch'án í so chojni chjéhe ch'án kjuachaxin tsonixjaxin sín í jnko nkíva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, ³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkíva ókjé, la ko kénhya chojni chóna kjuachaxin tsochronaxin sín nkexrí t'axrjéxin tí nkehe chrónka tí sín nixjaxin ijnko nkíva ókjé. Chaxín kjá náhi. ³¹ Méxra tjéyará tí kjuachaxin antsí jína chrójtáhará Dios. Ntá jie tsjákohará ijnko ntía antsí jína chrók'uejorá.

13

Chrótjuèheni kichó ni

¹ Tí chrónixja nkívee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyona chica tsjánga ó la ko éxi ijnko chica platillo nchevékjan sín ó, kíxin ninkehó són chónahya. ² La ko tí chrónixja itén Dios, la ko tí chrókianxian káin nkehe kuènte Dios naxa noehya chojni, la ko tí chrókónona káin nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakítonghan tí sín nóa káin nkehe chonta, la ko tí chrókjuánjuan kjuachaxin kíxin chróchena kuènténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjínnoxienhyani, la ko sinchehnkehyaní, la ko tsohnkehyaní, ⁵ la ko ch'ehyaní ninkehó nkehe náxrjónhya, la ko tjejáhyani nkehe kuènteni ó, la ko

tsónínkakonhyani tjoka, la ko tsochóntahyani kjuanínkaon isé, ⁶ la ko kjaxin tsochènyani tió í jnko chojni tjasin jie. Náhí. Chróóchéheni tió ijnko nkehe jina sitónhen. ⁷ Tí tjuèheni kichó ni la kjónté kaín nkehe chrókuasótéxínni la chrókuitekaonni kixin jina sín la ko naxa chrok'uejóchónhenni chrókónínkakonhyani.

⁸ Tí tjuèheni kichó ni la jnkochrín tsjak'e ts'itjáyannya. A ntá itsi ijnko yaon í t'ichjánxínhya tsochrónka chojni itén Dios, la ko tsokohya kjuachaxin tsonixjaxín chojni ókjé nkíva, la ko tsokohya kjuachaxin tsonohe chojni má. ⁹ Naxa t'itjáyán tí nkehe chrókónoheni la ko naxa t'itjáyán tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyán.

¹¹ Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kujtohá tí nkehe kuénte chánjan. ¹² Méxra éxí ijnko xrosentá t'ikónxínhyani jina jie, ntá tsi ijnko yaon chr'éxín ntá ts'ikónxínni jina kaín nkehe. Ijie naxa t'itjáyán tí nkehe chrókónóna; ntá tsi ijnko yaon tsonóna jina kaín xín nkehe éxí xíkaha kjaxin Dios chóxin ch'an tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síin, la kjánchó antsí má t'ichjánxín tsotjuèheni kichó ni.

14

Tí nixjaxín chojni ókjé nkíva

¹ Chrókóxakonhanrá kixin chrótjuéhérá kichuárá la ko kjaxin chrókuéyará kixin Nchakuen Dios chrótjáhará kjuachaxin. Kjánchó antsí chrótjínkáonrá tí kjuachaxin tsochronkará ijnko nkehe kuénte Dios. ² Méxra, tí nkexro nixjaxín ijnko nkíva ókjé mé nixjehé sín Dios ó la ntá chojni la náhi, kixin kohya ninkexró tiénxín tí nkehe nixja sín la mé nchakuen sín ó mé chronkaxín sín ijnko nkehe kuénte Dios noehya tí í so sín. ³ A ntá tí nkexro chronkaxín ijnko nkíva tiénxín tí í so sín ijnko nkehe kuénte Dios mé nixjehé chojni ntá xíkaha tjínkítsa tí í so sín kixin antsí chrók'uitja sín nkehe kuénte Dios la ko chrókóchéhe sín. ⁴ A ntá tí nkexro nixjaxín ijnko nkíva ókjé la mé tjínkítsa jehó ch'an antsí tsonohe tí kjuachaxin kuénte Dios. A ntá tí nkexro chronkaxín ijnko nkehe kjuínchenohe Dios mé tsjínkítsa tí sín kuénte njnko kixin antsí chrók'uitja sín nkehe kuénte Dios.

⁵ Tjínkaván kixin kaín rá chróchontará kjuachaxin chrónixjaxínrá ijnko nkíva ókjé. Kjánchó antsí tjeotan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjeotan chrónixjaxínrá ókjé nkíva tí noahyará tsochronkaxínrá nkexrí t'axrxjén tí nkehe chróchronkará kixin chrókuínhin kaín tí sín tinkáchónki Inchéni kixin antsí chrók'uitja sín nkehe kuénte Dios. ⁶ A ntá kichó ni, tí chrókjuasántsjahará chrónixjáaxínrá ijnko nkíva ókjé la ó chónkó tíha. Íchá jina chrónixjáaxínrá ijnko nkíva tiénxínrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuénte Dios naxa noahyará, la chróxrjankaxián ijnko nkehe tjínkaon Dios chrókónohará, la chrókjuákoáxínrá ókjé nkehe njxin.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsoanni nkehe tí ntáchro tí són a. ⁸ La ko éxi yóhe tí síin guerra, tjanjónko kichó sín, la ntá ntoáhya chrók'uañoa sín tí chica trompeta, ntá kohya nkexro chrókóyaxínhin sín sáchrókjuikjanjónko kichó sín. ⁹ Kjaxin xíkaha tí jahará tí nixjahyará ijnko tan tiénxín sín, ¿ntá nkexrí chrókónohe sín nkehe tí ntáchrór? Mé xíkaha tjejonixjará éxí chjéhe xrjntó ó. ¹⁰ Chaxín síin itsjé nkíva chjasintajni la ko kaín nkíva la síin chojni tiénxín sín. ¹¹ Kjánchó tí chrókianxínhya janhan tí nkehe tsonotáchro ijnko nkexro, ntá tí nkexro a ts'ikon tí janhan éxí ijnko nkexro tsíkjixín ókjé la ko kjaxin janhan ts'íkuan tí jehé ch'an éxí ijnko nkexro tsíkjixín ókjé. ¹² Méxra jahará imá tjínkáonrá chrók'uayéhérá ijnko xra kuénte Nchakuen Dios, ntá chrókójína chrókjuéyará tí xra chrókjuinkítsa tí í so sín kuénte njnko kixin antsí chrók'uitja sín ijnko nkehe kuénte Dios.

¹³ Méxra tí nkexro nixjaxín ijnko nkíva ókjé la chrókjuanchehe Dios kixin chrókjuinkítsa chróchronkaxín ch'an nkexrí t'axrxjén tí tan a. ¹⁴ Kixin tí tsonixjaxián Dios ijnko nkíva ókjé, ntá tí nchakuenná ó mé tjenixjehé Dios, la ntá tí kjuaxrexínkaon kuéntana la ókjé tjen. ¹⁵ A ntá tí xíkaha, ¿nkehe chrókjuít'a? Íchá jina chrónixjaxián Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kixin tí tsochjéxínrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kiénxínhya sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókjuanchehérá Dios kjuasáya la ntá chrókienxínhya tí sín tjejótinhin, ntá chrokjuinkítsahya kixin chrók'uitja sín nkehe kuénte Dios. ¹⁸ Tjáncháha Dios kjuasáya kixin antsí chonta janhan kjuachaxin tsonixjaxián ókjé nkíva, la ntá jahará la kánhyó nixjará xíkaha. ¹⁹ Kjánchó tió tójnkotsé chojni kichó ni la mé ntáxrjan kixin antsí tjínkaván chrónixja janhan kjónté in'ó palabra ó tiénxín sín kixin xíkaha chrókjuákuaxian

sín, la ntá kánhyó chrókójína kjónté ite mil palabra chrónixjaxian ijnko nkíva ókjé tienxínhya chojni.

²⁰ Kíchéni, chrókjuenkayáxinhyará éxi chánjan. Kjánchó chrók'uejorá éxi chánjan naxa noehya nkehe jínahya. A ntá chrókjuenkayáxinrá éxi chojni nteto. ²¹ Tí xroon tsíkjin sín ósé nkexrí k'uetqan Dios mé ntáchro kíxin: "Janhan tsonixjaxian ókjé nkíva la ko itén chojni ókjé kíxin tsinhin tí nacióon Israel na kjónté tsitekakonhya sín, xíkaha ichro Ìnchéni."* ²² A ntá tí kjuachaxin tsonixjaxin chojni ókjé nkíva mé xránjon kíxin chrókjuakoxin chojni chrókuinhin tí sín tinkáchónkihya Ìnchéni, jehya kíxin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxin chrókjuakoxin chojni chrókuinhin tí sín tinkáchónki Ìnchéni, jehya kíxin chrókuinhin tí sín tinkáchónkihya Ìnchéni. ²³ A ntá tío tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkíva, ntá tí chrók'ui xenhen nchia ijnko chojni naxa kuénhya sín xíkaha, o chrók'ui xenhen nchia ijnko chojni naxa tinkáchónkihya Ìnchéni ntá chrókuinhin sín xíkaha la kjá tsontáchro sín kíxin ó k'uixikjánrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'ui xenhen nchia ijnko nkexro tinkáchónkihya Ìnchéni, o chrók'ui xenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jie chónta sín ntá chrókuítqhe sín kaín jie chónta sín. ²⁵ Ntá tsonoxin tí nkehe mó tjenkayáxin sín nkaya asén sín ntá ts'ejóxin tocht'in sín tsoxraxinkaon sín Dios la ko tsontáchro sín kíxin chaxín tjejókoará Dios.

Ntoá chrókjuich'eni kaín xín nkehe tío tójnkotséni

²⁶ A ntá kíchó ní, ¿nkehe chrókónhen? Tíó tójnkotsérá na mé isorá chrótsjerá salmo, la ko isorá chrókjuakorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkíva ókjé, la ko isorá chróchronkaxinrá nkexrí t'axrxjén tí nkehe nixjaxin tí í so sín ókjé nkíva. Kjánchó kaín tíha tsonhen kíxin tí sín kuénte njnko chrók'uitja sín nkehe kuénte Dios. ²⁷ A ntá tí chrónixjaxin sín ijnko nkíva ókjé na mé yaá o iy'á chojni chrónixja sín la ko chrók'ui xinkí chojni tsonixja, la ko t'ichjánxin kíxin jnkojin nkexro nohe tsochronkaxin nkexrí t'axrxjén tí nkehe nixja sín. ²⁸ A ntá tí kohya ninxexro tí njnko ntaha tsjacha tsochronkaxin nkexrí t'axrxjén tí nkehe chrónixja sín, ntá chrónixjaxinhyá sín ókjé nkíva tí tjejótójnkotsé sín, na mé chrónixjehé sín asén sín ó la ko chrónixjehé sín Dios ó. ²⁹ Tjánjonrá kjuachaxin kíxin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinin mé chrókjuenkayáxin sín á ó nchoxón tí nkehe kuínhin sín. ³⁰ A ntá tí xrinahya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro jenó kjuankíxin chrónka nkehe la chróchónhen ch'án chrónixjahya ch'án. ³¹ Ó nchoxon jnkojnkorá chróchronkará nkehe tjáhará Dios kíxin xíkaha kaín rá chrók'uitjará la ko chrókócháhará. ³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxin í jnko nkexro. ³³ Kíxin Dios tjanjon tí kjuaxróxin, a ntá tjnkakonhya ch'án kíxin yóxinhya chrók'uejóni.

Tíó tójnkotsé chojni kíchó ní tinkáchónki Ìnchéni ³⁴ chrónixjahya tí chojni chjin jnkosiné servició. Kohya kjuachaxin xíkaha, na mé chrókjuinchexiteyéhe sín tí sín ntoa éxi t'etqan tí ley kuénte Dios. ³⁵ Tí tjnkaon sín tsonohe sín nkehe na mé chrókjuanchankíhi sín xii sín tío tjiji sín ntqe sín. Náxrxónhya chrónixja ijnko chojni chjin nkehe jnkosiné servició.

³⁶ Chrókónohará kíxin tí itén Dios xrankíxixínhya tí tjejorá la ko jehya jahórá k'uayéherá tíha. ³⁷ A ntá tí tjen jnkojin nkexro tjenkayáxin kíxin nixja itén Dios o tjenkayáxin kíxin tí Nchakuen Dios tjnkítsa tí jehe ch'án ntá chrókónohe ch'án kíxin tí nkehe tjékjian mé ijnko nkehe tsík'etqan Ìnchéni. ³⁸ A ntá tí nkexro titekakonhya tíhi na ntá jahará chrókuitekakuénhyará ch'án kjaxin.

³⁹ Méxra kíchó ní, chrókjuéyará kíxin chrók'uayéherá kjuachaxin chróchronkará nkehe kjuínchenohará Dios la ko chrókuiqtqherá tsonixjaxin chojni ókjé nkíva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kíchó ní, tjnkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí tjejóyará tí nkehe kjuákohará; tí la náhi la chónkó kuinkachónkirá tí nkehe kjuákuu.

³ Saóxín, kjuákohará tí nkehe k'uayáha kíxin Cristo k'uenyákonhen ijyéni, na mé xíkaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón

* 14:21 Isaias 28.11-12

ch'án tí nínin yaon éxí ntáchro tí xroon itén Dios. ⁵ Ntá k'uikon ch'in Pedro tí jehe ch'án, ntá chr'éxin inaá tí teyó sín k'uék'ajiko ch'án k'uikon sín tí jehe ch'án. ⁶ A ntá chr'éxin chjina quinientos chojni kíchó ni jnkokoá k'uéjó sín k'uikon sín ch'án. A ntá jie itjsé tí sín a naxa tjejó sín, a ntá jnkójín sín na ó tsík'en sín. ⁷ Chr'éxin k'uikon ch'in Jacobo tí jehe ch'án, la ko k'uikon kaín tí í so sín apóstol inaá.

⁸ A ntá kjuixín janhan k'uikuán Ìnchéni éxí ijnko xjan naxa xetjahya yaon chrókokjhi. ⁹ Kjánchó janhan kánhyó tjeotan la mé tóyóghya tí í so sín tsíkjeýá Ìnchéni la ko tósuána chrók'óna ijnko nkexro ch'ehe xra Ìnchéni kíxin janhan mé k'uénínkakonhan tí sín núnkpe Dios. ¹⁰ Kjonté jínahya kjuít'a la kjuasáyé Dios la ko kjuachaxin kuente ch'án mé kjuítóxinhin tí kjuenkayáxian, na mé chónkóhya kujkonóna ch'án, kíxin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kíxin xíkaha tí itan kjuakoni, a ntá kuítekaónrá.

Tsoxechón tí sín tsík'en

¹² A ntá tí tjakoni kíxin Cristo la xechón, zntá nkekuente ntáchrórá jnkójínrá kíxin tsoxechónhya chojni tsík'en? ¹³ Tí chrókóchaxín tí nkehe ntáchrórá kíxin tsoxechónhya chojni tsík'en, ntá kjáxin chrókóchónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekaónrá. ¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuénté Dios, kíxin ó chrónkani kíxin Dios kjuínchexechón Cristo. A ntá tí chrókóchaxínhya kíxin chrókóchón Cristo, ntá kjáxin chrókóchaxínhya kíxin chrókóchón chojni tsík'en ¹⁶ kíxin tí chrókóchónhya tí chojni tsík'en, ntá kjáxin Cristo chrókóchónhya ch'án. ¹⁷ A ntá tí Cristo chrókóchónhya ch'án ntá chrókóchónkó tí kuítekaónrá tí jehe ch'án kíxin naxa chrókjuínhya tí ijjárá. ¹⁸ La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókúinkáchónkini Cristo kíxin chrókjuínkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónóéni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna saoxín kíxin jehe ch'án saoxín xechón ch'án. ²¹ Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjáxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kíxin tí jie kjuasin ch'in Adán ntá kaín xín chojni sí'tenxín sín. A ntá Cristo la kaín ni tsochóntaxínni kjuachón. ²³ Jnkójínkoni éxí tsoqhenni tocar, na mé saoxín xechón Cristo, a ntá chr'éxin tío tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsí yaon tsjixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kíxin ts'áyéhe It'é ch'án Dios. ²⁵ Na mé t'ichjánxín ts'etóan Cristo tsjixrakája tí yaon tsjachahya tí sín nínkakonhen ch'án. ²⁶ A ntá tí nkehe tsjixín ts'itjáyán la mé tí kjuach'é. ²⁷ A ntá Dios kjuanjón kjuachaxin kíxin kaín nkehe síin mé chrók'uetuennen Cristo.* Kjánchó tío xíkaha ntáchro tí xroon itén Dios tsíkjin sín ósé kíxin kaín xín nkehe mé ts'etuennen ch'án, ntá ó noheni jina kíxin jehya kíxin Dios la chrók'útuennen ch'án inaá. Náhí. Jehe ch'án mé chjéhe Xjeen ch'án kaín kjuachaxin ts'etuennen ch'án kaín xín nkehe. ²⁸ A ntá tío tsjixin tsjacha Cristo ts'etuennen ch'án kaín xín nkehe, ntá Cristo, mé tí Xjeen Dios, la kjáxin sinchexiteyéhe ch'án It'é ch'án Dios kíxin ntá Dios mé ts'etuennen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuente xíkaha ch'e sín tí titekakonhya sín kíxin tí sín tsík'en tsoxechón sín inaá?

³⁰ A ntá tí xíkaha, ¿nkekuente kíxin kaín yaon kjuaxróxinhya tjejóni nínkakonhenni chojni? ³¹ A ntá kíchó ni, kaín yaon síin kjuachrakon chrók'uén janhan. Chaxín tíhi, kjánchó chàna kíxin jahará kjáxinrá tinkachónkirá Ìnchéni Jesucristo. ³² Kjonté kónínkakonna chojni chjasin Éfeso éxí iko jiehe la kjonté kjuak'é tíha, ¿la ntá nkehe chrókjuacha tí janhan tí chrókóchaxínhya chrókóchón chojni tsík'en? Tí xíkaha la ó nchóxon tí nkehe ntáchro tí sín titekakonhya Ìnchéni kíxin chrókóne sín la ko chrók'ui sín kíxin jie la o ntóye chrók'uen sín.

³³ Chrókjuítóéhyará chrokjuít'áyahará sín. Éxí ntáchro sín kíxin: "Tí chrók'uejókotoxínni chojni jínahya ntá chrók'uitjáyán tí nkehe jina tjenkayáxinni." ³⁴ Chrókjanrá ntja jina ntoá la chrókjuásinhýará jie. Méxra isorá naxa chonhyará Dios. Na mé ntáxjan tíhi kíxin chrók'úsuhará.

Nkexrí tsoxechón tí sín tsík'en

³⁵ Kjá jnkójínrá tsjanchankínará kíxin: "¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?" ³⁶ Lontírá tjanchankínará xíkaha. Tí noatje t'enkanı nonte t'ichjánxín its'en ts'itjáyán kíxin tsjak'echón tí nkehe ts'ayan. ³⁷ Tí nkehe t'enkanı

* 15:27 Salmo 8.6

la jehya tí ka a. Náhi. Tí nkehe t'enkáni la noatrigo o í jnko tje. ³⁸ Kjánchó Dios kjuanjon kjuachaxin kixin jnkojnko nta ts'óna éxi tjinkaon ch'án, la ko jnkojnko nta tsochónta tje kuènte. ³⁹ A ntá jehya kaín tí cuerpo la jnkokon. Náhi. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxhe, la ko í jnko la cuerpo kuènte koche. ⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsojte, a ntá tí nkehe tsoxechón la mé ijnko nkehe ts'itjáyanhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxi ntáchro tí xroon itén Dios kixin: "Tí chojni ntoa k'óna saoxín mé ch'in Adán tíha mé k'uáyéhe ch'án kjuachón ó."† A ntá tí ó kjuixixin ikui í jnko ch'in éxi yóhe Adán, kjánchó jehhe ch'án mé chónta ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chónta kjuachaxin kuènte Nchakuen Dios. Náhi. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chónta kjuachaxin kuènte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhe tí cuerpo k'uéchénta tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chónta tí nkexro kuixín nkaya nkajní. ⁴⁹ Éxi senó tóyóhēni tí nkexro k'óna nche, ntá xikaha chr'éxin tsoyóhēni tí nkexro kuixín nkaya nkajní.

⁵⁰ Ntá tsojtjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejehya. ⁵¹ A ntá tsojtjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xríñahya titàya tjejóni ntá éxi chróchr'áton konni la ko chrókuakitjenkini konni xikaha tió tsjixixin tsinhinni tsochtáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxi nixja tí xroon itén Dios ntáchro kixin: "Tsjachahya tí kjuach'én la mé tsjacha tí kjuachón."‡ ⁵⁵ "Jaha kjuach'én, ¿kjá tí kjuachaxin kuènta kixin chrókuajaha jaha? Jaha kjuach'én, ¿kjá tí kjuachaxin kuènta kixin chrók'oyánni?"§ ⁵⁶ Tí jie tjasinni mé kuixín tí ts'enni. A ntá tí ley k'uetoan ósé antsí k'uixixin jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókujtóehyará tinkachónkirá Ìnchéni. Jnkochríxin chrókujich'ehérá Ìnchéni xra antsí jina kixin ó nohará jahará kixin tí xra ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínktsará tí sín kichó ni tinkáchónki Ìnchéni na mé chrókujich'erá éxi kuétuanhan tí sín njnko estado Galacia. ² Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjujich'erá xra kixin t'ichjánxinhya chrókjuasánjia janhan ntá chrókjuénájínrá chichaon. ³ A ntá tió tsjasán janhan tsétuanhan tí sín tsjeyará kixin sátsji sín chjasin Jerusalén, na ntá tsokjian xroon tsjikoixin sín tí chichaon tsjénájínrá tsjikaán tí sín kichó ni ntiha. ⁴ A ntá tí chrókójina kjaxin janhan sáchrókjuiyá, a ntá sáchrókjuíkian tí jehhe sín kjaxin.

Tjenkayáxin ch'in Pablo nkexrí sátsji ch'án

⁵ Tí sátsjia la t'ichjánxin ts'atsinka janhan estado Macedonia ntá chr'éxin tsjasán ntiha chjasin Corinto. ⁶ Ach'e ntaoh chrókuitgna chrók'uatstínkajia nchakuen kin. A ntá jahará

chrókuínkĩtsará tí janhan tió sátsjia ókjé chr'éxin. ⁷ Méxrā tĩnkākonhya chrók'uatšínkoá chrótsjahará ó. Náhí. Tĩnkāvan chrókuitona iso yaon tí tjeorá ntiha tí Ìnchéni chrókuanjon kjuachaxin. ⁸ Kjánchó tsitona chjasin Éfeso tsjixrakájia yaon Pentecostés, ⁹ kixin ntihi ántsi chonta kjuachaxin chrókjuít'a xrā kuente Ìnchéni la ko jina chrókónhen tí xrā kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la ántsi jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjāxin ch'ehe Ìnchéni xrā éxi janhan. ¹¹ Kaín tí jahará chróchonteherá ch'án kjuasáya. Tĩnkĩtsará ch'án kixin jina itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóahā ch'án kixin kjāxin chrókjuijiko ch'án tí í so kichó ni, kjánchó tĩnkakonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitóehyará tí tinkachónkirá Ìnchéni. ¹⁴ Kaín nkehe chrókjuich'erá la koí chrótuèhérá kichuárá.

¹⁵ Na ntá kichó ni, ó nohará kixin tí sín kjéhya ch'ín Estéfanás saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xrā a tĩnkĩtsa sín tí sín kichó ni tinkáchónki Ìnchéni. ¹⁶ Tĩnkāvan kixin chrókjuínchexiteyéhérá tí sín tĩnkĩtsa éxi tí jehe sín la ko kaín tí sín ch'e xrā. ¹⁷ Chāna kixin ó kui ch'ín Estéfanás la ko ch'ín Fortunato la ko ch'ín Acaico, kixin jahará kjónté tjeohyará. ¹⁸ A ntá jehe sín kjuínchechéhe sín asenná éxi kjuínchecháhará sín. Chróchonteherá kjuasáyé chojni xikaha.

¹⁹ Tí sín tójnoktsé estado Asia xraxinkaon sín tí jahará. Kjāxin ch'ín Aquila la ko tjan Priscila la ko tí sín tójnoktsé ntóje sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkojina.

²¹ Janhan Pablo xráxināvan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí ninko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninkoe Dios chjasin Corinto la ko kaín tí í so kichó ni tinkáchónki Ìnchéni tjejorá nkuixín estado Acaya. ² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehé It'eni mé tikonógheni ch'án la ko xráxin nchechéheni ch'án. ⁴ Jehé ch'án mé nchechéhé ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxi yóhé jehé ch'án kjuínchechéhé ch'án tí jeheni. ⁵ Mé xikaha tjejótjasóteni éxi yóhé kjuasóte Cristo ntá kjaxin jehé ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókócháxinrá la ko chrókuaáxinrá. A ntá Dios nchechéhé tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxi tjasóteni jeheni. ⁷ Na mé ó noheni kixin chaxín ntoá tinkáchónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhé Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuaachahyani, la k'uitjáyehenni tí tjenkayáxinni kixin chrók'uaxrjexínni ntiha naxá chrók'uejóchónni. ⁹ Ó kónoheni kixin chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókjuaachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en. ¹⁰ Jehé Dios mé kjuínchekaáni ch'án la ko naxá sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehé ch'án sinchekaáni ch'án ¹¹ tí tjínkítsaráni tjanchehéra Dios kixin tsjinkítsani ch'án. A ntá tí tsjé chojni chrókjuaanchehe Dios kixin tsjinkítsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehé ch'án kjuínkítsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé xikaha k'uejókoaráni. Ntá jehya kjuachaxin kuènteni kjuachaxínni xikaha. Náhí. Kjuachaxin kuènte Dios mé kjuínkítsani kixin xikaha k'uejóni. ¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuejínchekuáxinrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsócháhará kixin xikaha kjuakoharáni jeheni la ko kjaxin tsóchéheni kixin jahará kuítekaónrá.

¹⁵ Mé xikaha kjuenkayáxian kixin saoxín chrókjuasántsajahará tí jahará kixin chrókócháhará kixin yáya chrókjuasántsajahará. ¹⁶ Kjuenkayáxian janhan chrókjuasántsajahará saoxín tió sáchrókjuia estado Macedonia la ko chrókjuasántsajahará inaá tió chrókjanxian ntiha. Mé xikaha chrókjuejínkítsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xikaha kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuákoxian janhan tí k'uejóni ntiha, mé xikaha k'uechéronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. ²⁰ Kixin kaín nkehe tsichronka Dios la mé jehé Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni "Amén, ó nchoxon" kixin tí kjuachaxin kuènte Cristo Jesús. ²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehé ch'án mé kjueyáni ch'án. ²² Kjaxin jehé ch'án tsikjinchekani ch'án xroye, na mé kjuanjon ch'án Nchakun ch'án tsochónta asémmi senó kixin tsoñoxínni kixin chaxin ts'áyéheni nkehe chr'éxin.

²³ A ntá tí naxá kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkajonhya kixin chrókóxakonhanrá tí chrókjueñtuáhárá tí jahará inaá. ²⁴ Jehya kixin chrókuéñtuánhárá kixin nkexrí chrókuinkáchónkirá Ìnchéni kixin ó nõna kixin ntoá tinkáchónkirá ch'án. Ó jehí tjinkaonni chrókjuejínkítsaráni kixin antsi má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha inaá tí naça xrásinrá kjuanínkaon. ² A ntá tí naça chrókjuintak'ávára, ¿a ntá nkexro chrókjuinchehána inaá tí chrókjuinchehányará jahará kixin janhan kjuintak'ávára? ³ Mé xikaha ikjian tí xroon chr'anhánrá senó kixin tjñkakonhya chrókjuasán chrókjuinchekóxakonnará inaá. Náhi. Jahará chrókjuinchehányará. Méxra ó nóna kixin tí chrókóhána janhan ntá chrókóhányará káin rá. ⁴ Kjánchó tió ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuintak'ávára. Náhi. Ikjian tí xroon chr'anhánrá kixin chrókónoaxinrá kixin imá tjuahará tí jahará.

Ch'in Pablo chrókjuinchek'itjányenhen ch'an tí jie kjuasin tí nkexro a

⁵ A ntá tí nkexro kjuinhexakonna la jehya janhvån kóxakonna. Náhi. Káinrá kóxakonhanrá. Kjánchó tjñkakonhya tjetóxin tsontáxrjan tíha. ⁶ Na mé itsjé tí jahará nixjehérá ch'an kóyakoterá ch'an kixin chrókjuasinhya ch'an jie xikaha la táhó la ó tjen. ⁷ Ntá jie chrók'uitjányanhanrá tí jie kjuasin ch'an, chrókjuinkitsará ch'an, kixin tí náhi la ts'itjányanxín ch'an tí kjuanchenihi. ⁸ Méxra xrjanóahará kixin chrókjuákoçxinrá inaá kixin chaxín tjuéhérá ch'an. ⁹ Mé xikaha senó ikjian xroon chr'anhánrá kuente tí kjuanínkaon chontará kixin tsononaxian á chrókjuinchexiteyánará káin nkehe chrókuétuanhánrá. ¹⁰ A ntá tí sinchek'itjányenhenrá ijnko chojni ichrén jie kjuasin ch'an ntá janhan kjaxian sintak'itjányanhan ch'an tí jie kjuasin ch'an. Méxra tí chaxín k'ué ichrén jie chrókjuintak'itjányanhan ijnko chojni la ó kjuixin kjuintak'itjányanhan ch'an tí jie a kixin chrók'uejorá jnkojina. Kjaxin xikaha tjetsjehe Cristo, ¹¹ kixin ntá tí ch'in Tsochren na tsjachahya ch'an tsjachroe ch'an tí jeheni, kixin ó noheni nkexrí ch'ia tí ch'in Jínahya.

Kóxakonhen ch'in Pablo tí kjuák'e ch'an chjasin Troas

¹² A ntá tió kjuasán tí chjasin Troas chrókjuákua tí tan jina kuente Cristo la antsí xránjon kjuachaxin kixin chrókónhen xra kuente Inchéni. ¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxin níxjaha tí jehé sín tjejó ntiha ntá sákjuia tí estado Macedonia.

Ntá ó tsjacha sín tsochóna sín kjuachaxin kuente Cristo

¹⁴ Kjuasáyé Dios kixin xráxin jehé ch'an tjñkítsani ch'an ntá tjachani kixin chóntani tí kjuachaxin kuente Cristo Jesús. Ntá káin nketí sáchrókjuini mé tjakoçjinni tí tan kuente ch'an éxi ijnko nkehe xraxé náxrjón chrókóxrjínhin káin xín chojni. ¹⁵ Káinni la éxi yóhé tí xraxé náxrjón kuente chjñço chrókjuanjón Cristo chrók'uáyéhé Dios kixin tíha mé chrókónoexín tí sín tsáa la ko kjaxin chrókónoexín tí sín ts'itjányan. ¹⁶ Tí sín ts'itjányan mé tókaxraxéhé sín éxi ts'enxin sín tí xraxé a. A ntá tí sín tsáa mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxi ch'e nchónhya chojni chrókjuacha sín chichaon. Náhi. Káin asénni tjakoni itén Dios kixin kjueyáni ch'an sich'eheeni Cristo xra, la ko tjetsjehe ch'an tí xra tjejóh'eni.

3

Ti pacto nixin

¹ A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jina tí jeheni, ó á t'ichjánxin kixin chrókjuijikoni xroon kixin tsonoaxinrá kixin jina tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jina tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jina tí jeheni éxi ch'e í so sín? ² Náhi. T'ichjánxienhyani nijnko xroon kixin jahará mé éxi yóhé ijnko xroon tsíkjinri xrikoni chrókóxin la ko chrókjuinchekuáxin káin xín chojni tsonoexín sín kixin jeheni mé ch'eheeni Cristo xra. ³ T'ikon sín noxín kixin tí jahará mé éxi yóhé ijnko xroon tsíkjin Inchéni Cristo xrikoni nchekuáxin chojni. Kjánchó jehya ntáhni tsíkjinxin ch'an. Náhi. Kjuanjón ch'an Nchakuen ch'an tjechón chontará la kjaxin jehya xrotabla tsíkjin ch'an. Náhi. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjñkítsani Cristo. ⁵ Jehya kixin ó jehí chrókóntani kjuachaxin kixin chrókjuich'eni xra. Náhi. Káin tí xra ch'eni na Dios tjetjanjon kjuachaxin. ⁶ Jehé ch'an mé kjuanjón ch'an kjuachaxin kixin chrókjuich'eheeni ch'an xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchexiteyéhéni. Náhi. Tíha mé kjuachaxin kjuanjón Nchakuen Dios kixin sinchexiteyéhéni ch'an. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kúikao t'inkaséyan la mé kjuachahya tí sín israelita chrókomá sín ikon ch'in Moisés kixin imá tjáqini tsjehe ikon ch'an.* Kjánchó tí

* 3:7 Éxodo 34.29-35

t'inkaséyan kjuankíxin ó tinkák'anka. Méxra tí xíkaha tí ley tjanjon kjuach'én mé kuikao ijnko t'inkaséyan imá náxrjón. ⁸ Já chrókójehya kíxin antsí má t'inkaséyan kuikao tí tan nixin kuixín kjuachaxin Nchakuen Dios? ⁹ Méxra xíkaha tí ley k'u'échóna kjuachaxin jíe kjónté ntácho kíxin its'en chojni, a ntá antsí má jina tí tan chrónka Dios kíxin tsotjuáxin tí jie chóntani. ¹⁰ Méxra tí kjuachaxin k'u'échóna tí ley k'u'ék'etóan ósé la ninkehó tóyójehya tí kjuachaxin jíe tjen jie. ¹¹ A ntá tí k'u'échóna kjuachaxin tí nkehe séhyó ntá tinkákjeje, a ntá antsí má chóna kjuachaxin tí nkehe tsjak'e jnkochríxin.

¹² Mé xíkaha tí nkehe tsjejehya tjejóchónhenni ntá chrakonhyani chronkaxinni kaín tíha. ¹³ Ch'ehyani éxi kjuich'e ch'ín Moisés k'uikjèxin ch'án ka ikon ch'án kíxin tsoñoehya tí sín israelita kíxin ó tinkákjeje tí t'inkaséyan chóna ch'án. ¹⁴ Kjánchó jehe sín naça kienxínhya sín la ko naça xíkaha tjejó sín ijie tió nchekuáxin sín tí nkehe k'uituhenen sín ósé kíxin tí ka naça t'inkákonhen tí chrókienxín sín kíxin naça kjuinhyia tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxi naça t'inkákonhen tí ka a kíxin tienxínhya sín. ¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjin. ¹⁷ A ntá Ìnchéni mé Nchakuen Dios tíha. A ntá tí tjen Nchakuen kuente Ìnchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosenta tjákiní tí kjuachaxin kuente Ìnchéni, na mé tinkák'ixitóxin tí kjuaxrexinkaon kuénténi kíxin antsí chrókóyóhene éxi tí jehe ch'án kíxin antsí tsochóntani tí kjuachaxin kuente ch'án, kíxin Ìnchéni, na tí Nchakuen a, mé xíkaha ch'e xra.

4

¹ Méxra xíkaha chrókóxrjéhyani chrókjuich'eni tí xra kjuanjon Dios kíxin jehe ch'án kuikónóeheni ch'án. ² Ó kuítóhene kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xíkaha chrókónoexín kaín xín chojni kíxin ntoá tjejóni éxi tjinkaon Dios. ³ A ntá jeheni mé tjakoní tí itan tsaáxinni, kjánchó iso sín kjónté xíkaha tinhin sín mé tienxínhya sín kíxin xráxin jehe sín la ts'itjáyan sín. ⁴ A ntá jehe sín kuítekakonhyia sín, a ntá tí dios kuente chjasintajni mé kjuinçek'ikonhyia sín kíxin chrókienxínhya sín, kíxin ntá chrók'uikonhyia sín tí t'inkaséyan kuente tí tan kuente Cristo, mé tí nkexro chóna kjuachaxin, a ntá jehe ch'án la mé yóhe éxi tsjehe Dios. ⁵ Tió tjakoní na mé jehya tjakoní kíxin jeheni chrókuitekaónra. Náhi. Chronkaxinni kíxin chrókuitekaónra Jesucristo mé Ìnchéni la ko chrónkani kíxin jeheni mé t'aharáni xra tsjinkjtsani tí jahará kíxin tjuaahará Jesús. ⁶ Na mé jehe Dios k'uetóan kíxin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asenni kíxin chrókjuachani chrókónoheni nkexrí tjen tí kjuachaxin jíe kuente Dios t'inkaséyanxín Ìnchéni Jesucristo.

Nkexrí chrók'uejóni kíxin tinkáchónkini Ìnchéni

⁷ A ntá tí cuerpo kuénteni la yóhe ijnko ch'í tsík'óna nchetje tjinka nkehe tjete, mé xíkaha ts'ikon sín kíxin tí kjuachaxin jíe chóntani la kuixín tí tjen Dios kíxin jehya kuénteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títóehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítójehya ch'án tí jeheni. Kjónté k'uékoni kjuitsínkani kjánchó kjuinçek'itjáyanhyani sín. ¹⁰ Kjónté nketí sájtini xráxin chrók'uenxinni éxi k'uénxin Ìnchéni Jesús, kíxin xíkaha tjakoxxinni tí kjuachón chóna ch'án. ¹¹ Méxra jeheni naça tjejóchónni la xráxin sín kjuaxikaon kíxin chrók'uenxinni kíxin tinkáchónkini Jesús kíxin kjaxin xíkaha chrókjuakoxxinni tí kjuachón chóna ch'án kjónté chrók'uen tí cuerpo chóntani. ¹² Kjónté xíkaha chrók'uenxinni, a ntá jahará tsochontará kjuachón.

¹³ Éxi ntácho tí xroon itén Dios tsíkjin sín ósé kíxin: “Kuítekavan ntá xíkaha xrxanka.”* A ntá kjaxin jeheni kuítekaonni ntá xíkaha chrónkani. ¹⁴ A ntá ó nohene kíxin Dios mé tí nkexro kjuinçhexechón tí Ìnchéni Jesús kjaxin sinçhexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kíxin jahará jina chrók'uejoxinra. La ko kjaxin xíkaha nchónhyará chrók'uayéherá tí kjuasáyé Dios, ntá antsí tsje chojni ts'ejóni tsjancheheni Dios kjuasáyé kíxin tí kjuachaxin jíe chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kíxin ó nohene kíxin jnkojnko yaon Ìnchéni mé tjençek'ánkí ch'án tí kjuaxrexinkaon kuénténi. ¹⁷ A ntá tí nkehe tjasótexinni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíe la ko í tsjejehya tíha. ¹⁸ Ntá chrókomáhyani tí nkehe sín chjasintajni ntihyó. Náhi. Chrókjueyáni tí

* 4:13 Salmo 116.10

nkehe *naxa* t'ikonhyéni kixin tí nkehe t'ikonxínni ikonni na mé nkehe chóxin tsjeje. *A* ntá tí nkehe t'ikonhyani mé nkehe tsjejehya.

5

¹ *A* ntá ó noheni kixin tió tsjeje tí cuerpo chóntani na mé yóhé éxi ijnko nchia tjoka tsjeje, a ntá Dios mé kjuich'éna jnkojnko nchia nixin ts'tijáyanyha jnkochrixin nkaya nkajni kixin jehya tja chojni kjuich'énaxin tíha. ² Tí *naxa* chóntani cuerpoéni ntíhi la náxrjónhya tjejóni tjinkaonni tí ókjé cuerpo tsochóntani nkaya nkajni ³ kixin táha ts'inkáyani éxi ijnko ka, ntá xitjahya chrókótjóchinni. ⁴ Tí *naxa* tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuitjokoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyán tí chrók'uenxínni la ntá chrók'ualjani tí kjuachón nixin. ⁵ Dios mé kjuenkayáxin ch'án kixin xikaha sinchekjtonhenni ch'án ntá kjuínchekjtonhenni ch'án tí Nchákuen ch'án kixin ntá chrókónoexínni kixin chaxin ts'áyéheni tí nkehe tsjanjon ch'án.

⁶ Mé xikaha xráxin ó noheni kixin tí *naxa* tjejóni ntíhi *naxa* chóntani cuerpoéni ntá *naxa* tjejókyani Inchéni. ⁷ *A* ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuitjoheni tí cuerpoéni chóntani jie kixin sáchrókjuini tí tjen Inchéni, chrók'uejókoni ch'án ntíha. ⁹ Méxra xikaha tjinkaonni chrókjuinchehéheni Inchéni kjónté *naxa* chrókóntani cuerpoéni ntíhi la ó í chrókóntahyani, la *naxa* chrók'uincháónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etqan ch'án kixin nkehe ts'áyéheni jnkojnkonni kixin nkeri xra kjuich'eni á jina ó náhi tí *naxa* k'uechóntani cuerpoéni ntíhi chjasintajni.

Tí tan tjanjon kjuaxróxin

¹¹ Méxra xikaha noheni chróchrakonhenni tí kjuachaxin jie kuénte Inchéni ntá tóxakonhenni tjáqoheni chojni kixin chrók'uincháónki sín ch'án. Ó nohe Dios kixin nkexri tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará inaá kixin jina ch'eni xra. Náhi. Jehí ntáchroni kixin síin nkehe chrókócháxinrá kixin tí jeheni ntoá chrónkani kixin chrókónohará nkexri chrókjuáteherá tí sín imá nchehne sín kixin imá náxrjón nixja sín a ntá xraxinkakonhya sín tí jie chóna asén sín. ¹³ *A* ntá tí lóconi na mé tíha kixin tjinkaonni chrókjuich'eheni Dios xra. *A* ntá tí jehya lóco tí jeheni la mé jehí tjinkaonni chrókjuinkjtsani tí jahará. ¹⁴ Kixin Cristo la imá tjeuhe kaín xín chojni ntá t'etuenhenni ch'án kixin ó noheni jina kixin jehó ch'án k'uenyákonhenni ch'án tí ijéni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuéntení chrókjuinchexiteyéheni. Náhi. Chrókjuínchexiteyéheni ch'án kixin k'uenyákonhenni ch'án la ko xechón ch'án inaá kixin tsaáxinni ch'án. ¹⁶ *A* ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uechóxinni Cristo kixin nkexri kjuák'e ch'án chjasintajni ó, a ntá jie la xikahya t'ikonni ch'án. ¹⁷ Méxra tí nkexo tinkáchónki Cristo mé k'óna ijnko chojni nixin. *A* ntá kaín nkehe ntaxin la ó kjuixin k'uatásinka la ntá jie la kaín nkehe ó k'óna nixin.

¹⁸ Kaín tíha mé tí xra kjuich'e Dios. Jehe ch'án mé kjuanjon ch'án kjuaxróxin kixin jina chrók'uejókoni ch'án kixin k'uenyákonhenni Cristo. Ntá jie jeheni k'uaýéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ *A* ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuéntá kaín tí jie chóna chojni, a ntá jeheni k'uaýéheni tí xra tsjakoni itén ch'án. ²⁰ Ntá jeheni kjuachaxin kuénte Cristo chronkaxínni kixin Dios chrónóaxinrá ch'án tí jeheni. Mé xikaha tí kjuachaxin kuénte Cristo chrónóaxinráni kixin kjuaxróxin chrók'uejókoar Dios. ²¹ *A* ntá Cristo la ninkehó jie kjuasinhya ch'án, ntá ijéni k'ueénxin ch'án. Kjánchó Dios k'uíkon kixin éxi tí jehe Cristo chóna ch'án jie, kjuenkayákonhen ch'án kaín tí jie k'uechóntani.

6

¹ Ntá kaín ni jnkokoá ch'eheni Dios xra, ntá chrónóaharáni kixin chrókuitjéhyará tí kjuasáyé Dios kjuakuxinrá ch'án. ² Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chrónóa chojni;

Tí yaon tsaáxin chojni mé kjuínkjtsa ch'án tí jehe sín.*

A ntá jie ó kui tí yaon kjueya Dios. *A* ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixin ntá chrók'uantaxínhin sín tí xra tjejóch'eni. ⁴ Náhi. Kaín nkehe ch'eni tjáqoxinni kixin ch'eheni Dios xra. Na mé tjachani tóninkakonhyani

* 6:2 Isaias 49.8

kjónté nchónhya nkehe tjasótéxinni, la kjónté ichrén nkehe t'ichjánxinhinni, la kjónté ichrén kjuaxikaon síin. ⁵ Na mé k'uékoni, la k'uéjóchjinani, la nchónhya k'uixite chojni kóninkakonhenni sín, la ko tí xrá kjuich'eni la imá xrá. Kjaxin k'uájuaahyani la ko kjónehyani. ⁶ Tjakoqxinni kixin tjóá tjenkayáxinni, la ko tjakoqxinni kixin ó noheni tí nkehe chaxin, la ko tjakoqxinni kixin tóninkakonhyani, la ko tjakoqxinni kixin ch'eni tí jína. La ko chótani Nchakuen Dios, la ko kaín asénni tjuèheni kichó ni, ⁷ la ko chrónkani tí tan ntoá kuènte Dios, la ko tjakoqxinni kixin chótani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. ⁸ Iso sín náxrjón nixjehe sín tí jeheni la ko iso sín náxrjónhya nixjehe sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'íkon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté náxa tjejóchónni. Kjuateni sín na kjónté k'óyanhyani sín. ¹⁰ T'áváni la kjónté xraxinkaonni kixin Ìnchéni t'ayakonhenni la chéheni. Éxí nòani jeheni na kjónté chénni itjé chojni tí itén Dios tsaáxin sín éxí chróchjeheni sín ijnko nkehe imá tjete xikaha. Éxí chóntahyani ninkehó nkehe la kjónté la kaín nkehe chótani.

¹¹ Kichóni tjejórá chjasin Corinto, ntoá chrónkani nixjaharáni la ninkehó t'ayaharáni la mé kaín asénni tjuahará. ¹² Jehya jeheni chrók'uitjáyan kixin chrótjuahará. Náhi. Jahóra t'itjáyan kixin chrótjuéhérá tí jeheni. ¹³ Janhan xrjanóahará éxí ijnko it'é xjan chrónóehe tí xjeen ch'án kixin kjaxinrá kaín asánrá chrótjuéhérá tí jeheni éxí tjuèheni tí jahará.

Jeheni mé éxí nínkøe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni náxa náhi? ¿La ko nkexrí chrók'óyóhe tí t'inkáséyan la ko tí sitié? ¹⁵ Xitjahya chrók'uíxin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya. ¹⁶ Xitjahya chrók'uíto tí nínkøe Dios la ko tí nkehe tsikjanøya. Kixin jeheni mé tí nínkøe Dios tjechón, kixin jehe ch'án tsintáchro ch'án kixin:

Ntaha tsjak'é la ko xritjak'é tí tjejó tí jehe sín,

¶ ntá janhan mé ts'óna Dios kuènte sín

la ko jehe sín mé ts'óna chjasin kuéntana.†

¹⁷ Méxra xikaha kjaxin ntáchro Ìnchéni kixin:

T'axrjekjanxínrá tí jehe sín na ókjé tjejórá;

tsehyará tí nkehe tjuáhya.

¶ ntá janhan mé ts'ayáha tí jahará.‡

¹⁸ Ntá janhan mé ts'óna It'árá,

¶ ntá jahará ts'ónará xjana ntoa la ko xjana chjin,

ichro Ìnchéni Dios chóna kaín kjuachaxin.§

7

¹ Mé xixaha kichó ni, tí nkehe i mé tsintáchro Dios tsjanjon ch'án. Méxra t'ichjánxín kixin tjóá chrók'uejóni, chrókuítøheni kaín nkehe chrókuinçekjítá tí cuérpøeni la ko tí asénni. Ntá chrókóxakonhenni chróchraqonhenni Dios la t'ichjánxín chrókjuancheheni ch'án chrókuinchetjóáni ch'án kixin jehó ch'án chrókuinkáchónkini.

Tí sín Corinto kjuitoqxínhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuich'yehyani ninkexró. ³ Jehya ntáchroni tíhi kixin chrókuékará jie. Náhi. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni. ⁴ Janhan la imá tjikosáyahará tí jahará la ko imá chàna kixin jína tjejórá. Kjónté kaín nkexrí tjejótasóteni na imá chàna.

⁵ ¶ ntá tíó kjuíjini estado Macedonia la xitjahya chrók'ok'éheni kixin nkuixín síin chojni nínkakonhenni la ko kóxakonhen asénni. ⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuinchechéhe ch'án asénni kixin ó kjuíji ch'ín Tito. ⁷ Ntá jehya kixin tí kjuíji ch'án ó chrókóchéxinni. Náhi. Chéheni kixin jahará kjuinchechéhé ch'án. Chrónka ch'án kixin imá tjinkáonrá chrók'uikonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuqhanrá. Mé kuínhan kaín tíha ntá antsí má kóchána.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonahya. Na mé senó kóxakonna ntá k'uikuqan kixin tí xroon kjuíntakonhanrá kjánchó kánhyó isé tíha. ⁹ Ntá jie chàna, kjánchó jehya kixin tí nkehe kjuíntak'ávára. Náhi. Chána kixin tí kjuat'ává ¶ ntá

ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjnhin ch'án. Méxra xikaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuitoehya tí nkehe kuente chjasintajni mé t'ává sín kixin táhó ts'enxín sín. ¹¹ A ntá jahará kjuachará k'uátsínkará tí kjuat'ává éxi kóxrjnhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuinchecónínkaonrá la ko kjaxin kjuínchechrakonrá. Ntá chr'éxin ntá tjínkáonrá chrók'uikonrá tí janhan. Ntá kjuínchekjásóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsikónhen. ¹² A ntá tí nkehe kjian la jehya kixin kjuenkayáxian janhan kuente tí ch'ín kjuasin jie, la ko jehya kixin kjuenkayáxian janhan kuente tí ch'ín k'uává ó. Náhi. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetóanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uíkoni kixin kóchéhe ch'ín Tito kixin jahará kaín rá kjuínkítasará kixin kjuaxróxin kjuák'e ch'án ntiha. ¹⁴ Janhan k'uetjanka tí ch'ín Tito kixin chána kixin tí jahará la jehya kjuach'ia tíha la kósuánahya. Náhi. Kaín nkehe k'uetjónkará la chaxín la ko kjaxin kain nkehe k'uéntátjan ch'ín Tito la chaxín kixin chéheni kixin kuitekáonrá. ¹⁵ A ntá jie antsí tjuahará ch'án kixin xráxinakon ch'án kixin nkexrí jína kuitekáonrá la ko nkexrí imá kjuikosáyehérá ch'án kjuánjonrá kjuachaxin kuitohe ch'án ntiha. ¹⁶ Ntá imá chána kixin ó nóna kixin jahará sijnchexiteyánará.

8

Antsí má chrókjuínkítsa sín kichó sín

¹ Ntá jie kichó ní, tjínkaonni chrókónohará kixin nkexrí tí sín tinkáchónki Ìnchéni tójnoktsé sín estado Macedonia kjuákoxin sín nkexrí tí kjuasáyé Dios. ² Kjónté nchónhya nkehe tsikónhen sín la kjónté la kóchéhe sín; la ko kjónté nòa sín la antsí má kjuínkítsa sín tí sín í so éxi chojni chóna itjsé chichaon xikaha kjuich'e sín. ³ Chaxín k'uíkuan kixin kjuanjon sín éxi tí nkehe chóna sín la ko antsí má xikjanjon sín inaá kixin xikaha kjuenkayáxin sín. ⁴ Nchónhya chrónógehe sín tí jeheni kixin chrókjuanjonni kjuachaxin kixin chrókjuínkítsa sín tí sín kichó ní tinkáchónki Dios. ⁵ Na mé antsí má kjuanjon sín la xikahya kjuenkayáxinmi kixin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhé sín tí jeheni éxi tóxrjnhin Dios. ⁶ Méxra chrónógeheni tí ch'ín Tito kixin chrókjuenájín ch'án chichaon tí tójnoktsérá ntiha éxi kjuankixin ch'án senó. ⁷ A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuente Dios, la ko antsí chontará kjuachéhé, la ko antsí tjuéhérá tí jeheni. Méxra xikaha antsí chrókjuákoxinrá tí xra jína chrókjuínkítasará tí sín kichó ní.

⁸ Jehya ntáxrjan tíhi kixin chrókuétuganhanrá xikaha. Náhi. Jehi tjínkavan chrókónohará nkexrí jína kjuich'e tí í so sín kixin kjaxínrá chrókjuákoxinrá kixin tjuéhérá kichuárá. ⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónòaxín ch'án mé jahará kórikóxinrá.

¹⁰ Méxra tsotjónkará tí nkehe tjenkayáxian janhan kuente tí xra i kixin jahará tí nánó k'uátsínka kjuankixinrá kjuínkítasará kjuánjonrá nkehe, la mé jehya kixin ó jehi kjuínkítasará sín. Náhi. Kjaxin imá kócháhará kixin kjuínkítasará sín. ¹¹ A ntá jie chrókjuintaxín chrókjuánjonrá éxi tí chrókjuachará chrókjuánjonrá éxi xrankixixín tsikjatehéherá tsjinkítasará tsjánjonrá nkehe. ¹² Mé xikaha tí chaxin tjínkaon jnkojin chojni chrókjuanjon sín nkehe, ntá tsóxrjnhin Dios tí tjanjon sín tí nkehe chóna sín. Dios la tjanachahya ch'án tí nkehe chónahya chojni.

¹³ Jehya kixin xikaha tí í so sín chrók'uejó sín jína kixin tí nkehe kjuínkítasará sín la ntá jahará chrók'uitjáyan nkehe t'ichjánxinhanrá. Náhi. ¹⁴ Chrókójina chrókóyóge chróchontará nkehe jnkokón. A ntá jie jahará chontará tí nkehe chónahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkítasará tí sín chónahya kixin chróchontará nkehe jnkokón. ¹⁵ Éxi ntáchro xroon itén Dios kixin: "Tí sín kjuenájín sín nchónhya la mé yéhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.*"

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxi tóxakonna kixin tí jahará. ¹⁷ Ntá kóxrjnhin ch'án tí nkehe k'uetuénhenni ch'án, la ntá kjaxin jehe ch'án kóxakonhen ch'án kixin á jína tjejorá, ntá jehe ch'án tjínkaon ch'án chrókjuijitsjehe ch'án tí jahará.

* 8:15 Éxodo 16:18

¹⁸ Kɔjɔxin k'uetɔanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xɔ́ jína tjech'e ch'án tjako ch'án tí tan tsaáxinni. ¹⁹ La ko kɔjɔxin tí sín kaín tí nínko ntíhi kɔueyá sín tí nkexo kichó ni kixin sátsjikotoxin ch'án tí jeheni tí xɔ́ sátsjikoni tí chichaon tsjikéhhenni tí sín nòà. Na mé tí xɔ́ ch'eni kixin xikaha tsjikosáyeheni Ìnchéni la ko xikaha tjakoɔxinni kixin tjinkaonni chrókjuinkitsani sín. ²⁰ Tjinkaonni kixin tsokohya nkexro chrók'uaútaxínhinni kixin tí chichaon xrenájín kjuíjiki. ²¹ Méxɔ́ tjinkaonni chrókjuich'eni tí nkehe ntoá, jehya jehó tí nkehe chrókóxrjínhín Ìnchéni. Náhi. Kɔjɔxin tjinkaonni kixin chrók'uikon chojni kixin jína tjejóch'eni.

²² La ko kɔjɔxin k'uetɔenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuakoxín ch'án kixin chéhe ch'án chrókjuinkitsa ch'án kixin itsjé xɔ́ kjuich'e ch'án. A ntá jé antsí má chrókjuich'e ch'án xɔ́ kixin chóxin ch'án tí jahará. ²³ A ntá jnkojín sín tsjanchankí sín kixin nkehe tí xɔ́ ch'e ch'ín Tito la mé chenkará sín kixin jehé ch'án mé tjinkitsa ch'án tí janhan kixin xikaha tjinkitsa ch'án tí jahará. A ntá tí tsjančankí sín kixin nkehe tí xɔ́ ch'e tí í so kichó ni ntá chenkará sín kixin sín kaín nínko k'uetɔan sín kixin sátsji sín ntiha kixin mé xikaha tsjikosáyehé sín Cristo. ²⁴ Méxɔ́ chrókjuakoxínɔ́ kixin chaxín tjeùhéɔ́ kichuáɔ́ kixin tsonohé tí sín kichó ni í so nínko la ko kɔjɔxin tsonohé sín kixin chaxín chéheni kixin tí jahará.

9

Tí chichaon xrenájín tsjinkitsa tí sín kichó ni

¹ A ntá tí xrenájín chichaon kixin tsjinkitsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánɔ́ ² kixin xɔ́xín kónóna kixin jahará tjinkáonɔ́ chrókjuinkitsará, na mé xikaha chána la tjanka tí sín tjejó estado Macedonia kixin jahará chojni estado Acaya desde tí nánó k'uaútsinka xɔ́xín tjejóɔ́ tjinkáonɔ́ chrókjuinkitsará. A ntá antsí tsjé sín estado Macedonia tjinkaon sín chrókjuinkitsa sín kixin jahará xikaha kjuakoxínɔ́ nkexrí tjinkáonɔ́ chrókjuinkitsará. ³ A ntá ichr'an tí sín kichó ni kixin tjinkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanɔ́ chrókjuinkitsará tí sín kichó ni éxi ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonɔ́ ntá chrókósuèheni tí jeheni kixin imá chóxinni kichó ni la ko kjá chrókósuahará kɔjɔxinɔ́. ⁵ Méxɔ́ xikaha tóna kixin t'ichjánxín tsontátjan tí sín kichó ni kixin sátsji sín tsitónxin sín ntá tsjijitsjehé sín tí jahará senó tsjinkitsa sín kixin tsjenájínɔ́ tí chichaon tsintáchrórɔ́ senó kixin chrókjuánjonɔ́. A ntá chrókóyaxínhanɔ́ kixin chrókjuánjonɔ́ tí chichaon éxi ijnko nkehe chaxín tjinkáonɔ́ chrókjuánjonɔ́ la jehya éxi ijnko nkehe chrókjuanchaharáni afuerza.

⁶ Xɔ́xínkáonɔ́ kixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxɔ́ jnkojnko chojni chrókjuanjon tí nkehe kjuenkayáxixin sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjeùhe ch'án tí nkexro chéhe tjanjon nkehe. ⁸ A ntá Dios chónɔ́ kaín kjuachaxin jé ntá tsotjáhará ch'án kaín nkehe t'ichjánxínhanɔ́ kixin tsochontará nkehe tsóchjehéɔ́ í so chojni chónɔ́haya kixin xikaha sjch'erá kaín xɔ́ jína. ⁹ Éxi ntáchro tí xroon itén Dios kixin: Tí nkexro t'óxikayéhe ch'án itsjé nkehe nchekítɔnhén ch'án tí sín nòà

na mé nunca tsjejehya tí xɔ́ jína ch'e ch'án.*

¹⁰ Dios mé tjanjon noatje kixin ts'inka la ko jehé ch'án mé tjanjon nkehe sineni, la ntá kɔjɔxin tsotjáhará ch'án kaín nkehe t'ichjánxínhanɔ́ la ko jehé ch'án sinček'ánkí ch'án tí nkehe ts'énkará la ko jehé ch'án sinček'ánkí ch'án tí xɔ́ jína tjejóch'erá. ¹¹ A ntá tsochontará kaín nkehe tjeɔ́ kixin ntá antsí tsjachará tsjinkitsará tí í so sín kichó ni. A ntá xikaha tsjijikenhenni sín tí nkehe tsóchjehéɔ́ tí sín kichó ni ntá tsjanchehe sín Dios kjuasáya. ¹² Kixin xikaha chrókjuinkitsará tí sín kichó ni na jehya kixin chrók'uaúyéhe sín tí nkehe t'ichjánxínhín sín ó, la mé kɔjɔxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya kixin tí nkehe kjuánjonɔ́ kjuakoxínɔ́ kixin nchexiteyéhéɔ́ tí tan kuénte Cristo. Kɔjɔxin tsjikosáyehé sín Dios kixin tí í so nkehe kjuánjonɔ́ k'uaúyéhe sín la ko tí nkehe k'uaúyéhe í so chojni. ¹⁴ La ko jehé sín tsjanchehe sín Dios kixin tsjinkitsa ch'án tí jahará kixin jehé sín tjuahará sín kixin t'ikon sín kixin tjákoɔxínɔ́ kixin tí kjuasáye Dios chontará. ¹⁵ Tjancheheni Dios kjuasáya kixin kjuínčekítɔnhenni ch'án ijnko nkehe imá jé tsaáxinni la tsjachahyani tsochronkaxínni kaín tíha.

10

Kjuachaxin chónɔ́ ch'ín Pablo kixin tsik'óna ch'án apóstol

* 9:9 Salmo 112:9

¹ Janhan Pablo tió xrjanóahará nkehe la jnkójina xrjanóahará la mé tjákoxian éxi toxrjínhin Cristo. Ntáchrorá kixin tió tjén tí tjejórá ntiha la tósuaña, a ntá tí kjín tjén la imá jiëna, ichrorá. ² Méxra xrjanóahará kixin tí tsjasántsahará tjínkakhonya kixin chrókujuinçekóninkáonráni kixin ntá tsonínkakhonhárá jnkójiná kixin tsékaráni jië kixin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxi chojni ó, na kjánchó tió tjanjónni la tjanjonyani éxi tjanjon chojni chjasintajni. ⁴ Kixin tí nkehe xraáni tjanjonxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinček'itjáyán kaín kjuachaxin kuènte tí Jínaha. ⁵ Na mé tsjachani sinček'itjáyanni tí nkehe ntoáhya tjenkayáxin chojni la ko kaín nkehe nchehnkexin sín t'inkákonhen kixin chrókochoxin chojni Dios. A ntá kjuachaxin kuènte Cristo tjákohe ni kaín chojni kixin ntá tsitöhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchónhenni sinčekjasóteni kaín tí sín ntiha naxa tjinkakhonya sín chrókujuinchehiteyá sín tí tsjixin tsonoheni kixin á chaxín tsjachará sinchehiteyará jína.

⁷ A ntá jahará tékaráni jië kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjáxin chrókuátsaon kixin kjáxinni jeheni la ch'ehe ni Cristo xra. ⁸ A ntá tí chrókujuintahnkena ntsí kixin tí kjuachaxin chonta janhan ntá chrókosuánahya kixin Ìnchéni kjuanjón tí kjuachaxin kixin chrókujuínkítsa tí jahará kixin ántsi chrók'uitjará kuènte Dios, la mé jehya kixin chrókujuíntak'itjáyánrá. ⁹ Tjínkakhonya éxi tjanjon chrókujuíntachrakonxínrá tí xroon chr'anhárá. ¹⁰ Kixin ntáchro sín kixin ixra la ko jiëhe tí nkehe ikjian janhan, a ntá tí chrókuak'é ntiha la jienáhya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xikaha ntáchro chrókochohe ch'án kixin jnkokón nixja janhan éxi nixja tí xroon tsíkjan kjónté ikjín tjén la ko kjónté tí chrók'uejóni ntiha.

¹² Tjínkakhonyani chrókuenkayáxinni kixin chrókóyóhe ni tí í so sín ntáchro sín kixin jína tí jehe sín. Jehe sín mé lontjín sín kixin ncheyóhe sín asén sín í so chojni. ¹³ A ntá jeheni la chrókujuinchehnkexínhyani ijnko xra jehya xra kuènteni. Dios mé kjuako nketi sich'eni xra la kjuanjón ch'án kjuachaxin kixin kjuújini kjuúich'eni xra tí tjejórá chjasin Corinto. ¹⁴ Jehya kixin chróchóntahyani kjuachaxin chrók'ueuáhanháráni. Tí chaxín jehya jeheni saoxín kjuújini tí tjejórá ntá xikaha chróchóntahyani kjuachaxin. Ntá náhi, kixin jeheni saoxín kjuújini ntiha kjuakoharáni itan kuènte Cristo. ¹⁵ Chrókujuinchehnkexínhyani ijnko xra kjuúich'e ókjé chojni éxi xra chrók'uejóni jeheni. Náhi. Tjínkaonni kixin ántsi chrók'uitjará tsinkachónkirá Ìnchéni ntá xikaha la ántsi chrókujuínkítsani tí jahará kixin jehó tí xra k'uáyéhe ni tjejóch'eni. ¹⁶ Kjáxin tjínkaonni chrókuakoni tí itén Ìnchéni chrókuaáxin chojni í so chjasin sáchrókjuini la ko kjáxin chrókujuinchehnkexínhyani tí xra chrók'uejóni ókjé chojni.

¹⁷ A ntá jnkójín sín tjínkaon sín chrókujuinchehnke sín ntá jehó chróntáchro sín kixin kjuachaxin Ìnchéni mé chóntha sín.* ¹⁸ Kixin tóxrjénhya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínhya apóstol

¹ Tjínkavan chrókuinhínrá ntsí tí lontjína. ¿Á chrókuachará chrókuinhínrá nkehe tsontáxrjan? ² Janhan tjínkakhonya kixin í jnko nkexro chrókuinkachónkirá. Kjáxin xikaha tjínkakhonya Dios. Ó ikjuá Cristo kixin chrókuakja ch'án tí jahará. Tjínkavan chrókujuánjuan tí jahará chrókuakja tí jehe ch'án éxi yóhe ijnko tjan tjarisó chrókótehe jnkokoá xii. ³ Tóxakonna kixin éxi tí konche tí kjuach'ia ntiha ntá kjuúich'iyehé tjan Eva, ntá xikaha kjáxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo. ⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxi tí chronkaxínni jeheni, la ko kjáxin cháhará k'uayehérá ókjé nchakuen jehya tí Nchakuen Dios k'uayehérá saó, la ko cháhará chrókuítekáonrá ijnko nkehe ókjé chrókuaáxinrá jehya éxi tí nkehe kuítekáonrá senó. ⁵ Ó nòna kixin chaxínhya ninkehó sínkílyana janhan, a ntá ántsi sínkí tí sín chréhérá jahará, ichrorá. ⁶ Kjónté kánhyó náxrjón nixja janhan la jehya kixin kánhyó chrókónòna chrókuakua. A ntá tjíóáxinrá jahará tíhi kixin kaín nkehe t'a.

⁷ ¿Á ntoáhya kjuú'ta janhan xrjankaxián tí tan tsaáxinni kixin ninkehó kjuáncháhya chrókuakua la ko éxi ijnko chojni nóè kjuak'é janhan kixin tjínkavan chrókujuínkítsará chrók'uitjará? ⁸ Tí sín í so njnko kjuínkítsana sín kjuanjón sín chichaon k'uayáha kixin tsjak'é tsjákohará jahará. ⁹ Tí kjuak'é tí tjejórá jahará la kjónté t'itjáyán nkehe la ninkexró kjuáncháhya nkehe. Jehó tí sín kichó ní kjuújín estado Macedonia kjuújkaó sín tí nkehe

* 10:17 Jeremías 9.24

t'ichjánxinna. Méxra t'jínkakonhya k'ixin chrótjahará xra t' jahará la ko xikaha naxa tjet'a jie. ¹⁰ Xikaha chaxin choxian t' tan chaxin ntoá kuente Cristo, a ntá kohya ninkexro nkuíxin estado Acaya tsjacha tsakitsjena t' kjuachéhe chonta. ¹¹ ¿Nkekuente xikaha ntáxrjan? ¿Á xikaha ntáxrjan k'ixin tjuahyará t' jahará ní? Náhí. Dios la ó nohe k'ixin imá tjuahará.

¹² Kjánchó ó Jehí tsjintaxin xikaha sít'a k'ixin t'jínkakonhya tsánjuan kjuachaxin k'ixin nchehnkexin t' sín ixri ntáchro k'ixin jnkokón kjuachaxin chóna t' nkehe tjákua la ko t' nkehe tjako sín. ¹³ Kjánchó jehe sín ijnko apóstol chaxínhya mé ch'ia sín ncheyóhó sín éxi chojni kjueyá Cristo. ¹⁴ Jehya ijnko kjuachrakon tíha k'ixin kjaxin ch'in Tsochren kjaxin xikaha ncheyóhe ch'an éxi ijnko ángel kuente t' t'inkaséyan. ¹⁵ Méxra xikaha kjaxin kuèhnen t' sín ch'ehe t' Jínahya xra mé ncheyóhe sín t' sín jina. Ntá tsjixixin mé tsjasótéxin sín t' xra jínahya kjuich'e sín.

Kjuasóte ch'in Pablo k'ixin apóstol t' jehe ch'an

¹⁶ Ntáxrjan inaá k'ixin nijnkorá chrókjuenkayáxinrá k'ixin lócona. Kjánchó t' xikaha t'jenkayáxinrá la t'jtghérá tsonixja janhan éxi lócona k'ixin kjaxinna jina chrókjuintahnke ntsí. ¹⁷ T' xikaha ntahnkexián la jehya kjuachaxin kuente Inchéni ntáxrjanxian tíha. Náhí. Jehí éxi ijnko chojni lóco nixja. ¹⁸ A ntá nchónhya chojni sín nchehnkexin sín t' nkehe nohe sín a ntá jie la kjaxin janhan sjntahnke. ¹⁹ K'ixin jahará ntáchrorá k'ixin imá nohará ntá cháhará tjetó t' sín lóco. ²⁰ K'ixin t'jánjonrá kjuachaxin t'etuanhanrá sín la nchexiteyéhérá sín la ko taktisjahará sín t' nkehe chontará la ko ch'ena asén sín éxi inché sín t' jahará, la ntá kjoníehyará sín la ko t'jate sín nkaya ikonrá. ²¹ Kjóté chrókósuána tsontáxrjan k'ixin jeheni la kánhyó jjehe k'uetuanhanráni.

Kjánchó t' nkehe nchehnkexin sín la janhan ntahnkexián kjaxinna, kjóté ntáxrjan tíhi éxi ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'in Abraham? Kjaxin janhan k'uaxrjeníxian ch'an. ²³ Ch'ehe sín Cristo xra kjánchó janhan la antsí má la jehe sín la kénhyó, kjóté ntáxrjan tíhi éxi ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon k'ixin chrók'uén. ²⁴ In'ó veces t' sín judío kjuatena sín la ko treinta y nueve t' kjuatjoté. ²⁵ Níya kjuatexinna sín inta la ko í jnko vez kjuak'e sín xro. Níya k'uániánki ntabárcó ntá ntá ijnko yaon la ko ijnko tie t'jénkataván ntayaon. ²⁶ K'uájia má, k'uikuán kjuaxikaon chrók'uénxian t' ntarío la ko chrók'óyánna t' xíchee la ko chrók'óyánna t' sín chjasenná la ko t' sín tsíkjixin ókjé. K'uikuán kjuaxikaon t' chjasin jie la ko t' nteje la ko t' nteyaon la ko chrók'óyánna t' sín chaxínhya t'ínkáchónki Inchéni. ²⁷ Kóxrjéna k'ixin t' xra kjuít'a la ko itsjé nkehe náxrxónhya kónna. Itsjé tie kjuak'échrinhya jina la ko itsjé yaon ik'uén kjinta la ko ik'uén ntá la ko itsjé yaon kjónghya ninkehó la ko kókinna la ko chontahya kaná.

²⁸ Kjóté kaín tíha la ko í so nkehe kónna la mé jnkojnko yaon imá tóxakonna k'ixin kaín t' sín tójnkoté sín kaín t' nínko. ²⁹ ¿Á t'jen jnkojínra níhará? A ntá t' xikaha la koína éxi nina. ¿Á t'jen jnkojínra kjuásinra jie? A ntá t' xikaha la kjaxin tóxakonna. ³⁰ T' chrókjuintahnkexian nkehe la mé t'jínkavan k'ixin jehó chrókjuáqoxian k'ixin kánhyó jjeña. ³¹ Dios, It'é Inchéni Jesucristo, na mé t' nkexro chrórxaxinakonni jnkochríxín mé ó nohe ch'an k'ixin chaxin t' nkehe ntáxrjan. ³² Ntá t' kjuak'é chjasin Damasco la mé t' ch'in gobernador kjuích'ehe ch'in rey Aretas xra mé k'uetuèhnen ch'an t' sín soldado k'ixin tsochónhen sín t' ntója t' chjasin k'ixin chrótséna sín chrókjuak'échjina. ³³ Kjánchó siín nkexro k'uínkajinxinna ijnko ntaxra ijnko ventana t' t'jat'o k'uantatjen chjasin la mé xikaha kuaána, tséhyana sín.*

12

T' nkehe k'uikon ch'in Pablo

¹ Ninkehó tsjachahya t' nkehe tsóxrjancka kuèntana ó. Íchá jina tsóxrjancka t' nkehe k'uikuán la ko t' nkehe kjuínchenóna Inchéni. ² Choxian ijnko nkexro t'ínkáchónki Cristo. A ntá k'uátsínka catorce nánó sátsíkji ch'an t' nínxin nkajní. Nonahya á sátsíkjiko ch'an cuerpo kuente ch'an ó asén ch'an ó. Jehó Dios mé nohe. ³ Méxra ó nóna k'ixin xikaha sátsíkji ch'an la ntá nonahya á koí cuerpo kuente ch'an ó asén ch'an ó. Jehó Dios mé nohe. ⁴ A ntá sátsíkji ch'an nkajní. La ntá t' palabra kuínhin ch'an la kohya kjuachaxin nijnko chojni tsochronka. ⁵ Jina chrókjuintahnkexián k'ixin xikaha kónhen t' nkexro a. A ntá t' chrókjuintahnkexián k'ixin kjuachaxin kuèntana la jehya jina tíha. Íchá jina chrókjuáqoxian k'ixin janhvá la chontahya kjuachaxin. ⁶ T' chrókjuintahnkexián t' nkehe kónna la chrókólócohyana k'ixin chaxin t' nkehe chróxrjancka. Kjánchó xikahya t'a k'ixin t'jínkakonhya k'ixin xikaha chrókjuenkayáxin

* 11:33 Hechos 9.23-25

chojni kixin antsí jina janhan. Náhi. Tjínkavan kixin tí xra t'ikon sín la ko tí nkehe tinhin sín mé chrókjuenkayáxixin sín kixin á jina tí janhan, tsixro sín.

⁷ Méxra chrókjuintahnkexinyhana ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'j kuikjiáte cuerpo kuéntana mé ijnko nkehe tsík'etuenhen ch'in Tsochren ikui kjuinçekjoténa. ⁸ Iní veces xrjanógha Inchéni kixin chrókjuatsen ch'an tí kjuatjoté chonta. ⁹ Kjánchó ntáchro Inchéni kixin jehó tí kjuachaxiэн ch'an chrókjuachaxian janhan. Kixin tí kjuachaxiэн ch'an antsí tsjakoxén chojni fuértehya. Méxra ntá chána kixin fuértehyana kixin ntá xikaha tsjakoxian tí kjuachaxin kuэnte Cristo. ¹⁰ Méxra chána kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyána sín la ko kjónté siín kjuaxikaon chrókjuasótexinna kixin tí tinkachónkia Cristo. Chána kixin fuértehyana na mé fuérte janhan kixin Cristo tinkachónkia.

Tóxakonhen ch'in Pablo kixin tí sín tjejó nínko chjasin Corinto

¹¹ ¿Á lócona kixin xikaha xrjanka? Kjánchó jahará kuitekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sinkína la ntá tí sín chréhérá la antsí sinkí sín. Náhi. Kjónté janhan la chaxin ninkehó sinkíhyana. ¹² Kjuásian itsjé kjuaxroan jié la jina kjuak'é kóninkákonhya kjuakoxian kixin chaxin janhan ijnko nkexro tsíkjeýá Inchéni. ¹³ ¿Xá k'uikuán tí jahará éxi kánhyó sinkírá a ntá tí í so nínko la antsí sinkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tóninkákonhyará.

¹⁴ A ntá ijie ó yaxinna tí nixin vez chrókjuasántsahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéýá janhan la mé jahará kixin jahará éxi yóhe xjanna t'ikuán. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuэnte tí xjan chrókjuenájín xjan chichaon chrók'uayakuénxín sín tí it'é xjan. ¹⁵ Tóxakonnaha kjónté chrókjuíntakjeje kaín nkehe chonta janhan o kjónté chrók'uéxian kixin tí jahará la jina chrók'uejorá. A ntá janhan imá tjuáhará la kjánchó éxi tóna janhan kixin jahará kánhyó tjeúherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá. ¹⁷ ¿Xá kjuít'ayahará kixin jnkojín sín ichr'an kjuíjitsjehe sín tí jahará? ¹⁸ Kjuáncháha tí ch'in Tito kixin tsjijitsjehe ch'an tí jahará la ko kjaxin kuétuanhan tí í jnko kichó ni sátsjikotoxin ch'an. ¿Á kjuít'ayahará ch'in Tito ní? ¿Á chaxínhya jina k'uejóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jié ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kichóni tjuáhará la kaín tíha ntáxrjan kixin tjínkavan kixin antsí chrókjuinkachónkirá Inchéni. ²⁰ Tóxakonna kixin tió tsjasántsahará la tsóxrjinnahya nkexrí tjejorá la ko kjaxinrá tsóxrjinnahyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinqóxínhin la ko tsóninkákonhénrá kichuárá la ko chrókuétoanrá jahórá la ko naxa tsinkachónkirá kjuach'ia la ko naxa ts'ántaxínhínrá kichuárá la ko naxa chontará kjuahnke la ko jnkoqóghya tsjenkayáxinrá. ²¹ Tóxakonna kixin tió tsjasántsahará inaá la tí Dios kuэntana mé sinchesuána tí tjejorá la ntá imá tsotsjanka kixin itsjérá tsíkjasinrá jié tí ósé la naxa tjeúéhyará tí nkehe tjuáhyá ch'erá la ko naxa tjeúéhyará chontará chojni chjin ókjé tjásinkoará jié la ko tjeúéhyará kaín tí í so nkehe jínahya k'uekjich'erá ósé.

13

Nhexraxinkaon ch'an sín la ko tsjixixín nixja ch'an

¹ A ntá jié la níyáxin tsjasántsahará. A ntá tí kaín nkehe tjínkáonrá tsónona la mé chróchrónka yaá o iy'á chojni tsík'ikonxín kon sín tí nkehe tsikónhen. ² Nixjahá tí sín tsíkjasin jié ósé, la ko nixjahará kaín rá kixin kjónté ikjín tjén la inaá nixjahará éxi nixja tí kjuak'é k'uejóni tí iyó kjuasántsahará kixin tió tsjasán inaá la í tsikonóghya tí sín kjuasin jié. ³ Jahará tjínkáonrá tsinhínrá á chaxin níxjaxian kjuachaxin kuэnte Cristo. Jehya kixin Cristo tsjachahya tsjakoxin ch'an tí kjuachaxiэн ch'an tí tjejorá ntiha. Náhi. Chaxin tjakoxin ch'an tí kjuachaxin chóna ch'an tí tjejorá ntiha. ⁴ Chaxin tí k'uénxin ch'an tí ntacruz la mé éxi chóntahya ch'an kjuachaxin. Kjánchó ijie tjechónxin ch'an tí kjuachaxin kuэnte Dios. Kjaxinni jeheni éxi kjuak'é ch'an k'uéchéntahyani kjuachaxin la ntá ijie tinkáchónkini tí jehé ch'an la tjejóchónxinni tí kjuachaxin kuэnte Dios kixin jina tsjinkítsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkáchónkirá Inchéni. ¿Á noahyará kixin tjejokoará Jesucristo? A ntá jahará tsónohará á chaxin tinkáchónkirá o náhi. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Inchéni. ⁷ Nixjeheni Dios kixin chrókuétoehya ch'an tí jahará kixin ninkehó nkehe jínahya chrókjuich'erá. Jehya kixin chrókjuakoxiní kixin jina tí jeheni. Náhi. Jehí tjínkaonni kixin

jahará chrókjuich'erá nkehe jína. Ántosénni kjónté tsóntáchro sín kixin chóntani jie. ⁸Ninkehó nkehe chrókjuich'eni kixin chrókjuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹Méxra chrókóchéhēni tí t'ichjánxinhya imá chrók'ueŋoanni, tí chaxín jína chrók'uejorá. Ntá naxa tsonixjehēni Dios kixin chrókjuixraká chrók'uejorá ntoá. ¹⁰Mé xikaha ikjian tíhi senó naxa tsjasántsjáhyará ntiha kixin ntá tíó tsjasán la ts'ichjánxinhya naxa sìnchekóninkáonrána tsoníxjaxiān tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyanrá. Náhi. Kjuanjon ch'án tíha kixin jahará ántsí chrókuinkachónkirá Ìnchéni.

¹¹Na ntá kichó ni, chrókócháhará. Tjéyará kixin jína chrók'uejorá. Chrókjuinchechéhérá kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹²Nixjehérá kichuára jnkójina la tsehérá tja kichuára. ¹³À ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjeueýana la ko jehya chojni ichr'ánna. Náhi. Kjeueýana Jesucristo la ko It'eni Dios, mé tí nkexro kjuínchexechón Jesús. ² Janhan la ko kain tí sín kichó ni tjejókoni ntihi ikjinni tí xroon ts'áyéhe tí nínko siín estado Galacia. ³ Tjancheheni It'eni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéherá tí kjuaxróxin kuénte ch'án. ⁴ Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya siín chjasintajni tsjachroeni mé xikaha tjínkaon It'eni Dios. ⁵ Tjáncháha Dios kjuasáya jnkochrínín mé xikaha tsoxiteýa. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakjtoherá Dios kjeueýará kjuasáyé Cristo. Jahará la tjoka ó kjuankixinrá chréhérá ókjé tan chrókuaáxinrá. ⁷ A ntá chaxínhya xikaha. Kohya í jnko tan tsaáxinni. Jehí iso chojni tjínkaon nchexakonhanrá la ko tjínkaon sín chrókjuítóxinhin sín tí tan chrókuaáxinni kuénte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóghya tí nkehe ó kjuakoni la tí xikaha la Dios mé sinchekjasóte tí sín kixin xikaha sich'e sín, kjónté á janhan o ijnko ángel chrókjuixín nkaya nkajni. ⁹ Senó xrxjanka la inaá tsoxrjanka kixin jnkojín nkexro chrókjuako ijnko tan ókjé tsaáxinrá yóghya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xra t'a. Náhi. Tjínkavan kixin Dios mé chrókóxrjínhin tíha. Tí chrókójtínkavan chrókóxrjínhin chojni ó a ntá xikaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kichó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhi. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxá k'u'échráha tí sín judío. Ó nohará kixin k'u'échonkíha tí sín tinkáchónki Ìnchéni la ko tjínkavan chrókjuíntak'itjáyán sín.* ¹⁴ Tí naxá k'uék'ájikian tí sín judío la antsí má k'u'éónna. A ntá kain tí sín chjasenná jnkokón nánó k'u'échontakian sín la kánhyó k'u'énohe sín. Antsí má k'u'ékítekavan tí nkehe k'uék'etóan tí sín tsík'axrjenixinni. ¹⁵ Kjánchó Dios kjeueýana kjónté naxá tókjínahya la kjuasáyé ch'án kjeueýana ch'án kixin xikaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kixin tsjakoha tí sín jehya judío tí tan tsaáxinni. Tió kjeueýana Dios la ninkexró kjuakonahya. ¹⁷ La ko kjáxin kjuítsjáhya janhan tí sín tsík'óna apóstol siín chjasin Jerusalén. Náhi. Janhván tuénxín sákjuia chjasin Arabia, a ntá chr'éxin íkjan tí chjasin Damasco.

¹⁸ A ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekjan ch'án quince yaon. ¹⁹ Kjánchó k'uíkqñhya tí í so sín apóstol. Jehó k'uúkuan ch'ín Jacobo kichó Ìnchéni. ²⁰ Ó tjetsjehe Dios kixin tí nkehe íkjan la mé chaxín tíha.

²¹ A ntá chr'éxin ntá sákjuia nó estado Siria la ko Cilicia. ²² A ntá tí sín kichó ni tinkáchónki Cristo tjejó estado Judea la naxá tjatsqanhyana sín. ²³ A ntá ó kuinhón sín kixin tí nkexro k'u'échréhe sín chrók'óyán sín la ntá ijie mé tjako tí tan chrókjuinchek'itjáyán ch'án. ²⁴ A ntá ijie tjanchia sín kjuasáya kixin janhan ó tinkachónkia Ìnchéni.

2

Tí iso sín kjeueýa Jesús k'uáyéhe sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén inaá la sákjuikian ch'ín Bernabé la ko kjáxin ch'ín Tito. ² Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkotsékoni tí sín t'etóan núnko ntiha la ntá xrxjankaxián nkexrí tí tan tsaáxinni tjákoaha tí sín jehya judío. Mé xikaha kjuít'a kixin janhan tjínkavan jnkokoqá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekjan ch'án la jehe ch'án mé griego ch'án la k'uëtuqñhya sín kixin chrókua ch'án xroye. ⁴ A ntá iso tí sín kichó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuénte Cristo chóna kjuachaxin. A ntá jehe sín tjínkaon sín kixin chrókjuinchexiteýeheni inaá tí nkehe k'uék'etóan

* 1:13 Hechos 8.3; 22.4-5; 26.9-11

tí ley. ⁵ A ntá tahyani kuente nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etóan kjuakónahya sín ninkehó. A ntá jeheni la tahyani kuente á chojni t'etóan o náhi kixin Dios la jnkokón t'ikon ch'an kaín chojni. ⁷ A ntá kjuátsóan sín kixin Dios ó chjina tí xra tjákoḡa tí sín jehya judío tí tan jina éxi yóḡe tsíchéhe Dios xra ch'in Pedro tjakoḡe ch'an tí sín judío. ⁸ Tí Dios tsík'etuñhen ch'in Pedro ts'óna apóstol tsjakoḡe ch'an tí sín judío la ko kjaxin tsík'etuñna ch'an ts'óna apóstol tsjakoḡa tí sín jehya judío.

⁹ Méxra ch'in Jacobo la ko ch'in Pedro la ko ch'in Juan, mé tí sín t'etóan kuente njnko, mé kjuátsóan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'in Bernabé. Ntá kjuenkayáxinkoni sín kixin jeheni la tsjakoḡeheni tí sín jehya judío la jehe sín nachrohe tsjakoḡe sín tí sín judío. ¹⁰ Jehó k'uetóan sín kixin tsoxraxinkaonni la ko tsotjuéheni tí sín ña la xráxín tóxakonhenni sinchexiteyáni tíha.

Ch'in Pablo kjuentuéhe ch'an tí ch'in Pedro chjasin Antioquia

¹¹ A ntá tíó kjuúji ch'in Pedro chjasin Antioquia la kjuentuáḡa ch'an kixin ntoáhya kjuích'e ch'an. ¹² Senó k'uekjineko ch'an iso chojni kjónté jehya sín judío. Ntá ikui iso sín kuixín tí tjen ch'in Jacobo. A ntá kjuankixin k'uaxrjenta ch'an la kuitóḡe kjónekohya ch'an tí sín jehya judío a. Xíkaha kjuích'e ch'an kixin chrakonhen tí sín kui kixin tí sín neko ch'an naḡa tsíkaha sín xroye. ¹³ Tí iso sín kichó ni judío kjaxin kuítekakonhen sín tí ch'in Pedro kjónté ntoáhya kjuenkayáxin ch'an. Kjaxin ch'in Bernabé la kjuacha kjuachroe sín ch'an kixin tí nkehe ntoáhya kjuích'e sín. ¹⁴ A ntá tíó k'uikuñ kixin tí nkehe kjuakoxin sín la tóyóḡehya tí chrónka tí tan jina tsaáxinni tjako sín la ntá nixjaha tí ch'in Pedro nkayakon kaín tí sín tsíkójnkotsé. Ntáxrañ kixin: "Jaha mé ijnko chojni judío la kjónté itjen éxi jehya ijnko chojni judío. ¿A ntá kuente tétuñhén tí sín jehya judío kixin chrók'uejón sín éxi chrókóyóḡe tí sín judío?"

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjenixinni chojni judío desde tí kokjéxinni la jeheni na chóntahyani jie éxi tí í so chojni chónhya Dios. ¹⁶ Kjónté xíkaha la ó noheni kixin tsotjuáxinhya ijje chojni tí nkehe tsík'etóan ch'in Moisés. Jehó tí sín tinkáchónki Jesucristo mé tsotjóá ijje sín. Méxra kjaxinni tinkáchónkini Jesucristo kixin tjinkaonni sinchetjóá ch'an ijjeni kixin titekaonni ch'an. Méxra ninxeró tsjachaha tsotjuáxin ijje sín kixin chrókjuinchexiteyéhe sín tí nkehe t'etóan tí ley.

¹⁷ Tí tjinkaonni tinkáchónkini Cristo kixin tsotjuáxin ijjeni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetóan kixin chrókjuasinni jie. Kjá chaxín náhi. ¹⁸ Tí kuitóḡeheni tí ley la ntá naḡa chrókjanni chrókuiinkáchónkini tí ley inaá la tíha la ó jie kuéntení tíha. ¹⁹ A ntá tí ley la kjuanchia jie k'uénxian. A ntá jie la tjéchuñ kixin tinkáchónkia Dios. ²⁰ Janhan la ó tsík'en kixin ó k'uénkian Cristo. A ntá jie la janhya tjéchuñ. Cristo mé tjéchónxin tí janhan. La ntá jie la tjéchónxian tí cuerpo chonta kixin tinkáchónkia tí Xjeñ Dios kixin jehe ch'an la tjuña ch'an la k'uenyákonhenni ch'an. ²¹ Tjinkakonhya tsjanoá tí kjuasáyé Dios. Tí chrókótjuáxin ijje chojni tí ley tsík'etóan ch'in Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuákoḡará mé kuinhínra kixin Cristo k'uénxín tí ntaacruz k'uenyákonhenni ch'an. ² Jnkokoḡá nkehe tjinkaḡavan chrókjuateherá. ¿A k'uayéxinrá Nchakuen Dios kixin kuítekáonrá tí nkehe tsík'etóan ch'in Moisés o á k'uayéxinrá Nchakuen Dios kixin kuítekáonrá tí tan chrónkani kuinhínra? ³ Imá lontirá jahará. Tí kjuankixixínra la kuítekáonrá kjuachaxiñ Nchakuen Dios. A ntá jie la tjinkáonrá jahorá sinchekjintaxínra tí xra. ⁴ ¿A chónkó kaín tí nkehe tsík'atsínkará? Kjá chrókjuinkitsa chrókjuích'e xra tíha. Jehya chónkó tí nkehe kjuasótiaxinrá. ⁵ ¿Nkekuénte kjuanjon Dios tí Nchakuen ch'an la ko kjuasin ch'an kjuaxroan k'uíkonrá? Jehya k'uayéxinrá tíha kixin kuítekáonrá tí nkehe tsík'etóan tí ley. Náhi. K'uayéxinrá tí nkehe kixin kuinkachónkirá tí tan kuinhínra.

⁶ Ch'in Abraham kuítekaon tí nkehe k'uetóan Dios ntá Dios k'uíkon kixin jina ch'an. ⁷ Méxra chrókónohará jahará kixin tí sín chaxín tikínixin sín ch'in Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kixin tí sín jehya judío mé sinchetjóá Dios ijje sín kixin tsinkáchónki sín ch'an. Mé xíkaha Dios mé chénka ch'in Abraham ósé tí tan jina, ntáchro ch'an kixin: "Ijnko nkexro ts'axrjenixin tí jaha mé tsoyaonxin kaín nación."* ⁹ Mé xíkaha kjaxin kaín sín tinkáchónki Dios mé tsoyaon sín jnkokón éxi kóyaon ch'in Abraham kixin kuítekaon ch'an.

* 3:8 Génesis 12.3

¹⁰ Kaín sín jehó tinkáchónki tí nkehe tsík'etōan ch'ín Moisés la tsjasóte sín káxin ntáchro xroon itén Dios káxin: "Tsjasóte kaín tí sín tsjachahya sinchexiteyéhe tí nkehe tsík'etōan tí xroon chóna ley."[†] ¹¹ Ntá ó ntoá ntáchro káxin kohya nkexro tsotjuáxin ijíe sín tí tsitekaon sín tí ley. Xroon itén Dios ntáchro káxin: "Tí nkexro tsikótjóa la tjejóchónxin sín káxin tinkáchónki sín Dios."[‡] ¹² Ntá tí chrókuinkáchónkini tí ley tsík'etōan ch'ín Moisés la chrókuinkáchónkiyhani Cristo. Ntáchro xroon itén Dios káxin: "Tí nkexro sinchexiteyá tí ley la táhó chrók'uejóchónxin sín."[§]

¹³ A ntá Cristo kjuatsen ch'án kaín tí chrókjuasótexinni tí ley. Tí náhi la chrókjuasóteni káxin chrókjuachahyani sinchexiteyéheñi tí ley. Jehé ch'án kjuenka ch'án tí ijíeni káxin k'uenyákonhenni ch'án. Ntáchro xroon itén Dios káxin: "Kaín tí chojni chóna jie ts'ejótjian sín ijnko nta ntá its'en la mé xíkaha k'uáyéhe sín tí kjuanínkaon kuente Dios."^{*} Mé xíkaha k'uikon sín tí ch'ín Jesús. ¹⁴ Mé xíkaha kónhen káxin ntá tí nkehe chénka Dios tí ch'ín Abraham senó mé ts'áyéhe tí sín jehya judío káxin kjuachaxièn Cristo Jesús. Ntá xíkaha kaín ní ts'áyéheñi tí Nchakuen Dios káxin tinkáchónkini ch'án mé xíkaha tsintáchro ch'án.

Tí ley la ko tí nkehe kjuanjon Dios

¹⁵ Kichóni, tíhi mé sjintayóaxian kuente chojni ó. Tió ijnko chojni ch'éna ijnko xroon tsochóna firma kuente sín la ntá xitjahya ts'óxika í jnko nkexro la xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham káxin tsjanjon ch'án nkehe ts'áyéhe tí nkexro ts'axrjenixin ch'án. Tí xroon itén Dios ntáchrohya káxin kaín nkexro ts'axrjenixin ch'ín Abraham chrók'uáyéhe tíha. Náhi. Ntáchro káxin ts'áyéhe jnkokoá nkexro ts'axrjenixin ch'án la mé Cristo tíha.[†] ¹⁷ Méxra xrxjan tíhi. Dios chénka tí ch'ín Abraham ijnko nkehe chaxín la tsoxiteyá tíha káxin éxi yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchronka ch'ín Moisés. La ntá kjónté xíkaha la xitjahya tsoxika tí nkehe tsíchronka Dios ó tsontáchro chojni káxin tjeoanhya tí nkehe tsintáchro ch'án.[‡] ¹⁸ Tí chrókjuanjon Dios nkehe káxin chrókjuinchexiteyáni tí nkehe k'uetōan tí ley la ntá tí nkehe tsintáchro Dios senó mé chrókiteyáhya. A ntá Dios mé tsíchénka ch'ín Abraham káxin sinchekjtonhen ch'ín Abraham tí nkehe kjuasáyé ch'án.

¹⁹ ¿A ntá xíkaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley káxin tsoñoexinni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsjia tí nkexro ts'axrjenixin ch'ín Abraham, mé tí nkexro kjuelyá Dios káxin xíkaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxon ch'án. ²⁰ A ntá tí nijxhe Dios tí ch'ín Abraham la jehó ch'án la ko jehó Dios la méxra t'ichjánxinyha í jnko nkexro.

Tí xra kuente tí ley

²¹ ¿A ntá á chrók'uaxrjéxin káxin tí ley tsík'etōan ch'ín Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón la ntá chrókótjuáxin ijíeni tí chrókuitekaonni tí nkehe t'etōan tí ley. ²² A ntá tsintáchro xroon itén Dios káxin tí jie mé t'etuenhen kaín xín chojni káxin ntá tí sín chrókuinkáchónki Jesucristo ntá chrók'uáyéhe sín tí nkehe tsíchronka Dios.

²³ A ntá tí naxa kuihya Cristo la ntá tí ley la k'uetuenhen kaín ní la k'uejóchónhenni káxin chrókónoxín tí nkehe chrókuinkáchónkini. ²⁴ Tí ley la éxi ijnko maestro kuente chánjan k'uetōan. A ntá jie ikui Cristo la jehé ch'án mé kótjuáxin ch'án káxin titekaonni ch'án. ²⁵ A ntá ijie ó titekaonni Cristo la í nchexiteyèhyani kaín tí nkehe t'etōan tí ley.

²⁶ A ntá jahará ó k'ónará xjeen Dios káxin ó tinkáchónkirá Jesucristo. ²⁷ Kainrá kuikitiaxinrá kjuachaxièn Cristo mé xíkaha jehé ch'án kótjuáxinrá ch'án. ²⁸ A ntá jehya tjeoan á chojni judío ó á chojni jehya judío ó á chojni ch'exón xra ó á chojni t'etōan ó á chojni ntoa ó á chojni chjin. Kaínni la ó k'ónani jnkokoá káxin tinkáchónkini Cristo. ²⁹ A ntá tí tinkáchónkini Cristo chaxín la ntá tí xíkaha ó chaxín tsík'axrjenixinni ch'ín Abraham la ts'áyéheñi tí nkehe tsíchronka Dios.

4

¹ Mé xíkaha ntáxrxjan tíhi. A ntá ijnko chánjan tió chrók'uen tí it'é ntá chrókuitegoke tí nkehe kuente tí it'é la jehé ch'án la tóyóhó ijnko nkexro ch'exón xra káxin tí jehé la xitjahya t'etōan xra kjónté chaxín kuente ch'án kaín tí nkehe a. ² Siín nkexro t'ayakonhen ch'án la t'etōan tí xra kuente ch'án tsjixrakája tí yaon tsintáchro tí it'é. ³ Mé xíkaha kónhen tí jeheni. Káxin tí naxa k'uéchánjani la kuítekaonni kaín tí nkehe kuente chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjenixin ch'án ijnko chojni chjin. La kjuínchexiteyá ch'án kaín tí nkehe tsík'etōan tí ley kuente Moisés. ⁵ Ikui ch'án xíkaha káxin

† 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7 ‡ 3:17 Éxodo 12.40

tsaáxinni ch'án kjónté senó k'uek'etuñhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxin: "It'èni jaha mé kuéntá tí jeheni." ⁷ Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekijonhanrá tí nkehe kuénte ch'án kixin tinkachónkirá Cristo.

Ch'in Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uechonhyará Dios la kjuinchesteyéhérá tí dios chaxínhya. ⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naxa chrókuinchesteyéhérá tí nkehe tinkáchónki chojni. ¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna kixin á chónkó tí xra kjujt'a kjuakohará.

¹² Kichóni, xrjanóghará kixin chrókóyóghará éxi tí janhan kixin janhan mé tóyóhe éxi k'uejorá senó kixin t'etuñhyani tí ley. Janhan la tékahyará ninkehó jie. ¹³ Ó nohará kixin tió saxón kjuakohará tí tan tsaáxinni la k'ueútsankahyana kixin k'ueñina k'uechonta ijnko chin k'uek'ijínchekjoténa. ¹⁴ Kjónté xikaha k'ueñina la jahará kjuanoóghará tí janhan la k'uechontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxi chrók'uayéhérá ijnko ángel kuénte Dios o éxi chrók'uayéhérá jehe Ìnchéni Jesucristo mé xikaha kjuak'é jína ntiha. ¹⁵ ¿Nkehe kónhen tí kjuachéhe k'uechontará? Kixin ntáxrjan kixin jína tí jahará kixin tjínkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákónnará jehó kixin kuinhinrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuitóhéhérá tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jína chrókótjínkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekáonrá jína. ¹⁹ T'ikonní tí jahará éxi xjeenni. Ijie la imá kjuíncheníhi asenná kixin tóxakonna tí jahará. Éxi yóhe ijnko iné xjan tsjoté tjan tió sinchekokjilhi tjan xjeen tjan mé xikaha janhan la naxa tsjasótena kixin tjínkavan kixin Cristo chrókjuintchetjóá tí jahará. ²⁰ Chrókójina ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuinchesteyéxin ch'in Pablo tí tjan Agar la ko tí tjan Sara

²¹ A ntá jie chrónkará nkehe. Jahará naxa tjínkáonrá chrókjuintchesteyéhérá tí ley tsik'etqan ch'in Moisés la ¿á kuiénhyará nkehe chro tí ley? ²² Ntáchro kixin ch'in Abraham mé chóntha ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuñhya. ²³ Tí xjeen tjan ch'exón xra kokjilhi ch'án éxi tokjilhi chojni ó. A ntá tí xjeen tí tjan t'ítuñhya la mé ó kokjilhi ch'án kixin tsoxiteyá tí nkehe tsintáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsik'etqan Dios. Tí tjan Agar mé tóyóexín tí ley xránjonxin ijna Sinaí. La ntá tí sín titekaon tíha mé éxi chojni ch'exón xra tí jehe sín kixin t'ítuñhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuñhen sín la ko kaín xjeen sín. ²⁶ A ntá tí chjasin Jerusalén itjen nkaya nkajni la mé t'ítuñhya. Náhi. Mé jeheni la kuénteni tíha. ²⁷ Ntáchro xroon itén Dios kixin: Jaha chojni chjin chontahya chánjan kjónté chrokócháha.

Jaha k'uikohya ninkehó kjuatjoté kixin kjuinchestekokjijehya xjan la kjónté chrokócháha.

Tí tjan kuítínkehe na mé nchónhya inté tjan ts'íkon tjan,

a ntá tí tjan kjuak'eko xii tjan la kánhyó ts'íkon.†

²⁸ Kichóni jeheni la éxi yóhèni ch'in Isaac kixin kaín ni la xjeen Dios kixin xikaha tsintáchro ch'án. ²⁹ A ntá éxi senó tí xjan kokjilhi éxi tokjilhi chojni ó la jehe ch'án k'uechónkíhi ch'án tí xjan kokjéxin kjuachaxién Nchakuen Dios. Mé xikaha kjaxin sítónhen jie. ³⁰ A ntá ntáchro tí xroon itén Dios kixin: "Tétuñhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítónhen tí xjeen tí tjan t'ítuñhya."‡ ³¹ Méxra kichó ni, kaín ni la jehya xjeen ijnko tjan ch'exón xra. Náhi. Jeheni mé xjeen tí tjan t'ítuñhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuñhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuñhen inaá.

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10

² Tinhínrã, janhan Pablo mé ntáxrjan kixin tí chrókuarã tí xroye a ntã ó chónkó chrókuinkachónkirã Cristo. ³ Tjínkãvan tsóxrjanka inaã kixin tí jnkójín nkexro itsa tí xroye la jehe ch'án mé t'ichjánxin sinchexiteyéhë ch'án kaín tí ley tsíkjin ch'in Moisés. ⁴ A nta jaharã la xritjéyará tsotjuáxin ijjará kixin sinchexiteyéhérã tí ley la ntã ó kujtohérá Cristo la ko ó kujtohérá tí kjuasáyë Dios tjuaharã. ⁵ A ntã jeheni la tinkáchónkini Cristo la chóntani Nchakuen Dios la ntã tjejóhóhenni kixin tsjintaxin tsotjóã ijjéni. ⁶ Jeheni mé tinkáchónkini Jesucristo la ntã kánhyó tjeotan tí xroye. Antsí tjeotan chrókuinkáchónkini Ìnchéni la ntã tí tinkáchónkini Ìnchéni la chrótjuèheni kichó ni.

⁷ Jaharã la jina kjuankíxinrã tinkáchónkirã Ìnchéni. ¿A ntã nkexro k'uetóan kixin chrókujtohérá tí nkehe chaxín? ⁸ Jehya nkehe kuente Dios tí tjejoch'erã méhe. Méxra jehe ch'án la kjueyará ch'án. ⁹ Ntáchro sín kixin tí ch'o t'óna niotja tsjiko intsikóã tí xroan nchek'ánki niotja, a ntã ts'ánki kaín tí ch'o. ¹⁰ A ntã janhan tinkáchónkia Ìnchéni la ko ó nòna kixin jaharã kjaxin tinkáchónkirã ch'án la kjã í chrókjuenkayáxinhyarã í jnko nkehe. A ntã Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kichóni, tí naça chrókúetóan chrókua chojni xroye la ntã tí sín judío chrókónínkakonnahya sín. Tí xikaha la chrók'uantaxienhya sín tí tan jina chrónka nkexri k'uenxin Cristo tí ntacruz. ¹² Méxra tí sín ntaxakonhanrã la t'etóan sín itsarã xroye la íchá jina naã chrók'uatísinkó chrókóchrít'o sín kaín.

¹³ Jaharã kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhí. Chrókjuinkitsani kichó ni la ko chrótjuèheni kichó ni. ¹⁴ Mé xikaha tí ley mé t'axrxjén kixin: “Chrótjuéhérã kichuarã éxi tjuèxinrã asánrã.”* ¹⁵ A ntã tí chrókjónterã kichuarã la ko chrókjónterã kichuarã la ntã chrókóxakonhanrã kixin tí xikaha la chrókjuinçek'itjáyánrã kichuarã.

Tí jje chrókjuasin chojni la ko tí nkehe t'etóan Nchakuen Dios

¹⁶ A ntã ntáxrjan kixin chrók'uejorã éxi tjínkaon Nchakuen Dios, a ntã chrókjuéyáhyarã tí nkehe jínahya chrókjuenkayáxinrã. ¹⁷ A ntã tí nkehe jínahya tjenkayáxinrã la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrã la tjanjonko kichó. Méxra jaharã la xitjahya ch'erã tí nkehe tjínkaonrã chrókjuich'erã. ¹⁸ A ntã tí Nchakuen Dios tjetjinkitsarã, a ntã jehya tí ley t'etuánhanrã jie.

¹⁹ Xrahya ts'ikonní tí jje tjasin chojni jínahya tjenkayáxin. Mé tíha la tí sín tjasinko jje chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjangya, la ko tí chojni nchexroan, la ko tí chojni níinkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjínkaon jehó tsochónta itsjé nkehe, la ko tí chojni tjínkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjäya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxi yóhe senó mé k'uetjónkarã la ko ijje la xikaha tjetjónkarã inaã kixin tí nkexro xikaha tinkákjasin jie mé xitjahya ts'áyéhë sín tí kjuachaxin kuente Dios.

²² A ntã tíó chóntani Nchakuen Dios ntã tsotjuèheni kichó ni, la ko tsóchéheni, la ko kjuaxróxin ts'ejóni, la ko tsóchóhenni tsonínkakonnahyani, la ko jnkójina ts'ejókoni kichó ni, la ko nchexiteyáni jnkójina. ²³ La ko tsóhnhkehanyi, la ko ts'etueghenni asénni kixin tsjasinhyani jie. Kohya nijnko ley chrókjuinçekjasóteni kixin tí jina chrók'uejóni xikaha. ²⁴ Mé tí chojni tinkáchónki Jesucristo la kaín jie k'uechónta sín la ko tí jínahya k'uejénkayáxin sín la ó jjuenkã Ìnchéni kjuák'enkáni ch'án ntacruz. ²⁵ A ntã tí tjejókoni Nchakuen Dios t'ichjánxin tsítóheni kixin Nchakuen Dios ts'etueghenni.

²⁶ Méxra chrókjuinchehnkehanyi la ko chrókjuachaxinhyani kichó ni la ko chrókóchjinoxienhyani.

6

Tjínkitsarã kichuarã

¹ Kichóni, a ntã tí chrók'uíkonrã jnkójín nkexro kjuasin ichrén jie a ntã tí jaharã tí chaxín chontarã Nchakuen Dios la chrókjuéntuéhérã sín la chrókjuinkitsarã sín. A ntã jnkójina chrónixjehérã sín, a ntã jaharã la chrókóxakonhanrã kixin xikahya chrókónhanrã chrókjuásinrã jie kjaxin. ² Tsjínkitsarã kichuarã kixin jónhya tsamará tí nkehe ye. Kixin tí xikaha la ó chrókjuinchehiteyáni tí nkehe t'etóan Cristo.

³ Ntã jnkójín nkexro ntáchro kixin imã tjeotan tí jehe ch'án la chaxínhya tíha la jehó ch'iyehë asén. ⁴ Jnkójnko chojni chróxraxinkaon a nchóxon tjenkayáxin la chrókónohe kixin

* 5:14 Levítico 19.18

ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni. ⁵ Kíxin jnkojnko chojni yámá tí jię kuènte.

⁶ Tí nkexro xrakohę tí tan jına la chrókjuinkįtsa sín chrókjuanjon sín nkehe chrók'uáyęhe tí nkexro tjako.

⁷ Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín ts'áyęhe sín. ⁹ Mé xikaha chrókóxrjéhyani chrókjuich'eni kaín nkehe jına kixin tí tsoxrjéhyani la ntá chaxín tsjixraká tí yaon tsjachani ts'áyęhęni tí nkehe jına. ¹⁰ Méxra xikaha xráxin chrókjuich'eni nkehe jına la antsí t'ichjánxin chrókjuinkįtsani tí sín kichó ni tinkáchónki İnchéni.

Ch'in Pablo nchexasinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo. ¹³ Kjóté tí sín tsíka xroye la nchexiteyáhya sín kaín tí nkehe t'ętoan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontácho sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sintahnke ninkehó. Íchá jına chróntáxrjan kixin Cristo k'uenyákonhęni. A ntá xikaha k'uenxín Cristo tí ntacruz la ntá tí nkehe k'uék'ętoan kuènte chjasintajni la kjaxin k'uitjýan la ko janhan kjaxin kuitohą tí nkehe kuènte chjasintajni. ¹⁵ La ntá ninkehó sínkihya á tsíka chojni xroye o náhi. Tí nkehe sínki la chrók'ónani ijnko chojni nixín. ¹⁶ A ntá tí sín ts'áyęhe kjuaxróxin kixin kujkonóhęhe Dios tí jehe sín la mé kaín tí sín kuítekaon tí nkehe t'ętoan ch'án mé kaín tí sín chaxín tsík'óna xjęen ch'án.

¹⁷ A ntá ijie la tjínkakonhya kixin chrók'uekana jię ninkexró. Janhan mé chaxín chonta tí tsíkatsęoxnín tsíchrít'ę cuerpo kuèntana kixin kjuasótexinna kixin kjuít'aha xra İnchéni Jesús.

¹⁸ Kichóni tjánchą İnchéni Jesucristo kixin kjuasáyę ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí ninko chjasin Éfeso

¹ Janhan Pablo tsíkjeýána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko titekáonrá Cristo Jesús. ² Tjétjáncháha It'éni Dios la ko Ìnchéni Jesucristo kixin kjuasáyé ch'án chrókjuintayonará ch'án la ko chrótjáhará ch'án kjuaxróxin.

Ts'áyéheni tí nkehe jina kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jina tuxin nkaya nkajni kjuanjon ch'án. ⁴ Dios mé kjuéyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóani ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjinhin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xikaha kuaáxinni ijné tí Xjeen ch'án k'uitji la xikaha tsjixin kaín ijnéni. ⁸ Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuiénxinni jina la ko kjuanjon ch'án kjuaxrexinkaon jina. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjinhin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchronka ch'án. La ntá jehe ch'án tsjanjon kjuachaxin kixin Jesucristo ts'etueñhen ch'án kaín xín nkehe siín nkaya nkajni la ko chjasintajni.

¹¹ Dios kjuéyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxi tóxrjinhin Dios. ¹² Mé xikaha kjuich'e ch'án kixin ntá jeheni kuítekaonni Cristo saoxin chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínra tí tan jina ntoá chrónka nkexri tsaáxinni, a ntá ó kuinkachónkirá Cristo. La ntá jnkokóá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. ¹⁴ Tí Nchakuen Dios kujtonhenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'in Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuinhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios. ¹⁶ Ntá janhan nunca títuáhya nixjahá Dios tjáncháha kjuasáya kixin ó tinkachónkirá ch'án. ¹⁷ Tjénixjahá Dios, mé jehe ch'án mé ichr'án Ìnchéni Jesucristo, mé It'éni imá tjeotan la tjétjáncháha ch'án kixin tsotjáhará ch'án kjuaxrexinkaon jina kuènte Nchakuen ch'án kixin ntá antsí chrókuiénxinra jina tí nkehe kuènte ch'án kixin ntá antsí má chróchoxinra ch'án. ¹⁸ Kjaxin tjétjáncháha Dios kixin tsjinkjitsa ch'án tsjanjon ch'án ijnko kjuaxrexinkaon jina kixin ntá tsonohará ts'ejochonhénra kixin xikaha kjuéyará ch'án. La ko tsonohará kixin imá tjeotan tí nkehe sinchekjtonhenni ch'án kixin jeheni mé tinkáchónkini ch'án. ¹⁹ La ko kjaxin tjétjáncháha Dios tsjinkjitsará ch'án tsonohará kixin tí kjuachaxin kuènte ch'án mé ijnko nkehe imá jie noehyani nketi kjuéxin. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chónani la ko tí kjuachaxin imá jie kjuakoxin ch'án ²⁰ tió kjuínchexechón ch'án Cristo. Ntá Cristo sákjui kjuák'etjaxin ch'án tja chjina tí It'é ch'án itjen nkaya nkajni. ²¹ Mé xikaha kjuanjon Dios kjuachaxin kixin Cristo ts'etueñhen ch'án kaín xín gobierno la ko kaín tí sín t'etgan. Ijie tjet'etueñhen ch'án kaín xín nkehe siín chjasintajni la ko chr'éxin ts'etgan ch'án kjaxin. ²² Cristo k'uáyéhe ch'án kjuachaxin ts'etueñhen kaín xín nkehe siín. Jehe ch'án mé ts'etueñhen kaín tí sín k'óna ninkóé ch'án. ²³ Tí ninko mé éxi tí cuerpo kuènte ch'án la jehó ch'án mé t'etueñhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxién Dios

¹ La ntá ijie Dios mé kjuínchekjtonhanra tí kjuachón jnkochrixin kixin tinkachónkirá Cristo. Senó la jahará la éxi tsík'enra kixin tí jínahya k'uékjich'erá la ko tí jie k'uékjásinra. ² Mé xikaha k'uéchréhérá éxi sitónhen chjasintajni. K'uékjinchexiteyéhérá éxi tóxrjinhin tí nchakuen jínahya t'etueñhen tí xrintó la ko t'etueñhen kaín xín tí chojni titekakuenhya

Dios. ³ Kaínni xikaha k'uék'ejóni tí ósé a naḡa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naḡa xikahó chrókjuih'eni la Dios imá chrókjuihchekjasóteni éxi tsjasóte tí í so sín. ⁴ A ntá Dios mé imá kuikonóeheni ch'án la ko imá tjuèheni ch'án. ⁵ La ntá kjuanjón ch'án tí kjuachón éxi chónata Cristo. Jeheni la éxi chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexéchón Cristo Jesús la ko kjaxin jeheni tsóxechónni kixin ts'ejókoni ch'án nkaya nkajní. ⁷ Mé xikaha kjuíh'e ch'án kjuakoxin ch'án la naḡa tjetjakoxin ch'án kixin tjuèheni ch'án la ko kjuínkítsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkáchónkirá ch'án kixin táha la jehya jahóra k'uitjará tíha. Náhí. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jína kjuíh'eni kixin chrókjuihchekjénni. ¹⁰ Dios mé kjuíh'éna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókjuih'eni tí xra jína kixin xikaha tsíkjenkayáxin ch'án tí senó a.

Kjuaxróxin tjeóni kixin tinkáchónkini Cristo

¹¹ Méxra jahará la jehya chojni judíora. Mé tí sín judío ntak'inrá sín chojni chónthaha tí xroye tí jahará. A ntá tí sín judío, mé tí sín itsa sín xroye cuerpo kuente sín, mé nchek'in sín asén sín tí chojni chónthaha xroye. ¹² Xráxinkáonrá kixin tí senó la k'uéchonhyará Cristo. Jahará la jehya kuente tí nación Israel la xikaha k'uéchonhyará tí nkehe tsík'etqan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'uéchonhyará Dios la k'uéchoénhyará kixin chrókuaará. ¹³ La ntá jie la ó tinkáchónkirá Cristo Jesús. Jahará tí ósé imá ikjín k'uék'ejorá. La ntá jie la ó kóhchineherá ch'án kixin k'uenyákonhánrá ch'án, k'uitjí ijní ch'án. ¹⁴ Jehé Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuihchekjénni sín kixin k'óna éxi jnkokoá chjasin. Cristo k'óxika ch'án tí kjuanjón éxi ijnko tjt'ó k'uinákonhén. ¹⁵ Jehé ch'án kjuasóte ch'án, la kjuatsen ch'án tí ley. Tí iyó chjasin k'uéjó kjuíh'éna ch'án jnkokoá chjasin nixin kixin tinkáchónki sín ch'án. Mé xikaha kjuanjón ch'án kjuaxróxin. ¹⁶ Mé xikaha k'uenyákonhenni ch'án k'uenxin ch'án tí ntacuz la kjuakjiih ch'án tí kjuanjónkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuente ch'án.

¹⁷ Cristo mé ikui la kjuakohe ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjeñ Dios la ko kjaxin tí sín chjinaxón k'uéjó. ¹⁸ A ntá kjuachaxin kuente Cristo la kaín ni kjónté jeheni o í so chojni mé tsóhchinehenni It'éni Dios kixin jnkokoá k'uáyéheni Nchakuen ch'án. ¹⁹ A ntá jahará la í tóyóahyará chojni tsíkjiñin ókjé la ko jahará la jehya ókjé chjasin tjejorá. Kaínni la chónthani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjt'ó jie k'óna chritaón tí xro k'uejo tí sín kjueyá Jesús la ko tí sín tsichr'án Dios chrónka itén ch'án ósé. La ntá Jesucristo mé tí xro imá t'etqan kuente tí tjt'ó a. ²¹ Tí xranikixixín mé Cristo la chritaón k'óna kuente nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko njnko tjóá kuente Inchéni. ²² Mé xikaha jahará tinkáchónkirá Cristo la tsójnokotsérá kaín rá ts'óna éxi ijnko nchia kuente Dios la ntaha tsjak'exenhen tí Nchakuen ch'án.

3

Ch'in Pablo k'uáyéhe ch'án tí xra tsjakohe ch'án tí sín jehya judío tí tan jína

¹ Mé xikaha janhan Pablo mé tjejchinaxián tí tjákua itén Cristo Jesús kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjón ch'án tí xra k'uayáha kixin tsjákohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéherá. ⁴ Tíó sinchekuáxinrá tíha ntá tsonohará kixin ó nóna tí nkehe kuente Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuente Nchakuen Dios la Dios kjuínchenoéxin tí sín kjueyá Jesús ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokoá ts'óna sín tí cuerpo kuente Cristo la jnkokón ts'áyéhe sín kaín tí nkehe tsichrónka Dios sinchexiteyá Cristo Jesús.

⁷ Janhan k'uékitekakonhya, a ntá jie kjuasáyé Dios kjuanjón ch'án tí xra í sít'a kixin tsjákuu tí itén ch'án kixin tí kjuachaxin kuente ch'án. ⁸ Janhan mé kánhyó tjeoan kixin janhan la imá intsína la kaín tí í so sín tsíkjinchetjóá Dios la antsí tjeoan sín. Kjónté la Dios mé kjuínchekjítónna tí xra imá tjeoan kixin tsotjanka tí sín jehya sín judío tí tan jína nkexrí imá tjeoan tí nkehe kuente Cristo. ⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehé ch'án mé kjuíh'éna ch'án kaín xín nkehe. ¹⁰ Mé xikaha kónhen kixin ntá tí sín kuente njnko tsjákuéxin sín kaín xín

tí sín t'etəan nkaya nkajní kixin tsoñohe sín kixin xikaha kaín nkehe jína tsíkjenkayáxin Dios. ¹¹ Kaín tíha kjuích'e Dios éxí tsíkjenkayáxin ch'án ntá Ìnchéni Jesucristo la ó kjuínchaxiteyá tíha. ¹² Kjuasáyé Cristo ntá ó chóntani kjuachaxin tsochjimeheni Dios kixin tinkáchónkini ch'án. ¹³ Méxra xranóahará kixin chrókuítóéhyará chrókuinkachónkirá ch'án kjónté tjetjasótena kixin kain tíha kónhen kixin jahará chrók'uejoxínrá jina.

Cristo imá tjuèheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo. ¹⁵ Mé tsik'áyéhe ihnéjé Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni. ¹⁶ Tjáncháha It'eni kixin tsjanjon kjuachaxin kuènte ch'án ts'ayéhérá kjuachaxièn Nchakuen ch'án ¹⁷ kixin Cristo chróchóna asánrá kixin tinkachónkirá ch'án la ntá ntoá chrók'uejorá éxí ijnko nta tsíkji nuèe ninka la chrótuèhérá kichuárá. ¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko nínkaxín la ko ntetoxín kixin nkexrí tjuèheni Cristo. ¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kain tíhi kjuachaxin kuènte ch'án mé tsjinkítsa tí jeheni. ²¹ Kjuasáyé Dios itjen jnkochríxín kixin Cristo Jesús kjuíncheaka ch'án tí nínko, mé xikaha ó xiteyá jnkochríxín. Amén.

4

Jína chrók'uejókoni kichó ní kixin chóntani Nchakuen Dios

¹ Janhan mé tjechjinaxián tí xra kuènte Ìnchéni. Méxra xranóahará kixin jína chrók'uejorá kixin xikaha Dios tsíkjeýá tí jahará. ² Méxra chrókjuínchehnkehyará la ko chrókójiyahará la ko chrókójinará chrókóninkáonhyará la ko chrótuèhérá kichuárá. ³ Méxra jína chrók'uejokoará kichuárá kixin chrókjuinkítsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyèhe kaín ní kixin jnkokoá nkehe ts'ejóchónhenni. ⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etueñhen ch'án kaín nkehe.

⁷ Jnkojnkonni k'uáyèheni kjuachaxin sich'eheni Dios xra kixin xikaha kjuanjon Cristo. ⁸ Méxra xikaha níxja xroon itén Dios kixin:

“Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekítònhen ch'án chojni jnkojnko kjuachaxin kuènte ch'án.”*

⁹ Ntá nkexrí t'axrxéjín kixin sákjuí ch'án? Tíhi mé t'axrxéjín kixin jehe ch'án mé senó k'uínkajínxin ch'án nkaya nkajní la kjuák'e ch'án chjasintajni. ¹⁰ Jehe ch'án mé k'uínkajínxin ntiha mé ntá jie sákjij ch'án tí nkajní imá noi. La ntá tjet'etueñhen ch'án kaín xín nkehe. ¹¹ Jehe ch'án mé kjuínchekítònhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. ¹² Mé xikaha tí xra k'uáyèhé tí sín kjueyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo. ¹³ Ntá xikaha kaín ní jnkokoá tsinkáchónkini tí Xjen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. ¹⁴ Méxra chrók'ónahyani éxí xjan ntsíntí. Tí xjanntí la xrahya tsjinkí kjuaxrexinkaon éxí ijnko nkehe sákjuíko xrinto xikaha kixin sich'iyèhe sín chojni ijnko nkehe níxin la xrahya titekaon sín. Tí chojni ch'ia tjinkaon sín tsjachroñni sín í jnko ntja ntoáhya kixin chrok'uitjáyèheni Cristo ntá chrókjuasinni jie. ¹⁵ A ntá íchá jína chrónixjani tí nkehe chaxín ntoá la kaín asénni chrótuèheni kichó ní ntá xikaha chrókónoheni kixin xikaha tjinkaon Cristo. Jehe ch'án mé tí kja t'etueñhen tí cuerpo kuènte ch'án. ¹⁶ A ntá kjuachaxièn Cristo kuènte tí cuerpo, tí ch'e xra jnkokón la tjinkítsa kuénté. Ntá jnkojnkonni jina ch'eni xra la mé xikaha ts'ánkí tí xra kuènte ch'án la mé jína chrótuèheni kichó ní.

Tí kjuachaxin níxin kuènte Cristo

¹⁷ Tíhi mé ntáxrxjan la ko tétuanhanrá kjuachaxièn ihnéjé Ìnchéni. Ijie la chrók'uejohará éxí ch'e tí sín chónhya Dios. Kaín nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítíe la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. ¹⁹ Ó tsíkjinchek'itjáyán sín tí kjuaxrexinkaon kuènte sín la í tósuehya sín chrókjuasin

* 4:8 Salmo 68.18

sín jie. Imá tóxrjnhjn sín chrókjuich'e sín kaín nkehe jínahya. ²⁰ A ntá jahará xikahya xrakohará tí nkehe kjuako Cristo, ²¹ tí chaxín kuinhíná kuènte ch'án la ko tsíxrakohará tí nkehe chaxín ntoá kuènte ch'án. ²² Méxra tìtohérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naça t'ayahará. ²³ Jahará t'ichjânxin kixin chrókónjxin tí kjuaxrexinkaon kuèntará la ko tí nchakuanrá. ²⁴ Méxra chrókuákjárá tí kjuaxrexinkaon nixin kjuich'éna Dios xikaha tjinkaon ch'án la ntá chrókuákoxinrá ijnko ntja jína ntoá.

²⁵ Méxra chrókuítóhérá tí kjuach'ia. Méxra jnkojnkórá chrónixjehérá kichuára ntoá kixin kaín ni tsík'onani jnkokoá cuerpo.

²⁶ Tí chrókóninkáonrá la chrókjuásinhyará jie la chrókóninkákonhyará kuènté yaon. ²⁷ Chrókuítóehyará kixin Tsochren chrókjuít'ayahará.

²⁸ Tí jnkojíná kuèrá la tìtohérá kjuachee. Íchá jína kixin itjárá chrókjuich'exíná xra kixin tsochontará chichaon sinchekítqnhéná jnkojín nkexro t'ichjânjnhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánki kjuaxrexinkaon kuènte kichuára la xikaha tsjinkitsará tí sin tjejótinin. ³⁰ Nchek'áváhyará tí Nchakuen Dios kixin tíha mé k'uayéxinrá éxi ijnko xroye kixin tsonoaxínrá kixin jahará mé tinkachónkirá Dios la ko tsochónhéná tí yaon itsi ch'án ntá tsjintaxin tsaará.

³¹ Tìtohérá tí kjuanínkaon chontará la ko tìtohérá tí nkehe ntoáhya tjenkayáxinrá la ko tìtohérá tí kjuanqon la ko kaín nkehe jínahya. ³² A ntá chrókójinárá chrókuikonóehérá kichuára. Sinchek'itjáyehéná ijie kichuára kixin Dios kjuatsen tí jie chontará kixin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxi kjuákoxin tí jehe ch'án. ² Chrótuéhérá kichuára éxi Cristo tjuéhe tí jeheni kixin jehe ch'án la k'uenyákonhenni ch'án. éxi yóhe ijnko kolélo xikaha kjoqehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'onará chojni kuènte Dios la ntá chrónixjahyará kuènté ijnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóna sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuènté Dios la tsjasóte tí sín titekakuenhya sín tí jehe ch'án. ⁷ Méxra chrók'uitohyará tí sín xikaha ch'e.

⁸ Senó la k'uék'ájirá ntja sitié. A ntá ijie ó k'ónará chojni kuènté Inchéni la ó xritjéjorá tí ntja t'inkaséyan kuènte ch'án. Méxra tjenkayáxinrá jína éxi tí sín xritjéjé tí ntja t'inkaséyan. ⁹ Tí t'inkaséyan t'axrjenixin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjnhjn Inchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sitié. Íchá jína tsjákoxinrá tí xra tí itjen tí t'inkaséyan. ¹² Chrókósuéhéni chrónixjani kuènté tí nkehe imó ch'e tí sín jínahya. ¹³ Tí t'inkaséyan mé tsonoxixin kaín xin nkehe la mé tí xrohi ts'ikonxinni jína kaín nkehe. ¹⁴ Mé xikaha ntácho xikihí:

T'áya jaha tjéchrian t'inkatjenxian tí síin tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxi tí sín noehya chrók'uejorá. Náhi. Chrók'uejorá éxi ijnko chojni nohe má. ¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra. ¹⁷ Chrókóqntjhyará. Chrókóxakonhanrá chrókuiéxinrá tí nkehe tóxrjnhjn Inchéni. ¹⁸ Chrókóoanhyará kixin tíha mé chrók'uitjáyaxíná. Íchá jína chrókjuánjonrá kjuachaxin chrók'uetuánhanrá Nchakuen Dios. ¹⁹ Chrónixjéxinrá kichuára tí salmo la ko tí himno la ko chrótsjerá la xikaha kaín asánrá chrókjuancheherá kjuasáyé Inchéni. ²⁰ Jnkochrixin chjehérá kjuasáya It'éni Dios kixin kaín nkehe kjuanjon ch'án la ko chrókjuanchaxíná kjuasáya kjuachaxién ihnjé Inchéni Jesucristo.

Jína chrók'uejókoní tí sín kjéhyani kixin tinkáchónkini Inchéni

²¹ Títékákonhénrá kíchuárá kixin ó tinkachónkirá Ìnchéni. ²² Tí chojni chjin chrókjuinchexiteyéhe xii sín éxi nchexiteyéhe sín Ìnchéni. ²³ Tí chojni ntoa chóna kjuachaxin ts'etuenhen ichjién éxi Cristo mé ikja t'etuenhen tí nínko. Kjaxin jehe ch'án kjuíncheakaá ch'án tí nínko, mé tí cuérpóé ch'án. ²⁴ Méxra éxi tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xii.

²⁵ Tí chojni ntoa chrótjuéhe tí ichjién kixin éxi Cristo la tjuéhe tí nínko la k'uenyákonhen ch'án. ²⁶ Mé xikaha kjuich'e Cristo kixin sinchetjóá ch'án tí nínko mé kjuínchetjuáxin ch'án tí nta kuíkitéxin sín kjuachaxién itén ch'án. ²⁷ Nta tsjanjon ch'án tí jeheni éxi ijnko nínko imá jina chónahya jie la ko chónahya ninkehó nkehe náxrjónhya, mé ijnko nínko tjóá la ko ntoá. ²⁸ Mé xikaha tí chojni ntoa chrótjuéhe tí ichjién sín éxi tjuéxin ch'án cuérpóé ch'án. Tí nkexro tjuéhe ichjién mé kjaxin tjuéhe asén ch'án. ²⁹ Kohya ninkexró ninkakonhen tí cuerpo kuénte. Kaín chojni la ine sín la t'ayakonhen sín cuérpóé sín la mé xikaha Cristo t'ayakonhen tí nínko. ³⁰ Kaíni mé k'ónani cuerpo kuénte ch'án. Jeheni mé ntóe ch'án la ko huésóé ch'án. ³¹ Ntácho kixin: "Méxra ijnko chojni ntoa mé tsítóhe it'é la ko iné kixin tsakja ichjién la yói sín mé ts'óna éxi jnkokóá chojni."* ³² Tíhi mé ijnko nkehe imá jie tienxínhya ninkexró. Mé janhan xrxanka kuénte Cristo la tíha mé nínkoé ch'án. ³³ Méxra kjaxin tjéxrxanka kixin chojni ntoa t'ichjánxin tsotjuéhe ichjién sín éxi tjuéxin asén sín la tí chojni chjin chróchéntehe sín kjuasáya tí xii sín.

6

¹ Jahará chánjanrá la t'ichjánxin sínchexiteyéhérá it'ará la ko inará kixin tjuéhérá Ìnchéni kixin tí xikaha mé jina. ² Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: "Chrókjuikosáyehérá it'ará la ko inará ³ kixin mé náxrjón chrók'uejorá la isé chrók'uejorá ntíhi chjasintajni."*

⁴ Jahará it'é xjan la chrókjuínchekóninkakonhyará tí xjanrá. Íchá jina kixin sínchek'ánkixínrá xjanrá ijnko kjuaxrexinkaon jina kixin ts'ánkixín xjan tsínkáchónki xjan Ìnchéni.

⁵ Jahará chojni ch'e xra mé chrókuitekákonhénrá tí lámóará ntíhi chjasintajni la chróchontehérá sín kjuasáya. Sích'eherá sín xra éxi ch'eherá xra Ìnchéni Cristo.

⁶ Chrókjuich'erá xra jina la jehya kixin tí tjejó sín tjejótsjehe sín kixin ntá xikahó ntá jina chrók'uejoxínrá. Náhi. Éxi ch'eherá xra Cristo kaín asánrá sích'erá xra kixin mé xikaha tóxrjínjin Dios. ⁷ Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra. ⁸ Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jina kjuíuch'e sín.

⁹ Tí jahará chojni lámó mé jnkojina chrókuétuenhénrá tí sín t'ahará xra la séchrókóninkákonhénrá sín. Xráxinkáonrá kixin jahará la ko jehe sín mé jnkokón chrókjuínchexiteyéhérá Ìnchéni itjen nkaya nkajní kixin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A ntá jie kichó ni, nchefuérte asánrá kixin tjejókoni Ìnchéni la tjetóan tí kjuachaxin kuénte ch'án. ¹¹ Chrókuáaxínrá kaín tí kjuachaxin tsjanjon Dios kixin ntá xikaha jina chrók'uejorá la chrókjuít'ayahyará Tsochren. ¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya sín chjasintajni. Tíha mé tjínkaon chrók'uejón tí chjasintajni sítié. ¹³ Méxra chrókuáájárá kaín tí kjuachaxin kjuanjon Dios kixin ntá chrókjuachará tí itsi tí yaon jínahya ntá tí xikaha chrókjuich'erá la ch'éxin la jina chrók'uejorá. ¹⁴ Nchefuérte asánrá. Jina chrók'uejorá. Chrókuítekáonrá tí itan chaxín kixin tí nkehe ntoá mé chrók'uayakonhanrá. ¹⁵ Méxra listo chrók'uejorá sátsjichronkará tí tan tjanjon kjuaxróxin. ¹⁶ La antsí tjetóan chrókuínkachónkirá Ìnchéni. Tíha mé chrok'uinkákonhen tí chica flecha tsochr'án Tsochren. ¹⁷ Tí chrókuáaxínrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókjuítóéhyará chrónixjehérá Dios la jnkochrixín chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkítsa Dios kaín tí sín tinkáchónki ch'án. ¹⁹ Chrónóehérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsoníxja janhan kixin ntá janhan antsí jina chrónixja kixin ntá tsinhín sín tí nkehe ninkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé

* 5:31 Génesis 2.24

* 6:3 Éxodo 20.12; Deuteronomio 5.16

ichr'anna tsoxrjanka tí itén ch'án, mé xíkaha tjéchinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkeexo imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a. ²² Mé xíkaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xíkaha chrókócháhará.

²³ Tjánháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsojtjuèhe kichó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'eheni xra Jesucristo, mé ikjinni tí xroon i chr'anhánrá kain tí jahará kichó ni tinkachónkirá Cristo Jesús tjejórá chjasin Filipos la ko tí sín t'etqan kuènte nínko ntiha. ² Tjanchiani káxin It'éni Dios la ko Ìnchéni Jesucristo kjuasáyé ch'án imá chrókjuincheyaoonrá ch'án la ko chrók'uayéhérá kjuaxróxin.

Ch'ín Pablo tjechrónóhehe ch'án Dios káxin tí sín tinkáchónki Jesús ntiha

³ A ntá tió xráxinkavan tí jahará la imá tjaha Dios kjuasáya ⁴ la ko nixjaha Dios la imá chàna tjáncháha ch'án káxin tsjinkítsa ch'án kain tí jahará. ⁵ Jahará la kjuínkísarà tió kjuákua tí tan jína tí saoxín kuinhínra itén Dios la naxa tjejtjinkítsarà ijie. ⁶ Ó òna chaxín káxin xikaha Dios ó kjuankáxin ch'án ch'e ch'án xra jína káxin kuítekáonrá mé xikaha naxa tsjintaxín sich'e ch'án tsjixrakájia tí yaon tsokjan Jesucristo. ⁷ Jína káxin tjenkayáxian kuènte kain tí jahará. Méxra xikaha imá tjahárá. Jahará la ko janhan la jnkókón kjuachaxin k'uáyéheni la kjónté janhan tjéchjina o itjén tí tjejó tí sín t'etqan tjéxrjanka káxin jína tí tan tsaáxinni. ⁸ Dios la ó nohe káxin imá tjínkavan chrók'uikuan kain tí jahará káxin éxi tjuáxinrá Cristo. ⁹ Tjáncháha Dios káxin tsjinkítsa ch'án tí jahará káxin antsi má chróktjuehérá ch'án la ko chrók'uánkí tí kjuaxrexinkaoon kuéntará káxin antsi chrókuiénxinrá kain nkehe. ¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejórá la ko kohya nkehe chrókjuanchia jje tió tsokjan Jesucristo. ¹¹ Méxra jahará chrókjuich'erá xra jína éxi ijnko nkehe jína chrók'óna káxin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjéchonxian Cristo

¹² Kichóni tjínkavan tsonohará káxin tí nkehe kjuasótexinna la kjuínkítsa káxin kuínhin chojni tí itén Dios tsaáxinni. ¹³ Kaínxín tí chojni siín palacio la ko kain tí í so sín mé nohe sín káxin tjéchjinaxián káxin tinkachónkia Jesucristo. ¹⁴ A ntá tí tjéchjina la itsjé tí sín kichó ni antsi má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinqóxinhin sín káxin tjínkaon sín chrókjuachaxinna sín. A ntá í so sín tjako itén ch'án káxin tjínkaon sín jína chrókjuinkítsana sín. ¹⁶ Kjánchó iso sín tjínkaon sín chrókjuako sín káxin chrókjuacha sín la ntá kénhya asén sín tjako sín. Mé xikaha ch'e sín káxin tjínkaon sín chrók'uekana sín antsi má jje káxin naxa tjéchjina. ¹⁷ La í so sín nixja sín kuènte Cristo káxin tjeúhe sín ch'án la ko tjuana sín la ó nohe sín káxin ntihi tjén káxin tsoxrjanka tí itan tsaáxinni. ¹⁸ Kjánchó ántosenná kjónté á chaxín kain asén sín tjako sín o náhi, la imá chàna káxin chrónka sín tí tan jína kuènte Cristo la antsi má chéhe asenná.

¹⁹ Ó òna janhan káxin kjónté kain nkehe tsonna la kjónté xikaha la tsaáxinna káxin kjuasáyará jahará tjejónixjehérá Dios la ko tí Nchakuen Jesucristo mé tjetjinkítsana. ²⁰ Jína tjéchonhan káxin Dios la tsítqehya tí janhan káxin ichréni nkehe jínaha chrókóna. Tjínkavan tsochonta kjuachaxin káxin jína tsonixja kain asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxén sín káxin Cristo imá chóna kjuachaxin kjónté á naxa tjéchuán o á ó tsik'ena. ²¹ Káxin janhan na Cristo tjéchonxian la ntá kjónté ts'énxian xikaha la mé chrókjuácha. ²² A ntá tí naxa tsjak'é naxa tjéchuán ntá naxa jína sit'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuán. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékjan Cristo. A ntá janhan la ntáxrjan káxin íchá jína tíha. ²⁴ Kjánchó t'ichjánxin naxa chrókjuak'é káxin naxa chrókjuinkítsa tí jahará. ²⁵ Méxra ó òna káxin naxa tsitona tí tjejórá káxin chrókjuinkítsa tí jahará káxin ntá antsi chrókónohará la chrókócháhará káxin jína chrókuinkachónkirá Ìnchéni. ²⁶ Ntá tió tsjasán janhan ts'ejóni inaá la imá tsocháhará la tsjanchehérá kjuasáyé Jesucristo.

²⁷ A ntá jahará chrókjuákoxinrá chrók'uejórá jína éxi ntácho tí tan kjuákoxin Ìnchéni Cristo. Mé xikaha tí tsjasántsahará o náhi la tjínkavan chrókjuinhan káxin naxa imá tinkachónkirá Cristo la ko jnkóqá tjenkayáxinrá la ko jnkóqá tjejoch'erá xra tjakórá tí itan jína tsaáxinni. ²⁸ Chrókuiqéhyará káxin tí sín nínkakonhanrá chrókjuintachakonrá sín. Tí xikaha chróchrakonhyará la chrókónoxin sín káxin ts'itjáyán sín, a ntá chrókónoxin káxin jahará mé chaxín tsaárá. Tíha mé Dios tsjinkítsarà. ²⁹ Ó kuítonhanrá tí kjuachaxin káxin tsinkachónkirá Jesucristo la ko kjaxin kuítonhanrá kjuachaxin tsjasótiaxinrá káxin jahará mé tinkachónkirá

ch'án. ³⁰ Jahará la ko janhan jnkokón ch'eni xra. Jahará ó k'uikonrá senó nkexrí kjuít'a xra la ó kuinhínrá ijie kixin naxa tjet'a xra kjónté nínkakonna sín.

2

Kuítohe Jesús tí kjuachaxin chrók'ueŕtoan ch'án ntá ijie imá tjeoan ch'án

¹ Tí chaxín tí Cristo nchexraxinkaonrá la tí chaxín Cristo tjuàhará ch'án nchexháhará ch'án la tí chaxín tí Nchakuen ch'án xrikoará la tí chaxín nohará kixin tikonóahará ch'án ² la nchexháhará kixin jnkokoá chrók'uejokoará kichuára la ko jnkokoá chrótjuéhérá kichuára la ko jnkokoá chrókjuenkayáxin nchakuanrá la ko jnkokoá xra chrókjuich'erá. ³ Chrókjuenkayáxinhyará chrókuétoanrá la ko chrókjuinchehnkehýará. Náhí. Chrók'ónará chojni t'etóanhyá. Chrók'uikonrá éxí antsí tjeoan tí í so sín, a ntá kánhyó tjeoan tí jahará. ⁴ Ninkexró chrókjuéyá tí nkehe kuénte jehó. Náhí. Chrókjuéyará tí nkehe chrókjuinkítsa tí í so chojni.

⁵ Jahará chrókjuenkayáxinrá éxí kjuenkayáxin Cristo Jesús. ⁶ Jehé ch'án chóna ch'án kaín kjuachaxin kuénte Dios la kjónté xikaha la tjinkakonhyá ch'án chrókjuincheyóhé ch'án éxí Dios. ⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuich'e ch'án xra. ⁸ La éxí ijnko chojni k'ueŕtoanhyá kjuak'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz. ⁹ Méxra Dios imá kjuikosáyehe tí jehé ch'án la ko kjuínchek'in ch'án ijnko ihnjé imá tjeoan. ¹⁰ Kixin ntá tsinhin kaín chojni tí ihnjé Jesús ntá ts'ejóxin toh'in sín, mé tí sín siín nkaya nkajni la ko tí sín siín chjasintajni la ko tí chojni siín chrinki nche. ¹¹ La ko kaín xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhé éxí xrohi t'inkaséyanxín chjasintajni

¹² Jahará kichó ni imá tjuàhará la xráxin kjuínchexiteyánará tí k'uék'ejóni. A ntá ijie la chrókjuínchexiteyánará kjónté ikjín tjén. Chrókjuítóéhyará tí nkehe tsjanjon kjuachón la chrók'uayakonhénrá jnkójina ¹³ kixin Dios ntaxraxinkaonrá s'ich'erá tí nkehe jina tjinkaon ch'án.

¹⁴ Kaín xra ch'erá la chrókóninkákuénhyará kichuára la ko chrókjónthahará kichuára ¹⁵ kixin tsokohya ninkexró tsontácho kixin jahará la chontará jie. Kixin jahará la mé tí xjeen Dios chróchontahará jie, la tjejorá tí siín tí sín jínahya tjasin jie. Na ntá jahará chrók'uinikaséyanxín tí jehé sín éxí tí konoté t'inkaséyanxín tí chjasintajni sítié. ¹⁶ Méxra jahará chrók'uayakonhénrá jina tí tan tjanjon kjuachón. Tí xikaha chrókjuínchexiteyará jnkójina ntá tíó tsi Cristo tsochéhé asenná kixin xikaha xra tjejoch'erá kixin ntá tsonóna kixin jehya ó chónkó kjuak'ékjít'a xra. ¹⁷ Kjónté chrók'uénxian la éxí nkehe chrókjuachatóxixínrá Dios chrók'uikonrá tí janhan. Mé xikaha chrókjuintaxín tí nkehe chrók'jehérá ch'án kixin tinkáchónkirá ch'án, la ntá mé janhan mé tsochána la ko tjínkavan kixin kaín rá xikaha chrók'uayéhérá kjuachéhe. ¹⁸ Méxra chrókóháhará jahará kjáxin la chrók'uayéhérá éxí tí kjuachéhe chonta.

Ch'in Timoteo la ko ch'in Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'in Timoteo tsjijitsjehe ch'án tí jahará kixin ntá tsochána tsinhan nkexrí tjejorá. ²⁰ Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jina. ²¹ Kaín tí í so sín tjeýá sín tí nkehe tóxrjínhin sín ó la jehya tí nkehe tóxrjínhin Jesucristo. ²² A ntá jahará ó nohará kixin ch'in Timoteo ó kjuakoxín ch'án kixin jina asén ch'án kixin jehé ch'án kjuít'akian ch'án xra kjuakoni tí tan jina. Éxí ijnko xjanna xikaha kjuínkítsana ch'án. ²³ Mé xikaha tjínkavan tsochr'an ch'án tsjijitsjehe ch'án tí jahará tíó tsonóna nkexrí tsji tí xra kuéntana. ²⁴ La ko kjáxin chonhan kixin Ìnchéni tsjinkítsana kixin tjoka tsjasán kjáxinna.

²⁵ A ntá kjáxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehé ch'án mé jnkokoá ch'ekoní ch'án xra kjónté nínkakonhenni chojni. Jahará k'uéch'ánrá ch'án ntihi kixin jehé ch'án tsjinkítsana ch'án kaín nkehe tjínkavan. ²⁶ Imá tóxakonhen ch'án tsjijitsjehe ch'án tí jahará kixin ó nohe ch'án kixin tsikinhínrá kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kuíkonóhéhe tí jehé ch'án kjánchó jehya jehó ch'án, kjáxin kuíkonóna Dios tí janhan kixin kánhyó chrók'uavá. ²⁸ Méxra tjínkavan tsochr'an ch'án kixin ó nóna kixin tsocháhará ts'ikonrá ch'án ina la ko xikaha janhan í kánhyó chrók'uavá. ²⁹ Imá chrókóháhará chrókjuiji ch'án kixin jehé ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxí chrókjuikosáyehérá kaín tí í so sín éxí jehé ch'án. ³⁰ Jehé ch'án ó mero chrók'uenxin ch'án tí ch'ehe ch'án xra Cristo. Mé siín kjuaxikaon chrók'uenxin ch'án kixin jehé ch'án kjuínkítsana ch'án kixin jahará xitjahya ts'inkará tsjinkítsará tí janhan.

3

Tí nkehe chaxín sínkí

¹ A ntá tí ijie, kichó ní, chrókócháhará kixin jahará la kuènte Ìnchéni. A ntá tí janhan la xrahya tsokjatee tsokjian tí nkehe ó kjian kixin tíha la chrókuinkitsa tí jahará. ² Chróchontará cuidado tí sín ch'e jínahya éxí konjá la tóchrít'ò sín cuérpòé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxinni Dios kjuachaxièn Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpòéni chrókóchrínjinni. ⁴ A ntá janhan kjaxin jina chróntáxrjan kixin chrókóchrít'ò tí cuérpòé chojni. Ninkexró ántsí chrókóhonta kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uéchonta ijní yaon la ko janhan mé tikiñixian tí sín israelita la tsík'axrjenixinna tí sín tsík'axrjenixin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxí tinkáchónki tí sín fariseo. ⁶ A ntá imá k'uéninkakonhan k'uéchonkíha tí sín tinkáchónki Jesús la ko imá kjuintaxiteyáha tí ley la kohya ninkexró tsontácho kixin chaxínhya tíha. ⁷ Ntá kaín tíha la tí ósé k'uéjkenkayáxian janhan kixin sínkí tíha, a ntá ijie la tinkáchónkia Cristo la ntá tí nkehe k'uékóxrjinna k'uéjkít'a la ntá jie la ninkehó sínkíhya. ⁸ La kjaxin kaín xín nkehe t'íkuan éxí chónkó tíha kixin ántsí má tjeotan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuintak'itjáyán kixin ijie ó tinkáchónkia Cristo la kaín xín tí nkehe k'uéchonta la t'íkuan éxí chjínínó ó kixin ntá xíkaha jina chrókjuak'ékian Cristo. ⁹ Chrókóchána kixin jnkokoá chrók'uejókoni ch'án. Tjéyáhya kixin tí ley chrókjuinixín ijieni tí chrókjuinchexiteyéheni. Náhi. Tinkáchónkia Cristo la tsaáxinni kixin Dios la tsjakjün tí ijieni kixin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tíó xechón ch'án la ko tjínkavan tsjasótexinna éxí kjuasóte ch'án la ko kjónté chrók'uéna éxí k'uénxin ch'án ¹¹ kixin ntá tjínkavan tsjácha tsoxechónna inaá.

Ch'ín Pablo tjínkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha. ¹³ Kichóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuitóhe senó la t'ichjánxin kaín asenná tjichráha tí nkehe naxá t'itjáyán tsjácha. ¹⁴ Kixin xíkaha ntá chrókjuácha chrók'uayáha kaín tí nkehe jina tsjanjon Dios. Jehé ch'án la sinchexiteyá kaín tíha kixin tinkáchónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. ¹⁶ A ntá t'ichjánxin chrók'uejóni éxí tí nkehe ó kjuachani.

¹⁷ Kichóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuakoharáni tí jahará. ¹⁸ Nchónhya xrjankaxián senó la ntá xrjanka inaá la imá tsjanka kixin sín nchónhya sín tjejó sín éxí ninkakonhen sín tí Cristo k'uénxin ntacruz. ¹⁹ Tí sín a mé ts'itjáyán sín. Tí dios kuènte sín la mé tí nkehe ntácho asén sín ó la ko tjínkaon sín chrókjuinchehnexín sín tí nkehe chrókósuèxin sín. Jehó tjenkayáxin sín tí nkehe sín chjasintajni ó. ²⁰ A ntá jeheni kaín ní la mé chojni kuènte nkajni la tjejóchónhenni kixin ts'inkajjinxin nkaya nkajni tí nkexro tsaáxinni, mé Ìnchéni Jesucristo. ²¹ Ntá jehé ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhé éxí tí cuerpo náxrjón chóna ch'án. Tíha mé tsoxiteyá kjuachaxièn ch'án jíé kixin ó chóna ch'án kjuachaxin ts'etuenhen ch'án kaín xín nkehe.

4

Jnkochrín chrókócháhará kixin tinkáchónkirá Ìnchéni

¹ Jahará kichó ní imá tjuahará la ko imá tjínkavan chrókjuasántsjahará tí jahará kixin jahará imá nchechánará kixin jahará mé éxí ijnko nkehe ó kjuácha. Méxra jina chrók'uejorá chrókuinkáchónkirá Ìnchéni kixin tjuahará kichó ní.

² Xrjanógha tjan Evodia la ko tjan Síntique kixin jnkokoá chrókjuenkayáxin sín kixin jehé sín la jnkokoá kichó sín kixin tinkáchónki sín Ìnchéni. ³ Jaha la jina k'uéjoni kjuích'eni xra, méxra xrjanógha tjínkita tí sín chjin kichó ní kixin jnkokoá chrókjuenkayáxin sín. Jehé sín kjaxin kjuích'e sín xra tíó kjuakoni tí tan jina tsaáxinni. Koí tí ch'ín Clemente la ko í so sín kjuích'ekoni xra. Tí ihnjé sín la ó ts'ínixín ts'ínixín ihnje chojni tsaá.

⁴ Nchéchéhérá asánrá jnkochrín kixin tjejókoará Ìnchéni. Inaá kjatee xrjanka nchéchéhérá asánrá. ⁵ Kaín chojni chrókónohe kixin jahará la chojni jínará. Chróráxinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án kixin imá ijíé tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokqá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínjin Dios.

⁹ Chrókjuich'erá kaín tí nkehe kjuákoahará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uikonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjón tí sín filipenses tsjinkítsa sín tí ch'in Pablo

¹⁰ Inchéni imá nchechàna kixin jahará xráxinkáonrá tí janhan inaá. Ntáxrjanhya kixin tsik'itjáyánhanrá tí janhan kixin jahará xitjahya k'uékjínkítsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó. ¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántoséna. ¹³ Kaín xra tsjácha sít'a kixin Cristo tsjinkítsana. ¹⁴ Kjánchó jahará jína kjuich'erá kixin kjuinkítsará kjuánjonrá nkehe t'ichjánxinna.

¹⁵ Tió sákjuixian estado Macedonia la kjuankíxian kjuakua tí tan tsaáxinni inaá la jahóra tí ninjo chjasin Filipos ichr'anrá chichaon k'uayáha kixin cháhará kjuákoahará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuinkítsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsi má chrókjuich'erá tí nkehe tjínkaon Dios kixin ntá ántsi chrókjuachará. ¹⁸ Ó k'uayáha kaín nkehe tsíkjánjonrá la ántsi itsjé chonta. Ó k'uayáha tí nkehe tsichr'anrá mé tí nkehe kuikao ch'in Epafrodito, la kaín tíha la ó tsjácha. Tíha la éxi yóhe ijnko nkehe xraxé náxrjón chróchjehérá Dios mé éxi ijnko iko chrók'oyánrá imá chrókóxrjínjin ch'án. ¹⁹ Tí Dios kuéntana mé tsotjáhará kaín xín nkehe naxa t'itjayan tsákjára kixin chóna ch'án kaín xín nkehe imá náxrjón tje la tsjanjon ch'án kixin jahará la tinkáchónkirá Cristo Jesús. ²⁰ Kjuasáyé It'eni Dios jnkochrixín. Mé xikaha tsoxiteyá. Amén.

Tsjixixín nixja ch'in Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'in t'etōan romano mé nixjahará sín. ²³ Tjáncháha kixin Inchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjevána Jesucristo t'aha ch'án xra kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuitekáonrá Jesucristo tjejórá chjasin Colosas. Kjuasáyé It'eni Dios chrókjuintayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochr'ixin tjancheheni kjuasáya Dios la ko tjanchiani kixin chrókjuintátsa ch'án tí jahará mé jehe ch'án It'é Inchéni Jesucristo. ⁴ Ó kuínhinni kixin jina tinkachónkirá Inchéni Jesucristo la ko tjuéhérá kaín tí sín ó tsíkjinchetjóá Dios. ⁵ Mé xikaha tjejochonhénrá kixin ts'ayéhérá tí nkehe chóna Dios tjan nkaya nkajni. Jahará la xikaha tjejochonhénrá kixin tjejotinhénrá tí tan chaxín kuénte Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuénte Dios kuénté chjasintajni. Mé xikaha kónhen tíó kuinhénrá la ko kuitekáonrá kixin chaxín tjuahará Dios. ⁷ Tíhi mé kjuakoahará kichó ni Epafras. Jehe ch'án la jnkokoá kjuich'ekoni ch'án xra kixin jehe ch'án la jina ch'ehe ch'án xra Cristo kixin xikaha tjinkátsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuéhérá kichuárá kixin Nchakuen Dios tjinkátsa tí jahará.

⁹ Méxra xikaha tí yaon tíó kuínhinni nkexrí tjejórá la títoehyani tjancheheni Dios kixin tsjinkátsa tí jahará kixin tsoñohará jina nkexrí tóxrjinhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuénte ch'án. ¹⁰ Tjancheheni ch'án kixin jina chrók'uejórá kixin tinkachónkirá Inchéni la ko chrókuítóehyará chrók'ujich'erá éxi tóxrjinhin tí jehe ch'án. Ntá jina chrókjuachará chrók'ujich'erá xra kuénte ch'án la ntá chrókónohará jina nkexrí tjan Dios. ¹¹ Tjanchiani kixin jehe ch'án chrókjuinkátsa kixin chrók'uejórá fuerte kixin tí kjuachaxin jíé kuénte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehérá kjuasáya It'eni Dios kixin kjuanjon ch'án kjuachaxin kixin ts'áyéheni tí nkehe tí tjan tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etóan tí Xjeen ch'án, tjuéhe ch'án. ¹⁴ Jehe ch'án kjuínchekaáni ch'án kixin k'uenyákonhenni ch'án la tí ijníé ch'án mé kjuenka ch'án tí ijíeni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxi tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxin tjan tí naxa t'ónahya ninkehó. ¹⁶ Kjuachaxién tí jehe ch'án kjuich'énaxin Dios kaín tí nkehe siín nkajni la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etóan la ko chóna kjuachaxin la mé jehe ch'án kjuich'éna ch'án kixin sich'ehe sín ch'án xra. ¹⁷ Cristo la ó xráxin tjan kjónté naxa t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuénte ch'án. ¹⁸ La kjaxin jehe Cristo mé tí kja t'etughnen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etughnen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxién Cristo chrók'uíxin kjuaxróxin nkuíxin mé chjasintajni la ko nkaya nkajni. Mé xikaha tsjasin ch'án kjuaxróxin kixin jehe ch'án kjuak'enkáni ch'án ntacruz ik'uén ch'án.

²¹ Jahará la ósé ikjin k'uék'ejórá la k'uéninkákonhénrá Dios kixin tí nkehe jínahya k'uék'jich'erá. A ntá jie la kjuaxróxin tjejókoará Dios ²² kixin k'uenyákonhánrá Cristo, kjuasóte tí cuérpóé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. ²³ Méxra xikaha chrókuítóehyará chrókuinkachónkirá Inchéni la ko chrókuítóehyará tí nkehe tjejochonhénrá kixin ó kuinhénrá tí tan tsaáxinni. Tí tan i mé ó chrónka chojni kuénté chjasintajni la ko janhan Pablo kjaxin tjinkátsa xranjaka xikaha.

Ch'ín Pablo ch'e ch'án xra kuénte nínko

²⁴ Méxra jie la tjasótexinna kixin tí jahará la chána kixin xikaha mé tsjintaxín tjasóte janhan kixin tí nkehe t'itjayan tí naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóé ch'án. ²⁵ Mé xikaha Dios kjuéyána kixin sit'a xra kuénte nínko kixin xikaha tí xra k'uegtaanna ch'án kixin ntá jina chrók'uejoxinrá tí jahará kixin chrókjuintaxin chróxrjankaxián tí itan kuénte Dios. ²⁶ Tí nkehe ninkexró k'uénoehya tjemá ósé nchónhya nánó a ntá jie kjuínchenohe Dios kaín tí sín tinkáchónki tí jehe ch'án. ²⁷ Dios

tjinkaon chrókjuinchenohe tí jehe sín tí nkehe tjemá náxrjón tjeje ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénra ts'áyéhérá tí kjuachaxin jíe kuènte ch'án.

²⁸ Jeheni mé chronkaxinni nkehe kuènte Cristo la nchexraxinkaonni kaín chojni la ko tjakoheñi sín kixin chrókuienxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án. ²⁹ Méxra xíkaha tí xra it'a la kaín asenná it'a xra tí kjuachaxièn chjina Cristo.

2

¹ Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxá t'íkonyha tí janhan. ² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuehe sín kichó sín. Mé xíkaha chrók'uánkí kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninxeró k'uénoehya kuènte It'éní Dios, mé Cristo tíha. ³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xrjanka kixin ntá ninxeró chrókjuít'ayahyará tí jahará kixin tí náxrjón chrónixja sín ó. ⁵ Kjonté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráinkávan tí jahará la chána kixin t'ikuán kixin jína tjejorá naxá tinkáchónkirá Cristo.

⁶ Méxra xíkaha kuinkáchónkirá Inchéni Jesucristo la mé xíkaha jnkokoá chrókjuenkayáxin koará tí jehe ch'án. ⁷ Éxí ijnko nta tsíkji nuèé njnka mé xíkaha chrókjuinkáchónkirá tí jehe ch'án éxí kjuakohará ch'án la ko chrókjuanchehéra Dios kjuasáya jnkochrixín.

Cristo tjanjon ijnko ntia nixin

⁸ Chrókjuítóehyará kixin ninxeró chrókjuít'ayahyará kixin tí nkehe ntoáhya chrókjuakohará sín. A ntá jehe sín chrónkaha sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjonté k'óna ch'án chojni. ¹⁰ La jahará chontará kaín kjuachaxin kuènte Dios kixin ó tinkáchónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etóan. ¹¹ Kjaxin tío kjuankixínra tinkáchónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhí. Kjuakjiin ch'án tí jíe k'uékóxrjínhanrá la kjuintakaará ch'án, mé tíha mé tí xroye kjuanjon Cristo. ¹² Tí kuíkiterá jahará mé xíkaha éxí xravákoará Cristo. Ntá ó xechón tí jehe ch'án la kjaxínra xechónrá kixin ó kuíteáonrá tí kjuachaxin kuènte Dios kixin Cristo la ó xechón ch'án inaá. ¹³ Jahará ósé la éxí tsík'en asánra k'uék'ejorá kixin tí jíe k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jíe chontará. ¹⁴ Mé Dios kjuatsen ch'án kaín tí nkehe tsík'etóan ch'án ósé kjuachahyani nchexiteyáni la ko kjuatsen ch'án kaín tí jíe k'uéchóntani kixin Cristo kjuák'enkáni ch'án tí ntacruz la xíkaha kjuatsenxín ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuehé ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajni

¹⁶ Méxra ninxeró chrókjontahyará kixin tí nkehe chrókjónterá ó tí nkehe chrók'uirá ó á tjikosáyeherá tí yaon kia ó tí nitjó nixin ó tí yaon t'ók'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókjuítóehyará kixin ninxeró chróntáchro sín kixin ts'itjáyánra kixin tinkáchónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchién sín t'íkonxín sín la nchehnke sín kixin tí nkehe t'axrjenixin kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ní la jehe ch'án mé ch'éna ch'án jnkokoá cuerpo kuènte ch'án kaín ní la nchek'ánkí ch'án tí cuerpo kixin jehe ch'án t'ayakonhenni ch'án kixin xíkaha tjinkaon Dios.

²⁰ A ntá jahará la ó k'uénkoará Cristo la kuítóghérá tí nkehe k'uék'etóan kuènte chjasintajni ó. ¿A ntá nkekuènté naxá tjejorá éxí tí chojni síin chjasintajni chrókjuinchesiteyará tí nkehe t'etóan sín? ²¹ Mé xíkaha t'etóan sín kixin jahará chrótshehará tíha la chrókjontehyará tí nkehe la chrókjuákjáhýará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjenixin ikja chojni ó. ²³ Chaxín kixin jehe sín ntáchro sín kixin jína xíkaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuéppé sín, kjánchó kaín tí nkehe ch'e sín xíkaha la chónkó kixin tjínkítsahya kixin chrókjuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajní kixin Cristo la ntiha tjetjaxin ch'án tí tja chjina Dios. ² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko Dios chónthe tí kjuachón kuéntará. ⁴ Jehu Cristo mé chontaxinrá kjuachón jahará la tió tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jie kuente ch'án.

Tí ntia ntaxin la ko tí ntia nixin

⁵ A ntá chrókjuítoghérá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxin chróóxrjénhya sín chróóhnta sín itsjé nkehe kixin tíha mé yóhé tí chróórxaxinkao sín tí nkehe tsíkjanoya. ⁶ Méxra tí nkexro titekakonhya tí nkehe t'etóan Dios la tsónínkakonhen Dios tí jehe sín la sinchekjásóte sín ch'án. ⁷ Mé xíkaha k'uékjich'erá jahará tí ósé. ⁸ Méxra ijie chrókjuítoghérá kaín tí kjuanínkaon la ko tí nkehe tjak'e asánra la ko tí nkehe jínahya la ko tí t'antaxínhínra kichuára la ko tí nkehe jínahya t'axrxjén ir'vará. ⁹ Chrókjuich'iyéhyará kichuára kixin ósé xíkaha k'uékjich'erá a ntá jie la ó chrókjuítoghérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxi tí jehe ch'án kixin jehe ch'án kjuich'éna ch'án tí jahará. Mé xíkaha chrókjuixraká chróóhóxinrá tí jehe ch'án jina. ¹¹ Jehya tjetóan á chojni judío o náhi o á chojni tsíka xroye o náhi o á chojni tsíkjin kjin o náhi o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etuñhen kaín nkehe.

¹² Dios la tjuéhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókjuikonóghérá kichuára la jina chrók'uejorá la ko chrókjuínchehnkehyará la ko chrókójjahyará la ko chrókóninkákonhyará. ¹³ Chrókóninkákuénhyará kichuára la chrók'uitjányanhanrá ichrén jie kjuasinhánra í jnko chojni kixin Cristo la k'uitjányenhen ch'án tí jie kjuásinrá la kjaxin jahará la xíkaha chrókjuich'erá. ¹⁴ Mé xíkaha chrótjuéherá kichuára la jnkokoá chrókjuenkayáxinrá. ¹⁵ Tí kjuaxróxin kuente Cristo mé chrók'uetuñhen asánra kixin xíkaha kjuenkayáxin Dios k'uiyáhará ch'án kixin chrók'ónará jnkokoá cuerpo kuente ch'án mé xíkaha chrókjuancheherá ch'án kjuasáya.

¹⁶ Tí tan kuente Cristo jnkochrínin chróóhnta asánra. Mé xíkaha chrókjuákohérá kichuára la chrókjuínchehéherá kichuára kaín kjuaxrexinkao jina. Chrótsjerá salmo la ko himno la ko canto kuente Dios la chrókjuancheherá Dios kjuasáya kaín asánra. ¹⁷ Kaín xra chrókjuich'erá la ko tí nkehe chróntáchorá la kaín táha chrókjuanchaxinrá ihnjé Ìnchéni Jesús la chrókjuancheherá kjuasáya It'éni Dios kjuachaxién Jesucristo.

Jnkójina chrók'uejóko kichó tí sín tinkáchónki Cristo

¹⁸ Jahará chojni chjin la chrókjuínchexiteyéherá tí xiyará kixin mé t'ichjánxin xíkaha chrókjuich'erá kixin tinkachónkirá Ìnchéni. ¹⁹ Jahará chojni ntoa la chrótjuéherá tí ichjiánra la chrókóninkákuénhyará tí jehe tjan. ²⁰ Jahará chánjanrá la chrókjuínchexiteyéherá it'ará la ko inará kaín nkehe chrók'uetóan sín kixin xíkaha mé tóxrjínhin Ìnchéni. ²¹ Jahará it'é xjan la chrókjuínchekónínkakonhyará tí xjaanrá kixin tí xíkaha la chrókjuínchek'ávahyará tí jehe xjan. ²² Jahará chojni ch'exón xra chrókjuínchexiteyéherá tí lámóará ntíhi chjasintajni. Jehya kixin tí tjeótsjehe sín ó chrókjuich'erá xra kixin ntá jina chrók'uejoxinrá. Náhi. Kaín asánra chrókjuich'erá xra kixin ó nohará kixin xíkaha ch'eherá Ìnchéni xra. ²³ Kaín nkehe chrókjuich'erá la kaín asánra chrókjuich'erá xra éxi chrókjuich'eherá xra Ìnchéni la jehya kixin éxi chojni ó chrókjuich'eherá xra. ²⁴ Ó nohará kixin Ìnchéni la sintakitonhanrá tí nkehe chóntha ch'án kixin jahará ch'eherá Cristo xra la jehe ch'án mé chaxin Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tükonóehya ninkexró ch'e tí nkehe jínahya.

4

¹ Méxra jahará lámorá la jina chrónixjehérá tí sín t'ahará xra. Chróórxáxináoanrá kixin kjaxinrá jahará chontará ijnko Dios tjen nkaya nkajní.

² Chrókjuítoghéhyará nixjehérá Dios la ko chrókjuancheherá ch'án kjuasáya. ³ Kjaxin tjanchehéherá ch'án tsjinkítsa tí jeheni kixin tsjanjon Ìnchéni kjuachaxin chrókuinhin chojni tsochrónkaxiníni tí itén Cristo. Tí xra k'ueñoehya ninkexró mé tjechjinxaxián jie. ⁴ Tsjanchehéherá Dios kixin tsjinkítsa ch'án tí janhan kixin chrókjuánxjan jina chrókjuákua éxi tjnkaon Dios.

⁵ A ntá jahará la jína chrókjuáakohérá itén Dios tí sín naxa tinkáchónkihya Ìnchéni kixin kánhyó tiempo siin kixin tsjåkorá. ⁶ Chrónixjehérá sín jnkojína kixin chrókóxrjinhin sín la chrókónohará chrókjuáateherá nkexrí tsixro jnkojnko chojni.

Kjuixin nixja ch'in Pablo

⁷ Kichóni Tiquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sitónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntøechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikítexin sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxin sín nkehe kuènte tí kjuachaxin kuènte Dios. La tí sín a mé imá kjuínchehána sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochríxin chrónøehe ch'án Dios tjinkaon ch'án kixin kaín asánrá chrókuinkachónkirá Dios éxi tjinkaon ch'án. ¹³ Ó nõna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntøe tjan. ¹⁶ Tió tsjixin sinchekuáxinrá tí xroon tsikjiji tí tjejorá ntiha la ichr'anrá xroon sátsji sinchekuáxin tí sín tjejó nínko chjasin Laodicea la ko kjaxin sinchekuáxinrá tí xroon tsikjijihí tí jehe sín tió tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókjuinchexiteyá ch'án jína tí xra tsíkjanjon Ìnchéni sich'e ch'án.

¹⁸ Janhan Pablo tjaná kjinxjan tí palabra nixjahará. Jahará chróxråxinkáonrá kixin janhan la tjechjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énnen ch'án tí sín tinkáchónki Cristo chjasin Tesalónica

Ch'ín Pablo nixjehę ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'eni Dios la ko Inchéni Jesucristo. Kjuasáyé It'eni Dios la ko Ichéni chrók'uejorá.

Tí sín ókję chjasin mé kjuíncheyóhę sín tí sín Tesalónica

² Jnkoyaxón chjeheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará. ³ Tió nixjeheni It'eni Dios xraxinkaonni kixin kaín asánrá kuítekáonrá Inchéni, a ntá tjejoch'erá xrá la ko imá tjuéhérá kichuárá ntá jnkokoá tjejochonhénrá tsokjan Inchéni Jesucristo. ⁴ Kichóni jahará, imá tjuahará Dios la ó noheni kixin jehe ch'án tsíkjayará ch'án tí jahará. ⁵ Na mé xikaha tió kjuíjini chjasánrá kjuakoharáni tí tan jína nixin tsaáxinni chrónkani na jehya iténni ó. Náhí. Kjaxin kjuachaxiэн Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin xikaha chrók'uejorá chrókjuakoxinnrá.

⁶ Mé xikaha kjuíncheyóhérá tí jeheni la ko kjuíncheyóhérá tí Inchéni Jesucristo. A ntá tió kuínhinnrá tí itén Dios ntá kaín asánrá kuinkachónkirá Inchéni la ko kócháhará kixin tí Nchakuen Dios mé t'etugenhen asánrá kjónté nchónhya nkehe k'uatinsinkará. ⁷ Mé xikaha kjuakuexinrá kaín tí sín tinkáchónki Inchéni ntiha estado Macedonia la ko tí sín estado Acaya. ⁸ Jahará kjuakoxinnrá tí itén Dios la jehya jehó estado Macedonia la ko tí estado Acaya kjuakoxinnrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya i jnko nkehe naxa chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuakoharáni la ntá kujtohérá kaín tí nkehe tsíkjanoya kixin ntá kjuankixinnrá kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénrá tsokjanxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótéxinhvani tí nkehe jínahya chrókjuasótéxinni itsi.

2

Tí xrá tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánrá. ² Ó kónohará kixin senó tí sín chjasin Filipos k'uekjinchekjásóteni sín la ko k'uek'ántaxínhinni sín. Kjánchó Dios mé kjuínkitsa ntá chrakonhyani kjuakoharáni tí tan tsaáxinni kuénte Dios kjónté imá k'ueíninkakonhenni sín. ³ Kónohará kixin jehya ntoáhya kjuakoharáni la ko jehya ijnko nkehe náxjónhya kjuakoni la ko kjuít'ayahyaráni ninkehó. ⁴ Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni. ⁵ Ó nohará kixin kjuích'iyaxínhyani itan imá náxjón kixin xikaha chrókuakitsjexinni chichaon chrókjuachani. Náhí. Dios la ó nohe ch'án kixin xikahya kjuích'eni. ⁶ Tjeyáhyani kixin chojni chrókjuikosáyeheni sín la á jahará la o í so chojni. Náhí, xikahya ch'eni, kjónté chóntani kjuachaxin chrók'uetuqhanránani kixin chrókjuánjonrá nkehe chrók'uaýéhéni kixin jeheni ch'eheni xrá Cristo. ⁷ Jnkojína k'ueénixjeharáni k'uek'ejóni. Éxi yóhę ijnko iné xjan t'áyakonhen xjeen kixin ts'ánki xjan mé xikaha jeheni k'uaýakonhanránani tí jahará. ⁸ Imá tjuáhará ntá jehya jehó tí itén Dios chrókjuakoharáni. Náhí. Kjónté chrók'uenxinni tí tjakoharáni kixin xikaha imá tjuáhará. ⁹ Kichóni, chrórxaxinkáonrá kixin tió k'uejóni chjasánrá la mé nchónhya xrá kjuích'eni nchakotjin la ko tie ntá kjuachani chichaon k'uenaxinni nkehe sineni kixin tjinkakonhyani kixin chrótjeharáni xrá chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uejókoaráni jahará chojni tinkáchónki Inchéni. Nijnko nkexro ts'ekahyani jje kixin ichrén nkehe jínahya chrókjuich'eni. ¹¹ Jahará ó nohará kixin kjuakoharáni la ko kjuínchexchéheni tí jahará jnkojnkórá éxi ch'e ijnko it'é xjan tjuéhe xjeen ch'án. ¹² La ko k'uetuqhanránani kixin jína chrók'uejorá éxi

tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uayéherá tí kjuachaxin kuènte ch'án.

¹³ Méxra jnkochrixin tjancheheni Dios kjuasáya kixin tió kuínhínra tí tan jina kuènte ch'án kjuakoharáni na ntá kjuátsoanrá kixin chaxín tí tan jina kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uúixitóxin ntjará. ¹⁴ Mé xikaha jahará kichó ni kjuasótiará kónínkakonhará tí sín chjasánrá éxi yóhé kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuínkáchónki sín Ìnchéni ntá tí sín judío chjasén sín mé kjuankixin sín kónínkakonhen sín chrók'óyan sín. ¹⁵ A ntá tí sín judío a mé tsík'óyan sín Ìnchéni Jesús la ko tsík'óyan sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuich'e sín la kónínkakonhen sín kaín chojni. A ntá Dios la kóxrjénhya ch'án kixin xikaha kjuich'e sín. ¹⁶ A ntá tjinkaonni kixin chrókjuakohéni tí sín jehya judío tí tan jina chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. A ntá xikaha kjuich'e sín ntá Dios sinchekjasóte ch'án tí jehe sín.

Ch'in Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kichóni, tió kuitóheni tí jahará a ntá kjónté ókjé k'uejóni la k'uéxraxinkaonni kaín asénni tí jahará la ko imá tjinkaonni chrókjuitsjeheni tí jahará inaá. ¹⁸ Na mé xikaha janhan Pablo itsjé veces mé tjínkavan chrókjuasántsajahá tí jahará, a ntá tí ch'in Tsochren mé k'uínkákonna ntá xitjahya tsjasán. ¹⁹ ¿Nkehe tsonhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochéxinni tió tsi Ìnchéni Jesucristo kixin kuítekáonrá ch'án. ²⁰ Méxra jahará mé kóchéxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójina jehóni chrókuitóheni chjasin Atenas 2 na ntá ichr'ánni tí kichó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhé ch'án asánrá ³ kixin tsoxrxjéhya asánrá má kixin tí kjuaxróxinhya tjejó'tatsínkará. Kixin xikaha ó nohará kixin t'ichjánxin tsjasótéxinni tí xra kuènte Ìnchéni. ⁴ Naxa k'uejóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxin xikaha kónhen. ⁵ Méxra imá kóxakonna ntá ichr'an kichó ni Timoteo kjujijitsjehe ch'án nkexrí tjejórá, á naxa tinkachónkirá Ìnchéni o ách'e ch'in Tsochren chrókjuachroerá chrókuitóhéra tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'in Timoteo chjasánrá Tesalónica chrónka ch'án kixin jina tjejórá naxa tinkachónkirá Ìnchéni, la ko naxa tjejórá tjeuhérá kichuárá la ko chrónka ch'án kixin xraxínkáonrá tí jeheni tjínkáonrá chrókjuitsjeheni tí jahará. Kjaxin jeheni xikaha tjinkaonni chrók'uikonni tí jahará. ⁷ Mé xikaha kichó ni tjejó'tatsínkani kjuaxróxinhya ntihi na ntá kjónté kóchéhé asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xikaha kixin jina tjejórá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xikaha imá chéhé asénni kixin tí jahará tinkachónkirá ch'án. ¹⁰ Tie la ko nchakotjin chronóghéni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjáyan iso nkehe chrókjuakoharáni naxa chrók'uitjára nkexrí jina chrókjuinkachónkirá Ìnchéni.

¹¹ Tjejó'tjancheheni T'éni Dios la ko Ìnchéni Jesucristo kixin chrókjuinkitsani ch'án chrókjuitsjeheni tí jahará ¹² la ko tjancheheni Ìnchéni kixin chrókjuinkitsa ch'án tí jahará kixin antsí má chrótuéhérá kichuárá la ko chrótuéhérá kaín sín chojni éxi yóhé tjuáhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'éni Dios tió tsokjan Ìnchéni Jesús tsikao ch'án kaín tí sín ó tsikótjóá.

4

Nkexrí tóxrjnhin Dios chrók'uejóni

¹ Jahará kichó ni chronógharáni la ko ntaxraxinkaonráni tí kjuachaxin ihnjé Ìnchéni Jesús kixin jina chrók'uejórá tinkachónkirá Ìnchéni éxi tjejóch'erá jie kixin éxi kjuakoharáni. Mé xikaha jina sinchechéhéra Dios.

² Ó nohará tí nkehe kjuakuaáxinráni kjuachaxin kuènte Ìnchéni Jesús. ³ Tí nkehe tjinkaon Dios kixin jina tjóá chrók'uejórá la ko chrókjuásinkoahyará jie í jnko chojni chjin ókjé. ⁴ Jnkojnkora chrókónohará chróchontará jnkojnko ichjiánrá la ko jina chrók'uejórá

chrótuèhérá kíchuára. ⁵ Jehya kixin chrókuakérá asánrá tí nkehe jínahya chrókjuich'erá éxi ch'e tí chojni chónhya Dios. ⁶ Nijnkorá chrókjuich'iyehérá ichjién kíchuára xíkaha kixin Ìnchéni mé imá sinchekjasóte ch'án tí chojni xíkaha sich'e mé xíkaha kjuíntaxraxinkaonráni senó. ⁷ Dios mé k'uíyeheni ch'án kixin jína chrók'uejóni, jehya kixin naḡa chrókjuasinni jie. ⁸ A ntá tí sín chónthya kjuasáyé tí nkehe tjakoní na mé jehya kixin chónthya sín kjuasáyé chojni. Náhí. Chónthya sín kjuasáyé Dios, tí nkexro kjuanjón tì Nchakuen chónntani.

⁹ A ntá tí tjuèhérá kíchuára la í t'ichjánxinhya naḡa chrókjinni tosochronkani kixin nkexrí chrótuèhérá kíchuára kixin jehe Dios mé tjetjakohará ch'án nkexrí chrótuèhérá kíchuára. ¹⁰ Xráxín xíkaha tjeoch'erá tjuèhérá kaín tí sín kíchó ní tjejó estado Macedonia. Kjánchó chronóaharání kíchó ní kixin antsí má chrótuèhérá kíchuára. ¹¹ Tóxakonhanrá kixin kjuaxróxin chrók'uejorá. Jnkojnkorá nohará nketi xra chrókjuich'exinrá tjára éxi k'uetuñhanráni. ¹² Na mé xíkaha chrók'uikon tí sín chónhya Dios ntá chróchóntahará sín kjuasáya la ko chrók'uitjányanhya ninkehó nkehe chrókuicháxinhanrá.

Itsi Ìnchéni Jesús

¹³ Kíchóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankamará sín chrókóyóahyará tí sín tinkáchónkihya sín Ìnchéni naḡa chónhya sín kixin chróxechón sín inaá. ¹⁴ Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani tí jahará tí nkehe kjuako Ìnchéni kixin tí naḡa tjejóchónni tió tsi ch'án na kjónté naḡa tsitónxinhyani ntja, naḡa tsochónhenni tí sín tsík'en. ¹⁶ Jehe Ìnchéni mé ts'inkajinxín ch'án nkaya nkajní la ko itsen tsonixja ch'án kixin tí kjuachaxin jie kuènte ch'án la ko ts'èya tí ángel t'etjoan la ko tsontácho tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'exín kaín xinni tjejóchónni la ko kaín xín tí sín tsíxechón mé jnkokqa tosochriinni kixin tí kjuachaxin jie kuènte Ìnchéni. A ntá xrikan tjuj tsoxetani ch'án. Mé xíkaha ts'ejókoni ch'án jnkochrixín. ¹⁸ Méxra xíkaha chrókjuinchechéxinrá kíchuára tí tan í kixin xíkaha tsonhen tió tsokjan Ìnchéni.

5

¹ A ntá tí yaon tsonhen tíhi kíchó ní t'ichjánxinhya naḡa tsokjinni í jnko nkehe tsinhínra. ² Jahará ó nohará jína kixin titàya itsi tí yaon tsokjan Ìnchéni éxi yóhe chrókui ijnko xíchee tí tie a. ³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxikaon jie la ko kjuachrakon mé ts'itjayanxín tí kjuachón chróchónta sín éxi yóhe ijnko tjan tjejá xrinahya titàya tsjankixín ts'óntáki tjan kixin sinchekokjilhi tjan xjeen tjan na mé jehe tjan xitjahya tsontácho tjan "Náhí", mé xíkaha jehe sín chónthya sín nkerí tsaáxin sín. ⁴ Ntá jahará kíchó ní sítiéhya tjejorá ntá chróchakonhyará tí yaon itsi Ìnchéni. Tí náhi chróchakonrá éxi chrókui ijnko xíchee chrókjuintachrakonrá. ⁵ Ntá jie kaín rá mé tjejorá tí ntja t'inkáséyan. Jeheni la jehya tjejóni tí ntja sítié a. ⁶ Méxra xíkaha chrók'uejójuahyani éxi tjejójua tí sín í so na mé chrók'uejótsheni chrókjuenkayáxinni jína. ⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. ⁸ A ntá jeheni na tjejóni tí ntja t'inkáséyan t'ichjánxín kixin jína chrók'uejóni chrókjuasinhyani jie. Chrókuinkáchónkini Ìnchéni la ko chrótuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'in soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejójóhónhenni itsi Ìnchéni tsaáxinni ch'án na mé éxi tí ch'in soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. ⁹ Kjueyáhya Dios tí jeheni kixin chrókjuincheekjasóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrixín kjónté naḡa tjejóchónni o kjónté ó tsík'enni tió tsokjan ch'án. ¹¹ Méxra xíkaha chrókjuinchechéhérá kíchuára la ko chrókjuínktsará kíchuára kixin jína chrók'uejójó sín éxi xráxín tjejoch'erá.

Ch'in Pablo mé nchexraxinkaon ch'án tí sín tinkáchónki Cristo

¹² Kíchóni chronoàharání kixin chróchontehérá kjuasáyé tí sín tjejóch'e sín xra kuènte Dios ntíha tjejótjitaón sín ntja chrónka sín itén Ìnchéni. ¹³ Na mé chróchontehérá sín kjuasáya la ko chrótuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kíchuára.

¹⁴ Méxra tétuñhanráni kíchó ní kixin chrókjuéntuèhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínktsará tí sín naḡa noehya sín jína la ko chrókóninkákuénhyará ninkehró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejtjenkayáxinrá.

¹⁶ Méxra nchechéhéra asánra jnkochrín. ¹⁷ Chrókjuítoéhyará chrónixjehéra Dios jnkochrín. ¹⁸ Kjónté ichrén nkehe chrókónhanrá la chróhjhéherá Dios kjuasáya kixin xíkaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chonteherá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios. ²¹ Chrótsjehéra jína tí nkehe tjejóh'e sín. A ntá tí jína na chrókuítekaonrá. ²² Chrókjuítohéra kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánra la ko cuerpo kuéntará kixin tsochóntahya ninkehó jię tió tsi Ìnchéni Jesucristo. ²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókjuincheyaoon tí jehe sín

²⁵ Kichóni chrónóehéra Dios kixin tsjinkitsani ch'án kaín ni.

²⁶ La ko nixjehéra kaín xín tí sín kichó ni ntiha tsehéra tja sín.

²⁷ T'etoanxínni tí kjuachaxin kuènte Ìnchéni kixin nchekuáxinrá tí xroon chr'anhánra tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehé ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni núnko chjasin Tesalónica kixin jnkokoá tinkáchónkini It'eni Dios la ko Ìnchéni Jesucristo. ² Kjuasáyé It'eni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexin ch'án tí ijé chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrixin kixin tí jahará. Na mé jina xikaha chrókjuich'eni kixin tinkák'ánki tí tinkáchónkirá Ìnchéni Jesús la ko tinkák'ánki tí tjuéhérá kichuárá tjejorá ntiha. ⁴ Ntá chéheni chenkaní tí sín kichó ni kaín tí núnkqe Dios kixin naxa tjákoxinrá kixin naxa tinkáchónkirá Ìnchéni kjónté síin chojni núnkakhonhanrá la ko kjónté t'atsínkará itsjé kjuaxróxinha. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuénte ch'án. Méxra xikaha tjejtjasótxinrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'eheni tí yaon itsi Ìnchéni Jesús ts'inkajinxin ch'án nkaya nkajni tsikao ch'án kaín tí sín ángel t'etqan kuénte ch'án na mé tsikao ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jina kuénte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrixin ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etqanxin ch'án. ¹⁰ Xikaha tsqohen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuénte ch'án. Mé xikaha kjaxinrá jahará kixin ó kuítekaonrá tí nkehe kjuakoharáni.

¹¹ Mé xikaha jnkochrixin tjancheheni Dios kixin jina chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuénte ch'án kixin chrókjuinkitsará ch'án kixin chrókjuachará ch'erá kaín tí xra jina tjinkáonrá chrókjuich'erá kixin tinkáchónkirá ch'án. ¹² Mé xikaha kaín xínrá tsjikosáyehérá tí ihnjé Ìnchéni Jesucristo la ko jehe ch'án mé kjaxin tsjikosáyahará ch'án kixin tinkáchónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntácho jnkojin nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjoni chrónka kixin xikaha tsqohen. ³ Tjítóehyará kixin jnkojin nkexro chrókjuit'ayahará xikaha. Naxa tsihya tí yaon ntá senó itsjé chojni tsonínkakhonhen sín Dios, la ko tsonoxín ijnko ch'ín jínahya chóntha jie, na ntá tíha mé tsjasóte jnkochrixin. ⁴ Tsjak'etjaxin ch'án nkaxenhen tí núnkqe Dios kixin jehe ch'án mé sich'éna asén ch'án éxi Dios tí jehe ch'án.

⁵ ¿A xráxinkákonhyará kixin xikaha k'uéxrjanka senó tí naxa k'u'éjóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjayan kixin sáchrókjui tí nkexro chónthehe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjéxin ir'va ch'án ó mé ts'enxin tí jínahya a kixin mé xikaha sinchek'itjayanxin ch'án tí jínahya tí kjuachaxin jie tsikao ch'án. ⁹ Méxra tí ch'ín jínahya mé tsikao ch'án tí kjuachaxin kuénte ch'ín Tsochren la mé xikaha tsochóntha ch'án kjuachaxin jie tsjakoxin ch'án sich'iyaxin ch'án tsjan ch'án kjuaxroan ntoáhya. ¹⁰ Mé xikaha kaín nkehe jínahya sich'iyexin ch'án tí sín xráxin ts'itjayan sín kixin chrohya sín chrókuitekaon sín tí tan chaxin ntoá chrókuaáxin sín. ¹¹ Méxra tsítqhe Dios tí jehe sín kixin tsitekaon sín kaín nkehe chaxinhyá ¹² kixin ntá tsjasóte kaín tí sín kuítekakonhya sín tí tan chaxin chrókuaáxin sín na mé ántsi kóxrjínhin sín chrókjuasín sín jie tsjasótexin sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrixin kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuitekáonrá. ¹⁴ Méxra xíkaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jíe kuénte Ìnchéni Jesucristo.

¹⁵ Mé xíkaha kichó ní, jína chrók'uejorá chrók'uitjáyanhyará tí nkehe kjuakoharáni tío k'uejóni jnkogqá la ko tí nkehe chrónka tí xroon ikjinni k'uayéherá. ¹⁶ Ntá Ìnchéni Jesucristo la ko It'eni Dios na mé tí nkeexo kjuasáyé ch'án tjeuèhe ch'án tí jeheni la ko nchechéhé ch'án asénni jnkochrixin la ko kjuasáyé ch'án tjejóchónhenni itsi Ìnchéni ¹⁷ na mé sinchechéhé ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkítsa kaín ní

¹ Méxra kjuixixin chrónogaharáni kichó ní kixin chrókjuancheherá Dios kixin chrókjuinkítsa ch'án tí jeheni kixin tjoka sáchrókjuikjakoni itén Ìnchéni nkuixin kixin ntá tsinhin chojni la tsjikosáyehe sín ch'án éxí yóhé kuitekáonrá jahará. ² Kjaxin nixjehérá Dios kixin chrókjuinkítsani ch'án kixin kohya nkehe chrókónhenni tí siin chojni jínahya nínkakohenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkítsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsónhanrá. ⁴ Ó noheni kixin Ìnchéni la tsjinkítsa ch'án tí jahará kixin naxa sich'erá xra éxí k'uetuanhanráni. ⁵ Ìnchéni tsjinkítsará ch'án tsónohará kixin Dios la tjuahará ch'án la ko tsjinkítsará ch'án kixin chrókóninkákonhyará éxí kónínkakohya Cristo.

T'ichjánxin chrókjuich'eni xra

⁶ Kichóni t'etoxáninni tí kjuachaxin ihníé Ìnchéni Jesucristo kixin chrók'uaxrjekjanxinrá tí sín kichó ní tjinkakohya sich'e xra la ko xrihya sín éxí kjuakoharáni. ⁷ Ó nohará kixin nkexrí chrók'uejorá chrókjuákoxinrá éxí k'uejó tí jeheni kixin tí k'uejókoaráni la jehya kixin kjuich'ehyani xra. ⁸ Jehya kixin kjóneni niqtjé jnkójín nkexro ntá chrókjuenkahyani. Náhi. Kóxakohenni nchakotjin la ko tie kjuich'eni xra kixin ninkehó chónitaxinhyani tí jahará kixin chrókjuánjonrá tí nkehe chrókjóneni. Náhi. ⁹ Kjónté chónitani kjuachaxin chrókjuanchaharáni kixin chrókjuinkítsará tí jeheni kjánchó jeheni na kjuich'eni xra kjuákoxinni kixin xíkaha jahará chrókjuich'erá xra. ¹⁰ Kixin tí naxa k'uejóni jnkogqá ntiha k'uetoxanni kixin: Tí nkexro tjinkakohya ch'e xra la kjaxin chrókjonehya. ¹¹ Ó kuínhinni kixin tjejorá jnkójínrá ninkehó xra ch'ehyará a ntá kjuach'ia ó xrikoará. ¹² A ntá tí kjuachaxién Ìnchéni Jesucristo t'etoxáninni la ko chrónóexinni tí sín a kixin chrókóninkakohya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kichó ní, chrókóxrjéhyará chrókjuich'erá tí nkehe jína. ¹⁴ A ntá tí tjen jnkójín nkexro titekakohya tí nkehe t'etoxáninni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhé ch'án. ¹⁵ Kjánchó jehya kixin chrókjuánjonkoará ch'án. Náhi. Chrókjuinchexraxinkáonrá ch'án jnkójína éxí ijnko chojni kichó ní.

Ó kjuixixin nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrixin kjónté ichrén nkehe chrók'uatínkará. Jehe ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xíkaha chrókjuátsoanxinrá tí letra kaín carta tsikjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehé ch'án tí ch'ín Timoteo

¹ Janhan Pablo kjueyána Jesucristo la ko Dios mé tsik'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxí xjanna tí jaha káxin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókujkonóaha ch'án káxin kjuaxróxin tsjak'e jaha.

Chrókjuinchexráxinkaon ch'án sín káxin chrókuitekakuenhya sín tí nkehe chaxínhya

³ Éxí xrxannóaha tíó sákjuia estado Macedonia la mé jaha chrókuitoaha tí chjasin Éfeso la ntaha chrókuétuénhén iso tí sín ntiha káxin chrókjuakohya sín tí nkehe ntoáhya. ⁴ La ko chrókuétuénhén sín káxin chrókjuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxín kichó sín la ó chónkó tíha. Kaín tíha la í tsjinkítsahya káxin sinchexitéyeheni Dios káxin tinkáchónkini ch'án.

⁵ Tí nkehe tjinkaonni la chrótjuéhéni kichó ní kaín ní káxin ó kótjóa asénni la ko ó noheni káxin jina tjenkayáxinni la ko kaín asénni tinkáchónkini Cristo. ⁶ Iso sín la kjuichróe sín káxin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín káxin ó ntoá tí nkehe tjako sín, ntá chaxínhya.

⁸ A ntá jeheni la ó noheni káxin tí ley la jina tí chrokjuakoni éxí tjinkaon Dios. ⁹ Ó noheni káxin tí sín tjasinhya jie t'ichjánxinhya sín tí ley tsik'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko iné sín la ko kaín tí sín tjáya. ¹⁰ La ko tí sín tjinsako jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekjí, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakohen tí nkehe jina tjakoni. ¹¹ Tí nkehe tjakoni mé chaxín tí tan jina sinchekaá chojni la tí Dios tjetoan mé k'uetuanna káxin tsjúaku tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo káxin imá kjuínkítsana ch'án la ko k'uikon ch'án káxin jina sít'aha ch'án xra ntá chjina ch'án tí xra i. ¹³ Mé xíkaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kujkonóehé ch'án tí janhan káxin ó nohe ch'án káxin k'uékinkachónkihya janhan tí jehe ch'án la ko k'uénonahya nkehe tí xra k'uékjít'a. ¹⁴ Méxra Ìnchéni antsí má kjuíncheyonna káxin ntá kjuanjon ch'án kjuachaxin káxin tsinkachónkia ch'án la ko tsotjuaha ch'án. Mé xíkaha kaín ní chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ní chrókuitekaonni. Ikui Jesucristo chjasintajni káxin sinchekaá ch'án tí sín kjuasin jie. Ntá janhan mé antsí má kjuasian jie. ¹⁶ Kjónté xíkaha kjuít'a la Dios antsí má kujkonóana ch'án tí janhan káxin xíkaha kjuakoxin Jesucristo káxin kónínkakonhya ch'án. Mé xíkaha tsjúakuaxian kaín nkexro tsitekaon tí jehe ch'án káxin tsochóna sín kjuachón jnkochrín. ¹⁷ Ntá jnkochrín tsochónteheni kjuasáyé tí Rey t'etoan. Jehe ch'án mé ijnko nkexro xráxin tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xra i tjaha káxin tsjanjonkoa tí jínahya la tsjacha káxin tinkachónkia jina Ìnchéni la ko tjenkayáxian tí nkehe jina. Mé xíkaha sinchexitéyá tí nkehe kuínhin senó káxin tí sín kichó ní chrónkaxin ihnjé Dios. ¹⁹ Í so sín la kjuenkayáxinhya sín tí jina ntá kjuichróe sín kuitohe sín tí nkehe tinkáchónki sín. ²⁰ Mé xíkaha kónhen ch'ín Himeneo la ko ch'ín Alejandro. Janhan kjuánjuan kjuachaxin káxin ch'ín Tsochren mé sinchekjasóte sín káxin mé xíkaha ts'itja sín káxin í ts'ántaxínhya sín Dios.

2

Nkexrí chrónixjehéni Dios

¹ A ntá saoxín la xrxannóaha káxin kaín chojni chrónixjehé sín Dios la chrókjuanchehe sín kjuasáyé ch'án káxin chrókjuinkítsa ch'án kaín xín chojni. ² Chrókjuanchia sín káxin Dios imá chrókjuinkítsa ch'án kaín tí sín t'etoan la ko tí sín gobierno káxin ntá kjuaxróxin ts'ejóni la ko sinchexitéyeheni Dios la ko ntoá ts'ejóni. ³ Xíkaha mé imá jina la tóxrjinhin Dios, mé tí nkexro tsaáxinni. ⁴ Jehe ch'án mé imá tjinkaon ch'án káxin tsaá kaín xín chojni la ko tjinkaon ch'án

kixin tsonohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehe Jesucristo mé k'uenyákonhenni kaín xínni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsintáchro Dios ósé kixin xíkaha tsonhen ch'án. ⁷ Méxra tí xra mé kjueyána Dios kixin tsíjkákoha tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkáchónkia Cristo la xrxanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehe sín Dios la chrókjuaya sín tja sín la chrókótjóá asén sín la ko chrókóninkakonhya sín la ko chrókjuehya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxi chrókjuich'e kaín tí sín tsikjinchetjóá Dios. ¹¹ Tí chojni chjin t'ichjánxin chrókuinlin sín itén Dios la chrónixjahya sín la ko chrók'uetjoanhya sín. ¹² A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetjoenhen sín chojni ntoa. Jehe sín la tání sín chrók'uejó sín ¹³ kixin saoxín la Dios kjuich'éna ch'án tí ch'ín Adán la ntá chr'éxin kjuich'éna ch'án tjan Eva. ¹⁴ A ntá ch'ín Adán la ninkexró kjuich'iyehya ch'án. Náhi. Tí tjachjin mé tsíkitekakonhen tjan tí nkexro tsíkijch'iyehye tjan ntá xíkaha xrankíxixín k'uixín jie. ¹⁵ A ntá tí chojni chjin la kjónté xíkaha tsíkijch'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí nínko

¹ Ijnko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjínkaon ch'án. ² Tí ch'ín chrók'uetjoan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchóna ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchóna ch'án kjuasáyé ch'án la ko kjaxin jína chrónixjehe ch'án tí nkexro tjiji ntqe la ko kjaxin chrókónohe ch'án tí nkehe chrókjuako ch'án. ³ La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjénhya ch'án kixin chrókjuacha ch'án nchónhya chichaon. A ntá chrókójehya ch'án la ko kjuaxróxin chrókjuak'e ch'án la ko chrókóxrjénhya ch'án chróchóna ch'án itsjé chichaon. ⁴ Jehe ch'án mé kjaxin jína chrók'uetjoenhen ch'án tí sín tjejó ntqe ch'án la ko chrókjuentuèhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuenhen ch'án tí sín tjejó ntqe ch'án la zntá nkexrí chrók'uetjoan ch'án tí nínko kuènte Dios? ⁶ Íchá jína kixin jehya ijnko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxi kjuasin ch'ín Tsochren ijie senó. ⁷ Kjaxin t'ichjánxin kixin kaín xín tí sín naxa tinkáchónkihya Inchéni mé tsochóna sín kjuasáyé tí ch'ín t'etjoan a. Tí náhi la ts'eka sín ch'án jie ntá tí xíkaha la ch'ín Tsochren tsjacha tsjachróe tí ch'ín a ntá tsjasin ch'án jie.

Nkexrí chrók'uejó tí sín tsjinkítsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchónthehe sín kjuasáyé chojni. Kjaxin t'ichjánxin kixin chrókjuinchehiteyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kixin jehe sín chróxraxinkaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya sín nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuènte nínko. ¹¹ La ko kjaxin tí chojni chjin mé chrók'uejó sín jína kixin chróchóna sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchehiteyá sín kaín nkehe. ¹² Tí sín diácono la mé chróchóna sín jnkokoá ichjién sín la jína chrók'uetjoenhen sín xjeen sín la ko jína chrók'uetjoan sín ntqe sín. ¹³ T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon inchéni la ko kjaxin tsosùehya sín tsochrónka sín nkexrí tinkáchónki sín Cristo Jesús.

Dios mé kjuinchenoheni tí nkehe k'uékiexínhyani

¹⁴ Tjínkavan tjoka chrókjuasantsjahá tí jaha kjánchó senó tsokjian tí xroon i. ¹⁵ A ntá tí tsoxrjenna isé ntá kjónté tsonohe nkexrí chrók'uejó tí sín naxa kjéhya Dios mé tí sín t'óna nínkoe Dios tjechón. Jeheni kaín ni mé tjejó't'ayakonhenni tí tan chaxín ntoá. ¹⁶ Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jie tíha la ninkexró k'uénoehya tí senó a. Dios mé ikui k'óna chojni;

ikui ch'an kjuakoxin ch'an kjuachaxien Nchakuen Dios ch'onta ch'an kixin jina ti jehe ch'an. La ntá ti sín ángel mé k'uikon sín ch'an la kuenté chjasintajni mé ó kuínhin sín nkehe chrónka ch'an ntá itsjé sín kuítekaon sín ch'an. Ntá Dios k'uáyéhe ti jehe ch'an nkaya nkajni.

4

Tí sín kuítghe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítghe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehe sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjonté imá tsjasin sín jie la í tsosuèhya sín kixin éxi tsíchján tí tjenkayáxixin sín la í tjenkayáxinhya sín jina. ³ Jehe sín mé tjinkakonhya sín kixin chrókótghe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuich'ena ch'an kaín xín nkehe ineni la tjinkaon ch'an kixin tí jeheni tinkáchónkini ch'an la ó noheni tí tan chaxín ntoá mé chrókjuancheheni ch'an kjuasáya ntá chrókjóneni. ⁴ Méxra kaín xín tí nkehe kjuich'ena Dios la jina la kohya nkehe chróntáchroni kixin jehya jina sineni. Chrókjuancheheni Dios kjuasáya la ntá jina chrókjóneni ⁵ kixin tíó tsoxraxinkaonni itén Dios la tsonixjeheni ch'an la ntá sincheyaoon ch'an tí nkehe sineni.

Ijngo chojni jina ch'ehé xra Jesucristo

⁶ Jaha tjákohe tí sín kichó ni kaín tí nkehe i la ntá xikaha imá jina sich'ehé xra Jesucristo la ko antsí tsjinkítsa ch'an ts'ánki kjuaxrexinkaon kuéntá tí tinkáchónkia tí tan kuénté ch'an la ko naxa tjákua tí nkehe jina ó xráqoha. ⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítgèhya chrókuinkáchónkia Dios. ⁸ Tí chojni tsítán la jina tíha kjánchó antsí má tjetooon chrórxaxinkaonni Dios. Tíha la tsjinkítsa kixin jina xritjéjóni ijie la ko kjaxin tsjinkítsa kixin ts'áyéheni kjuachón jnkochríxín tíó tsokjan Inchéni. ⁹ Kaín tíhi mé chaxín la kaín chojni chrókuítekaon. ¹⁰ Mé xikaha kjonté t'ántaxínihinni chojni la jina ch'eni tí xra í kixin tinkáchónkini Dios tjechón. Jehe ch'an chaxín sinchekaá ch'an kaín tí chojni titekaon tí jehe ch'an.

¹¹ Kaín tíha mé t'ichjánxin tsétoan la ko tsjákua. ¹² Jaha chrókuítgèhya kixin chrojuanoá sín kjonté naxa ntasoyá. Chrókujúqexián tí sín tinkáchónki Inchéni nkexrí chrónixja sín la ko nkexrí ntoá chrók'uejé sín la ko nkexrí chrótjuehe sín Dios la ko nkexrí chrókuítekaon sín Inchéni la ko nkexrí tjóá chrók'uejé sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjákohe sín. ¹⁴ Sinchek'itjáyanhya tí kjuachaxián Dios k'uáyéhé tíó tí sín t'etooon kuénte njnko kjuachaxián Dios k'uejotja tja sín chrítaón ikjá.

¹⁵ Chrókóxakonhan chrókjuinchesteyá kaín tíha kixin kaín chojni tsotsjehe sín kixin jina noha. ¹⁶ Chrókjuenkayáxian jina tí nkehe tjákua kixin jina chrókjuak'e jaha, chrókjuinchesteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jina chrók'uejé tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jina chrónixjehé sín jnkojina éxi chrónixjehé it'á. La kjaxin tí sín ntasoá chrónixjehé sín éxi chrónixjehé kichuá mero. ² A ntá tí sín ó nána la mé chrónixjehé sín éxi chrónixjehé iná xikaha. Kjaxin tí sín tjarisoá mé jnkojina chrónixjehé sín éxi chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuinkítsa tí síhjin tsikók'an la ko nchekjtonhén sín nkehe sine sín tí chaxín kohya nkexro tsjinkítsa sín. ⁴ A ntá tí chojni chjin tsikók'an ch'onta xjeen o ch'onta inté, a ntá tí jehe sín mé chrók'uitja sín chrókjuinkítsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánki sín, kixin xikaha mé jina tóxrjinhin Dios. ⁵ Tí tjan chaxín tsikók'an na jehó tjan tjen tjan mé jehó Dios tinkáchónki tjan la imá chrónóghe tjan Dios tie la ko nchakotjin. ⁶ A ntá tí sín tsikók'an ixri sín tjasin sín jie la kjonté tjejóchón sín la éxi tsik'en sín xikaha tjejó sín. ⁷ Tétuénhén tí sín kixin sinchesteyá sín kaín tíha kixin tsókohya nkexro tsjanchia jie. ⁸ A ntá tí nkexro tóxakuenhya kixin sín sín naxa kjéhya la ko kjaxin tóxakuenhya kixin sín tjejó ntge ch'an mé xikahó tjakoxin kixin ninkehó tinkáchónkihya ch'an Dios. Mé xikaha antsí ch'onta ch'an jie a ntá tí sín tinkáchónkihya Inchéni la kényó.

⁹ Tí ts'ínixin ihnié tí sín tsikók'an la chrók'uínixin jehó tí sín ch'onta sesenta nánó la ko tí sín k'uéch'onta sín jnkokoá xii. ¹⁰ Kjaxin chrókjuakoxin tjan kixin jina ch'e tjan xra la ko

chrókjuakoxin tjan kixin jina kjuíncheke'ánki xjeen tjan la ko kjaxin jina nixjehe tjan tí nkexro tjiiji ntoe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jina kjuíche' tjan.

¹¹ A ntá chrók'uénixinhya ihnié tí sín tsikók'án naxa tsjehya nánó chóna kixin tsontáchro asén sín kixin í jnko chojni ntoa tsotehe sín inaá la ntá tsitöhe sín ixra kuente Cristo. ¹² Ntá xikaha tjasin sín jie kixin sinchexiteyáhya sín tí nkehe tsintáchro sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jina tí xikaha chrónixja sín. ¹⁴ Méxra tí sín tsikók'án naxa tjarisoá sín la íchá jina chrókótöhe sín chróchóna sín xjeen sín la ko chrók'uàyakonhen sín ntoe sín. A ntá tí xikaha la tí sín nínkakonhan la chrókjontahya sín tí jaha. ¹⁵ A ntá iso tí sín tsikók'án ó kuitöhe sín tinkáchónki sín Ìnchéni kixin ch'in Tsochren tsikjachróe sín.

¹⁶ A ntá jnkojin chojni tinkáchónki Cristo ts'ikon sín kixin tsikók'án tí síhjin kjehya sín ntá t'ichjánxin tsjinkítsa sín kixin sine tí sín a kixin tsochóniahya sín tí nínko tsjinkítsa. Méxra jehó tí sín chaxín tsikók'án chónahya nínkexró tsjinkítsa mé chrókjuinkítsa tí nínko.

¹⁷ Tí nkexro jina t'etöan xra kuente nínko la jehé sín chrókjuacha sín la ko kjaxin antsí chrókjuikosáyehé chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntáchro kixin: "Chrók'uejóyáhyará kampoza ir'va tí koxinta tjejóche' xra", la ko kjaxin ntáchro kixin: "Tí sín ch'e xra la síin kjuachaxin chrókjuacha sín.*"

¹⁹ Chrókuaehya kuente jnkojin nkexro tsjikao kjuach'ia t'eka jie tí nkexro t'etöan xra kuente nínko. T'ichjánxin tsnoxin yaá ö iy'á sín tsochrónka kixin chaxin chóna jie tí nkexro a. ²⁰ Chrókjuéntuehé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie. ²¹ Tétuanxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuehé kaín chojni la ko jnkokón tétuénhen sín kaín tí nkehe xrxanka. ²² Chrókjuéyáhya chjini jnkojin sín kixin ts'etöan sín xra kuente nínko kixin tí chróchóna sín jie la kjaxin jaha chrókuamá tí jie. A ntá jaha chrókuitöhe kaín nkehe jínahya.

²³ Jaha la jnkoyaxón tóniha tjeté tsaa. Jehya intá ó chrók'uaia. Kjaxin intsí xranvino chrók'uaia ntá chrókuitöaxián jina.

²⁴ Tí ijje jnkojin chojni la t'íkonní noxin tí naxa kuitöexinhya ijje sín. A ntá í so sín nóxinhya tjasin sín jie kjánchó tió tsjixixín la tsnoxin tí jie tjasin sín. ²⁵ Mé xikaha kjaxin ó t'íkonní kixin iso chojni imá ch'e sín tí xra jina. A ntá í so sín kjónté t'íkonyani la xitjahya tsjak'emá sín tí nkehe jina ch'e sín.

6

¹ Tí sín ch'exín xra mé t'ichjánxin tsochónthehe sín kjuasáya tí lamo kuente sín, kixin ntá tí í so sín la ts'ántaxiéhya sín ihnié Dios la ko ts'ántaxiéhya sín tí nkehe tjakoni. ² A ntá tí sín ch'exín xra la chóna sín lámé sín tinkáchónki Cristo la mé chrókuitöehya sín tsjikosáyehé sín tí lamo kixin jnkokóá kichó sín. La mé antsí jina chrókjuinkítsa sín kixin ó nohe sín kixin tjinkítsa sín ijnko nkexro tinkáchónki Cristo la chrótjuéhe sín kichó sín. Jaha mé tjákehé sín kaín tíha.

Tí nkehe tinkáchónkini tsochëxinni

³ Iso sín tjako tí nkehe jehó sín tjenkayáxin sín la tóyóehya tí nkehe jina kjuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxi ijnko chin chóna sín la tíha mé tjiixin tí kjuachjinoxinhin la ko tjanjonko kichó sín la ko t'ántaxinhin sín kichó sín la ko chóntheha sín kichó sín kjuasáya. ⁵ Mé tí sín la náxrxónhya tjenkayáxin sín la jnkochrúxin tjanjonko kichó sín la noehya sín tí nkehe chaxin. Mé tjenkayáxin sín kixin tinkáchónki sín Ìnchéni kixin xikaha chrókjuacha sín nchónhya chichaon, ichro sín. Jaha la chrókuitöhe tí sín xikaha ch'e. ⁶ Tí tinkáchónkini Ìnchéni la ijnko nkehe imá tjetöan la ko tjete tíha a ntá kjuaxróxin chrók'uejóni kjónté tí nkehe chónani ó. ⁷ A ntá tí kokjihiní la nínkehó kuikohyani tí kuini chjasintajni la kjaxin tió ts'enni la nínkehó nkehe xitjahya sátsjikoni. ⁸ A ntá tí chónani nkehe sinení la ko chónani ikéni la kjónté táhó la chrókóhéheni. ⁹ A ntá tí sín tjinkaon sín imá chrókóroko sín mé tí sín a mé tsjichróe sín la lontjín sín kixin xikaha tjenkayáxin sín, la mé ts'itjáyanxin sín tíha. ¹⁰ Tí imá tjuéheni chichaon la tíha mé nuéé kaín nkehe jínahya. Jnkojin chojni imá tjinkaon sín tsochóna sín chichaon ntá tsjichróe sín tsitöhe sín tsinkáchónki Ìnchéni la tíha mé imá sinchekjasótéxin sín asén sín.

Jina tí nkehe tinkáchónkini

* 5:18 Deuteronomio 25.4, Mateo 10.10; Lucas 10.7

¹¹ Jaha mé tinkachónké Dios la t̄t̄ohé kaín tí nkehe i. Chrókjuak'e ntoá la ko kaín asán chróxráinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókjuínchehnkehya asán. ¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'ua'yéhé tí kjuachón jnkochrixin kixin mé x̄ikaha k'uiyaha Dios tí jaha. Jaha la ó tsichronka kixin tinkachónkia Ìnchéni la ó kuínhin la ko k'uikon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsichronka jína nkayakon ch'ín Poncio Pilato, mé tétuəghan ¹⁴ kixin s̄inchexiteyá kaín tí nkehe t'etəgan Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka j̄e tío tsjixrakájia tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chón̄ta ch'án kjuachaxin ts'etəgan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chón̄hya ts'en la tí t̄jen ch'án la imá t'ínkaséyan la ko kohya nínkexró tsjacha tsəchjina tí t̄jen ch'án. Nínkexró k'uikonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chón̄ta ch'án kjuachaxin ts'etəgan jnkochrixin. Amén.

¹⁷ Tí sín chón̄ta itsjé nkehe chjasintajni mé tétuəhén sín kixin sinchehnkehya sín la ko tétuəhén sín kixin tsochóntiəx̄ínhya sín tí nkehe chón̄ta sín kixin jnkochrixinhya tsochón̄ta sín tíha. Íchá jína chrókuinkáchónki sín Dios t̄jehón kixin jehe ch'án tjanjon ch'án kaín xín nkehe kixin mé x̄ikaha tjinkaon ch'án tsəchéhēni. ¹⁸ Tétuəhén sín kixin chrókjuich'e sín tí nkehe jína kixin tí chaxín chrókóríko sín la chrókjuínk̄itsa sín kichó sín la chrók'óxiəyēhe sín tí nkehe chón̄ta sín. ¹⁹ Mé x̄ikaha chrókjuacha sín tí nkehe t̄jete kixin chr'əx̄in la jína chrók'uejé sín kixin chrókjuacha chróchón̄ta sín tí kjuachón jnkochrixin.

Kjuixixín k'uituenhen ch'ín Timoteo

²⁰ Jaha Timoteo t'ayakonhén tí x̄ra la tiénhya tí nkehe ntoáhya nixja chojni. Ntáchro sín kixin imá nohe sín k̄jánchó chaxínhya tíha. ²¹ Iso sín ó x̄ikaha ntáchro sín kixin imá nohe sín la ntá kjuíchrəe sín í tinkáchónkihya sín Ìnchéni. Dios chrókjuintayavan tí jaha. Amén. Ó t̄jen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'aha ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochónta chojni kjuachón jnkochrixin tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. T'ikuan éxi xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuiikonòaha ch'án la ko chrótjaha ch'án kjuaxróxin.

Chróchrónka ch'án kixin tinkáchónki ch'án Jesucristo

³ Xráxinkávan tí jaha tió nixjaha Dios nchakotjin la ko tie la ko tjétjáncháha kjuasáyé Dios kixin imá tinkáchónkia ch'án. Jehé ch'án mé t'aha xra kaín asenná éxi xikaha mé k'uekjich'e tí sín tsik'axrjenixinna. ⁴ Xráxinkávan jnkochrixin nkexrí tsjanka la tjínkavan kixin chrótsjaha tí jaha inaá kixin tsóchéhe asenná. ⁵ Ó nòna kixin kaín asán tinkáchónkia Jesucristo. Kjaxin náchrja tjan Loida la ko iná tjan Eunice mé saoxin kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkáchónkia ch'án.

⁶ A ntá ijie ntáxráxinkávan kixin chrók'uitjányanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonyha Nchakuen ch'án kixin tsochrakonni. Náhl. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókósuàhya chróchrónka kixin tinkáchónkia Ìnchéni la ko kjaxin chrókósuàhya chróchrónka kixin janhan tjéchjinaxián tí xrxjanka itén ch'án. Kjónté la íchá jína chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé. ⁹ Jehé Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuich'eni ntá chrókuaáxinni. Náhl. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixixinyha chjasintajni mé tsikjenkayáxin ch'án tíha kixin jehé ch'án mé imá tjuèheni ch'án. ¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyvan ch'án tí kjuachaxin k'uechónta tí kjuach'én kixin kjuacha ch'án xechón ch'án inaá. Chronkaxin itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyvan.

¹¹ Dios mé k'uetuanna sátsjixrxjanka itén ch'án la ko kjueyána ch'án tsjákoħa tí sín jehya sín judío tí tan jína. ¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkáchónkia. Mé ó nòna kixin chónka ch'án kjuachaxin ts'ayakonhenni ch'án tsjixrakájia tí yon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyvanhya tjákua kaín nkehe jína ó kjuákoħa. Naxa titekávan la ko tjuèhé kichuára kixin tinkáchónkia Cristo Jesús. ¹⁴ Kjuachaxién tí Nchakuen Dios chóntani jnkobjnkoni mé t'ayakonhén jína tí tan tjákua kjuíntakjtonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehé sín kuítóna sín la ko kjaxin tí ch'ín Figelo la ko ch'ín Hermógenes. ¹⁶ Tjánháha Ìnchéni kixin imá tsikonóhehe ch'án tí sín tjejó ntøe tí ch'ín Onesiforo kixin jehé ch'án mé imá kjuínkítsana ch'án la ko kósuèhya ch'án ikui ch'án kjónté tjéchjina. ¹⁷ Tí nantá kjuuji ch'án chjasin Roma ntá kuitøehya ch'án kjueyána ch'án hasta k'uitjana. ¹⁸ Tjánháha Ìnchéni kixin tí yon itsi ch'án ntá chrókuiikonóhehe ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóxin ch'ín Pablo kixin jeheni éxi yóhe ijnko soldado jína kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjínkítsa kixin tinkáchónkini ch'án. ² Tí nkehe kuínhín kjuákua nkayakon nchónhya chojni mé xikaha chjehé tí xra tí sín jína choxian jína ch'e xra kixin ntá jehé sín mé xikaha chrókjuakøhe sín i so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo. ⁴ Kohya nijnko soldado jína ch'e xra chrók'ui xenhen ókjé xra kixin t'ichjánxin jnkójnón xra sich'e ch'án kixin éxi tjinkaon tí nkexro t'etøenhen ch'án. ⁵ Mé xikaha éxi yóhe ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etøan. ⁶ La éxi yóhe ijnko nkexro ch'e xra nonte ntá chónka ch'án kjuachaxin

saoxín tsakja ch'án tí nkehe ts'óna. ⁷ Chrórxaxinkávan jína kaín tí nkehe xrjanka la ìnchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehé ch'án mé k'uaxrjenixin ch'án ch'ín rey David. Tíha mé tí tan jína tsaáxinni tjétjákua. ⁹ Tí tan tjéxrjanka mé tjasótexinna. Tíha mé tjéchronretoxinna cadena éxí ijnko chojni tsíkjàya la kjónté tí itén Dios la jehya tjéchronretoxín cadena. ¹⁰ Méxra kjónté nchónhya t'atsínka tí janhan la ntáxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochríxín kixin tinkáchónki sín Jesucristo.

¹¹ Tíhi mé chaxín:

Tí jehé ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótexinni tí jehé ch'án la ntá kjaxin ts'áyéhéni kjuachaxin kuénte ch'án ts'etoanni. A ntá tí chrókjuinchemáni tí jehé ch'án na ntá kjaxin ch'án la xíkaha sich'e ch'án.

¹³ Kjónté nchexiteyèhani ch'án la jehé ch'án tjenchexiteyá ch'án kixin Dios la xitjahya sich'ia ch'án.

Chrókuich'eni tí xra jína

¹⁴ Nchexraxinkávan sín kaín tí nkehe i. Dios tjetsjehe tétuénhén sín kixin chrókuítoghe sín tí nixja sín tjanjonxin sín kixin ó chónkó tíha la ninkehó sínkíhya. Tí xíkaha ch'e sín la sinchek'ítjáyán sín tí sín tjejótinhin. ¹⁵ Sich'e xra jína kixin tsóxrxínhin Dios tí xra tjech'e a. Ntoá chrókuákua tí tan jína chaxín kixin ntá chrókuichjánxinhya chrókósuaha. ¹⁶ La títoghé tí nkehe náxrxónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jína tjako sín mé éxí yóhé ijnko iton sóa sitinkáchr'enka. Mé xíkaha tjako tí ch'ín Himeneo la ko ch'ín Fileto. ¹⁸ Jehé sín mé ó kjuixin kuitoghe sín tí ntja ntoá la ntáchro sín kixin ó kjuixin k'uátsínka tí tsóxehón chojni. Ntá xíkaha ch'iyehé sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxí yóhé tí xro xrankíxín tjat'o xitjahya tsoxika la chóna éxí ijnko sello tí itén Dios ntáchro kixin: "Ìnchéni mé tjatsoan ch'án tí chojni kuénté ch'án",* la kjaxin ntáchro kixin: "Kaín tí sín tinkáchónki Cristo mé t'ichjánxin chrókuítoghe sín kaín nkehe jínahya," mé xíkaha ichro itén Dios.

²⁰ Ijnko nchia jíé kuénte tí sín rico la síin vaso tsík'óna chica oro la ko vaso tsík'óna chica plata. La kjaxin síin nkehe tsík'óna ntachiso la ko nkehe tsík'óna nchetje. Iso la xra ó tsík'óna kuénte tí xra tjetooan la í so la tsík'óna kuénte tí xra tjetuanhya. ²¹ A ntá ijnko chojni chrókuítoghe kaín jíe chrókóyóhé éxí ijnko vaso tjóá jína kixin chrókuicháxinhin Ìnchéni. A ntá tí nkexro xíkaha chrókuich'ehya tí nkehe jínahya kixin chrókuicháxinhin Ìnchéni tí xra jína.

²² Títoghé kaín tí nkehe jehya tí jína tóxrxínhin í so tí sín ntasoá a. Chrókuak'e tí ntja ntoá la ko kaín asán chrókuinkachónkia Cristo la ko chrótuéhé kaín chojni la ko kjuaxróxin chrók'uejokoa kaín sín. Mé xíkaha chrók'uéjé kaín xín tí sín kótjóá asén mé kaín tí sín tinkáchónki Ìnchéni. ²³ Jaha chrókuaaha kuénté tí sín lontj tjenkayáxinhya jína kixin jaha ó noha kixin xrahya chrókuajanjoko kíchó sín. ²⁴ A ntá ninkexro ch'ehé xra Ìnchéni chrókuajanjoko kíchó sín kixin jína chrókuinkítsa kíchó sín. Chrókónohe sín kaín nkehe jína chrókuako sín la ko chrókóninkakuenhya sín kíchó sín. ²⁵ Kaín asén sín jnkojína chrónixjehé sín tí sín titekakonhya kixin chróchónhen sín kixin Dios chrókuinkítsa tí sín a chrók'uíxinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókuich'e sín ²⁶ kixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókuich'iyehé sín ntá chrókuasin sín jíe.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ìnchéni mé imá chrók'uetooan sín jehó la ko imá tsóxrxínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó díos. ³ Tsojtúehya sín kíchó sín la ko tsikonóehya kíchó sín la ko tsjonta sín kíchó sín la ko ninkexró tsochrakuenhya sín la ántosén sín tsjasin sín jíe, la ko imá tsojtíehé sín la ko imá tsonínkakonhen sín kaín nkehe jína. ⁴ Jehé sín mé sinchekji kíchó sín la ko tsjenkayáxinhya sín jína la ko sinchehnke sín. Tsojtínkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehé sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuénte Dios chaxín ntoá.

Méxra jaha la chrókuankíehya tí chojni ch'e xíkaha. ⁶ Iso tí sín a mé ixri sín t'ixenhen ntog ókjé chojni la ch'iyehé sín tí chojni chjin lontj tjasin jíe la nchexiteyèhé sín kaín tí ntáchro

* 2:19 Números 16.5; Juan 10.14

asén sín. ⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxi yóhe tí sín k'uékjinchexroan mé ch'in Janes la ko ch'in Jambres mé k'uénínkakonhen sín ch'in Moisés mé xikaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuénte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sín isé káxin kaín chojni tsonohe káxin tí sín a mé lóntj sín káxin éxi xikaha tsíkónhen tí yaá sín k'uékónínkakonhen ch'in Moisés.

Tí nkehe kjuixixín k'uetuēnhen ch'in Pablo tí ch'in Timoteo

¹⁰ A ntá jaha mé ó kuitekávan tí nkehe kjuákua. Ó noha nkexrí kjuak'é janhan la ko ó noha tí xrá kjuít'a janhan. Ó noha nkexrí tinkáchónkia Ìnchéni la ko noha káxin tjokahya kónínkavan la ko noha nkexrí tjuahá chojni. Ó noha káxin kjónté kónínkaon chojni la kuitóahya tí xrá a ¹¹ kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjínkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín. ¹³ A ntá tí sín jínahya la ko tí sín ixrí ch'ia sín mé ts'óna sín antsí jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuitekávan. Jaha la ó noha tí nkexro kjuakoha. ¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni káxin Cristo Jesús tsaáxinni káxin tinkáchónkini ch'án. ¹⁶ Ntá kuenté xroon Biblia kjuachaxiēn Nchakuen Dios kjuínkítsa tí nkexro ikjin la tíha mé jína tsoxrácuexinní tí nkehe chaxín la ko tíha mé jína tsjentuēheni la ko tsjinkítsani tsonoheni nkexrí chrók'uejóni ntoá ¹⁷ káxin tí nkexro tinkáchónki Dios chrókónohe jína la ko chrókjuacha sich'e kaín tí xrá jína.

4

¹ Kjuachaxiēn Dios la ko Ìnchéni Jesucristo, tí nkexro itsi éxi ijnko rey la sinchekitóexín ijje kaín chojni tjejóchón la ko tí chojni tsík'en, ² mé tétuanhan chrókjuákua itén Dios kaín asán kjónté á chrókuinhin sín o náhi. Nixjehé sín jnkojína káxin tsitekaon sín la ko tjéntuéhé sín jnkojína. Chrókónínkákónhya chrókjuákohé sín. ³ Itsi ijnko yaon ntá tsojtinkakonhya sín tsinhin sín tí nkehe jína. A ntá sinchexiteyéhe sín tí nkehe ntácho asén sín ó. Tsjeýá sín nchónhya maestro tsjakohé sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuénté kaín nkehe chaxínhya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xrá chrókjuákohé chojni itén Dios tsaáxinni mé xikaha sinchexiteýá jína tí xrá chonta.

⁶ Ntá janhan ó kjuixiraká tí hora tsjasótena la ko ó kjuixiraká tí hora its'én. ⁷ Ó kjuánjonkian jína kaín tí nkehe jínahya la ko ó kjuixinna tí xrá kuéntana la ko kuitóahya jína kuínkachónkia Ìnchéni. ⁸ A ntá ijie la tí nkehe tsjónna mé tjechónhen káxin jína kjuak'é ntihi. Tíha mé tsjanjon Ìnchéni tí yaon itsi ch'án. Jehé ch'án mé ijnko juez jína. Jehya káxin janhván tsákjaá tí nkehe tsjanjon ch'án. Náhi, kjáxin kaín tí nkexro kuitekaon sín ch'án la ko chéhe sín tjejóchónhen sín tió tsi ch'án.

Ch'in Pablo k'uetqan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ káxin ch'in Demas la kuitóhe ch'án tí janhan káxin imá kóxrjínhin ch'án tí nkehe kuénte chjasintajni. Sátsíkji ch'án chjasin Tesalónica. Ch'in Crescente mé sátsíkji ch'án chjasin Galicia a ntá ch'in Tito sátsíkji ch'án chjasin Dalmacia. ¹¹ Jehó ch'in Lucas naxa tjékjan ch'án. Tjikjéýá ch'in Marcos la tsjikuana ch'án ntihi káxin jehé ch'án mé jína tsjinkítsa ch'án tí xrá chonta ntihi. ¹² A ntá ch'in Tíquico mé kuétuanhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'itsate kuitóha chjasin Troas ntóé ch'in Carpo la ko kjáxin ts'inkakuana tí libro kuéntana la ko kóí tí tjéé iko tsík'óna xroon.

¹⁴ Tí ch'in Alejandro tí ch'in ch'e xrá chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án. ¹⁵ Jaha mé tóxakonhan káxin tí jehé ch'án káxin imá nínkakonhen ch'án tí nkehe tjakoni.

¹⁶ A ntá tí saoxín k'uéya tí síxree tí kjuia tí tjejó sín la ninkexró kjuínkítsahyana. Kaín sín mé kuitóna sín janhván. Kjónté xikaha la tjáncháha Dios káxin chrókjuahya ch'án kuéntá káxin xikaha kjuich'e sín. ¹⁷ Kjánchó Ìnchéni mé chaxín kjuínkítsana ch'án la kjuanjon ch'án kjuachaxín káxin tsjachana naxa jína tsjakua itén ch'án. Ntá kuínhin kaín tí sín jehya judío. A ntá Ìnchéni kjuínkítsana káxin kjóneyhana koxra. ¹⁸ Ìnchéni mé tsjinkítsana káxin naxa tsonnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etqan ch'án nkaya nkajni. Kjuasáyé ch'án káxin xikaha jnkochrín tsoxiteýá. Amén.

Ch'in Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntøe ch'ín Onesíforo.
²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkojína.

²² Ínchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énnen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýána Jesucristo káxin tsjákoḡa tí í so sín tsíkjeýá Dios kjaxin káxin ts'itja sín tsoḡohe sín káxin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónta sín kjuachón jnkochrín. Dios la xitjahya sich'ia la káin tí nkehe tsíchronka ch'án ósé tí naḡa k'ónahya chjasintajni la mé xíkaha tsoḡhen. ³ Ntá tí yaon tsintácho Dios la mé jie ó xiteýá la ntá kónoxín tí tan kuente ch'án. A ntá Dios tí nkexro tsaáxinni mé k'uetḡan káxin sit'aha ch'án xra tsjáku itén ch'án. ⁴ Ikjan tí xroon í chr'anhan jaha Tito. T'íkuan éxi chaxín xjanna tí jaha káxin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókuintayavan la ko chrókuikonóḡa ch'án la ko chrótjaha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoḡa jaha tí isla Creta káxin jaha chrókuétuennén tí sín siín ntiha káxin nkexrí chrók'uejó sín la ko chrókónoxín nkexro ts'etḡan kuente jnkojnko njnko jnkojnko chjasin éxi tí kuétuanhan jaha. ⁶ T'ichjánxin káxin tí nkexro ts'etḡan xra kuente njnko la jina chrókjuak'e káxin kohya nkexro chrók'ueka jie, la ko chróchónta jnkokoḡa ichjién la ko tí xjeen sín chrókuinkáchónki Inchéni káxin tsokohya nkexro chrókjuanchia jie káxin jehya tí jina tjejóch'e sín, la ko kjaxin chrókójiehya sín. ⁷ Mé xíkaha tí nkexro ts'áyeḡe tí xra ts'etḡan xra kuente njnko mé ts'etḡan nkexrí tsoḡhen xra kuente Dios la ntá t'ichjánxin jnko nkexro tsjenkayáxin jina, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya jnko nkexro tókoan la ko jehya jnko nkexro tjeýá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jina chrókjuak'e ch'án káxin tí tsjiji jnko nkexro ntḡe ch'án chrókjuanjon ch'án kjuachaxin chrókjuak'e tí nkexro a. La ko jina chrókjuak'e ch'án la ko jina chrókjuenkayáxin ch'án káxin jnko nkexro ó tsíkjinchetjóá Dios la ko chróchónta ch'án kjuasáyé ch'án. ⁹ Kjaxin t'ichjánxin chrókútoḡehya ch'án tí tan jina xrákoḡe ch'án káxin ntá jina tsjákoḡe ch'án í so chojni tí nkehe ntoá la kjónté nkexro tjinkakonhya tsinhin la jina chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi lontj sín mé xíkaha ch'iyehé sín chojni. ¹¹ Tí sín a la chrók'uík'jeḡeni ir'va sín káxin tjachróe sín nchónhya chojni káxin tjako sín tí nkehe jehya jina káxin chrókjuich'ia sín chrókjuacha sín nchónhya chichaon.

¹² Jnko ch'ín kuente chjasin Creta la mé tsíchronka ch'án nkexrí tjejó tí sín chjasén ch'án. Ntácho ch'án káxin: "Káin tí chojni chjaséni mé imá ch'ia sín la ko imá jiehe sín la ko imá kóchjinka sín la ko séhe sín", mé xíkaha chrónka ch'án. ¹³ Tí nkéhe tsíchronka ch'án mé chaxín ntoá. Méxra antsí fuerte chrókjuéntuéhé sín káxin ntá jina chrók'uejó sín chróxraxinkaon sín Dios. ¹⁴ Nixjeḡe sín káxin chrókuahya sín kuente káin tí nkehe tsík'axrjenín kja tí sín judío tjako la ko chrókuitekakonhya sín tí nkehe t'etḡan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuente sín ntá káin nkehe ch'e sín la jina. A ntá tí nkexro titekakonhya la tjuáhya kjuaxrexinkaon kuente la kohya ninkehó nkehe jina tí kjuaxrexinkaon kuente sín la káin nkehe tjenkayáxin sín mé tjuáhya. ¹⁶ Ntácho sín káxin chóxin sín Dios a ntá tí t'ikonni nkexrí ch'e sín ó noexinni káxin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xíkaha ch'e sín la, ¿nkexrí chrókjuich'e sín tí xra jina?

2

Chrókjuako ch'ín Tito tí tan chaxín

¹ A ntá jaha chrókjuakua éxi tí chrónka tí tan jina chaxín. ² Tjákoḡe tí sín ó táda káxin chrókókoanhya sín la ko jina chrók'uejó sín la ko chróchónta sín kjuasáyé sín la ko chróchónta sín jnko kjuaxrexinkaon jina la ko jina chrókuinkáchónki sín tí nkehe chaxín la ko chrótjuehe sín kichó sín la ko chrókóninkakonhya sín kjónté tsjasóte sín. ³ A ntá kjaxin xíkaha tí sín ó nána la kjaxin jina chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín jnko kjuaxrexinkaon jina ⁴ káxin xíkaha chrókjuakuexin sín tí chojni chjin tjarisoá a káxin chrótjuehe sín xii sín la ko chrótjuehe sín xjeen sín ⁵ la ko chrókjuich'e sín xra jina la ko ntoá chrókjuenkayáxin sín la ko jina chrók'uáyakonhen sín nchia ntḡe sín la ko chrókójina sín la ko chrókuitekakonhen sín xii sín. Tí xíkaha chrókjuich'e sín chrókjuinchehiteýá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xíkaha chrókjuinchehraxinkávan tí sín ntasoá káxin jina chrók'uejó sín chróchónta sín kjuasáyé sín. ⁷ Jaha mé chrókjuakoéxian sín káin nkehe jina la ko chrókjuakóḡe sín káxin

ntoá chrók'uejó sín. ⁸Jaha la chrónixja tí nkehe jína kixin kohya nkexró chrók'uaántaxín la ntá xíkaha chrókósuehé tí sín nínkaon la ntá kohya nkehe jínahya chróntáchro sín kuente tí jeheni.

⁹Tétuénhén tí sín xrich'exón xra kixin chrókjuinchexiteyéhé sín tí lamo kuente sín la ko chrókójina sín la ko chrónixjankjehya sín tí nkexro ch'ehe sín xra ¹⁰la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹Kixin Dios mé kjuakoxin ch'án kixin nkexrí tjuèhenni ch'án kixin jehe ch'án mé tsaáxin kaín chojni. ¹²Kjuasáyé Dios mé tjakqeheni ch'án kixin chrókuítqeheni kaín nkehe jje la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³Kjaxin chrók'uejóni jína kixin chrókóchéhenni chrók'uejóchónhenni tí yaon kjuachaxién Dios jje itsi Dios la ko Jesucristo tí nkexro tsaáxinni. ¹⁴A ntá jehe ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jje chóntani kixin ntá jeheni mé ts'ónani ijnko chojni sich'ehe ch'án xra la ko tsoxrjinhjini sich'eni kaín xra jína tjinkaon ch'án.

¹⁵Tíhi mé chrókjuákua la ko chrókjuinchexraxinkávan sín la ko chrókuétuénhén sín kjuachaxién Dios. Chrókuítqéhya kixin ninkexró chrókóqjoniéhya tí nkehe tjákua jaha.

3

Jína chrók'uejó tí sín tinkáchónki Cristo

¹Chrókjuinchexraxinkávan sín kixin sinchexiteyéhé sín tí gobierno la ko tsitekaon sín ichrén xra ts'etoan tí sixréé kixin chrókjuich'e sín kaín xra jína ts'etoan tí sín a. ²La ko chrók'uaántaxiéhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehé sín kaín chojni.

³Jeheni kjaxin ósé k'uélontjini la ko k'uékitekakonhyani Dios. Chjini k'uék'ajini la k'uékóxrjinhjini kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíéhenni í so chojni. ⁴A ntá tí Dios tsaáxinni mé kjuakuexinni ch'án kixin jína ch'án la ko tjuèhe ch'án kaín chojni. ⁵Jehe ch'án kuaáxinni ch'án la jehya kixin ichrén xra jína chrókjuich'ehehenni ch'án. Náhi, ó jehi kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjinhini njxin kixin tí Nchakuen ch'án la mé k'uáyéxinni kjuachón njxin. ⁶Kjuasáyé Jesucristo tí nkexro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuénté ch'án. ⁷A ntá xíkaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochrixín tsjanjon ch'án.

⁸Kaín tíha mé chaxín. Tjinkávan kixin jaha chrókuétqan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni. ⁹A ntá jaha mé tjtóhé tí sín tjachaxin kichó sín lontjín sín la ko tjtóhé tí nkehe tinkáchónki sín kuente tí sín tsik'axrjenixin sín la ko tjtóhé tí sín tjantonxin tí ley kuente Moisés. Kaín tíha la ó chónkó la ninkehó kjuaxrexinkaon chóntahya.

¹⁰Jnkojín nkexro tjinkaon tsjixrónkáxin tí tójnkotsé njnko ntiha la nixjehé ch'án jnkojína senó la ko yóxin inaá ntá tí titekakonhya ch'án ntá tjtóhé sátsji ch'án ¹¹kixin ó noha kixin tí chojni xíkaha a mé ntoáhya tjenkayáxin sín kixin jehó sín nchek'ánkí sín ijje sín.

Tí nkehe k'uetqan ch'in Pablo

¹²Ti tsétuanhan ch'in Artemas la ko ch'in Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin. ¹³Jína chrókjuinkítsa jaha tí ch'in Zenas tí ch'in nixjayákonhen í jnko chojni la ko tí ch'in Apolos la ko chróchéhé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. ¹⁴Ntá tí sín í so chrók'uitja sín nkexrí sich'e sín tí xra jína la ko chrókjuinkítsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixin nixja ch'in Pablo

¹⁵Kaín tí nkexro tjéqian janhan ntihi nixjahá sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèhenni sín. Dios mé chrókjuincheyaonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehe ch'ín Filemón

¹ Janhan Pablo tjéchinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios. ² Kjaxin chrókuinhin kaín tí sín tinkáchónki Ìnchéni tójnksóté ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni. ³ Kjuasáyé It'éni Dios la ko Ìnchéni Jesucristo chrókuinjntayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxin tjáncháha kjuasáyé Dios tí xráxinkavan tí jaha tí nixjaha Dios ⁵ kixin ó kujnhan kixin imá tinkáchónki Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkítsa ch'án tí sín kuítekaon tió kjuákohe sín kixin ntá tsienxin sín jina nkexrí kaín tí nkehe chótani kixin kjuincheyaonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kichúa ntiha la ko imá kjuinchechéhé asén tí sín tinkáchónki Ìnchéni.

Ch'ín Pablo chrónóhe tí ch'ín Filemón kixin tsikonóhe ch'án tí ch'ín Onésimo

⁸ Janhan na kjuayána Jesucristo t'aha ch'án xra méxra chonta kjuachaxin tsétuanhan jaha tí nkehe chrókuich'e. ⁹ A ntá íchá jina jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéchinaxián tí xra kuènte Jesucristo. ¹⁰ Méxra xrjannóaha tsjinkítsa tí ch'ín Onésimo. Jehé ch'án mé t'ikuan éxi xjanna kixin kjuankixin ch'án tsinkáchónki ch'án Jesucristo tí tjéchinakian ch'án ntihi.

¹¹ A ntá tí ósé ch'ín Onésimo mé kjuit'ahya xra jina. A ntá ijie ó nòna kixin imá jina sit'aha ch'án xra tí jaha la ko jina sich'ena ch'án xra kjaxin. ¹² Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxi chrótjuèhé tí janhan. ¹³ Janhan tjínkavan chrókuitonakian ch'án ntihi kixin chrókuinkítsana ch'án chrínki tí chrókuak'e jaha kixin tjéchinaxián tí itén Jesucristo. ¹⁴ Kjánchó tjínkakhya tsjáncháha xikaha tí tjínkakhya jaha. Jehya kixin jaha chrókuinkítsani kixin chrókuétuanhan xikaha. Náhí. Jehí tjínkaonni éxi jaha tóxrjínhan chrókuich'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrixin. ¹⁶ Ijie la jehya éxi ijnko chojni tsik'íná chrók'uikuan ch'án. Náhí. Ntá jie la éxi ijnko nkexro ch'e xra antsí jina mé éxi ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxi chojni ó chrók'uikuan ch'án. Náhí. Chrók'uikuan ch'án éxi ijnko kichua kuènte Ìnchéni.

¹⁷ Méxra tí chaxin t'ikuan tí janhan éxi kichó ni jnkokoá tinkáchónki Ìnchéni ntá chrók'uayéhé ch'án éxi chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjínkakhya chrókujntaxraxinkávan tí jaha kixin kaín tí nkehe tsjikána tí janhan kixin kjuákohá jaha. ²⁰ Méxra kichó ni tsotsenkávan sich'e tí nkehe tjáncháha chaxin tinkáchónki Ìnchéni. Mé xikaha sjinchechéhé asenná kixin jaha mé kichó ni tinkáchónki Cristo.

²¹ Méxra ikjian tí xroon i chr'anhan kixin ó nòna kixin jaha la sjnchexiteyá tíha la ko ó nòna kixin jaha la sich'e antsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéchnhan kixin jahará la nixjehérá Dios la ntá Dios chrókujanjon kjuachaxin kixin chrókjuasántsajahará.

Kjuixixín nixja ch'ín Pablo

²³ Kjaxin ch'ín Epafras mé nixjaha ch'án jnkójina. Jehé ch'án mé tjéchinakian ch'án jnkokoá tí ntoéchiso ntihi kixin kjaxin tinkáchónki ch'án Cristo Jesús. ²⁴ Ch'ín Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójina. Jehé sín mé tjinkítsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá óse Dios mé nixjehe tí sín tsík'axrjeníxinni nchónhya veces kixin nchónhya nkexrí chrókiénxín sín, nixjaxin ch'án tí sín k'uéchrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehé ch'án mé t'inkaséyanxín ch'án tí kjuachaxin kuénte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehé ch'án t'aykonhen ch'án kaín xín nkehe síin kixin tí kjuachaxin jié chóna tí tan nixja ch'án. A ntá kjuixin kjuinchetjóá ch'án tí jie chónani, ntá sákjuí ch'án kjuak'etjaxin ch'án tí tja chjina It'é ch'án tí tjen ch'án t'etqan ch'án nkaya nkajni.

Tí Xjeen Dios imá t'etqan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuénte It'é ch'án, a ntá imá t'etqan ch'án, a ntá tí jehe sín la náhi. ⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuénte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kixin:

Kaín tí sín ángel kuénte Dios chrókjuikosáyehe tí jehe ch'án.†

⁷ A ntá ntáchro Dios kuénte tí sín ángel kixin:

Tí sín ángel ch'éna ch'án éxi xrjntq kixin nchakuen sín ó,

la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrín, jaha Dios,

la mé jaha mé ijnko nkexro t'etqan jina.

⁹ Jaha tóxrjnhan tí nkehe jina, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuéntá kjuintacháha má,

a ntá tí í so sín k'uájikoa la kánhyó.§

¹⁰ Kjaxin ntáchro kixin:

Jaha Inchéni, tí xrankíxixín kjuich'éna chjasintajni,

la ko jaha kjuich'éna nkajni.

¹¹ Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxi iké chojni,

¹² éxi ijnko iké chojni xikaha tsoxrá't'o,

ts'ixinkí éxi ijnko iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuénte ch'án kixin chrók'uejó sín tja ch'án chjina ntahó chrók'uetqan sín, tsjixinjian kaín xín tí sín nínkakonhen sín la chrókjuachahya sín chrók'uetqan sín.† ¹⁴ Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkítsa tí sín ts'áyéhe kjuachaxin tsaá sín.

2

Chrókjoniéhyani tí nkehe tsaáxinni

¹ Mé xikaha chrókjuenkayáxinni jina tí nkehe ó kuínhini kixin chrókuitqehyani tí ntja ó kuákjani. ² A ntá tí tan tsíchrónka tí sín ángel óse la mé tsíkónoxín kixin chaxín tíha. A ntá tí sín kuítekakonhya sín tí tan jina kuínhin sín la kjuasin sín jie, na mé kjuasóte sín la táhó mé kjuacha sín. ³ ¿Xá nkexrí chrókuaáni tí chrókuaahyani kuéntá tí nkehe jie chrókuaáxinni? Jehé Inchéni tsíchrónka ch'án saoxín nkexrí chrókuaáxinni, a ntá chr'éxin tí sín tsikinhin mé kjuakohe sín tí jeheni. ⁴ Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxién Nchakuen ch'án tsík'áyéhe ni éxi tjinkaon ch'án tsjanjon ch'án.

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4 § 1:9 1.8-9 Salmo 45.6-7 * 1:12 1.10-12 Salmo 102.25-27 † 1:13 Salmo 110.1

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'uetóan chjasintajni chr'éxin éxí tí jie tjejónixjani. ⁶ Náhi. Éxí nixja xroon itén Dios chronkaxin kixin:

ǂXá nkexéhe tí chojni a, jaha It'éni Dios, kixin imá xráxinkávan tí jehe ch'án?

ǂXá nkexro tíha kixin imá tóxakonhan kixin tí jehe ch'án?

⁷ Jaha tsíkijch'éna ch'án éxí ijnko chojni t'etóanhya kjánchó kánhyó isé, a ntá tí sín ángel antsí má k'uechónta sín kjuachaxin,

a ntá jie la imá kjuikosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etúenhen ch'án.*

Mé xíkaha ntáchro tíha kixin tsíchjéhe Dios tí chojni kjuachaxin kixin chrók'uetúenhen ch'án kaín xín nkehe, ntá Dios kuitóehya ninkehó nkehe chrókuitekakuenhya ch'án. Kjánchó naxá t'íkónhyani kixin á kaín nkehe titekakonhen ch'án. ⁹ Kjánchó ó noheni kixin Jesús la tsíkijch'éna Dios éxí chojni t'etóanhya kjánchó kánhyó isé, a ntá tí sín ángel antsí má k'uechónta sín kjuachaxin. Dios mé tjeúhe kaín xín chojni ntá tjinkaon ch'án kixin ch'in Jesús chrók'ueenyákonhen kaín chojni. A ntá jie tsík'áyehé ch'án kjuachaxin náxrjón la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe síin la kuénte Dios la ko tjejó kixin tí kjuachaxin kuénte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjeen ch'án tí t'inkaséyan.

Méxra Dios kjuanjón Ínchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án. ¹¹ Kaín tí sín tsikótjóá la ko tí nkexro kjuínchetjóá na mé chóna jnkokoá It'é. Méxra tí Xjeen Dios tósuehya ch'án tsontáchro ch'án kixin kichó ch'án tí jehe sín. ¹² Éxí ntáchro tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyehani tsotsjeni himno tí tójkotsékoni tí sín kichó ni.†

¹³ Kjaxin ntáchro kixin:

Janhan titekavan Dios.‡

La ko kjaxin ntáchro inaá kixin:

Ntíhi tjékian tí xjeen Dios tsikjanjón ch'án tsík'ayáha.§

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'in Jesús xíkaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrxéjin kixin diablo tíha, ¹⁵ mé xíkaha chrókjuinchekaá ch'án kaín tí sín chrakonhen sín tí kjuach'en, tjejó sín éxí t'itúenhen sín kaín yaon tjejó sín. ¹⁶ Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjenixin ch'in Abraham. ¹⁷ A ntá t'ichjánxin chrók'óyóhe ch'án éxí tí sín kichó ch'án kixin jína chrók'óna ch'án nch'at'á t'etóan kuénte Dios la chrókjuíkonóhenni ch'án, ntá jína tsjatsen ch'án ijje kaín chojni kixin k'ueenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3*Antsí tjeotoan ch'in Jesús, a ntá ch'in Moisés la kánhyó*

¹ A ntá kichó ni, jahará la tsíkótjóará, la mé Dios tsík'iyahará ch'án kixin ts'ónará xjeen ch'án, a ntá chrórxaxinkáonrá jína Cristo Jesús na mé jehe ch'án mé tí apóstol la ko tí nch'at'á t'etóan kuénte tí nkehe tinkáchónkini. ² Tí ch'in Jesús jína kuitékonhen ch'án Dios, mé tí nkexro tsíkijeyá ch'án sich'ehe ch'án xra, éxí kjaxin ch'in Moisés jína kjuích'e ch'án xra k'uáyakonhen ch'án ntóe Dios. ³ Dios antsí kjuikosáyehé tí ch'in Jesús, a ntá ch'in Moisés la kénhyó, éxí antsí tjikosáyehé sín tí nkexro kjuích'éna ijnko nchia, a ntá tí nchia la kénhyó tjikosáyehé sín.

⁴ Jnkoinko nchia k'óna kixin síin nkexro kjuích'éna, kjánchó Dios mé kjuích'éna kaín nkehe síin. ⁵ Ch'in Moisés jína kjuích'e ch'án xra k'uáyakonhen ch'án tí nchia kuénte Dios. Tí xra kjuích'e ch'án mé k'uénixja ch'án kuénte tí nkehe tsontáchro Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jína la t'ayakonhen ch'án tí nchia kuénte Dios, la tíha mé jeheni, kixin tí tsitóehyani ch'án la naxá tsinkáchónkini ch'án ntá tsochéhenni kixin tí nkehe tjejóhónhenni.

Ts'ok'éheni tí tjeen Dios

⁷ Mé xíkaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínra tí nkehe ntáchro Dios,

⁸ chrókjuích'ehyará éxí kjuích'e tí sín ósé kuitékonhanya sín Dios

tí yaon kjuích'ehe sín prueba Dios tí nteje.

* 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

⁹ **A** ntá ntaha tí sín tsík'axrjeníxínrá ósέ kjuích'èna sín prueba, kjónté cuarenta nánó k'uíkon sín tí xrá kjuít'a.

¹⁰ Méxra kónínkakonhan tí chojni a, ntáxrjan kíxín: "Xráxín xrichoe asén sín, tjínkakonhya sín tsochóxin sín ntíaná."

¹¹ Méxra kónínkakonhan tí jehe sín, ntátjan sín

kíxín chaxín tsoxiteyá kíxín ts'ixenhya sín ts'ok'éhe sín tí tjén janhan.*

¹² Kíchóni, chrókóxakonhanrá kíxín chrókókohya nijnko tí jahará chróchontará asánrá jínahya chrókuítghérá Dios tjechón chrókuítekákuenhyará tí jehe ch'án. ¹³ Chrókuínchechéhérá kíchuará jnkojnko yaon naxa tjen tiempo kíxín nijnko tí jahará chrókuénkayáxinrá kíxín naxa chrókuásínrá jie, í chróntáchrohya asánrá kíxín naxa chrókójiáhará. ¹⁴ **A** ntá tí chrók'uejóni jnkojína hasta tsjixixin éxi kuinkáchónkini tí xrankixixin, ntá síin kjuachaxín ts'ejókoni Cristo.

¹⁵ Mé xíkaha ntáchro kíxín:

A ntá jie tí chrókuinhínrá jahará tí nkehe ntáchro Dios, chrókuíjch'ehyará éxi kjuích'e tí sín ósέ kuítekakonhya sín Dios.†

¹⁶ ¿**A** ntá nkexro tí sín kuínhin itén Dios, a ntá tí chr'éxin kuítekakonhya sín? ¿**A** jehya kaín tí sín tsíkakitsjéxin ch'ín Moisés tí nacióne Egipto? ¹⁷ ¿**A** ntá nkexro tí kónínkakonhen Dios tí cuarenta nánó? ¿**A** jehya tí sín kjuasin jie k'uénxin nteje? ¹⁸ ¿**A** ntá nkexro ntáche Dios kíxín chaxín tsoxiteyá kíxín ts'ixenhya sín ts'ok'éhe sín tí tjen tí jehe ch'án? ¿**A** jehya tí sín kuítekakonhya? ¹⁹ **A** ntá ó noheni kíxín kjuachahya sín k'uíxenhén sín kíxín kuítekakonhya sín.

4

¹ Méxra, tsíntáchro Dios kíxín tsjanjon ch'án kjuachaxín ts'ixenhenni ts'ok'éheni tí tjen ch'án, a ntá tóxakonhenni kíxín ách'e jnkojín tí jahará chrókuachahyará chrók'uixenhenrá ntíha. ² Kíxín kjáxin jeheni kuínhini itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kíxín kjónté kuínhin sín tí tan na kuítekakonhya sín. ³ **A** ntá jeheni kuítekaonni, ntá ts'ixenhenni ts'ok'éheni ntaha, éxi tsíntáchro Dios kíxín:

Méxra kónínkakonhan sín tí jehe sín ntátjan sín kíxín chaxín tsoxiteyá

kíxín ts'ixenhya sín ts'ok'éhe sín tí tjén janhan.*

Kíxín Dios la tíó kjuixinhín ch'án xrá kjuích'èna ch'án chjasintajni ntá kjuák'e ch'án k'ok'éhe ch'án. ⁴ Mé xíkaha í jnko nketí nixja tí xroon itén Dios chrónka kuénte tí yaon yatoxín ntáchro kíxín:

Kjuixinhín Dios kaín xrá ntá kjuák'e ch'án k'ok'éhe ch'án tí yaon yatoxín.†

⁵ **A** ntá inaá ntáchro tí xroon itén Dios kíxín:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyan jnkojín chojni chrók'uixenhen sín chrók'ok'éhe sín. **A** ntá tí sín saoxín kuínhin tí tan chrókuaáxin sín la k'uíxenhya sín kíxín kuítekakonhya sín tí tan a. ⁷ Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjájín ch'án tí nkehe tsíchrónka ch'ín David éxi ntáchro tí xroon itén Dios kíxín:

A ntá jie tí tsinhínrá tí nkehe ntáchro Dios, chrókuínchexiteyará.§

⁸ Kíxín tí chrókjuanjon ch'ín Josué kjuachaxín kíxín chrók'ok'éhe tí sín israelita,* ntá Dios la í chrónixjahya ch'án kuénte í jnko yaon. ⁹ **A** ntá naxa tjechónhen tí ts'ok'éhe tí sín tinkáchónki Dios; ¹⁰ kíxín tí nkexro ts'ixenhen ts'ok'éhe tí tjen Dios tsíkixinhín ch'án tí xrá kuénte ch'án éxi yóhe kjáxin Dios kjuixinhín ch'án tí xrá kuénte ch'án ntá kjuák'e ch'án k'ok'éhe ch'án.

¹¹ T'ichjánxin kíxín kaín asénni chrókjeýáni nkexrí chrók'uixenhenni chrók'ok'éheni, kíxín chrókóyóehyani éxi tí sín kuítekakonhya.

¹² Kíxín tí itén Dios la mé tjechón la ko chóna kjuachaxín. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí njnka asén chojni la ko nchakuen chojni hasta tí nkaya asén chojni. Tíha mé nchexraxínkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'èna Dios tsjacha chrók'uejómehe tí jehe ch'án kíxín kaín nkehe la noxín sín t'ikon tí nkexro ts'áyéhe kuéntá.

Jesús mé tí nchat'á imá tjeoan

¹⁴ Jesús tí Xjeen Dios mé tí nchat'á tjeoan kuénténi mé k'uíxenhén tí tjen Dios la méxra chrókuítegehyaní tí tinkáchónkini tí jehe ch'án. ¹⁵ Méxra jehe ch'án mé tí nchat'á tjeoan kuénténi mé tsjínkítsa ch'án tí jeheni kíxín fuérteghyani kíxín kjáxin tí Jínahya chrókuachroe tí jehe ch'án éxi sítónhen tí jeheni, kjánchó jehe ch'án la ninkehó jie kjuasinhya ch'án

* 3:11 3.7-11 Salmo 95.7-11 † 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11

§ 4:7 Salmo 95.7-8 * 4:8 Josué 22.4

kjonté xikaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'et'otan ch'án kixin chrókuikonóeheni ch'án la ko chrókuinkitsa ch'án tí jeheni tí nkehe chrók'uichjánxinhinni.

5

¹ Kaín nchat'a t'et'otan tsikónoxín la chojni ó, tsik'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyaxín tí jie kuénte chojni. ² Kjaxin tí nchat'a a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsikjichroe. ³ Kjaxin jehe ch'án, kixin fuértehya ch'án t'ichjánxín tsjanjon ch'án iko its'en kixin tí jie chóna ch'án jehe ch'án éxi tjanjon ch'án nkehe kuénte tí í so chojni chóna jie.

⁴ Ninkexró xitjahya jehó sich'éna asén nchat'a t'et'otan. Náhí. Jehó tí sín tsikjeyá Dios tsik'áyéhe tí xra éxi tsik'áyéhe ch'ín Aarón. ⁵ Mé xikaha Cristo, kjuich'énahya ch'án jehó ch'án asén ch'án nchat'a t'et'otan. Náhí. Dios mé kjuikosayehe ch'án mé tsikjanjon tí xra éxi tsintácho kixin:

Jaha mé xjana;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntácho kixin:

Jaha mé ijnko nchat'a tsjak'e jnkochríxín,

éxi yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóehé ch'án Dios, kixin Dios chóna kjuachoxin chrókjuincheaká ch'án kixin chrók'uenhya ch'án; la Dios la kuínhin kixin xikaha kuíteakon ch'án. ⁸ Méxra Cristo, kjonté Xjeen Dios, la kuíteakon ch'án kjuínchexiteyá ch'án kjonté tí kjuasote ch'án. ⁹ Mé kjuínchexiteyá ch'án, ntá kjuacha ch'án k'óna ch'án tí nkexro sincheaká jnkochríxín kaín tí chojni sinchexiteyéhe tí jehe ch'án. ¹⁰ A ntá Dios mé tsikjich'éna ch'án nchat'a t'et'otan éxi yóhe kjuák'e ch'ín Melquisedec.

Jehya jína chrókuít'oheni tí tinkáchónkini Ìnchéni

¹¹ Chóntani nchónhya nkehe chróchrónkani kuénte tíha, kjánchó imá xra chróchrónkaxinni tíha kixin tiénxinhyará jahará. ¹² Ntá k'uatínska nchónhya tiempo, a ntá ó jína chrók'ónará maestro, ntá náhi kixin naxa t'ichjánxínhanrá nkexro chrókjuakohará inaá tí nkehe xrahya kuénte itén Dios. Éxi xik'ónará lontjirá, t'ichjánxín chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjeyá sín nkexrí chrók'uejó sín jína. ¹⁴ Á ntá tí nkehe cha mé ine tí chojni nteto kixin ó nohe sín tí nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxi chojni nteto. Chróchenkahyani tí jahará ijie tí nkehe kánhyó xra tsixrakohará tí xrankixixín kuénte Cristo. Náhí. T'ichjánxínhya naxa chrókjuakoharáni kixin chrókuít'ohérá tí jie k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjárá chrítaón tí sín tinkáchónki Cristo, la ko nkexrí tsóxechón chojni tsik'en, la ko nkexrí chrókuít'oxín ijie chojni. ³ A ntá tí Dios chrókjuanjón kjuachaxin la chrókjuakoni í so nkehe.

⁴ A ntá tí sín ó tsik'áyéhe sín tí xrohi, la ko ó tsjexín sín tí nkehe kjuanjón Dios, la ko tsik'áyéhe sín tí Nchakuen Dios, ⁵ la ko kóxrjínjín sín tí nkehe jína kuénte itén Dios, la ko kónohe sín nkexrí tí kjuachaxin tsochóna tí chjasintajni chr'éxín, ⁶ a ntá tí chrókuít'ohé sín Dios, í chrókuinkáchónkihya sín, ntá xitjahya tsokjan sín inaá, kixin tí xikaha la éxi chrókjuak'enkaní sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni. ⁷ Éxi nonte jnkojnko vez t'aniá chrin la tsjatan la ts'óna jína, a ntá kjuacha tí sín kjuich'e xra kixin Dios kjuíncheyaoon tíha. ⁸ A ntá tí ts'óna ntach'í la ko kach'í la ninkehó sínkihya la tsónínkakohen Dios, la tí tsjixixín mé tsoche.

Tí nkehe tjejóchónhenni mé tjinkitsa kixin jína ts'ejóni

⁹ Kjonté nixjani xikaha, kichó ní, ó noheni kixin chaxín jína tjejorá k'uitjará tí ntja tsaáxinrá. ¹⁰ Kixin Dios la jína, la ts'itjáyenyha ch'án tí xra jína tjejoch'erá kixin tjeuherá kichuárá, mé xikaha kjuákoxinrá kixin kjuinkitsará tí kichuárá tinkáchónki Cristo la naxa tjejótjinkitsará sín xikaha. ¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuinkitsará kichuárá kixin chaxín ts'ayéhérá tí nkehe tjejochonhérrá. ¹² Tjinkaonnyani kixin chrókjanrá chrókósáhará. Náhí. Tjinkaonni kixin chrókjuákoxinrá éxi tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsintácho Dios kixin tsjanjon ch'án.

* 5:5 Salmo 2.7 † 5:6 Salmo 110.4

¹³ A ntá Dios, tió tsintáχρο ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjetóan chrók'uákjenxin ch'án. ¹⁴ Ntáχρο ch'án kixin chaxín sincheyao ch'án tí ch'ín Abraham la ko nchónhya chojni ts'axrjenixin tí jehe ch'án.* ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsintáχρο Dios. ¹⁶ A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjetóan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontáχρο ninkehó. ¹⁷ Méxra Dios k'uákjenxin ch'án asén ch'án tsintáχρο ch'án kixin chaxín tsoxiteyá, kixin tjinkaon ch'án chrókjuakoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsintáχρο ch'án la í tsjtóxjenhya ch'án ninkehó tíha. ¹⁸ Mé xikaha síin yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexíni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xikaha la jina ts'ejó asénni éxi yóhe tí ntábáro chóna gancho tjechruéxin kixin kohya nketi sátsji. Méxra xikaha kjaxin tí nkehe tjejóchónhenni la sátsikji hasta nóton tí ka cortina tjen nkaxenhen njnko tjen nkaya nkajni. ²⁰ tí senó k'uixenhen Jesús kuakitjehe ch'án ijnko ntja ts'ixenxíni. Mé xikaha jehe ch'án k'óna ch'án nchat'á t'etóan jnkochrín éxi yóhe kjuák'e tí ch'ín Melquisedec.

7

Ch'ín Jesús mé nchat'á éxi yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuénte chjasin Salem la ko nchat'á kuénte Dios tjen nkaya nkajni. A ntá tió ch'ín Abraham kjanxin ch'án tí tsikjikjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuincheyao ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjača ch'án tí tsíkjikjanjonko ch'án tí sín rey.* A ntá ihnjé ch'ín Melquisedec mé t'axrjéxin saoxín kixin “ijnko rey jina”; a ntá jehe ch'án k'ué rey kuénte chjasin Salem, tíha mé t'axrjéxin kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”. ³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjenixin ch'án; la ko noehya sín nkesá tsíkókjihi ch'án la ko nkesá tsík'en ch'án. Mé xikaha tóyóhe tí Xjeen Dios kixin jehe ch'án mé ijnko nchat'á jnkochrín.

⁴ A ntá jie, tsjehérá kixin imá t'etóan tí ch'ín Melquisedec kixin tí ch'ín Abraham k'uaxrjenixinni, la tsíchjéhe ch'án tí ch'ín Melquisedec diezmo tí nkehe tsíkjača ch'án tí tsíkjanjonko ch'án tí sín rey. ⁵ Éxi nixja ley tsík'etóan ch'ín Moisés, kixin tí sín nchat'á tsík'axrjenixin tí ch'ín Leví chóna sín kjuachaxin tsjanchehe sín kaín xín chojni diezmo kjónte naxa kjéhya sín, tsík'axrjenixin sín tí ch'ín Abraham éxi tí jehe sín. ⁶ A ntá ch'ín Melquisedec, kjónte tsík'axrjenixinhya ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintáχρο Dios. Mé xikaha tí ch'ín Melquisedec tsíkjincheyao ch'án tí ch'ín Abraham. ⁷ Kohya nkexro tsontáχρο kixin chaxínhya kixin tí nkexro ncheyao la antsí má t'etóan, a ntá tí nkexro tsikóyao la t'etóanhya. Náhi. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáχρο tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjéxin kixin ch'ín Leví la ko kaín xín tí sín nchat'á tsík'axrjenixin ch'án, mé tí sín t'áyéhe sín diezmo jie, la mé kjaxin jehe sín tsikjenkehe sín diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuénte ch'án tí sín ts'axrjenixin ch'án, naxa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjenixin sín tí ch'ín Aarón. A ntá jie tí chaxín chrókjuacha sín chrókjuentóa sín tí sín tinkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxi tí ch'ín Aarón. A ntá kjuachahya sín xikaha ntá t'ichjánxin chrókónoxín ijnko nchat'á chrókóyóhe éxi tí ch'ín Melquisedec. ¹² A ntá tí chrók'uixinkí tí nchat'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuénte Ìnchéni. A ntá jehe ch'án la tsík'axrjenixin ch'án í jnko nkexro kuénte Israel la kohya ninxeró tsík'óna nchat'á tsík'axrjenixin tí sín a. ¹⁴ Kixin ó noxín kixin Ìnchéni tsík'axrjenixin ch'án tí ch'ín Judá, a ntá ch'ín Moisés la chrónkahya ch'án ninkehó kuénte tí sín ts'axrjenixin tí ch'ín a tió nixja ch'án kuénte tí sín nchat'á.

¹⁵ A ntá tíhi la antsí má kónoxín kixin tí nchat'á njxin la tóyóhe éxi ch'ín Melquisedec ¹⁶ kixin tió k'óna ch'án nchat'á la jehya kixin xikaha chrók'ueŕtoan ijnko ley kixin nkexro chrók'uaxrjenixin ch'án. Náhi. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjáyan. ¹⁷ Kixin nixja Dios kixin nkexrí tjen tí jehe ch'án, ntáχρο kixin:

* 6:14 Génesis 22.16-17

* 7:2 7.1-2 Génesis 14.17-20

Jaha mé ijnko nchat'á tsjak'e jnkochrín, éxi yóhe k'uékjak'e ch'ín Melquisedec.†

¹⁸ Méxra tí nekehe k'uék'etöan senó mé ch'ehya xra jie kixin kánhyó kjuachaxin k'uéchóna la ko kjuachahya, ¹⁹ kixin tí nekehe k'uetöan ch'ín Moisés kjuachahya kjuínchetjóá ninkehó nekehe. A ntá jie chótani ijnko nekehe antsi jína tjejóchónhenni kixin tíha mé antsi jína tsoghjinexíni Dios.

²⁰ A ntá tió ntáchro Dios tíha la tsík'ákjenxin ch'án asén ch'án jehó ch'án. ²¹ La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á í la Dios tsík'ákjenxin ch'án asén ch'án. A ntá ntáchro xroon itén Dios kixin:

Ínchéni tsík'ákjenxin asén ch'án

a ntá ts'ixitóxinhya tí nekehe tsintáchro ch'án:

"Jaha mé ijnko nchat'á tsjak'e jnkochrín

éxi yóhe k'uékjak'e ch'ín Melquisedec."[‡]

²² Méxra ch'ín Jesús ntáchro kixin tí pacto t'etöan ch'án la antsí má jína, a ntá tí pacto senó la náhi. ²³ Ntá k'uúixin nchónhya sín nchat'á, kjánchó nkák'en sín, ntá xitjahya naxa chrókuich'e sín tí xra a. ²⁴ A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuénte ch'án chrók'óna nchat'á. ²⁵ Méxra jehe ch'án tsjacha sinchekaá ch'án jnkochrín tí sín tsoghjinehe Dios kixin tinkáchónki sín tí jehe ch'án kixin itjen ch'án jnkochrín chrónóhehe ch'án Dios kixin chrókjuinchekaáni ch'án.

²⁶ Mé xikaha Jesús mé tí nchat'á t'etöan t'ichjánxinhinni; jehe ch'án mé ijnko nkexro tjóá, chónahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní. ²⁷ Ntá tóyóehya tí í so nchat'á t'etöan, kixin t'ichjánxin ts'óyan sín iko tsjanjon sín tsoghjéhe sín Dios kain yaon, saoxín kixin tí jie kuénte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án. ²⁸ Tí ley k'uék'etöan ch'ín Moisés t'etöan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjen ch'án mé ts'óna nchat'á t'etöan kixin jína kjuínchexitéyá ch'án jnkochrín.

8

Ch'ín Jesús nixjxin ch'án ijnko pacto nixin

¹ Tí nekehe antsí má tjetöan chrónkani la mé tíhi kixin tí nchat'á kuénteni mé t'etöan ch'án, la ko tjetjxin ch'án nkaya nkajní, nó chjina tí trono t'etöanxín Dios, ² k'óna ch'án nchat'á tí njnko chaxín tsíkjih'éna Ínchéni, la jehya chojni tsíkjih'éna tíha. ³ Kain nchat'á t'etöan tsík'áyéhe xra kixin tsjanjon nekehe la ko iko its'en. Méxra Jesucristo t'ichjánxin kixin tsjanjon ch'án ichren nekehe. ⁴ Tí chrókjuak'e ch'án chjasintajni, chrók'ónahya ch'án nchat'á kixin naxa sín nchat'á tjanjon nekehe k'uetöan tí ley tsík'áyéhe ch'ín Moisés. ⁵ A ntá tí sín nchat'á k'uékjanjon nekehe tóyóhó tí nekehe síin nkaya nkajní. Noheni kixin tóyóhó kixin tió ch'ín Moisés chrókjuich'éna ch'án njnko la ntáche Dios tí jehe ch'án kixin: "Tjenkayáxian jína, a ntá sich'éna jaha éxi tí nekehe kjuákuáxian chrítaón jna."^{*} ⁶ A ntá tí nchat'á t'etöan kuénteni tjech'e ch'án xra antsí jína kixin jehe ch'án mé tí nkexro nixjxin tí pacto nixin tsintáchro Dios chrónka tí nekehe jína tsonhen chr'éxin.

⁷ A ntá tí pacto tsík'etöan saoxín la tí chróxitéyá jína, la t'ichjánxinhya chrók'óna yóxin pacto. ⁸ A ntá Dios k'uúkon kixin kjuínchexitéyáhya tí sín a, éxi ntáchro xroon itén Dios kixin:

Ntáchro Ínchéni kixin: Tíi jnko yaon

mé tsjánjuan ijnko pacto nixin tsoghóna tí sín nación Israel la ko tí sín chjasin Judá.

⁹ Jehya xikaha tí pacto kuétuanhan tí sín tsík'axrjenixinrá ósé,

tí yaon kjuinkitsa sín k'uaxrxjén sín tí nación Egipto;

kjánchó kjuínchexitéyáhya sín tí pacto kuétuanhan sín,

méxra kuítóha sín, ichro Ínchéni.

¹⁰ Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ínchéni: Sintaxráxinkavan asén sín tí ley tsétöan,

a ntá tí kjuaxrexinkaon kuénte sín tsokjian tí nekehe tsétuanhan sín.

A ntá janhan ts'óna Dios kuénte sín,

a ntá jehe sín mé ts'óna chjasin kuéntana.

¹¹ Ts'ichjánxinhya naxa tsjaköhe kichó sín

kixin chróchóxin sín Ínchéni,

kixin kain sín tsóchóxinna sín,

kjónaté chojni imá ntsínsí la ko chojni imá hyé.

¹² Sintak'itjayan tí nekehe jínahya kjuích'e sín

la ko í tsoxráxinkakonhya ínaá tí jië chóna sín.[†]

¹³ Xíkaha nixja Dios kuènte tí pacto nixin ts'etóan ch'án kixin tsíkóntaxin tí pacto saoxín k'uetoan ch'án, tíha mé tinkákóntaxin la ko tinkákjeje, na í séhya ts'itjáyan.

9

Tí nínko chjasintajni la ko tí nínko nkaya nkajní

¹ A ntá tí pacto saoxín t'etóan nkexrí chrórxaxinkaonni Dios, kixin tí nínko ntihó chjasintajni. ² A ntá tí nínko k'uékjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejójen tí niojtja k'uérxaxinkakonxín sín Dios. ³ Nóton tí yóxin ka cortina kjuák'e tí cuarto k'uékjinchek'in sín tí Cuarto Antsí Tjóá. ⁴ Ntiha k'uékjak'e tí altar tsik'óna chica oro k'uékjakaxín sín tí chjinco la ko k'uékjak'e tí ntacajón chr'ísma chica oro tjenkáya tí pacto. Nkaxenhen tí ntacajón k'uékjak'e ijnko nchésen tsik'óna chica oro k'uék'inka maná k'óna niojtja, la ko kjaxín k'uékjak'e tí nta k'uékjixín ch'in Aarón kjuankixín k'uayan nta ntahnte, la ko kjaxín ntiha kjuák'e tí xró chóna tí tan k'uetoan Dios. ⁵ Chritaón tí ntacajón k'uék'ejó yaá ángel tsikjanoya tsikjentoá kanéne chritaón tí kjuák'e tí kjuachaxín kuènte Dios; ntaha k'uékjinxín tí jië k'uéchóna chojni. A ntá ijie la t'ichjánxínhya náxa tsonixjani kuènte tíha.

⁶ A ntá xíkaha k'uéjé tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte nínko kixin tí xra ch'e sín kuènte nínko. ⁷ A ntá tí yóxin cuarto jehó tí nchat'á t'etóan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxín ts'ixenko ch'án ijnié iko tsochjéhe ch'án Dios tsojtjuáxin ijie ch'án la ko ijie tí i so chojni. ⁸ A ntá tí Nchakuen Dios nchenoexíni tíhi kixin nachrohe k'uékjich'e xra tí cuarto saoxín la náxa tjejránkehya kixin chrók'uixenhenni tí Cuarto Antsí Tjóá. ⁹ Kain tíha tjaqxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyan sín xitjahya nchenoexín sín kixin á chaxín kótjóá tí jië k'uéchóna sín kixin xíkaha k'uérxaxinkaon sín Dios. ¹⁰ A ntá tíha jehó t'etóan kuènte tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kain tíha mé k'uítuhenhen sín kuènte cuerpo ó la jehó k'uéchóna kjuachaxín tí náxa kjuinkíhya Dios nkexrí chrórxaxinkaon sín ch'án.

¹¹ A ntá ó kui Cristo, jehe ch'án mé nchat'á t'etóan kuènte tí nkehe antsí jina itsi. A ntá tí nínko ch'e ch'án xra la antsí jina la ko antsí ntoá, la jehya chojni tsikjich'éna tíha kixin jehya chjasintajni ntíhi tjen. ¹² Tió k'uixenhen Cristo tí Cuarto Tjóá, la jehya kixin chrókjuanjon ch'án ijnié koténtsó la ko ijnié koxintáxjan. Náhí. Ijnié ch'án kjuanjon ch'án; mé xíkaha k'uixenhen ch'án jnkokoá vez ntiha mé xíkaha kjuenká ch'án kixin chrókuaáxinni jnkochrín. ¹³ A ntá tí ijnié koxinta la ko ijnié koténtsó la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chóna kjuachaxín tsojtjuáxin tí chritaón ó. ¹⁴ A ntá tí xíkaha, la kjá antsí má chóna kjuachaxín tí ijnié Cristo. Kixin tí kjuachaxín Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkeho jië chónahya ch'án. A ntá ijnié ch'án nchetjóá tí nkehe kjuich'eni senó chrók'uénxinni kixin ntá jie la jina chrókjuich'eheni xra Dios tjechón.

¹⁵ Méxra Jesucristo nixjaxín ch'án tí pacto nixin k'uetoan Dios. Kixin k'uenyákonhenni Cristo ntá tsojtjuáxin tí jië kjuasinni kjuinchexiteyáhyani tí pacto k'uítuhenhenni senó; kixin tí sín k'uíyehé Dios la jina chrók'uáyéhe sín tí nkehe tsjejhya kixin jehe ch'án xíkaha tsintáchro ch'án tsjanjon ch'án. ¹⁶ A ntá tí síin ijnko nkehe tsintáchro ijnko chojni kjuák'e na ntá ik'uén la t'ichjánxín tsonoxín kixin chaxín tsik'en tí nkexro tsikjich'éna. ¹⁷ A ntá tí nkehe tsintáchro ch'án la sínkíhya tí náxa tjechón tí nkexro tsikjich'éna; jehó tió chrók'uen ch'án mé sínkí. ¹⁸ Méxra tí pacto xrankixín tsik'etóan Dios kjuankixín kjuich'e xra kixin k'uitji ijnié. ¹⁹ Ch'in Moisés tsichrónka ch'án kain nkehe tsik'etóan tí ley kúinhin kain tí chojni; a ntá chr'éxin kuákja ch'án ichjóen kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié koténtsó tsikjiko intá, ntá kuikjanjin ch'án tí libro chóna ley la ko kuikjanjin ch'án kain tí chojni. ²⁰ A ntá ntáchro ch'án kixin: "Tí jni i tsoxiteyáxin tí pacto k'uetoan Dios chrókjuinchexiteyéherá jahará."* ²¹ Tí ch'in Moisés kjaxín kuikjanjin ch'án jni tí nínko la ko kain nkehe t'ichjánxín tí nkaxenhen nínko. ²² Kixin xíkaha ntáchro tí ley kixin kain nkehe la chrókótjuáxin tí jni; a ntá xitjahya chrókótjóá tí jië tí chrók'uixikjanjinhya jni.

Tí ik'uén Cristo mé tsjinxín ijieni

²³ Méxra t'ichjánxín kixin ik'uén iko kótjuáxin tí nkehe a, táha mé tóyóhó tí nkehe síin nkaya nkajní; a ntá tí nkehe chaxín kuènte nkaya nkajní t'ichjánxín ijnko nkehe antsí jina chrók'uen. ²⁴ A ntá Cristo k'uixenhya tí nínko tsikjich'énaxín chojni tja, táha mé ijnko nkehe tóyóhó tí nínko chaxín. Náhí. Jehe ch'án mé k'uixenhen ch'án tí nkaya nkajní, a ntá jie mé tjen ch'án tí tjen Dios nixjaxín ch'án kain ni. ²⁵ A ntá jehe ch'án la jehya jnkoyaxón

† 8:12 8.8–12 Jeremías 31.31–34

* 9:20 9.19–20 Éxodo 24.6–8

k'uixenhen ch'án ntiha k'uenyákonhenni ch'án. Náhí. A ntá tí nchat'a t'etgoan t'ixenhen tí Cuarto Tjóá jnkojnko nánó k'ixin tsjanjon ch'án ijñié ko ó. ²⁶ A ntá tí xikaha chrókónhen Cristo la t'ichjánxin k'ixin jnkoyaxón chrók'óyán sín ch'án desde tí k'lóna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez k'ixin tsjiinxín ijñéni. ²⁷ Mé xikaha kaín ni its'enni jnkokoá vez, a ntá chr'éxin tsitogéxín ijñéni. ²⁸ Mé xikaha kjaxin Cristo jnkokoá vez ik'uén ch'án k'ixin tsjiinxín ijñé nchónhya chojni. A ntá chr'éxin itsi ch'án inaá, jehya k'ixin naxá tsjatsen ch'án ijñé chojni. Náhí. Sinchekaa ch'án tí chojni ó tsikótjóá tjejóchónhen itsi ch'án.

10

¹ A ntá tí ley k'uetoanxín ch'in Moisés la tóyóhó tí nkehe jina tsi la jehya tí nkehe chrókuaáxinni. Méxra tí ley kjuachahya kjuinchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuinchetjóá ijñé sín, ntá chrókjuenkayáxinhya sín k'ixin naxá chróchóna sín jie, la chrókuitoghe sín, í chrókjuanjonhya sín iko its'en. ³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsikjasin sín ⁴ k'ixin ijñié koxinta la ko ijñié koténtsó xitjahya tsjiinxín ijñé chojni.

⁵ A ntá tío Cristo kui chjasintajni ntáche ch'án Dios k'ixin: Tjinkákonhya jaha iko its'en la ko tjinkákonhya jaha ninkehó nkehe chrók'uayehé. Náhí. Jaha tsikjich'éna ijnko cuerpo k'ixin tsochonta janhan.

⁶ Jaha tóxrjanhya iko tsichján la ko tí í so nkehe chrókjuanjonni chrókjuakjiinxian ijñé.

⁷ A ntá ntátjan ch'án k'ixin: "A ntá ijñé la ntihi tjén janhan k'ixin sintaxiteyá tí nkehe tóxrjanhan jaha Dios,

éxi nixja xroon chrónka nkexrí chrókjuít'a."*

⁸ Senó ntácho k'ixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuinxín ijñéni k'ixónté tí ley k'uetoan k'ixin xikaha chrókónhen. ⁹ A ntá chr'éxin tsintácho k'ixin: "A ntá k'uinka janhan k'ixin sintaxiteyá tí nkehe tóxrjanhan jaha Dios," ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixín. ¹⁰ Dios kjuinchetjuáxinni k'ixin Jesucristo kjuinchetjueyá éxi tóxrjinhn Dios k'ixin tí cuerpo kuénte ch'án kjuanjon ch'án ik'uén ch'án jnkokoáxón vez para jnkochrixín.

¹¹ A ntá kaín nchat'a judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjiinxín ijñé chojni. ¹² A ntá Jesucristo mé jnkokoá vez k'uenyákonhenni ch'án k'ixin tsotjuáxin ijñéni la tíha mé sich'e xra jnkochrixín. A ntá kjuinxín ntá sákjuí ch'án kjuák'etjaxín ch'án nó tí tja chjina kuénte Dios. ¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etgoan sín. ¹⁴ Mé xikaha jnkokoá nkehe kjuich'e ch'án chjéhe ch'án Dios, k'ixin jina ts'ejó tí sín ó tsikótjóá. ¹⁵ A ntá tí Nchakuen Dios nchenoheni tíhi k'ixin senó tsintácho k'ixin:

¹⁶ Tí pacto tsotjahá tí jehe sín tío ts'atsínka tí yaon a, ichro Inchéni;

Sintaxráxinkavan asén sín tí ley tsétoan,

a ntá tí kjuaxrexinkaon kuénte sín tsokjian tí nkehe tjínkavan.†

¹⁷ Kjaxin ntácho k'ixin:

Í tsoxráxinkakonhya inaá tí ijñé sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijñéni la t'ichjánxinhya í so nkehe chrókjuanjonni chrókótjuáxin tí ijñéni.

Méxra t'ichjánxin tsochjinehenei Dios

¹⁹ Kichóni, a ntá la í kohya kjuachrakon ts'ixenheni tí Cuarto Antsí Tjóá tí tjen Dios k'ixin kjuachaxién ijñé Jesucristo, ²⁰ chreheñi tí ntja nixín mé tí ntja tjechón kuakitjehé ch'án nóton tí ka cortina, tíha mé tí cuerpo kuénte ch'án. ²¹ Jesús mé tí nchat'a tjeoan kuénteni t'etgoan tí ntogé Dios. ²² Méxra xikaha chrókóchjinehenei Dios kaín aséni chrókjuenkáchónkini ch'án chaxín k'ixin jehe ch'án tsikjinchetjóá ch'án aséni k'ixin chrókjuenkayáxinhyani k'ixin naxá chótani jie k'ixin tí cuerpo kuénteni kótjuáxin tí ntá jehó.‡ ²³ Chrókuitogehyani chrók'uejóchónhenni tí nkehe tinkáchónkini k'ixin Dios la chaxín sinchexiteyá ch'án tí nkehe tsintácho ch'án. ²⁴ Chrókjuéyáni nkexrí chrókjuinkitsani kichó ni k'ixin chrótjuéni kichó ni la chrókjuich'eni tí nkehe jina. ²⁵ Chrókuitogehyani chrókójnkotséni, chrókóyogehyani éxi tí sín í tójnkotséhya sín. Náhí. Chrókjuinchechéhenei kichó ni antsí má jie k'ixin ó noheni k'ixin í séhya tsokjan Inchéni.

²⁶ A ntá tí naxá chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chótani. ²⁷ A ntá jehó itjen tí kjuachrakon jie tsitogéxín jie la ko tí xrohí tjeche ts'itjayanxín tí sín nínkakonhen Dios. ²⁸ A

* 10:7 10.5-7 Salmo 40.6-8 † 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25

ntá tí tjen jnkojín nkeexo titekakonhya tí ley k'ugtoanxín ch'ín Moisés, la tsonoxín yaá o y'á tí sín tsík'ikon tí jié tsíkjasin sín, tíha mé ts'enxín sín la kohya nkeexo tsíkonóehé tí jehe sín. ²⁹ ¿Á tjenkayáxinhyará kixin ántsi má chrókjuasóte tí sín kuitekakuenhya tí Xjeen Dios la ko chóntheya sín kjuasáya tí injié ch'an la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etqanxín tí pacto la ko tí jni k'uijmáxinni. ³⁰ Noheni kixin tsíntáχρο Ìnchéni kixin: "Janhan mé tóna tocar sɪntakitqaxián ijié chojni la ko janhan tsjénkahá sín."* Kjaxin tsíntáχρο kixin: "Ìnchéni sinchekitqexín jjié tí sín tinkáchónki ch'an."† ³¹ Méxra kjuachrakon jié chrók'uanótjenyáni tí tja Dios tjechón.

³² A ntá chrórxáinkáonrá jahará tí nkehe tsíkónhen ósé kixin tíó jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. ³³ A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuinkáta sín tsík'ekon. ³⁴ A ntá jahará kuíkonóehérá tí sín tjejóchjina ntoechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajni chontará nkehe ántsi jina chónhya tsjeje. ³⁵ Chrókuítqehyará tí nkehe tinkachónkirá kixin ó nohará kixin tíha mé ts'ayéxinrá nkehe chr'éxin. ³⁶ Kjaxin jahará t'ichjánxin chrók'uejochonhéna chrókóninkákonhyará kjónté ichrén nkehe chrókónhanrá, kixin sɪch'erá tí nkehe tjinkaon Dios, kixin xɪkaha chrók'uayéhérá tí nkehe tsíntáχρο tí jehe ch'an. ³⁷ Kixin xɪkaha ntáχρο xroon itén Dios kixin:

Kánhyó sé

itsi tí nkeexo tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítqhe tí janhan la í tsochánahya tí xɪkaha ch'e sín.‡

³⁹ Kjánchó jeheni jehya xɪkaha chrókuítqeheni chrókuinkáchónkihyani tí jehe ch'an kixin ntá chrókjuasinni jié chrók'uitjáyánxinni. Náhi. Tinkáchónki ch'an la tíha chrókuaáxinni.

11

Tí fe

¹ Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen. ² Tí sín tsík'axrjenixinni ósé la kóxrjínhin Dios kixin k'uéchónta sín fe.

³ Tí fe mé noexínni kixin Dios tsíkɪch'éna kaín nkehe tí kjuachaxin tí nixja ch'an la ko noexínni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyan ch'an ijnko kolélo chjéhe ch'an Dios. Tíha ijnko nkehe ántsi jina kjuanjon ch'an, a ntá tí nkehe tsíkjanjon ch'ín Caín la náhi. Méxra Dios kóxrjínhin tí nkehe kjuanjon ch'ín Abel ntá ntáχρο Dios kixin jina tí ch'ín a. Kjónté ó tsík'en ch'ín Abel la tí nkehe tsíkɪch'e ch'an naxa tjakoɪxin kixin jina tí fe k'uéchónta ch'an.*

⁵ A ntá tí fe k'uéchónta ch'ín Enoc la Dios sátsíkɪko tí jehe ch'an la k'uénhya ch'an, a ntá k'uitjahya sín ch'an kixin Dios sátsíkɪko. Naxa sákjuíhyá ch'an la xráxin kóxrjínhin Dios nkexri k'uékjak'e ch'an.† ⁶ A ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'an la ko jehe ch'an tsjenkehe ch'an tí sín xritjeyá sín tí jehe ch'an.

⁷ A ntá tí fe k'uéchónta ch'ín Noé tí Dios chénka tí jehe ch'an tí nkehe naxa k'uíkonhya ch'an tsonhen, la kuítekaon ch'an kjuich'éna ch'an ntabarco kixin tsaáxin ch'an la ko tí sín naxa kjéhya ch'an. Tí fe k'uéchónta ch'an kjuakoɪxin kixin tí í so chojni chjasintajni la jínahya sín tsjasóte sín. A ntá kóxrjínhin Dios tí jehe ch'an kixin kuítekaon ch'an la tí xra kjuich'e ch'an mé kuaáxin ch'an.‡

⁸ A ntá tí fe k'uéchónta ch'ín Abraham tí k'uiyehé Dios tí jehe ch'an la kuítekaon ch'an sákjui ch'an tí nonte tsjanjon Dios ts'áyéhe ch'an, ntá k'uaxrjéxin ch'an chjasén ch'an kjónté noehya ch'an nketí nó sátsɪ ch'an.§ ⁹ A ntá tí fe k'uéchónta ch'an k'uékjak'e ch'an tí nonte chrókjuanjon Dios, éxi jehya nqntge ch'an tíha. Kjuák'e ch'an nchia tsík'óna ka, la ko kjaxin xɪkaha k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe tsíntáχρο Dios.* ¹⁰ A ntá ch'ín Abraham k'uékjak'echónhen ch'an tí chjasin tsíkɪch'éna Dios ts'itjáyanhya.

¹¹ A ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sɪch'éna tjan ijnko xjan; a ntá kjuich'éna tjan ijnko xjan kixin kuítekaon tjan kixin Dios sinchexiteyá tí nkehe tsíntáχρο ch'an.† ¹² Kjaxin xɪkaha ch'ín Abraham, kjónté ó mero chrók'uen ch'an

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4 * 11:4 Génesis

4.3-10 † 11:5 Génesis 5.21-24 ‡ 11:7 Génesis 6.13-22 § 11:8 Génesis 12.1-5 * 11:9 Génesis 35.27 † 11:11

Génesis 18.11-14; 21.2

kixin ó tada ch'án, la k'uaxrjeníxin ch'án nchónhya chojni éxi konotsé siín nkajní o éxi nchesen siín chrinta ntayaon, xitjahya ts'ekini.‡

13 A ntá kaín tí chojni a ik'uén sín k'uáyéhya sín tí nkehe tsintácho Dios kixin chrók'uáyéhya sín, a ntá k'uéchóntha sín fe, la kjónté ikjín k'uíkón sín la ko kuítekaon sín kóchéhe sín. Mé xikaha k'uéchóntha sín kixin tí chjasintajni jehya chjasén sín. 14 Mé xikaha k'uénixja sín la tienxínni jina kixin naxa xritjeyá sín nketi chrók'óna chjasén sín. 15 A ntá tí chrórxaxinkao sín tí chjasin tsík'axrjexín sín ntá jina chrókjan sín ntiha inaá. 16 Kjánchó tjínkaon sín ijnko chjasin antsí má jina, tíha mé chjasin nkaya nkajní. Méxra Dios la tósuehya ch'án kixin chrókjuinçek'in sín ch'án tí Dios kuénte tí jehé sín, kixin ó tjechónhen tí chjasin ts'áyéhé tí jehé sín.

17 A ntá fe k'uéchóntha ch'in Abraham kixin Dios kjuich'e prueba tí jehé ch'án kjuanchia tí xjeen ch'án Isaac, a ntá kjuikao ch'án chrók'óyán ch'án, chrókjuanjón ch'án. Tjechónhen ch'án chrókjuanjón ch'án kjónté jnkokoaxón xjeen ch'án tsíkjanjón Dios[§] tsintácho kixin: 18 "Tí ch'in Isaac ts'axrjeníxin nchónhya xjan."^{*} 19 A ntá ch'in Abraham kjuátsoan ch'án kixin Dios imá chóntha kjuachaxin, la kjónté chojni tsík'en na nchexechón ch'án, la éxi yóhé chrók'uen tí xjeen ch'in Abraham ntá chrók'uáyéhya ch'án inaá.

20 A ntá tí fe k'uéchóntha ch'in Isaac kjuíncheyao ch'án tí xjeen ch'án ch'in Jacob la ko Esau, kixin jina ts'ejó sín.† 21 A ntá tí fe k'uéchóntha ch'in Jacob tió chjina its'en ch'án kjuíncheyao ch'án jnkojnto tí xjeen ch'in José, a ntá tí nta tjixín ch'án kjuisóixjín ch'án nixjehé ch'án Dios.‡ 22 A ntá tí fe k'uéchóntha ch'in José tió chjina its'en ch'án tsintácho ch'án kixin tí sín israelita la chr'éxin ts'axrjexín sín chjasin Egipto, tsík'etóan ch'án kixin tío sátsji sín la sátsjiko sín tí huesogé ch'án.[§]

23 A ntá tí fe k'uéchóntha it'é la ko iné ch'in Moisés tió kokjíhi ch'án kjuak'emá sín ch'án iní nitjó kixin tsík'ikon sín kixin ijnko xjan ntoa náxrxón tsjehe ch'án, la ko chrakuenhya sín tí nkehe tsík'etóan tí ch'in rey kixin chrók'óyán sín xjan.* 24 A ntá tí fe k'uéchóntha ch'in Moisés tió kónteto ch'án la chroyha ch'án its'in ch'án xjeen tí tjan xjeen ch'in rey Egipto.† 25 Náhi. Kjueyá ch'án kixin kjónté chrókjuasóteko ch'án tí sín tinkáchónki Dios, la kórxjénhya ch'án kixin séhya náxrxón chrókjuak'e ch'án chrókjuasin ch'án jie. Náhi. 26 Kjuenkayáxin ch'án kixin antsí tjeoan chrókjuasótéxin ch'án tí tinkáchónki ch'án tí Cristo itsi chr'éxin, a ntá kánhyó tjeoan chrókóntha ch'án kaín nkehe tje te sín chjasin Egipto. Kjuenkayáxin ch'án kixin chrók'uáyéhya ch'án tí nkehe chrókjuanjón Dios. 27 A ntá tí fe k'uéchóntha ch'in Moisés sákjuixín sín tí chjasin Egipto,‡ chrakonhya ch'án kjónté kónínkaon tí ch'in rey, a ntá kuíteghya ch'án tí tinkáchónki ch'án Dios kixin éxi t'ikon ch'án tí Dios ninkexró t'ikonhya.

28 A ntá tí fe k'uéchóntha ch'in Moisés kjuasin ch'án tí kia pascua, k'uetóan ch'án kixin chrókjuikjanjín sín jni tí puerta, kixin tí ángel t'óyán chojni chrókjuincheníehya nijnto tí xjan saó kuénte tí sín Israel.[§] 29 A ntá tí fe k'uéchóntha tí sín israelita k'uátóye sín tí Ntayaon Kjátse kixin k'óna nche xamá, a ntá tió tí sín Egipto tjínkaon sín chróchréhe sín xikaha la kjánchó kjuínhin sín tí nta a.*

30 A ntá tí fe k'uéchóntha tí sín israelita la xitjen tí tjat'o t'inkákuénxín tí chjasin Jericó, tió kjuixín k'uántatjen sín yato yaon tí chjasin a.† 31 A ntá tí fe k'uéchóntha tí tjan Rahab, na mé ijnko tjan k'uéchóntha nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjón tjan kjuachaxin kixin kjuaxróxin tsíkitohe ntóe tjan tí sín israelita kjuíjitsaya sín tí chjasin Jericó.‡

32 ¿Nkehe naxa chróntáxrjan? Sintak'itjáyan tiempo naxa chrónixja kuénte ch'in Gedeón, la ko ch'in Barac, la ko ch'in Sansón, la ko ch'in Jefeé, la ko ch'in David, la ko ch'in Samuel, la ko tí sín profeta. 33 Kixin tí fe k'uéchóntha tí jehé sín kjuacha sín k'uetóan sín jina ókéj chjasin, la ko jina kjuínchekitexín sín ijje chojni, la ko k'uáyéhya sín tí nkehe tsintácho Dios kixin tsjanjón ch'án, la ko k'uíkjehe sín ir'va koxra, 34 la ko k'uanka tí xrohí chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjónko sín tí sín soldado tsíkjixín ókéj. 35 Kjáxin k'uék'ixín chojni chjin k'uáyéhya inaá tí chojni tsík'en kuénte sín tsíxechón inaá.

A ntá í so sín la kjuasote sín k'uénxín sín kixin kjuínchemáhya sín kixin kuínkáchónki sín Dios kixin ó nohe sín kixin tsoxechón sín antsí jina inaá. 36 A ntá í so sín kjuasóte sín la nchónhya chojni kjuanoá tí jehé sín, la ko tsík'ekon sín la ko kjáxin cadena chróntetoxín sín k'uejóchjina sín. 37 Í so sín la ixro k'uénxín sín, la í so sín tierra chrít'oxín sín, la í so sín la nchónhya nkehe kjuasótéxín sín, la í so sín k'uénxín sín espada, la í so sín k'uék'aji sín tsík'inkáya sín tjeje kolélo la ko tjeje koténtsó, nóa sín, kjuasóte sín, kjuaxróxinhya la náxrxónhya k'uéjó sín.

‡ 11:12 Génesis 22.17 § 11:17 Génesis 22.1-14 * 11:18 Génesis 21.12 † 11:20 Génesis 27.27—29,39-40 ‡ 11:21 Génesis 47.31—48.20 § 11:22 Génesis 50.24-25 * 11:23 Éxodo 1.2; 2.2 † 11:24 Éxodo 2.10-12 ‡ 11:27 Éxodo 2.15 § 11:28 Éxodo 12.21-30 * 11:29 Éxodo 14.21-31 † 11:30 Josué 6.12-21 ‡ 11:31 Josué 2.1-21

³⁸ A ntá tí sín chjasin ntiha kjuikosáyehya tí sín a la ntá k'uúinkíté sín, la tí sín a la chóntahya chjasén sín la sákjuj sín nteje, la ko jna, la ko tjo síxra la ko tóye. ³⁹ Kaín tí sín a kónhen sín prueba kíxin á chaxín chóna sín fe la kjónté xikaha k'uáyèhya sín tí nkehe tsíntáchro Dios kíxin tsjanjon ch'án ⁴⁰ kíxin Dios kjuenkayáxin ch'án ijnko nkehe antsi jina kíxin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchénta sín, la ntá chrókuítgheni ntáha kaín tí nkehe t'inkákonhen, la ko tí jie chrókujuachoeni, a ntá chrókuich'eni jina tí xra chóntani la ntá chrókujuachani antsi má chrókónohen. ² Jehó Jesús chrókuinkáchónkini kíxin jehe ch'án kjuanjón tí fe chóntani kíxin jina kjuakoxin ch'án kjuínchexiteyá ch'án, la kjuasótexin ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kíxin nohe ch'án kíxin tsjixin tsjasóte ch'án ntá náxrxón tsjak'e ch'án la ko tsochéhe ch'án kíxin tsjak'etjaxin ch'án tí tja chjina tí trono kuénte Dios.

³ Méxra chrókjuenkayáxinrá jahará nkexrí kjuakoxin ch'án Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án. ⁴ A ntá jahará naxa k'uénxinhyará tí tjanjonkoará tí jie. ⁵ ¿Á k'uitjáyannhará tí jahará tí nkehe ntaxraxinkaonrá Dios kíxin éxi xjeen ch'án t'íkon ch'án tí jahará? Éxi ntáchro xroon itén Dios kíxin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kíxin Ìnchéni mé tjentuéhe tí sín tjuéhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítékáonrá tí nkehe t'etqan Dios kíxin Dios t'íkon kíxin éxi xjeen ch'án tí jahará. ¿Á síin ijnko it'é xjan chrokujuentuéhya tí xjeen? ⁸ A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín. ⁹ A ntá tí naxa k'uéchánjanni, na mé it'eni ntíhi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsi chrókjuínchexiteyéheni It'eni tjen nkaya nkajní kíxin chróchóntaxínni kjuachón. ¹⁰ It'eni ntíhi chjasintajni kjuentuéheni ch'án kjónté kánhyó sé éxi nkexrí kóxrjínjin ch'án; a ntá It'eni Dios tjentuéheni ch'án kíxin jnkójina chrók'uejóni, kíxin chrók'ónani tjóá kíxin jehe ch'án la tjóá ch'án. ¹¹ Chaxín ninkehó xikaha chrókjuínchekjasóte Dios tí jeheni chrókóxrjínjinni tí nantá chrókónhenni kíxin tí kjuatjoté. A ntá xikaha ts'itjaxínni tí kjuaxrxín éxi ijnko nkehe náxrxón kjuachani.

Tí sín tjanoá tí kjuasáyé Dios

¹² Méxra tjisójirá tí tjará tsíkóxrjé la ko tóch'ínrá chóntahya fuerza, ¹³ la ko chrókjuéyará tí ntja ntoá. A ntá tí totará níhi xitjahya tjixinrá chrókuítghe jina la ko chrókóniehya inaá.

¹⁴ Chrókóxakonhanrá kíxin kjuaxrxín chrók'uejorá kaín rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'íkonrá Ìnchéni. ¹⁵ Chrókóxakonhanrá kíxin nijnkorá chrókuítghehyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóniéxin tí í so chojni. ¹⁶ Nijnko tí jahará chrókjuásinkoará jie ijnko chojni chjin ókjé, la ko chrókjóniehýará tí nkehe tjóá éxi kjuich'e ch'ín Esaú, kíxin jnkokoá comida kjuínchekjixin ch'án tí nkehe chróchóna ch'án kíxin xjan saó jehe ch'án.† ¹⁷ Jahará ó nohará kíxin chr'éxin, tí tjinkaon ch'án kíxin chrókjuíncheyaoon it'é ch'án tí jehe ch'án la í xitjahya tsoyaon ch'án kíxin kohya nkexrí chrók'uixitóxín tí nkehe tsikjich'e ch'án kjónté imá chrótsjánka ch'án.‡

¹⁸ A ntá jahará la jehya kóchjinará éxi kóchjina tí sín israelita tí jna jina chrótsé sín tí sichr'áksen xrohi, tí tjen tí sítie t'inkaséyanhya la ko tí chjéhe xrxinto. ¹⁹ Na ni tsíkienhyará tí tsíntáchro trompeta, la ko tí itén Dios nixja. A ntá tí sín tsíkinhin tí tan a na mé chronóa sín kíxin í chrónixjahya ch'án inaá. § ²⁰ mé xikaha ichro sín kíxin tsjachahya sín sinchexiteyá sín tí nkehe k'uétoan ch'án kíxin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”* ²¹ Ijnko kjuachrakon jie tí nkehe k'uíkon sín la kjónté ch'ín Moisés tsíntáchro ch'án kíxin: “Kjixin síxrankana chrakonna.”†

²² A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel ²³ tsikójnksóte sín kíxin tsochjéhe sín kjuasáyá Dios, la ko tí sín tsikójnksóte sín tsik'óna sín xjeen Dios saoxín ts'ínixín ihjé sín nkaya nkajní. Jahará tsikóchjineherá Dios, jehe ch'án mé Juez sinchekítgexin ch'án ihjé kain chojni, la ko

* 12:6 Job 5.17; Provérbios 3.11-12 † 12:16 Génesis 25.29-34 ‡ 12:17 Génesis 27.30-40 § 12:19 Éxodo 19.16-22,

20.18-21 * 12:20 Éxodo 19.12-13 † 12:21 Deuteronomio 9.19

tsikóchjineherá tí nchakuen chojni jína ó tsíkjinchetjóá Dios, ²⁴la ko tsikóchjineherá ch'ín Jesús, jehe ch'án mé nixjaxín ch'án tí pacto nixin kixin tí iijné ch'án k'uitji kjuínchetjuáxinni ch'án. A ntá antsí jína chrónkaxín tí iijné ch'án, a ntá kánhyó tí iijné ch'ín Abel.

²⁵Chrókóxakonhanrá chrókuítekákonhénrá tí nkexro tjenixja. Kixin tí sín kjuanoá Dios tíó kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuuáni tí chrókuítekakuehnyani tí nkexro nchexraxinkaonni kuxjín nkaya nkajni. ²⁶A ntá tí itén Dios tí yaon a kjuínchekinkí nonte. A ntá jie tsintáchro ch'án kixin: “A ntá inaá jehya nonte ó sintakinkíá. Náhi. Kjaxin nkajni sintakinkíá”;[‡] ²⁷A ntá tí tsintáchro ch'án kixin “inaá” mé t'axrxjén kixin tsjakjín ch'án tí nkehe jína tsinkí, a ntá tsítóhe ch'án tí nkehe xitjahya tsinkí. ²⁸A ntá tí ts'áyehéni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chrórxaxinkaonni ch'án chróchrakonhenni ch'án ²⁹kixin tí Dios kuènteni mé éxi ijnko xrohi tsjacha sinchek'itjáyán kaín nkehe. §

13

Nkexrí chrók'uejóni kixin chrókóchéhe Dios

¹ Méxra chrókuitóehyará chrótuéherá kichuárá. ² Chrók'uitjáyanyhará chrókjuánjonrá kjuachaxin chrókuitóhe ntoará tí sín tsíkjixín kjin. Mé xikaha kjuich'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxi kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxi kjaxin tí jahará xikaha chrókonhanrá kjaxin.

⁴ Kaínrá chróchonteherá kjuasáya tí kótehe chojni. A ntá jahará tsikótáhará la jína chrók'uejokoará kichuárá chrótuéherá kichuárá. A ntá tí sín tjinkaon tsochónta chojni chjin óké la Dios sinchekjasóte sín kixin xikaha ich'e sín.

⁵ Kénhyó má chrókóxrjínhanrá itjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsítóahya tí jahará la ko ts'itjáyannahya tí jahará.”†

⁶ Mé xikaha chrakonhyani tsontáchroni kixin:

‡ Inchéni mé tjinkitsani,

‡ méxra chróchrakonhyani kjónté ichrén nkehe chrókjuich'e heni chojni. ‡

⁷ Chrórxáxinkáonrá tí sín kjuinkitsa tí jahará kjuakohará sín itén Dios, chrókjuenkayáxinná nkexrí k'uejé sín ntá xikaha chrókóyóhará sín éxi tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrixín. ⁹ Chrókuitóehyará chrókjuakohará chojni ijnko nkehe óké chrókuinkachónkirá. Íchá jína tí asánrá chrók'uíyéhe fuerza kixin Dios tjuahará la jehya tjeoan chrókjuinchexiteyéheni tí nkehe t'etoan nkehe sineni. Mé xikaha tí sín kjuich'e xikaha kjuínchexiteyá tí nkehe k'uituenhen sín nkexrí chrókjóne sín la ninkehó kjuínkítsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuich'e xra nkaxenhen nínko ósé. ¹¹ A ntá tí nchat'á t'etoan judío kjuíko sín tí iijné ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpóé tí ko kjuakaxín sín ikon tí chjasin k'uejé sín. ¹² Kjaxin Inchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijie chojni tí iijné ch'án. ¹³ Tsochréheni Inchéni Jesús éxi k'uénxin ch'án ikon chjasin kjónté tsjasóteni éxi kjuasóte tí jehe ch'án kjuikosáyehya sín tí jehe ch'án. ¹⁴ A ntá ntihi chjasintajni chóntahyani nijnko chjaséni chrók'uitjáyanyaha; a ntá xritjeyáni tí chjasin itsi chr'éxin. ¹⁵ Méxra chrókuitóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjónni kixin ir'vanyi ó chrókjuikosáyexínni ch'án. ¹⁶ Chrók'uitjáyanyhará chrókjuich'erá xra jina la ko chrókjuínkítsará kichuárá. Tí xikaha chrókjuich'erá la imá tóxrjínhin Dios.

¹⁷ Chrókuitekákonhénrá tí sín tjakohará chrókjuinchexiteyéherá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuéntá tí tjen Dios. Tsjínkítsará sín kixin tsóchehe sín sich'e sín xra la tsónínkakonhya sín. A ntá tí chrókjuinchek'ávára sín, ntá ninkehó tsjachahya sín tsjinkítsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jina kjuenkayáxinni la ko tjinkaonni kixin jina chrók'uejóni. ¹⁹ Tjánchá xra ó kixin chrónixjehérá Dios kixin chrókjuanjón ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Inchéni Jesucristo kjónté tsík'en ch'án, jehe Jesucristo mé tí Pastor tjeoan t'ayakonhen tí kolélo, la tí iijné ch'án mé

‡ 12:26 Hageo 2.6 § 12:29 Deuteronomio 4.24 * 13:2 Génesis 18.1-8, 19.1-3 † 13:5 Deuteronomio 31.6

‡ 13:6 Salmo 118.6

tsoxiteyáxin tí pacto sich'e xra jnkochrín, ²¹ jehe Dios mé tsjinkítsa tí jahará kixin jina chrók'uejorá la ko kaín xra jina chrókjuich'erá kixin xikaha tjinkaon ch'án; kixin jehe ch'án t'etueñhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xikaha chjéheni Cristo kjuasáya jnkochrín. Amén.

²² Kíchóni, xrjanóahará kixin tóninkákonhyará kixin tí palabra xrjanka sjntaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. ²³ Chrókónohará kixin kichó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkójina kaín tí sín tjítaón ntja tjako la ko kaín tí sín kichó ni tinkáchónki Dios. Tí sín tinkáchónki Inchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'gha xra Dios la ko Ìnchéni Jesucristo nixjaha kaín tí sín tsík'axrjenínxín tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uaats'ínkará ichrén nkehe náxrxjónhya. ³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. ⁴ Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjáyannya ninkehó.

⁵ Tí jnkójín tí jahará t'itjáyannya kjuaxrexinkaon la chrókjuancheherá Dios la Dios mé chrótjáhárá ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. ⁶ Tíó chrókjuancheherá Dios nkehe la kénxin asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrintó ijnko lado la í jnko lado. ⁷ A ntá tí xíkaha itjo asén sín la chróntáchrohya sín kixin chrók'uayéhe sín ichrén nkehe chrókjuanjon Ìnchéni. ⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nda chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha. ¹⁰ A ntá tí nkexro rico kjónté chrók'uitjáyannya tí nkehe chónta la antsí chrókóchéhe kixin tinkáchónki ch'án Ìnchéni, kixin tí nkehe chónta ch'án la kánhyó sínkí la ts'itjáyannya éxí itsjo tsík'óna ka. ¹¹ Tíó tsjijon yaon la tsosó imá la tí ka tsoxámá la ko tí tsjo la ts'ánótjen la tí náxrxjón tsjehe la tsjeje. Mé xíkaha tsonhen tí ch'ín rico, ts'itjáyannya ntá tsítoghe ch'án tí xra k'uéchónta.

Tí nkehe tsonhen chojni

¹² Náxrxjón tí nkexro tsjacha ts'atsínka tí nkehe náxrxjónhya tsonhen. A ntá tí tsjacha ch'án ts'atsínka kaín tí nkehe náxrxjónhya tsonhen ntá ts'áyéhe ch'án tí corona kuente kjuachón kixin Dios tsintáchro ch'án kixin tíha mé tsochjéhe ch'án tí sín tjuéhe ch'án. ¹³ A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchrohya kixin Dios tsíkjanjon kjuachaxin xíkaha s'ich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetqan ch'án kixin ninkexró chrókjuich'e ijnko nkehe jínahya. ¹⁴ A ntá jnkójín chojni tí ó jého tjenkayáxinín asén tí jínahya la mé xíkaha tsjachroe, tsjasin sín jie. ¹⁵ Mé xíkaha tí nkehe jínahya tjenkayáxin chojni mé tjixin tí jie. La mé xíkaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá. ¹⁷ Kaín nkehe jína ntoá t'áyéheni mé tjixin nkajni tí tjen Dios tí nkexro kjuich'éna kaín tí xrohi kuente nkajni. Jehe ch'án mé Dios jnkochrín la jehe ch'án mé xitjahya ts'ixitóxin. ¹⁸ Jehe ch'án kjuanjon ch'án kjuachón k'uayéheni kixin tí tan ntoá nixja ch'án, kixin éxí tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chrórxáinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxí tórxjínjin Dios. ²¹ Méxra títoghérá tí nkehe tjuáha la ko tí nkehe jínahya kjuachjínóxinhin sín nkuixín la chrókjuinchehnehýará, chrók'uayéhérá tí itén Dios chrók'uinka nkaya asánrá. Tí tan a mé chónta kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. A ntá tí náhi la jahórá ch'iyehérá asánrá. ²³ A ntá tí chojni tsinhón tí tan la ntá sinchexiteyáha la éxí ijnko chojni tsjexin xrosentá tí kon ó. ²⁴ A ntá tí k'uíkon tí kon la sátsji la tuénxin k'uitjáyanyen nkexrí tsjehe. ²⁵ A ntá tí nkexro k'uitjáyanyenya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etqan tíha la ntá náxrxjón tsjak'e kixin kjuinchexiteyá ch'án.

²⁶ A ntá jnkójín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jého ch'iyéhe asén la ninkehó sínkíhya tí nkehe tinkáchónki ch'án. ²⁷ A ntá tí nkexro tinkáchónki Dios chaxín jína la ko tjasinnya jie nkayakon It'éní Dios la mé tíhi: mé chrókjuinkítsa tí chojni nóe la ko tí chojni k'án chóntahya nkehe sine sín o níhi sín, la ko chrókjuasinnya tí jie jínahya síin chjasintajni.

2

Jnkokón chrókuikosáyehé kichó ni

¹ Kichóni, jahará tinkáchónkirá Ìnchéni Jesucristo imá tjetooan la t'ichjánxin chrókuikosáyehérá kain chojni jnkokón. ² Éxi ijnko chojni rico chrók'uixenhen tí tójkotsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nòa chóna iké ntaxin. ³ A ntá tí chrókuikosáyehérá tí chojni t'itsa ka jina la tsontácherá ch'án kixin: "Ntíhi antsí jina tjak'e." A ntá tí chojni nòa tsontácherá ch'án kixin: "Jaha la tjak'éxian tqtá ntiha o tjak'e nonte ó." ⁴ Mé xikaha la jnkokónhya tjikosáyehérá kichuárá la tí nkehe jínahya tjenkáyaxinrá.

⁵ Kichóni tjuahará, tsinhínrá tíhi: Dios tsíkjeýá tí sín nòa ntihi chjasintajni kixin antsí má tsinkáchónki sín tí jehe ch'án kixin ts'áyehé sín tí kjuachaxin kuènte ch'án éxi tsintáchro ch'án tsochjéhe ch'án tí sín tjuéhe ch'án. ⁶ A ntá jahará mé tjikosáyehará tí sín nòa. A ntá tí sín rico mé tjikosáyehérá. ¿Á jehya tí sín rico tjanchia sín jie sájtjiko sín tí jahará nkayakon tí sín t'etooan ní? ⁷ ¿La á jehya jehe sín t'ántaxínhin sín tí ihnié Cristo tjikosáyeheni?

⁸ A ntá jahará la jina tjejoch'erá tí nchexiteýará éxi t'etooan tí ley éxi níxja tí xroon itén Dios kixin: "Chrótjuéherá kichuárá éxi tjuéxíná asánrá." ⁹ A ntá tí jnkokónhya tjikosáyehará chojni la ntá xikaha la tjásinrá jie la nchexiteýehará éxi tí níxja tí ley kuènte Dios. ¹⁰ A ntá ijnko nkexro titekaon kain tí ley la ntá kjuínchexiteýáhya jnkokoá tí nkehe tjetooan la mé tí xikaha la kjuínchexiteýéhya kain tí nkehe t'etooan tí ley. ¹¹ Ntá Dios tsintáchro kixin: "Chrókuáqjahyará í jnko chojni chjin ókjé", la kjaxin tsintáchro ch'án kixin: "T'oyánhyará kichuárá." A ntá tí nkexro kuáqjahya í jnko chojni chjin ókjé kjánchó kjuàya la kjuínchexiteýéhya tí nkehe t'etooan tí ley. ¹² A ntá jahará chrónixjará la ko chrókuínchexiteýará kixin chrókuanchiahya jie tí ley sinchekaáni. ¹³ A ntá tí nkexro kuikonóghya í jnko chojni la kjaxin tsjikonóghya Dios tí jehe. A ntá tí nkexro kuikonóghé kichó la mé xikaha tsjacha tsaáxin ch'án tí yaon tsjixixín tsitqoxín jie.

Tí fe ch'ehya xra la tsík'en

¹⁴ Kichóni, ¿nkehe tsohnen ntáchrorá kixin chontará fe a ntá ninkehó nkehe jina tjákoxinhyará? ¿Á ntáchrorá kixin xikahó chrokuááxinrá? ¹⁵ Éxi ijnko kichó ni ntoa o kichó ni chjin chónahya iké o chónahya nkehe sine sín t'ichjánxinhin sín jnkojín yaon. ¹⁶ Ntá jnkojín tí jahará tsontácherá sín kixin: "Sátjia jnkojina la ko ts'itsa ká la ko sinte jina." A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrorá. ¹⁷ La mé xikaha tónhen tí fe la tí tjákoxinhyará ninkehó nkehe jina kjuíuch'erá la éxi nkehe tsík'en tí ntáchrorá.

¹⁸ A ntá jnkojín chojni tsontáchro kixin: "Jaha chonta fe a ntá janhan it'a tí xra jina." Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jina tjet'a. ¹⁹ Jaha titekávan kixin jnkokoá Dios itjen la chaxin jina xikaha, kjánchó kjaxin tí jínahya titekaon tíha la ko síxranka chrakon. ²⁰ T'ónahyará lontj. Jahará la nohará kixin tí fe ch'ehya xra la chónkó tíha. ²¹ Dios kóxrjínhin tí nkehe chrókuíuch'e ch'in Abraham, tí nkexro k'uaxrjenixinni ósé, tíó chrók'óyan ch'án tí xjeen ch'án Isaac la chrókuanjon ch'án chrók'uáyéhe Dios. ²² Chrókónohará kixin tí fe k'úechóna ch'in Abraham la kjuákoxin ch'án tí xra kjuíuch'e ch'án la ntá xikaha kjuákoxin ch'án kixin antsí má kuinkáchónki ch'án Dios. ²³ Mé xikaha xiteýá éxi ntáchro xroon itén Dios kixin: "Abraham kuítekaon Dios la ntá Dios ntáchro kixin jina ch'án", la ntá Dios kjuínchek'in ch'án amigo kuènte ch'án.

²⁴ Chrókónohará jahará kixin Dios la t'áyéhe ch'án chojni la nchetjóá ch'án kixin tí xra jina ch'e sín la jehya kixin jehó chrókuínkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'úechóna nchónhya chojni ntoa. Jhe tjan kjuanjon tjan kjuachaxin kuitóhe ntqé tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntja, a ntá Dios la kóxrjínhin tí nkehe kjuíuch'e tjan. ²⁶ Éxi tí cuerpoé chojni chónahya nchakuen la tsík'en la kjaxin xikaha tí fe la tsík'en tí ninkehó tjákoxinhya tí nkehe jina chrókuíuch'e sín.

3

Tí kjuachaxin chóna nejen chojni

¹ Kichóni, chrók'ónahya tí jahará nchónhya maestro kixin tí ntoáhya chrókuákorá la tíha mé chrókuasótiaxinrá imá. ² Kainni chónani jie, a ntá tí nkexro ninkehó jie ntáchrohya la ijnko chojni jina tíha la ó tsjacha ch'án ts'etuenhen ch'án kuénté tí cuerpo kuènte ch'án. ³ Éxi tí kokaté tsochóna chica freno tí ir'va va kixin tsitekaon va la sátsjiko tí inché va la tsjacha ch'án ts'etuenhen kuénté tí cuerpo kuènte va. ⁴ Tjenkáyaxinrá kjaxin nkexrí tjejó tí ntábáro kjónté imá jie la tsjacha tí xríntó chjéhe tjan sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchro

éxi ijnko xrohi ntsi la tsjacha tsochéxin kuenté ijnko jnã jíé. ⁶ Mé xikaha tí ir'vani la éxi ijnko xrohi kixin nchónhya jíé t'axrjéxin la éxi ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuente ir'vani la mé tjixín tí infierno la tíha mé tjixín tí ts'itjáyanxínni. ⁷ Tí chojni la tsjacha sinchesáncho kaín ko jíehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínhya la xitjahya tsósáncho. Tíha mé éxi ijnko nkehe chóntha nchónhya veneno ts'énxín chojni. ⁹ Tí ir'vani la kjaxín tjikosáyexinni It'éni Dios la tíha kjaxín t'ántaxíenxinni chojni tsíkjich'éna Dios éxi tsjehe tí jehe ch'án. ¹⁰ Kjaxín tí ir'vani t'axrjéxin tí nkehe itsjeni kuente Dios la kjaxín tíha t'ántaxínxinni. Kíchóni, xikahya chrókjuich'erá. ¹¹ Jnkokoá tòye xitjahya ts'axrje ntã xé la ko kjaxín ntã tsjá. ¹² Kíchóni, ¿á jína tí nta híguera chrók'óna to aceituna o tí nta to uva chrók'óna to higo? Kjaxín xitjahya ijnko tòye chrók'uaxrje ntã xíjnta la ko ntiha kjaxín chrók'uaxrje ntã xé.

Tí kjuaxrexinkaon jína

¹³ Tí tjen jnkojín nkexo tí tjejórá nohe jína la ko tienxín la chrókjuakoqxín ch'án jnkojína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóntha kjuachjinoxínhin asánrá la tjínkáonrá jahórá chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjínkáonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kujixín tí tjen Dios. Tí xikaha la kjuachaxin kuente chojni chjasintajni ó la ko kuente ch'ín Tsochren. ¹⁶ A ntá tí xikaha sín kjuachjinoxínhin la ko tjínkaon chojni jehó chrók'uetóan la ntá xitjahya tsónhen xrã yóxin kixin xikaha sín nkehe jínhya. ¹⁷ A ntá tí sín kjuaxrexinkaon jína tsíkixín tí tjen Dios la sãoxín tjejó chojni jína la ko kjaxín kjuaxróxin tjejó sín la ko náxrxón tjejó sín la ko jnkojína nixjehé kíchó sín la ko kjaxín tjikonóehé kíchó sín la ko tí xrã jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'uenkã sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuárá? Táha la mé jahórá t'axrenixínrá kaín tí kjuanínkaon a. ² Jahará tjínkáonrá tsochontará ichren nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjínkáonrá kixin tjanchehyará Dios. ³ La tí tjanchará la ts'ayéhyará kixin ntoáhya kjuanchiará kixin tjínkáonrá chrókuicháxinhanrá ó la chrókjuinchehnkexínrá. ⁴ Jahará chojni titekakonhya Dios. ¿Á noahyará tí jahará kixin tí imá tsotjuèhérá chjasintajni la ntá tsóninkáonhénnrá Dios? A ntá tí jnkojínrá tjínkáonrá tsotjuèhérá chjasintajni la tsokjanrá tsóninkáonhénnrá Dios. ⁵ ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xíkíhi: “Tí Nchakuen Dios kjuanjon ch'án k'uayéhérá la tjuahará ch'án la tsónínkaon tí tsítóherá ch'án.” Mé xikaha ichro Dios. ⁶ Kixin Dios la imá tjínkítsani ch'án, méxrã ntáchro xroon itén Dios kixin: “Dios la nínkakonhen tí chojni nchehne a ntá tjínkítsa ch'án tí chojni nchehnehya.”* ⁷ Méxrã chrókjuinchehnkehyará. Íchá jína chrókuítekáonrá Dios la chrókjuánjonhyará kjuachaxin tí jínhya chrók'uetuághanrá ntá chrók'uikon tí jínhya kixin chrók'uetuághya ntá sáchrókjui. ⁸ Chrókóchjineherá Dios, la tí jehe ch'án kjaxín tsóchjinahará ch'án. Jahará chojni chóntha jíé la chrókjonemará tjárá. Chrókjuinchetjóará asánrá kixin chrótjuèhérá Dios la kánhyó chrótjuèhérá chjasintajni. ⁹ Chrók'uavará la ko chrótsjankará. Chrókjuínkírá tí tjanorá la chrótsjankará la chrókjuínkí tí cháhará la chrók'uavará. ¹⁰ Chrókjuinchehnkehyará chrórxáxinkáonrá Ínchéni a ntá jehe ch'án chrókjuínkítsa ch'án qntsi chrókónohará.

Chrók'uántaxíenhyani kichó ni

¹¹ Kíchóni, chrók'uántaxíenhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jíé tí ley. A ntá tí t'eka ch'án jíé tí ley la mé t'óna juez chrínkí chrókuítekaon tí ley. ¹² Kixin jnkokoá nkexro kjuanjon tí ley la tí nkexro a mé tí juez la jehe ch'án sinchehá ch'án chojni la ko sinchekjásote ch'án chojni. ¿A ntá nkexro tí jaha kixin chrókjuanchéhé jíé tí kichuá?

Í noehyani nkehe tsónhen ntóye

¹³ A ntá jie jahará chrókjuinhínrá tíhi kixin tsintáchorá kixin: “Íjie o ntóye sáchrókjuini ijnko chjasín la ntiha chrók'uejóni ijnko nánó chrókjuinchejini nkehe chrókjuachani chichaon.”

* 4:6 Proverbios 3.34

¹⁴ A ntá jahará noahyará nkehe tsonhen ntóye kixin tí tjejóchónni la éxí ijnko tjuí nonte ts'ikónni a ntá tuénxín ts'itjáyán. ¹⁵ Íchá jína chróntáchrórá kixin: “Tí tjínkaon Ìnchéni la naxa chrók'uejóchónni la chrókjuich'eni tíhi o tíha.” ¹⁶ A ntá jahará tí nixjará la imá ihnkerá la káin tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xíkaha la mé antsí tjasin jie.

5

Tí nkehe chrókuinhin tí sín rico

¹ Jahará ricorá chrókuinhínrá tíhi. Chrótsjankará la ko chrók'uíyatorá kixin tí nkehe tsonhanrá tsjasótíará. ² Tí nkehe rícoxínrá la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoxín kixin nkexrí tsonhen ntóará tsoche. ¿Nkehe tsonhen kjuásintonrá nkehe kixin ó tsí tí yaon tsjixixín? ⁴ A ntá tí nkehe chrókjuacha tí sín kjuít'ahará xra la kjuénkehýará sín la ntá tjanchia sín jie tí jahará la t'eya sín, ntá Ìnchéni imá t'etóan mé kuinhin kixin xíkaha ichro tí sín kjuich'e xra. ⁵ A ntá ntíhi chjasintajni la náxrjón tjeorá la káin nkehe tóxrjínhanrá ch'erá la éxí iko imá jína ine la tsíkótsánka la ntá itsji yaon ntá its'en la mé xíkaha tsonhanrá. ⁶ Kixin jahará la kjuínchekjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénrá tsokjanjian Ìnchéni. Éxí tí ch'in ch'e xra nonté chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. ⁸ Mé xíkaha jahará la kjaxin chrókóninkákonhyará chróchonhénrá chrókóxrjéhyará kixin tí yaon itsi Ìnchéni la ó chjina tsí. ⁹ Kichóni, chrókoninkákuenhyará kichuárá kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta. ¹⁰ Kichóni, chrókuankihírá éxí tí sín k'uéchrónka itén Dios k'uéchrónkaxín sín kjuachaxin ihníé Ìnchéni. Jehé sín kjónté kjuasóte sín la kónínkakonhya sín. ¹¹ A ntá jeheni ntáchroni kixin kóchéhé tí sín a kjónté kjuasóte sín la kjuacha sín. Jahará la ó kuinhínrá kixin nkexrí kónhen ch'in Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonógehé ch'án tí ch'in a.

¹² A ntá kichó ni, chrókuakjénxínhyará ihníé Dios tjen nkaya nkajní la ko ni chjasintajni la nijnko nkexro chrók'uakjénxínhyará. Tí chróntáchrórá chaxín la chaxín la tí náhi la náhi kixin Dios la chrókjuínchekjasótíahýará.

¹³ A ntá jnkojín tí jahará náxrjónhya tjeorá la chrónixjehérá Dios, a ntá jnkojínrá náxrjón tjeorá la chrótsjerá kuente Dios. ¹⁴ A ntá tí jnkojín nkexro níhi la chrók'uíyehé sín tí sín táda t'etóan kuente njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxin ihníé Ìnchéni. ¹⁵ Chrónixjehérá Dios káin asánrá kixin tí sinníhi chrókuítóhe jína la ntá Ìnchéni chrókjuínkítsa sín, a ntá ichrén jie kjuasin sín la jehé ch'án sinchek'itjáyán tíha. ¹⁶ Méxra chróchenkará kichuárá tí jie chontará la ko chrónixjehérá Dios kixin chrókuitóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. ¹⁷ Tí ch'in Elías, tí nkexro k'uéchrónka itén Dios, mé ijnko chojni éxí tí jeheni la jehé ch'án kjuanchehe ch'án Dios káin asén ch'án kixin ts'aniáhya chrin la ntá k'uaniáhya chrin chjasintajni iní nánó ko t'ó. ¹⁸ A ntá chr'éxín kjuanchehe ch'án Dios kixin ts'aniá chrin la ntá k'uaniá chrin inaá chjasintajni la jína k'óna tí nkehe k'uénka sín.

¹⁹ Kichóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuínkítsa kixin chrókjan tí nkexro a ²⁰ la chrókónohará tí jahará kixin jnkojín chojni tjinkítsa ijnko nkexro chóna jie tsokjanxin tí ntja jínahya k'uék'aji ch'án la ntá ó kjuínkítsa kixin tsaáxin asén tí ch'in a kixin ts'itjáyánhya ch'án la ntá chrók'uitjáyán tí nchónhya jie k'uéchóna ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhanrá jahará sátsikjirá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'eni Dios kixin jehe ch'án tsikjenkayáxin ch'án ósé xikaha. Kótjuáxinrá Nchakuen ch'án kixin chrókuftékáonrá ch'án la ko kótjuáxinrá ijnjé Jesucristo. Kjuasáyé ch'án chrókujintayaonrá ch'án kixin ántsi chrókuákjárá tí kjuaxróxin kuente ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kujkonóeheni ch'án kixin éxi kokjixinni nixín kixin xechón Jesucristo. Mé xikaha tjejóchónhenni sinchekaáni ch'án. ⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyán, la ko chónhya tsokjita, la ko chónhya tsoxamá. ⁵ Dios mé t'ayakuanxínrá ch'án tí kjuachaxin kuente ch'án kixin jahará tinkachónkirá ch'án kixin ntá tsjacha tsaará éxi tsikjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xikaha chrókócháhará kjónté ihrén nkehe chrókónhanrá iso yaon kixin jehi t'ichjánxin xikaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xikaha t'ichjánxin ts'atsínka tí síin xrohi tsotsjexín sín á chaxín jina kohya nkehe tsónhen. A ntá ántsi má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsónhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjeuhérá Jesucristo kjónté k'uikonyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóhenni kixin imá náxrjón tíha. ⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkésá tsónhen tí nkehe chrónkaxín Nchakuan Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uejó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kujxin nkaya nkajni mé kjuinkítsa tí jehe sín. Kjaxín tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jina nkehe chrókjuich'erá kixin chrók'uejorá jnkójina. Káin asánrá chrók'uejochónhénrá kixin tí nkehe sintakjtonhanrá Dios tió tsi Ìnchéni Jesucristo.

¹⁴ Éxi ijnko xjan titekaon mé xikaha jnkójina chrók'uejorá jahará, chrókjuenkayáxinhyará éxi k'uékjenkayáxinrá senó naxá k'uéchonhyará Dios. ¹⁵ Náhi. Jnkójina tjóá chrók'uejorá kixin Dios k'uíyehará la mé jina ch'án la ko tjóá ch'án. ¹⁶ Kixin ntáchro xroon itén Dios kixin: "Jahará chrók'uejorá tjóá kixin janhan na mé ijnko nkexro tjóá.*"

¹⁷ Tí ntáchrorá jahará kixin It'ará mé Dios la ko ó nohará kixin jehe ch'án sinchekitogéxin ch'án ijje jnkoinko chojni, kixin t'ikon kixin jnkokón sínkí jnkoinko chojni, a ntá jahará chrórxáinkáonrá ch'án jnkochrixín tí naxá tjejochónrá ntíhi chjasintajni. ¹⁸ Dios mé kjuintakaará ch'án kixin chrók'uejohyará éxi k'uék'ejó tí sín tsik'axrjenixínrá. Jahará ó nohará jina kixin tí nkehe k'uínáxinrá tsaáxinrá jehya ijnko nkehe chrókjuéje éxi chica oro o chica plata. ¹⁹ Náhi. Ná mé k'uínáxinrá ijnjé Jesucristo imá tjeje. Jehe ch'án mé k'óyán sín la k'uáyéhe Dios éxi ijnko kolélo ninkehó xéhya va. ²⁰ Kixin Cristo mé ósé tsikónoxin ch'án tí naxá k'ónahya chjasintajni. Kjánchó jehya tuénxin kónhen tíha hasta tí chr'éxin ntá kónoxin ch'án kixin jina chrók'uejoxínrá tí jahará. ²¹ Ntá xikaha kónhen Cristo a ntá jie jahará la kuftékáonrá Dios, mé tí nkexro kjuínchexechón Cristo la ko kjuikosáyehé ch'án. Mé xikaha jahará tinkachónkirá Dios la ko tjejochónhénrá sintakaará ch'án.

²² A ntá jie ó kuftékáonrá tí tan chaxín ntoá kixin tjinkítsará Nchakuen Dios. Tíha mé kótjuáxin asánrá kixin ntá tsotjuehérá kichuára. Mé xikaha chrótjuehérá kichuára

* 1:16 Levítico 11.44

kaín asánrá. ²³ Méxra jahará kokjíhará nixin, jehya kixin naxa chrók'uaxrjeníxinrá it'ará chjasintajni ntiho ts'itjáyan. Náhi. Kokjiaxinrá itén Dios itjen jnkochríxin. ²⁴ Kixin ntáχρο xroon itén Dios kixin:

Kaín chojni chjasintajni tóyóhe kayoa ó,
a ntá tí kjuachaxin chóna la tóyóhe itsjo t'óna kayoa.

Tí ka la tsoxámá a ntá tí tsjo la ts'anótjen

²⁵ a ntá tí tan kuente Ìnchéni la tsjak'e jnkochríxin.†

Tí tan í mé tsaáxinni la kuinhínra tí jahará.

2

¹ Méxra tìtoherá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia. ² Chrók'uejorá éxi chánjan na ntá tsíkókjìhi la itsjen ó chrók'ui, mé xikaha jahará chrók'uejorá itén Dios, tíha mé chrókónohará la chrók'uánkixin kjuaxrexinkaon kuéntará kixin chrók'uaáxinrá, ³ tí chaxín kjuátsoanrá kixin Ìnchéni la jina.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxi tí xro tjechón. A ntá tí chojni la kuitekakhya tí xro a, a ntá Dios la kjuéyá ch'án tí xro a imá tje te sínkí. ⁵ Mé xikaha Dios kjuich'énará tí jahará éxi xro tjechón la Dios chrók'juich'éna ch'án tí jahará jnkokoá nínko kuente ch'án, la mé ts'ónará nchat'á tsíkjinchetjóá Dios, a ntá chrók'jehérá ch'án tí nkehe tóxrínhin ch'án kixin tinkachónkirá Jesucristo. ⁶ Mé xikaha kjaxin xroon itén Dios ntáχρο kixin:

Tsjaké chjasin Jerusalén ijnko xro t'etqan ts'óna nchia, ijnko xro tsíkónoxín imá tje te sínkí
a ntá tí sín tsitekaon tí jehe ch'án mé tsosuehya sín.*

⁷ A ntá jahará titekáonrá tí xro kixin imá tje te. A ntá tí sín kuitekakhya, la mé tsoxiteyá éxi ntáχρο xroon itén Dios kixin:

Tí xro náxrjónhya kuítóenta tí sín ch'éna tjat'o,

mé ijie mé k'óna tí xro tje toan.†

⁸ La ko kjaxin tsoxiteyá tí nkehe ntáχρο xroon itén Dios kixin:

Tí xro mé tsóténkixin sín la mé tíha ijnko tjo tsjitsínkaxín sín.‡

Kjánchó jehe sín kóténkixin sín tí xro kixin kuitekakhya sín tí itén Dios mé xráxín tsíkítqenxín sín xikaha tsqnen sín.

Tí sín tinkáchónki Dios

⁹ A ntá jahará tsik'axrjeníxinrá tí sín tsíkjeýá Dios la ko tsik'ónará nchat'á ch'ehérá xra tí rey, la ko tsik'ónará ijnko nación tjóá, la ko tsik'ónará ijnko chjasin kuente Dios kixin ntá tsochronkará tí xra náxrjón kuente Dios. K'uíyahará ch'án kixin ts'axrjéxinrá tí sítié ntá ts'ixenhénrá tí sín xrohi náxrjón t'inkaséyan kuente ch'án. ¹⁰ A ntá jahará tí ósé la jehya chjasén Dios, a ntá jie la tsik'ónará chjasén ch'án. Tí ósé la Dios k'uekikonóahyará. A ntá jie la kuikonóahará Dios.

Chrók'uejóni ch'eheni xra Dios

¹¹ Kichóni, xrjanóahará tí jahará kixin éxi chojni tsíkjin ókjé chrók'uejorá ntihi chjasintajni chrók'juánjonhyará kjuachaxin chrókóxrjínhin asánrá tí nkehe sín chjasintajni, mé tí nkehe tjanjonko asánrá. ¹² Jina chrók'uejorá tí sín tí sín chónhya Dios kixin kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kixin jina tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ìnchéni chrók'juínchexiteyéhérá kaín tí sín t'etqan kuente chjasintajni, á tí ch'ín rey kixin imá t'etqan ch'án, ¹⁴ ó á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jina. ¹⁵ Dios tjinkaon kixin jina chrók'uejorá kixin tí sín noehya la ko tí sín lonjé la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kixin chrók'ontaxínrá kjuachaxin kixin chrók'juich'erá tí jínahya. Náhi. Chrók'juáoxínrá éxi chojni ch'ehé Dios xra. ¹⁷ Chrók'juikosáyeherá kaín chojni. Chrótjuehérá tí sín kichó ni, la ko chrók'ontehérá Dios kjuasáya, la ko chrók'juikosáyeherá tí ch'ín gobierno t'etqan.

Tóyóexin éxi tí nkehe kjuasótéxin Cristo

† 1:25 1.24-25 Isaías 40.6-8

* 2:6 Isías 28.16

† 2:7 Salmo 118.22

‡ 2:8 Isaías 8.14

¹⁸ Jahará chojni ch'exón xra, chrókjuinchehiteyéherá tí lámorá, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuákoxinrá kjónté chrókjuasótiaxinrá ijnko nkehe jínahya kixin xikaha mé chrókjuinchehiteyéherá Dios. ²⁰ A ntá tí tjeoch'erá ichrén nkehe jínahya, ntá nchekjasótiaxinrá sín la nkehe tsonhen kixin chrókóninkákonhyará? A ntá tí chrókjuasótiaxinrá ijnko nkehe jína la ntá chrókjuachará chrókóninkákonhyará, la tíha mé tóxrjínhin Dios. ²¹ Méxra xikaha k'uíyahará Dios kixin Cristo kjuasóteyákonhánrá. Tíha mé kjuákoxin ch'án kixin mé xikaha chrókjuich'erá. ²² Kixin Cristo la ninkehó jie kjuasinhya ch'án la ko ninkexo kjuich'iyehya ch'án, ²³ la ko ninkehó kjuáteheya ch'án tió k'uántaxínhin sín ch'án; a ntá tió kjuinchejasóte sín ch'án la ninkehó k'ókjanxinhya ch'án. Náhi. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoxén ijie chojni. ²⁴ Cristo mé kuamá ch'án tí ijieni kixin tí cuéppé ch'án kjuák'enkání ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'o ch'án kixin jahará chrókuitoxáxinrá jína. ²⁵ A ntá jahará k'uék'ejorá éxi kolélo tsík'ichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjaxin jahará chojni chjin ó tsíkótahará chrókuitekákonhénrá tí xiyará, kixin kjaxin jnkojin tí sín titekakonhya itén Dios chrókuitekaon sín kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan, ² kixin chrók'uikon sín xikaha kixin jína tjen tí tjachjin chónka kjuasáyé tjan. ³ Chrókjuinchehnkexinhyará nkehe náxrjón chróchontará la ko tí nkehe náxrjón chróchónka kaxihará la ko nkehe náxrjón tsík'óna chica oro la ko tí ikará imá náxrjón. ⁴ Náhi. Chrókjuinchejinará asánrá, kixin tí nkehe náxrjón chrók'uitjáyanyha na mé tí asén chojni tójeheya la ko náxrjón. Tíha mé imá sinki nkayakon Dios. ⁵ A ntá tí óse xikaha k'uékjenkayáxin tí chojni chjin jína. Jehe sín mé kuinkáchónki sín Dios la ko kjuínchehiteyéhe sín xii sín. ⁶ Mé xikaha kjuich'e tjan Sara kjuínchehiteyéhe tjan tí ch'ín Abraham, mé kjaxin ntácho tjan kixin inché tjan tí jehe ch'án. A ntá tí jahará tí xjeen tí jehe tjan la chrókjuinchehiteyará jína la ko ninkehó kjuachrakon chróchontahyará.

⁷ Kjaxin jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yórá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jína kjuich'e sín

⁸ Méxra, jnkokóá chrókjuenkayáxinrá kaín rá chrókjuikonóehérá kichuárá, chrótuèhérá kichuárá. Jnkojína chrónixjehérá kichuárá la chrókjuinchehnkehyará asánrá. ⁹ Tí ichrén nkehe jínahya chrókjuit'ahará sín la jahará la xikahya chrókjuich'ehérá sín. Tí chrók'uántaxínhanrá sín la jahará chrók'uantaxienhyará sín. Náhi. Íchá jína chrókjuancheherá Dios kixin chrókjuincheyaon ch'án sín kixin Dios la k'uíyahará ch'án kixin chrók'uayéherá kjuachaxin kuènte ch'án. ¹⁰ Kixin:

Tí nkexro tjinkaon tsotjuèhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjéxinhya ir'va ch'án.

¹¹ Tí nkexro la chrókuitóhe tí nkehe jínahya la íchá jína chrókjuich'e tí nkehe jína,

la ko íchá jína chrókjuéyá ch'án kjuaxróxin chrókjuak'e ch'án.

¹² Kixin Inchéni t'ayakonhen tí nkexro jína

la ko tinhin ch'án tí nixjehe sín ch'án,

a ntá tí sín ch'e tí jínahya la tjinkitsahya ch'án.*

¹³ Xá nkexro chrókjuit'ahará nkehe jínahya tí jahará tjeoch'erá nkehe jína? ¹⁴ Kjónté chrókjuasótiaxinrá tí nkehe jína tjeoch'erá kjónté la chrókócháhará chróchrakuenhyará ninkexo la ko chróchrakonhyará. ¹⁵ Náhi. Íchá jína chrókjuikosáyehérá Cristo nkaya asánrá kixin Inchará. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Inchéni, la chrókjuinchehnkehyará la kjuasáya chrókjuáteherá. ¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuehé sín kixin tí nkehe ntácho sín la ntoáhyá. ¹⁷ Íchá jína chrókjuasótiaxinrá kixin tí jína tjeoch'erá tí xikaha tjinkaon Dios, a ntá chrókósuahará chrókjuasótiaxinrá tí ichrén jie chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jie kuènteni, óná k'uén ch'án kixin para jnkochríxin. Jehe ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuikoni ch'án tí tjen Dios. A ntá ik'uén ch'án éxi chojni, a ntá Nchakuen

ch'án la k'uénhya mé xechón inaá, ¹⁹ kixin tí Nchakuen ch'án sákjuikjakohe tí nchakuen tí sín tsík'en tjejóhina. ²⁰ Tí sín a mé kuítekakonhya sín tí ósé tió kjuák'e ch'in Noé na mé Dios la kónínkakonhya ch'án kjuák'echónhen ch'án nachrohe sí'óna tí arca, na mé ijníkoá chojni kuítekaon sín mé kuaá sín tí kuítee sín nta. ²¹ Tí nta a mé tóyóhe tí tikitéxín chojni ijie kixin tí xikaha tsonhenni la tsaáxinni ijie. A ntá tí tikite chojni la jehya kixin tsotjuáxin tí cuerpo. Náhi. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo, ²² mé tí nkexro sátsíjki nkaya nkajni itjen ch'án itja chjina Dios. A ntá jehé ch'án la mé t'etuenhen tí sín ángel la ko tí sín t'etóan.

4

Chrókjuich'eheni Dios xra éxi tí kjuachaxin kjuanjon ch'án

¹ Méxra éxi Cristo kjuasóte tí cuérpoé ch'án ntá kjaxinrá kjónté xikaha chrókjuasóterá chrókóxakuanhyará kixin tí nkexro kjuasóte tí cuérpoé la ó kuítóhe tí jie. ² A ntá tí naxa chrók'uejochónrá intsi la chrók'uejorá éxi tóxrjnhin Dios. Jehya éxi k'uékóxrjnhánrá. ³ A ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará óké chojni chjin la ko k'uékókoanrá la k'uékjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. ⁴ A ntá ijie la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín. ⁵ A ntá tí jehé sín tsjanjon sín kuentá tsochénka sín tí nkexro tjechónhen sinchekitóexín ijie tí sín tjejóchón la ko tí sín tsík'en. ⁶ Méxra kjónté tí sín tsík'en tsíxrákohe sín tí itén Dios kixin tí nchakuen sín chrók'uejó éxi tjinkaon Dios kjónté naxa k'uejó sín ntihi chjasintajni la kuítóexín tí ijie sín éxi tsitóexín ijie kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkojína la ko chrók'uejotsjehérá chrónixjehérá Dios. ⁸ Tí nkehe imá tjeoan kixin antsi chrótjuehérá kichuárá. A ntá tí tjeuhérá kichuárá la mé tíha chrók'uitjáyaxín tí nchónhya jie chontehérá kichuárá. ⁹ Chrókjuánjonrá kjuachaxin chrókuitóhe jnkojín kichuárá ntóará chrókóninkakuénhyará nijno kí jehé sín. ¹⁰ Jnkojnkorá nkehe tí xra tjáhará Dios k'uayéherá chrókjuínkítsará kichuárá. Xikaha jina chrókjuákoxinrá tí kjuasáyé ch'án tjáhará ch'án kixin nchónhya xra k'uayéherá. ¹¹ Tí jnkojínrá tjínkáonrá chrónixjará ichrén nkehe la chrónixjará éxi níxja itén Dios. Tí jnkojínrá tjínkáonrá chrókjuínkítsará la chrókjuákoxinrá tí kjuachaxin tjáhará Dios. Kaín tí xra chrókjuich'erá chrókjuancheherá Dios kjuasáya kixin kjuasáyé Jesucristo tinkachónkirá tí jehé ch'án. Kixin jehé ch'án la kaín tí kjuachaxin siín la kuénte ch'án jnkochríxín. Mé xikaha chaxín. Amén.

Íchá jina chrókjuasótéxinni kixin tí tinkáchónkini Cristo

¹² Kichóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin óké nkehe tjasótiaxinrá. ¹³ Náhi. Íchá jina chrókócháhará kixin xikaha chrókjuasóterá éxi kjuasótéxín Cristo, kixin kjaxinrá tsocháhará imá tió ts'ikonrá tí kjuachaxin tsíkaó Ìnchéni tí itsi ch'án. ¹⁴ Chrókócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehé sín t'ántaxínhin sín ch'an, a ntá jahará tjíkosáyehérá ch'án. ¹⁵ A ntá tí jnkojínrá tjeotjasóterá chrókókehya kixin ichrén nkehe chrókjuich'erá chrókjuáyará o chrókuegerá o ichrén nkehe jínahya chrókjuich'erá o chrókjiatérá kjuanínkaon kuénte óké chojni. ¹⁶ Náhi. A ntá jnkojínrá chrókjuasótiaxinrá kixin tinkachónkirá Cristo la chrókósuáhyará. Náhi. Chrókjuancheherá Dios kjuasáya kixin xikaha kónhanrá.

¹⁷ Ntá jie ó kui tí tsitóexín ijie chojni mé xrankíxixín tí sín tsík'óna xjeen Dios. A ntá tí xikaha tsitóexín ijie tí jeheni xrankíxixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jina la ko xikaha tsonhen sín ntá tsaá sín a ntá íchá tí sín jínahya chóna jie kjá antsi tjasóte sín.* ¹⁹ A ntá tí nkexro tjasóte éxi tjinkaon Dios la kjónté xikaha la naxa chrókjuich'e sín nkehe jina la ko chrókjuanjon sín asén sín chrók'uayakonhen Dios mé tí nkexro kjuich'éna sín la mé jehé ch'án xráxín jina ch'án.

5

Tí k'uituenhen tí sín t'etóan kuénte njnko

¹ Tjínkavan tétuanhan tí chojni t'etóan kuénte tí njnko tjejorá ntiha kixin kjaxin janhan tétóan kuénte njnko éxi tí jehé sín, a ntá janhan mé k'uíkuan kixin nkexri kjuasóte Cristo, la ko kjaxin janhan mé tsochonta kjuachaxin kuénte Dios éxi tsochóna tí jehé sín tió itsi Ìnchéni chr'éxin. ² Jahará chrók'uayakonhénrá tí kolélo kuénte Dios ntiha kixin xikaha tí xra k'uayéherá. Jnkojína chrókjuínkítsará sín éxi tjinkaon Dios la jehya kixin ijnko

* 4:18 Proverbios 11.31

chojni chrók'uetuñhanrá chrókjuich'erá xra, la ko kjaxin jehya kixin imá chrókóxrjínhanrá chichaon. Náhi. Kaín asánrá chrókjuich'erá xra jína. ³ Jehya jahará kuéntará tí jehe sín kixin chjini chrókuétuñhénrá sín. Náhi. Jnkojína chrókjuakoéxínrá tí jehe sín. ⁴ A ntá tió tsi tí Pastor chaxín t'etóan ntá jahará ts'ayéhérá ijnko corona náxrjón tsjehehya.

⁵ Kjaxin jahará ntasoará chrókjuinchesteyéhérá tí sín t'etóan kuénte nínko. Kaínrá chrókjuinchesteyéhérá kichuárá chrókjuinchehnkehyará kixin: Dios la tsónínkakohenen tí sín nchehnke,

a ntá tí sín nchehnkehya mé tsjinkítsa ch'án.*

⁶ Méxra chrókjuinchehnkehyará, chrókjuinchesteyéhérá Dios kixin jehe ch'án imá ts'etóan ch'án kixin tsjixraká tí yaon mé jehe ch'án tsotjáhará ch'án kjuachaxin kixin tsétoanrá. ⁷ Chróchjehérá Dios kaín tí kjuaxrexinkaon chontará kixin kjaxin jehe ch'án tóxakohenen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexo nínkakohenanrá mé tí ch'ín Tsochen éxi ijnko koxra tsjánka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kichuárá nkuixín chjasintajni xikaha tjejó'tjasóte sín kixin tinkáchónki sín Ìnchéni. ¹⁰ Kjánchó kánhyó sé tsjasótiará, a ntá Dios antsí tsjinkítsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kixin ts'ejokoará ch'án jnkokoá tí tjen Jesucristo chónka kjuachaxin jnkochríxín. ¹¹ Jehe ch'án tsjancheheni ch'án kjuasáya kixin chónka ch'án kjuachaxín ts'etóan ch'án jnkochríxín. Amén.

Kjuixixín nixja ch'ín Pedro

¹² Ch'ín Silvano mé t'ikuñ ijnko kichó ni jína mé kjuínkítsa ikjinni tí xroon kjónté kánhyó tsje nixja, la ntaxraxinkáonrá kixin kjuíntayaonrá Dios ntá xikaha kjuakoxín ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí nínko tjen Babilonia mé tsíkjeyá Dios éxi tsíkjeyá ch'án tí jahará nixjahará sín la ko kjaxin nixjahará ch'ín Marcos, mé éxi xjanna t'ikuñ tí jehe ch'án.

¹⁴ Nixjehérá kichuárá jnkojína. Kjuaxróxin chrók'uejorá tinkachónkirá Jesucristo. Amén.

* 5:5 Proverbios 3.34

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'gha xra Jesucristo. Ikjian tí xroon ts'ayéherá jahará ó tinkáchónkirá Ìnchéni éxi tinkáchónkini jeheni kixin Dios la ko Jesucristo tí nkexro sincheakaáni na mé jina ch'án. ² Sintayaonrá Dios la ko antsí ts'ayéherá kjuaxróxin kixin ó nohará nkexrí tjen Dios la ko Ìnchéni Jesús.

Jina chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jina chrórxaxinkaonni tí jehe ch'án. Kixin ó noheni nkexrí tjen tí nkexro k'uiyeheni kixin tí kjuachaxin jié chóna ch'án la ko tí xra imá jié kjuich'e ch'án. ⁴ Mé xikaha kjuanjon ch'án kaín xin tí nkehe a, táha la mé imá jié la ko imá tjete sinki. Mé xikaha kjuakoxin ch'án kixin chrók'uayéherá kjuachaxin chrók'uejorá éxi tjinkaon ch'án la ko chrókuítoghérá tí nkehe jínahya kixin chrók'uitjáyaxinhyará tí nkehe k'uékjenkayáxinrá siin chjasintajni. ⁵ A ntá jahará tinkáchónkirá Ìnchéni la kjaxin chrók'uejorá kixin chrók'uejorá jnkójina; a ntá tí jina tjeorá ntá chrókjuachará antsí chrókónohará; ⁶ a ntá tí kónohará ntá chrókjuachará chrókjuenkayáxinrá jina; a ntá tí tjenkayáxinrá jina ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótuéhérá kichuára; a ntá tí tjuéhérá kichuára ntá chrókjuachará chrótuéhérá kaín chojni.

⁸ A ntá xikaha tjeoch'erá tinkák'ánki tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo. ⁹ A ntá tí nkexro ch'ehya xikaha la mé éxi ijnko chojni t'ikonhya o ijnko chojni t'ikonhya jina, kixin ó k'uitjáyenhen kixin Ìnchéni ó kjuixin kjuinchetjótá tí jié k'uéchóna ósé. ¹⁰ Méxra xikaha kichó ni jnkójina chrók'uejorá kixin ntá tsonohará jina kixin Dios tsíkjeýará tí jahará la ko tsík'iyahará ch'án kixin xikaha jina chrókjuenkayáxinrá, a ntá xitjahya chrókjuichroerá. ¹¹ A ntá xikaha chrókuítekáonrá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochrixin. Jehe ch'án mé tí nkexro kjuincheakaáni.

¹² Méxra titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará. ¹³ Ntáxrjan kixin jina tí naxa tjeen chrókjuintaxráxinkáonrá kaín tí nkehe a ¹⁴ kixin Ìnchéni Jesucristo kjuinchenóna kixin í séhya its'én janhan. ¹⁵ Na mé kaín tíha tjet'a kixin tió its'én, ntá jahará tsoxráxinkáonrá jnkochrixin kaín tí nkehe kjuít'a.

Tí sín k'uíkon tí kjuachaxin kuente Cristo

¹⁶ Tí nkehe kjuákoaharáni kuente tí kjuachaxin kuente Ìnchéni Jesucristo la ko nkexrí itsi ch'án na mé jehya ijnko cuento kjuich'éna chojni chrókjuich'iyaxin. Náhi. Ikonní k'uíkonxínconí Ìnchéni la ko tí kjuachaxin kuente ch'án. ¹⁷ K'uíkonni tíha tió It'eni Dios kjuikósáyehe ch'án tí Xjeen ch'án, la ntá kuínhinni nixja Dios tjeen nkaya nkajni ntáchro ch'án kixin: “Tíhi mé xjanna tjuahá ch'án. Imá chána kixin nchexiteýá ch'án éxi tjínkavan janhan,” ichro Dios. ¹⁸ Mé kuínhinni itén Dios kujxin nkaya nkajni kixin xikaha ntáchro tió k'uejókoni Ìnchéni chrítaón tí jna tjtóá.

¹⁹ Mé xikaha k'uechrónka tí sín tsíkjin itén Dios ósé ntá noexinni kixin chaxín tsoxiteýá. A ntá jahará chrók'uejorá chrókuinhínrá jina nkehe k'uéntáchro sín kixin tí tan mé éxi ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchtjén mé xikaha ts'inkaséyanxín nkaya asánrá. ²⁰ A ntá tjeotan chrókónohará tíhi: kixin nínkehó xroon itén Dios tsík'óna jehó chojni chrókjuacha chrókiénxín. ²¹ Náhi. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjótá Dios tí jehe sín, a ntá Nchakuen Dios kjuínkítsa k'uenixja sín itén Dios.

2

*Tí sín tjako kjuach'ia
(Judas 4-13)*

¹ Kjaxin k'uék'ixín tí sín ntoáhya k'uechrónka itén Dios tí chjasin Israel, mé kjaxin xikaha tí jié ts'ixín maestro sit'ayahará. Jehe sín tsochr'ákjenhen sín iso nkehe ntoáhya ts'itjáyaxin tí nkehe chaxín tsaáxinni la xikaha sinchemá sín tí Ìnchéni chrókuááxinni. Tíha mé tsjixin tsjasótéxín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxiexín chojni tí ntja ntoá kuente Ìnchéni. ³ Tsoxrxjínjin sín tsochóna sín

nchónhya chichaon, ntá tsjanchiáxinrá sín chichaon tí nkehe ntoáhya tsjakohará sín. A ntá tí nkehe ts'itjáyánxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kuikonóehya ch'án sín la k'uetóan ch'án kixin sátsji sín tsjasóte sín sátsjik'ikjehé sín tí sítíe na tjejóchjina sín tsjixrakájia tí tsitoxén ijíé sín. ⁵ La ko kjaxin kuikonóehya Dios tí sín k'uéjé chjasintajni ósé ntá ichr'án ch'án ntá kujéte tí sín jínahya, a ntá Dios kjuíncheakaá jehó tí ch'in Noé, na mé tí nkexro kjuako tí tan jína la ko kjuíncheakaá ch'án tí yato sín ó. ⁶ Kjaxin Dios kjuíncheak'itjáyán tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xikaha tsonhen sín. ⁷ Kjánchó Dios kjuíncheakaá ch'án tí ch'in Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. ⁸ Tí ch'in Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín. ⁹ A ntá Inchéni na sincheakaá ch'án tí sín kaín asén kuitekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitoxén ijíé chojni.

¹⁰ Dios antsi sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etóan Inchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Inchéni.

¹² A ntá tí chojni a la éxi yóhe iko tjenkayáxinhya ninkehó la nchexiteyéhe tí nkehe ntáchro asén, la kokjiji kixin ts'óyán kichó ó. T'ántaxínhin sín tí nkehe tienxínhya sín, mé xikaha its'en sín éxi its'en tí ko a. ¹³ Tíha mé tsjasótéxin sín kixin jehe sín kjuínchekjasóte í so chojni. Xráxin tóxrjínhin sín ich'e sín tí nkehe ntáchro asén sín. Ijnko kjuatósuehe kixin tjejontaxin sín nteokar sín tí kia chontará la kjónté tí xikaha la naxa tjasin sín jie.

¹⁴ Kohya nijnko chojni chjin chrókjuasinkohya sín jie. Tóxrjéhya sín tjasin sín jie tsjasótéxin sín. ¹⁵ Kuítóhe sín tí ntja ntoá ntá chréhe sín ntja kuénte ch'in Balaam xjeen ch'in Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrináhya nixja itén chojni la kjuentuéhe tí ch'in Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án. ^S

¹⁷ Tí chojni tjako mé éxi yóhe tóye tjáhyá nta la ko éxi tjuj tjakáko xrinto ó; ó kjuixin k'uítuénhen sín sátsji sín tí imá sítíe tsjasóte sín jnkochríxin. ¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroxén sín tí sín na ntá tjinkaon chrókuítóhe sín tí jie. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuénhen sín. ²⁰ A ntá tí nkexro ó chóxin Inchéni Jesucristo tsaáxinni mé kuítóhe sín tí nkehe chrók'uitjáyánxin sín kuénte chjasintajni. A ntá chr'éxin tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá antsi má jínahya chrókónhen tí jehe sín. ²¹ Íchá jína chrókónoehya sín tí ntja jína. A ntá jehya jína tí ó nohe sín ntá tsitóhe sín tí nkehe k'uetóan Dios kuínhin sín. ²² A ntá tí jehe sín kjuínchexiteyá sín éxi ntáchro tí proverbio kixin: “Tí konjá t'ókjan ntá xikjan xíkjine inaá,* la ko tí cochúno na ntá tsík'ónti tjóá ntá xikjan kjíankí tí nchet'o kjita.”

3

Ti'ó tsi Inchéni

¹ Kichóni tjuahará tíhi la xroon yóxin ikjan ts'ayéherá. Yóí tí xroon a ntáxráxinkáonrá kixin jína chrókjuenkayáxinrá. ² Chróxráxinkáonrá tí nkehe tsichrónka tí sín k'uéchrónka itén Dios ósé la ko tí nkehe k'uetóan Inchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la itsi chojni tsjanoá tí tan jína kuénte Inchéni, la sinchexiteyéhe sín kaín nkehe jínahya ntáchro asén sín. ⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsík'axrjenixinni k'uéjé ósé la xikahó naxa sítónhen éxi tió k'óna chjasintajni. ⁵ Tí sín a titekakonhya sín kixin ósé k'uénixja Dios ntá k'óna nkajni la ko chjasintajni na mé kjuin tí nta ntá kuítóhe nonte xamá. ⁶ A ntá tí nta k'uitjáyánxin chjasintajni inaá. ⁷ A ntá tí nkajni la ko tí chjasintajni naxa tjejó jie tjejóchónhen tsoche kixin xikaha k'uetóan Dios kixin xrohi tsochexín tí yaon tsjixixín tsitoxén ijíé chojni la ko kaín tí sín jínahya tsjasóte sín.

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29 § 2:16 Números 22.35-46

* 2:22 Proverbios 26.11

⁸ A ntá kichó ni, chrók'uitjáyanyhará kixin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.* ⁹ Ntá Ìnchéni í séhya sinchexiteyá ch'án tí nkehe tsintáchro ch'án la jehya éxí tjenkayáxin í so chojni kixin ó má sé tjejóchónhen sín. Náhi. Jehí tjechónhen ch'án kixin nínkexró chrók'uitjáyanyha kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xíchge itsi tí tie. A ntá tí nkajní ts'itjáyán, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyán tsoche, la ko tí chjasintajni tsoche la ko kaín nkehe síin.

¹¹ A ntá tí xíkaha kaín nkehe ts'itjáyán, a ntá jahará la jína chrók'uejorá chróxráxinkáonrá Dios. ¹² Chrók'uejochonhénrá tí yaon itsi Dios chrókóxakonhanrá chrókjuich'erá xrá kixin ntá tjoka chrókui Ìnchéni. A ntá tí yaon tsjixixín mé ts'itjáyán nkajní tsoche, la ko kaín nkehe tsoxika ts'itjáyán kixin imá tsosóa. ¹³ A ntá jeheni tjejóchónhenni nkajní nixin la ko chjasintajni nixin éxí tsintáchro Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xíkaha kichó ni, nachrohe tjejochonhénrá kixin itsi tí yaon tsonhen xíkaha la kaín asánrá chrókjuéyará jnkójina chrók'uejorá kixin ts'ikon Dios kixin kjuaxróxin tjejorá chontahyará jię. ¹⁵ Chrókónohará kixin naxá tjechónhen Ìnchéni, tjokahya itsi ch'án kixin í so chojni naxá chrókuitekaon sín ch'án. Kjaxin xíkaha tsíkjin tí kichó ni Pablo tí xroon chr'ánhanrá ch'án éxí tí kjuachaxién Dios tsik'áyéhe ch'án chrónka xíkaha. ¹⁶ Jnkójnko tí xroon tsíkjin ch'án nixja xíkaha la imá xrá chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xíkaha jehó sín tjeýa sín nkehe ts'itjáyánxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xríko tí sín jínahya ntá chrókujtqhérá tí nkehe jína ntoá tinkáchónkirá. ¹⁸ Ichá jína antsí má chróchoxinrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyehe ni ch'án ijie la ko jnkochrín. Amén. Ó tjen.

* 3:8 Salmo 90.4

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon í ts'ayéhéra kixin tsonohará kuénte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikoxín konni. Kixin tí nkexro mé k'uikonni la ko tí nkexro kuákoxín tjani, mé tí nkexro nixja tí tan tsjanjon kjuachón. ² Kjuakoxín ch'án nkexrí kjuák'e ch'án, a ntá kaín tí jeheni k'uikonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uikonni la ko tí nkehe kuínhinni, kixin kjaxinrá jnkokoá chrókuinkachónkirá éxi tinkáchónkini tí jeheni, éxi tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xíkaha ikjinni tí nkehe i, kixin chrókujintaxín chrókóchéhara la ko chrókóchéhni.

Dios mé tí xrohi

⁵ Tí tan í mé Ìnchéni Jesucristo kjuakohé tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítie tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítie, na mé xíkaha ch'iani kixin ch'ehyani tí nkehe ntáchroni. ⁷ A ntá tí xritjeóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijníé Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyehnen ch'án kaín jie chóntani la ko sinchetjóáni ch'án kixin kaín tí nkehe jínahya kjuich'ení. ¹⁰ A ntá tí tsontáchroni kixin kjuasinyani ninkehó jie, la éxi chróntáchroni kixin Dios la ch'ia ch'án, a ntá tí xíkaha tsixroni la chaxínhya tsík'áyéheni tí tan kuénte ch'án.

2

Cristo mé tsonixjayákonhenni ch'án

¹ Kichóni, éxi xjanna t'ikuán tí jahará, a ntá tjékjian tí xroon ts'ayéhéra tsochronka kixin chrókuásinhyará jie. A ntá tí jnkójinrá chrókuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina. ² Jesucristo mé k'uenyákonhenni ch'án kixin tí jie chóntani; a ntá jehya ijíeni ó. Náhí. Ijje kaín chojni síin chjasintajni.

³ Tí tsitekaonni tí nkehe k'uetqan Dios ntá tsonoxéinni chaxín kixin chóxinni ch'án. ⁴ A ntá jnkójin nkexro ntácho kixin chóxin Dios, a ntá titekakhya tí nkehe tsik'etqan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsik'etqan Dios la chaxín tjuéhe Dios; mé xíkaha noheni kixin chaxín jnkokoá tjejókonni ch'án. ⁶ Tí nkexro ntácho kixin chaxín tinkáchónki Dios chrókjuak'e éxi kjuák'e Jesucristo.

Tí mandamiento nixin

⁷ Kichóni, méxra tí nkehe tjékjian jehya ijnko nkehe nixin tsik'etqan Dios. Náhí. Tíha mé tí nkehe k'uayéhéra tí xrankixixín, mé tí mandamiento óse tjen, mé tí nkehe ó tsíkinhínra. ⁸ Kjánchóni tí nkehe ikjian mé yóhe ijnko nkehe nixin, éxi kjuakoxín Cristo mé xíkaha tjakoxinni, kixin tí sítie la tinkák'itjayan kixin ijie la ó t'inkaséyanxín tí xrohi chaxín.

⁹ A ntá tí nkexro tsontácho kixin ixri tí t'inkaséyan, a ntá naxa nínkakohen kichó, na mé tí xíkaha naxa itjen tí sítie a. ¹⁰ A ntá tí nkexro tjuéhe kichó mé tjen tí t'inkaséyan, a ntá xíkaha jina tjen, chóntahya jie la chrókjuachruéhya ch'án ninxeró kixin chrókjuasin sín jie ina. ¹¹ A ntá tí nkexro nínkakohen kichó mé tjejó sín la ko ixri sín tí sítie a la ko noehya sín nketí nó sátsji sín kixin tí sítie la kjuich'éna ntakótán sín.

¹² Éxi xjanna t'ikuán tí jahará, la méxra tjékjian tí xroon ts'ayéhéra kixin tsonohará kixin kjuachaxin ihníé Dios kjuínchetjuáxinrá tí ijjará kixin k'uenyákonhenni Ìnchéni Jesucristo. ¹³ Jahará it'é xjan, ikjian tí xroon ts'ayéhéra jahará kixin choxínra tí nkexro tjen tí xrankixixín. A ntá jahará ntasoíra kjaxin ikjian tí xroon ts'ayéhéra jahará kixin kjuachará kixin kjuachahya tí jínahya chrók'uetuqanhanrá.

Ikjian tí xroon ts'ayéhéra jahará chánjanrá, kixin choxínra It'éni. ¹⁴ A ntá jahará it'é xjan ikjian tí xroon ts'ayéhéra kixin ó choxínra tí nkexro itjen tí xrankixixín tí naxa t'ónahya chjasintajni. Ikjian tí xroon ts'ayéhéra jahará ntasoíra, kixin naxa fuérterá, la ko k'uayéhéra tí itén Dios, la ko kjuachará kixin kjuachahya Tsochren chrók'uetuqanhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'èni Dios. ¹⁶ Kíxin ninkehó tí nkehe chrókjuanjon chjasintajni chrókuixín tí tjen It'èni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókuich'eni, la ko tí chrókuak'e asénni tí nkehe ts'ikonni, la ko tí kjuahnke xrikonni kíxin itsjé nkehe chróchóntani. ¹⁷ A ntá tí chjasintajni sitinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjnhin Dios mé ts'ejó sín jnkochrixin.

Tí nkehe chaxín la ko tí nkehe kjuach'ia

¹⁸ Éxi xjanna t'íkuan tí jahará, la chrókónohará kíxin ó kuichjina tí yaon tsjixixín. Jahará ó kuinhínra kíxin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kíxin ó kuichjina tí yaon tsjixixín. ¹⁹ Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhí. Tí chaxín chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naaxá chrók'uejókonni sín jnkokoqá. A ntá xíkaha kónhen k'uaxrjekjan sín kíxin tsonoxín kíxin kuinkáchónkihya sín éxi tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhéra kaín rá, ntá jie tiénxinrá intsi kuènte ch'án. ²¹ Ikjian tí xroon ts'ayéhéra kíxin ó nohará tí nkehe chaxín, jehya kíxin chrókónohayará; jahará la ó nohará kíxin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'èni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínra tí xrankixixín la chrórxáinkáonrá jnkochrixin. A ntá xíkaha tí chrórxáinkáonrá jnkochrixin tí nkehe tsíkinhínra tí xrankixixín, la kjaxin xíkaha jnkokoqá chrókuinkáchónkirá tí Xjeen Dios la ko tí It'é ch'án. ²⁵ Kíxin Jesucristo tsintáchro ch'án kíxin tsjanjon ch'án tí kjuachón jnkochrixin.

²⁶ Méxra xíkaha tjékjan tí xroon í ts'ayéhéra kíxin chrókónohará kuènte tí sín tjinkaon chrókuít'ayahará. ²⁷ Kjánchó jahará la ó chontará Nchakuen Dios tsitjáhará Jesucristo, a ntá xíkaha la í t'ichjánxínhya kíxin ókjé nkexro chrókuakohará, kíxin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkáchónkirá Cristo éxi kjuako tí Nchakuen ch'án.

²⁸ A ntá jie éxi xjanna t'íkuan tí jahará, chrókuítjuèhyará chrókuinkáchónkirá Cristo, kíxin tíó tsi ch'án la antsí chróchóxinrá ch'án la ko chrókósuàhyará chrókóchjinará tíó tsi ch'án, ²⁹ kíxin ó nohará kíxin Jesucristo la jína ch'án. A ntá chrókónohará kíxin kaín nkexro jína la xjeen Dios tíha.

3

Tí sín xjeen Dios

¹ Chrókónohará kíxin It'èni Dios, imá tjuèhe tí jeheni kíxin nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kíxin jehé sín la xráxin chónhya sín Dios. ² Mé xíkaha kichó ní, ó tsík'onani xjeen Dios, a ntá naaxá tjakoxínhya ch'án nkehe tsonhenni tí tsjixixín. Kjánchó ó noheni kíxin tíó itsi Inchéni Jesucristo la ts'onani éxi tí jehé ch'án, kíxin ts'ikonni kíxin nkexri tjen tí jehé ch'án. ³ A ntá kaín nkexro tjejóchónhen tí tsi ch'án la chrókuítóhe sín ijíé sín kíxin tsotjóá sín kíxin jehé ch'án la tjóá ch'án.

⁴ Kíxin kaín tí nkexro tjasin jie mé jínahya ch'e sín, kíxin tíó tjasin chojni jie la mé xíkaha kuítetekakonhya sín tí ley a. ⁵ Jahará ó nohará kíxin Jesucristo kui chjasintajni kíxin tsjatsen ch'án tí ijíéni, a ntá jehé ch'án la ninkehó jie chóntahya ch'án. ⁶ Mé xíkaha kaín tí sín chaxín tinkáchónki tí jehé ch'án la mé tjasinhya sín jie; a ntá kaín tí sín tinkákjasin jie la tsík'ikonhya sín ch'án la ko xráxin chónhya sín ch'án. ⁷ Éxi xjanna t'íkuan tí jahará; méxra chrókuítjuèhyará kíxin ninkexró chrókuít'ayahará; a ntá tí nkexro ch'e nkehe jína la jína ch'án, kíxin Inchéni la jína ch'án. ⁸ A ntá tí nkexro xritjasin jie la mé kuènte tí Jínahya; kíxin tí Jínahya mé kjuankixín kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kíxin sinchek'itjáyán ch'án kaín tí xra kjuích'e tí Jínahya.

⁹ Nijnko tí chojni tsík'axrjenixín Dios naaxá chrónkákjasin jie, kíxin ó chóna tí kjuachón kjuanjon Dios; la í xitjahya naaxá chrókjuasin jie kíxin ó tsík'óna xjeen Dios. ¹⁰ Mé xíkaha tónoxín kíxin nkexro tí xjeen Dios la ko nkexro tí xjeen tí Jínahya, kíxin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ní

¹¹ Méxra tí tan tsíkinhínra tí xrankixixín mé tíhi, kíxin chrótjuèheni kichó ní. ¹² Chrókuích'ehyani éxi kjuích'e ch'in Caín, kíxin jehé ch'án mé kuènte tí Jínahya, kíxin

k'óyán ch'án tí kíchó ch'án. ¿Nkekuènté kixin k'óyán ch'án? Kixin tí ch'in Caín la tí nkehe jínahya kjuíuch'e ch'án, a ntá tí kíchó ch'án la kjuíuch'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín síin chjasintajni. ¹⁴ A ntá noheni kixin k'uat sínkani tí kjuach'én, a ntá kjuachón, mé noexínni tíhi kixin tjuèheni kíchó ni. Tí nkexro tjuèhya kíchó la éxi tsík'en sín xíkaha xritjejó sín. ¹⁵ Kaín tí nkexro imá nínkakonhen kíchó na mé chojni tjàya tíha, la ko ó nohará kixin ijnko chojni tjàya la xitjahya tsochónta kjuachón jnkochríxín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxín jeheni kjónté chrók'uenyákonhenni tí sín kíchó ni. ¹⁷ A ntá tí tjen ijnko nkexro rico t'íkon kixin ijnko tí kíchó ch'án t'íchjánxínhin nkehe, a ntá tí tsjinkjísahya tí kíchó, ¿a ntá nkexrí chrótjuèhe ch'án Dios kaín asén ch'án? ¹⁸ Éxi xjanna t'íkuan tí jahará, méxra chrótjuèxínhyani tí kíchó ni tí tan náxjón chrónixjani ó. Náhí. Chrókjuakoxínni tí nkehe jína chrókjuíuch'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxi tjinkaon Dios. ²⁰ A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xíkaha kíchó ni, tí jòhya asénni kixin náxa ichrén nkehe jínahya tjenkayáxinni, a ntá antsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetjoan ch'án la ko ch'eni tí nkehe tóxrjínhin ch'án. ²³ Tí nkehe tsík'etjoan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kíchó ni éxi k'uetjoan ch'án. ²⁴ Tí nkexro nchexiteyéhe tí nkehe k'uetjoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókonni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitekákonyará kaín tí sín ntácho sín kixin Nchakuen Dios mé nixjaxín tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chónta sín Nchakuen Dios o náhi, kixin tí chjasintajni la ixri nchónhya chojni ch'ia, ntácho sín kixin nixja sín tí itén Dios. ² A ntá xíkaha mé chrókónoaxínni kixin á chaxín chónta sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chónta sín Nchakuen Dios. ³ A ntá tí nkexro titekakonyaha kixin xíkaha tsíki Jesús, na chóntahya sín Nchakuen Dios. Náhí. Chónta sín tí nchakuen tí nkexro nínkakonhen Cristo. Jahará ó kuínhínni kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekaonrá Dios, a ntá kjuachará kixin kjuachahya tí sín ch'ia chrók'uetjoan, kixin tí nkexro tjejókoará la imá t'etjoan, a ntá tí nkexro t'etjoan chjasintajni la kánhyó t'etjoan. ⁵ Kixin jehe sín la kuènté chjasintajni ó, méxra nixja sín tí nkehe kuènté chjasintajni ó. A ntá tí chojni kuènté chjasintajni ó mé tjejótinhin sín. ⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjínkakonyaha sín chrókuínhin sín tí nkehe tjakoni. A ntá tíha mé tjatsqanxínni nkexro chónta tí Nchakuen tí nkexro chaxín la ko nkexro chónta tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tíxín tí tjen Dios. Kaín nkexro tjuèhe kíchó mé xjeen Dios, la ko chóxin Dios. ⁸ A ntá tí nkexro tjuèhya kíchó na mé chónhya Dios kixin Dios la xráxin tjuèhe chojni. ⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkoqó Xjeen ch'án chjasintajni kixin tsochóntaxínni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehé ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xíkaha Dios tjuèhe tí jeheni, a ntá kjaxínni jeheni xíkaha chrótjuèheni kíchó ni. ¹² A ntá Dios la nínkexro k'uíkonyaha. Kjánchó tí chrótjuèheni kíchó ni la Dios ts'ejókoni ch'án, a ntá tsjinkjísá ch'án kixin chaxín tsotjuèheni kíchó ni. ¹³ Tíhi mé noexínni kixin tjejókonni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkoxín konni la mé chrónkaxínni kixin It'eni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xíkaha chaxín chrótjuèheni Dios kixin ntá chróchrakonhyani tí yaon tsitqéxín ijíeni kixin ó noheni kixin Jesucristo la tjuèheni ch'án la ko jeheni la kjaxín tjuèheni tí jehe ch'án.

¹⁸ Kíxin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kíxin jehe ch'án senó tjuèhe ch'an tí jeheni. ²⁰ A ntá jnkojín nkexro ntáchro kíxin jehe mé tjuèhe Dios, a ntá tuénxín nínkakonhen kíchó mé kjuach'ia xríko. Tí tjuèhya ch'án tí kíchó chóxin ch'án, la kjaxín xitjahya tsotjuèhe Dios kíxin tsík'ikonhya ch'án Dios. ²¹ Tíhi mé tsík'etqan Jesucristo kíxin tí nkexro tjuèhe Dios la mé kjaxín chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kíxin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxín tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etqan ch'án, a ntá noheni kíxin kjaxín tjuèheni tí sín tsík'óna xjeen Dios. ³ Tí tjuèheni Dios la t'ichjánxín kíxin chrókuitekaonni tí nkehe k'uetoqan ch'án, kíxin tí nkehe t'etqan ch'án la jehya ijnko nkehe imá xra ⁴ kíxin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ínchéni la mé tsjachaxínni la tsjachahya tí chjasintajni. ⁵ A ntá tí sín tinkáchónki kíxin Jesús mé tí Xjeen Dios mé tsjachahya tí chjasintajni ts'etugnenhén sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxín tí ínta la ko tí jni. La jehya kíxin jehó tí ínta kjuakoxín ch'án. Náhi. Kjaxín ínta la ko íjní kjuakoxín ch'án. A ntá tí Nchakuen Dios mé chrónkaxín tíha, kíxin tí Nchakuen Dios la chaxín ntoá. ⁷ Siín iní nkexro chrónkaxín nkaya nkajni: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá siín iní tí nkehe chrónkaxín ntíhi chjasintajni, mé tí Nchakuen Dios, la ko tí ínta la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjeoan kíxin táha la Dios tsíchrónkaxín kíxin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuítetekakonhya sín tí nkehe tsíntáchro Dios kíxin nkexrí tjen Xjeen ch'án. ¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochríxin, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxín chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kíxin jahará ó titekáonrá tí Xjeen Dios, kíxin mé tsoñoaxínrá kíxin chaxín chontará kjuachón jnkochríxin.

¹⁴ Tíhi mé chóxixínni Dios kíxin noheni kíxin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. ¹⁵ A ntá tí xíkaha ó noheni kíxin Dios tjetinhin tí nkehe níxjeheni ch'án, a ntá kjaxín ó noheni kíxin ó chónani tí nkehe kjuancheheni ch'án.

¹⁶ A ntá jnkojínrá ts'íkonrá ijnko kíchuará tjasin jie, a ntá tí jehya ijnko jie chrók'uenxín ch'án, la chrókjuancheherá Dios kíxin chrókjuinchexraxínkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kíxin íchá jina chrókjuanchehyará Dios kíxin chrókjuinkítsa tí ch'ín a. ¹⁷ Kaín nkehe jínahya la íjie tíha. Kjánchó siín jie ts'enxínhya chojni.

¹⁸ Ó noheni kíxin tí nkexro tinkáchónki It'eni Dios tjasinhya sín jie, kíxin tí Xjeen Dios tjinkítsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kíxin Dios t'ayakonhen tí jeheni, a ntá tí Jínahya chóna kjuachaxín t'etugnenhén kuènte chjasintajni.

²⁰ Ó noheni kjaxín kíxin Xjeen Dios kui, la ko kjuínkítsa ch'án tí jeheni kíxin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochríxin. ²¹ Éxí xjanna t'íkuan tí jahará, la títqhérá tí dios tsíkangya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeýá Dios tójnoktsé sín ntiha, la mé chaxín tjuahá sín: a ntá jehya janhván, la kjaxín kain tí sín chóxin tí tan chaxín. ² Tjuahará tí jahará kixin tí tan chaxín ó chónta asénni, tíha mé ts'ejókoni jnkochrixín. ³ It'éni Dios la ko Inchéni Jesucristo mé Xjeen Dios chrókjuintayaonrá ch'án la ko chrókujikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chána k'uikuán kixin isorá tjejórá titekáonrá tí nkehe chaxín, éxí tsík'etóan It'éni Dios. ⁵ A ntá jie jahará kichó ni, xrxanóahará kixin chrótjuéhérá kichuárá. Méxra xikaha tjéjkian tí xroon í, la jehya ijnko nkehe nixin tsík'etóan Dios. Náhi. Tíha la mé tí nkehe tsík'áyéheni tí kjuák'e Inchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'etóan Dios; a ntá tí nkehe tsík'etóan Dios la mé ó tsíkinhínrá jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhérá tí nkehe tsjintaxín ts'ayéhérá.

⁹ A ntá tí sín ijnko nkexro kuitóhe tí nkehe kjuako Cristo ntá kjuichroe la mé chóntahya sín Dios; a ntá tí nkexro títóehya tí nkehe kjuako Cristo mé chónta sín It'éni Dios la ko tí Xjeen ch'án. ¹⁰ A ntá jnkójin sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxín chrókuitóhe tí sín a ntoará la ko ni chrónixjeéhyará sín jnkójina. ¹¹ A ntá tí nkexro tsonixjehe tsontáchro kixin: “¿Á jina k'uinka?” na mé éxí tóxrjinhin sín tí nkehe jínahya ich'e tí sín a.

Tí tan tsjixín

¹² Chonta nchónhya nkehe chrókuinhínrá jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuárá tójnoktsé kuénte nínko ntihi, mé tí sín kjaxín tsíkjeýá Dios, mé nixjahará sín. Amén. Ó tjen.

Tí nixin xroon tsíkjin ch'in Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'in choxian, mé tí ch'in Gayo tí ch'in chaxín tjuahá.

² Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kain xra ch'e la ko jína chrókjuak'e jaha. ³ Imá kóchána tió kui iso tí sín kíchó ni chrónka sín kixin jína tjákoxian tí tan chaxín. ⁴ Kohya ijnko nkehe antsí má nchechána éxi tió kuínhan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ójé chjasin. ⁶ A ntá tí tsíkójkotsé tí sín kíchó ni la tsichrónka sín kixin nkexrí tjuéhé tí jehé sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjínhin Dios. ⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios. ⁸ Méxra tí jeheni t'ichjánxin chrókjuínkítsani tí jehé sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'in Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'in Diótrefes kuítেকakonhya ch'án tí nkehe k'uetuenhenni ch'án kixin tjinkaon ch'án chrók'uetóan ch'án jehó ch'án. ¹⁰ Méxra xíkaha tí sátsjia níha tsonixjahá ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'etóan ch'án kixin tsjanjonhya sín kjuachaxin la ko t'etóan ch'án kixin tsochjinahya sín tí tójkotsé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'in Demetrio

¹² Kain sín ntáchro sín kixin jína tjákoxin tí ch'in Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tsontáxrjan, kjánchó tjínkakhonhya tsokjian ó ¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kain nkexro choxian níhi nixjaha sín. Tétuanhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'aha xra Jesucristo, la sana mé Jacobo la mé ikjian tí xroon í ts'áyehé tí sín tsíkjeýá It'eni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikonóghará ch'án ntá ts'ayéhérá kjuaxróxin kixin tjuahará ch'án.

*Tí sín ntoáhya tjako
(2 Pedro 2.1-17)*

³ Kíchóni, imá tjínkavan tsokjan tí xroon ts'ayéhérá tsochrónka nkexrí tsaáxinni kain ni. A ntá t'íkuan kixin t'ichjánxin tsokjan tí xroon ts'ayéhérá tsoxrjanóaxínrá kixin jína chrókiénxinrá nkehe chrókuátéherá kixin nkexrí tinkachónkirá Inchéni kixin tí fe la mé ónaá tsík'áyéhó tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuénte tí sín a kixin tsjasóte sín. Jehe sín la chojni jínahya ntá ntácho sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etóan, la ko titekakonhya sín Inchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Inchéni Dios kuakitsjexin ch'án Egipto tí sín chjasin Israel, ntá kjónté xikaha la chr'éxin kjuinçek'itjáyán ch'án tí sín kuítékakonhya sín tí jehe ch'án.* ⁶ Kjaxin tí sín ángel kuítékakonhya sín tí k'uetóan Dios ntá kuitohe sín tí kjuachaxin tsíkjanjon Dios tsík'áyehé sín la ko kuitohe sín tí k'uék'ejó sín jína, a ntá jie Dios k'uetóan ch'án kixin ts'ejóchjina sín tí sítié la ts'ejóchónhen sín tsjia tí yaon tsitóexin ijje sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítékakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxin kain chojni kixin nkexrí tsonhen tí sín titekakonhya tsjasótexin sín tí xrohi jnkochrín ts'ankahya.

⁸ Méxra kjaxin tí chojni a kotáchrién sín tsík'ikonxin kixin ó nchoxon chrókjuasinko sín jie chojni chjin ókjé la ko chrókuitekakonhya sín tí kjuachaxién Inchéni la ko chrók'uántaxinhin sín tí sín ángel chóna kjuachaxin t'etóan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuénte ch'ín Moisés.† A ntá jehe ch'án kjónté xikaha la kjuinçekjasótehya ch'án tí ch'ín Tsochren. Jehó ntáche ch'án kixin: "Inchéni mé tsjentuáha tí jaha." ¹⁰ A ntá tí chojni i t'ántaxinhin sín tí nkehe tiénxinhya sín la tjenkayáxin sín éxi ko tiénxinhya nchexiteyéhé tí nkehe ntácho asén, mé xikaha tí nkehe jínahya kjuich'e sín ts'itjáyánxin.

¹¹ jNóa tí jehe sín! Chréhe sín éxi kjuich'e ch'ín Caín.‡ Tjinkaon sín chrókjuacha sín chichaon ntá ntoáhya kjuich'e sín éxi kjuich'e Balaam, la ko its'en sín éxi ik'uén ch'ín Coré kixin kuítékakonhya sín.§* ¹² Ijnko kjuatósuehé kixin tjejóyáxjanxin sín tí sín kia náxrjon chontará, kixin tjejóne sín la ko tjejót'ín sín chéhe sín la kjónté xikaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuj chóntahya ntá tjakáko xrinto; la ko éxi injko nta t'ónahya to tí nitjó chrók'óna to, éxi yáya tsík'en tsík'axrjenkixin nuéé. ¹³ Jehe sín na mé éxi ntayaoon jiehe sixróji lóxrjo ó chóntahya ntá jína mé xikaha chónkó tí nkehe ch'e sín mé injko kjuatósuehé tíha; la ko éxi konotsé kjuichroe sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatóxin chr'éxin kui ch'ín Enoc nixjaxin kjuachaxién Dios ntácho ch'án kixin ku'ikon ch'án itjen Inchéni kuikao nchónhya mil tí sín ángel kuénte ch'án, ¹⁵ kixin sinchekitóexin ch'án ijje kain tí sín jínahya kixin kain tí jínahya kjuich'e sín la ko kain nkehe k'uénixja tí sín jínahya k'uántaxinhin sín tí jehe ch'án. ¹⁶ Xráxin tóxrjénhya sín nkehe sífónhen la ko ixri sín tjonta kíchó sín. Jehó xritjeýá sín tí nkehe tóxrjinhin sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókjuinkitsa jehe sín.

Nchexraxinkaoon ch'án tí sín tinkáchónki Cristo

¹⁷ A ntá jahará kíchó ni, xráxinkáonrá kixin tí sín tsíkjeýá Inchéni Jesucristo ¹⁸ ntácho sín kixin tí yaon tsjixixin tsjexin chjasintajni ts'ixin chojni tsitekakonhya sín ts'ántaxinhin sín tí nkehe tjinkaon Dios la ko tsotjinkaon sín sinchexiteyéhé sín tí nkehe jínahya ntácho asén sín ó. ¹⁹ Tí sín a mé tjinkaon ts'ókika tí sín jnkokoá tjejótójkotsé kixin naxa tóxrjinhin sín sich'e sín nkehe sín chjasintajni kixin chóntahya sín Nchakuen Dios.

* 1:5 Éxodo 12.51 Números 14.29-30 † 1:9 Deuteronomío 34.6 ‡ 1:11 Génesis 4.3-8 § 1:11 Números 31.16

* 1:11 Números 16.1-3

²⁰ A ntá jahará kichó ni tjuahará, antsí jina chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchàkuen ch'án. ²¹ Jina chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuikonóghérá tí sín naxa tienxínhya. ²³ Jnkojín sín chrókuinchekaará chrókuakitsjekjanxínrá sín chríkjan xrohi, la ko chrókuikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jié.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jié la ko tió tsjijini tí tjen ch'án la ninkehó jié chróchóntahyani, imá tsóchéhēni tí tjen ch'án ntiha. Kjuasáyé Dios imá chóna ch'án kjuachaxin t'etōan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

¹ 18

Kaín tí nkehe í mé chénka Dios Jesucristo kíxín jehe ch'án tsochéna tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuénte ch'án kíxín nkexrí chrókoñohe tí ch'ín Juan ch'ehe ch'án xra. ² A ntá jehe ch'án mé k'uítuenhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsík'íkon ch'án nkexrí kjuakoxín Dios.

³ Náxrxón tjejó tí sín nchekuáxín tí xroon í la ko kjaxín tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon í kíxín ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá la ko kjaxín tí yato Nchakuen ch'án tjejó tí trono t'etoanxín ch'án mé tjanjon kjuaxróxin. ⁵ La ko kjaxín kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxín xechón kjónté tsík'en kíxín tjetooan ch'án kíxín t'etuenhen ch'án kjónté kaín tí sín rey la ko tí sín t'etoan síin chjasintajni. Jehe ch'án mé tjuéheni ch'án la ko tí ijnjé ch'án mé k'uíjmaxinni kaín tí jie chótani. ⁶ Jehe ch'án mé tsikjanjon kjuachaxín tsík'ónani nchat'á kíxín sich'eheni xra It'éni Dios. Tí kjuachaxín kuénte ch'án me ts'etoan jnkochr'ín. Mé xikaha tsoxiteyá. Amén.

⁷ Ts'íkon chojni kíxín Cristo la ó tsí chríkjan tjuj. Kaín chojni ts'íkon ch'án la ko kjaxín tí sín k'uékónínkakonhen tí jehe ch'án tsikjinchekjasóte sín ch'án mé ts'íkon sín ch'án la ko kaín chojni chjasin síin chjasintajni tsotsjanka sín tió ts'íkon sín tí jehe ch'án. Mé xikaha tsonhen. Amén.

⁸ Janhan mé tí xrankíxín la ko tí tsjixín éxí tí letra xrankíxín A la tsjixín Zeta. Mé xikaha ichro Inchéni Dios, tí nkexro imá t'etoan. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá.

Ch'ín Juan tsík'íkon ch'án kíxín Cristo chónka kjuachaxín

⁹ Janhan Juan mé ijnko kichó tí jahará mé tjékjan Jesús la ko tí kjuachaxín kuénte Dios chonta la mé jahará la ko jeheni jnkokón tjejótasóteni la jehe ch'án tjinkitsani kíxín tsjachani. Kjuakua itén Dios éxí chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yaon xraxinkakonxíni Inchéni la ikui kjuachaxín Nchakuen Dios tí tjeñ tí janhan la kujnhan kíxín nóton tí janhan ijnko nkexro nixja imá itsen éxí itén ijnko trompeta. ¹¹ Mé ntácho ch'án kíxín:

—Janhan mé tí xrankíxín la ko tí tsjixín éxí tí letra xrankíxín A la tsjixín Zeta. Mé tsokjian jaha ijnko xroon kaín tí nkehe k'uíkuan kíxín tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjaha kíxín nkexro itén tí tjenixjana ntá xrinahya k'uíkuan yato candelero tsík'óna chica oro. ¹³ A ntá chríkjan tí yato candelero k'uíkuan ijnko nkexro éxí yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsík'óyóhe toté ch'án la ko mé chónka ijnko cinta jehó oro tjenkáni ntaquin ch'án. ¹⁴ Tí kaxjhi ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe. ¹⁵ Ntá tí toté ch'án la éxí chica sine tjákini na ntá tsík'axrxéjin tja. A ntá tí itén ch'án la itsen éxí tóvéntó nchónhya ntario. ¹⁶ A ntá tí tja ch'án chjina mé chónka yato konotsé. A ntá tí ir'va ch'án k'uaxrxéjin chica espada iyo, yánjin taté. A ntá imá tjákini tsjehe ikon ch'án la éxí yaon t'inkaséyanxín imá.

¹⁷ A ntá tí k'uíkuan xikaha la kjuachr'itsinka toté ch'án éxí tsík'énna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntácho ch'án kíxín:

—Chrakonhya jaha. Janhan mé tí xrankíxín la ko tí tsjixín. ¹⁸ Janhan tí nkexro tjechón. Ik'uén, a ntá ijie la tjéchuán inaá la itjén jnkochr'ín. Amén. Janhan chonta llave kuénte chojni its'en la ko kuénte tí síin tí sín tsík'en. ¹⁹ Méxra ikjian jaha tí nkehe k'uíkuan mé tí nkehe síin ijie la ko tí nkehe tsonhen chr'éxin. ²⁰ Ninxeró k'uékiexínhya nkexrí t'axrxéjin tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrxéjin kíxín tí yato ángel t'ayakonhen tí yato nínko la ko tí yato candelero k'uíkuan me kjaxín t'axrxéjin tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí nínko Éfeso: "Xíkaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsik'óna oro. Ntáchro xíkahi: ² Janhan nõna kaín tí xra ch'erá la ko nõna kixin tóxrjíanhyará tí sín jínahya. Janhan la ó nõna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. ³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá njna la ko nunca kóxrjéhyará. ⁴ Kjánchó tjánchiá ijnko jie tí jahará kixin tinkachónkihyará éxi kjuankixixínra k'uétjuanará. ⁵ Méxra chróxráinkáonrá kixin ó kujtohérá tí k'uétjuanará la ntá chrókuínkirá tí nkehe tjenkayáxinrá la ko chrókuich'erá xra éxi tí kjuankixixínra. A ntá tí náhi, la tjoka tsjasán la tsjakíyan tí candelero tí tjejórá tí nunca tsjínkihyará tí nkehe jínahya tjenkayáxinrá la tí tsokjanhyará tsóxráinkáonrá Dios. ⁶ Kjánchó chrókónohará kixin tóxrjina tí nkehe tjejóch'erá kixin tóxrjíanhyará tí xra ch'e tí sín nicolaitas kixin kjaxin janhan nínkakonhan tí nkehe ch'e sín. ⁷ Tí nkexro tjínkaon chrókuinhin la chrókuinhin sín tí nkehe nixjehé Nchakuen Dios tí nínko ntáchro kixin: Tí sín tsjacha sinchexiteyana sín la tsotjaha sín kjuachaxin sine sín tí to t'óna tí nta tjanjon kjuachón itjen tí tjen Dios."

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí nínko Esmirna: "Xíkaha ichro tí nkexro xrankixixín la tsjixixín, mé tí nkexro ik'úen la ntá jie tjechón: ⁹ Janhan la ó nõna kaín nkehe tjejóch'erá. Ó nõna kixin nkexrí tjejótsasótiará la ko ó nõna kixin nõará kjánchó jehya. Náhi. Jehe sín mé tójnko tsé sín tí nínké tí Jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntóechiso jnkójín tí jahará kixin tsotsjéxín nkexrí tí jahará ntá t'ichjánxin tsjasótiará iso yaon. Kjánchó chrókujtóhéhyará Dios kjónté chrók'uenrá ntá janhan tsotjehará tí kjuachón chr'éxin. ¹¹ Tí nkexro tjínkaon chrókuinhin la chrókuinhin tí nkehe nixjehé Nchakuen Dios tí nínko: Tí nkexro tsjacha sinchexiteyana sín la í tsjasótehya, la tí yóxin its'en chojni la í ts'enhya tí jehe sín."

Tí tan k'uáyéhe tí sín chjasin Pérgamo

¹² Tsokjian tí nkehe ts'áyéhe tí ángel t'ayakonhen tí nínko Pérgamo: "Mé xíkaha ichro tí nkexro chóna chica espada yánjín taté: ¹³ Janhan ó nõna kaín nkehe tjejóch'erá la ko ó nõna nketi tjejórá kixin tí tjejórá la t'etqan ch'ín Satanás la kjónté la jina kuinkachónkirá tí janhan. Jahará kujtóhéhyará kuinkachónkirá tí janhan kjónté tí yaon tsik'en ch'ín Antipas, ijnko nkexro kjuínchexiteyana jina. Jehe sín tsik'óyánxin sín ch'án tí tjejórá ntíha kixin ntaha t'etqan ch'ín Satanás. ¹⁴ Kjánchó janhan tjánchiá ijnko jie tí jahará kixin iso nkehe ntoáhya ch'erá. Siín ntíha chjasin Pérgamo tí tjejórá iso sín tjínkakonhyá sín tsítqhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kixin tí sín israelita chrókjuasin sín jie chrókjóné sín tí nkehe tsikjokehe sín tí nkehe tsikjanoya la ko chróchóna sín chojni chjín ókjé chrókjuasinko sín jie. ¹⁵ Kjaxin xíkaha tí tjejórá la siín iso sín tjínkakonhyá sín tsítqhe sín tí nkehe tjako tí sín nicolaitas. Janhan mé tjínkakonhyá tí sín a. ¹⁶ Méxra chrókjánra chrókuinkachónkirá Dios. A ntá tí náhi, la tjoka tsjasán tí tjejórá la tsjánjonkianxian sín tí espada t'axrjéxín ir'va. ¹⁷ Tí nkexro tjínkaon chrókuinhin la chrókuinhin sín tí nkehe nixjehé Nchakuen Dios tí nínko ntáchro kixin: Tí nkexro tsjacha sinchexiteyana sín la tsotjaha sín kjuachaxin chrókjóné sín maná tjechónhen la ko tsotjaha sín ijnko xro tjóá la tí xro la ts'inixín ihnjé sín nixin chónhya ninkexró. Jehó tí nkexro ts'áyéhe mé tsonhe."

Tí tan k'uáyéhe tí sín chjasin Tiatura

¹⁸ Tsokjian tí nkehe ts'áyéhe tí ángel t'ayakonhen tí nínko chjasin Tiatura: "Mé xíkaha chro tí Xjeen Dios, tí nkexro ikon éxi yóhe xrohi nene sí'taxrjéxín la ko toté éxi chica sine tjákini tsjehe. ¹⁹ Janhan ó nõna kaín tí nkehe tjejóch'erá la ko ó nõna kixin tjuanará la ko tinkachónkirá tí janhan la ko ó nõna tí xra tjejóch'erá la ko ó nõna kixin tjejóchónhénra tóninkákonhyará. La ko ó nõna kixin qantsi tjejóch'erá xra ijie ntá tí kjuankixixínra la kénhyó. ²⁰ Kjánchó tjánchiá ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntáchro tjan kixin nixja tjan itén Dios kjánchó ch'iehe tjan tí sín ch'ena xra kixin kjaxin sín chrókjuasinko sín jie chojni chjín ókjé la ko chrókjóné sín tí nkehe tsik'óyán sín tsikjokehe sín tí nkehe tsikjanoya. ²¹ A ntá janhan ó kujtohá tjan intsi kixin chrókuínki tjan tí tjenkayáxin tjan kjánchó tjínkakonhyá tjan sich'e tjan xíkaha la tjínkakonhyá tjan chrókuítóhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsoníhi tjan tsjak'eták'a tjan cama la ko kjaxin tsjasóte kaín tí nkexro kjuasinko tjan jie tí nunca tsítqehya sín tí nkehe tjínkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí nínko tsonoxín sín kixin janhan choxian nkehe tónhen asén kaín chojni. A ntá jnkójnko tí jahará la tsjénkahará nkexrí tí xra kjuich'erá. ²⁴ A ntá tí í sorá tjejórá chjasin Tiatura

tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuénte ch'ín Tsochren la xikahó la í tsétuanhyará í jnko xra. ²⁵ A ntá jahará la tí nkehe ó chontará la t'ayakonhénrā hasta tsokjan janhan. ²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuenhen sín kaín nació. ²⁷ Na mé xikaha T'aná mé chjina kjuachaxin tsétuan la kjaxin xikaha jehe sín mé ts'etuenhen sín tí nació yóhe chróchónta sín ijnko chica vara kixin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjaha sín tí konotsé tí tji nchitjen. ²⁹ A ntá tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí njnko chjasin Sardis: “Xikaha ichro tí nkexro chónta yato Nchakuen kuénte Dios la ko chónta tí yato konotsé: Janhan nóna kaín nkehe ch'erá, ó nóna kixin éxi tsík'en tí xra ch'erá kjónté nchehnerá kixin tjejóhónrā. ² T'ayarā. Naxa t'ayakonhénrā kjónté í tsjéhya tí nkehe kuitohe kixin kjaxin tíha mero its'en. Ó k'uikuán kixin tí xra ch'erá la t'ikon tí Dios kuéntana kixin ntoáhya. ³ Chróxráxinkáonrā tí nkehe tsíxrahóhará la ko tíha chrókjuich'erá la chrókjanrā chróxráxinkáonrā Dios. A ntá tí naxa tjejóchrínrā la titáya tsjasán éxi ijnko síchee la tsónoahyarā nkesá tíha. ⁴ Kjánchó naxa sín iso chojni ntaha chjasin Sardis naxa kjuínchekjítahya sín iké sín la jehe sín la ts'ájikjan sín kixin chónta sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'ínkáya sín la ko tsoxikahya ihnjé sín chónta tí libro ts'ínixín ihnjé tí sín tsaá la ko tsochoxian sín nkayakon T'aná la ko nkayakon tí sín ángel kuénte ch'án. ⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí njnko chjasin Filadelfia: “Xikaha ichro tí nkexro tjóá la ko chaxín mé tí nkexro chónta llave kuénte ch'ín rey David. A ntá tí tsakitjehé ch'án puerta la ninkexró tsjachahya ts'íkjéhe, a ntá tí ts'íkjéhe ch'án puerta la ninkexró tsjachahya tsakitjehé. ⁸ Janhan ó nóna kaín nkehe tjejóch'erá. Kjuaké tí tjejórá ijnko puerta xitjehé la ninkexró xitjahya ts'íkjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. ⁹ Tí sín tsíkitekaoon Satanás la ntáchoo sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínki tótará la ntá tsónohe sín kixin chaxín janhan tjuahará. ¹⁰ Ó kuitekáonrā tí nkehe kuétuanhanrā la jina tjejórá la mé xikaha janhan ts'ayakonhanrā tí ichrén nkehe tsónhanrā tíó tsi tí nkehe tsónhen kuénté chjasintajni kixin ó jehí xikaha tsónhen kaín chojni tjejó chjasintajni. ¹¹ Janhan mé tjoka ts'ínka. Méxra t'ayakonhénrā tí nkehe chontará kixin ninkexró chrókuakitsjehará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuénte njnko kuénte Dios kuéntana la nunca xitjahya sáts'ixín sín ntiha. La janhan tsokjian ihnjé tí Dios kuéntana tsjiko sín la ko tsokjian ihnjé chjasén Dios kuéntana mé tí Jerusalén nixín tsixín nkajni tí tjen Dios kuéntana. Kjaxin tsokjian njina nixín tsóhónta sín. ¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí njnko chjasin Laodicea: “Xikaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuich'émaxín Dios kaín nkehe. ¹⁵ Ó nóna kaín nkehe tjejóch'erá. Ó nóna kixin jahará la ní jehya kinrā ó sóará. Chrókóchaxín chrókókinrā ó chrókóchaxín chrókósóará. ¹⁶ A ntá jahará la yásorá la jehya ikinrā la jehya sóará. A ntá ijie ir'va ó tsíkja tí jahará la ts'ítjia. ¹⁷ Ntáchrórā kixin jahará rícorá la imá jina tjejórá la ko ninkehó t'itjáyanhya tí tjejórá, ichrorá. Kjánchó chontahyará kjuachéhe la ko jehya jina tjejórá la ko nóará la ko ntakótánrā la ko tjóchínrā. ¹⁸ Méxra ijie ntáxraxinkáonrā janhan sintakjihará tí nkehe oro náxrxón ts'ík'axrxéjin tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjínhanrā kjuatósuehé kixin í tjóchínhyará. La ko janhan tsjánjuan xroan kolirio tsjiankí ikonrā kixin ts'íkonrā. ¹⁹ Janhan mé tsjéntuáha kaín tí sín tjuaha. Méxra íchá jina chrókjan sín chrókuinkáchónki sín Dios. ²⁰ Tsjehérá janhan itjén ntója puerta, tjé'teya. A ntá njkojin nkexro chrókuinhin tí tanná ntá chrókuakitjehé tí puerta ntá chrók'úxanhan ntóe sín la chrókjónékian sín la ko jehe sín la ko janhan. ²¹ A ntá tí sín chrókjuacha chrókjuínchexiteyána la tsjánjuan kjuachaxin ts'ejóqjan sín tí tétóanxian ntiha la éxi xikaha janhan kjuacha ntá T'aná kjuanjon kjuachaxin tjékjan ch'án tí tjen ch'án t'etóan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

4

Tí sín tjikosáyehe Dios nkaya nkajní

¹ Ntá chr'éxin janhan k'uikuán ijnko puerta tjexrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xrankixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjákohe kaín nkehe tsonhen chr'éxin.

² Ntá tuénxín ikui tí kjuachaxin kuènte Nchakuen Dios k'uayáha ntá k'uikuán tí trono itjen nkaya nkajní ntá ntiha tjetjaxin ijnko nkexro. ³ A ntá tí ch'ín tjetjaxin tí trono mé tjákiní tsjehe éxi ixro jaspe o ixro cornalina. A ntá jnkontatjen tí trono itjen ijnko konchecha tjákiní tsjehe éxi ijnko xro esmeralda. ⁴ A ntá kjaxin jnkontatjen tí trono k'uikuán í so veinticuatro trono kjaxin tjetjótjaxin veinticuatro sín táda, iké sín la tjóá la ko tjejóya kja sín corona tsik'óna chica oro. ⁵ A ntá tí trono kuènte Dios la ntiha sí'axrxjén tí sítjónkixín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxi xroxro tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. ⁷ A ntá tí nkexro tjechón k'uikuán saoxín mé éxi koxra tsjehe. A ntá tí nkexro yóxin tóyóhe éxi koxinta, a ntá tí nkexro nixin tsjehe éxi chojni. A ntá tí noóxin la éxi kotjuanhko xritjaká tsjehe. ⁸ A ntá jnkoinko tí noó nkexro tjejóchón chóna injon kangene sín la chóna nchónhya ikon nóton la ko nkaxenhen, la nchakotjin la ko tie títøehya sín ntáchro sín kixin:

Santo, santo, santo,
Inchéni Dios, jaha chonta kaín kjuachaxin,
jaha xráxin tjen la ko itjen ijie la ko jaha ts'inka inaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjehe sín kjuasáyé tí nkexro tjetjaxin tí trono mé tí nkexro tjechón jnkochrixín. ¹⁰ La ntá tí veinticuatro tí sín táda tjejóxin toh'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochrixín la ko tjakjinjin sín corona tjoka sín tí tjen tí trono la ntáchro sín kixin:

¹¹ Inchéni Dios kuènteni, jaha la imá jina la t'ayéhe kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'ena kaín nkehe síin kixin jaha kóxrjínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uikuán ijnko libro mé tsikjin sín nkaxenhen la ko nóton la ko mé tsikjénin yato sello. ² La k'uikuán ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jina chrókjuacha chrókuakitjehe tí libro la ko chrókóchritøen tí sello chóna?

³ La ninkexró ní nkajní o ní chjasintajni o ní chrínki nonte tsjachahya tsakitjehe tí libro la ní komáhya sín. ⁴ A ntá janhan la imá tsjanka kixin naxa tónoxínhya ninkexró chrókjuacha chrókuakitjehe tí libro o chrókuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjankehya, tsjehé ntihi tí Koxra k'uaxrxjénixin Judá la ko tsik'axrxjénixin rey David. Mé kjuacha la ó tsjacha tsakitjehe tí libro la ko tsóchritøen tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uikuán tjejin toté ijnko Kolélo tsjehe éxi tsik'óyan sín mé chóna yato ntéé la ko yato ikon. A ntá tí kon mé tí yato Nchakuen Dios la táha mé tsik'ítuenhen t'ayakonhen kuènte chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uejóxin toh'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsik'óna chica oro tsikaón chjinco. Tíha mé oración nixjehe Dios kaín tí sín tsikjinchetjóá ch'án. ⁹ Itsje sín nkehe nixin ntáchro kixin:

Jaha mé ijnko nkexro jina kjuacha kuákja tí libro la ko kóchrítuan tí sello; kixin tsik'óyan sín tí jaha la ko tí ijniá k'ueanaxian tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsikjich'énani reyes la ko nchat'á sich'eheni xra Dios kuènteni, la ko jaha tsikjánjuan kjuachaxin ts'etøanni chjasintajni. Mé xikaha ichro sín.

¹¹ Ntá tuénxín k'uíkuan la ko kuñhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsik'óyán sín,
tíha mé kjuacha k'uáyéhe kjuachaxin ts'etóan la ko k'uáyéhe tí nkehe tjete kuénte Dios,
la ko tí kjuaxrexinkaon jína la ko kjuachaxin sich'e xra
la ko mé xikaha tjikosáyehe ni ch'án.

¹³ Kjaxin kuñhan kixin kaín nkehe kjuich'éna Dios síin nkajní la ko chjasintajni la ko tí nkehe síin chrínki nonte la ko kaín nkehe síin ntayaon la kaín tíha mé ntáchro kixin:
Chjéhe ni kjuasáya tí nkexro tjetjaxín tí trono la ko tí Kolélo
kixin chóna kjuachaxin jnkochrixín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejoxin toch'in sín la chjéhe sín kjuasáyé tí nkexro tjechón jnkochrixín.

6

Tiyato sello

¹ A ntá k'uíkuan kixin tí Kolélo kóchrítón tí xránkixixín tí yato sello ntá kuñhan ijnko tí noó tí noó tí sín tjejóchón nixja ch'án éxi kjóna, la ntáchro ch'án kixin:

—Xrákiá tsjehé.

² Ntá k'uíkuan ijnko kokate tjóá. A ntá tí nkexro tjejen tí kokate chóna ch'án ijnko arco tí tja ch'án la tsik'áyéhe ch'án ijnko corona. Jehe ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítón tí yóxin sello ntá kuñhan tí nkexro yóxin tjechón ntáchro kixin:
—Xrákiá tsjehé.

⁴ Ntá sákjuí í jnko kokate kjátse. A ntá tí ch'in tjejen k'uáyéhe ch'án kjuachaxin tsjakjín tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsik'áyéhe ch'án ijnko espada ijíé.

⁵ A ntá tí Kolélo kóchrítón tí nixin sello la ntá kuñhan nixja tí nixin nkexro tjechón ntáchro kixin:

—Xrákiá tsjehé.

Ntá k'uíkuan ijnko kokate tié. A ntá tí nkexro tjejen tí kokate chóna itja ch'án ijnko báscula. ⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuinchek'itjáyanhya tí aceite la ko tí vino. (Tíha mé t'axrxén tsokjinta.)

⁷ A ntá tí Kolélo kóchrítón tí noóxin sello ntá kuñhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uíkuan ijnko kokate sine. A ntá tí ch'in tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsik'en. Jehe ch'án k'uáyéhe kjuachaxin ts'etóan ch'án noóxin parte chjasintajni kixin ntá ts'óyán kichó sín la tsokjinta la ko ts'énxin sín ichin la ko kaín ko jiehe síin chjasintajni mé tsjaya va.

⁹ A ntá tí Kolélo kóchrítón tí n'óxin sello ntá k'uíkuan chrínki tí altar tí asén tí sín tsik'énxin tí tan kuénte Dios tsichrónka sín. ¹⁰ Ntáchro sín itsen kixin:

—Jaha mé Inchéni tjóá jína la jaha mé sinchexiteya tí nkehe tsintáchrúa, ¿la nkesá sinchekitoexián ijíé tí sín síin chjasintajni tsik'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituénhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'énxin sín éxi k'uén tí jehe sín.

¹² A ntá tí Kolélo kóchrítón tí injonxin sello ntá xrínahya imá kuínki nonte. A ntá tí yaon la kótié éxi ika tjiko chojni tsik'en. A ntá nitjó k'óna kjátse éxi jnj. ¹³ A ntá konotsé sit'ánótjenxin nkajní sitjitsínka nonte éxi yóhe tí inta t'óna to higo la sixénjin tí to yoa tió tsjixraya tí nta kixin tí imá fuerte chjéhe xrinto. ¹⁴ A ntá nkajní k'uitjayan éxi ijnko xroon tsixréya. Ntá kaín jna la ko tí nonte ntsínsi síin jnkosiné ntayaon sákjuí ókjé. ¹⁵ A ntá kaín tí sín reyes síin chjasintajni la kjaxin tí sín t'etóan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjó síin nteje ts'ejó máxin sín.

¹⁶ Ntáche sín tí jna la ko tí tjó kixin:

—Xrákiá xrátja tí jeheni nchemáni kixin chrók'uikonhyani tí nkexro t'etóan tjetjaxín trono la ko chrókjuasótehyani tí kjuachrakon jie tsjanjon tí Kolélo.

¹⁷ Kíxin ó kui tí yaon imá jié kuènte kjuachrakon la, çá nkeexo chrókjuacha chrók'uejó ntiha?

7

Tí sín israelita chóna sello

¹ A ntá chr'èxin k'uikuan noó sín ángel tjejóxin toté sín la jnkojnko sín tjejó sín tí chrínta chjasintajni chónetehe sín tí noó xrínto kíxin tsochjéhya xrínto chjini chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uikuan í jnko ángel kjuixín nó tjtóxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyéhe kjuachaxin sincheníhi nonte la ko ntayaon. ³ Ntáchro ch'án kíxin:

—Náhi, sincheníehya nonte la ko ntayaon la ko kjaxin tí nta la náhi tí naça tsíkaha sello totjen tí sín ch'ehe xra Dios kuènteni.

⁴ Kuñhan tí número tí sín tsika sello la me ciento cuarenta y cuatro mil kain tí sín tsík'axrjeníxin tí sín israelita. ⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad ⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés ⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Levi la ko teyó mil tí sín tsíka sello tsík'axrjeníxin Isacar ⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixín tíha ntá k'uikuan nchónhya chojni kaín xín nación la ko kaín xín nkexri tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín. ¹⁰ Kaín sín itsen nixja sín ntáchro sín kíxin: Dios kuènteni mé kjuíncheakaáni.

Jehe ch'án mé tjetjaxín tí trono tí tjen tí Kolélo kjuíncheakaáni.

¹¹ Kaín tí sín ángel tjejóxin toté sín jnkotatjen tí trono la ko jnkotatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios. ¹² Ntáchro sín kíxin:

Amén. Kjuíncheyaonni Dios la tsochjéheni Dios kjuasáya kíxin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kíxin tjinkítsani ch'án jnkochríxin. Amén.

¹³ A ntá ijnko tí sín táda kjuanchankina, ntáchro kíxin:

—A ntá tí sín tjejóya ika tjóá la, çá nkeexo tíha? la ko çá nketí tsík'jixín sín?

¹⁴ Ntá janhan ntáxrjan kíxin:

—Ínchéni, jaha ó noha. Ntá jehe ch'án ntáchro ch'án kíxin:

—Tí sín í tsík'jixín sín tí kjuaxróxinhya k'ué'lejó sín, la tí sín a mé tsíjen sín iké sín la ko tsíkótuáxin íjnje tí Kolélo. ¹⁵ Méxra xíkaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen nínko kuènte ch'án. A ntá tí nkexro tjetjaxín chrítaón tí trono mé t'ayakonhen ch'án sín. ¹⁶ A ntá tí sín a mé ts'enixinhya sín kjinta la ko ts'enixinhya sín ínta la ko tsochjánxinhya sín yaon la ko ní sóa kohya nkehe sich'ehe sín. ¹⁷ Kíxin tí Kolélo tjen jnkosíné tí trono mé t'ayakonhen ch'án tí jehe sín éxi iko kuènte ch'án la ko sájtiko ch'án tí tjáá ntá tjanjon kjuachón la Dios mé sinchexamá kain tí ntakon tí jehe sín.

8

Tí yatóxín sello la ko tí ihnti oro

¹ A ntá tí Kolélo kóchríton tí yatóxín sello kuènte tí libro la ntá kohya ninkehó ruido nkajni chjina it'ó hora. ² Ntá tuénxin k'uikuan yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta. ³ Ntá chr'èxin ikui í jnko ángel xraá ihnti tsík'óna chica oro la kjuák'exin toté nkayakon tí altar. K'uáyéhe ch'án nchónhya chjincó tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono. ⁴ A ntá tí ihnchi kuènte chjincó chríinxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuíncheakaón ch'án xrinta kuènte xrohi kuènte tí altar la ik'ue ch'án chjasintajni. La ntá kjóna la ko nchónhya ruido la ko síjónkíxin la ko kuínkí nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxinhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi tsinkíkjan jni mé xíkaha ikui chrítaón chjasintajni. A ntá iche nixin parte nonte la ko nixin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxi ijnko jnā jíe tjeche la sákjuí kjuánki ntayaon la ntá nixin parte tí ntayaon la k'óna jni. ⁹ A ntá tí nixin parte kaín tí nkehe síin tí ntayaon la ik'uén la ko nixin parte kaín tí ntabárcō la xíka.

¹⁰ A ntá tí nixin ángel k'uánoa trompeta la ntá xríñahya k'uánótjen ijnko konotsé jíe k'uánótjenxin nkajni mé tjeche éxi ijnko xrohi jíe. K'uánótjen chrítaón nixin parte ntario la ko tí sí'taxrje nta. ¹¹ Tí konotsé mé it'in Itsjá la tsíkjaníki nixin parte tí nta ntá kótsjá tí nta la nchónhya chojni ik'uén kixin tí nta xíkaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko nixin parte tí yaon la ko nixin parte tí nitjó la ko nixin parte tí konotsé. Méxra tí nixin parte kuitóhe sítié la í kohya t'inkaséyan tí nixin parte tí nchakotjin la ko tí tie.

¹³ Ntá tuénxin k'uikuán la ko kuínhan ijnko ángel tjetjaká jnkosiné nkajni t'èya ch'án itsen, ntáchro ch'án kixin:

—Nóa tí sín tjejó chjasintajni tíó tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uikuán ijnko konotsé tsik'ánótjenxin nkajni chrítaón chjasintajni ntá k'uáyéhe tí llave kuente tí tóye nínka. ² A ntá tuénxin xitjehe tí tóye nínka ntá ntiha chriínxin nchónhya ihnchi kuente tja ntá tí t'inkaséyanxin yaon la ko tí xrintó k'uúxin tié kixin tí ihnchi kuente tí tóye. ³ A ntá tí ihnchi mé k'uaxrjéxin kochjōa xritjaká chrítaón chjasintajni. A ntá tí kochjōa k'uáyéhe kjuachaxin éxi tí chóna konchjā síin chjasintajni. ⁴ K'uituenhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuente Dios tí totjen mé sincheníhi va. ⁵ Kjánchó k'uáyéhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxi chojni tsíkjinéhe konchjā. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjóté tjinkaon sín chrók'uen sín la tí muerte sátsíkji ókjé.

⁷ A ntá tí kochjōa éxi kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsik'lóna oro la ko tí kàré la tóyóhe éxi kàré chojni. ⁸ A ntá tí kaxree va tsjehe tóyóhe éxi kaxíhi chojni chjin, a ntá tí neno va la tóyóhe neno koxra. ⁹ A ntá tí cuérpōé la tjejanjin nkehe tsik'lóna chica kixin kohya nkehe tsonhen va. A ntá ruido kuente kanéñe la éxi nchónhya carro tinkánkájjen kokate tíó xritinká tí síin kjuanínkaon. ¹⁰ A ntá tí ntané va mé tsjiate chojni la éxi ntané konchjā, la tíha mé tsochóna kjuachaxin sincheníhi chojni hasta in'ó nitjó. ¹¹ A ntá tí kochjōa mé chóna ijnko nkexro t'etgan mé ijnko ángel kuente tí tóye nínka. Tí ángel mé nkíva hebreo mé it'in Abadón la nkíva griego la mé Apolión mé t'axrjéxin kixin táha mé sinche'itjāyan nkehe.

¹² Mé xíkaha kónhen tí kjuachrakon xrankixixín. A ntá naxa t'itjāyan yaá inaá.

¹³ A ntá tí injonxin ángel k'uánoa trompeta la kuínhan ijnko itén nkexro k'uaxrjéxin tí tjejó tí noó ntéé kuente tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóna trompeta kixin:

—Tjasintankehé tí noó ángel kuente tí jínahya tjejóchroé chjinaxón tí ntario jíe it'in Eufrates.

¹⁵ Ntá xíkaha xintankehe tí noó sín ángel kixin ts'óyan sín tí nixin parte chojni. Mé xíkaha yaxínhin sín sátsji sín tí hora la tí yaon la tí nitjó la tí nánó. ¹⁶ Ntá kuínhan tí número tí soldado la ko tí kokate la doscientos millones.

¹⁷ Mé xíkaha xríñahya k'uikuán tí kokate. A ntá tí sín tjejójen kokate la tí ntakuin sín chóna nkehe tsik'lóna chica kjátse la azul la sine. A ntá tí kokate la ikja la éxi kja koxra la tí ir'va la k'uaxrjéxin xrohi la ko ihnchi la ko azufre. ¹⁸ A ntá nixin parte chojni tsik'enxin tí iní clase tí chin tsik'axrjéxin ir'va kokate mé xrohi la ihnchi la azufre. ¹⁹ Tí kjuachaxin chóna tí kokate la k'uaxrjéxin ir'va va la ko tí ntané va. A ntá ntané la éxi konche tsjehe la tí kja va mé sincheníhi chojni.

²⁰ A ntá tí í so chojni kuitóhe k'uénxinhya tí chin a la kjóté kjuinkíhya sín tí nkehe tjenkayáxin sín la kuitóheya sín tinkáchónki sín nchakuen jínahya la ko tí nkehe tsikjanoya chica oro la ko chica plata la ko chica bronce la ko ixrō la ko inta, mé tí nkehe t'ikonhya la ko tienhya la ko tjíhya. ²¹ La kjóté xíkaha la kuitóheya sín tí nkehe jínahya ch'e la ko tí chrók'óyan kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókúeé.

10

Ijnko ángel la ko tí librito nsí

¹ Ntá k'uikuán í jnko ángel imá chonta kjuachaxin k'uínkajinxin nkajní tjenkakjan ch'án tjuj la ko ijnko konchecha chritaón tí ikja ch'án. A ntá tí kàré ch'án imá tjákiní tsjehe éxi yaon, a ntá tí toté la éxi xrohi síchr'ákjen. ² Tjexraá ch'án ijnko libro ntsí tjexrankehe, la ntá toté ch'án chjina la chritaón ntayaon la ntá toté ch'án kjon la chritaón nche. ³ Ntá xrinahya k'uèya ch'án itsen éxi ijnko koxra tsjánka va tí tónínkaon va mé xikaha k'uèya la yato kjóna kjuatéya tí itén ch'án. ⁴ Ntá kjuixin ntáchro tí yato kjóna la chrókjan ntá kuínhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjóna la ko ní chrókjinhya tíha.

⁵ Ntá tuénxín tí ángel k'uikuán ijnko toté tjekjen ntayaon la ijnko toté tjekjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochríxín mé tí nkexro a mé kjuích'éna nkajní la ko chjasintajni la ko ntayaon la ko kaín xín nkehe síin la ntáchro ch'án kixin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxitéya tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchronka sín itén ch'án.

⁸ A ntá tí itén nkexro kuínhan k'uaxrjéxín nkaya nkajní ntá xínixjana inaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chritaón ntayaon la ko chritaón nche.

⁹ Ntá sákjua kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsóxé éxi tsjen kjánchó tí tsaa la tsotsjá.

¹⁰ Ntá kuákjáa tí libro ntsí tjexraá tí ángel ntá kjoné. A ntá ir'va kóxé éxi tsjen ntá chr'éxin la kótsjá nkaya tsena. ¹¹ Ntá tuénxín k'uètuanna ch'án kixin:

—Inaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxi tji tsjehe tsjáchroaxián ntá ntáchro ch'án kixin:

—T'áyá tjáchroa nkaxenhen njnko kuénte Dios la ko tí altar la tékia nkekjáin nkexro tjejó ntiha tinkáchónki Dios. ² Kjánchó tí ntásin itjen ntója njnko la tjáchroahya kixin táha ó tsík'áyéhe tí sín tsíkjinjin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuéntana tsonixjajinxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo í mé iyó nta olivo la ko iyó candelero tjejó tí tjen Ìnchéni kuénte chjasintajni.

⁵ A ntá tí jnkojin sín tjínkaon sich'ehe sín daño la jehe sín la xrohi ts'axrjéxín ir'va sín la tsoche kain tí sín nínkakonhen sín la mé xikaha its'en kain tí sín tjínkaon sich'ehe sín daño tí jehe sín. ⁶ A ntá tí testigo í chóna kjuachaxin ts'íkjehe nkaya nkajní kixin í ts'aniáhya chrin tí tsonixja sín kuénte Dios la ko kjáxin chóna sín kjuachaxin tsonatéhe sín tí ntá kixin ts'óna jni la ko sinchekjasótéxín sín chojni chjasintajni nchónhya clase chin nchónhya veces éxi tí tjínkaon sín. ⁷ A ntá tí kjuixinhin sín tí xra ntá tí ko jiehe ts'axrjéxín tí tóye njnka mé tsjankixin tsjanjonko tí jehe sín ntá tsjacha va ts'óyan va tí jehe sín. ⁸ A ntá tí cuérpóé sín tsitqhe sítsínka tí calle kuénte chjasin jieé tí tsíkjak'enkanı sín Ìnchéni ntacruz mé tí chjasin mé kjáxin nchek'in sín Sodoma la ko Egipto. ⁹ A ntá iní yaon ko t'lo la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'íkon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchronka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'lo la ntá Dios kjuínchexechón tí iyó tí sín a inaá la k'uàya sín inaá la ntá kain chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákiá antsí ntiha.

Ntá chríinxín sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínki nonte la ntá ijnko ite parte chjasin ntiha la k'uújtáyan la yato mil chojni tsík'en kixin tí kuínki nonte. A ntá kaín tí sín xéhe imá chrakon sín la kjuankíxín sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxíkaon la ntá tuénxín itsí tí nínxín kjuachrakon inaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

Ἀ ντά τί σίν κ'υάyéηε κjuachaxin kuènte chjasintajni la ó κjaxin nchexiteyéηε sín

Ἰnchéni Jesucristo

kixin jehe Jesucristo mé ts'etōan ch'án jnkochrixín.

¹⁶ Ἀ ντά τί veinticuatro tí sín táda tjejójtjaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios. ¹⁷ Ntáchro sín kixin:

Tjáhani kjuasáya jaha Ἰnchéni Dios imá chonta kjuachaxin.

Jaha itjen la ko xráxin tjen la ko jaha ts'inka inaá.

Kixin jaha k'uayéηé κjuachaxin jié kixin xráxin tétōan.

¹⁸ Ἀ ντά kaín tí nación kónínkaon,

a ntá ó kui tí yaon jaha sìnchekjasóte sín

la ko κjaxin jaha sìnchekitōexián ijié tí sín tsík'en

la ko tsjénkehé tí sín kjuít'aha xrá chrónkaxín itán

la ko tí sín ó κjuínchetjóá la ko tí sín κjuikosáyehe tí ihniá,

mé tí chojni nteto la ko tí sín chánjan ntsíntsi.

Jaha tjoka sìnchek'itjáyan tí sín chrókjuinçek'itjáyan chjasintajni.

¹⁹ Ἀ ντά xitjeηé tí nñkōe Dios tjen nkaya nkajni, a tí nkaxenhen kónoxín tí caja tjinká tí nkehe tsík'etōan Dios. Ἀ ντά sítjónkixin la ko nchónhya ruido sítjonta la ko kuínki nonte la ko imá tsanká k'uániá toni.

12

Tí chojni chjin la ko tí dragón

¹ Ἀ ντά kónoxín nkajni ijnko kjuaxroan jié mé ijnko chojni chjin iké tjákini éxi yaon tsjehe la chrínki toté tjan itjen nitjó. Ἀ ντά tí kja tjan tjenkáya ijnko corona chóna teyó konotsé.

² Ἀ ντά tí chojni chjin a mé tjejá tjan la t'eya tjan kixin tjeté tjan kixin sìnchekokjilhi tjan xjeen tjan. ³ Kjaxin kónoxín í jnko kjuaxroan nkajni mé ijnko dragón kjátse chóna yato kja la ite ntéé la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé nkánákájen nixin parte konotsé kuènte nkajni la ik'ue chrítaón chjasintajni. Ἀ ντά tí dragón

kjuák'e chók'èxin tí tjen tí chojni chjin mero tsokjilhi xjeen kixin tjínkaon tjoka chrókjōe tí xjan tsokjilhi. ⁵ Ἀ ντά tí xjan κjuínchekokjilhi tjan mé xjan ntoa kixin jehe ch'án mé ts'etuenhen

ch'án kaín nación la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuiko tí tjen ch'án t'etōan ch'án. ⁶ Ἀ ντά tí chojni chjin la kuínka tjan sákjuí tjan

nteje kixin tsíkjincheyóxin Dios nketi sátsji tjan kixin ntaha tsoxranjon nkehe sine tjan mil dos cientos sesenta yaon.

⁷ Ntá chr'èxin xrinahya k'uixín kjuanínkaon jié nkajni la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó κjuachahya tí dragón la kohya lugar kuènte nkaya nkajni. ⁹ Mé xikaha kuakítsjexín sín tí dragón nkajni. Jehe mé tí konche ósé ikjí mé nchek'in sín diablo

la ko Satanás. Jehe mé k'uékjich'iyehé tí chojni kuènté chjasintajni. Jehe la ko tí sín ángel kuènte k'uaxrjexín ntaha la kjuítsinka chjasintajni.

¹⁰ Ntá kuínhan itén ijnko nkexro nkaya nkajni itsen nixja ntáchro kixin:

—Ó kui tí tsaáxinni tí κjuachaxién tí Dios kuènténi la ko tí κjuachaxin t'etōan Cristo kixin ó k'uaxrjexín nkajni tí nkexro t'eka jié tí kichó ni mé kjuanchia jié nchakotjin la ko tie nkayakon Dios kuènténi. ¹¹ Tí sín kichó ni la kjuacha sín kuaáxin sín kixin tí ijnié

tí Kolélo k'uitji la ko kixin jehe sín chrónkaxín sín tí tan tsík'áyéhé sín la chrakonhya sín kjónté chrók'uenxín sín. ¹² Ἀ ντά jie la tócháhará kaín rá tjejorá nkajni. Ntá nóa tí sín tjejó chjasintajni la ko ntayaon kixin k'uínkajin tí ch'ín diablo la imá nínkaon ch'án kixin ó nohe

ch'án kixin í kánhyó sé tsjak'e ch'án.

¹³ Ntá tí ch'ín dragón ó nohe kixin k'uánótjenxin nkajni ikui chjasintajni ntá sákjuíchréhe tí chojni chjin chóna tí xjan ntoa kixin chrókjuinçek'itjáyan tjan. ¹⁴ Kjánchó tí chojni chjin k'uáyéηé yaá kanēēē kuènte kotjuanhnko ijié kixin jina tsjaká tjan sátsji nteje kixin ntá ikjin tsitōhe tí konche. Sátsji tjan kixin ntaha tsoxranjon nkehe sine tjan ini nánó ko t'ō. ¹⁵ Ἀ ντά tí konche mé k'uaxrjexín ntá ir'va kixin ts'óna ijnko ntario kixin tjínkaon va chrók'uatjōáko tí tjan a tí ntá a. ¹⁶ Ἀ ντά tí nonte κjuínkítsa tí tjan a kixin xitjeηé ir'va nonte la kaín tí ntá k'uaxrjexín ir'va tí konche la ntahó sákjuí k'uixenhen. ¹⁷ Ἀ ντά tí dragón la imá kónínkakonhen tí tjan a ná imá kónínkaon kjuánjonko tí í so sín naxa kjéhya tí tjan a kixin naxa titekaon sín

tí nkehe tsík'etōan Dios la naxa tinkáchónki sín tí nkehe tsíchrónka Jesucristo.

13

Tí yaá bestia

¹ Tí κjuak'é chrínta ntayaon ntá ntaha k'uikuān chriinxín ijnko bestia chóna yato kja la ko ite ntéé chojni t'ántaxínjin Dios. ² Tí bestia k'uikuān mé tóyōhē kotigre la chóna toté éxi toté

ko oso la ko tí ir'va la éxi ir'va koxra. Tí dragón kjuanjon kjuachaxin imá ts'et'oan tí bestia a. ³ A ntá ijnko kja tí bestia chóna ijnko tsichrít'ò jíé chóna chrók'uénxín ntá tsíkitohe jina ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kixin:

—Xá nkexro chrók'óyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontáchro kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjé. ⁶ Ntá mé xikaha kjuich'e k'uántaxínhin Dios la ko k'uántaxínhin ihnjé Dios la ko k'uántaxínhin tí nínko tjen nkaya nkajni la ko kaín tí sín tjejó ntiha. ⁷ Kjaxin tsik'áyéhe kjuachaxin tsjanjonko tí sín tinkáchonki Dios hasta tsjacha ts'etuénhen tí sín ntá k'uáyéhe kjuachaxin ts'etuénhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nació. ⁸ A ntá tí bestia mé kaín xín chojni síin chjasintajni mé tsjikosáyehe sín tí bestia. Tí chojni a mé ts'inixínhya ihnjé tí k'óna chjasintajni, mé ts'inixínhya ihnjé sín tí libro ts'inixín ihnjé tí sín tsaá. Tí xroon a mé chóna tí Kolélo tsik'óyán sín.

⁹ La jnkojin nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehe í so chojni la kjaxin ch'an ts'ikjehe ch'an la tí nkexro tsjayaxin espada la kjaxin espada ts'énxín. A ntá tí nkexro tinkáchonki Dios la t'ichjánxin tsonínakonhya la ko tsochóna fe.

¹¹ A ntá chr'éxin k'uikuan í jnko bestia k'uaxrxéjin nonte, chóna yaá ntéé éxi tsjehe ntéé coronta la mé nixja éxi nixja tí dragón. ¹² Tí bestia la chóna kaín xín kjuachaxin éxi k'uéchóna tí bestia saoxín tí k'ué la t'etuénhen tí sín síin chjasintajni kixin tinkáchonki sín tí bestia saoxín mé tí bestia tsichrít'ò kja ntá tsíkitohe jíina. ¹³ Kjaxin kjuasin kjuaxroan jíé hasta xrohi k'uánótjénxin nkajni ikui nonte ntá nchónhya chojni k'uikoxín kon sín kixin xikaha kónhen. ¹⁴ Mé xikaha tí bestia tsik'áyéhe kjuachaxin kjuasin kjuaxroan tí tjen tí bestia saoxín la kjuich'iyehé nchónhya chojni síin chjasintajni. La ntá k'uetuénhen tí sín síin chjasintajni sich'éna sín ijnko nkehe tsikjanoya éxi yóhe tsjehe tí bestia tsichrít'oxín espada la kjónté xikaha naxa kjuak'echón. ¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsikjanoya tóyóhe tí bestia saoxín kixin ntá tí nkehe tsikjanoya la jina tsonixja la ko jina ts'et'oan its'en kaín nkexro tinkáchonkihya tí jehe. ¹⁶ Kjaxin ts'et'oan kixin kaín chojni tsochóna marca, á chojni hyé o chojni ntsintsí, la á chojni rico, la á chojni nòla la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chónthaha sín marca o ihnjé tí bestia o chónthaha sín número kuente ihnjé tí bestia. ¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uikuan tí Kolélo tjexín toté chrítaón tí jna Jerusalén. Jehe ch'an tjeko ch'an ciento cuarenta y cuatro mil chojni ts'inixín totjen sín ihnjé tí Kolélo la ko ihnjé It'é ch'an. ² Ntá tuénxín kuínhan ijnko itén nkexro kuixín nkaya nkajni mé ijnko ruido éxi nchónhya ntárió la ruido éxi sitjonta itsen la éxi ijnko ruido nchónhya chojni it'ín sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchónthaha sín itsjé chojni chjin la tjóá sín la chréhe sín tí Kolélo kjónté nketi k'uáji. Tí sín a mé kuaá sín tí k'uék'ixín chojni k'uék'jasin jie la ko tí sín a mé éxi ijnko ofrenda xrankixín k'uáyéhe Dios la ko tí Kolélo kjaxin. ⁵ Kónoxínhya ninkehó kjuach'ia k'uaxrxénhya ir'va sín. La tí sín la ninkehó jie chónthaha sín tí tjejó sín nkayakon tí trono kuente Dios.

Tí nkehe chrónka tí iní ángel

⁶ A ntá k'uikuan í jnko ángel tjetjaká jnkosiné nkajni chrónka tí tan tsaáxinni jnkochrínxín tsinhín tí sín síin chjasintajni, mé tsinhín kaín nació la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chrórxáinkáonrá Dios la chróchjehérá ch'an kjuasáya kixin ó kjuixraká tí yaon sinchekitoxén ch'an ijje chojni. Tjikosáyeherá ch'an kixin jehe ch'an kjuich'éna ch'an nkajni la ko chjasintajni la ko ntáyaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixín kjuítsínka, ó kjuixín kjuítsínka tí chjasin jie Babilonia. Mé ntiha kuixín tí vino kókuaxín sín kaín nació ntá kjuasin sín jie chóna sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótéxín sín kujxin tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótéxín sín tí xrohi la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótéxín sín síchriin jnkochrínin la tí sín a kuinkáchónki tí bestia la ko tí nkehe tsíkjanoya kuènte o chóna sín ihnéti kuènte. ¹² A ntá tí sín tinkáchónki Dios la kuítekaon sín tí nkehe k'uətoan ch'án la ko naxa jína tinkáchónki sín Jesús mé t'ichjánxin chrókuíteheya sín titekaon sín ch'án.

¹³ Ntá kujnhan itén ijnko nkexro kujxin nkajni ntáχρο kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxin kixin tinkáchónki sín Ìnchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuíuch'e sín xra la tí xra kjuíuch'e sín mé kjuacha sín.

Tí nkehe tsík'óna chjasintajni

¹⁴ Ntá xrinahya k'uíkuan ijnko tjuj tjóá la chrítaón tí tjuj tjetjxin ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexaa ch'án. ¹⁵ A ntá nkaxenhen njnko mé k'uaxrjéxín í jnko ángel itsen nixja ch'án nixjehe ch'án tí nkexro tjetjxin chrítaón tjuj ntáχρο ch'án kixin:

—Tjankíxian tətəxian chica hoz kixin ó kjuixraká tí yaon tsojtá tí nkehe siin chjasintajni kixin tí nkehe tsík'óna chjasintajni la ó tsicha.

¹⁶ Ntá tuénxín tí nkexro tjetjxin chrítaón tjuj ntá kjuínček'átsínka ch'án chica hoz kuénté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjéxín í jnko ángel tí njnko tjen nkaya nkajni la kjaxin sákjuiko ch'án ijnko chica hoz imá taté. ¹⁸ Ntá sákjuíxín í jnko ángel tí tjen altar la chóna ch'án kjuachaxin kuènte xrohi la itsen k'uíyehé ch'án tí nkexro chóna tí chica hoz imá taté la ntáχρο ch'án kixin:

—Tjankíxian tətəxian tí chica hoz taté la tjankíxian itjá tí racimos to uva tsík'óna chjasintajni kixin ó tsichjé to —ichro ch'án.

¹⁹ A ntá tí ángel kjuínček'átsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tját'o ts'ényaxín sín to. Tíha mé t'axrjéxín kixin xikaha Dios sinchejasóte chojni. ²⁰ A ntá tí to uva tsík'ényaxín sín tját'o tí ikon chjasin a ntá tí tját'o a mé k'uaxrjéxín nchónhya jni noixín éxi tí freno tjnká ir'va kokəte la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uíkuan tí nkajni í jnko kjuaxroan jié mé ijnko kjuachrakon: mé tí yato sín ángel kujkəo tí yato chin tsjixixín tsonéxín chojni. Tíha mé tí kjuanínkaon kuènte Dios tsjixixín.

² Kjaxin k'uíkuan ijnko nkehe tóyóhe ijnko ntayaon tsík'óna éxi xrosəntə sínkíkjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnéti tí bestia mé tjejóxin toté sín chjinaxón ntayaon tsík'óna éxi xrosəntə la ko chóna sín isón arpa tsikjanjon Dios tsík'áyéhe sín. ³ Itsje sín isón k'uétsje ch'ín Moisés, tí nkexro kjuíuch'ehe xra Dios la ko isón kuènte tí Kolélo la mé ntáχρο kixin: Imá ijie tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'ətoan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuénté chjasintajni tsjikosáyehe sín tí jaha

kixin k'uíkon sín tí xra tsíkjich'e la jína tíha.

⁵ Kjuixín tíha la k'uíkuan nkajni tjebrankehe tí njnko la ko tí cuarto tjóá t'inkachjina tí nkehe tsík'ətoan Dios. ⁶ A ntá tí njnko a k'uaxrjéxín yato ángel kujkəo yato chin. Tí iké sín la ika tjehe tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóxon mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsikaón tí nkehe tsjasótéxín chojni kujxin tí tjen Dios tí nkexro tjechón jnkochrínin. ⁸ A ntá tí nkaxenhen njnko la tsikaón ihnchi kujxin tí kjuachaxin jié kuènte Dios la njnko nkexro xitjahya ts'ixenhen ntiha tsjixinjian ts'átsínka tí yato tí chin kujkəo tí yato ángel.

16

Tí copa tjnká nkehe tsjasótéxín chojni

¹ Ntá kuñhan ijnko itén ijnko nkexro imá itsen k'uaxrjéxín nkaxenhen nínko, ntáche tí yato sín ángel káxin:

—Sátjia tikákanjian chrítaón chjasintajni tí nkehe tjía tí yato copa la táha mé tsjasótéxín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxi ijnié ijnko chojni tsík'óyán kichó la kaín ko sinkánki ntayaon ik'uén.

⁴ A ntá tí nixin ángel sákjuik'itji tí nkehe tjía copa chrítaón ijnko ntario la ko chrítaón tí ntá sit'axrje tòye, la ntá tí ntá k'óna jni. ⁵ Ntá tuénxín kuñhan nixja tí ángel kuènte ntá ntáχρο káxin:

—Jaha mé ijnko nkexro jína káxin kjuínchekitoexián ijie chojni. Ichéni jaha ijnko Dios jína, óse tjen la ko naça tjen ijie ⁶ káxin jehe sín k'óyán tí sín tinkáchónki tí jaha la ko tí sín tsíchronka itan la ntá jaha Inchéni chjehé sín ijni its'i sín káxin mé xíkaha sitjasóte tí jehe sín.

⁷ Kjaxin kuñhan nó altar ijnko nkexro ntáχρο káxin:

—Chaxín Inchéni Dios, jaha mé chonta kaín kjuachaxin la ntoá jína kjuínchekitoexián tí ijie a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tosóa káxin tsochjánxin chojni tí sóa kuènte. ⁹ A ntá kaín chojni chjánxin tí imá sóa kuènte yaon la k'uántaxínhín sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjía copa chrítaón tí trono t'etoxánxín tí bestia. A ntá kaín tí k'uéchóna kjuachaxin k'uék'etoxán tí bestia la k'uixín tié. A ntá tí chojni a la netja nejen sín káxin tjetéhe sín. ¹¹ La kjónté xíkaha la kjuinkíhya sín tí nkehe jínahya ch'e sín. Náhí. Íchá má k'uántaxínhín sín Dios tjen nkaya nkajni káxin tjetéhe sín káxin xíkaha kónhen sín.

¹² A ntá tí injoxín ángel sákjuik'itji tí nkehe tjía copa chrítaón ijnko ntario jie it'in Eufrates. A ntá tí ntario la kjuixié káxin jína tsakitjehe sín ijnko ntja tsjixín tí sín rey tsjixín nó tjitoxín yaon.

¹³ A ntá k'uikuán káxin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjéxín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchekójkotsé kaín rey siín chjasintajni káxin tsjanjón sín ijnko yaon jie kuènte Dios chóna kaín kjuachaxin. ¹⁵ “Tsjehe, janhan titáya ts'inké éxi ijnko xíche. Chéhe tí nkexro tjejótsjehe la t'ayakonhen tí iké káxin ts'itjáyanhya káxin chrók'uajihya sín tjóchin sín la chrókósuéhya sín káxin chrókónoxín káxin tjóchin sín.” ¹⁶ A ntá tsojnkotsé tí sín rey tí nonte it'in Armagedón nkíva Hebreo.

¹⁷ A ntá tí ángel yatoxín sákjuik'itji nkehe tjía copa chrítaón tí xrinto ntá nkaxenhen nínko nkaya nkajni k'uaxrjéxín ijnko itén chojni itsen nixja mé kuixín tí tjen tí trono la ntáχρο káxin:

—Ó kjuixín kónhen tíha.

¹⁸ A ntá sítjónkíxín la ko ruido sítjonta la ntá imá kuínki nonte fuerte. La desde tí kjuankáxin k'uixín chojni chjasintajni la xíkaha kónhen kuínki nonte a ntá jie antsí fuerte kuínki nonte.

¹⁹ A ntá tí chjasin jie xitjehe nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxínkaon káxin chrókjuínchekjasóte tí sín siín tí chjasin jie Babilonia la k'uétoxán ch'án its'i sín tí vino tsjasótéxín sín káxin mé xíkaha kónínkaon ch'án. ²⁰ A ntá kaín tí nonte sinkátaón ntayaon k'uánanki ntá la ko tí jna k'uuitjayan. ²¹ A nta nkajni k'uánótjénxín toni ijie xrátja choni mé cuarenta kilo yexín nkjojnko toni. A ntá chojni na antsí má k'uántaxínhín sín Dios káxin tí xíkaha kónhen sín xrátja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxín ángel chóna tí yato copa la ntáχρο ch'án káxin:

—Xrákiá tsjákoħa nkexrí tsjasóte tí chojni chjin tjasin jie tjetjaxín tjan chrítaón tí nchónhya ntá. ² Tí sín rey t'etoxán chjasintajni kjuasínko tjan jie la ko tí chojni siín chjasintajni kokuaxín sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian netje ntá k'uikuán ijnko chojni chjin tjetjaxín chrítaón ijnko bestia kjátse la kuenté tí ko a la simá ihnié náxrxónhya tsík'ántaxínxín sín Dios la chóna yato kja la ko ite ntèe. ⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrxón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié koħya nkexro

tienxín. “Tíha mé tí chjasin jié Babilonia, mé iné tí chojni chjin tjasin jié la ko kain chojni jínahya ch'e síin chjasintajni.” ⁶ Ntá kónóna kixin tí tjan a la tsékánxín tí iijné tí sín tinkáchónki Dios la ko tí iijné tí sín tsík'énxín tí chrónka sín kixin tinkáchónki sín Jesús. Ntá k'uíkuan xíkaha imá chrakonna. ⁷ A ntá ijnko ángel ntáchro ch'án kixin:

—¿Nkekuénté chrakuan? Ntá ijie sintonoha tí nkehe tienxínhya chojni kuénte tí tjan a la ko kuénte tí bestia tjejen tjan chóna yato kja la ko ite nté. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrínxín tí tòye núnka ntá chr'éxin ts'itjayan. A ntá tí sín síin chjasintajni ts'ínixínhya ihnjé sín tí libro ts'ínixín ihnjé chojni tsaá desde k'óna chjasintajni, la mé jehe sín tsochrakon sín tió ts'íkon sín tí bestia kjuák'e ósé la tsík'en la ntá ijie xikjan inaá.

⁹ Tí jnkójin nkexro chrókiénxín la mé tí yato kja la t'axrjéxin yato jna tjejen tí chojni a. ¹⁰ A ntá tí kja kjaxin t'axrjéxin yato rey la ntá in'ó tí sín rey la í t'etuanhya sín ijie la ijnko tí jehe sín t'etóan ijie la í jnko naxa tjihya. A ntá tió tsji tí yatóxín la í kánhyó sé ts'etóan. ¹¹ A ntá tí bestia kjuák'e senó la ijie tjechónhya mé tí jnixín rey la jehe ch'án kuénte tí yato rey la chr'éxin la ts'itjayan.

¹² A ntá tí ite ntéé tsík'íkuan mé ite rey naxa t'etuanhya. A ntá ijie la ts'áyéhe sín kjuachaxin ts'etóanko tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxin kuénte sín kixin ts'etóan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etóan kixin jehe ch'án mé Inché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehé Dios la tsík'eyá ch'án sín la jina nchexiteyá sín.

¹⁵ Kjaxin ntáchro tí ch'ín ángel kixin:

—Tí ntá k'uíkuan la chrítaón tjetjaxín tí chojni chjin tjasin jié la mé t'axrjéxin kixin nchónhya chjasin la ko nchónhya chojni la ko nchónhya nación la ko nchónhya nkíva. ¹⁶ A ntá tí bestia k'uíkuan la ko tí ite ntéé la tíha mé tsonínkakonhen tí tjan tjasin jié la tsitóhe tjan tjóchin tjan la sine tí bestia tí nto chóna cuérpóé tjan la ko tsoche tí huésóé tjan. ¹⁷ Dios tsík'etuenhen asén sín kixin xíkaha sich'e sín éxi tjínkaon ch'án kixin jnkokoá tsjenkayáxin sín la ko tsjanjon sín kjuachaxin kuénte tí sín rey kixin ts'etóan tí bestia tsoxiteyáxia tí nkehe tsintáchro Dios. ¹⁸ A ntá tí chojni chjin k'uíkuan la táha mé tí chjasin jié t'etóan tí sín rey t'etóan chjasintajni.

18

Kjuítsínka chjasin Babilonia

¹ Ntá chr'éxin k'uíkuan í jnko ángel k'uínkajinxín nkajni chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án. ² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jié Babilonia. Ntá tí jínahya ó kjuacha k'uíxénhen t'etóan ntiha la ntiha síin kaín xín clase nchakuen jínahya la ko síin kaké ko xritjaká tjuáhya la ko jínahya. ³ A ntá kaín xín nación kókuaxín tí vino kjuínchekji tjan ntá kjuasinko tjan sín jié la ko tí sín rey t'etóan chjasintajni kjaxin kjuasinko tjan jié. La tí sín nchekji nkehe chjasintajni kórikoxín sín kixin k'uena tjan nchónhya nkehe.

⁴ Ntá kuñhan í jnko itén nkexro kuñxín nkaya nkajni ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uicahyará tí ijie sín la ko chrókjuasótéxínhyará tí nkehe tsonhen sín. ⁵ Kixin tí nchónhya jié tinkák'ánki hasta kjuixraká nkajni la Dios ó nohe tí jié chóna sín. ⁶ Ch'eherá tjan éxi tí jehe tjan kjuich'ehe tjan í so chojni kixin xíkaha tsjasótéxín tjan. Chrókjuenkehérá tjan iyó veces éxi tí tsík'ich'éna tjan ik'ui í so chojni. ⁷ Antsí chrókjuasóte tjan tóyóhe tí nkehe kjuich'e tjan kixin kjuínchekje tjan la ko k'uéchóna tjan kaín nkehe tóxrjnhjín tjan. Jehe tjan ntáche asén tjan kixin: “Ntíhi tjetjaxian éxi ijnko reina. Jehya ik'ána kixin chrókjuasótena.” ⁸ Mé xíkaha kjaxin jnkokoá yaon itsí tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kixin Inchéni imá chóna kjuachaxin la jehe ch'án sinchekjasóte ch'án tjan.

⁹ A ntá tí sín rey síin chjasintajni tsíkjasinko sín tjan jié la ko nchónhya nkehe kjuínchexenko sín tjan la mé tsotsjánka sín la ts'eya sín tió ts'íkon sín ts'aya ihnchi tió tsoche tjan. ¹⁰ Ntá jehe sín tsitóhe sín ikjín kixin chrakon sín kixin xíkaha tsjasóte tjan la tsontáchro sín kixin:

—Nóa tí jaha chjasin jié Babilonia, chjasin imá t'etóan kixin titáya kjuasótia.

¹¹ Tí sín xrinchekji nkehe la kjaxin tsjánka sín, t'eya sín kixin xíkaha kónhen tí chjasin ntiha kixin kohya nkexro ts'enghe sín tí nkehe sinchekji sín. ¹² Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjáse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroqan xraxé náxrjón la ko chjincó la ko xroqan mirra la ko crema la ko vino la ko

aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekeji sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjáyán kaín nkehe náxrjón tjete k'uéchonta.

¹⁵ Tí sín k'uékjinchekeji tí nkehe la kóricó sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín ¹⁶ la tsontácho sín kixin:

—Nòa tí chjasin jié. Éxí ijnko chojni chjin tsik'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etóan tí ntabárcó la ko tí sín tsik'ixenhen tí ntabárcó la ko tí sín ch'e xra chrítaón ntayon kuítóhe sín ikjín ¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié í?

¹⁹ La tjikjanjin kja sín nche la tsjánka sín t'èya sín kixin:

—Nòa tí chjasin jié. Kóricó tí sín k'uéchónta ntabárcó chrítaón ntayon kixin tí chjasin í la ntá jnkorató koá kjuixin k'uitjáyán tí nkehe chóna sín.

²⁰ A ntá jahará tjejórá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchekejasóte tí chjasin a kixin tí jié kjuasin sín kjuínchekejasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayon la ntá ntácho ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninxeró xitjahya sích'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsótehe chojni ntiha. Tí sín k'uékjinchekeji nkehe ntiha la imá k'uék'etóan kuènte chjasintajni la tí sín k'uékjich'iyehé tí sín siín chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsikónoxín ijnié tí sín tsik'en k'uéchronka itén Dios la ko tí sín tinkáchónki tí jehe ch'án la ko kain tí sín tsik'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntácho sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuènteni.

² Kixin jehe ch'án ntóá kjuínchekejasóte ch'án tí tjan kjuasin nchónhya jié kixin jehe tjan kjuachroe tjan chojni siín chjasintajni kixin tí nkehe jínahya k'uékjich'e tjan. Dios kjuínchekejasóte tjan kixin k'óyán tjan tí sín k'uékjich'ehe ch'án xra.

³ La ntá kjaxín inaá xintácho kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chriin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjaxín tí trono la ntácho sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntácho kixin:

Chjehérá kjuasáya tí Dios kuènteni kaín rá ch'ehérá ch'án xra la kuítékákonhénra ch'án,

mé kaín tí jahará kjónte chánjan ntsíntí o chojni nteto.

Tí kia tsótehe tí Kolélo

⁶ Kjaxin kuínhan nkehe éxí itén nchónhya chojni éxí nchónhya ntárió sítóvéntó la ko imá itsen sítjonta la ntácho kixin:

¡Aleluya! Kjuasáyé Ìnchéni ó kjuankixin t'etóan Ìnchéni Dios kuènteni chóna kaín kjuachaxin.

⁷ Chrókóchéhéní la chrókuikosáyeheni Dios

kixin ó kjuixraká tí yaon ts'ixin kia kuènte Kolélo.

La tí tjan tsótehe la tsikóyaxínhin tjechónhen,

⁸ mé tsik'áyéhe kjuachaxin tsik'itsa ka lino náxrjón tjóá tjákiní.

A ntá tí ka lino náxrjón a mé t'axrjéxin kixin tí jina k'uéjó tí sín tinkáchónki Dios.

⁹ Ntá tí ch'ín ángel k'uetoan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsótehe tí Kolélo.”

Ἀ ντά ντάχρο χ'án inaá kíxin:

—Tí palabra a mé chaxín ntoá nixja Dios.

¹⁰ Ntá kjuak'éxian toçh'ian toté tí ángel kíxin chrókjuikosáyaha ch'án, kjánchó jehe ch'án ntáχρο ch'án kíxin:

—Xikahya chrokjuich'e kíxin janhan kjaxian t'aha xra Dios éxí tí jaha la ko éxí tí sín kíchua kuíteghya kuítekaon tí tan jina chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uikuan kíxin nkajní tjaxrankehe la ntaha kónoxin ijnko kokate tjóá la ko tí nkexro tjekjen va mé it'in Jína la ko Chaxín kíxin ntoá kjuínchekitogéxin ch'án ijíé chojni la ko ntoá kjuánjonko ch'án chojni. ¹² Ἀ ντά tí ikon ch'án mé tjákini éxí xrohi nene xikaha tsjehe. Ἀ ντά tí kja ch'án la chóna nchónhya corona la ko ts'ínixín ijnko ihníé ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihníé ch'án mé Itan Kuénte Dios. ¹⁴ Chréhe tí sín soldado kuénte nkajní. Iké sín mé ka lino náxrjón tjóá la tjejójen sín kokate tjóá. ¹⁵ Ir'va tí jehe ch'án k'uaxrjéxin espada imá taté kíxin táha mé tsjik'óyánxin ch'án tí sín siín kaín nación la ko ts'etogánxin ch'án ijnko chüca vara. Jehe ch'án mé sinchekitogéxin ch'án ijíé sín éxí t'énxin sín to uva toté sín mé xikaha ts'etuénhen ch'án kíxin its'i sín vino tsjasótéxin sín kíxin mé xikaha tsixín tí kjuánkaon kuénte Dios chóna kaín kjuachaxin. ¹⁶ Iké ch'án mé ts'ínixín kíxin jehe ch'án me Rey t'etuénhen kaín rey la ko jehe ch'án mé Ínché kain chojni.

¹⁷ Ntá tuénxin k'uikuan ijnko ángel tjaxín toté tí tjen yaon la k'uéyato ch'án itsen k'uéyatohe ch'án tí ko xritjaká, ntáχρο ch'án kíxin:

—Xrákirá tójkotsérá ntihi kíxin Dios tsjanjon nkehe sinterá ijie. ¹⁸ Sinterá cuerpo kuénte reyes la ko sinterá cuerpo kuénte tí sín comandante la ko cuerpo kuénte chojni jjehe la ko ntog kokate la ko cuerpo kuénte tí sín tsikjiták'á va la ko cuerpo kuénte kaín chojni libre o chojni ch'exón xra la chojni hyé o chojni ntánsi.

¹⁹ K'uikuan tí bestia la ko tí sín reyes t'etogán chjasintajni la ko tí soldado kuénte sín, tsikójkotsé sín tsjanjonko sín tí nkexro tjekjen kokate la ko koi tí sín soldado kuénte ch'án. ²⁰ Ἀ ντά itsé sín tí bestia kíxin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'án tí sín tsikítóhe tsíka marca kuénte tí bestia la ko kjuikosáyehé sín tí nkehe tsikjanoya kuénte tí bestia. Ntá tí bestia la ko tí nkexro ntoáhya kjuako itén Dios mé k'uítuennen sín sátsji tí siín xrohi tsoche tjejóchónxin sín tsochéxin azufre. ²¹ Ἀ ντά tí í so sín la ts'énxin tí espada k'uaxrjéxin tí ir'va tí nkexro tjekjen tí kokate tjóá la kaín ko xritjaká ts'ixín tí siín tí cuerpo kuénte tí jehe sín la hasta tsokjehe va sine va.

20

Tí mil nánó

¹ Ntá xrináhya k'uikuan ijnko ángel k'uínkajinxín nkajní tjaxraá llave kuénte tí tóye njnka la ko ijnko cadena jíé tjaxraá ch'án. ² Ἀ ντά tí ángel a itsé tí dragón mé tí konche ósé kjí mé tíha tí ch'in diablo la ko Satanás la kjuak'echroé ch'án ijnko mil nánó. ³ Ich'án ch'án sákjuí tóye njnka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni siín kaín nación hasta chrók'uatánsinkajia tí mil nánó. Ἀ ντά ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxin k'uikuan tí trono la ko tí sín tjejótxajín tsík'áyéhe sín kjuachaxin sinchekitogéxin ijíé chojni. Kjaxin k'uikuan asén chojni tsíchrimjin kja kíxin kuítekaon sín Jesús la ko tsíchrónkaxin sín itén Dios. Jehe sín la kuínkáchónkihya sín tí bestia la ko tí nkehe tsikjanoya kuénte la ko kuíteghya sín ikuá sín marca tí totjen sín o tí itja sín. Mé k'uikuan kíxin tsíxechón sín la ko ts'etoganko sín Cristo ijnko mil nánó. ⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. Ἀ ντά tí yóxin chrók'uen sín la tíha chónthaha ninkehó kjuachaxin ikuá xikaha chrókónhen sín. Jehe sín mé ncha't'á kuénte Dios la ko kuénte Cristo la ts'etoganko sín ch'án tí mil nánó.

⁷ Ἀ ντά ts'atsínka tí mil nánó ntá ch'in Satanás tsoxintankehe tí kjíchroé. ⁸ La sátsjikjich'iyehé tí chojni siín kuénté chjasintajni la ko sátsjikjich'iyehé tí chjasin Gog la ko Magog. La tsojnkotsé sín kíxin tsjanjon sín la ko tí soldado kuénte tí jehe sín. Nchónhya sín tsojnkotsé ntiha éxí tí nchesen siín ntayaon. ⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jíé tjehe ch'án. Ἀ ντά xrohi tsixín nkajní kíxin tsochéxin tí sín jínahya ts'itájyanxín sín. ¹⁰ Ἀ ντά tí diablo tsikjich'iyehé tí jehe sín kjaxin sátsji tsochéxin xrohi la ko azufre tí sátsíkji tsíchéxin tí bestia

la ko tí nkebro ntoáhya kjuako itén Dios. Mé ntiha mé tsjasótéxín nchakotjin la ko tie jnkochríxín.

Tsitoxín ijíe chojni tí tjen tí trono jíe tjóá

¹¹ Ntá k'uíkuan ijnko trono jíe tjóá la ko tí nkebro tjetjaxín nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte. ¹² Ntá k'uíkuan tí sín tsík'en; chojni hyé la ko chojni ntsíntí tjejóxín toté sín nkayakon Dios la ntá xitjehe iso libro la ko xitjehe í jnko libro ts'ínixín ihníé tí sín tsaá. Ntiha tsitoxín ijíe chojni tsík'en éxí nixja tí í so libro nkehe tí xra kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuaxín sín la tí sín sátsíkji tí síin chojni tsík'en la ntiha xrakuaxín sín kaín sín tsochjina sín tsitoxín ijíe jnkojnko sín káxin nkebrí tí xra kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihníé sín tí libro ts'ínixín ihníé chojni tsaá.

21

Nkajní nixín la ko nonte nixín

¹ Ntá k'uíkuan ijnko nkajní nixín la ko ijnko nonte nixín káxin tí nkajní saoxín la ko tí nonte saoxin tsík'itjáyán la ko kjaxín kohya ntayaon. ² Janhan Juan k'uíkuan tí chjasin jíe tjóá. Táha mé tí Jerusalén nixín k'uínkajínxín nkajní kuixín tí tjen Dios la kuenté tsíkóyóxín éxí ijnko chojni chjin tsothe tsík'ítsa káxin tsákja tí xí. ³ Ntá kuínhan ijnko itén ijnko nkebro itsen kuixín nkajní ntábro káxin:

— Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntaon sín la í tsokohya nkebro its'en la tsokohya nkebro tsotsjánka la ko ts'áváhya sín la ko tsokohya kjuatjoté káxin kaín tí nkehe k'uékónhen ósé la ó kjuixín k'uátsínka.

⁵ A ntá tí nkebro tjetjaxín tí trono ntábro ch'án káxin:

— Janhan mé t'ána kaín nkehe nixín.

Kjaxín ntábro ch'án káxin:

— Ikjían tíha káxin tíha mé palabra chaxín la chrókuítekáván kaín tíha.

⁶ Ntá chr'éxín chrónka ch'án káxin:

— Kaín nkehe la ó kjuixín tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkebro t'énxín ntá la janhan tsojtahá sín tí ntá its'i sín mé tí ntá tjanjón kjuachón la ninkehó ts'ixínkiéhya sín tíha. ⁷ Tí nkebro tsjacha tsítóehya tí janhan la ts'áyéhe sín kaín tí nkehe tsojtahá sín. La janhan mé ts'óna Dios kuènte sín, a ntá jehe sín mé xjanna ts'íkaán tí jehe sín. ⁸ A ntá tí chojni chrakon la chojni titekakonhya la tí sín chjínxínhin la ko tí chojni ts'oyán kíchó la ko tí chojni tsákja chojni chjin ókjé la ko tí chojni xrinchexroán la ko chojni tínkáchónki nkehe tsíkjangya la ko kaín chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tíó itsi tí yóxin muerte.

Tí Jerusalén nixín

⁹ Ntá ikuí ijnko tí yatoxín ángel chóna tí yatoxín copa tsíkaón tí yatoxín chin tsjixixín tsjasótéxín chojni. Ntá ntábro ch'án káxin:

— Xrákia tsjáqoha tí tjan tsothe tí Kolélo.

¹⁰ Ntá k'uíkuan ijnko nkehe kjuakoxín Nchakuen Dios la ntá tí ángel sákjuíkian ijnko jna jíe la ko noi la kjuakona ch'án tí chjasin jíe tjóá mé tí Jerusalén ts'ínkajínxín nkajní tsíkíxín tí tjen Dios. ¹¹ A ntá tí chjasin a mé tjákiníxín kjuachaxin kuènte Dios. A ntá tjákiní éxí ijnko xro imá náxrjón tje téxí xro jaspe éxí xrosentá tsjehe. ¹² A ntá jnkontajén tí chjasin chóna tjat'ó noi la chóna teyó puerta la jnkojnko ángel jnkojnko puerta tjejónta la ihníé tí teyó tí sín tsík'axrjénxín sín Israel ts'ínixín jnkojnko puerta. ¹³ La iní puerta la nó tjitoxín yaon la iní puerta la nó norte la iní puerta la nó tjiatóxín yaon la iní puerta la nó sur. ¹⁴ Tí tjat'ó tsík'antatjen tí chjasin chóna teyó xro chónatxín fuerza tí tjat'ó la jnkojnko ihníé tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuènte chjasin la ko tí tjat'ó t'ínkáuènxín. ¹⁶ Tí chjasin la cuadrada la tí kjinjínxín jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachqa ch'án tí chjasin mé chóna dos mil dos cientos kilómetro tí kjinjínxín la ko tí ntetoxín la ko tí tonxín la jnkokón. ¹⁷ Ntá tsíkjachqa ch'án tí tjat'ó tsíkjintajín tí chjasin a la chóna sesenta y cuarto metro káxin éxí tjachroa chojni chjasintajni mé xíkaha kjuachqa tí ángel.

¹⁸ Tí tjat'ó tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosentá tjóá. ¹⁹ Tí xro tsík'óna xrankíxixín tsík'antatjen tí tjat'ó la nchónhya xro chjíní náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro nixín la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxín la

cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntja jié kuènte chjasin la tsík'óna jehó chica oro éxi xrosentá tsjehe.

²² Ntaha la k'uikohya ninkehó njnko tí chjasin a, kixin Ìnchéni Dios chóna kaín xin kjuachaxin la jehe ch'án la ko tí Kolélo mé tí njnko ntiha. ²³ Tí chjasin a mé t'ichjánxinhya yaon la ko ni nitjó ts'inkaséyanxin. Kixin tí t'inkaséyanxin la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsikaá la ts'ikonxin tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsík'ehya tí nchakotjin la ntaha la tsokohya ts'ixin tie. ²⁶ Ntaha sátsjiko kaín xin nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'inixin ihnjé tí libro ts'inixin ihnjé tí sín tsaá, mé tí libro chóna tí Kolélo.

22

¹ A ntá tí ángel kjuákona ijnko ntarío tjóá, a ntá tí ntá a mé tjanjon kjuachón. Táha mé t'ikonxinni éxi xrosentá la mé k'uaxrjexin tí trono kuènte Dios la ko tí Kolélo. ² A ntá jnkosiné tí calle tjetoan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroan tsitoxén jina tí nación síin ntiha. ³ La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí káré Dios la ko tsochóna sín ihnjé ch'án tí totjen sín. ⁵ Ntiha la tsokohya ts'ixin tie la tí sín síin ntiha la t'ichjánxinhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxin sín ntiha la ko tsochóna sín kjuachaxin kuènte Dios jnkochrixin.

Tí itsi Ìnchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxin la chrókuitekákónhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnjé ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsqnhen.

⁷ —Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhan la ko k'uikuán tíha. A ntá chr'éxin kjuixin kuinhan la ko k'uikuán tíha ntá kjuak'éxian toch'ian chrínki toté tí ángel kixin xikaha kjuákona la ntá chrókuikosáyaha ch'án. ⁹ A ntá jehe ch'án ntáchro ch'án kixin:

—Xikahya sích'e kixin janhan kjaxin t'aha xra Dios éxi tí jaha xikaha la ko éxi tí sín kichúa mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuikosáyehé.

¹⁰ Kjaxin k'uetuanna ch'án kixin:

—Chrókuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jinahya ája nohe sín ch'e sín tí jinahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjinhin Dios la naxá chrókuich'e xikaha la ko tí nkexro tsikjinchetjóá Dios la naxá jina chrók'uejó sín chrókuitekaon sín tí jehe ch'án.

¹² —Chaxin tjoka ts'inka janhan la ts'inkakian tí nkehe tsotjohará jnkojnkorá kixin nkexrí tí xra chujch'erá. ¹³ Janhan mé tí xrankixixin la ko tí tsjixixin la janhan mé tí saxoin la ko tí tsjixixin éxi tí letra xrankixixin A la ts'ixixin Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tochjinehe sín tí nta tjanjon kjuachón kixin jina ts'ixenxin sín tí puerta kuènte chjasin. ¹⁵ A ntá ntója tsitqhe tí chojni jínahya kuitekakohya la ko tí chojni nchexroan la ko tí sín chóna nchónhya chojni chjin la ko tí chojni tjáya la ko tí chojni tinkáchónki tí nkehe tsíkjanqoya la ko tí chojni tóxrjinhin xrich'ia.

¹⁶ —Janhan Jesús mé ichr'an tí ángel kuèntana kixin tsochéna kaín njnko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkáséyan. ¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxin ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé ąntsí sinčekjasóte tí jehe sín tsoníhi sín éxí nixja tí libro i. ¹⁹ ą ntá jnkojín nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnjé tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ ą ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ;Xrákiá. Inchéni Jesús!

²¹ Inchéni Jesucristo mé sincheyaonrá kaín rá. Amén.